

# 001 太上洞玄靈寶宿命

## 因緣明經<sup>①</sup>

經名：太上洞玄靈寶宿命因緣明經。撰人不詳，約出於南北朝或隋唐。《靈寶經目》著錄未出。一卷。底本出處：《正統道藏》洞玄部本文類。

爾時太上道君宴景太霞之上，喻諸侍真曰：天地之大德曰元道，天地之寶德曰始道，天地之係德曰人道。三道合德，寶化隱存，虛無之元，皇化之先。女媧蛇軀，伏羲麟身，陰陽混沌，造化未分。三聖相禪，五帝造端，道成德就，吉凶部分。光化敷流，漸生因緣，善惡之符，變動已然。太古淳朴，風教易因。中古漸偽，害賊滔天，表信不行，違道本源。禹德治明，監水之勳，爲舜所舉，治勞山川，開通四瀆，

濟度萬民，生受禪遜，歿治鐘山。太陰宮主，明監水官，天授寶符，過溺乃全。三寶之法，於斯昇化，善哉善哉，道乃宣焉。

道君曰：吾道高妙，幽顯易通，隨善而化，降致寶文。後世轉惡，篤無信言，相與流滯，深誤子孫，死遭三徒五苦，痛忍難言。每深念之，善惡當分，善德不修，橫罹罪怨。子勤修齋，永求得脫，身度諸災，長保歡欣，得順教化，隆泰可言。

道君曰：吾憂念將來，生死罪福，宿命所纏，積善乃慶，福報自然，有道德之精，得之亦仙度也。

尹生稽首曰：善哉善哉。今受戒文，宣流無親。堯存有舜禹，何等宿命，何等因緣，生而聖知，享祚永延，治水之勞，功見世間。餘有何故，屯否悴然。復何苦惱，楚痛不歡。復何厚德，乃爲天人。有何陰德，剋定飛仙，不遭八難，保度子孫。今以叩頭流涕，請知因緣。

道君曰：善哉，善哉。子之所問

甚是。來世之戒，子可具說。吾戒宿命因緣，生死罪福，灼灼甚明，惟願後世明承教化，天道無親，唯與善人。慎之，慎之。說如吾言。

道君曰：三界無上大道，神化一切，勉度羣輩，普濟衆生，得度五濁之世，功可言乎。今五毒方至，驅除天下逆惡，分別賢善，恐子墮落惡中，後生畜生中，爲之哀痛，痛當奈何。

道君曰：當爾之時，君臣相伐，無善無惡，無大無小，無尊無卑，無師無友，悉受橫禍，身死名滅，萬無一遺。生不修德，遭此凶災。內懷嫉妬，無有順慈，更相誹謗，相視亂迷，如此之人，墮落地獄餓鬼之中。生取一時之榮，不勤修福，防後世生臭惡，爲人所困辱，屠剥痛酷，當可言乎。

尹生問曰：後生有劫數之殃，以何法訓之。實念群生，是可哀可憐，皆得善報者，由有大功，得生善緣，死離三塗五苦之中，長升福堂，衣食自然，可謂善哉善哉矣。

尹生曰：如聖君之言，請問人生

有何因緣，得生仙貴，可願可樂。復何因緣，得生凡常人中。復何因緣，得生地獄之中，苦痛難言。復何因緣，得生奴婢之中，爲人所憎，苦惱不歡。復何因緣，得生賢貞好人之中，身口香潔，爲人所宗。復何因緣，生羸醜人中，恒受憎辱，觸行不善。復何因緣，得生出優遊，爲人所貴，常得供養，所願從心。如是之行，唯願告悟解脫之源，善得濟度，長受福珍，如此隆泰，苦病不嬰。

道君曰：諦聽吾戒，思吾苦言，今爲汝曹，具說要妙。其德之應，事唯有六。一者慈心不殺羣生，養活萬物，一切濟度，令得安全。二者愛念賢良，不行盜心，唯欲布施，濟卹窮貧。三者執心貞潔，專念精進，棄遠聲色，不犯法戒。四者誠信敦篤，不妄欺人，謹口肆過，不爲貪濁。五者不妄醉酒，干穢清賢。六者執心畏敬，躬信有道。行此六事，得生天人之上，優遊飛仙，衣食行厨，爲人所尊，得爲師友。爾時之慶，道常頌曰：

不殺得長壽，無痛常離苦。一切

受天位，身安得所怙。不盜常清貴，自然錢財聚。七寶爲宮殿，歡樂當安人。不淫則不亂，身體常潔清。所生當端正，行德自聰明。不欺口氣香，言語常忠貞。所說出元道，談論使功成。滴酒不過口，無有謬誤事。常願見華實，得使天人侍。壽終昇天堂，二十五神迎。萬福自來降，光影恒煌煌。

道君曰：次復六事，得生人中。何謂六事，一者布施救困窮，心念恒苦少。二者持戒精進，不犯十惡。三者忍辱含容，不妄宣言。四者勸化愚頑，趣令敬慎。五者一心奉法，慈仁盡忠。六者好生惡殺，不妄爲非。行此六事，得生人中，富貴常遂，所向如願，施布廣大，後世得生人王，萬國所宗。德行如此，道乃頌曰：

布施得大福，錢財自然來。所生常尊貴，傳世受歡欣。持戒常敦敬，奉受於九尊。精敬不犯惡，保得身長存。忍辱謙下人，嗔怒不形口。罵詈忍不應，祿壽常自然。精進不怠懈，念道常得真。所行合於道，壽終爲天人。念

真心不退，忠信不妄言。供養諸道德，所生無艱艱。能行此六善，輒得生爲人。面色端且正，自然成貴身。

道君曰：復有惡緣七醜，死入地獄，被考億劫，無有極已。何謂七醜。一者不忠不孝，毀辱道尊，夭身傷殘，死落地獄中，被考數萬年。二者虛引鬼神，罵詈善人，身被灾考，嬰羅可言。三者毀壞神堂，不敬三尊，身被重責，楚痛在身。四者多疑少信，謂無鬼神，顛倒無道，裸穢三光，身嬰諸苦病，恒繫天牢間，動與百惡會，生子輒跛殘，夭墮地獄中，萬年被惡患。五者骨血至不親，孔懷相侵賊，謗誣於鬼神，濁慢不清潔，酷不信中真，以此被夭折，終不得命年，死落地獄中，苦惱嬰萬端。六者反逆不順法，械囚於父君，尊長不敬愛，口誦惡爲先，形骸被屠剥，夭折不塞愆，後生被虎傷，殃流逮子孫。七者疽癩乃嫉妬，逮戾好強梁，咎惡不離身，遭逢被灾殃，死入地獄中，萬劫落鑊湯。惡事如此，道爲頌曰：

慳貪不布施，私竊不養親。藏財

貪妄貴，不救老窮人。妻子及下使，不衣視饑寒。端坐守財物，歿爲餓鬼殘。身不見飽足，苦毒生瘡癩。東西乞不得，家族悉滅殫。造作弄口舌，生死被剥殘。洋銅灌其口，拔舌過身半。沃口強令咽，入腹腸胃爛。生時不念善，死死被塗炭。疽惡輕凌人，被考數萬年。罪畢復身出，便爲下賤人。元惡好殺害，盜竊反強梁。形殘入地獄，萬劫被灾殃。

道君曰：又有五惡，生出畜生中。一者犯戒竊盜，負債拒捍不還。二者姪愛內親，不敬天地。三者枉橫無罪人，輕誓不顧法。四者見彼善不好，聞惡輒相從，即身被酷考，灾殃流子孫。五者欺上罔下，事君不忠，處位乘勢，枉罔忠良，酷好屠鱠，生剥牛羊，痛毒不可忍，內懷如豺狼。凡此五事，死落地獄中，出生爲畜生中，生被五毒害，賢愚一是同。罪報如斯，道乃頌曰：

常行盜竊心，負債不肯還。殺生好田獵，非法作俗緣。執行無誠信，小言輒恚嗔。罪惡不自覺，好邪不信真。

後生墮畜生，牛羊驢馬類。臭惡恒負重，如是考萬劫。內淫犯干逆，雷電所搥殺。死沒地獄中，倒懸被火粹，弄口謗真道，後生極苦難。洋銅灌其口，常抱饑且寒。

道君曰：又有五善，得爲尊貴，衆人所敬，奉行天下，人心所歸。何謂五善。一者布施無愛惜，恩惠普流通，周濟救窮急，功德揚八方。二者供奉上道，敬事三寶。三者端意思齋戒，靜柔和謙下於人。受人曲辱，不求申論，道乃念己，上名昇仙。五者好鍊道氣，明信天文，委心任道，道恒在身，洞知九宮，剋成地仙，塵俗羣愚，謂之不然。於是之驗，道乃頌曰：

布施常不惜，普濟令衆安。即身受清貴，世得見昇仙。供養好道德，齋戒見真靈。靜念心不懈，七祖昇天堂。忍辱無嗔怒，生輒得正端。學問好道德，得爲人中尊。行心能柔和，謙節下於人。救急度危厄，剋得延命長。敬奉靈寶戒，明練九宮道。委心信虛无，壽與天同老。

道君曰：又有五惡，常生卑賤人，爲人奴婢。何謂五惡。一者驕慢，不敬二親。二者剛悖，心不恭恪。三者放蕩，不禮三尊。四者自專，盜竊在身。五者負債逃隱，違捍不還。是爲五事，常生下賤人，爲人奴婢，搥打困辱，恒抱饑寒，生不充足。道乃頌曰：

正有癡患者，驕慢於二親。無有恭恪心，後生卑賤人。見寶不恭禮，違突於長者。執行不慈孝，後生爲奴婢。衣食仰於人，驅打無晝夜。受生恒苦惱，死不得免度。放蕩好姪色，至不信鬼神。後生受饑凍，所作逢艱難。負債反呪詛，貧苦罵先祖。後生作牛羊，爲人所困苦。

道君曰：又有好德五事，常見善緣，得生人中，口氣香潔，身心常安，爲人所敬貴。何謂五德。一者至心好信真，生不欺罔人。二者誦經行道，專心無二。三者勤心齋戒，好樂仙道。四者教人行善，不爲非惡。五者敦篤慈仁，周濟急難，多信不惑。斯之五善，並生貴人之中，口氣香潔，不妄犯非，

心意常安，爲人所宗奉，終身不貧，積功之久，漸見天仙。善報如斯，道以頌曰：

篤信好生道，慈心常哀哀。素餐身清潔，化後登天機。恭奉於三寶，不驕於二親。至誠不欺詐，是行忠孝人。謹口不妄語，行心周一切。勸人遠罪目，念法不違戾。周窮救危急，功德甚重大。增筭益年壽，終身受欣泰。結友行義弘，相敬如父母。閉惡揚善德，孝悌感神靈。

道君曰：又有六不祥，所行既無道，惡穢墮在身，形骸卑且悴，出輒逢饑寒。何謂六惡。一者期弄無誠信。二者至不信真道，聞法輒欲壞，素無好善心，恒被誹謗言。三者不念善戒，調弄真人。四者穢辱長老，所行多端。五者毒心凶悖，讒佞善人。六者心恒念惡，無端恚怒，得生賤人，常抱飢寒，給人驅使，晝夜無寬，身體臭惡，常不得欣。道乃以頌曰：

欺詐好妄語，常無至信誠。心口自相反，恒受穢辱形。悖惡好誹謗，死

落地獄中。洋銅灌其口，苦毒長冥冥。酒酒好罵詈，不信有鬼神。鐵鉤著其舌，痛惱當可言。脫當生人中，口氣常腥臭。爲人所憎惡，衆災所尅注。惡念常遭逢，所向遇罪刑。無端橫嬰羅，痛毒靡不經。死復還地獄，後身作畜生。輾轉五毒中，愁惱慘辱生。

道君曰：又有五德，所生得好處，常在道法中，衆人所敬重，所言無不從，積善滿五百，後身見仙公。次生得作道士，好學多開通。上願五德者，上與希微同。一德樂仙真，奉敬事三寶，詠經行法輪，周遊還劫老，上香存虛无，昇度離苦惱。二德仙賢遊，功德爲身保。三德願人中，明鍊三元道。四德頌上清，不食自充飽。五德遊虛空，罪滯一時倒。善報如斯，道以頌曰：

奉敬歸三德，宣化勸善事。願得見仙賢，長得真人至。願撫一切賢，與我等無異。吾我心平蠲，練練道百誠。晝夜勤修學，智慧爲天人。尹生西地化，普使知道真。篤好思仙真，積念無不同。先願昇虛遊，上與希微通。積

善不厭多，布惠勿恡惜。功德感仙真，自然降丹藥。

道君曰：隨世行是法，復出三界道，法一爲上清，飛化契洞真。次爲無量劫，分身號如來，根同化小異，後教極邊夷。十方法中國，難化是成西，道吾爲老氏，携導尹生時，口吐五千言，練胞一十年，周天乃三匝，會合全福基。唯我道行善，見而深慎之。

太上洞玄靈寶宿命因緣明經

①明經：當作「妙經」。

②案此處當有缺文，缺第四條目。

(郭清點校、王卡復校)

# 002 太上洞玄靈寶導引 三光妙經

經名：太上洞玄靈寶導引三光妙經。撰人不詳。約出於南北朝。靈寶經目著錄未出。原本一卷。《正統道藏》分作二種經書，即《太上導引三光寶真妙經》；《太上導引三光九變妙經》，收入洞真部本文類。今合并為一。

## 太上導引三光寶真妙經

元始天尊時在赤明世界丹靈國土、朱鳳城中明霞宮內，御三炁丹華之殿。與諸天大聖、至真尊神、五老帝君、金闕後聖、三清無極、上聖高尊、東華太皇、西靈金母、三十二天帝、八十一天君、玄和靈妃、太明玉女、無鞅之

衆，校定天元，制御洪災，考量劫運，按三元籙籍，度一切人。三界九幽，沈潛異類，萬靈稱泰，咸覩法門。地獄寧閑，八陰開朗，積痼蠲蕩，罪錄銷除，預覩天光，咸蒙大慶。十方無極世界，承道威神，倏忽之間，僉然俱至。時東西極遠之處，忽有奇光上照太空，來入法會，九色艷逸，灼爍鮮華，焯焯流芳，不可熟視。即有天君天帝、真人仙人、玉女玉童、天人眷屬，皆項生圓象，足步蓮花，充塞二方，一時齊至。既入法會，禮覲天尊，燒香散華，供養朝謁。法事既畢，各退本方，左右二邊，依位而坐。於是太真舉信，神王仗幡，天樂空歌，萬種互作，震駭天地，喜樂難言。法會未悉，普德妙行真人，即從座起，安徐雅步，直詣道前。稽首作禮，上白天尊：今此會中有東西二衆，形神挺特，相好端嚴，進止雍容，奇光焯爍，宗修何法？師稟何人？以何因緣，證斯品位，願賜告勅，教所未聞。

天尊告曰：普德妙行，汝證位上真，多歷年劫，聖尊品緒，真果階修，內

外高卑，淺深行業，咸所洞見，无不該詳。二衆所修，亦當備悉。汝所發問，當是此會之內，有小聖童真，及初仙之人，所習未廣，見彼來衆，默有所疑。汝又欲顯彼所修，昭示後學，故此發問，廣爲來生，開演妙門，作大法利。此心弘普，不可思議。復坐諦聽，當爲汝說。夫大道之化，先乎無先，非有非無，至幽至寂，難聲離見，非色非空，微妙玄深，不終不始，將示開化，漸布生成。於太虛冥寂之中，先分道炁，稍見形兆，清濁有殊，清浮爲天，濁厚爲地。二炁分判，一陰一陽，陰陽至精，結爲日月。陽極於九，日含九芒，陰極於十，月分十彩。月以躁速，日以舒遲，月以裁成，日以生化。二象遞代，照燭於中，萬物感通，生化於下。又以二象結炁，日月分精，散爲星辰，止爲川嶽，五星五斗，交絡於天，以正紀綱，以司幽顯。物無巨細，咸所繫焉。日月星中，各有宮闕，君臣宰執，統領職司。仙秩神官，罪福僚掾，各於其內，莫不備陳。其中官僚，或稟炁挺生，或積功

遷署，或隨其修學，證品所居，總名三光，應道運化。皆有自然玉字，八會之文，藏祕三宮，未傳於世，今將授汝，下化群生。此名導引三光，服御真炁，依科盟受，按法修行，一十八年，功成得道，炁與道合，壽命無窮。二方之人，久修此道，功充德備，形神合昇，居三光宮中，爲三光寮屬，形儀炳灼，光耀紛敷，與衆神仙，居然有異。若累功不息，隨品轉遷，自三光下仙，亦登聖位，與三洞修稟，事事玄同。此法在億劫之前，渺漭之際，與玉清聖教，俱化諸天，一觀三乘，等無有別，勿於大道，生疑惑心。

即命典經上卿、衛真太史、監盟統錄，玄上職僚，玉司四宮、典領官屬，開晨華寶殿，奉丹景玉函，出三光上篇，八天玉字、九變八會，微妙洞章，依四極明科，授普德妙行。諸天在位，萬聖列儀，三界四司，咸所瞻覩。於是普德妙行北向長跪，稽首受經，天地萬靈，齊聲稱善。即以白玉爲簡，黃金刻書，藏於鬱儀之臺，結璘之閣。四百年內，

得傳三人。

受經既悉，天尊告曰：二方來衆，日月諸仙，導御三光，證成真品，神形朗徹，映照會中。以衆所觀，甚爲奇妙，然於諸方應化，一切真仙光相之中，未爲殊特，勿生疑貳，自喪善功。須臾即見元始天尊，及人天大衆，各於身相，生微妙光，洞朗太空，混融天地，種種色相，變化無窮。如七寶山，照百千日，與日月衆，混合無殊。天尊告言普德妙行曰：大道玄功，生化萬物，隨形稟受，各有淺深，垂法應機，開度一切，隨機修習，亦有等差。萬化不同，歸於一道，道本無二，歸於一元，契道之時，亦忘此一。不拘物我，不繫有無，湛寂希夷，離言絕想，劫運有盡，此道常存，安處妙門，是名得道。說是語已，勅命天駕，歸還大羅。會衆神仙、天真上聖、三界內外、洞了真詮，稽首太虛，作禮而退。

太上導引三光寶真妙經

### 太上導引三光九變妙經


玄古高聖、無極天真、玄和靈妃、太明玉女，與三十二天天君天帝、天真大神、靈寶真人、諸天仙衆、仙童玉女、日月真官、列曜星辰、無鞅僚掾，及日月星內遊散仙民，常以太陽正炁之時，正月、三月、五月、七月、九月、十一月，左引日華，右引月魂，仰朝萬聖，俯挹列星，奉修定光真常之道。一名流精，一名澤嬰，三名法炁，四名陽玉，五名雲華，六名道仙，七名九變，八名定光。此道都畢，歸真於常。隨炁昇淪，與道玄會，不生不滅，億劫常存。諸天真仙，咸所翫習。日君月帝，星宿真官，亦所常契，真常之道，莫不歎服。元炁吐天流精，噲漱澤嬰，引伸法炁，導御陽玉，灌鍊雲華，化演導仙，超騰九變，身生奇彩，手回定光，躍影太空，登度三界，永出生死，飛昇上宮。

五老大聖，諸天真人，導引三光流精。時一百二十五真人，誦詠法契八

會之音。

妙道分一炁，炁中分陰陽。凝化日月星，燦然流三光。九華含九道，八色怡八方。煥爛洞真體，流精歸太芒。下生淵泉宮，上列无何鄉。縱體復飛跡，欵然都相忘。七寶流精結，混沌雜華芳。嚙服九雲散，此樂殊未央。

道引流精，誦契畢，服三符。




五老大聖、諸天真人，導引三光澤嬰。時一百二十五真人，誦詠法契八會之音。

玄絕九炁中，澤嬰生太无。鬱儀

煥陽谷，結璘耀天衢。五星流寶光，斗極回乾樞。飛炁鬱勃散，嚙御方踟躕。超跡天寶階，鍊芝服華敷。炁布萬神備，舉形昇太虚。


導引澤嬰，誦契畢，服三符。



五老大聖，諸天真人，導引三光法炁。時一百二十五真人，誦詠法契八會之音。

浩晶生法炁，氤氳凝玄中。兩曜共澄澈，五緯交相通。三光煥已明，寶炁盈三宮。帝鄉會九老，嚙服百骸豐。金華照光鏡，身與日月同。念道上聖前，萬劫壽无窮。


導引法炁，誦契畢，服三符。



五老大聖，諸天真人，導引三光玉陽。時一百二十五真人，誦詠法契八會之音。

玉陽正真炁，妙道三景分。玄和唱靈音，八會敷瓊文。五老冥丹宅，飄飄乘景雲。大聖諸天衆，駕龍飲玉津。三五定生籍，遊戲太上賓。華光朗无际，携手朝帝晨。


導引玉陽，誦契畢，服三符。



五老大聖，諸天真人，導引三光雲華。時一百二十五真人，誦詠法契八會之音。

引炁鬱羅外，九芒結雲華。七神高上道，三景耀朱霞。捧香服晨精，功滿解世羅。鍊化塵結盡，億齡不為多。落籍三界庭，結友太上家。御景控玄耳，八極何足賒。

導引雲華，誦契畢，服三符。



五老大聖，諸天真人，導引三光導仙。時一百二十五真人，誦詠法契八會之音。

自然至真道，妙極玄中玄。萬天朝玉陛，九老參華軒。三光有靈炁，所度惟聖賢。勤行導仙業，嚙御吞華根。神形合三象，渺渺歸本元。皇鳥翔十天，飛舉不顧還。


導引導仙，誦契畢，服三符。



五老大聖，諸天真人，導引三光九變。時一百二十五真人，誦詠法契八會之音。

迢迢三天上，落落九玄臺。真童採芝集，玉女持花回。天寶挹仙客，俯仰升瑤階。天河處東井，寶炁縈空來。嚙納漱瓊津，兆劫不復衰。矯首三清路，振衣何樂哉。

導引九變畢，誦契後，服三符。




五老大聖，諸天真人，導引三光定光。時一百二十五真人，誦詠法契八會之音。

至矣上真道，妙哉靈寶章。吸景導五星，嚙嗽存華芒。流精灌百體，皎晶凝雪霜。洞違照內外，滓塵都消亡。豐肌不復老，契此名定光。永宴太明

館，斯為不夜鄉。攝跡歸本根，九轉凝真常。

導引定光，誦契畢，服三符。



服符揖真，導體嚙炁，二景混合，

三光會同。我身超然，與光合一。應則歸有，寂則入無。逍遙太虛，隱見無極。以此自在，為自然至真之人，亦名元始五老靈寶三十二天定光真人也。常與十極大聖、十華高真，四天帝王、五老上帝，侍從千真萬神、三界官屬，遊息洞陽之闕，絕觀臺中，即有皇曾天、和陽天、孔昇天、霄度天，四天各有三十六國，國有君臣土地，人民帝王，人鳥崑侖，玉京金闕，玄都五嶽，神仙靈司，大澤名山，八威神獸，飛沈遊息，鱗介羽毛，丘林蠢動，化成七寶，映照四方。法鼓駭空，靈音合奏，歌詠太上八會之章。有進學初仙，得預觀聽，昇綱飛紀，從紀旋斗入魁，嚙元吞精，融神合妙，手回六度，足躡九華，縱身凌

虛，與景混一，永登妙道，後天常存也。

玉完天、恭華天、皇崖天、元洞天，有浩陽玄元之臺，為九變真人所登之處。

何童天、宗飄天、極風天、妙成天，有玉華之林凌雲之臺，為導仙真人所登之處。

平育天、皇笏天、孝芒天、禁上天，有玄昌寶臺，為雲華真人所登之處。

文舉天、堂耀天、翁重天、常融天，有回陰太真之臺，為玉陽真人所登之處。

七耀天、端靖天、江由天、騰勝天，有雲結靈飛之臺，為法炁真人所登之處。

越衡天、恭慶天、上揲天、梵度天，有無量極觀之臺，為澤嬰真人所登之處。

濛翳天、極瑤天、曇誓天、賈弈天，有十絕九華之臺，為流精真人所登之處。

凡此八臺，皆三光真仙、四天天王，與諸真人登覽遊宴之所，天文玉



書，鏤玉爲字，在此臺之內，名曰元始八天符命。導引者尊奉吞餌，變質易形，鍊有待之軀，入无形之道。修行之時，別室存道，清齋絕塵，以六陽之月，六炁宣和，天真感應。或於靈丘仙嶽之上，澄神注念，立可上通。若在民間，諒難感徹也。

元始天尊、太上大道君、太上老君、五老上帝、四極真王、九天帝君、四天王、三十二天帝、太上十華真人、三元君統錄衆聖，一切尊神，每以此月，導引三光。三光開玄，正炁宣行，天度均正，八風无愆。即命真仙官衆，朝謁四方老子天尊，隨念顯形，神光煜耀，以助日月之明。修此道者，當於齋室，旦夕存禮，以冀感通也。

東方八天老子天尊：  
太玄老子總御天尊。  
玄微老子八明天尊。  
方御老子流霞天尊。  
太丹老子三真天尊。  
黃庭老子太乙天尊。  
北帝老子太皇天尊。

天威老子顥炁天尊。  
紫極老子回真天尊。  
南方八天老子天尊：  
龜山老子五炁天尊。  
圓行老子寶鍊天尊。  
導通老子侍極天尊。  
千誦老子回道天尊。  
四明老子隨生天尊。  
雲慶老子雲光天尊。  
遊玄老子上京天尊。  
寶量老子元老天尊。  
西方八天老子天尊：  
太衡老子普度天尊。  
九炁老子真化天尊。  
黃老老子度生天尊。  
紫陽老子養神天尊。  
定相老子飛行天尊。  
高業老子觀天天尊。  
飛黃老子九光天尊。  
大法老子玄極天尊。  
北方八天老子天尊：  
回元老子三素天尊。  
六合老子北度天尊。

紫度老子流嬰天尊。  
興相老子真炁天尊。  
勸化老子至容天尊。  
百仙老子延真天尊。  
兵刃老子五炁天尊。  
九變老子清靜天尊。  
元始天尊，統億劫以來諸天大聖、十方應化老子天尊，脩洞天靈寶導引齋法。當以正月、三月、五月、七月、九月、十一月，六陽齋月，正中之時，隨方敬禮老子天尊。首體投地，三十二禮，散華燒香，晝日祈請，然燈靜念，夜以朝懺，一心丹竭，萬善咸臻，至真太神，當自冥應，克得通感，度學道之人也。

太上洞玄靈寶導引三光妙經

(王卡點校)

# 003 洞玄靈寶二十四生圖經

經名：洞玄靈寶二十四生圖經。  
撰人不詳，約出於晉代。係古  
《靈寶經》之一。一卷。底本出  
處：《正統道藏》正一部。

三部八景自然神真，大運告期，赤明開光，三景朗煥，五劫始分。元始天尊與十方大聖、至真尊神、無極太上大道君、飛天神人、玄和玉女、無鞅之衆，同坐南浮洞陽上館栢陵舍中，清談虛泊，素語自然，靈音十合，妙唱明真，諸天歡樂，日月停輪，星宿默度，九天徊關，河海靜波，山嶽吞煙，龍麟涌躍，人神歡焉。

是時太上無極道君稽首作禮，上白天尊：今日侍座，太漠開昏，無極世界，一切見明，法音遐振，澤被十方。

過泰因緣，劫劫化生，輪轉聖位，任居總真。方當胤御，剖判六天，考劫理運，料度種民，推筭長夜，檢實三官，役勞任重，歡戚難言。敢附靈風，自響披心。前與元始天王，俱於長桑碧林園中，聞天尊普告大聖尊神云：洞玄天文靈寶玉奧，有三部八景神二十四圖，上應二十四真，中部二十四炁，下鎮二十四生。靈章璀璨，妙絕空洞，觀之者九天書名，金簡記錄，生死得仙。來運當促，三五傷喪，萬兆短命，流曳八難，風刀痛體，五苦備嬰，淪於長夜，不覩三光，無知受對，任運生死，撫之傷襟，痛感人神。今大慈道行，惠澤普隆。伏願天尊有以哀矜，直據玄科，教所未聞，使未見者見，未成者成，福流一切，億劫得恩。如蒙訓授，輒當承神鼓風，因流揚波，清蕩三界，肅檢衆魔，部正六天，馘斬羣邪，安國育民，使陰陽寧休，明化既興，道暢太虛。

於是天尊仰面含笑，有青黃赤三色之炁，從口中而出，光明徹照，十方內外，無幽無隱，一劫曉明。金書紫

字，玉文丹章，文彩煥爛，在三炁之中，三八景神，二十四真，各從千乘萬騎，在空玄之上，輔衛靈文，諸天日月，流灑華光，衆津交灌，飛香八纏，萬聖稱慶，一時禮真。

天尊告曰：今生一切，歡樂難譬，傾心露蘊，情無遺隱。當依玄科，七寶鎮靈，黃金爲壇，授子神真之道。道尊法重，四萬劫一行，下世度人。祕則真降，泄則禍臻。今以相告，明識之焉。太上道君欣喜歡歎，唯北向而立聽命。

天尊登命九光太真、十方飛天、侍經玉郎，披九光玉蘊，出金書紫字玉文丹章，三部八景二十四圖，盛以白玉立空之案，九色之巾，雲精空結飛文錦蓋，懸覆經上。諸天大聖、無極天尊、飛天神王、三天真人，同時監盟，燒香散華，誦詠靈章，旋行宮城，繞經三周，一依舊典俯仰之格自然威儀，付度道君。法事粗畢，三景復位，衆真退席。是時赤明天中，是男是女，莫不範德，歸心信向，皆得度世。

上皇元年九月二日，後聖李君出

游西河，歷觀八門。值元始天王乘八景玉輿，駕九色玄龍，三素飛雲，導從羣仙，手把華幡，獅子白鶴，嘯歌邕邕，浮空而來，同會西河之上。李君稽首請問天王。昔蒙訓授天書玉字二十四圖，雖得其文，未究妙章，雖有圖讚，而無其像，修之菴藹，妙理難詳。今遇天尊，喜慶難言。願垂成就，極其道真。

於是天王口吐洞玄內觀玉符，以授於君，使清齋千日，五香熏體，東向服符。子形神備見，自當洞達，諸疑頓了。李君稽首，奉承教旨，具依天儀，長齋千日，東向服符，三八景神，並見身中。金書玉字，二十四圖，空中而明，文彩光鮮，洞徹無窮，羅縷自然。是時即命主圖上仙而畫圖焉。金書紫字玉文丹章，於此成音。自南極上元九光太真王夫人、東西二華、南北真公、五嶽神仙、清虛真人，所受真文，並是後聖所書圖像，而各係之焉。

真人沐浴東井圖 上部第一真炁  
天河灌東井，石景水母精。圓光拂靈曜，玄輝應高明。元始披長夜，天

人逐月生。沐浴蘭池上，龍負長綆餅。金童灑香華，玉女流五星。冠帶灌玉津，鍊度五仙形。體香萬神降，乘景登高明。

神仙五嶽真形圖 上部第二真炁  
妙哉元始道，五靈敷真文。上開龍漢劫，煥爛三景分。十部飛天書，安鎮五帝神。靈嶽承玄宮，鬱勃吐寶雲。上有不死炁，植牙練五仙。玉芝玄中渙，體潔自然熏。精思高靈降，交游上帝君。

通靈訣精八史圖 上部第三真炁  
三景吐靈華，晃朗八門開。中有智慧神，被服飛天衣。八史通靈炁，玉符洞精微。寶雲映玉字，巨獸振天威。煥爛八會宮，紛紛靈人飛。精思招真炁，五符生光輝。八景策玉輿，登空入紫微。

神仙六甲通靈圖 上部第四真炁  
靈宮飛天女，六真宴常湯。抱日負明月，仰躡三晨光。通靈究幽微，洞觀朗十方。招致自然厨，五芝六府昌。變化鍊萬神，分形改正容。乘虛步玄

都，高奔入空洞。時降金霄人，祥襟三素房。携契策飛蓋，逍遙昇玉京。

神仙九宮紫房圖 上部第五真炁  
紫房映高清，宮室互相扶，香煙繞日月，飛天翳太虛。至真大聖衆，蕭條流羽書。開度諸天劫，塵沙始一周。九五固靈運，長保天地居。精思安能遠，紫宮生我軀。


元始太清圖 上部第六真炁  
太清無邊際，青炁鬱紫微。靈風迅七寶，琳樹何萋萋。紫鳳鳴長條，龍麟交橫馳。太上觀十方，諸天整法衣。旋行繞宮城，三周長夜開。若能思靈炁，自得乘景飛。

神仙真道混成圖 上部第七真炁  
蕩蕩元始初，混沌炁未分。三色無中化，迴合若景雲。幽冥生真景，煥落敷靈文。豁朗開長夜，植立天地根。自然妙真炁，淳淳炁常存。運通大九界，開度諸天門。

神仙西昇保錄圖 上部第八真炁  
乘運迅靈炁，駕景昇西宮。之造玉那國，萬乘來相從。神魔稽首伏，天

王並歸降。分金範正法，世恭道德王。故施正真炁，別號度一方。是時有道士，稱曰福德堂。


靈寶神仙圖曰：上部八真神圖，以洞天元始之炁，化生自然八景上真，鎮在人身中上元宮中，致上元生炁。精心內思八年，八真見形，千乘萬騎，運致景雲，載人上昇。




上真一景腦神，名覺元子，字道都。色白，一景玉符，上元洞天炁部一景神。




上真二景髮神，名玄父華，字道衡。色玄，二景玉符，上元洞天炁部二景神。



上真三景皮膚神，名通衆仲，字道連。色黃，三景玉符，上元洞天炁部三景神。




上真四景目神，名虛監，字道童。五色，四景玉符，上元洞天炁部四景神。



上真五景項髓神，名靈謨蓋，字道周。色白，五景玉符，上元洞天炁部五景神。



上真六景膂神，名益歷轉，字道柱。白玉色，六景玉符，上元洞天炁部六景神。



上真七景鼻神，名仲龍王，字道微。青黃白三色，七景玉符，上元洞天炁部七景神。



上真八景舌神，名始梁時，字道岐。色赤，八景玉符，上元洞天炁部八景神。

靈寶神仙圖曰：八景神真玉符，上元洞天自然之炁，以部上部八景神真，鎮在人身上元宮中。服之八年，八景見形，爲己通達幽微之事，洞觀自然，坐在立亡，降致天仙，千乘萬騎，雲輿羽蓋，白日登晨。

神仙通微靈化圖 中部第一真炁 大道妙無像，運炁凝高玄。結空

自然生，靈化表三神。朝引五星精，中喻日中津。夕餐黃月華，復卧煉五仙。變景隨空化，倏忽立自然。

神仙耀靈九天圖 中部第二真炁 簫簫九天炁，清澄自高玄。慶雲翳重虛，金闕承紫煙。中有太極宮，道君羅大千。青林彌乘梵，十方並飛天。南陵福德堂，四座皆清賓。散華慶我願，逍遙無波津。

神仙九變圖 中部第三真炁 妙化因空感，專思通至靈。上食九天炁，導引五雲精。三日練萬神，一日九變形。脫身遊九域，遨戲三界庭。乘景望太素，靈風迴綠輶。飛煙繞十絕，黃旛召萬靈。諸天降羽儀，鬱鬱入太清。

神仙常存圖 中部第四真炁 默念招幽真，專靜神自歸。漏盡外應消，正炁自夷微。積感妙真降，六府生光輝。玄會空相和，萬神應響齊。八景扶雲蓋，煥落迅羽儀。載我大梵外，逍遙乘空飛。

神仙守一養身圖 中部第五真炁  
導引九天炁，摩手慰身形。遏斷  
邪魔逕，瑩飾練光明。鳳翔通真炁，龍  
超制萬靈。辰旦衆真會，養身覺神生。  
淡泊還守一，靜思正炁庭。神備景自  
飛，高昇入上清。

神仙守神合景圖 中部第六真炁  
泥丸置魄營，中元抱一宮。丹田  
三靈府，混合百神王。三關統九天，呼  
喻日月光。五星奧玄滋，流演六胃充。  
靜思萬炁歸，神安形亦芳。三部八景  
真，携我入太空。長居天地劫，無始永  
無終。

神仙寂嘿養精守志圖 中部第七真炁  
清朝餐五星，專思守泥丸。正中  
嚙日光，嘿念絳府熏。黃昏導月精，灌  
溉丹田君。三真生一景，變化形自分。  
一見萬神歸，攝炁景高奔。上登日月  
宮，出入觀八門。龍漢無終劫，妙哉靈  
文。


芝英玉女圖 中部第八真炁  
飄飄散靈炁，芝英隨風迴。諸天  
灑香華，日月灌靈暉。玉女槃金槃，槃

槃乘空飛。仰思真顏降，嚙芝五神開。  
導引光明徹，萬劫體不衰。

靈寶神仙圖曰：中部八景神圖，  
以元始靈寶洞玄之炁，化生自然中部  
八景中真，鎮在人身中中元宮中，致中  
元生炁。精思八年，八真見形，千乘萬  
騎，運致神仙，羽蓋玉輿，飛行太虛。



中真一景喉神，名百  
流放，字道通。九色，  
洞玄中元一景真符部  
一景神。




中真二景肺神，名素  
靈生，字道平。色白，  
洞玄中元二景真符部  
二景神。




中真三景心神，名煥  
陽昌，字道明。色赤，  
洞玄中元三景真符部  
三景神。




中真四景肝神，名開  
君童，字道清。色青，  
洞玄中元四景真符部  
四景神。




中真五景膽神，名龍  
德拘，字道放。色青，  
黃綠洞玄中元五景真  
符部五景神。



中真六景左腎神，名  
春元真，字道卿。五  
色衣，洞玄中元六景  
真符部六景神



中真七景右腎神，名  
象他无，字道王。白  
黑色，洞玄中元七景  
真符部七景神。



中真八景脾神，名寶  
无全，字道騫。正黃  
色，洞玄中元八景真  
符部八景神。

靈寶神仙圖曰：靈寶洞玄中元八  
景真符，以部中部八景神真，鎮在人身  
中中元宮中。服之八年，中元八景見  
形，爲己通靈達神，洞觀八方，神芝玉  
漿五炁玄芽，身生光明，神仙乘騎，飛  
行太空。

神仙六陰玉女圖 下部第一真炁  
靈飛秀太極，玉女翠朱瓊。窈窕

飛空出，飄飄乘虛生。玄妙自然炁，六陰安常形。遐念希良會，仰盼降六丁。携景金房內，嫵婉娉精誠。玄感自相求，豈期形與名。變化因歎發，應響神自靈。

神仙九元導仙圖 下部第二真炁

玉清耀玄都，十聖迴紫微。神仙披雲出，紛紛流羽衣。香花隨風散，十天乘雲飛。丹霄映輕蓋，日月灌靈暉。仰思妙真降，神感因心歸。

神仙導引圖 下部第三真炁

鬱鬱五雲芝，玄暉吐玉光。凝津洞靈府，徘徊日月宮。五色理高真，流精灌十方。呼吸不覺疲，飛天並金容。導引餐靈炁，玄哺六胃充。精思易致感，安坐觀空洞。

神仙洞中洪保圖 下部第四真炁

澄心理太玄，蕭蕭羣真居。下治諸名山，洞房清且虛。五色煥日月，列號衆仙儲。上統紫微宮，總錄天寶書。中有守一士，精思待開圖。五老監魔試，心端情自舒。身度水火宮，名入九天廬。善哉有今人，遂得乘景輿。

神仙變化隱測圖 下部第五真炁  
變化空无中，五行兆身形。洞思自然炁，金木水火精。土為隱測府，六戊合景庭。玉女變衣裳，老壯應響生。細入毫釐裏，大包山嶽靈。種植通神草，身與八史並。萬化隨所欲，逍遙可娛情。


神仙採芝開山圖 下部第六真炁  
靈嶽鬱嵯峨，翠阜陵景霄。五芝秀玄嶺，仙草茂霜條。上有採芝人，披服乘羽緇。靈洞萬劫開，一煥諸天交。得妙安覺厭，恒沙如一朝。

神仙明鏡圖 下部第七真炁  
妙鏡生威光，流煥照八景。洞徹方圓內，通真別鬼精。自然觀重陰，照耀諸天形。伏魔致神仙，變化入紫庭。


神仙無極太一圖 下部第八真炁  
煥爛第一真，身生龍鳳文。威光洞九天，爛照大囿圓。上御諸天炁，總為萬仙君。巍巍至道宗，洛洛大梵門。

靈寶神仙圖曰：下部八真神圖，以元始靈寶洞神之炁，化生自然下部八景下真，鎮在人身中下元宮中，致下

元生炁。精思八年，下元八真使千乘萬騎，運致神仙，羽蓋載人，俱昇七寶林中。




下真一景胃神，名同來育，字道展。黃色，洞神下元一景靈符部一景神。




下真二景窮腸神，名兆騰康，字道還。黃色，洞神下元二景靈符部二景神。



下真三景大小腸神，名蓬送留，字道厨。赤黃色，洞神下元三景靈符部三景神。



下真四景胸中神，名受厚勃，字道虛。九色，洞神下元四景靈符部四景神。



下真五景胸膈神，名廣瑛宅，字道冲。白色，洞神下元五景靈符部五景神。

靈符部六景神。

下真六景兩脇神，名辟假馬，字道成。赤白色，洞神下元六景靈符部六景神。

靈符部七景神。

下真七景左陽神，名扶流起，字道圭。青黃白色，洞神下元七景靈符部七景神。

靈符部八景神。

下真八景右陰神，名包表明，字道生。青黃白色，洞神下元八景靈符部八景神。

靈寶神仙圖曰：靈寶洞神下元八

景靈符，以部下部八景神真，鎮在人身下元宮中。服之八年，下元八景，見形為人，養精補氣，鍊髓凝真，身生光澤，八景雲輿，載人飛行。

玉清七寶神仙圖 總三八部真炁

簫簫三清上，凝真大羅天。瓊林翠玄臺，日月煥靈軒。飛天梵綠炁，駕景乘紫煙。鬱鬱披雲出，紛紛靈寶仙。逍遙七寶林，五色煥金銀。振響衆真會，靈歌慶萬神。精思三八景，超步登寶門。

赤明元年正月上寅一日午時，天

光四朗，紫雲迴天，慶霄八會，靈風掃塵，日月吐輝，五星灌津，天地溟滓，流灑香華，河海靜默，山嶽藏煙。五苦咸解，三徒赦魂，九幽息對，長友盟緣，聾盲總明，六痾並痊。地藏發泄，金玉露形，白骨生炁，腐骸還人，龍麟踴躍，鳥獸飛欣，三界長樂，人神歡焉。是日大慶，萬劫更新。元始天尊延寶瓊堂，於赤明天中南霍之丘丹靈洞宮，敷羅五色，黃金為壇，白玉薦地，七寶告靈，傳度洞玄金書紫字玉文丹章自然靈圖，二十四真三部八景神、天仙飛仙、神仙地仙、兵馬乘騎，以授太上無極道君。依威儀玄格明真科文，度人九萬九千九百九十九萬億，宿有金名，列字諸天，應仙之人。大運之中，當收文還上大羅七寶玄臺紫微宮中。今三洞御運，靈寶下教，先度並昇仙官空缺，應須中賢以充諸天某帝真人某嶽先生。臣某昔以某年某月某日，於某州縣某所，從某嶽先生某君一作黑帝真人、北嶽先生，臣君昔以戊戌年七月十三日，於中天南洞，從中嶽先生

楊君受法，應更度人。先有宿名金格玉

錄合真之人，以補天官，周歷八極，從虛无中來。今有宿命某帝真人某，本命某甲子，命屬某天，某帝領籍，某月生，某天一作赤帝真人某，本命丙午，命屬丹天南帝，領籍七月生，素天度炁，骨命合真，應補洞玄第二品仙。今歲在某甲子某月某日，於某天中，依先師舊科明真大法，身登黃壇，七寶鎮靈，五綵澄仙，授度虛无自然靈寶洞玄金書紫字玉文丹章，二十四真三八部圖，神仙乘騎，某受大法，三界所舉，靈寶保明，身度五道，名入紫宮金簡玉錄，位登真仙。出入遊行，天儀羽服，雲輿龍駕，三七色節，前導鳳歌，後從天鈞，五帝啓道，太極參軒。仙童玉女，散華燒香，寶蓋垂陰，營衛遊行。某炁齊洞玄，身登仙宮，宜遵俯仰，檢口慎行，棄諸色累，斷絕外想，靜心夷嘿，專志在法，不得混濁，更相招引，以亂其炁。每行大慈，廣度一切，國安民豐，四海寧一，七祖父母，皆得昇度，身入光明，早生人中。大劫運終，同飛上清，逍遙金闕，七寶林中。其未仙度，

備法七年，天炁備足，天告玄應，合仙之人，當依科以傳。自無靈感，四萬劫勿宣。愆盟負信，中泄靈文，生死父母，長閉幽夜，身謝五道，風刀萬劫，不敢有言，依科奉誠，生死同仙，衆行一如，明真之文。

九炁天中空  
洞青靈魔王

姓  
諱  
靈

保度某嶽先生某三界上仙品

九炁天中空  
洞赤靈魔王

姓  
諱  
靈

保度某嶽先生某三界上仙品

中嶽高皇天空  
洞黃靈魔王

姓  
諱  
靈

保度某嶽先生某三界上仙品

七炁天中空  
洞白靈魔王

姓  
諱  
靈

保度某嶽先生某三界上仙品

五炁天中空  
洞黑靈魔王

姓  
諱  
靈

保度某嶽先生某三界上仙品

洞天上部一景腦府真神道都神仙  
洞天泥丸飛天上仙官，各二十四人。

洞天上部二景髮府真神道衡神仙  
洞天通精飛天上仙官，各二十四人。

洞天上部三景皮膚府真神道連神仙  
洞天羽儀飛天上仙官，各二十四人。

洞天上部四景目府真神道童神仙

洞天洞明飛天上仙官，各二十四人。

洞天上部五景頂髓府真神道周神仙  
洞天凝真飛天上仙官，各二十四人。

洞天上部六景膂府真神道柱神仙  
洞天通津飛天上仙官，各二十四人。

洞天上部七景鼻府真神道微神仙  
洞天惠氣飛天上仙官，各二十四人。

洞天上部八景舌府真神道岐神仙  
洞天智慧飛天上仙官，各二十四人。

洞天上部八景洞天飛行三五直靈神仙  
飛天度命功曹，各八十一人。

洞天上部八景洞天飛行三五直靈神仙  
正一昇玄功曹，各八十一人。

洞天上部八景洞天飛行三五直靈神仙  
直使生炁功曹，各八十一人。

洞天上部八景洞天飛行三五直靈神仙  
靈寶青帝功曹，各八十一人。

洞天上部八景洞天飛行三五直靈神仙  
靈寶赤帝功曹，各八十一人。

洞天上部八景洞天飛行三五直靈神仙  
靈寶黃帝功曹，各八十一人。

洞天上部八景洞天飛行三五直靈神仙  
靈寶白帝功曹，各八十一人。

上部八景洞天飛行三五直靈神仙

靈寶黑帝功曹，各八十一人。  
上部八景洞天飛行自然靈寶神仙

通真度命使者，各八十一人。  
上部八景洞天飛行自然靈寶神仙

傳事飛天使者，各八十一人。  
上部八景洞天飛行自然靈寶神仙

香官生炁使者，各八十一人。  
上部八景洞天飛行自然靈寶神仙

洞明青帝使者，各八十一人。  
上部八景洞天飛行自然靈寶神仙

洞明赤帝使者，各八十一人。  
上部八景洞天飛行自然靈寶神仙

洞明黃帝使者，各八十一人。  
上部八景洞天飛行自然靈寶神仙

洞明白帝使者，各八十一人。  
上部八景洞天飛行自然靈寶神仙

洞明黑帝使者，各八十一人。  
上部八景洞天飛行自然靈寶神仙

監齋直事，各三十二人。  
上部八景洞天飛行自然靈寶神仙

典齋直事，各三十二人。  
上部八景洞天飛行自然靈寶神仙



傳言書佐，各三十二人。

上部八景洞天飛行自然靈寶神仙  
奉香書佐，各三十二人。

上部八景洞天飛行自然靈寶神仙  
監功謁者，各三十二人。

上部八景洞天飛行自然靈寶神仙  
校事謁者，各三十二人。

上部八景洞天飛行自然靈寶神仙  
侍香玉童，各三十二人。

上部八景洞天飛行自然靈寶神仙  
散華玉女，各三十二人。

上部三十二天洞天八景飛行自然  
靈寶虛无直符，各三十二人。

上部三十二天洞天八景飛行自然  
靈寶上元直符，各三十二人。

上部三十二天洞天八景飛行自然  
靈寶日月直符，各三十二人。

上部三十二天洞天八景飛行自然  
靈寶傳言直符，各三十二人。

上部三十二天洞天八景飛行自然  
靈寶奏事直符，各三十二人。

上部三十二天洞天八景飛行自然  
靈寶直齋直符，各三十二人。

上部三十二天洞天八景飛行自然  
靈寶侍香直符，各三十二人。

上部三十二天洞天八景飛行自然  
靈寶五帝直符，各三十二人。

上部三十二天洞天一景靈寶陽宮  
丙寅鍊腦生魂飛天上真，各三千二百  
人。

上部三十二天洞天二景靈寶陰宮  
丙申鍊髮生魂飛天上真，各三千二百  
人。

上部三十二天洞天三景靈寶陽宮  
丙子鍊膚飛天上真，各三千二百人。

上部三十二天洞天四景靈寶陰宮  
丙午鍊目飛天上真，各三千二百人。

上部三十二天洞天五景靈寶陽宮  
丁亥鍊髓飛天上真，各三千二百人。

上部三十二天洞天六景靈寶陰宮  
丁巳鍊脊飛天上真，各三千二百人。

上部三十二天洞天七景靈寶陽宮  
丁卯鍊鼻飛天上真，各三千二百人。

上部三十二天洞天八景靈寶陰宮  
丁酉鍊舌生尸飛天上真，各三千二百  
人。

太玄上部洞天八景自然靈寶神仙  
度命天仙兵馬，各九億萬騎。

太玄上部洞天八景自然靈寶神仙  
度命地仙兵馬，各九億萬騎。

太玄上部洞天八景自然靈寶神仙  
度命飛仙兵馬，各九億萬騎。

太玄上部洞天八景自然靈寶神仙  
度命真人兵馬，各九億萬騎。

太玄上部洞天八景自然靈寶神仙  
度命神人兵馬，各九億萬騎。

太玄上部洞天八景自然靈寶神仙  
度命日月兵馬，各九億萬騎。

太玄上部洞天八景自然靈寶神仙  
度命星宿兵馬，各九億萬騎。

太玄上部洞天八景自然靈寶神仙  
度命九宮兵馬，各九億萬騎。

太玄上部洞天八景自然靈寶神仙  
度命五帝兵馬，各九億萬騎。

太玄上部洞天八景自然靈寶神仙  
度命五嶽兵馬，各九億萬騎。

太玄上部洞天八景自然靈寶神仙  
度命三河四海兵馬，各九億萬騎。

太玄上部洞天八景自然靈寶神仙

度命諸天督仙兵馬，各九億萬騎。

太玄上部洞天八景自然靈寶神仙

滅度生尸兵馬，各九億萬騎。

太玄上部洞天八景自然靈寶神仙

開度更生兵馬，各九億萬騎。

太玄上部洞天八景自然靈寶神仙

金龍騎，各九億萬衆。

太玄上部洞天八景自然靈寶神仙

飛龍騎，各九億萬衆。

太玄上部洞天八景自然靈寶神仙

游龍騎，各九億萬衆。

太玄上部洞天八景自然靈寶神仙

神龍騎，各九億萬衆。

太玄上部洞天八景自然靈寶神仙

驛龍騎，各九億萬衆。

太玄上部洞天八景自然靈寶神仙

雲龍騎，各九億萬衆。

太玄上部洞天八景自然靈寶神仙

龍虎騎，各九億萬衆。

太玄上部洞天八景自然靈寶神仙

龍騰騎，各九億萬衆。

太玄上部洞天八景自然靈寶神仙

度命九炁天官青牙玉女，各九千人。

太玄上部洞天八景自然靈寶神仙

度命三炁天官朱丹玉女，各三千人。

太玄上部洞天八景自然靈寶神仙

度命七炁天官明石玉女，各七千人。

太玄上部洞天八景自然靈寶神仙

度命五炁天官玄滋玉女，各五十人。

太玄上部洞天八景自然靈寶神仙

度命中央黃上天官靈紐玉女，各萬二千人。

太玄上部洞天八景自然靈寶神仙

東嶽青帝主圖飛天吏，各二十四人。

太玄上部洞天八景自然靈寶神仙

南嶽赤帝主圖飛天吏，各二十四人。

太玄上部洞天八景自然靈寶神仙

中嶽黃帝主圖飛天吏，各二十四人。








太玄上部洞天八景自然靈寶神仙

西嶽白帝主圖飛天吏，各二十四人。

太玄上部洞天八景自然靈寶神仙

























北嶽黑帝主圖飛天吏，各二十四人。

太玄上部洞天八景自然靈寶神仙

洞玄中部一景喉府真神道通神仙	洞玄中部二景肺府真神道平神仙	洞玄中部三景心府真神道明神仙	洞玄中部四景肝府真神道清神仙	洞玄智聖飛天上仙官，各二十四人。
----------------	----------------	----------------	----------------	------------------

右四字一行合八行，皆有文角，黑書。

洞玄中部五景瞻府真神道放神仙  
洞玄定志飛天上仙官，各二十四人。

洞玄中部六景左腎府真神道卿神  
仙洞玄生神飛天上仙官，各二十四人。

洞玄中部七景右腎府真神道王神  
仙洞玄生仙飛天上仙官，各二十四人。

洞玄中部八景脾府真神道騫神仙  
洞玄守虛飛天上仙官，各二十四人。

中部八景洞玄飛行三五直靈神仙  
飛天度命功曹，各八十一人。

中部八景洞玄飛行三五直靈神仙  
正一昇玄功曹，各八十一人。

中部八景洞玄飛行三五直靈神仙  
直使生炁功曹，各八十一人。

中部八景洞玄飛行三五直靈神仙  
靈寶青帝功曹，各八十一人。

中部八景洞玄飛行三五直靈神仙  
靈寶赤帝功曹，各八十一人。

中部八景洞玄飛行三五直靈神仙  
靈寶黃帝功曹，各八十一人。

中部八景洞玄飛行三五直靈神仙  
靈寶白帝功曹，各八十一人。

中部八景洞玄飛行三五直靈神仙

靈寶黑帝功曹，各八十一人。

中部八景洞玄飛行自然靈寶神仙  
通真度命使者，各八十一人。

中部八景洞玄飛行自然靈寶神仙  
傳事飛天使者，各八十一人。

中部八景洞玄飛行自然靈寶神仙  
香官生炁使者，各八十一人。

中部八景洞玄飛行自然靈寶洞明  
青帝使者，各八十一人。

中部八景洞玄飛行自然靈寶洞明  
赤帝使者，各八十一人。

中部八景洞玄飛行自然靈寶洞明  
黃帝使者，各八十一人。

中部八景洞玄飛行自然靈寶洞明  
白帝使者，各八十一人。

中部八景洞玄飛行自然靈寶洞明  
黑帝使者，各八十一人。

中部八景洞玄飛行自然靈寶神仙  
監齋直事，各三十二人。

中部八景洞玄飛行自然靈寶神仙  
典齋直事，各三十二人。

中部八景洞玄飛行自然靈寶神仙  
傳言書佐，各三十二人。

中部八景洞玄飛行自然靈寶神仙  
奉香書佐，各三十二人。

中部八景洞玄飛行自然靈寶神仙  
監功謁者，各三十二人。

中部八景洞玄飛行自然靈寶神仙  
校事謁者，各三十二人。

中部八景洞玄飛行自然靈寶神仙  
侍香玉童，各三十二人。

中部八景洞玄飛行自然靈寶神仙  
散花玉女，各三十二人。

中部三十二天洞玄八景飛行自然  
靈寶虛无直符，各三十二人。

中部三十二天洞玄八景飛行自然  
靈寶上元直符，各三十二人。

中部三十二天洞玄八景飛行自然  
靈寶日月直符，各三十二人。

中部三十二天洞玄八景飛行自然  
靈寶傳言直符，各三十二人。

中部三十二天洞玄八景飛行自然  
靈寶奏事直符，各三十二人。

中部三十二天洞玄八景飛行自然  
靈寶直齋直符，各三十二人。

中部三十二天洞玄八景飛行自然

靈寶侍香直符，各三十二人。

中部三十二一天洞玄八景飛行自然靈寶五帝直符，各三十二人。

中部三十二天洞玄一景靈寶陽宮丙辰鍊喉飛仙上真，各三千二百人。

中部三十二天洞玄二景靈寶陰宮丙戌鍊肺飛仙上真，各三千二百人。

中部三十二天洞玄三景靈寶陽宮丁丑鍊心飛仙上真，各三千二百人。

中部三十二天洞玄四景靈寶陰宮丁未鍊肝飛仙上真，各三千二百人。

中部三十二天洞玄五景靈寶陽宮戊寅鍊膽飛仙上真，各三千二百人。

中部三十二天洞玄六景靈寶陰宮戊申鍊左腎飛仙上真，各三千二百人。

中部三十二天洞玄七景靈寶陽宮戊子鍊右腎飛仙上真，各三千二百人。

中部三十二天洞玄八景靈寶陰宮戊午鍊脾飛仙上真，各三千二百人。

太玄中部洞玄八景自然靈寶神仙度命天仙兵馬，各九億萬騎。

太玄中部洞玄八景自然靈寶神仙度命地仙兵馬，各九億萬騎。

太玄中部洞玄八景自然靈寶神仙

度命飛仙兵馬，各九億萬騎。

太玄中部洞玄八景自然靈寶神仙

度命真人兵馬，各九億萬騎。

太玄中部洞玄八景自然靈寶神仙

度命神人兵馬，各九億萬騎。

太玄中部洞玄八景自然靈寶神仙

度命日月兵馬，各九億萬騎。

太玄中部洞玄八景自然靈寶神仙

度命星宿兵馬，各九億萬騎。

太玄中部洞玄八景自然靈寶神仙

度命九宮兵馬，各九億萬騎。

太玄中部洞玄八景自然靈寶神仙

度命五帝兵馬，各九億萬騎。

太玄中部洞玄八景自然靈寶神仙

度命五嶽兵馬，各九億萬騎。

太玄中部洞玄八景自然靈寶神仙

度命三河四海兵馬，各九億萬騎。

太玄中部洞玄八景自然靈寶神仙

度命諸天督仙兵馬，各九億萬騎。

太玄中部洞玄八景自然靈寶神仙

滅度生尸兵馬，各九億萬騎。

太玄中部洞玄八景自然靈寶神仙

開度更生兵馬，各九億萬騎。

太玄中部洞玄八景自然靈寶神仙

金龍騎，各九億萬衆。

太玄中部洞玄八景自然靈寶神仙

飛龍騎，各九億萬衆。

太玄中部洞玄八景自然靈寶神仙

遊龍騎，各九億萬衆。

太玄中部洞玄八景自然靈寶神仙

神龍騎，各九億萬衆。

太玄中部洞玄八景自然靈寶神仙

驛龍騎，各九億萬衆。

太玄中部洞玄八景自然靈寶神仙

雲龍騎，各九億萬衆。

太玄中部洞玄八景自然靈寶神仙

龍虎騎，各九億萬衆。

太玄中部洞玄八景自然靈寶神仙

龍騰騎，各九億萬衆。

太玄中部洞玄八景自然靈寶神仙

度命九炁天官青牙玉女，各九千人。

太玄中部洞玄八景自然靈寶神仙

度命三炁天官朱丹玉女，各三千人。

太玄中部洞玄八景自然靈寶神仙

度命七炁天官明石玉女，各七千人。

太玄中部洞玄八景自然靈寶神仙  
 度命五炁天官玄滋玉女，各五千人。  
 太玄中部洞玄八景自然靈寶神仙  
 度命中央黃上天官靈鈕玉女，各萬二  
 千人。

太玄中部洞玄八景自然靈寶神仙  
 東嶽青帝主圖飛天吏，各二十四人。

太玄中部洞玄八景自然靈寶神仙  
 南嶽赤帝主圖飛天吏，各二十四人。

太玄中部洞玄八景自然靈寶神仙  
 中嶽黃帝主圖飛天吏，各二十四人。

太玄中部洞玄八景自然靈寶神仙  
 西嶽白帝主圖飛天吏，各二十四人。

太玄中部洞玄八景自然靈寶神仙  
 北嶽黑帝主圖飛天吏，各二十四人。

赤	明	開	真
洞	天	炁	和
五	丹	炁	光
藏	不	枯	

洞玄下部七景左陽府真神道主神  
 仙洞靈滅跡飛天上仙官，各二十四人。

洞玄下部八景右陰府真神道生神  
 仙洞靈騰虛飛天上仙官，各二十四人。

洞玄下部八景洞靈飛行三五直靈神仙  
 飛天度命功曹，各八十一人。

洞玄下部八景洞靈飛行三五直靈神仙  
 正一昇玄功曹，各八十一人。

洞玄下部八景洞靈飛行三五直靈神仙  
 直使生炁功曹，各八十一人。

洞玄下部八景洞靈飛行三五直靈神仙  
 靈寶青帝功曹，各八十一人。

洞玄下部八景洞靈飛行三五直靈神仙  
 靈寶赤帝功曹，各八十一人。

洞玄下部八景洞靈飛行三五直靈神仙  
 靈寶黃帝功曹，各八十一人。

洞玄下部八景洞靈飛行三五直靈神仙  
 靈寶白帝功曹，各八十一人。

洞玄下部八景洞靈飛行三五直靈神仙  
 靈寶黑帝功曹，各八十一人。

洞玄下部八景洞靈飛行自然靈寶神仙  
 通真度命使者，各八十一人。

洞玄下部六景兩脇府真神道成神  
 仙洞靈解形飛天上仙官，各二十四人。

洞玄下部一景胃府真神道展神仙  
 洞靈通元飛天上仙官，各二十四人。

洞玄下部二景窮腸府真神道還神  
 仙洞靈洞微飛天上仙官，各二十四人。

洞玄下部三景大小腸府真神道厨  
 神仙洞靈隱空飛天上仙官，各二十四  
 人。

洞玄下部四景胸中府真神道虚神  
 仙洞靈開明飛天上仙官，各二十四人。

洞玄下部五景胸膈府真神道冲神  
 仙洞靈蔽日飛天上仙官，各二十四人。

洞玄下部六景兩脇府真神道成神  
 仙洞靈解形飛天上仙官，各二十四人。

洞玄下部七景左陽府真神道主神  
 仙洞靈滅跡飛天上仙官，各二十四人。

洞玄下部八景右陰府真神道生神  
 仙洞靈騰虛飛天上仙官，各二十四人。

傳事飛天使者，各八十一人。

下部八景洞靈飛行自然靈寶神仙

香官生炁使者，各八十一人。

下部八景洞靈飛行自然靈寶神仙

洞明青帝使者，各八十一人。

下部八景洞靈飛行自然靈寶神仙

洞明赤帝使者，各八十一人。

下部八景洞靈飛行自然靈寶神仙

洞明黃帝使者，各八十一人。

下部八景洞靈飛行自然靈寶神仙

洞明白帝使者，各八十一人。

下部八景洞靈飛行自然靈寶神仙

洞明黑帝使者，各八十一人。

下部八景洞靈飛行自然靈寶神仙

監齋直事，各三十二人。

下部八景洞靈飛行自然靈寶神仙

典齋直事，各三十二人。

下部八景洞靈飛行自然靈寶神仙

傳言書佐，各三十二人。

下部八景洞靈飛行自然靈寶神仙

奉香書佐，各三十二人。

下部八景洞靈飛行自然靈寶神仙

監功謁者，各三十二人。

校事謁者三十二人。

下部八景洞靈飛行自然靈寶神仙

侍香玉童，各三十二人。

下部八景洞靈飛行自然靈寶神仙

散花玉女，各三十二人。

下部三十二天洞靈八景飛行自然

靈寶虛无直符，各三十二人。

下部三十二天洞靈八景飛行自然

靈寶上元直符，各三十二人。

下部三十二天洞靈八景飛行自然

靈寶日月直符，各三十二人。

下部三十二天洞靈八景飛行自然

靈寶傳言直符，各三十二人。

下部三十二天洞靈八景飛行自然

靈寶奏事直符，各三十二人。

下部三十二天洞靈八景飛行自然

靈寶直齋直符，各三十二人。

下部三十二天洞靈八景飛行自然

靈寶侍香直符，各三十二人。

下部三十二天洞靈八景飛行自然

靈寶五帝直符，各三十二人。

下部三十二天洞靈一景靈寶陽宮

己亥煉胃生華飛天上真，各三千二百人。

下部三十二天洞靈二景靈寶陰宮

己巳煉窮腸生津飛天上真，各三千二百人。

下部三十二天洞靈三景靈寶陽宮

己酉煉大小腸生液飛天上真，各三千二百人。

下部三十二天洞靈四景靈寶陰宮

己卯煉胸中生光飛天上真，各三千二百人。

下部三十二天洞靈五景靈寶陽宮

戊辰鍊胸膈生仙飛天上真，各三千二百人。

下部三十二天洞靈六景靈寶陰宮

戊戌煉兩脇生神飛天上真，各三千二百人。

下部三十二天洞靈七景靈寶陽宮

己丑煉左陽生命飛天上真，各三千二百人。

下部三十二天洞靈八景靈寶陰宮

己未煉右陰生命飛天上真，各三千二百人。

下部三十二天洞靈八景靈寶陰宮

己未煉右陰生命飛天上真，各三千二百人。

下部三十二天洞靈八景靈寶陰宮

己未煉右陰生命飛天上真，各三千二百人。

下部三十二天洞靈八景靈寶陰宮

己未煉右陰生命飛天上真，各三千二百人。

下部三十二天洞靈八景靈寶陰宮

太玄下部洞靈八景自然靈寶神仙  
度命天仙兵馬，各九億萬騎。

太玄下部洞靈八景自然靈寶神仙  
度命地仙兵馬，各九億萬騎。

太玄下部洞靈八景自然靈寶神仙  
度命飛仙兵馬，各九億萬騎。

太玄下部洞靈八景自然靈寶神仙  
度命真人兵馬，各九億萬騎。

太玄下部洞靈八景自然靈寶神仙  
度命神人兵馬，各九億萬騎。

太玄下部洞靈八景自然靈寶神仙  
度命日月兵馬，各九億萬騎。

太玄下部洞靈八景自然靈寶神仙  
度命星宿兵馬，各九億萬騎。

太玄下部洞靈八景自然靈寶神仙  
度命九宮兵馬，各九億萬騎。

太玄下部洞靈八景自然靈寶神仙  
度命五帝兵馬，各九億萬騎。

太玄下部洞靈八景自然靈寶神仙  
度命五嶽兵馬，各九億萬騎。

太玄下部洞靈八景自然靈寶神仙  
度命三河四海兵馬，各九億萬騎。

太玄下部洞靈八景自然靈寶神仙

度命諸天督仙兵馬，各九億萬騎。

太玄下部洞靈八景自然靈寶神仙  
滅度生尸兵馬，各九億萬騎。

太玄下部洞靈八景自然靈寶神仙  
開度更生兵馬，各九億萬騎。

太玄下部洞靈八景自然靈寶神仙  
金龍騎，各九億萬衆。

太玄下部洞靈八景自然靈寶神仙  
飛龍騎，各九億萬衆。

太玄下部洞靈八景自然靈寶神仙  
遊龍騎，各九億萬衆。

太玄下部洞靈八景自然靈寶神仙  
神龍騎，各九億萬衆。

太玄下部洞靈八景自然靈寶神仙  
驛龍騎，各九億萬衆。

太玄下部洞靈八景自然靈寶神仙  
雲龍騎，各九億萬衆。

太玄下部洞靈八景自然靈寶神仙  
龍虎騎，各九億萬衆。

太玄下部洞靈八景自然靈寶神仙  
龍騰騎，各九億萬衆。

太玄下部洞靈八景自然靈寶神仙  
度命九炁天官青牙玉女，各九千人。

太玄下部洞靈八景自然靈寶神仙  
度命三炁天官朱丹玉女，各三千人。

太玄下部洞靈八景自然靈寶神仙  
度命七炁天官明石玉女，各七千人。

太玄下部洞靈八景自然靈寶神仙  
度命五炁天官玄滋玉女，各五千人。

太玄下部洞靈八景自然靈寶神仙  
度命中央黃上天官靈鈕玉女，各萬二千人。

太玄下部洞靈八景自然靈寶神仙  
東嶽青帝主圖飛天吏，各二十四人。

太玄下部洞靈八景自然靈寶神仙  
南嶽赤帝主圖飛天吏，各二十四人。

太玄下部洞靈八景自然靈寶神仙  
中嶽黃帝主圖飛天吏，各二十四人。

太玄下部洞靈八景自然靈寶神仙  
西嶽白帝主圖飛天吏，各二十四人。

太玄下部洞靈八景自然靈寶神仙  
北嶽黑帝主圖飛天吏，各二十四人。

元	黃
生	中
自	理
尊	炁

洞	養	桃	白	大	胃
神	育	康	元	府	腕
往	朱	德	公	俱	幽
還	丹	淳	子	存	通

右四字一行，合八行，皆有文角，黑書。

洞玄靈寶二十四生圖經

①今：原誤作「金」，據文義改。

(郭清點校、王卡復校)



# 004 太上洞玄靈寶飛行三界通微內思妙經

經名：太上洞玄靈寶飛行三界通微內思妙經。撰人不詳，約出於南北朝或隋唐。靈寶經目著錄未出。一卷。底本出處：《正統道藏》太平部。

太極真人曰：太上靈寶飛行三界隱存上道，能長齋修行，百日之中，諸疾皆除，顏色光明，白髮復黑，齒墮更生。行之二百日，髓滿骨填，腸化為筋，癥灸滅去，拘蹇屈伸，暗痾盲聾，能令見聞。行之三百日，出入無間，役使鬼神，騰身虛空，足躡浮雲，恣意所行，去彼崑崙。行之三年，得道成真，遊宴八極，驂駕麒麟，白虎援據，青龍掩塵。行之五年，招遊三界，位登仙王。茲言之妙，道由人弘，豈其遊說，寔存弘之，

道存人亡。大哉，太上靈寶之韞囿乎。

太極真人曰：靈寶太真景陽丹陽感陽登天玉符，太上祕之玉京山金闕上宮。非有仙相，位應為仙王、仙公、仙卿者不傳。子若遇之，將宿命玄會，已標名上清，齋信告盟而受也。

太極真人曰：師弟子先各齋三十日，又對齋三日，每令惡盡，推求虛靈，亦當有感於當時，然後書符佩服而行事焉。

太極真人曰：服食鍊炁吐納精，存神靜默帶太真。

太極真人曰：入室三七見真靈，變化立亡易短長，移源塞流服景陽。

太極真人曰：水鍊八石定黃金，煎沙騰奏吞丹陰。

太極真人曰：思心神道存仙遊，期跡希想服感陽。

太極真人曰：符虛渺茫望明嶽，願仰看雲思天澤，欲昇雲虛銜登天。

太極真人曰：道成盡佩凌華嶽，上造天階乃頓服。服食鍊炁吐納精，存神靜默帶太真，入室三七見真靈。

靈寶太真陰

靈寶定丹陰  
靈寶登天陰

太極真人曰：法用玉囊，請佩之，不得履穢。

太極真人曰：修靈寶飛行三界之道，當以甲子、甲戌、甲申、甲午、甲辰、甲寅之日，入齋堂，東向叩齒，心存曰：蒼林玄象，流水如何，炎火周身，安能知他，道來歸我，冲炁自和。

太極真人曰：修靈寶飛行三界之道，當壬申、壬午、壬辰、壬寅、壬子、壬戌、癸酉、癸未、癸巳、癸丑、癸亥、癸卯之日，入齋堂，北向叩齒，心存曰：願覩天鏡，玄滋玉池，還白使黑，常為嬰兒，神來歸我，五藏相隨。

太極真人曰：修靈寶飛行三界之

道，當以庚午、庚辰、庚寅、庚子、庚戌、庚申、辛未、辛巳、辛卯、辛丑、辛酉、辛亥之日，入齋堂，西向叩齒，心存曰：本子本子，白雲本起，〔白雲本起〕霧合萬里，願靈來歸，留與我使，反覆本運，終而復始。

太極真人曰：修靈寶飛行三界之道，當以丙寅、丙子、丙戌、丙申、丙午、丙辰、丁卯、丁丑、丁亥、丁酉、丁未、丁巳之日，入齋堂，南向叩齒，心存曰：朱雀丹池，天海地河，願得不死，飲食至和，壽均二儀，所期萬多。

太極真人曰：修靈寶飛行三界之道，當以戊辰、戊寅、戊子、戊戌、戊申、戊午、己巳、己卯、己丑、己亥、己酉、己未之日，入齋堂，東向安臥，平枕叩齒，心存曰：天道天道，願得不老，壽比中黃，昇日常蚤，願延其命，與道長久。

太極真人曰：修靈寶飛行三界之道，夫六甲之日，魄遊玄宮，當此之日，念於心中有一神人，被服白光，狀如玉女。

太極真人曰：修靈寶飛行三界之

道，夫六癸之日，魂在膀胱，伏念腎中神人朱光，形象玉童。

太極真人曰：修靈寶飛行三界之道，夫人有五心，其要最密，一名五門子。常念心中若一人，主神仙之元，左手太初，右手太素，左足爲朝，右足爲暮，皆有赤炁。名曰元公，此是五帝之舍。肺爲石室，肝爲蘭臺，心印金，腎印銀。

太極真人曰：修靈寶飛行三界之道，常以立春之日清齋，東向呪曰：東方青牙，服食青牙，飲食朝華。朝華在脣表，因三咽之。

太極真人曰：修靈寶飛行三界之道，常以立夏之日清齋，南向呪曰：南方朱丹，服食朱丹，飲以丹池。丹池在脣內，因三咽之。

太極真人曰：修靈寶飛行三界之道，常以四季之月清齋，向王呪曰：中央黃野，昂昂太山，服食元氣，飲以醴泉。醴泉在舌上懸膺，因三咽之。

太極真人曰：修靈寶飛行三界之道，常以立秋之日清齋，向西呪曰：西

方明石，服食明石，飲以靈液。靈液在齒上，因三咽之。

太極真人曰：修靈寶飛行三界之道，常以立冬之日清齋，北向呪曰：北方玄滋，服食玄滋，飲以玉飴。玉飴在舌下，因三咽之。

太極真人曰：修靈寶飛行三界之道，常以夜半，上思丹池神水、白雲五色炁，出來入玄門，下通腎中三道，上行徑入絳宮，浮遊華蓋，還入泥丸。

太極真人曰：修靈寶飛行三界之道，常以月朔日、五日、十五日、二十五日、甲午、丙午、戊午日，平旦至日中，向日披髮，偃臥瞑目，心存視日若太陽，還歸絳宮，與我合德，俱養絳宮。

於是因念心中有玄蓋，蓋下有日，日中有一人，名曰太乙玉女，小童之身，赤炁周行，繞日三十周，至日中止。

太極真人曰：修靈寶飛行三界之道，當食日之精，常思心中正赤如日，赤炁四布，遍一身體。思念心中有日，日中有玄蓋，蓋下有三人，左爲太初元

先，右爲太乙南極元陽，中爲赤子小

童，左爲玉女老子夫人，常持金盤玉碗，神酒飲我，神丹芝草食之，久久六丁神來到。常以平旦行之，至日中而止。太玄神上入泥丸，赤炁頭中腦，徑入口中，繞口九周止，赤炁下入絳宮，徑至丹田赤炁，與之合并。

太極真人曰：修靈寶飛行三界之道，常食月之精。常念玄光玉女來出神水上正立，白炁在神龜上止，戴大明星，光照身體。夜半行之，至日中止。入於太淵，與太乙合符，靈復來下，人定時，入於弱水中，上崑崙山上，夜半復沐浴丹池中，元炁平行，上神龜上呼吸，名曰元一。晦朔望日時，亦存之，常念腎間有大神龜，文綵五色，狀如總絲，上有玄光，下有神水，腎間白炁繞身一周，左日右月，次於上元。常以晦朔八節之日，呪曰：司錄六丁玉女，削去某死籍，十二大夫皆言，如靈寶大法科令。

太極真人曰：修靈寶飛行三界之道，當食斗之精。常念脾中黃炁，上有北斗七星，黃神玄女，形長三寸，上思

北斗太清七星，黃炁入我口中，下匝一身，混沌合并。

太極真人曰：修靈寶飛行三界之道，當食星之精，太極中央明星之精。常念絳宮小童赤如日，三人併立，太乙赤炁上升泥丸。因念額三星，大如雞子赤如日，赤炁入日與神連，黃精入口至太玄。常以甲午、丙午日，日中時。

太極真人曰：修靈寶飛行三界之道，當以夜半，上思太極斗中有八星，八魁正圓，中有赤衣人，文綵五色，即吾身也。因念絳宮太一小童子，呪曰：三景弟子小兆某，好道長生，上遊三界，凱旋已成。

太極真人曰：修靈寶飛行三界之道，當以甲子、甲戌、甲申、甲午、甲辰、甲寅、乙丑、乙亥、乙酉、乙未、乙巳、乙卯之日，平旦正東向，坐齋堂中，念我身正青肝神老君，青炁上與天連，太清元炁下入身中，思行某炁，周遍一體，至日出後止。

太極真人曰：修靈寶飛行三界之道，當以丙寅、丙子、丙戌、丙申、丙午、

丙辰、丁卯、丁丑、丁亥、丁酉、丁未、丁巳之日，禺中之時，入齋堂俯心，因念心中太一小童，赤如日，一身正赤炁，上與天連。赤炁下入身中，思行赤炁周遍一身，至日中止。

太極真人曰：修靈寶飛行三界之道，當以戊辰、戊寅、戊子、戊戌、戊申、戊午、己巳、己卯、己丑、己亥、己酉、己未之日，食時，入齋堂俯心，因念脾中黃炁上與天連，中黃炁下入身中，思行黃炁周遍一身，至日西時止。

太極真人曰：修靈寶飛行三界之道，當以庚午、庚辰、庚寅、庚子、庚戌、庚申、辛未、辛巳、辛卯、辛丑、辛亥、辛酉之中晡時，入齋堂俯心，因念肺神太和正白白炁上與天連，太始元炁下入身中，思行白炁周遍一身，至日入時止。

太極真人曰：修靈寶飛行三界之道，當以壬申、壬午、壬辰、壬寅、壬子、壬戌、癸丑、癸酉、癸未、癸巳、癸卯、癸亥之日，人定之時，入齋堂俯心，因念弱水黑炁鬱勃上與天連，太玄元炁下

入身中，思行元炁周遍一身，至夜半時止。

太極真人曰：修靈寶飛行三界之道，當行泥丸。常念頭中紫雲出如紫蓋，布之稍稍大，彌於天際，翩翩紫蓋，炁徑入太極中。念絳宮小童、太一玉女凡三人，紫蓋下坐，持玉盤，金盃酌酒，神丹、芝草食之。常存不老，上遊三界，仙皇齋考。

太極真人曰：修靈寶飛行三界之道，當行太極三皇。常念額上有北斗，斗上有三星，狀如連珠，大中雞子，混沌三色。黃精入口，下至絳宮紫房丹田中。精炁正赤，上入目中，九十息止。

太極真人曰：修靈寶飛行三界之道，當行太清之道。常以甲子之日平旦之時，入齋堂靜思心中赤炁從口出，繫齒上根，翩翩綿綿。五色青黃徑入太清中華蓋中，九十息止。常以平明行之至日中止，常念耳中各有一人焉。

太極真人曰：修靈寶飛行三界之道，當行太初。常以月一日、三日、五

日、十五日、二十五日、甲午、丙午、戊午日，平旦入齋堂，東向日，至日中正南坐。亦可被髮俯心，呪曰：太一小童玉女，常居絳宮。瞑目念心中赤炁，上與日精同光，日精赤炁來下，入鼻口中，咽之三九而止。又呪曰：日君太陽，神乎神乎。還歸絳宮，與我合德。俱養絳宮小童。畢。

太極真人曰：修靈寶飛行三界之道，當以月七日、八日、庚申、戊申之日，晡時，食肺之精，入齋堂，念肺中白炁來上，出至口中，咽之三七。畢。

太極真人曰：修靈寶飛行三界之道，當以甲子、癸亥、晦朔望日，夜半時入齋堂，思腎間白炁，從兩腎孔中出雲，上遊華蓋，徑入泥丸，下入涌泉，周遍一身。畢。

太極真人曰：修靈寶飛行三界之道，當行老君。常以甲子、甲寅、壬子、壬寅、丙子、丙寅之日，平旦之時入齋堂，念肝炁正青，從泥丸上出，徑入太清。太清元炁下入其身，思行青炁周遍一身，至食時畢。

太極真人曰：修靈寶飛行三界之道，當以戊辰、戊寅、戊子、戊戌、戊申、戊午之日，入齋堂，念脾中黃炁人正立，形長三寸，黃炁上昇，徑入中極北辰星中。辰星中黃炁下入體中。畢。

太極真人曰：修靈寶飛行三界之道，當以甲子、甲午、晦朔之日，夜半之時，入齋堂，念丹田著臍，方圓六寸，正赤如日。元陽五童炁若怒雲，左青，右白，黃炁在中，中有赤人長九分。白炁覆之，赤炁繞之，黑炁復周其表，內見其人，精通絳宮。止。

太極真人曰：修靈寶飛行三界之道，當行明堂之道。以雞鳴、食時、日西之時，入齋堂，日三爲之。因念太倉胃腕中，正白如膏，黃炁鬱勃填滿。畢。

太極真人曰：修靈寶飛行之道，當行中極。常以八節之日，立春、春分、立夏、夏至、立秋、秋分、立冬、冬至、臘正、除夕，人定時，入齋堂北向高座，禮三寶十方。先北方，次東方，次南方，次西方，次西北方，次上方，次東

北方，次東南方，次下方，次西南方，方一拜。次又禮大聖衆，四方，方三拜，回旋都畢。言曰：三景弟子某甲，少好大道，願得長生，今日願太一北君、司命、司錄削去某死籍，更著長生錄籍。於是因卧念五城十二樓，十二大夫在中央，衣朱衣，河水流通，分布四肢。又呪曰：司錄六丁玉女，削去某死簡，更著長生神仙玉籍。度名青錄，於今必獲邁跡三界，遨遊九外。畢。

太極真人曰：修靈寶飛行三界之道，當先行江河。常念怒雲鬱勃，徘徊爲江河，大腸爲江，小腸爲河，胞爲弱水，人生之根，玉水玄妙，江河至神。畢。

太極真人曰：修靈寶飛行三界之道，當行元炁。常以癸亥、甲子、晦朔之日，夜半時，下思弱水怒雲紛紛，上出腎間，白炁並合上行，經歷五宮，上入泥丸，下入涌泉，周遍身體，因念玄光玉女正從中道來上，上戴明星上行，身中皆明，元炁四布，至雞鳴畢。

太極真人曰：當行易益之道。當

以甲子、癸亥、八節之日，立春、春分、立夏、夏至、立秋、秋分、立冬、冬至，夜半之時，入齋堂，念弱水中元炁鬱鬱漂漂，出上華蓋，雲行雨施，周遍一身。於是便因念太一小童玉女，凡三人，紫房道君下灌丹田，玉池青水，上生華光。乃念太清元炁紛紛如雲霧，來下入身中，鬱鬱如雲入山，萬世常存。畢。

太極真人曰：修靈寶飛行三界之道，當行門戶。常以月朔一日至十五日，入齋堂靜思，手十指爲門戶，元炁徑注至十指，皆熱。魂從中出，引使來還，九十息止。從十六日至月晦思之，十指元炁下至足十指，皆熱，九息止。

太極真人曰：修靈寶飛行三界之道，當行玄化。常以癸亥之日，人定之時，入齋堂下，念玄太文中倒住人，方長七寸，思行玄卯乾燥如黃，因復念玄來正黑，行引其色，潤澤有光，至夜半止。

太極真人曰：修靈寶飛行三界之道，當思日中黃精赤炁來下入口中，咽

之三九止。止便呪曰：日帝君，月夫人，神乎神乎，還歸絳宮，俱養小童，太一玉女，無離其宮。凡三呪文，思肺中白炁來上至口中，咽之三七而止。又呪曰：鴻達得道，太白子期，與我合德，長生不死。三過畢。

太極真人曰：修靈寶飛行三界之道，常當思心中有十二芝莖，正赤玉色，上與肺連，名曰思箭。以意把之，太一引怒，心中正圓，名曰威喜。此乃天神太一、道太一。常存守百思，可精念之。

太極真人曰：修靈寶飛行三界之道，常當思心赤炁下行，與腎相連。常念腎間白炁上入心中，心中赤炁下行入腎，間中有白炁上行，萬世不絕，名曰陰陽元炁也。

太極真人曰：修靈寶飛行三界之道，常當存太一紫綬金印，帶玉華符。印名威喜，天帝信璽。凡有七人帶劍持符，行在前，止在後，坐在左，卧在右，恒念存之。

太極真人曰：修靈寶飛行三界之

道，常當行中極。存脾上黃人，形長三寸，兩手中各有一黃人，黃炁上通天，下入身體，即見其神，便呪曰：黃裳子，黃裳子，黃庭真人在吾己，爲我取醴酒肥脯、神仙芝草、諸可飲食者。便引咽之，三五而畢。

太極真人曰：太上靈寶隱遊飛行三界上道，非有真，莫能求，非有道，不能學。若精修五年，尅得超遊三界，上登玉京，蓋三洞之至妙，道冠衆經矣。修之者，宜淡泊其心，外累都盡。如其不爾，雖復積之於年稔，亦不能有所得，徒勞天年以遊視，不亦哀哉。

太極真人曰：傳授盟信，如五稱舊科，玉訣要言。但別齋上金三兩、本命紋繒隨年尺丈。子能勤學，克爲太上之賓，遊盼金闕，高仙列位。可不勗哉。可不勤哉。

太極真人曰：若違盟而妄傳，又不依年限，及不盟而傳妄爲，罪及七祖，搥濛山之石，填積夜之河，萬劫不原，己身亦殞，仙何可期乎明慎之焉。

太上洞玄靈寶飛行三界通微內思妙經


（郭清點校、王卡復校）

# 005 太上洞玄靈寶芝草品

經名：太上洞玄靈寶芝草品。  
撰人不詳，約出於南北朝或隋  
唐。靈寶經目著錄未出。一卷。  
底本出處：《正統道藏》正一部。


竊以延命之術，本因餌藥長生。  
鴻寶宛秘之書論云：仙人使鬼。是以  
廣成子居崆峒山上，示道治而授軒轅。  
赤松子昇崑崙宮，服水玉而教炎帝。  
仍隨風雨上下，究察機祥，遊歷名山，  
顧觀草木，闡驗幽昧。芝英一作精形品  
萬端，實難辨別，故畫圖記，著狀貼傳，  
請據尋求，得臻仙路耶。

芝玉青



青玉芝，生於揚州山。其味甘酸，  
服之十二萬歲。王子喬食，仙矣。蒼  
虎守之。依圖取服，有四重，第二重有  
二枝，蓋莖並皆青也。

芝玉赤



赤玉芝，一作子食芝。生於郁州山，  
狀如此，其味苦。赤松子食之，得仙。  
赤虎、赤魚守之。依圖取服，莖蓋赤，  
有二重，下重有二小芝，上重二小芝，  
並有蓋。

芝玉黃



黃玉芝，生於蓬萊山，其色黃，味  
辛。東王父食之，壽九萬歲，仙矣。黃


虎、黃魚守之。三重，下重有三枝，一有  
生九蓋。蓋莖並黃也。

芝玉白




白玉芝，生於方丈山中，其味辛  
白，蓋四重，下一重上，有二枚生，並有  
三枚生上重，或生大石之上、黃沙之  
中、腐木之根、高樹之下、名山之陰。  
得而食之，仙矣。白虎守之。

芝玉黑



黑玉芝，生於龜山之中，其味甘  
酸。鮮于子食之，得仙矣。傍有黑虎  
守之，其狀如此。上有二小枝重生，其  
色黑，有四重，莖蓋並赤。

芝玉帝五



五帝玉芝，生於嵩高名山中，有五  
色及五變五行，四時有味，以四時取服  
之，為萬年仙矣。有三重，下二重二枝  
相對。

芝玉帝青



青帝玉芝，生於名山之中大樹之  
下，黃雲覆之，青蓋、赤裏，其莖白，其味  
酸。春甲乙日取食之，令人不老仙矣。

芝玉帝赤



赤帝玉芝，生於名山之陽，赤蓋、  
黃裏、白莖。上有赤雲，其味甘苦。夏  
採食之，令人得四千年仙矣。

芝玉帝黃



黃帝玉芝，生於名山之頂，上有五  
色雲。黃蓋、白莖，其味甘苦，食之令  
人不驚恐，長生三萬年，得仙矣。

芝玉帝白



白帝玉芝，生於名山之陽重石之  
間，白蓋、青莖、裏黑，其味甘。食之令  
人得三千年仙矣。

芝玉帝黑



黑帝玉芝，生於名山之陰大谷之  
中，黑雲覆之。黑蓋、青裏、黃莖，其味  
甘酸。冬間採食之，令人不老，得仙  
矣。

芝方東



東方芝，生於名山之陽大谷中，青  
赤裏，二重白蓋，青莖，其味酸。食之  
延年，十萬歲仙矣。

芝方南





南方芝，生於名山之陽，赤色，赤蓋，赤莖，有三枝，其味苦。用竹刀採之，陰乾百日，食之如錢，得三萬歲仙矣。

芝 央 中



中央芝，生於名山之陰，白蓋，黃莖，裏黑，枝如一莖蓋，二枝要半，上屈頭，垂如懸蓋。傍有黃羊捍守之。用木刀採食之，仙矣。

芝 方 西



西方芝，生於名山之陰，白蓋，黑裏，青莖，有三枝俱生，其味甘辛，食之萬年仙矣。

芝 方 北




北方芝，生於名山之陰，黑蓋，莖三枝並生。其味甘美，食之仙矣。入水不溺，不老，得八萬年。有黑牛守之。

芝 白 石



石白芝，生於少室山上，有赤雲，兩邊黃虎守之。蓋赤，黑莖，與石玉芝相對生。取之當齋戒沐浴三十日，雄雞過轉鳴，自稱天齋將軍，使者彩衣，冠帶玄服。往取食之一合，六十萬歲。一作十六。生大石之間，其味甘酸，下根四方，高三尺。

芝 神 木



木神芝，生於嵩高山之陰，黃蓋，黑裏，上有赤雲及朱雀守之。以六月戊己辰日，採而食之，得九千歲，令人仙矣。狀如四方石，有一坦者。

芝 菌 鬼



鬼菌芝，生於名山之陰，白蓋，狀如甌，二鬼守之，見人即滅。以夜採之，陰乾百日，食如刀圭，所向盡服。織女服之，仙昇天矣。

人威芝




人威芝，生於嵩高少室太室之山。狀如人，赤色、戴蓋，乍黃乍赤，味甘。食之，令人不老，服之十萬年仙矣。

金精芝



金精芝，生於華山，白蓋，莖上有白雲，狀如雀鷄。其味甘辛。十月壬日採之，陰乾百日，食之八千歲。韓衆食之仙矣。

黃芝



黃芝，生於黃土山，黃蓋三重，其味甘。食之與天地等。一莖色白。

生金芝



生金芝，生於名山之陽，白蓋、赤裏、赤莖。春夏採之，陰乾百日，食之一合，陰病除，增年也。

龜威芝



龜威芝，生於常山深淵之中，其色青黑，龜文蓋，青白裏，莖黑，味酸苦。採而食之，為萬歲仙矣。

龍威芝



龍威芝，生於太山之陰，青莖、紫蓋、白裏，其文似龍蛇，其味甘酸。春採食之，令人十六萬年仙矣。

鳥威芝




鳥威芝，生於南嶽丘山之陰，赤蓋、黑莖，其味酸。食之令人身輕，不老萬歲仙矣。

火精芝



火精芝，生於霍山之陰，赤蓋、黃裏、黃莖。上有赤雲，似烏雞之形，其味甘。五月丙午日採之，九千年仙矣。



火錫芝


火錫芝，生於名山之陽大樹之傍，色赤如火，青莖、赤蓋，炎起五枝似火，其味甘苦。夏採而食之，延年得仙矣。

赤松子芝



赤松子芝，生於崦山，有千歲松樹者，生於其間，狀似木人形。採之，陰乾百日，食之，與天地等仙矣。

木精芝




木精芝，生於名山之中，冬即木本如紡車，拮拾採揀無時。其色白，其味甘苦。食之令人身輕仙矣。無蓋似叉，莖赤。

木神芝



木神芝，生於齊泰山，山名曰東岳。青蓋、赤裏、赤莖，上有青雲如雞之狀。以壬日採而食之，千萬歲仙矣。

天目芝




天目芝，生於名山之陽，其色青，莖半有二枝，上如曲蓋，赤，覆大蓋上。竹刀採之，陰乾百日，食之，五萬年仙矣，有黑雲覆之。

天心芝



天心芝，生於名山之陽夾石之上，青蓋、赤莖，其味酸。以竹刀採之，陰乾百日，食如一爪甲，成三千年仙矣。上有赤雲，下有白羊守之。

白英芝



白英芝，生於太山之陽，青色、青莖，五莖枝相對。甘美，食之，萬歲仙矣。

水神芝




水神芝，生於恒山，黑蓋，青莖，上有黑雲如馬形。採食之，六千歲仙矣。

土芝



土芝，生於名山之陽大澤之中，白蓋，如甕，味辛苦。食之不寒不熱，夏採服之，仙矣。

望玉芝




望玉芝，生於名山之陰岡闕中，黃蓋，赤莖，味甘。食之令人二千年仙矣。下有三莖並生，蓋青，莖赤。上有二莖，黃蓋，赤莖。

木文芝



木文芝，生於名山之中，上青，下裏黃，味甘酸。春採食之，七百年不老仙矣。

銅芝



銅芝，生於名山之陰源泉深谷之中，反如甌，色青黃赤，味辛苦。食一合，長生仙矣。

天絳芝




天絳芝，生於陵谷，黑蓋，赤裏，赤莖，味甘小辛。食之令人不寒不熱，六千年仙矣。

茯苓芝



茯苓芝，以冬至日生兔絲下，狀似牛蹄，黑色，味甘。食之令人千里外見物，壽萬年仙矣。

北方芝




北方芝，生於土山。狀如蛇，赤色、白裏，味甘酸。食之令人不老二萬年仙矣。

芝 菌 木




木菌芝，生於名山之陰谷中樹木上，生木三節，色青，味甘辛。食之萬年仙矣。

芝 精 風




風精芝，生於名山之中。青蓋，莖三枝並生，味甘。銅刀採食之，萬年仙矣。

芝 精 靈




靈精芝，生於名山之陰。赤蓋，二重紫莖。食之二萬年仙矣。上有蒼赭雲守之。

芝 文 鳥




鳥文芝，白蓋，黑莖，裏有文長六尺，厚四寸。味甘。食之四萬歲矣。

芝 菌 玉




玉菌芝，生於名山之陽。仲夏、季夏採之，陰乾百日，食之十萬年仙矣。做夜精芝樣，面赤，下黃白，朱莖，赤蓋，反上生。

芝 精 晝




晝精芝，秋生於名山之陽。赤色，二枝並生。以木刀採之，陰乾百日，食之一合，令人三萬歲。莖蓋並赤。

芝 精 夜



夜精芝，生於名山之陰。青蓋、青莖、味酸，蓋反仰向外，有露，飲之令人三萬歲。

芝玉白




白玉芝，生於太山谷中，葉青，下赤，每邊三重赤莖。採而食之，八萬歲矣。

芝精朝



朝精芝，夏生。白色、無蓋，如方石，味苦。銅刀採之，陰乾百日，食之萬年仙矣。上有二人守之。

芝精春



春精芝，青赤色，反蓋，有角，上有二子下垂，味苦。銅刀採之，無間多少，食之三萬歲。有五色雲覆之。

芝菌土




土菌芝，五色，乍黃、乍青、乍赤、乍白、乍黑，上有三枝，有子。食之，延年仙矣。

芝菌木




木菌黃芝，生於大石中。葉廣二寸，長一尺，青色，三葉並生，下如方石。冬夏生，味甘美，食之不老仙矣。

芝精夏




夏精芝，生於名山之中。赤色蓋，二子如珠，蓋中生，味甘。竹刀採之，陰乾百日，食之四萬年仙矣。

芝精秋



秋精芝，生於坎陷中，旁多有香草，黃蓋，赤裏，三枝並曲生，頭垂下，青莖。食之，萬歲。

芝雲白



白雲芝，有五色圓如鼓，上有六子，赤色。莖亦赤色，味酸。食之萬年仙矣。

芝神左




左神芝，黑蓋，反向天，白莖，有女人守之。飲中露，二千年。生於名山中。

芝神右




右神芝，生於名山。青蓋，白莖，三枝。骨刀採之，陰乾百日，食如瓜甲許，壽萬年。下有白鹿守之。

芝椽木



木椽芝，青色，有支文，生於名山中，味甘。食之萬歲。上有五莖，青蓋。

芝菌石




石菌芝，生於名山。夜則有光。夏午日採取中央赤者食之，萬年仙矣。白莖，頭中似蓮樣。

芝圭赤



赤圭芝，生於名山。白蓋，裏有紋，青莖，味辛。食之不老，一百神明從仙矣。

芝精鐵



鐵精芝，秋生。紫蓋，黃裏，五枝味甘。銅刀採之，食如木耳許，壽三千年仙矣。上有五色雲覆之。


芝精柯



柯精芝，生於名山之陰。白蓋，白莖。木刀採之，陰乾百日，食之如豆大，萬歲仙矣。中央黃者可食。

土菌芝

土菌芝，生於名山。青蓋，白莖，食之萬年仙矣。



石芝

石芝，生於名山。白蓋，白莖，食之令人六萬歲仙矣。方寸七，以上日三服之。




石精芝



石精芝，秋生。赤蓋，白裏，赤莖，味酸。食之為萬年仙矣。上有赤鳥守之。

河閉芝

河閉芝，秋生。黃色，三枝並生。飲上露，九千年仙矣。反蓋向上。



水菌芝

水菌芝，青蓋，白裏，青莖。食之日一合，去病為萬歲仙矣。




獸菌芝



獸菌芝，生於名山松栢樹下。白蓋，白莖。夏至日採之，旦取一合食，三年變化仙矣。

海闕芝

海闕芝，秋生沙石上。四重，似蓋，青色，赤莖，一枝並生。上有露，飲之萬年仙矣。上有五色雲覆之。



雲瑤芝

雲瑤芝，精秋生。青莖，青葉，上有白鳥守之。飲上露，千年仙矣。





芝菌青

青菌芝，青蓋二重，白裏，白莖，味甘酸。日食一合，千年仙矣。



芝雲

雲芝，青蓋，黃莖，味如蜜。食之千年得仙矣。上有五色雲覆之。



芝崙崙


崙崙芝，秋生。黃蓋二重，黃莖，



其味甘。上有露，飲之三千年仙矣。


芝精人

人精芝，生於名山。頭青，蓋白，裏赤，莖三枝並生，味甘。飲上露，為萬年仙矣。




芝英山

山英芝，生於名岳深崖陰近濕處。赤色，如四重浮圖級。食之，千年仙矣。



芝紫



紫芝，似人頭，味辛。食之，令人心通，不死身輕耳。


芝如冬

冬如芝，秋生太山之陽。黃蓋，三黃莖，別根同蓋，味甘辛。陰乾百日，食之，二千年仙矣。



芝精赤

赤精芝，夏生。黃蓋，青莖，白裏，九二重。食之五千年仙矣。兩邊五色草。




芝石紫

紫石芝，味苦，赤蓋，黃裏，赤莖。食之，令人不死仙矣。



芝蓋紫

紫蓋芝，三莖共本，下圓上方，二尺紫蓋，味甘。食之三千年仙矣。



芝精赤

赤精芝，赤色炎起，味甘。鐵刀採之，陰乾百日，食之二千年仙矣。二人



守之，似火炬樣。莖炎俱赤。


芝連山迎

迎山連芝，食之，日行千里，八千歲仙矣。三枝，中枝頂有蓋，共根生，紫色，下二枝無蓋。




芝山紫

紫山芝，赤紫色，四重，赤蓋。食之三千年仙矣。




芝紫



紫芝，白蓋，黃裏，似月，白莖。食之有光明仙矣。


芝木

木芝，食之千年仙矣。



芝水

水芝，食之千年仙矣。似王字樣也。



芝紫重

重紫芝，黃蓋，赤莖，二枝並生相連。食之，仙矣。



六柱紫芝



六柱紫芝，赤蓋，赤莖，黃裏。食之得仙矣。頂有蓋，下三重無蓋。

紫科芝



紫科芝，赤色，白裏，似蛇，味苦。除寒熱邪氣，日食一合，仙矣。秋取之。

紫芝



紫芝，味甘，白蓋，三枝，莖上黃下赤。食之仙矣，骨體滿實，腸化爲筋。

上有蓋，下一重無蓋。

重紫芝




重紫芝，狀如此。味甘苦。食之仙矣。白蓋如起，黃莖，赤根，三枝，頂上有蓋，下一重二枝無蓋。

紫芝



紫芝，赤蓋，白裏，赤莖，味甘。食之延年仙矣。

紫科芝




科芝，赤表，白裏，味甘。冬服之，令人不老而仙，似蛇尾。

紫芝




紫芝，赤蓋，白裏，黑莖，味甘。秋採食之，仙矣。

火芝




火芝，赤蓋，白裏，黑莖，味苦。冬夏採食之，仙矣。上有五色雲覆之。兩枝交叉分生。

紫科芝




科芝，三重，赤色、蓋白、味甘辛。食之延年得仙矣。

芝水




水芝，赤蓋、白裏、白莖。三枝，通上出蓋，食之，延年仙矣。

芝宮




宮芝，食之延年不老仙矣。總有十一段也。朱蓋，赤莖。

芝闕




闕芝，夏秋採服方寸七，與天地等畢。紫蓋，紫莖，七段。當中一枝長，兩蓋似珠輪。

芝祿上



上祿芝，食之仙矣。乘虛行也。青蓋，朱莖。十一段，上六，中二，下三。

芝精玉



玉精芝，大海中生。味甘。服之二千年仙也。朱蓋，玉莖，朱色。

芝侯代




代侯芝，上圓下方。春一作五月。採食之，壽萬年也。似桶朱色。

芝曇




曇芝，食之六年，上有紅雲守之。朱蓋，朱莖，朱葉，有六葉。

芝死不




不死芝，食之萬年。上有紅雲，紫蓋，紫莖，四枝無蓋。

芝朱



朱芝，食之令人千歲仙矣。朱蓋，朱莖。

芝威天



天威芝，青色，四時採食之，千萬年。有雲赤色覆之。青蓋，青莖。

芝精辟




辟精芝，生海中。青色，食之千年矣。其狀似人形。

芝寒天



天寒芝，黃色如人形。食之千歲仙矣。

芝英赤




赤英芝，味辛。四時採食之，壽三千年也。二枝交叉，一枝無蓋，一枝頭朱，一頭似花未開。

芝天




天芝，四時採，陰乾百日，服方寸七以仙矣。朱蓋，紫莖。

芝陸天



天陸芝，銅刀採食之，為三千年仙矣。兩莖並生，朱色，似蓮藥未開。

芝闕天




天闕芝，食之萬年仙矣。二莖並生，朱蓋，白裏。

芝精地



地精芝，二羊守之。服上露者，六千年仙矣。三莖並生，朱蓋青莖。

芝精日



日精芝，味甘。竹刀採，陰乾百日，服方寸七，五千年仙矣。朱色，三枝，無蓋，共一枝。

芝精月




月精芝，竹刀四時採之，食如豆，五千年仙矣。一人守之，黃蓋，黃莖。

芝精時四




四時精芝，服上露，二萬年。二青龍守之，赤色，上有五色雲覆之。二重，朱蓋，朱莖。

芝精黑




黑精芝，味甘酸。骨刀採食之，二千年仙矣。陰乾百日，下有羊守之。紫蓋，紫莖，有兩葉。

芝精木




木精芝，味甘。食之二千年仙矣。陰乾百日，上有三馬。骨刀採之。蓋紫色，反向上。

芝精水




水精芝，味苦。夏採食如爪甲，五千年仙矣。青蓋，四莖穿出蓋上，無蓋，白莖。

芝精金




金精芝，味甘。木刀採食之，千歲仙矣。陰乾百日，食之五段，似火焰起。朱色，一朱蓋，朱莖。一蓋如初生月，莖青色。

芝水




水芝，生於衆水旁，味苦。夏採食如爪甲，十萬年仙矣。蓋紫色，頂有三角，莖青色，通出無蓋。

芝精雨



雨精芝，夏生。味甘，食無拘多  
少，六千年仙矣。其蓋青，紫莖，有四  
苗生。

芝精水



水精芝，生山水旁。青黑色，四枝  
並生，蓋仰，味小苦。飲上露，十萬年  
仙矣。

芝精雲



雲精芝，生於華山，味酸。竹刀採  
之，食無多少，九千年仙矣。蓋紫色，  
莖白。

芝精虎



虎精芝，生於華山之陰。黃色，如  
虎皮，味甘，食之令人不老，聰明仙矣。  
莖朱色。

太上洞玄靈寶芝草品

(郭清點校)

# 006 元始天尊說變化空洞妙經

經名：元始天尊說變化空洞妙經。又名：《太上洞玄靈寶變化空洞妙經》。撰人不詳，約出於南北朝或隋唐。靈寶經目著錄未出。一卷。底本出處：《正統道藏》洞真部本文類。

元始天尊遷駕於西那天鬱察山浮羅之嶽丹玄之阿，坐七寶瓊林騫木之下，身佩九色離羅之帔，飛森之袍巾，須臾百變之冠，帶晨光日鈴育延之劍。高真侍座，五千萬人。是時乃命五老上真、仙都左公披玉霜七色紫寶鳳羽之笈，敷落五篇赤書真文，吟詠《變化空洞上經》。瓊音四激，妙響八陳。振風朱素，高會萬神。玄範流秀，紫虛飾裝。上聖權悅，普散瓊光。諸天踴躍，

靡不開朗。香華妓樂，無軌數量。慶煙八會，金風四暢。三景停暉，七靈皓暎。八道煥明，洞觀无境。嘯朗上都，神惠遐曠。凝真內溢，放神獨往。炁輕重霄，縱體五象。耀龍文於碧津，煥綵雲於蔚上。肆曲精于蘭林，宴飛蓋乎八景。抗龍轡於清嶺，逸鳳車以高仰。躡空洞以散雲，迅丹轅以流騁。躡九霞以永目，凌三天而解想。颺長煙以浮塵，舒日華以拂朗命。太陽以吐威，并奔電以激響。流鈴交換，四絕翳莽。逍遙玄覺，觀化大像，濯津蘭池，洗穢滄浪。鍊魂碧波，上會道場。金神煥落，六度伏殍。理化九絕，和炁永長。頤怡內款，惠講外融。洞靈陶運，含真吐章。俯仰空洞，變化爲王。太上道德，普冠神宗。巍巍大範，諸天所崇矣。妙真既煥，萬炁並歸。冥感玄通，大寂洞微。理妙含暢，沈澄紫暉。驚浪幽虛，總持上機。宏落九冥，日門廓開。戢翼上館，靈化二儀。琳琅激籟，萬響自哀。鸞鳴蘭園，鳳嘯雲梯。馬駭絕宅，龍奔玄河。七元息蓋，

三景停回。仙皇擗轡，元君啓扉。上整未成，下授四至。俄頃之間，倏歛九圍。冥會八衝，洞幽入微。太帝扶輪，五老執麾。金虎前驅，天騶後追。猛馬張喉，毒獸吐威。天丁攝邪，赤書捕非。天魔喪炁，萬精消摧。玉真校誠，大小無遺。三天正道，六炁奔馳。冥惠洗穢，滌蕩寒池。道觀重明，靈化九徊。大有四通，五域齊平。颺放無礙，適心所營。蕩蕩太初，遼遼遐清。皇流應運，萬真自生。森羅蔚秀。龍幹敷榮，群類亂葩。朱景振瓊，騰翮紫霄。凌翰玉清，二象輕光，八道高明。月女煦華，日童揚精。流灌諸天，合會八冥。百和散馥，芳風亂逞。眇眇澄神，飛輪羽青。暉光燦爛，流灑七城。金童執巾，紫妃抱嬰。灌津玉霄，散華朱庭。騫樹鼓條，圓象秀英，萬有廓開，籟響空青。哀音發章，鳳歌亦鳴。希微常韻，鸞唱合并。慶烟交沓，朱火金鈴。炁不受翳，景澄自萌。窈窕上虛，可以忘情。高注下炁，布神遐征。愍世悼俗，俯和生生。是故玉洲上刻



黃籙之簡，帝一則書大有之名，大漠則澳玉府之炁，無仞則握浩劫之齡，能斂厲於變化，則延康而无傾，研修於空洞，則萬神自然寧。俯吟空洞章，萬鬼无賈形。妙哉靈威，嚴肅廣停，巍巍德宗，上聖之至靈也。於是命五老上真、仙都左仙，出變化空洞八道之要，以示來世修學之士，使研習精妙而登仙也。

立春之日，日中時，高真大神會諸仙人於太極上宮，剋定玉簡金札紫文，記得仙之人名，題於玄格，列字於方諸。其日天地水官、五嶽真靈、四海大神，皆乘八景玉輿，五色雲輶，匡御朱鳳，或乘飛龍。仙童玉女，十億萬人，手把幢幡，散華燒香，浮空而行，洞映諸天，履行八方。各執學仙簿錄，上論太極宮，對校功過，糾簡善惡。爲三官所舉，五帝所保，即書名玉簡，勒錄太極宮，勅告萬靈，右別司迎。有犯禁戒，罪名列於九府，刑目繫於三官，爲四司所執，五帝所糾，皆削除簿錄，移付鬼官，善惡即判。三日集議，諸天日月星宿，地上萬靈，莫不振肅。爲學之

士，常以其日沐浴清齋，日中入室，夜半露身，北向再拜，叩頭搏頰九過，自陳己身學真以來，所犯沈匿惡過、難赦之愆，不原之罪，隨事首謝。當令心虚意玄，内外空盡，无所隱藏，乞丐解釋，拔出七玄，幽魂上昇，我身飛仙。畢，叩齒九通，微呪曰：

北玄高真，太極上仙，玄虚萬萬，靈化千千，日吉時良，上會高晨，三景冥合，八炁敷陳，四司開校，五帝定仙，乞除宿過，削減罪根，書名九天，勒錄靈軒，披散七祖，仰享玄恩，萬願刻會，靡不如言。畢，便服太極鍊變定真靈生之符，仰嚙九過止。行此道八年，則玉名列簡於太極上觀，當爲太極諸仙人，論兆之身，尅得飛行，上昇上清。

春分之日，日中時，崑崙瑶臺太素真人會諸仙官於瑶臺之上，揀定真經，及學者功業。當此之日，天地水官、五嶽四真、神仙大神皆來，乘雲輿羽蓋，十二飛龍。仙童玉女散華燒香，手執華幡，浮空而行，周觀八方，上詣瑶臺，條錄學者所修經業輕重，採授上真。

三日集議，諸天日月星宿，及地上萬靈，莫不振肅。爲學之士，其日當清齋，日中入室，夜半露身，燒香誦經，北向再拜，叩頭搏頰九過，自陳首謝己身學法以來，所犯禁戒，違負經科，漏慢天文輕泄之罪，乞丐原除。又乞解救罪咎，延累七祖考罰，拔出幽魂，離三塗五苦之中，窮魂上昇，我身獲仙。畢，叩齒九通，微呪曰：

太素上真，高仙太靈，今日上告，慶雲回輶，宴景瑶臺，會具紫庭，簡校簿籍，落罪勒生，五帝定錄，東華記名，道合上願，我稟妙經，萬遍待駕，上希神靈，玉帝開赦，所向尅定，變景易骨，飛昇太清。畢，便服太素瑶臺通真變仙寶符，仰嚙九過止。行此道八年，致太素真人降房，目覩神形，尅得上昇，飛昇瑶臺八素上宮。

立夏之日，日中時，五帝會諸仙人於紫微宮，列太極四真人，校定學道功過簿目。當此之日，諸天司直、河海水帝，及五嶽神靈，皆乘雲輿，羽蓋飛龍朱鳳。仙童玉女，燒香散華，浮空而

行，手執華幡，五色流鈴，森然俱至。上登紫微宮，條列學者功過，簡校籙籍。三日集議，分別善惡。當此之時，諸天日月五星，及地上衆靈，莫不振肅。學者當以其日清齋，日中入室，夜半露身，北向脫巾，叩頭搏頰九過，首謝己身爲學以來，所犯禁戒，違替輕慢之罪，心懷陰惡，不忠不孝，姒妬逆害，不信之愆，並乞原除。七玄考責之魂，拔度三塗五難之中，去離幽役，上昇福堂，願乞神仙，飛行上清。畢，叩齒九通，微祝曰：

五炁回靈，總真高濤，四極監映，普告萬靈，檢察三官，上條功程，有勤勒錄，无善落生，三光垂飾，五帝鍊精，變景化骨，仰享大靈，上願飛仙，身屏紫庭，中願九天，書字金名，下願無極，長天不傾，三願九合，莫不剋成。畢，便服紫微靈都真符，仰嚙九過止。行此道八年，則致五帝降房，與靈交真，罪散福會，飛昇上清。

夏至之日，日中時，天上三官會於司命上宮，集河侯水帝，校定萬民功過

簿錄，增年減算。其日則九天司命，及諸天上真、五嶽五帝神靈，皆乘五色雲輿，飛龍羽蓋，導從仙官，履行天下，浮空而行，森然俱至。上論司命官，校定簿錄，有罪減算，有功增年。三日集議，分別善惡。當此之時，諸天日月五星，及地上衆靈，莫不振肅。學者以其日清齋，日中入室，夜半露身，燒香誦經，修行至道，北向脫巾，叩頭搏頰九過，首謝己身爲學以來，所犯輕慢天地、觸犯三光、泄真露道、漏慢天文、違科犯戒之罪，並乞原除。解釋七祖，令得去離三官之中，五難之下，昇遷玄宮，我身飛昇。畢，叩齒九通，微祝曰：

三官九府，太上衆真，携景帝房，司命校年，招會河侯，十二水神，檢定罪籍，及得玉篇，有善者記，犯惡者言。今日普算，仰希玄恩，乞除宿對，分散萬愆，七祖獲福，我身飛仙，名書九天，保真玉晨。畢，便服司命長存符，仰嚙九過止。行此道八年，則司命定錄，太一勒功，三官削罪，身得上仙。

立秋之日，日中時，五嶽諸真人詣黃老君黃所雲庭山，會諸仙官，定天下神圖靈藥。其日諸天上真、九天丞相、日月五帝、五星天人，並乘八景玉輿，五色雲駟，飛龍鳳凰，結駟紛紜，仙童玉女，手執華幡，燒香散華，浮空歌唱，履行諸天，及宴五嶽，森然俱至。上登黃房，簡校真人簿錄、神圖靈藥，三日集議。當此之時，諸天上真，及地上衆靈，莫不振肅。道士修學，遊行名山，至其日，皆當清齋，二時燒香，誦經服符，嚙炁和調炁液，灰心絕念，注情玄真，叩頭搏頰。首謝己身所犯損喪精神，穢亂三官，存思不真，虧略科文，觸犯天地，日月星辰，沈結宿愆，並乞原除，拔度七祖，去離幽途，窮魂上昇，我身獲仙。畢，叩齒九通，微祝曰：

太上校仙，黃老度符，普告五嶽，開算神圖，名參帝錄，勒定丹書，有勤者記，有罪者除，日吉時良，萬炁清虛，誦求所願，靈藥芝華，俯飲月精，仰啜日霞，變化形景，飛昇玄都。畢，便服中黃八道祕仙符，仰嚙九過止。行此

道八年，即見神形，賜丹芝靈藥，飛行太空。

秋分之日，日中時，上皇太帝乃登上清靈闕太微之館，會太上三老君、北極真公、八海大神、五嶽尊靈，共集議天下萬兆之罪福，記學道之勤怠，副之司命君。其日乃詣九天元尊、九天父母、高仙真人、九靈仙母、南極上元萬聖大神，及五帝四極妙行仙人，並乘八景玉輿，紫雲之輪，五色丹輶，匡龍御鳳，飛仙羽蓋，九十萬重，仙童玉女，十億萬人，手執九色之節、十絕華幡，煥落火鈴，嘯歌雲宮，燒香散華，翫藹上清太微之宮，算定萬兆學士功過，三日集議。當此之時，日月傾蓋，星宿停機，天地萬靈，莫不振肅。凡修學之士，至其日當清齋，日中入室，夜半露身，燒香誦經，北向脫巾，叩頭搏頰。首謝己身所犯輕慢天地日月星辰、汙穢三光、漏泄祕文、違科犯戒，萬沒之罪，並乞原除。自今更始，唯蒙上聖宥以哀愍，乞七祖窮魂上昇福堂，我身飛仙。畢，叩齒九通，微呪曰：

皇上帝尊，太微玄靈，萬神校籍，司命度生，太一捻符，上元保精，今日八會，衆真合靈，宿根結滯，莫不開清，記我玄錄，削我罪名，白元公子，常與我并，三元混合，覩見神形，運我紫煙，飛入帝庭。畢，便服靈都幽昇符，仰嚙九過止。行此道八年，則萬神記識，名書九天，真人下降，致兆飛仙。

立冬之日，日中時，陽臺真人會諸仙官玉女於陽臺之上，校定後學諸名山始得道簿錄。其日諸天聖真，及五嶽河海大神，皆乘飛仙羽蓋，十二飛龍，五色流鈴，十絕華幡，燒香散華，履行天下，試觀萬民，森然俱至。上登陽臺，簡校名錄。爲學之士，當以其日清齋，日中入室，夜半露身，燒香誦經，存思神真，北向叩頭搏頰。首謝己身所行宿愆結過，隨意自陳，乞丐原赦，拔度七祖，解散幽魂，上昇南宮，我身獲仙。畢，叩齒九通，微呪曰：

太陽試觀，萬神肅清，四司五帝，上簡玄名，元皇開真，除罪勒生，上告八會，所願剋成，衆神敬祐，飛昇太靈。

畢，便服陽臺靈生玉符，仰嚙九通止。行此道八年，剋得題名九天，真人下降，飛昇帝房。

冬至之日，日中時，天真衆仙皆詣方諸東華太宮，東海青童君刻定衆仙錄金書內字。其日天人大聖衆、元皇九微靈都大神，皆乘八景玉輿，飛仙羽輪、金煙紫蓋，普天耀光，五色流鈴，攝五嶽四瀆河海神靈，燒香散華，浮空而行，天地試觀，萬仙上詣方諸，刻定玄名，三日集議。當此之日，天地萬靈，莫不振肅。爲學之士，至其日當清齋，日中入室，夜半露身，燒香誦經，北向脫巾，叩頭搏頰。首謝己身有識以來所犯之罪，隨意自陳，乞丐原赦，解拔七祖，上昇南宮。畢，叩齒九通，微呪曰：

天真妙觀，方諸校仙，日吉時合，萬願開陳，時清日良，我享上恩，金書玉字，列籍靈軒，五帝敬護，四司保神，得乘八景，凌空神煙，上昇三清，朝謁玉晨。畢，便服天真清靈八景玉符，仰嚙九通止。行此道八年，則名題方諸

青宮，精心勿失，剋得上仙。

八節乃天上朝會，開真大慶之日，其時乃萬神集議，諸天大聖、天真大神、妙行真人，及日月星宿、五嶽五帝、河海神靈、千億萬衆，莫不同時森然而集，三日慶會，算定天真，分判善惡，記功書罪，區別勤怠，功過簿目，皆列言九天，各副三宮九府、司命上曹，大小輕重，莫不畢載。學者以其日清齋，首謝所犯，燒香誦經，願念呪戒，上感神明，爲四司所佐，五帝所助，保舉各錄，記入玉籍，剋得神人下降，白日飛騰也。爲學而不知諸天有大慶之日，上聖有議集之時，不知首謝愆釁之法，宿考何由得解，罪名何由得脫，如此則七祖長淪於地獄，飛仙何冀之有哉。春秋二分，乃天元判生剋罪，定真觀試萬仙之日。是其日，自不灰心冥相，專思苦念，長存在道，身不履非，特不可妄輕修行，首謝己身所犯也。誓願既定，天元刻簡，始終不犯，則上仙可待。首而又犯，爲司官所糾，則天元不復受其首謝。仙道既邈，身爲下鬼，可謂罪福

之顯，由此一日也，學者慎而行焉。

凡修上道，思神念真，空洞變化，四時形景，求飛仙之要，而不知修行八節悔謝，願念呪說，除罪定生真法，神真邈不可見也。思念希感，將難可期。於此日悔謝，罪無不散，神無不祐，呪說之辭，發唱而感也。如此思神，不旬年而覩真神，七祖即蒙長離於三塗幽魂，反形受化於南仙，身將無融而騰飛，倚空霄而翱翔也。此元始上道，祕於九天之上大有之宮，依明真科品，萬劫一傳，輕泄靈文，禍及七玄，身無仙冀。


### 靈真八道變化空洞玉景隱符



太極鍊變定真靈生  
符舊文出太上變化  
空洞第一玉景篇中  
藏之太極上宮

諸行道求仙，思神存真，謝罪解過，上希神明感會之恩。當以立春之日，青筆書文，東向服之一枚，宿愆並散，則太極記名玉簡。修行八年，勿失一節，太極給玉童八人，存思感會，天

真下降，得見神形，致一景之興，飛升太極宮。




太素瑤臺通真變仙  
寶符舊文出太上變  
化空洞第二玉景篇  
中藏之崑崙瑤臺

諸行道求仙，思神存真，謝罪解過，上希衆真祐護之恩。當以春分之日，青筆書文，東向服之二枚，宿愆解散，太素題名金札之上。修行八年，勿失一節，太素給玉女十二人，存思感會，天真下降，得覩神顏，致二景之興，上昇崑崙瑤臺之觀。



紫微靈都真符舊文  
出太上變化空洞第  
三玉景篇中藏之紫  
微宮中

諸行道求仙，思神存真，謝罪解過，上希五帝神仙原祐之恩，當以立夏之日，朱筆書文，南向服之三枚，萬罪並消，五帝保舉，記名丹房。修行八年，勿失一節，則紫微給玉童八人，存思感會，五帝降形，致三景玉輿，飛行上昇紫微上宮。



司命長存符舊文出  
太上變化空洞第四  
玉景篇中藏之司命  
上宮

諸行道求仙，思神存真，謝罪解過，上希司命度生之恩，當以夏至之日，朱筆書文，西南向服之四枚，天上三官削除罪錄，司命勒注生籍。修行八年，勿失一節，則司命給玉女十二人，存思感會，司命降形，致四景之輿，飛昇司命上宮。



中黃八道祕仙符舊  
文出太上變化空洞  
第五玉景篇中藏之  
黃房雲庭

諸行道求仙，思神存真，謝罪解過，上希黃老靈丹芝英之道，當以立秋之日，白筆書文，西向服之五枚，罪名除散，記錄神圖。修行八年，勿失一節，則黃老君給玉童八人，自得神丹芝英靈丸，存思感會，黃老降房，致五景之輿，飛昇黃房雲庭。



太微靈都幽昇符舊  
文出太上變化空洞  
第六玉景篇中藏之  
太微之宮

諸行道求仙，思神存真，謝罪解過，上希大帝大聖尊神原赦宿罪之恩，當以秋分之日，白筆書文，西北向服之六枚，則衆神消除罪名，注筆玉簡，司命度生，保命神仙。修行八年，勿失一節，太帝給玉女十二人，通真致靈，神人下降，所願皆成，致六景之輿，飛昇上清靈闕太微之宮。



陽臺靈生符舊文出  
太上變化空洞第七  
玉景篇中藏之玉清  
陽臺

諸行道求仙，思神念真，謝罪解過，上希陽臺真人仙官玉女原赦之恩，當以立冬之日，黑筆書文，北向服之七枚，則仙官玉女注書仙簿，列字金簡。修行八年，勿失一節，真人給玉童八人，思真感會，真人降形，致七景之輿，飛行玉清陽臺之觀。



天真靈寶八景玉符  
舊文出太上變化空  
洞第八玉景篇中藏  
之方諸東華太宮

諸行道求仙，思神存真，謝罪解過，上希天真衆仙、東海青童君度名錄籍金書玉字之恩，當以冬至之日，黑筆書文，東北向服之八枚，則東華刻簡金書於方諸上宮。修行八年，勿失一節，東華給玉女十二人，存思感會，天真下降，致八景玉輿，飛昇方諸東華太宮。

右靈真八道變化空洞玉景隱符，出自太上玉篇之中，以輔神經之用，亦當隨色書繒上，佩身八年，剋得真人除譴，必獲上仙。諸行道存思期真，上希飛騰，散降罪籍，上名金簡，皆當服符行事。凡太歲、本命、甲子、庚申，預是修行，皆當隨節服符，不必在正節之日也。修學不得此文，罪名不解，神真直除，去仙甚遠。有得之者，白日昇天，可謂變化空洞也。

元始天尊說變化空洞妙經

(郭清點校、王卡復校)

## 007 太上洞玄靈寶五符序

經名：太上洞玄靈寶五符序。  
撰人不詳，約出於魏晉。係古  
《靈寶經》之一。葛洪《抱樸子內  
篇》已引此書。原本一卷，後分  
為三卷。底本出處：《正統道  
藏》洞玄部神符類。

### 太上洞玄靈寶五符序卷上

玄古淳和，陰陽無綸，風不動條，雲雨以期。萬物自縱其心，蒼生任道而行，上對天心，天人合氣，吉凶未兆，不聞殺害，無懼其凶，不欣其吉，不見可否之言，不生是非之教，淳然不虧，峙然不損，推天任性，委地縱命，千萬獲所，莫傷其和。其和不傷，天地無主，無主而自化，不教之大訓，保其命也。于時人年九萬歲，然後始學仙道

而升天，斯將可謂至化，順其心也，可謂至教。化之無方，教亦無跡，跡不見而功存，訓長守而德沒，可謂天和其象，三才比同者也。逮三皇之世，淳和欲缺，微有得失，笑怒於色，作制以定兆民，神靈營身以全衆生，可謂競始學而爭已發。羣稱言得失，相自然諸兆，卦象萬物，計玄虛於天地，有事之興，於此兆矣。及軒轅之時，神農世衰，諸侯相侵，互有攻奪之氣，明主弗能正也。於是黃帝習用干戈，以征不廷，諸侯咸來賓從，而蚩尤最爲暴，莫之能伐。炎帝欲侵凌諸侯，諸侯咸歸軒轅，軒轅乃修德振兵，治藝五種，拯撫萬民，度四方，教熊羆狼豹、獮虎獲天，以與炎帝戰于阪泉之野，三戰然後行其志。蚩尤作亂，不用帝命，於是黃帝乃徵師，與蚩尤戰于涿鹿之野，遂克之。諸侯因尊軒轅爲天子，代神農氏，以雲命爲雲師，置左右大監，監于萬國鬼神，山川封禪，與爲多焉。獲寶鼎，迎日推策，舉風后、力牧、恒先、大鴻以治民。順天地之紀，幽明之故，死生之

說，存亡之難，時播百穀草木，淳化鳥獸蠶桑，網羅日月星辰、水泥土石金玉，勞動心力耳目，節用水火什物，有土德之瑞，故號黃帝。黃帝生二十五子，其得姓者十四人。黃帝居軒轅之丘，而娶西陵之女，是爲累祖。累祖爲黃帝正妃，生子二人，其後皆有天下。其一曰玄囂，是爲青陽，青陽降居江水。二曰昌意，降居弱水。昌意娶蜀山女，曰昌僕，生高陽。高陽有聖德，是爲顓頊，黃帝之孫而昌意之子。淵淳有良謀，疏通而智，養財以任地，載時以象天，依神靈以信義，治氣以教民，潔誠以祭祠，北至於幽陵，南至於丹穴，西至於流沙，東至於蟠木，動靜之物，大小之神，日月所照，莫不稱屬焉。生子曰窮蟬，而玄囂之孫高辛立，是爲帝嚳。帝嚳，黃帝曾孫也。高辛父曰喬極，喬極父曰玄囂，玄囂父曰黃帝。自玄囂與喬極，不得在位，至高辛即帝位，高辛於帝顓頊爲族子。高辛生而神靈，自言其名普施利，不於其身，聰以知遠，明以察微，順天之義，知

民之急，仁而威，惠而信，修身而天下服。取地之物而節用之，撫教萬民而利誨之，曆日月而迎送之，明鬼神而敬事之，其色恢恢，其德巍巍，其動也時，其服也工。帝嚳既執中而尸天下，日月所照，風雨所至，莫不從助，總得天地之心。其時有天人神真之官降之，乘寶蓋玄車而御九龍，策雲馬而發天窗，自稱九天真王、三天真皇，並執八光之節，佩景雲之符，到于牧德之臺，授帝嚳以九天真靈經、三天真寶符。九天真金文，上開太上通天之氣，下敷元生神祇之度，極混沌而爲限，終地幽以生初，唯天真而造其涯，下賢不能達其際。九氣所陶，神齊日月，於是物木名草，萬品分別，甘苦有味，金石殊類。上以營天，使二儀無遺；下以營人，令年命無墜。達觀者希其意，入妙者仰其味。然其文繁盛，天書難了，真人之言，既不可解，太上之心，衆叵近測，自非上神啓蒙，莫見髣髴。是以帝嚳自恨，其才下徒，貴其書而不知其向。帝嚳乃祭天帝北河之壇，藏於鐘山之峰，

封以青玉之匱，以期後聖有功德者令施。其幽滯鐘山，弱水之北一萬九千里，山高萬二千里，其上方七千里，周迴三萬里，自生千芝神草千四十種，人但脚履其上，三步乃仙矣。上有金臺七寶紫闕，元氣之所舍，天帝君所治處也。日月所不能照，鐘山光耀，晝夜朗然，照明十萬里外，皆星漢所不及。聖人言天缺無西北，是鐘山照九陰之下矣。帝堯之時，洪水滔天，山壞陵崩，下民斯憂。堯命求能治水者，羣臣四嶽皆曰：鯀可。堯曰：鯀爲人負命毀族，心有缺傷，恐不可用。四嶽曰：未見復有賢於鯀者，願帝試之。於是堯聽四嶽，用鯀治水，九年而水不息，功用不成。於是帝堯乃求人，更得舜。舜登用，攝行天子之政，巡狩行視，鯀之治水無功，乃殛鯀，於羽山以死，天下皆以舜之誅爲是。於是舜舉言鯀子禹能，而使續鯀之業。堯崩，帝舜問四嶽：有能美成堯之事者，使居官。皆曰：伯禹爲司空，可成業，美堯之功。舜曰：嗟然，命禹卒平水土。禹拜稽

首，讓於契、后稷、皋陶。舜曰：汝其往親爾事。禹爲人敏給聰濟，其德不違，其仁可親，其言可信，聲爲律，身爲度，稱以土，豐豐穆穆，爲綱爲紀。禹乃遂與益、后稷，奉帝命諸侯百姓，興人徒以敷土，隨山刊木，定高山大川。禹傷先人父鯀之功不成受誅，乃勞身焦思，居外一十二年，過家門不敢入，薄衣食致孝於鬼神，卑宮室盡力於溝洫，陸行乘車，水行乘船，泥行乘橈，山行乘橐，左準繩，右規矩，戴四時以開九州，通九道，陂九澤，度九山。令益與衆庶，稻可種卑濕。令后稷與衆庶，艱食鮮食，食少，調有餘相給，以均諸侯。禹乃行相地宜所有以貢，及山川之便利。禹行自冀州始，既爲壺口斷梁及岐，既修太原至于嶽陽，覃懷致功至於衡漳恒衛，既從大陸，既作島夷皮服，夾右碣石入于河，濟河衮州。九河既導，雷夏既澤，濳沮會同，桑土既蠶，於是民得下丘居。后土平濟，大水既消，爾乃巡狩於鐘山，祀上帝於玉闕，歸洪勳於天后，還大成於萬靈。然後

登彼玄峰，於繡嶺之阿，瓊境之上，忽得此書。禹乃更恭齋罄林幽岫，請奉佩身。真人告禹曰：汝功德感靈，天人並助，而年命向彫，嶮矣哉。乃口訣以長生之道，示以真寶服御之方，分擲而別。還乃計功勞於會稽之野，召會羣神於東越之山。是時四氣溫隆，清風既鼓，玄功妙暢，虚心內治。思退身以滅跡，惟藏景於幽緒，覩九天之靈奧，觀三天之寶囿，動以全生爲大順，靜以舍精爲久視，上覽天經，幽而難縷，下愍羣生，不知其紀，乃復鳳翔南山，龍峙海島，更撰真靈之玄要，集天宮之寶書，差次品第，分別所修，行五色定其方面，名其帝號。太上本名爲靈寶五符天文，藏於玄臺之中，堅石之碩古紅切，隱於苗山之岫，萬年一出，以示不朽。其一通書以南和丹縉，隱齋於蒙籠之丘訖，封以金英之函，印以玄都之章，命川澤水神以付震水洞室之君，須三千之會，當傳與水師傅伯長。其石碩之文，乃待大劫一至而宣之耳。禹於是服靈方以匿景，葬茲山以顯終，

仙人解其契，愚人謂其亡。大哉神化，委身歸宗，於戲大君，玄跡高通，萬劫驗其書，道詠須其方，陽九見上天之書，百六告傳氏之功，洪唱千代，蘭氣遺芳者也。

其後吳王闔閭十有二年孟春正月，命檝江湖，耀旗蛟龍，觀兵於敵國，解帶乎包山。包山隱居爲使者，號曰龍威丈人，令極洞室之所，深履洪穴之源。包山隱居，得道者也。處于吳山，莫知其名，敖兀不羣，高離世榮，時人號曰包山隱居。闔閭數親駕修敬，問以安危。是其時嘗共講此源路之由，故爲其暫使乎。隱居於是帶燭載火，晝夜行邁一百七十四日而返。既還具說云：不知其所極，隱居當步行可七千餘里，忽遇羣孔雜穴，千徑百路，沙道亂來，俱會一處，形象相似，門戶同類。其叢徑之口，有金城玉屋，周迴五百里，於衆道中央，明月朗煥，華照逸光，其中帷帳牀机，窗牖密房，錯以紫玉，飾以黃金，雲厦凌天，莫識其狀。於是顧盼無人，瞻望城傍，見題門上曰

天后別宮，題戶上曰太陰之堂。隱居知是神館，不敢冒進門內，乃更齋戒，思真三日，束修而入，看行其內，於玉房之中，北机之上，有一卷赤素書，字不可解。隱居再拜取書曰：下土小臣，爲吳王使，請此神文，以爲外施真氣信效。既還出外，而見其門戶自閉，聞其中有簫鼓激響，人馬之聲。隱居震懼，不敢久息，又不敢復進前路，恐致迷亂，不知歸向。於是迴返，齋所得書以獻闔閭。自說初入乃小晝，須火而進，然猶自分別朦冥，道中四方上下，皆是青石，方五六丈許，略爲齊等。時復有廣狹處，其脚所履，猶有水濕，或一二里間。隱居行當出一千里，不復冥晝，自然光照如白日，大道高燥揚塵，左右有陰陽溝，三十里輒有一石井，水味甘美，飲之自飽不飢。或見人馬之跡，旁入他道。其隱居所行路，及左右壁，似白石，石皆洞照有光，廣七八十丈，高暨二百許丈。轉近至洞庭，不復見上所極，仰視如天，而日光愈明，明如日盛中時。又不溫不涼，和氣



冲然，聞芳香之氣鬱勃，終而不休。及道邊有房室亭傳，奇瑋瑯鏤，不可目名。既至衆道口，周行廣狹，隱居迴匝，相去可四五十里，四面有玉柱爲揭，題曰九泉洞庭之墟。其間植林樹成行，綠葉紫榮，玄草白華，皆不知其名也。五色自生，七寶光耀晃晃，飛鳳翔其巔，龍麟戲其下。斯實天地之靈府，真人之盛館也。隱居具書其所履見示王，王肅然駭聽，乃清齋靜臺，祭天而受書焉。即其年太昊風雨以時，五穀豐熟，兆庶樂業，國內安融。闔閭珍貴其天文，而不解其辭，乃遣使者齎此書，封以黃金之檢，印以玉皇之璽，書旨以問魯大夫孔丘。使者到魯國，奉書跪於丘前曰：吳王昔命駕出遊，瞻望海津，息卒於東林之丘，遊宴乎北包之山。於是秣駟戢輿，忽有赤烏遊翔其間，銜此素書，墮王車前。大人元吉，靈瑞自天，饗國萬紀，金石長存。使臣出國，奉齋天文，願告禎祥來福之因。丘恬然閑居，不發其函，乃答使者曰：丘昔遊於西河之上，聞童謠歌

曰：吳王出遊觀震湖，龍威丈人名隱居，北上包山入靈墟，乃造洞庭竊禹書，天帝大文不可舒，此傳伯長百六初，今雖取出喪國間。丘案童謠之言，昔夏禹治水，拓平山川，功舉事訖，巡狩於鐘山之阿，得黃帝、帝嚳等所受藏，上三天太上靈寶真經。後遊會稽，更演解靈寶玄文，撰以爲靈寶文，藏一通於名山石碕，付一通於水神，當有得道道士，得之而獻王者。丘恐此書，必靈寶符太上真文也。若以赤烏所銜而墮，丘未詳也。使者跪謝：伏實如大夫之言。子路侍側，曰：奉君之使，罔君之命，非忠臣也。入國而期有司，受事而奸其辭，非良使。彼狡人矣，由請討之。孔子曰：夫振裳以冥太陽，仰手而障之白日，陽光其可掩乎，日月其可蔽乎。此二象焉，怪掩塞之爲惡耶。苟照之所逮，無傷也，汝無伐焉。孔子乃告使者曰：此天官之靈蘊，大聖之所撰，上叙太和陰陽之氣，下論道化養生之會，唯仙人能用其文，君王不能得其術。若乃抗身幽邈，遠尋自然，避羅

鎖於無爲，豁爭競于深山幽居，是時問丘，將或告王靈文之奇奧，太上之微言也。遂以書還使者，不開視也。使者歸，具說丘言。闔閭自傷方薄，嘆息而絕望，遂不復重求解釋也。乃藏之神館，祕貴靈文，其後閑旦，親自取視，函封不脫而失書所在矣。夫差獲之於勞山，終有殺滅之患，闔閭探之於洞庭，遂爲勾踐所并。是由丘所說童謠之言，喪國間徵矣。夫神文非啓授而攬之者，鮮不爲禍也。天書非道同而傳之者，無有不嬰罰於玄都也。

華子期者，九江人也。少好仙道，入山隱跡，採服草藥，棲身林阜二十餘年。忽遇角里先生，乃授之仙隱靈寶方，一曰河圖隱存符，二曰伊雒飛龜，三曰平衡。案合服之，日更少壯，色如少女，一日行五百里，能舉千斤，一歲十易皮。乃入潛山中，而白日升天矣。

### 仙人挹服五方諸天氣經

華子期受角里先生訣，樂子長書出神名。

東方青牙九氣之天，其氣煙如春草之始萌，其光如暉日之初隆，下有朝

華之淵，上有流英之宮，室有青腰玉女，堂有太上真王。玉女乘九山之獸，真王駕九光神龍，上導九天之氣，下引九泉之流芳，養二儀以長存，護陰陽以流通，天致元精於太極，地保山嶽於句芒，神運虛于寂臺，人養五藏於脣鋒。所以營溉之者無極，存之者不終。於是迴萬劫而更始，却衰朽而童蒙。爾乃鵬奏九遐，上登玄洞，仰尋太真之靈官，與仙僚而爲宗。大哉靈寶青牙，長存由九氣之功。

南方朱丹三氣之天，其氣煙如絳雲之苞白日，其光如玄玉之映流淵，下有赤泉之泓池，上有長生之朱宮，室有太丹玉女，居于太陽三山之上。堂有元氣丈人，駕三角之麟，上導泰清玄元之靈化，下和三氣之陶館，令萬物之永存，運天精於南夏，養人精於丹脣。所以採之者無終，營之者永存。於是却凋老而反嬰，還枯朽而茂繁，攘秋霜之落葉，反光華於萬春。爾乃龍盼虛空，鸞翔雲端，忽縱心而豁慮，無塵埃之是戀。大哉靈寶朱丹，長生由三氣之勳。

中央元洞大帝之山，上出黃氣，下治地門，其氣煙如雲，徑蒸九天，元精往來，氣直如弦，上通太上無極，下生神靈。其光如飛景之羅朝日，其明如朗月之照幽城，內有玄膺九窗之闕，外有醴泉玉漿之淵，真人名曰子丹，天中號黃庭戊己天倉玉女，却死主養生宮，號曰大帝。總御九天之真，乘地軸之輦，從六甲六丁，遷賞道功，誅伐魔精，上導自然之和，下極五土之靈，天地守以不虧，陰陽用茲不傾，天氣柔順而無極，人漱脣齒以不零。於是抗虞淵之頽日，反朝霞之始明，迴昏朽之枯叟，革休滅之方清，光顏燁然而還初，神氣充實以流盈。爾乃虬步八域，上升雲路，超羣萃以凌眇，挹天氣以自度，友真仙於太微，後三光而告暮。大哉靈寶黃庭，長生由一氣之固。

西方明石七氣之天，其氣煙如明月之落於景雲，其光如幽夜之覩於明珠，白龍銜芝草而啓騰，靈真降素醴而露濡，斯乃七天之靈澤，上真之瓊腴，氣甘和而澹妙，雖鼎味而不殊。下有

玉泉之長河，上有流英之樓宇，室有太上素女，堂有元氣大夫。乘崩山之鸞虎，騁雲輦於虛無，上導洪精於七天，下和衆生於雲衢，挹雲露於皓芝，飲靈液於龍鬚，叩天池而鳴鼓，收甘津於舌端。所以存之者莫墜，爲之者永居，是以却素髮而玄黑，反枯朽而嬰孩。爾乃鳳舞景漢，朗嘯清虛，枕雲岫而鍊神，養精和於太初，致真人而爲友，安知榮辱之所如。大哉靈寶明石，長生由七氣之娛。

北方玄滋五氣之天，其氣煙如飄風之激於炎林，其光如流星之墮於洪波，煎玉飴於龍鼎，汲玄氣於天湖。下有長生之淵，中有太上之家，室有夜光玉女，服雲林之翠羅，乘靈虬以啓真，駕鹿輦於天河，上導五常之流氣，下拯萬生之衆，和護二儀而不傾，保羣命以永遐，天致元精於太玄，真人養三府於齒牙。所以爲之者長存，用之者壽多，漱神津於元首，合淳氣而弗華。於是迴陽光之西傾，還昊日於東陵，却衰枯之絕煙，反童稚而方升。爾乃鴻鼓雲

池，勃鬱而龍騰，友真人以論好，與靈仙而高登，其德洪矣，焉有能勝。大哉靈寶玄滋，長生由五氣之興。

### 靈寶五帝官將號

夏禹撰出天文中字，會稽南山之陽所演集。

東方靈威仰，號曰蒼帝，其神甲乙，服色尚青，駕蒼龍，建青旗，氣爲木，星爲歲，從羣神九十萬人，上和春氣，下生萬物。

南方赤飄弩，號曰赤帝，其神丙丁，服色尚赤，駕赤龍，建朱旗，氣爲火，星爲熒惑，從羣神三十萬人，上和夏氣，下長萬物。

中央含樞紐，號曰黃帝，其神戊己，服色尚黃，駕黃龍，建黃旗，氣爲土，星爲鎮，從羣神十二萬人，下和土氣，上戴九天。

西方曜魄寶，號曰白帝，其神庚辛，服色尚白，駕白龍，建素旗，氣爲金，星爲太白，從羣神七十萬人，上和秋氣，下收萬物。

北方隱侯局，號曰黑帝，其神壬癸，服色尚玄，駕黑龍，建皂旗，氣爲

水，星爲辰，從羣神五十萬人，上和冬氣，下藏萬物。

### 靈寶要訣

霍林仙人授樂子長，隱於勞盛山之陰。

道士入山採藥，採八石靈芝合丹

液，及隱身林岫以却衆精，諸無靈寶五符者，神藥沈匿，八石隱形，芝英藏光，所學不成，邪氣試犯，鬼怪振驚矣。諸見魍魎之妖，以靈符指之，即自消滅。若山精恐脇，亦登摧折，千變萬化唯其所恣也。道士不可妄行非道，非道之法，當遠之也。子之慎至矣。遵大法者，即便收對羣神，攝召萬靈，斬截凶魔，佩五文於肘間，招仙真于九霄，祕靈寶於五方，非同契而永幽。斯乃上皇之玄教，文命藏之於東苗，誓萬劫而一宣，然後覩天書之弗凋。閉口則福微而著，泄漏則禍重而梟，是以帝嚳之至親，不與鬻子於唐堯。

### 太清五始法

行東方之道，木肝王，心爲上相。常以立春、春分入靖室，各首其卧，瞑目存其内，思肝氣正青，赤神侍之，黃

氣養之。隨身正青，上與天通，太清元氣，下入身中，勾芒來至，老君主之。王者行之，則麒麟至，翔鳳發，而萬物華茂，歲星順度，精通太微，南夷服，靈瑞至。

東方仁，木王，火相，土死，金囚，水休，囚死當養子爲父報仇。

行南方之道，火心王，脾爲上相。常以立夏、夏至入靖室，各首其卧，瞑目存神，内思心氣正赤如日，黃神侍之，白氣養之，隨身正赤，上與天通，太清元氣，下入身中，祝融來至，太一主之。王者行之，鳳凰來翔，甘露降，景風扇，萬物育長，天垂景星，熒惑順常，蕙莆生，嘉禾成，西夷服，中國豐。

南方禮，火王，土相，金死，水囚，木休，囚死當養子爲父報仇。

行西方之道，金肺王，腎爲上相，常以立秋、秋分入靖室，各首其卧，瞑目存神，内思肺氣正白，黑神侍之，青氣養之，隨身正白，上與天通，太清元氣，下入身中，蓐收來至，太和主之。王者行之，白虎見仁，被厭孽子，蠱毒

藏形，清風新雨，五穀熟成，萬機得序，玉衡順平，天馬來下，太白順行，東夷服，鸞鳥至。

西方義，金王，水相，木死，火囚，土休，囚死當養子爲父報仇。

行北方之道，水腎王，肝爲上相，常以立冬、冬至入靖室，各首其卧，瞑目存神，內思念腎氣正黑，元氣澌澌，如山出雲，浮行著天，上與天通，太清元氣，下入身中，一身盡熱，赤氣養之，玄黃五色，玄冥來至，道君主之。王者行之，萬水流通，神龜鮮文，理風戢雨，萬物閉藏，休養黃泉，勿妄夭傷，辰星順度，文曜不絕，南夷服，黑丹出。

北方智，水王，木相，火死，土囚，金休，囚死當養子爲父報仇。

行中央戊己之道，土脾王，肺爲上相，六月土王日入靖室，正向南坐，瞑目存神，內思脾氣正黃，白氣侍之，黑氣養之，隨身正黃，上與天通，太清元氣，下入身中，正黃渾如雞子，澹泊無爲，萬物自理，禹疆來至，道君主之。王者行之，則八方被化，百神並營，地

吐醴泉，天垂景星，黃龍見升，精芝英茂，威僖生，甘露降，禾稼成，四夷降伏，天下太平。

中央戊己信，土王，金相，水死，木囚，火休，囚死當養子爲父報仇。

### 食日月精之道

食日之精，可以長生。常以月一日、三日、五日、七日、九日、十五日，日初出時，披髮向日，瞑目念心中有小童子，絳衣文綵，五色熠燿正赤。兩手以摩面，下至心，十二反爲之，日精正赤黃氣，來在目前，入口中，嚙之二九，以手摩送之。呪曰：

日君元陽，與我合德，俱養絳宮中小童子。須臾念下至丹田中止，令人長生。

食月之精，以養腎根，白髮復黑。常以夜半，思腎間白氣，周行身中，上至腦戶，下至兩足心。自然之道，易致難行。常以月十五日，向月呪曰：

月君元陰，與我合德，俱養丹田中小童子。因瞑目自念，月白黃精氣，來在目前，入口中，嚙之三七而止，以手

摩送之，下至丹田中止。

中黃道君曰：天生萬物，人爲貴。人一身形，包含天地，日月北斗，璇璣玉衡，五嶽四瀆，山川河海，風伯雨師，靈星社稷，麒麟鳳凰，龍虎玄武，五穀桑麻，六畜牛馬，鳥獸魚鼈龜鼉，竹木百草，無所不法也。亦立天子，置三公九卿、二十七大夫、八十一元士。亦布九州、百二十郡、千二百縣、萬八千鄉、三萬六千亭、十八萬埃。亦有宮闕、家宅、門戶、井竈、釜甑、粳稷黍稷，諸神可飲食者，人而知之，即可長生也。

人頭圓象天，足方法地，髮爲星辰，目爲日月，眉爲北斗，耳爲社稷，鼻爲丘山，口爲江河，齒爲玉石，四肢爲四時。五臟法五行，亦爲五帝，亦爲五曹，上爲五星，下爲五嶽，內爲五王，外爲五德，升爲五雲，化爲五龍。五臟者，謂肺、心、肝、脾、腎也。六腑者，膽爲肝腑，胃爲脾腑，大腸爲肺腑，小腸爲心腑，膀胱爲腎腑，膾爲都鄉腑。膾爲天子大道君，脾爲皇后貴女，心爲太尉公，左腎爲司徒公，右腎爲司空公。

八卦神八者，并膺太一，爲九卿。十二環樓神十二人，脾中諫議大夫十二人，並三焦神三人，合二十七大夫。四肢神爲八十一元士，上元氣爲冠蓋使者，下元氣爲大鴻臚。上部九變，中部九孔，下部九名，法九州也。三公府、九卿府、二十七大夫府、八十一元士府，合爲百二十府。府內爲五曹，外爲五官，合爲十官，爲千二百縣。中神萬八千，爲萬八千鄉。上神三萬六千，爲三萬六千亭。亭有五埃，爲十八萬埃。又肺爲玉堂宮尚書府，心爲絳宮元陽府，肝爲青陽宮蘭臺府，膽爲紫微宮無極府，脾爲中宮太素府，腎爲幽昌宮太和府。

子欲爲道，長生不死，當先存其神，養其根，行其氣，呼其名。頭髮之神七人，字尋長。項上神三人，東王父。腦戶中神南極君，字元先。眉間神天靈君。兩耳神四人，字嬌女。兩目神六人，字英明。鼻中神，字通盧。口神，字丹珠。舌神，字丹黃。齒神三十六人，字衛士。喉中神，字虎賁。兩

眉神，字爵神。兩手神，字魄陰。肺神，字鴻鴻。心神，字响响。肝神，字臨臨。膽神，字獲獲。胃神，字沮沮。脾神，字裨裨。兩腎神，字測測。膺中神，字玉靈子。丹田中神，字藏精。大腸神，字沌沌。小腸神，字梁梁。陰神，字窮英。女人神，字丹精。兩髀神，字陰陰。兩膝神，字軀公。兩脛神，字隨孔子。兩足神，字柱天力士。

子瞑欲卧，從上三呼之，竟乃止。若體有疾痛處，皆隨痛所，九呼其名，令神治之。正卧瞑目，存其神，所疾立愈。月望朔、分至之日夕，皆存神內視，召呼體上神名，使令拘魂制魄。真人曰：子欲登仙，當召身神。

中黃老君曰：子既知身藏之神名，又當知天地父母赤子之家，五城十二樓真人，祕之於太清玄和之府，叢霄之觀，非有仙錄者，不見其篇矣。角里先生口傳之訣於華子期。有欲知天地父母赤子，三一也。天一在華蓋下，人一在斗戶，地一在日月所遊。三一煌煌如明珠，子不守之，生復何求。又地

一在日月所遊，人一在斗戶，天一在華蓋下，元氣翩翩相引也。神龜在中正頗俄，子欲得之當問我。一之所在安在茲，不但守雄復守雌。一在無形甚難知，子不知一萬事失。大如雞子黃，其色如甘橘，出爲半，入爲一，子能守之萬事畢。三一者，身上之三官也。頭、心、膺，謂之三官也。既已知天地父母赤子之家，五城十二樓真人，須當知服神丹金液、太陽流珠太一，必爲三天宮人。子不服此三元，虛自苦耳。

第一先存五獸者，青龍、白虎、朱雀、玄武是也，中央黃麟。此五獸忽變爲山林，其四方林外，有仙人虎賁羽林郎，面各八人，存之廣狹隨意，可隱萬人。

第二當召身中神，從頭至足，存其神，養其根，行其氣，呼其名，必得長生神仙。

第三守地一，名曰丹田，皓白如雲，五色玄黃，道母所居，溺水胞中。第四守人一，名曰絳宮，南極太一，赤子小童，右月左日，魂魄合并。

第五守天一，名曰紫宮，大如混雞子，九色玄黃，交結星曆，身上紀綱。

第六食神丹，太陽之精。常以月一日始七之生，三五七九及九月半甲子、丙午日爲之。入室瞑目，存日精赤氣，下入口中，而嚙之八十一氣。真人曰：食日之精，與天地相傾。

第七食金液，玄水之精。常月十五日時加夜半，入室瞑目，存月精正白，下入口中，而嚙之四十九氣。真人曰：食月之精，是故長生。

第八食星玄氣來下，青白丹黃。常用有星夕初夜之時，入室瞑目，春存歲星之精青氣，下入口中，而嚙之九十氣止；夏存熒惑之精赤氣，下入口中，而嚙之三十氣止；秋存太白星之精白氣，下入口中，而嚙之七十氣止；冬存辰星之精黑氣，下入口中，而嚙之五十氣止；四季之月二日，存鎮星之精黃氣，下入口中，十二嚙之止。四季月，十二月、三月、六月、九月是也。用月二日爲之，內視精心，自見其氣。真人曰：食星之氣，與天相暨。

第九行太極紫雲彌天，升降上下，混沌自然。是謂八節之日，入室瞑目

內視，存泥丸中紫氣出上升天，絳宮中赤氣出上升天，丹田中黃氣出上升天。須臾，有三童子從天來下。其一童子衣紫衣，號護腦真人，從紫氣中徑下，來入泥丸宮，紫氣隨從還腦門。其一童子衣赤衣，號護心赤子，從赤氣中徑來下，入絳宮中，赤氣隨從還心中。其一童子衣黃衣，號護藏靈人，從黃氣中來下，徑入丹田中，黃氣隨從還臍門。如是此三童子，補氣除惡，練摩血氣，勅魂安魄，定心充脉，使光澤流通，津池補滿。良久間，體中休休納納，頤頤挹挹，即三童子護身之力。極念爲之，思存三宮心充門開，三童子忽飛還上天，門登閉矣。

真人曰：子欲不忘，審致天童。天童來下，乘空爲馬，護子身神，是以成仙。子不存神，尸魄上言。其道有九，爲之者壽。鐘山真人，傳之於禹，與天相保，上升玄府焉。

夏禹授鐘山真人食日月星之法

隱之於洞庭之墟。

食日之精，子必長生，緣以上天謁元先。常以月一日、三日、五日、七日、九日、十五日，日出時至日中食先，念心中有日，日中有玄蓋，蓋下有小童正赤，赤氣徧身中身外九重，思氣滿頭，從頂出，上升天，繞日九重。呪曰：日君元陽，還歸絳宮，與我合德，俱養小童。因思日精來下，入鼻孔口中，嚙之三九，滿心中。心中有三人，左即太一父也，右即玄光母也，中央即赤子小童也。坐金牀玉榻，執玉梓玉杯，杯中玉英神酒，并天芝草見在，食飲之，仍不饑渴而長生矣。

食月之精，可以長生，緣之以上天。常以十五日夜半時，向月再拜，呪曰：月君元陰，還歸丹田，與我合德，俱養小童。因思月白氣黃精來下，入鼻口中，嚙之三七而止。月精託腎根，長生矣。

食星之精，上升太清。常以日出、晡時、日中、夜半，上念北極太皇星。

呪曰：皇天上帝，太上道君，曾孫小兆某甲好道，願得長生。因念星精來下，在兩眉之間，流入鼻孔口中，嚙之三五，思氣滿心膽脾中。脾中有道母，主哺養赤子，即不飢長生矣。

太上洞玄靈寶五符序卷上

音釋

碩古紅切。蕙山洽切。莆方殫切。

### 太上洞玄靈寶五符序卷中

#### 靈寶服食五芝之精

老君曰：松生千歲，脂凝通神，下入於地，藏姓易名，棄本即大，因根成形，名曰威儔，一字茯苓。辟兵陸沈，出竊入冥，不飢不渴，日月合并，子能服之，即得長生。

老君曰：苟蝨養體，住色還年，一字胡麻，本生大宛，生來萬歲，來東度關，留在中土，斷絕胡蠻。含水之精，却風除寒，自名巨勝，擯逐邪奸，服之不息，與世長存。巨勝、威儔結親，出胡國，能調和精神，子能服之，故得長生。

老君曰：椒生蜀漢，含氣太陰，天地俱生，變化陸沈，故能却濕，邪不敢侵，噉鬼蠱毒，靡有不禁。子能常服，所欲恣心，世之祕奧，其道甚深，堅藏勿泄，不用萬金。

老君曰：薑生太陽，與椒同鄉，俱出善土，窈窕山間，堅固不動，以依水泉，含氣熒惑，守土本根，背陰向陽，與

世常存。故能辟濕，劫寒就溫，除邪斬疾，閉塞鬼門，子能常服，壽若乾坤。

老君曰：菖蒲生澤，附近深淵，下濕之地，浦瀆水濱，有生高山，石上結根，一寸九節，是謂靈身。固得之一，含氣萬元，故能生人，保養精神，逐水辟濕，厭鬼消患，鬼魅魍魎，遠迸幽昏，彊殫之屬，皆不敢前，服之不休，壽至千千。

樂子長曰：此五物皆可單服，並益氣住年，延精定魄，服之不休，與世長存。故《孝經援神契》曰：薑椒益氣，菖蒲益聰，巨勝延年，威儔辟兵。此即孔丘之祕言，上聖之明旨也。

老君觀天合服五芝草丹，留神住年度世長存方。

#### 靈寶三天方

樂子長書出文。

巨勝五分、威儔四分、蜀椒一分、乾薑三分、菖蒲三分。皆取真新好者，精潔治之。凡五物，以王相日，童男擣藥，勿易人也。各異治，下細篋，五物各萬杵。五物各異置赤杯中，凡五杯，羅列

赤案上，露一宿。明日平旦，乃以神斗分之，合和如法。和以白蜜，若白飴，後更擣三萬杵，丸如梧子。平旦向日長跪，吞三丸訖，言長生，得所願。暮日入，復跪西向，復吞三丸，如旦法以爲常。禁食生魚、猪肉、韭菜，禁見喪尸、犬猪、產洩。慎之。曰此是一劑也。若服盡更合，可計藥分并合之，多少在意，令周一服者乃佳。至於杵數，可都共益一萬杵耳。合和更擣，是爲四萬杵也。

甲子建天，癸亥數路，晨昏爲期。慎勿敢忘。六十一節，天地之常，服之如法。甲癸爲明，甲子建日，服至癸亥日，爲一節。若甲子無建者，滿定開亦佳。服藥皆先齋三日，燒香存神，然後即事也。滿六十日，身輕能行；復六十日，四肢通利；復六十日，顏色有光；復六十日，平調腹腸，五臟皆實，凶邪不傷；復六十日，身體堅彊；復六十日，耳目聰明。此是一歲驗也。復六十日，骨體彊梁；復六十日，手爪有光；復六十日，影響顯彰；復六十日，精氣益長；復六十日，白髮還藏；復六十日，牙齒堅剛。此是二歲驗也。

復六十日，道德達通；復六十日，六甲神從；復六十日，神達身中；復六十日，志信神行；復六十日，心開目明；復六十日，遠知四方。此是三歲驗也。復六十日，瞻視有光；復六十日，五神不亡；復六十日，不知飢渴；復六十日，百神來謁；復六十日，五藏不竭；復六十日，能寒能熱。此是四歲驗也。復六十日，能浮能沈；復六十日，能淺能深；復六十日，能圓能方；復六十日，能弱能彊；復六十日，能縱能橫；復六十日，能短能長。此是五歲驗也。復六十日，能好能醜；復六十日，能少能老；復六十日，能大能小；復六十日，能輕能重；復六十日，出入無間；復六十日，行厨在邊，位爲仙人。此是六歲驗也。長服不休，與天相傾，變形千化，上升太清。

### 靈寶巨勝衆方

霍林仙人授樂子長，隱於勞山之陰。

巨勝一名胡麻，一名苟蝨，一名莫如，一名三光之遺榮，一名天地之更生，一名流朱，一名九變，一名幽昌，一

名含腴，一名青襄。青襄，葉名也。

### 延年益壽神方

胡麻子，好者擇治，去否穢，蒸之如炊，須曝乾復蒸，九曝九蒸乃止。治下細篔，以白蜜丸，服如雞子一枚，日三。又一方云不能丸，服成末三升以爲常。服之一一年而色美，身體滑澤；服之二年，白髮返黑；服之三年，落齒更生；服之四年，入水不濡；服之五年，入火不焦；服之六年，走及奔馬。此藥甘香而美，易持難厭，方祕不出，百年一傳。

### 餌胡麻法

取一斛淘洗，去上黑皮，令正白，蒸之一日，曝乾磨之，擣之亦佳。溉釜中石五斗水，復蒸之，令釜中有石許水，因下甑瀉胡麻，置木杵中，悉以石湯沃之。以麥蘖一斗細擣，納中釀之，如作糖狀。卒時擠去糟，煎之三分餘一分，更置銅器中，浮湯上釜中猛火，無令沸絕。可丸止當如雞子者，三丸服之百日，充益肌肉，鬢髮皆黑，耳目聰明。能長服之，命無窮矣。



### 胡麻膏

胡麻膏一斗，薤頭三斤，微火上煎之，令薤焦黃絞去滓，以酒服之，日中一升。百日以去，服之肌膚充盛，二百日老者更少，三百日延年益壽。久服神仙也。

### 真人絕穀方

取巨勝二斗，大椒五升，去黑皮訖，合搗二物下筵。初服五合，日三。漿水無在，亦可蜜丸，服如雞子一枚，日四，漸自不飢。荒年亦可但服此藥，便當絕穀矣。渴但飲水，勿食他物，食他物便飢也。能令氣力百倍，寒暑不侵，百病悉愈，神仙自致矣。

### 真人絕穀餌巨勝法

取巨勝一斛，蒸令熱氣周達，便曝之一日，凡九蒸九曝，合用九日。訖，搗下筵，和以白蜜，服如雞子一枚，日三，久久食穀自少。服之百日，百病自愈，洗水不著身；服之一年，玉女侍衛。若急用者，亦可一日三蒸三曝，三日凡合九蒸九曝，便可用矣。天陰者，皆須日出，用一斛，加茯苓三斤，合搗，

蜜和，服如上法，得力益速，能補精髓，漸漸自不飢，渴則飲水。

### 真人輕糧辟穀不食方

巨勝一斗二升，取純黑者，茯苓二十四兩，澤瀉八兩，治三物萬杵，以水服如彈丸，日三。遇食可食，無食復取百物食之，無所禁。

### 出外益體服食方

取麻子五升，溫湯漬浸之，令開口去皮。羊脂二斤，合麻子中仁，微火煎熟，食飽為度。渴飲水，欲飯自在，更合如前。麻者，五穀之長，可以知萬物，通神明。七月七日取麻勃一升，真上黨人參半斤，合搗並蒸，使氣出，徧服一刀圭，無不驗矣。

### 辯菊億法

菊華與億華相似，宜以甘苦別之，菊甘而億苦也。今所在有菊，但為少耳。率多生於水側，緱氏酈縣最多耳。真人曰：日精、更生、周盈、神精、長生，皆一菊也，而根、莖、華、實異名。其說甚美，而近者服之略無效，正由不得真菊故也。

### 延年益壽方

春三月甲寅日，日中時採更生，葉也。夏三月丙寅、壬子日，日中時採周盈，一方云周成。周盈者，菊之莖也。秋三月庚寅日，晡時採日精。日精者，菊之華也。常以冬十月戊寅日，平旦時採神精。神精者，一曰神花，一曰神英，菊之實也。無戊寅者，壬子亦可用也。冬十一月、十二月壬寅日，日入時採長生。長生者，菊之根也。一方云：十一月無壬寅，壬子亦可用也。一方云：都合五物，皆令陰乾百日，各令二分，治合下筵。此上諸月，或無採之日，則用戊寅、戊子、戊辰、壬子日也。春加神精一分，更生二分；夏加周盈三分，更生二分；秋加神精一分，日精二分；冬加日精三分。常以直成日合之，無用破危日合之也。一方云：亦爾不用執日，令藥神不行。當於密室中搗，丸用白松脂，大如梧子服之，日三，服後飯。服之一年，百病皆去，耳聰目明身輕，益氣增壽二年。服之二年，顏色悅澤，氣力百倍，白髮復

黑，齒落更生，增壽三年。服之三年，山行不避蛇龍，鬼神不逢，兵刃不當，飛鳥不敢過其傍，增壽十三年。服之四年，通知神明，及與五行，增壽四十年。服之五年，身生光明，日照晝夜，有光關梁，交節輕身，雖無羽翼，意欲飛行。服之六年，增壽三百歲。服之七年，神道欲成，增壽千年。服之八年，目視千里，耳聞萬里，增壽二千年。服之九年，神成，能為金石，死能復生，增壽三千年。左青龍，右白虎，黃金為車。又一方云：春加神精二分，更生二分；夏加神精一分，周盈二分；秋加日精二分；立冬加神精二分；冬至加神精一分，長生二分。日吞十丸，旦暮各五。一方云：秋加神精一分，日精二分。一方云：春加周盈二分。

著釜，熱復摩之，令盡四斤脂。納汁釜中，炊以糠火，若蠶沙，四五日藥成，其色如金，狀如小兒哺。服如雞子黃，日三。服百日，父母不能識，令人顏色美好。夏徵舒母所服，壽七百年。乃仙去神方，祕之。

夏禹受真人方

樂子長書出，隱於勞山之陰。

赤箭，一名離母，一名鬼督郵，一名神草，一名獨搖，一名當苦，一名勝子，一名鬼箭。生陳蒼、生少室，生上洛堯流山、太山之陽，或諸名山之南，生南陽諸溪澗，或生谷中陰處。一莖生有節葉，其巔如竹葉，有風不搖。常以三月採取，盡其根無所去，擣絞取其汁，停置器中，曝乾其滓，乾復納汁曝乾，治服方寸匕，後食，令人不老。十日知效，三十日氣大至，百日以上身輕，耳目聰明，一年齒髮更生。其莖赤，如弓箭，根似人足跗有指處，但無爪也。其子似小羊兒。一曰根如芋魁，其子似芋子，居其傍不與相連，多者十餘枚，朝居母西，暮居母東，日中

居母下，盡取之。中央有王，大如指，小者如環之，十二枚，四邊各三，是其衛也。取之先齋戒百日，以酒脯醮其母，於日下乃取之，裹以丹囊，盛常置左腋下。其王名六甲父母，隱五百人衛，子能隱一人衛。此藥母至死喪生乳者家，藥神即去矣。一曰葉如母指大，指有四赤羽上下竟。冬夏生，採無時，主治惡鬼精物，蠱毒惡氣，中寒熱擁腫，起陰益氣，肥健輕身，久服延年。其味苦。

章陸根，味酸有毒，主胸中邪氣，塗擁腫，殺精物，練五藏，散水氣。根如人形者有神，生故墟、田間，三月、八月採。章陸草，一名夜呼，一名蕩根，一名當陸，一名莧陸，一名長根，一名商陸草，一名神陸，一名白華，一名逐邪，一名天草，一名逐陰之精。此草神草也。

去三蟲殺伏尸治面黧黑益智不忘男女五勞七傷婦人乳產餘病帶下去赤白皆愈方

麴十斤，米三斗，加天門冬，成末

取杏子三斗，去其中兩仁者，作湯纔沸三四沸，納杏子湯中，有頃，手摩令皮去，熟治之。置瓮中待之，清其汁，計度得七八斗。棄其滓，取一石釜置糠火上，以羊脂四斤摩釜中，令膏盡

一斗，漬章陸六日，便齋服。五日食減，二十日穀絕腸肥，財容氣息，諸蟲皆去，耳目聰明，癥痕皆滅。以月宿與鬼日，加丁時，取商陸，服如棗，日三。道士恒種此藥草於靜室之園，使人通神。

令人不老長生去三蟲治百病毒不

能傷人方

取章陸根四十斤，削去上皮，細切之。以水八斗，於東向竈煎之，令減半，去滓更煎之，令可九服，如梧子一丸。大良作之，勿令人見。又一方：取章陸三十斤，正月、二月、九月、十月、十一月、十二月採取，過此不中用。取章陸，淨洗麤切，長二寸許，勿令中風也。絹囊盡盛，懸屋北六十日，陰燥末治下篋。方寸匕，水服，日一，先食。十日見鬼，六十日使鬼取金銀寶物，作屋舍，隨意所欲。八十日見千里，百日身能飛行，登風履雲，腸化爲筋，久服成仙人。

真人長生去三尸延年反白之方

宜服丹光真華之母，宜食浮水玄

雲之髓，此自然能生，千歲一變，百歲一化，先變後化，天不復害，神鬼無柰何，故可服也，故得生也。丹光之母者，松脂也。浮水之髓者，茯苓也。能伏鬼神，却死更生。松脂流入地中，千年變爲茯苓，茯苓千年化爲琥珀，琥珀千年變爲丹光，丹光色紫而照人。丹光千年變爲蜚節芝，蜚節芝千年變爲浮水之髓，浮水之髓千年化爲夜光，夜光千年化爲金精，金精千年化爲流星，流星千年化爲石膽，石膽千年化爲金剛，金剛千年化爲木威僖芝。夫金入火不耗，入水益生。夫松脂之變，蓋無常形，故能沈淪無方，上升太清。此飛仙之法，勿傳非其人。

方曰：先取松脂、茯苓各十二斤，以水漬茯苓、松脂七日，朝陽去水。以醇酒二斗，與茯苓合餌之，以曝令乾。月食一斤，欲不食。因鍊松脂，去苦鼻，以火溫之，納茯苓中治合，和以白蜜。三物合服之，月各一斤，百日身輕，二百日寒熱去，三百日風頭胸目去，四百日五勞七傷去，五百日腹中寒

癖飲癥氣去，六百日顏色住，七百日面黧去，八百日黑髮生，九百日灸癥滅，千日兩目明，二千日顏色易，三千日行無跡，四千日諸痕滅，五千日夜視光，六千日肌肉易，七千日皮脉藏，八千日精神彊，九千日童子薄，萬日形自康，二萬日神明通，三萬日白日彰，四萬日太一迎，五萬日坐在立亡。日三食，慎勿忘，但過萬日，仍自縱橫，變名易姓，升皇天。

古有黃初平者，正服此藥，方成真入。初平，丹溪人也。年十五，家使牧羊，有道士見其良謹，便將至金華山石室中，四十餘年，忽然不復念家。其兄初起，行索初平，歷年不得。後見市中，有道士，乃問之曰：吾弟牧羊，仍失之四十餘年，不知死生所在，幸願道士爲占之。道士曰：金華山中有一牧羊兒，姓黃，字初平，是卿弟也。初起聞之，即隨道士去，求得弟相見，悲喜語畢，問初平曰：昔羊皆何在？初平曰：羊近在山東。初起往視，了不見羊，但見白石。還謂初平曰：山東無

羊也。初平曰：羊在耳，但兄自不見之。便起俱往。初平言叱，叱羊起，於是白石皆起成羊，數千萬頭。初起曰：弟獨得仙道如此，吾可學否。初平曰：唯好道便得耳。初起便復棄妻子，留就初平，共服松脂、茯苓，至五萬日，坐在立亡，行日中無影，有童子之色。乃俱還鄉里，親戚死亡略盡，乃復還去。以方教南伯逢，易姓為赤，初起改字為赤魯斑，初平改字為赤松子。其後服此藥仙者數千人。

**赤松子方**

七月十六日，去手足爪，除腹中三尸蟲矣。

**入山終身不食方**

用大豆十分、葳蕤三分、澤瀉一分、飛英一分、藁本葉半分，凡五物治下篋，和以棗脂，丸如李子，日吞三，食棗二十一枚，可終身無食。若無棗，常飲玉漿泉。

**黃帝受黃輕四物仙方**

一曰鴻光，二曰千秋，三曰萬歲，四曰慈墨實，合作四物，丸用白松脂，

大如雞子。服之七年，身壽四萬三千歲不死。長服之，可與天地相守。黃帝曰：此四物形狀何似，可得聞乎？黃輕曰：鴻光者，雲母也。千秋者，卷栢也，生於山石之間。萬歲者，澤瀉也。慈墨者，莧實也。丸以松脂，如雞子，旦暮服一丸，令人長存，不飢渴。

**真人四物却穀散**

用茯苓屑三分、乾地黄屑一分、胡麻屑一分、天門冬屑一分、胡麻火熬之，凡四物治合，搜以食蜜，日服方寸匕，美漿水酒為服之。三十日氣力有異，百日倍，一年後氣色如雲，夢與神遊，三年骨騰肉飛。

**槐木者，虛星之精，長服之年老更壯，腦不損耗，好顏色。以十月上巳日，取槐子盛新瓦瓮中，覆一瓦盆，蓋之泥，封之三七二十一日，發洗之，其外皮皆去，中子如大豆狀。服之從月一日始，一日服一枚，二日服二枚，三日服三枚，從此至十日，日加一枚，計十日服五十五實，大月服一百六十五，小月則不能以大月計。計一年服一千**

九百八十實，一年有六小月，即減六十實。

**又服食治病方**

以十月上巳日，取槐子，陰乾百日，擣去皮，取子著瓦器中盛之。欲從一日始，日服一枚，十日服十枚，復從一始，滿十日更之，如前法。欲治諸卒病，留飲宿食不消，胸中氣滿，轉下下利，一服一合，二合愈，多服無毒。若病人食少，勿多服，令人大便剛難。

**又去三蟲法**

取槐子，不須上巳也。得取取之，并上皮擣，令可丸，丸如杏核。一服三丸，日二服，多作長服亦善。亦可以蜜丸之。

**延年益壽方**

槐子熟者，置牛腸中，陰乾百日。於後飯旦夕吞一枚，十日輕身，三十日髮白更黑，百日面有光，二百日奔馬不及其行。

**又却老方**

十月上巳，服槐子一枚，日轉增一，至十日更復從一始，正當上巳日造

服之也。

### 真人住年月別一物藕散

凡一物，七月七日採藕華七分，八月八日採藕根八分，九月九日採藕實九分，治合藥畢矣。服方寸匕，授南陽劉長生。長生居清淵澤中北界。長生服藥七十餘年，不壯不老。欲知其驗，取雞雛如鴝鵒大者，與共服藥，三年故爲雛子矣，長服仙也。藕實一名水芝丹，一名茄實，一名芡實，一名蓮花，一名芙蓉。其葉名荷，其小根名芋，大根名藕，其初根名芡，與雞頭爲陰陽。以八月上戌取蓮裏實，九月上戌取雞頭實，九月上午取藕，各分等陰乾百日治之，正月上卯平旦，井華水服一方寸匕，日四五，後飯服之，百日止。主補中益氣力，養神不飢，除百病，久服輕身延年，不老神仙。雞頭實，一名鴈實，一名天門精，一名天禹，一名曜味甘，治濕痺、腰脊痛，補益氣彊志，耳目聰明，久服輕身不飢，神仙也。

### 住年方

以八月直成日取蓮實，九月直成

日取雞頭實，陰乾百日，擣分等。直成日以井華水服方寸匕，滿百日，壯者不復老，老者復壯。若爲不然，以藥別食雞雛百日，即知驗矣。久服之神仙。

### 服食麋角延年多服耳目聰明黑

#### 髮方

取新角，以刀削去黑皮，取中白，熬令色黃，熟治。服方寸匕，日再服，三十日通知神明，六十日力百倍，百日通神，常服壽無極延年。明子高、容成服之，以致仙，范蠡服之，遊在民間。

黃精之草，太陽之精也。結氣九天，浮遊八朗，逐風流化，散精六合，依山寄名，因雲雨之潤，附景託形，而爲草物。其生太行之坂，立根磐石之側，含精三陽，隨氣敷榮，育養淳和，溫調甘露，上承太火於少陽，吐葩於盛夏，積精成真，充根累節，色黃味甘，朝出向陽，雲葉理通，與衆草不羣，萬物不雙，此所謂中黃之所處，積陽之所宗，其神化者也。蛇食之化爲龍，鳥食之化爲鳳凰，人食之爲仙王。大哉此草，獲天地之淳精也。而天下人莫知其真

也，知之莫之能食也。故《九天大仙經》曰：天地神靈三萬六千，入人身中，人莫能使。服食仙藥三萬六千種，而人莫能用也。長生久視，人莫之能爲也。神聖可致，壽命可延，人莫之而通也。神雖明，服食易見，應時有效，而人莫常爲也。人自守貧賤養身，長生久視者，未見之也。逐勢趨利者，今人爲之。若使人求長生如求利者，無不皆得也。人能棄去榮華，修守清靜，以常無爲，求諸玄妙，服食此草，四時不廢，可致延年。若能棄世俗，幽居名山，服食此草，可與天地相望，衆神集會，太一候迎，上升天府，下遊崑崙，可與天地終始者也。此草與鈎勉相對。黃精，太陽之精，入口使人長生，鈎勉者，太陰之精，入口使人即死，不知其相對也。人但信鈎勉之殺人，而不信黃精之生人，不能服之也。鈎勉者，野葛也。日南諸夷山藪中，名野葛爲鈎勉，食之入口便殺人，其毒煩冤，氣鈎人腸，必勉絕之，故名之曰鈎勉也。是謂世人忽於長生，貪慕時榮也。唯黃精之爲草木，長生三陽之氣，上入

太清之宮，鍊精玄妙，隨化淳和，光流九野，布六合之內，依雲藏山，隨氣而化，植根立莖，隨葉通精，結味甘香，其

肉充盛，骨體堅彊，力倍少年，身體康壯，神仙服食，唯此爲昌。

### 靈寶黃精方

以春取根，淨洗薄切，熟蒸之，曝

可令燥，搗服方寸匕，當露搗之。一名

馬箭，一名菟竹，一名葳蕤，一名可沮，

一名羊括，一名仙人餘糧，一名苟格，

一名垂珠。其葉名雞格根，一名黃精，

一名白芨，三月採根，可餌也。主輕身

益氣明目，餌服令人耐飢，其味甘無

毒，陰乾五十日成，取實一斗，漬以甘

水，二斗爲漿，若酒服之爲常，可不死

也。服黃精根，多益善，洗刮令土盡，

一斛根以水二斛煮之，令盡味出之，益

清復煮再過，味足以盡也。合煎汁湯

上竭，令去火止內，熬大豆末，餅之如

大錢，服多少自在，味甘香。亦可取根

蒸，若煮食無多少。始生時亦可取莖

葉，爲菜茹齧食之，此一日重樓也。若

煮食之，汁可飲，勿棄去也，汁甚香美。

欲餌之法，以二月、八月取根，刮去毛，

熟洗細切，一斛煮以水六斗，炊火令

和，旦至夕藥熟，出使寒，手授之使碎，

酒囊醅得汁還竭，令可丸。取滓乾末

納釜中，令和藥成，服如雞子者，日二。

可絕穀不食，不寒不暑，行及奔馬，百

病自愈。人能絕房內則不老，壽無期

至仙人，不絕房內，止可壽二百歲耳。

服此藥，不避虎狼，不畏兵革，行山中

生食之，恣口渴飲水生食，又善通神

明，亦可散服，未必餌也。服黃精不知

老，令人有好顏色，白髮黑，落齒生。

服食黃精三十日，通知神明，百日欲騰

躍，走及奔馬，不知倦極，二百日之後，

乍見乍亡，十年仙道成。數有效驗，前

世多服此方。今者有但服華者，黃精

之精，一名黃華，其味皆甘香也。取其

母煮之以爲飲，寬中益氣，常以爲飲，

甘香辟惡氣，令人有色澤，耐寒暑。一

名救窮乏糧，凶年可與老小休糧而食

之，服其華，勝其實，實勝其根也。天

官名此草爲戊己芝。

昔人有至霍山赤城內者，見其中

有數千家，並耕田懇陸，盡以種此草，

多者數十頃，少處數十畝，而其根莖殊

大，當是鋤護之至，不如於山中櫓出而

丁，玉女在傍，服食千日，坐在立亡。春秋葉根，調和陰陽，丸及餅餌，顯味甘香，食在多少，在意無量。莖葉嚮淳，汁可爲漿，寬中益氣，五臟調良，肌

生矣。草澤皆有之也。昔人即問赤城人：種此草何爲？人對之云：此仙草，此中人由來並食之耳，使人長生矣。吳主孫權時聞其說，所言之審，即使人於江東山中種而食之。但權不絕房內，爲諸不靜，遂不能得其益也。爾時皆使監司領兵人專守之，吳敗，而此里名故存。江東或名之爲菟竹里，或名之爲黃里，是權時種植之故處也。

弟子葛洪曾聞之於鄭君，言識其始，云：子服戊己壽不已，子服長生之精，與天相傾。又聞葛仙公所傳云：諸修長生之道，當先去三蟲，下伏尸，乃可將服食，休糧絕穀耳。不去三蟲伏尸，而絕穀者，多所思念，於身不善，又復喜遇好食，令人意亂不覺，惑而犯之也。若能修無爲，食氣自然，漱醴泉者，上也。人多不能，則可以藥助之，先下伏尸，然後服食，則有效，此道之次也。合藥當以破除，日辰王相，天清無雲，乃丸藥於靜處，勿說服藥也。三蟲無耳有聞，無目有見。先沐浴蘭香，齋戒三日，避婦人，斷食猪犬肉。食此

物肉令人死，不得上天，但止泰山，入三官地獄，爲守檻鬼吏。此科施於道士矣。又忌食猪犬肉者，食之令人老則忘誤，面目羸瘦，齒敗聲壞。夫食清真者長生，食穢濁者命斷也。鴛不殺於蠱動，故有千年之壽；鵠不履於黑水，故有百之齡。性潔者受真，氣清者壽考，自然數也。

#### 仙人下三蟲伏尸方

用茯苓十斤，章陸根削去上皮，但取下白者五斤，清酒、麥麵麴各五斗，并炊釀之，置瓮中，封之二十日，藥成劑之。但取純大豆，熬作末，如飴狀，合丸如大彈丸，日服三丸，十日以去稍益，如雞子黃，上尸百日，中尸六十日，下尸三十日爛出。上尸如手，中尸如足，下尸如雞子；上尸黑，中尸青，下尸白。此三尸與人俱生，常欲令人死，至晦朔日，上天白人罪過。晦至其日，當拘魂制魄，及守庚申夕，於是三尸不能得動矣。是其夕，人夢與他人爭鬪者，是魄與尸鬪也。夫魂常欲寧，身故不欲伏尸，魄常欲寧，神故欲恍惚，三

尸常欲人死，故欲攻奪，此之謂也。凡道士、醫師，但知按方治身，而不知伏尸在人腹中，固人藥力，令藥不效，皆三蟲所爲。上尸好寶貨千億，中尸好五味，下尸好五色，若不下之，但自欺耳。去之即不復飢，心靜無念，可得遂生。真人貴其方，道士尊其藥，賢者樂其用，愚俗笑其事。所以言人死爲尸骸者，坐是三蟲之位號也。但作服章陸散者，乃自除去三尸，不必須釀而服之也。槐子亦善。能服氣者，不用此術。又真氣是青牙，五方之精，道士服之二十一日，三蟲走出矣。

#### 樂子長鍊胡麻膏方

以二斗膏、一斗水，合二升薰陸香、一升沈香，屑二兩合煮，令水盡，唯餘膏在。劑其屑，日以酒服五合，百日玉女侍之神效，五百日神仙至迎人去。道家祕此方，初不輕傳。

#### 樂子長服胡麻法

熬胡麻一斗，令香擣爲屑，令如粉，囊盛，納五斗酒中，封泥二十日，以酒服，胡麻膏也。屑亦可服。

靈寶太玄陰生之符

夏禹文，命受之於鐘山真人。



尸解下仙之道。其壽亦與天地相畢，可以地仙遊名山。服尸解藥，日數足，即作此符，丹書白素，以置腹前，以戊己日西首卧，思念自作死人，良久，解衣留所卧處，徑去入山。若之遠方，易姓名，勿還故鄉。其初去時，人見其卧處有死人尸，久乃忽然不知尸所在也。

尸解藥

以三月中殺牛，煎取脂一斤半，水銀一斤半，錫一斤半。於山中密地齋一月，乃於銅器中煎錫，錫消，納水銀及脂，都合同丸之，服如大豆三丸，日三服。服之九日，凡八十一丸，忽然尸解蛇蛻而去。去時如上符節度，若不得，即去更服，趨令得去矣。

真人曰：文用朱兒，帛用鮮支，盛

用鮮支囊。古人名丹砂為朱兒，絹帛為鮮支也。

去伏尸三蟲方

用三月三日，取桃葉，擣取汁七升，以苦酒合煎，令得五六合。先食頓服之，宿無食。

神仙修養方

用成日煎牛脂，若羊脂一斗，胡麻一斗，乾薑百累，生姜半斤，生地黄一斤，皆擣絞之。大銅鑪中微火上煎，使藥味盡，脂色變黃，成絞去滓，取如雞子者一枚，投酒中服之，日三，令人百病皆愈，髮黑齒生。

神仙釀酒方

生地黄十斤、生薑三斤，刮去皮，天門冬五斤，剥去皮，皆細切合擣，令如齋。以美酒一斛漬之，分著兩甕中，密塞其口，以甕著大釜中熟煮，使發甕塞，熱氣勃勃，射出則可也。冬夏常溫服一升，仍以卧，當覺藥氣炯炯，流布身中。此酒補虛勞，益精氣，令人健飲食，耐風寒，美顏色，肌膚光澤，延年。

朮酒方

朮成末五斗，絹囊盛之，漬一斛美酒中，十日出朮曝乾之。仍以朮酒服三方寸匕，日三，治百病神。或以秫米飯投酒中，合釀酒成，亦良食其滓。

神酒方

治百病，益精補氣，令人美肌色。桂三斤，一云三尺，精治取其肌，天門冬成末五升，納絹囊中，置五斗米釀酒中成，服之多少隨意。

胡麻酒方

用胡麻五斗，熬之令香，擣使熟，以攪一斛秫米飯中，釀之如常釀法。酒成飲之，多少隨意，令人肥白，肌膚潤澤。

地黄神酒方

用秫稻米五斗作粥，絞去滓，令得二斗，納好麥麩三斤，令浮起酒香。取生地黄十斤，小曝乾之，熟擣之，細炊一斗米飯，合納汁中，攪令相得，封泥經日，視地黄熟，但有筋脉，再絞其滓。又炊二斗米飯，納中酒熟。飲一升，日三，治百病，五勞七傷，續骨連筋，填骨



髓，久服延年。

### 松脂酒方

用秫米三斗，小麥麴二斤，合釀之畢，取白松脂一斤，天門冬成末，茯苓成末，各五升，納酒釀中，封泥三十日，成熟。頓服三升，令人延年。松脂當先鍊去其苦味。

### 又一方

秫米三斗，小麥麴三斤，松脂一斤，白蜜五升，合釀，封泥三十日，酒成，朝暮服三升。

### 章陸酒方

用秫米三斗，小麥麴十斤，天門冬成末一斗。治章陸令白，十斤乾末之，合釀六十日，酒成，絞去滓。飲酒多少隨意，久服斷穀，令人腹中肥，久久則益氣，去三蟲，殺伏尸，治男女五勞七傷，婦人產乳餘病帶下，去赤白。使人耳目聰明，益神智，除面黧癍痕皆滅。一方用章陸一斤。

### 枸杞酒方

枸杞根，好治令潔淨，百斤，細剉之，大釜中益水煮之，絞去滓。器中澄

之，去下滓濁，令得五斗。生地黄三十斤，淨洗之，搗絞取汁，合枸杞汁中。方用麴三斤，搗令細炊，赤黍米五斗，饋以藥汁，飯熟合麴，投藥汁中釀之。酒熟飲之，隨意多少，無常限也，唯不欲令人醉。治百病，益氣力，延年命。此草一名蒙柴，一名椹樗，或名仙人杖，或名西王母杖，或名天精，或名却暑，或名地骨，或名枸杞。吾有八名，象八氣。仙人曰：子欲長活，食我八氣，子食八氣，令子長視。

### 五茄酒方

取五茄剉之，令長一寸，一斗剉取一斗，美酒漬之，十日成。溫服之，勿令多也。令人耳目聰明，齒落更生，髮白更黑，身體輕彊，顏色悅澤，治陰萎，婦人生產餘疾百病，令人多子。取五茄，當取雄者，不用雌者也。雄者五葉，味甘，雌者三葉，味苦。

### 天門冬酒方

以秋取其根，滲洗絞取汁，多少在意，以漬米麴，如丸釀法也。服之多少無常，唯不欲大醉，無所禁。若別取根

乾末，以此酒服之，多多益善。此藥治百病，安神養氣，令人長生不死。夏姬常所服方，若絞汁不盡，自可以水漱之，更搗絞取汁也。經久則酢，當以甕盛酒，釜中煮之，則辟酢也。一方云：酒服方寸匕，日三四，多多益善。

### 天門冬煎方

治虛勞百病，心下懸飲不能食，止渴，令人肥，永不老。方用天門冬二百斤，生地黄一百斤，皆淨洗，搗絞取汁，澄取上清門冬汁一斛，地黄汁五斗，合於銅器中，微火上煎之，令得五六斗，畢納白蜜四斗，湯上煎之，攪不離手，晝夜數日，令可丸。服如雞子一枚，日三。亦可以酒和服之，十日則知效矣。地黄、門冬，不可頓得，稍取恐先者敗，以土藏之。

### 服食神方

天門冬三斛，剝去皮，好滲之，搗絞取汁，令得一斛，微火上煎之，令得五斗許汁，納白蜜一斗，胡麻熬之，令香色黃。成末二斗，投中攪之，勿息伺視，令剛止。以大豆屑餅之，令方圓三

寸，厚半寸，日服一枚，百日以後，肌膚潤澤，白髮更黑，齒落更生，延年無窮。服門冬，此法最妙。

**真人釀天門冬酒方**

以秋取其根，熟搗絞取汁，多少自在。漬米麴為酒，如常釀法也。又採根曝之，搗下筴，以此酒服方寸匕，日三四，無令大醉，無所禁。服藥三年，百病皆愈，癩蟲皆穿皮，從關節出去。三年頭髮、禿眉更生，十年司命上生籍，二十年冬不寒、夏不熱，三十年百歲翁如十五童子。四十年之後與神通，當有神女持藥來，如得服之，此神藥也。三日後蠶蛻身仙矣。雖已得服神丹，得此酒益佳也。

**健體仙酒方**

术、地黄各二十斤，五茄二十斤，削去上皮，皆細剉，水一石五斗煮，令得石二斗，去滓以浸麴，釀一石黍米，如作酒法。酒熟可飲酒一杯，日三服之。一月肥健，二月身有光澤，走及奔馬，無所疾苦。欲少作者，二斗米以上為法，五茄、地黄各四斤，五茄但取莖

耳。

**治百病神酒方**

用大麻子、麥麴各五斤，先細治麻子、麴下筴，合漬一石水中三宿，絞去滓，炊五斗黍米，投之適寒溫，再宿藥成。服之多少自在意。無令中寒水，藥不成。米欲得白鮮好。先服此藥酒，百日後乃行諸道也。

**靈寶服食地黃枸杞酒方**

取枸杞根莖百餘斤，洗去上垢，細剉，大釜益水煮之，煎令得五斗許汁，去滓，以絹濾令清。取地黃根二十斤，洗去土，搗絞取汁。又重以枸杞汁一斗許，澆地黃滓，絞取汁令盡，兩都合地黃、枸杞汁，取好麴三斤，細搗以汁，漬麴赤黍米三斗，淘沃炊之，下饋以地黃、枸杞汁澆之，擠去麴滓，黍熟釀之。酒熟，隨人能否飲之，取不醉，無常數也。治風濕宿寒，上氣虛羸百病。欲令目明者，取地膚屑，以方寸匕，用酒服之。禁房室，猪肉、生魚、菹菜。久服，延年長生。

**天門冬酒方**

天門冬三十斤，洗淨，絹囊盛之。又以門冬汁一斗，澆釀飯，釀一石米法也。納麴至醇，如常法。納囊於器底，乃納飯，封泥之。三十日酒熟，絞去天門冬滓，飲之勿大醉。盡一斛，令人百病愈，身體玉澤。以此酒服門冬丸，又可服菊華、栢子，大良。又云一月乃開去滓。

**枸杞酒方**

治風五勞七傷，益骨力。枸杞百斤，細剉，如合莖，洗去土煮之，視中莖剥皮，即燥者，是熟也。去滓出其汁，復煮之生者，如前法。一斛米用百斤枸杞煎汁，令多少足釀一斛米。

**釀法**

精黍米若秣米，熟簸之，以濕布拭令淨，漬著枸杞汁中，釋炊之下饋，以枸杞漬麴，麴如常釀法。欲作清酒者，著酵。又一方：猪椒三十斤，合釀，勝獨也。又一方：地黃三十斤合之，益髓。煮如枸杞法，合用淹一石米。

### 作神酒方

取稻米三斗、麴三斤、大附子十枚，釀不下水，醇酒三斗，宿曝令乾治末之。欲得一斗酒，取方寸匕著一斗水中，須臾成美酒。服之多少，在人能否耳。令酒與諸藥曝之俱燥，便合末成屑，并治寒疾。

### 神酒方

天門冬三斤、米一斗，炊令熟，少其水没沮天門冬，囊盛釀之，已熟都合濟。飲勿取醉，勿食菜蒜，盡一斛酒，百病消愈。

### 神仙乾酒法

用黍米三斗、粳米三斗、麴二斗，浸醇酒五斗中，五日出，熟蒸之，無令漏，陰乾之百日，勿令泄氣。大如博棊，納二斗水中，立為酒。冬用溫湯。

### 神仙服食青梁米方

取青梁米一斗，淘沃之，漬以醇酒三日，蒸之無令漏也。百蒸百露，無令見日，善密藏之韋囊中。即欲入山遠行，一餐之，足支十日不食，十日復一餐，足可四十九日不食，四十九日復一

餐，可四百九十歲為一節。一方宜玄梁米，一方云三斗。

### 又方

取青梁米一斗、赤石脂三斤，并合以水漬之，財足置溫處二三日，令上生衣，擣而丸之，大如李子，日食三丸，令人不飢，渴即飲水，可以遠行千里以上，不飢渴矣。

### 又一方

取稻米，淘沃之，百蒸乾擣，日一餐以水，三十日後飲一杯，可終身不飢，日行三百里。

### 乾酒法

精米五斗、麴五斤，以水四斗漬，釋爛二宿，合大附子二枚，善桂二兩，下篚納酒中，擠取糟，曝令乾，復納酒中，汁盡止。丸以白蜜，如雞子，投一丸於一斗水中，可成美酒也。

### 服食粳米散方

粳米一斗、酒三斗，凡二物漬之，盡酒止。出稍食之，渴飲水，可三十日後盡，更作如前法。

### 服食稻米方

取稻米，熟淘沃，百蒸之，乾擣，日一餐以水，三十日後日飲水一杯，可終身不食，日行三百里，得食便食。

### 休糧方

以粳米、黍米、小麥、大豆、麻子，各五合豆熬而未之，共和白蜜一斤，煎一百沸，投冷水中，丸如李子。一頓吞盡此一劑，可終身不飢，諸物皆各治之，唯熬豆耳。

### 樂子長含棗核方

長生之道，常含一棗核，如兒乳汁，久久及液滿口，三分嚙二餘一，口與氣俱入，名曰還精。周而復始如循環。絕穀之時，五日小極頭眩，須臾復止，十四日復頭眩，須臾復止，二十一日之後氣定，欲食便食，不欲食自息。絕穀之時禁交接，可食少棗脯，飲酒無過一升，男女同法。

太上洞玄靈寶五符序卷中

①腹：原誤作「復」，據文義改。

### 太上洞玄靈寶五符序卷下

夫天書煥妙，幽暢微著，至音希聲，陳而不煩。是以西吾之刃，雖十寸而割玉，流星之金，雖纖介而徹視。徒才大者用徧，有物細者用備，豈非《靈寶五符》，其由是乎。聖人演天地之文，而敷言數萬，葩龍鳳之形，暢動物者百篇。發山林八會之跡，爲日用之務，成淵分之名，草木和仙通神，悟性命之無期，以致營溉，必有倫乎。唯至道而貴其契，真人而仰其文矣。昔庖羲刊八象於玄石，畫甚亦少矣。至夏爲《連山》，殷爲《歸藏》，逮《周易》之興，猶未該其根。所以然者，卦有屯蒙困否，不通之象，明道妙者難著，理妙者叵尋，寔由經代紛紜，動數十萬言，况乎九天之靈書，三天之寶圖，上導太和元精之氣，下備羣生始然之會。爾乃至寂之音，希解於世。故帝馨祭天帝君於北阿之壇，藏於鐘山之峰，欲令衆庶有絕塵之歌耳。夏禹晚撰，其波

未載，其上真猶封于石碯，以待大劫，仙賢幽乎洞室，須期乃宣。靈符之妙，寔由高聖之所宗，上哲之所佩，真人之所貴，靈仙之讚味玄澹，而朗其采色，天神而校其對也。其服御日月星辰，八氣五元，身體草木之方，當是五符下流，通泗之沫耳。其天辭虛籥，非凡賢所聞。雖同載五符之中，故廢其龍跡，不顯大音矣。徒見而不知，亦何所言哉。聾者希聞黃鐘之響，盲者企覩白黑之津，奚有異於此耶。聖人雖不爲其解高妙之意，然故自陳於本符之上，無損減也。鐘山真人告夏禹有言：陵昔聞之於東海小童，說云：但抱靈寶符入水赴淵，則北帝開路，蛟龍衛從，水精震怖，長生久視，永享天祚。執符入火，則陽光殄翳，南帝激電，助我驅穢熱毒，不加丹精凌邁。佩符登山，山精迸走，中黃太帝與我爲輔，虎狼百禽莫敢當者。棲巖入穴，則土氣不障，祆邪伏死，魍魎逃鄉。以符向金，則五兵不傷，西帝真氣與我同牀，全生萬年，飲于玉漿。背金對木，則長守介福，青

帝靈氣來見沐浴，色反童孩，久視永樂。登嶽採芝，不化我目，八石正形，使時掇獲，迴天倒地，在心願欲也。太上真人之辭，東海小童使陵佩符而護之矣。靈寶上序及撰出服御之文，皆科斗古書，字不可解，子長並受集而顯出之。尋其波流，皆出乎五符之上也。子長受霍林仙人口訣，似韓衆也。是以子長說曰：朝日已西夕，違世來作鄰。同心合道好，走人乃飛仙。太白縱二心，下外以爲根。登天飛虛空，此是吾師君。教我服三光，三光者，日月星也。又巨勝一名三光。樂子長受仙人法，以巨勝爲主，故曰三光。授我靈祕文。靈寶五符者也。符者，經也。清齋降五帝，萬年可常全。子長口訣，清齋三日，而致五方天帝，誠之盡矣，則真人必降。所嚮在於致敬，享年在乎念道也。丹青畫誓信，五八乃一宣。陵昔受之於東海小童，使裂南和之繒五尺，當喻信而受之券。割碧林之帛五尺，當不漏泄之約。南和謂緋也，碧林謂青也。古人貴髮膚，故引珠玉以親之，尊四肢，迴絲帛以任之，崇道德保身神，此仙官之教矣。天文科法，四十年一傳之，五八者，是其數也。不得其年限而授之，玄都天令，已陳之於後生。慎之慎之。鴻鷺

千歲羽，用茲致天真。鴻鷺者，駕也。其鳥壽千年，古人皆享之，以致天神也。一名駕鶴，一名天蓋，一名白鴻。若無此鳥者，鶴亦可用。鶴亦名鴻，俱壽千歲也。駕不殺生，而惡蟲伏之，是其以性震邪也。老而聲清，是其神氣潔也。欲致天人，當以精鳥，方類相求，迴降必矣。此是子長之要言也。而其辭小隱，離合師名，陵徐而思之，其師名韓衆矣。其醮祝之儀，陳之于左。諸志道求生者，宜薄衣食，而致孝于天靈，苟誠之所竭，孰云不得道乎。備爲師帥，親驗其神，故復言情，將慎之焉。一座無常面，隨安處之，宜清齋三日，祭於靜室，若庭壇之間，行事於夜半，屏人於非所，請天官於脣齒言，受傳於丹心。爾乃先燔五會之香，看流芳所歸，氣正上者，中央黃帝先降，氣東流者，青帝先降，氣南流者，赤帝先降，氣西流者，白帝先降，氣北流者，黑帝先降，氣雜散合集，紛紜錯亂者，神女先到。使五火比肩，布列座前，調火齊香，詳視薰煙。如是靈光之焰，表乎燈燭，冥心之想，彰於通夢矣。若此真靈不能使至向獲仙，復朽骸於泉壤者，陵與子長，豈當以抱惡於雲漢

中乎。但方寸不盡，求生不測，而望長延之對，以此希天真之報，亦復費其功夫，故爲徒勞也。

肥鳥一頭，酒隨多少，要令三斗以上，令得清醇美者。盛杯十一枚，杯令潔好。拌三枚，其二枚各盛五杯，其一拌盛一杯。一拌令在五杯者，下流具五香火，相連於拌前。餘酒別樽盛著座前。隨杯處肉，餘肉別拌盛著座前。陳《靈寶五符》於座後，倒卷令髣佛其天書。抱朴子曰：登名山，師受經後，欲佩身供養，受者設此醮也。

南和丹繒裂五尺絳，於座後席上，符安其上。割碧林之帛五尺青，於座後上也。覆絳令符處丹青中間，以爲效信。果物爲隨豐儉之宜，唯忌以五葷之菜，猪脂之肴，盛席一領。香令有五種，雜和之。若於庭壇施祭，當四面安障，勿令當風，當風靈氣亂。設微火，火以蠟密蓋火氣上，勿令廣照，廣照靈氣散矣。

盛服束帶，跽請。若山林中無大衣者，可闕之。下氣徐聲奉請：

某年某月日，州縣鄉里男女生某甲，年若干歲，受道士某郡某甲《太上靈寶五符文》，依大道科法，奉請五帝君。請已清齋三日，宰鴻鷺之鳥，潔整身神，虚心伺迎上皇天尊。某身三魂七魄三宮真人，上到九天之宮，五外之鄉，青牙之天、朱丹之天、太帝之山中黃之天、明石之天、玄滋之天、八方之天、五帝真人之庭，具陳告齋，暫降于某郡縣鄉里中，臨氣五符之真，歆微禮薄饌。

言畢，再拜，向座而伏，良久乃起。又跽方，更請上神：

奉請降東方靈威仰蒼帝君、青牙九氣天君、太上真王、青腰玉女，東鄉諸靈官。

奉請降南方赤飄弩赤帝君、朱丹三氣天君、元氣丈人、朱官太丹玉女，南鄉諸靈官。

奉請降中央含樞紐黃帝君、太帝真人、子丹黃庭戊己、天蒼玉女，中央諸靈官。

奉請降西方曜魄寶白帝君、明石

七氣天君、元氣大夫、太上白素玉女、西鄉諸靈官。

奉請降北方隱侯局黑帝君、玄滋五氣天君、太上靈君、夜光玉女、北鄉諸靈官。

奉請降文命夏禹帝君、五嶽靈山真人、江河四瀆靈官、地仙玉女、角里先生諸仙官。

請一帝到，輒一再拜，凡六再拜

也。送帝亦如初請時，但除奉請二字，改云上勞某帝，便再拜。迎送去來，都

十二再拜，醮祀道畢矣。請畢，上酒，更燒香，徐自陳曰：某以胎生，肉人枯

骨，子孫生長濁世，穢氣澆聚，積罪河海，抱咎深重。自有識以來，尊仰大

道，心希真氣，以自歡樂。而精神微薄，未能上暢，常守心念善，敢有違越。

特恐絲髮之進，懼隕墜九泉，天願幸會，奉見靈寶文。真書浩大，祕藏玄

臺，是以不敢輕執竊佩，以虧真科。即日修齋，告祭於五帝、諸君丈人，以定

神契丹青之信。當喻誓之券，為效為信，約不漏泄，天親地愛，傳出五八，無

中宣授，明於科法。某志遁山林，不願榮華，佩符登山，當令某所向無前，金破石開，採藥不得隱匿，縱天橫地，從心所欲，山精頓伏，虎狼逃竄，令使役鬼神，長生久視，靈氣衛護，祆邪亡命，疫螫不彰，魍魎遠迸，如是受上天之佑，靈氣之助，神長守身，令三尸消去，太帝流恩，衆庶不勝洪濟之施。又上酒，若自宜有所啓，隨意陳之。此文是其旨略耳。然香送神。

### 勞盛山上刻石作文

仙人樂子長作，吳王夫差寫取。

玄流鼓絳波，琨碧映琅山。朝日

控晨輝，蒼豔何蜿蜒。游雲落太陽，颯景陵三天。靈寶曜九虛，幽朗鐘山間。

夏禹登八窗，散氣響金蘭。因枝振玉條，緣波討洪源。扶質立靈榦，垂葉以


結繁。眇邈龍鳳跡，煥爛九天翰。仰挹三晨精，保身永長安。俯漱五華液，

還復反童顏。騰神温涼宮，豈知熱與寒。千秋似清旦，萬歲猶日半。鼓翼

空洞上，要我靈寶官。紛紛五帝駕，俱會景漢端。相問飢與渴，玄泉饒流丹。

求仙方寸內，八遐無易難。顧聞朱門鼻，當塗中有歎。勒銘勞巖陰，穴岫可稽磐。

東方青帝符靈寶九氣天文，化生赤帝氣。



入山呪曰：臨兵鬪者，皆陳列前

行九字耳。常祕呪，無所不辟。

春月不入東嶽及山，隨月並類然。

慎之。

### 九天靈書三天真寶

夏禹撰為靈寶文，一通藏石硯中，一通幽洞室中。

夏禹受鐘山真人：入山水之日，

當以保日及義日、專日，大吉，易得道。以制日、伐日入山，必死。又欲得六癸

之日，六癸之時，一名天心，一名天同，必得度世。保者，支干上生下之日，甲

午、乙巳是也。義日，支干下生上之日，壬申、癸酉日是也。制日，支干上

尅下之日，戊子、己亥是也。伐日，支干下尅上之日，甲申、乙酉日是也。制日可施符召鬼耳。取六癸日六癸時，皆當令和順也。以類求之口訣矣。靈寶入山，以甲子開除日，以所授委繒，參之五色綵，各五寸，懸於名山大石上，所求必得度世也。入山當以三月七日吉。


東方靈寶符命

夏禹敷東文，出南帝書。




南方靈寶符命

夏禹敷南文，出戊己黃帝書。




中央戊己靈寶符命

夏禹敷中文，出白帝書。



西方靈寶符命

夏禹敷西文，出北帝書。



北方靈寶符命

夏禹敷北文，出青帝書。




九天王長安飛符

道人佩之，以履陽九，百六，千毒不加身。昔夏禹藏之於石碯，以傳理水傅伯長桑，甲子李廓光馬平石山。

大劫至，佩其前。



小劫會，佩其後。



三天太上伏蛟龍虎豹山精文  
名之曰八威策。

道士入山，帶此書於肘後，百禽精獸徒從人行在左右。執此書於手中，則百禽山精毒獸却走千里。




九天太玄陽生符

老君受之於太上丈人，丹書白素，方五寸。清齋百日，入室而吞之，使人無死，延年長存。濁氣於口，即符出而死矣。一名真券，一名八龍書。

(原缺)


三天太玄陽生符

男子吞之，法與上同。道士欲尸解者，神筆書草木刀金，即代為人形而死去矣。



三天太玄陰生符

女人吞之，法與上同。道士欲尸解者，神筆書草木刀金，即代為人形而死去矣。



皇人太上真一經諸天名  
帝軒轅書。





取青牙法，雞鳴呪畢，舌料上齒表，舐脣漱口，嚙之三。朱丹呪畢，舌料下齒表舐脣漱口，嚙之三。中央戊己祝畢，以舌反上刺玄膺，舐脣嚙之三。明石呪畢，以舌料齒上，舐脣漱口，嚙之三。一嚙輒叩齒二七。玄滋呪畢，以舌料舌下，鼻內氣，嚙之三。謂飲食自然胎息之道，一嚙皆使玉水滿口。

《太上太一真一之經》曰：三一相須，其居不同，或在北極太淵之中，前有明堂，下有絳宮，上有華蓋，玉樓萬重，左杓右魁，激波揚風，玄芝被宇，往往成叢，深谷直下，朱竹蓊茸，白玉嵯峨，甘泉無窮，日月垂光，金鑪隆崇，或在離宮，或在命門，歷火過水，經方入圓，城闕交錯，幃帳成雲，龍虎列衛，神人爲羣，玉淵萬刃，常飲其泉，叩玉却食，還反童顏，百邪遠避，役使羣神，長生久視，延年億千，目方徹視，腸化爲筋，子能得之，乃爲天仙。苟非其人，道不虛傳，子密行之，慎勿多言。

昔在黃帝軒轅，曾省《天皇真一之經》，而不解三一真氣之要，是以周流四方，求其釋解。爾乃命駕，出而遠遊，昌宇驂乘，方明爲御，力牧從焉。東到青丘，過風山，見紫府先生，受《三皇內天文大字》，以劾召萬神，役使羣靈。南到五芝玄澗，登圓隴蔭建木，觀百靈採箬乾之華。西見中黃子，受九茹之方。過崆峒上，從廣成子受自然之經。北到鴻隄上具茨，見大隗君黃蓋童子，受《神仙芝圖》十二卷。還陟王屋之山，受《金液九轉神丹經》於玄女。乃復遊雲臺青城山，見寧先生，先生曰：吾得道始仙耳，非是三皇天真之官，實不解此真一之文。近皇人爲扶桑君所使，領峨嵋山仙官，今猶未去矣，子可問之。又乃到峨嵋山，清齋三月，得與皇人相見。皇人者，不知何世人也。身長九尺，玄毛被體，皆長尺餘，髮則長數寸。其居乃在山北絕巖之下，中以蒼玉爲屋，黃金爲牀，張華羅之幃，然千和之香，侍者皆是衆仙玉女，坐賓三人，皆稱太清仙王。方見皇

人，設有盈升之棗，飯以丹華之英，雜麟脯鳳腊於其間，漱朱宮玉井之靈漿。黃帝匍匐既到，再拜稽首而立。皇人問：子欲奚求？黃帝跽曰：願得長生。皇人曰：子既君四海，復欲不死，不亦貪乎。帝跽曰：萬兆無主，則相凌暴，今爲制法，足以傳後。私心好道，遠涉四海，幸過遇道君，願垂哀告。竊見真人食精之經，徒省其文而弗綜其意，看其辭而不釋其事，乞得請教。皇人大驚，拊髀長歎，良久乃答曰：汝安得聞見此乎。此書乃生錄之首篇，上天之靈符，太上之寶文矣。白日升天，飛步虛空，身生水火，變化無常，其天仙之真，唯有龍胎金液九轉之丹。守形絕粒，辟除萬邪，使役鬼神，長生久視，爾乃血脉流宣，腸化爲筋，百穴不能傷，延期至億千，則唯有真一食五芽天文。此二事但使南斗君領錄，參於大帝鍵籥，自非仙人，四十年一出之，約皆不得背科而妄泄也。又西王母安此書著五城之內，其外衛備有仙樓十二，藏以紫玉之匱，刻以黃金之

札，封以丹光芝草，印以太上中章，其無仙籍者，不得聞知也。子未可聽天音於地上矣，便可去邪。黃帝稽首答曰：昔以受神丹於玄女，未及合作，唯未受五芽食真，解真經之意耳。幸今遭會，得見道君，既不授以生道，是臣相命不得度世耳。如未哀者，復用暫生何爲乎。惟乞愍濟元元之心。因叩頭流涕，腦破腸絕，於地良久。皇人下牀接之，乃惺告之曰：子所謂真得道者也。又太清仙王三人，見帝勤心之至，愍助之，因告皇人曰：此人先世祖曾遭飢困，不自飽口，割所食之饌，以糧窮餓百鳥，力作以救禽獸，畜役以贖蠢動。如此四十年，仁德感天，功蓋萬物，太上書其美，九天戡其世。故今芳氣之流光于帝位，德乃數代，仁歸寶服。此人先立善乃爾，何爲隱真芽之經乎。又亦是其勤求願會，得見吾耳，卿可教而成之也。皇人慨然曰：子宿世之善乃爾，吾何惜乎。可復坐，將告汝要道矣。帝就坐，皇人先爲設厨醴之饌，徐告曰：汝向所道真經，言所不

解者，蓋上天之所氣，歸此一身耳。一身分明，便可長生也。夫人是有生最靈者也，但人不能自知，不能守神以御衆惡耳。知之者則不求佑於天神，止於其身則足矣。故云：一人之身，一國之象，胸腹之位，猶宮室也；四肢之列，猶郊境也；骨節之分，猶百官；神猶君也，血猶臣也，氣猶民也，故知治身則知治國矣。夫愛其民，所以安其國，吝其氣，所以全其身，民散則國亡，氣竭則身死。亡者不可存，死者不可生，是以至人消未起之患，治未病之疾，醫之於無事之前，不追之既逝之后。民難養而易濁，故審威德所以保其理，割嗜欲所以固血氣，然後真一存焉，三一守焉，身壯之焉，年壽遐焉。泥丸、絳宮、丹田，是三一之真焉。令子守之，則萬毒千邪不敢傷矣。漱華池，食五芽，而不休者，便成仙人矣。吾先師正受此方於九天真王，令書以相授也。存之於口，名曰朱鳥丹，取之於身，名曰真一，此其天寶書文也。向旦密呪曰：

東方青芽，服食青芽，飲以朝華。已呪，舌料上齒之表，舐脣漱口，滿而嚙之三。次呪曰：

南方朱丹，服食朱丹，飲以丹池。已呪，舌料下齒表，舐脣漱口，嚙之三。次呪曰：

中央戊己，昂昂泰山，服食精氣，飲以醴泉。已呪，舌刺舌上玄，膺取玉泉，舐脣嚙之三。次呪曰：

西方明石，服食明石，飲以靈液。已呪，以舌料齒上，舐脣嚙之三，輒一叩齒七下，都畢，又叩五下，合三十六下也。次呪曰：

北方玄滋，服食玄滋，飲以玉飴。已呪，以舌料舌下，舐脣嚙之三，畢，因以鼻內氣極而徐放之，令過五以上，真道畢矣。

三仙王又告帝曰：吾昔食此法得仙，先師令益口中央醴泉下，呪曰：白石巖巖以次行，源泉涌洞以至漿，飲之長生，壽命益長。凡二十二言，汝可爲之。子能經目爲之，食真一不休，吞華池不息，內氣長閉不倦者，即得道而絕

粒矣，不復移月而成也。夫玄古之人，所以壽考者，造有之間，不食穀也。大有音曰：五穀是剗命之鑿，腐鼻五藏，致命促縮，此糧入口，無希久壽，汝欲不死，腸中無滓，汝欲長生，當令藏氣潔清，挹身華漿，與天相迎，玉水在口，天人同壽也。黃帝受教畢，乃贈皇人以所有，流俗棗脯清厨之酒，誓以不傳，畫一而辭。

夏禹曰：子知真一之丹，萬事延。知一者，無一之不知也。不知一者，無一能知。一者至貴，無偶之號，道起於一，數靡不由一，天得一以清，神得一以靈，地得一以寧，人得一以生。金沈羽浮，山峙川流，視之不見，聽之不聞，存之則在，忽之則亡，順之則吉，逆之則凶，寶之遐祚罔極，泄之命凋氣亡。惚兮恍兮，其中有象，恍兮惚兮，其中有物，此一之謂也。必欲長生，三一當明，思一至飢，一與之糧，思一至渴，一與之漿，古人貴此真一之道，祕口藏文。一能成陰生陽，推行寒暑，春得以茂，夏得以長，秋得以收，冬得以藏，其

大不可以六合隱，其小不可以毫芒比也。百姓日用而不知也。夫不施不寫，一安其所，不遲不疾，一安其室，能暇能豫，一乃不去，存一至勤，一能通神，少飲約食，一乃留息，臨危不疑，一爲除災，天禍在前，思一得生。知一不難，難在於終，知真不爲，與不知同，求之不已，登彼九皇，陸辟猛獸，及與毒蟲，水却魍魎，及與蛟龍，無物不却，無邪不中。守真則在，泄精則亡，食氣萬歲，常有少容。又告曰：人能存一，一亦存人，所以白刃無所揣其銳，百害無所容其凶，人敗已成，在危猶安。靈寶之真，豈虛誑於道士哉。上聖玄音，豈有不信於蒼生乎。蓋求之者靡耳。將來深根，其墻戶矣。

太上洞玄靈寶五符序卷下

(王卡點校)

# 008 上清太極隱注玉經寶訣

經名：上清太極隱注玉經寶訣。又名《太上玉經太極隱注寶經訣》。簡稱《太極隱注》。撰人不詳，約出於東晉南朝。係古《靈寶經》之一。一卷。底本出處：《正統道藏》洞玄部玉訣類。

夫太上玄微，三洞初元。至蹟之辭，幽而難聞，落落冥冠，包匝羣品。迢迢至德，巍巍高尊，至具所栖，衆妙之門，神仙之宗，集而成文。諷誦昇虛，策龍乘雲，惟信惟盡，制情使專也。於是乎有志之士，乃遐尋斯經，尊奉法師，稽首德堂，寔問寔諮，請受寶經。莫犯莫疑，真信正道，神仙可期。吐故納新，挹服英芝，虛無相招，飛仙有時。法輪定覺，洞觀九垓，邈矣奇訣，中仙

焉知。爾乃學真之子，若能孤思對景，趣合情丹，鍊試色想，經饑涉寒，苦而不倦，日中則餐，謗來不戚，譽集弗歡，獨德於內，外夷衆顏，沐浴青芷，胎氣無殘，登齋入室，燔煙真檀。於是披帔冠巾，整肅法服，設禮下方，歸命太真，三拜經前矣。乃開八色之蘊，陳無上之寶藏，而執讀大洞洞玄，道德尊經，八素隱篇，金真玉光，消魔散靈，招仙步虛，飛行羽經，清音霄暢，萬真降庭。太上命駕，同乘雲輶，翫藹鬱勃，遐合杳冥，三素齊景，項負圓明，身服羅帔，玉佩火鈴，肅肅高真，飄飄遠征，玉華扶翼，俱登上清。不問貴賤，決在至誠，三界獻禮，魔王奉迎，長年無極，焉知劫齡，於茲逍遙，永我利貞。

太上玉經隱注曰：授道德經法。師北向，經於案上，弟子伏左，師執經，弟子擎法信。師叩齒三十六下，心存三宮，泥丸、丹田、絳宮，三一出，千乘萬騎，營衛經師，因而祝曰：飄飄大虛嶺，流景在上玄。經始無終劫，長保天地人。世主學致堯，道

士誦得仙。賢者今奉受，依法以相傳。時無至德子，保祕不妄宣。宗之昇太清，棄之墮九泉。我說無爲道，清靜德自然。畢，弟子三拜受經。若女弟子伏右。凡經皆同爾。

太上玉經隱注曰：授大洞真經法。師北向，經於案上，師執經，弟子擎法信。師叩齒三十六下，心存太上玉皇，令日月之光，映照經師徒之身，而祝曰：

太微何眇邈，真人結虛生。空津自然道，集爲大洞經。真賢奉法信，乘運歷黃庭。太上削死籍，司命書仙名。保祕年劫積，泄慢地獄嬰。灾考及七祖，風刀解汝形。畢，弟子三拜，受經。

太上玉經隱注曰：授太上靈寶洞玄經法。師北向，經於案上，師執經，弟子擎法信。師叩齒三十六下，心存五藏之色，令備具，合成寶蓋之雲，羅覆經師徒，而祝曰：

天書簡不煩，道德自備足。修之必神仙，當復何所欲。文耀太無間，煥然而玄郁。傳授悉依法，泄慢墮地獄。

畢，弟子三拜，受經竟，又方一拜十方，從北始，東迴而周也。想見太上十方真形，如今像矣。

太上玉經隱注曰：授太上三皇天文。師北向，經於案上，師執經，弟子擎法信。師叩齒二十四下，心存三宮，各一真人，如嬰兒之狀，不著衣，口吐紫氣，以薰經師徒，而祝曰：

太上之天文，傳說天地初。皇人宣玄旨，是爲至真書。賢者令奉受，志願昇太虛。畢，弟子再拜，受經。

太上玉經隱注曰：傳授上清品經符，皆北向。中品之書，有爲之外文，師東向。仙聖苗裔籙，傳經者南向，男弟子伏左，女弟子伏右，法信祝誓，如法師之法。

太上玉經隱注曰：當開道德經蘊之時，先燒香，整法服，禮拜如初法，而祝曰：

玄玄至道宗，上德體洪元。天真雖遠妙，近緣泥丸君。宮室皆七寶，窗牖自然分。清靜常致真，駕景乘紫雲。日月左右照，昇仙長年全。七祖上生

天，世爲道德門。於是可讀經矣。

太上玉經隱注曰：當開洞真經蘊之時，先燒香，整法服，禮拜如法，而祝曰：

微微玄宗門，煥朗徹空洞。至道由靜默，當見三素宮。大道於此成，驂景乘雲龍。左右侍經仙，玉女及玉童。身濟不死津，解羅順靈風。七祖反胎生，世爲神仙宗。

太上玉經隱注曰：當開洞玄經蘊之時，先燒香，整法服，禮拜如法，而祝曰：

寂寂至無宗，虛峙劫仞阿。豁落洞玄文，誰測此幽遐。一入大乘路，孰計年劫多。不生亦不死，欲生因蓮花。超凌三界塗，慈心解世羅。真人無上德，世世爲仙家。

太上玉經隱注曰：當開三皇天文蘊之時，先燒香，整法服，禮拜如上法，而祝曰：

太上定神符，勒命天地慧。聞名不俟駕，萬仙儻忽萃。招靈無小大，豈況於滓穢。清齋絕人事，眇然與神對。

上昇玉清宮，邀宴九遐外。

太上玉經隱注曰：當讀道德經時，叩齒三十六下，咽液三十六過，先心存左青龍，右白虎，前朱雀，後玄武，足下八卦、神龜三十六，獅子伏在前，頭巾七星，五藏生五氣，羅文覆身上，三一侍經，各從千乘萬騎，天地各有萬八千玉女玉童衛之矣。

太上玉經隱注曰：當讀洞真經，叩齒三十六通，咽液三十六過，先存迴風混合帝一百神萬真，然後詠洞經。

太上玉經隱注曰：讀洞玄經，叩齒三十六下，咽液三十六過，存五藏五色之氣，上注五星之精，而讀經。

太上玉經隱注曰：誦太上洞玄步虛經時，先叩齒三下，咽液三過，心存日月在己面上，從鼻孔入洞房金華宮，光明出項後，煥然作九色圓象，薄入玉枕，徹照於十方，隨我遶經，旋迴而行矣。日從鼻左入，月從鼻右入，畢，又叩齒如初法。

太上玉經隱注曰：當讀昇仙之經，先叩齒十二下，咽液十二過，詠一

篇，三通叩齒也，經卷亦各有法，不載法者，可依此訣也。

太上玉經隱注曰：夫道經不師受，則神不行矣。若世無法師，又無錄傳者，當以法信投靖治，或可密室啓玄師老君，北向三拜，然後以物布施於饑乏之人，平等一心，而用經也。世有師，不須按此法也。

太上玉經隱注曰：轉經，坐小牀上，高五尺，廣長悉等，但巾帔，不須著褐也。太上真人讀經法服，披離羅九光錦帔，丹羅寶曜之巾，足下獅子文履。今道士讀經，勤苦於法事，羸其帔服，後得道之日，天帝授子離羅九光之帔，天寶纓絡飛仙法服，以酬往德也。兆勿慕世之冠冕，捨於道士陋服也。世服雖目下榮耀，不免於死，道士羸衣法服而昇仙，被服天衣矣。天衣著身，令人能飛仙乘虛也。

太上玉經隱注曰：讀經之法，法中夏之音，此是九天之正音也。第六十四大梵讚經，諷誦制聲，亦是正音。讀經之音，當法此正音。仙公曰：老

子西化胡，教外國讀經時，多是大梵天音也。適道士所好者耳。

太上玉經隱注曰：讀經五百言，則叩齒三通，以舌舐上下脣，咽液三過，令人不極，久而聲清。不知此法，損氣勞神也。真人曰：濃煮竹葉作飲，以讀經而存思，益精通神，和氣流行。

太上玉經隱注曰：太上大隱符九首，日正中以水頓服之，千日則出入無間，隱見在意，爲仙人矣。佩靈寶五符於身，則乘龍駕氣，經歷水火，五帝扶翼，遠遊高翔，亦爲仙也。佩五嶽真形，佩三洞大符，不得近房室，交接陰穢，必死不疑，永無仙期，可不慎哉。

太上玉經隱注曰：道士入室齋，讀太上步虛之玉章，及飛行羽書，則能馳騁九龍，雲駕來迎，此兩事宜祕之矣。

太上玉經隱注曰：常以讀五千文萬遍，太上雲龍下迎。萬遍畢未去者，一月三讀之耳，須雲駕至，便昇仙也。

太上玉經隱注曰：常讀黃庭內景

經，乃不死也。常服元氣，亦不死之道矣。

太上玉經隱注曰：常存頭正青如碧玉，兩手如丹，兩脚如雪。以此精思讀經，行諸妙事，去仙近矣。常叩齒十一下，晝夜十二時，時一叩，亦不死身，神恒具衛。

太上玉經隱注曰：叩齒一名天鼓，召身神，招天真，會羣仙也。左齒相叩，名鳴天鍾，右齒相叩，名擊天磬。道士意恐畏辟鬼賊，鳴鍾磬各二十四通，則妖精不敢前，天魔護身，百福并至。

太上玉經隱注曰：老子道德經稱：視之不見夷，聽之不聞希，搏之不得微，即三元老君之位號矣。又言：此三者，不可致詰，故混爲一。是三素合爲元一君，是胎尊之玄父元母。讀此經，三老君見子，子見之，仙道成矣。道盡於此，書不盡言，言不盡意。理之蹟者，莫尚乎斯文，通曰見之，無能知之也。

太上玉經隱注曰：崑崙、蓬萊、鍾

山、嵩高、王屋，上清經亦備有也。

太上玉經隱注曰：緣那羅衛之國，崑崙人鳥之山，元始天王所別治，七寶宮室，高臺凌天。西王母初學道，亦登此山。其上三洞經悉具，書虛中作經，一字方一丈也。是山真形圖至重，服佩便得三洞之玄真矣。山上百獸皆能飛行不死，何況人乎。諸奇物並出於此矣。其山衆聖誦經，皆大梵天制音，不哀不傷，不遲不疾，弘雅要妙，聞者融然。崑崙山上諸仙多作中夏，九天誦詠，蕭條遠暢，清音泠朗，聽者霄絕，使人忘情。時會衆仙，歌詠洞玄，合讀齊唱，新聲激響，窈窕遐聞，揚藻空洞，虛絃鳴彈，而玉清感悅矣。故讀經，上真之所重也。《高臺銘》曰：子欲乘空凌虛，誦我步玄羽書。諸仙不解此語也。步玄、羽經，此之兩書，太上玄經亦不傳中仙矣。

太極真人曰：步虛經者，靈寶齋步玄誦也。羽經，洞真之詠也。

太上玉經隱注曰：居家學道，當受五千文。月朔半，本命日，八節日，

日中、夜半時，各一遍誦之耳。若兆不能讀者，請師爲讀之，兆當親侍香火，一心聽受經旨，志以奉行經上妙事。託形太陰之日，天帝雲車迎人身神，不經太山三官地獄考罰之中也。上生天堂天帝之前，下生人間侯王之家。相好具足，靈顏煒燁，觀者心悅，恒欲見聞，亦轉女爲男，結緣上清，仙道自剋也。此經傳通羣品，無大無小，隨意所求，無有拘礙，送死養生，罄無不宜也。亦能安國寧民，制伏邊夷，莫不順道者也。斯經妙矣，弗有尚焉。

太上玉經隱注曰：學士雖修善行，或嬰前世之對，疾病災厄，頻煩委頓者，道士法師，當爲持齋，轉五千文，及消魔智慧玉清金真洞經，中品威神，營衛病人，所謂臨困得濟者也。救度一切之急，莫有及此之法輪矣。

太上玉經隱注曰：受三洞經，當絕人事而行之也。總三洞，名太上洞一，高上之經矣。受此語三人，則不得昇仙也。慎之慎之。

太上玉經隱注曰：受經皆比字三

校，誤一字，滅壽一歲，過此計加之，增損一字，亦奪一歲。若妄破經書，後生受風刀解形之考。受經不敬師，修之亦無福，而後生棄疾及六畜之中也。天下之惡，莫過陰賊，若協此行道，必見世受考。耳聾目盲、心鼻煩塞、胃津不通、身生蟲病、死墮地獄，經諸苦惱，刀山劍樹，湯煮吞火，孔竅潰爛，求死不得，竟生猪犬之中，方被屠割，所謂三惡之者矣。

太上玉經隱注曰：授中品經以下，東向叩齒十二通，祝曰：肅肅上真德，滅迹停虛閒。暉景昇太素，去來無梁津。有心則自應，不專道則綿。展轉以相授，將結冥中緣。法師及弟子，無服而成親。奉經行衆善，恒如臨深淵。外以救災病，內以護度身。畢，拜受經傳。仙人本業，亦用此呪法。

太上玉經隱注曰：大洞真經，或曰太真道經，或曰太清上道觀天內經上品，凡有十卷。上清金丹之經七卷，其高上大妙大丹消魔智慧大洞真經，三十九章。

太上玉經隱注曰：上清之高旨，極真之微辭，飛仙之妙經也。靈寶經，或曰洞玄，或云太上昇玄經，皆高仙之上品，虛無之至真，大道之幽寶也。三皇天文，或云洞神，或云洞仙，或云太上玉策。此三洞經符，道之綱紀，太虛之玄宗，上真之首經矣。豈中仙之所聞哉。

太上玉經隱注曰：寶訣，衆經之祖也。太上命傳太極諸仙公仙王、仙伯仙卿。未得此任，不傳之矣。道士有見斯書，皆應爲仙公之人也，玄錄宿名將定焉。傳之法信，以金五兩，白繒九十尺，長度經紙三百幅，呈道師君，然後知求道精誠之丹盡，乃可告此寶訣也。師與弟子先對清齋九日，或七日、五日、三日齋竟，日中時受經也。當傳經時，師北向，於靜室內，左手請經，執此經，弟子右手擎受道誓信，約不妄泄流俗。列墨辭：以七祖爲證，將奉行仁孝大慈之心，惟願飛仙昇虛，七祖離苦毒，俱生天中。師讀辭竟，口祝於弟子曰：

大朴本無質，聖聖謂之玄，一儀由始終，萬物之至淵，道化彌億劫，運周若圓環，蹟理歸無忘，冥想應宿緣，大覺無上慧，莫尚此法輪。志道效法信，誠盡師當宣。世無賢達士，封之於名山，順以苟合授，抱石濟九泉，兆爲太極公，上尊令我傳，三界以奏啓，玄都一時聞。畢，六拜，受取之。取此法物，師當營經法齋戒，施散世間窮厄之者，一等之心，不得偏意也。是經常有玉女玉童各三十人侍之，并察道士之德行，關奏於太上矣。可不慎之，可不慎之。度經之時，心存三元君在泥丸宮也。師叩齒三十六下，乃祝之耳。

隱注道經畢矣。

太極真人曰：諸真人由來多隨所修，別受其口訣，不頓受之也。所以仙人各各有得傳此一事矣。分傳者，法信用金一兩，紙一百幅，不須素繒也，存祝如上法。

太極真人曰：仙人本業傳，謂之道迹經也。法皆應師受之，當西向，用衆經之祝信，以丹絳十尺，效精誠之至

矣。上仙道迹經，存玉女玉童各十人，中仙五人，下仙三人，常隨侍傳，燒香擁護受讀弟子之身，衛其家口也。恒當忠孝，尊仰師父，行四等心，忍辱精進，布施容非，不爭虛誕，其意守志，念道常願，凌翮大清，飛行上玄，提携高仙，學道之要津矣。若能受太上隱注訣言，習行大洞之經，便號爲太上大法師。夫已受三洞經，稱太上玄經大法師，法師自得傳諸仙道迹經也。夫人不從師受此道迹經，玉女不肯護人，行道無益於身也。有疾苦妖怪時，可齋誦道迹經於靜處也，百鬼魍魎殃咎，皆應聲散滅矣。玉女玉童爲唱讚，音聞九玄，此仙人歡然，救度於子也。

太極真人曰：劫始以來，赤松子、王喬、羨門、軒轅、尹子，並受五千文隱注祕訣，勤行大道，上爲真人之長者，寔要注之妙矣。逮至漢孝文皇帝，好樂道德，精誠虛盡，太上真人降乎河上，以化文帝。真人時自誦經，帝未弘道義幽蹟之理，既心之所渴，聞有異人踴躍，即親駕稽首，禮問動靜，諮請道



真。真人爲其章句，略其一隅，通其所滯也。夫此經之蹟難究矣，故曰不可思而議也。然自足令文帝託刊霄冥，保景乘雲，散轡飛龍，徑登天堂金華宮中，及諸天人講誦爲事矣，亦仙道之次者也，樂乎哉。文帝行道德之經，致是巍巍矣。武帝徒勤苦於神仙，而性剛，亦得預天人之次耳。學道柔信爲本也。夫讀河上真人一章，則徹太上玉京，諸天仙人叉手稱善，傳聲三界，魔王禮於堂中，酆都執敬，稽首於法師矣。河上真人，則道德經之法師也，所以尊其章句焉。治身祕道，不可示俗人，俗人常笑此經虛誕，謂之不能昇仙度世，此各有宿緣，弗可強訓也。教之不行，彼此獲罪，故宜深而祕之也。

太極真人曰：禮此經時，心注太上老君，三拜，次念尹先生、河上真人爲玄中法師，亦復三拜，並向經也。常三萬六千仙童玉女侍經，燒香散花，通致衆仙，爲兆請不死之命，求白日昇天之道也。

太極真人曰：道士當作金丹之時

也，一晝一夜誦之，太一歡悅，來臨子之室矣。辟鬼試不祥之變也，所作則必成焉。

太極真人曰：夫學道以齋戒爲本也，誦經必齋，校經必齋，書經必齋，書符必齋，合藥必齋，作金丹必齋，精思必齋，詣師請問必齋，禮拜必齋，受經必齋，救疾消災必齋，致真人必齋。齋者，太上所敬重，老君所營護，諸聖所倚賴，齋法甚多，在兆所修受也。

太極真人曰：我昔學道，聞此訓於太上真人，奉而行焉，今以相傳也。子祕而修之，密教後世有宿命之人，應上仙者，可乎。

太極真人曰：夫人得生仙聖之門，而好道樂經，柔性慈心者，皆宿緣願會於今日矣。將去仙近也，宜當勤於法事，必上仙者乎。

太極真人曰：夫人有仙真相好，其要在慈心觸物，以輔相好，然後得仙矣。不能忍性容非，仙相敗也。斯語信焉。子其慎哉，子其思之，子其奉之，言之至矣。

太極真人曰：予有九天黃素隱訣，傳諸人也。或曰洞真威儀，或曰法輪元綱經太上隱訣，或曰太上玉清內教，或曰太上三洞威儀經，或曰太上玉經太極隱注訣。傳諸宿命應爲太上玉京玄都太無太極仙公仙王、仙伯仙卿之人矣。不告始學之道士也。若世有遇此經師者，皆玄都已金名之簡焉。

太極真人曰：夫奉上經，道士使心口相應，視人如己，敬師如父，思經如渴，念濟厄困，諫諍勸善，和柔容非，愛於有道，遠好山水，常行慈心，仁愛經營。道士居貴不驕，處疾苦之轆軻，而執志不移，此可與言於道者也。宜告之以隱注。若雅飾相傾，心口各用，當祕於寶訣，永幽之矣。受經後三年，其行亦可觀，斷可知也。是故此經上仙可祕，中仙希有見者。學道前世功不足弘大法，太上玄都玉京無具名也，亦終不與此經師相值矣。受訣妄示一人，則不得昇仙，死爲下鬼，苦毒於三官地獄，後生六疾之中，輪轉受對，其罪至重，是以祕之，故曰隱注焉。

太極真人曰：夫人清齋久靜，精思耽玄，誦經悔罪，燒香禮拜，將見飛天人矣。仙童玉女降於子室矣。或聞室中爲稱善，或光景照身，或聞金玉之響八音之聲，皆子道欲成也。勤之勤之，太上不負子矣。所以患子不固，不盡至經，是以仙道之難耳。常念此語矣。

太極真人曰：吾昔始得仙時，受太上大道君大智慧經偈七遍，叩齒三下，咽液三過，存三素元君在金華宮，如嬰兒之狀，而詠此文也。智慧本經有三萬一千言，上聖抄宣是章，應爲太上玉京太極仙公道士矣。今當相告，子豈不願聞之乎。

### 太上智慧經讚

太上玄虛宗，弘道尊其經。俯仰已得仙，歷劫無數齡。巍巍太真德，寂寂因無生。霄景結空構，乘虛自然征。日月爲炳灼，安和樂未央。

學仙絕華念，念念相因積。去來亂我神，神躁靡不歷。滅念停虛閑，蕭蕭入空寂。請經若饑渴，持志猶金石。

保子飛玄路，五靈度符籍。

濟我六度行，故能解三羅。清齋禮太素，吐納養雲牙。逍遙金闕內，玉京爲余家。自然生七寶，人人坐蓮花。仰嚼玄都柰，俯含空洞瓜。容顏曜十日，奚計年劫多。法鼓會天仙，鳴鐘徵大魔。

靈風扇香華，璨爛開繁衿。太真撫雲璈，衆仙彈靈琴。雅歌三天上，散慧玉華林。七祖昇福堂，由此步玄音。前世德未足，斯經邈難尋。信道情不盡，圖飛乃反沈。太上無爲道，弘之在兆心。

學道由丹信，奉師如至親。抑景偶清虛，孜孜隨日新。衆人未得度，終不度我身。大願有重報，玄德必信然。陰惡罪至深，對來若轉輪。

學道甚亦苦，晨夕建福田。種德猶植樹，根深果亦繁。子能耽玄尚，飄爾昇清天。修是無爲道，當與善結緣。太上弘至道，書名智慧篇。拔苦由大才，超俗以得真。靈姿世所奇，燁若淵中蓮。

人行各有本，皆由宿世功。立德務及時，發願莫不從。善惡俱待對，倚仗理難窮。賢士奉法言，道德在兼忘。解是大智慧，上爲太極公。寶蓋連玉輿，命駕御九龍。金華擎洞經，捧香悉仙童。嘯歌徹玄都，鳴玉叩瓊鍾。

竦身凌太清，超景逸紫霄。保無持法綱，遊玄極逍遙。萬劫猶昨夜，千春如晨朝。巍峨蔭雲華，手鬱寶林條。香煙自然生，玄階興扶搖。靈旛順風散，繁想應時消。滅智弘大混，無爲爲清謠。

上清太極隱注玉經寶訣

(郭清點校)

# 009 太上洞玄靈寶真文 要解上經

高玄大法師受

經名：太上洞玄靈寶真文要解上經。撰人不詳，約出於東晉南北朝。係古《靈寶經》之一。一卷。底本出處：《正統道藏》洞玄部本文類。

太上靈寶治玄都玉京山七寶玄臺，十方至真自然妙行真人，飛仙大聖衆，皆浮空燒香散華，旋行一日三周，手把十絕華幡，口誦洞章。日月交迴，七星運關，三百三十日，則天關迴山一度，三百三十度，則九天氣交，三千三百度，天地氣交。天地氣交爲小劫交，九千九百度則大劫周。此時則天淪地沒，九海溟一，金玉化消，豪末無遺。天地所以長存不傾者，元始命五老上

真，以靈寶真文封於五嶽之洞，以安神鎮靈，制命河源，致洪泉不涌，大灾不行。此自然之文，故曰靈寶九天上書，非鬼神所知。世有其文，則保國寧家，萬灾不衝。學得其法，至大劫之周時，晏鴻翻而高翔，躡飛霄而浮空也。舊科四萬劫一出，皆授宿有金名，刻簡來生，應爲真人者。

太上元始靈寶五篇真文，舊藏太上玄臺七寶上宮。天書宛奧，不可尋詳，文彩煥曜，洞映上清。五老侍衛，上帝朝真，玉女執巾，金童揚煙，熾百和合香，流薰紫庭。吐日精以却穢，散月華以拂塵。神燈朗照，炳燭合明，金風八發，慶雲四陳，鸞鳳悲鳴，嘯歌邕邕，飛龍毒獸，備衛玉闕。萬帝稽首，旋行上宮，飛空步虛，嘯詠洞章。讚九天之靈奧，欣三天之寶明，寔玄文之妙重，功德巍巍乎太空。故元始記篇有一十二德，以崇寶於天真，標靈文之難窮。一者其德如虛無，澄真洞寂，澹泊自然，幽幽冥冥，爲天地之根。二者其德如大道，恢廓無爲，爲神明之宗，一

切萬物，普受其成功。三者其德如天，澄虛廣覆，高浮上清，一切萬物，普受生成。四者其德如地，開張養生，含容無細，一切萬物，受其厚載。五者其德如日月，光明洞映，無幽不徹，一切萬物，受其柔惠。六者其德如衆星，照曜諸天，朗達幽冥，一切萬物，普受光明。七者其德如雲雨，和天潤地，流澤廣施，一切萬物，普蒙惠灑。八者其德如四時，轉輪陰陽，節氣和平，一切萬物，普受含生。九者其德如太山，包容障遏，威靈恢恢，五帝安鎮，神仙所居。十者其德如大江，柔弱蕩蕩，惠流十方，不簡穢賤，無細不容。十一者其德如真，教導三乘，綿綿長存，開張法門，普濟萬民。十二者其德如神人，救死護生，使寒灰起煙，演明玄教，普度天民。靈文妙重，出於自然，故標其至德，以貴其真。夫靈寶五文，皆天地之根，化生五老，上總五星，下鎮五嶽，運導五行，通人五臟，安氣養神，保國寧家，使帝主興隆，萬灾不加，洪波不衝。靈文既見，保天長存。元始之旨，其微

其深。今故相告，祕而勿宣，勤加修誦，道自感焉。

太上大道君曰：夫爲道結緣，世世不絕，致善福來生，當行十二上願，普度一切，致國太平，家門興隆，子孫昌熾，世出賢明，七祖生天，轉輪福堂。此功高重，勤而修行。一者當願大道澹泊虛無，安閑空寂，澄清自居，廣開法門，教導頑夫，皆蒙惠解，精苦是修，預以同學，普得昇虛，與天相保，長存無憂，一切衆生，咸同寧謐。一者當願諸天結氣澄清，高虛廣覆，保真固靈，氣候調節，四運和平，國安民豐，普天閑寧，廣濟一切，惠逮有生，保劫長存，億億不傾。三者當願地土廣載無窮，安平不陷，海淪不崩，保鎮寧國，兆民興隆，養生安死，惠周十方，禾稼種植，滋生日豐，含德厚載，萬願咸從。四者當願日月二景高明，無有勃蝕虧縮，安清光照諸天，洞消閻冥，保固劫運，世祚和平，普加惠潤，澤灑衆生。五者當願星辰與日月齊光，轉燭照曜，映朗十方，各安其位，經緯直行，保鎮安國，无

有灾殃，四海寧一，普天興隆。六者當願四時隨節推遷，景氣和調，无有灾患，疫毒消滅，普天平安，五穀豐熟，國富民權。七者當願浮雲結氣聚煙，飛空高澄，廢覆玄玄，隱則無爲，散則彌天，神仙同車，結交衆真，惠流一切，興國愛民，普濟羣生，人同劫年。八者當願風雨流灑无窮，普加施泄，受其發揚，萬物滋生，國儲民豐。九者當願五嶽各安其方，巍巍包藏，長爲仙宮，安鎮國祚，保天无終，護度一切，莫不仰宗。十者當願江海蕩蕩无極，含容恢廓，无細不殖，淵奧柔惠，潤加動息，天人獲慶，年同劫石。十一者當願帝主國土日昌，四鎮安穆，兵革不揚，天民歌唱，吉應來祥，敷教濟濟，威化洋洋，兆庶稱慶，長樂未央。十二者當願蠢

諸天，有見此法，立應自然，勤心修行，生死獲仙。

太上大道君曰：吾昔受之於元始天王，使授仙公仙王仙卿，上清真人，不傳中仙。自无玄圖帝簡，玉名上清，不得見聞。脱有漏慢之中，見亦不勤，九天禁書，四萬劫一傳。

夫修學之士，不行此法，功德不建，思无感徹，真靈不降，與善緣冥絕，福路既乖，仙何有日。至學之士，常當齋戒行香，朝禮事竟，仍東向行願，心口相應，无有異念。將足以招玄真於虛無，坐求靈福於自然，拔七祖於幽牢，昇窮魂於南宮，保家國於厄運，禳天灾於康年。此福巍巍，難可具宣。於是說靈寶自然五篇衛靈神呪曰：

東方

九氣青天，明星大神。煥照東鄉，洞映九門。轉燭揚光，掃穢除氛。開明童子，備衛我軒。收魔束祆，上對帝君。奉承正道，赤書玉文。九天符命，攝龍驛傳。普天安鎮，我得飛仙。

南方

南方丹天，三氣流光。熒星轉燭，洞照太陽。上有赤精，開明靈童。總御火兵，備守三宮。斬邪束祿，翦截魔兇。北帝所承，風火八衝。流鈴交煥，敢有不從。正道流行，我享上功。保天長存，億劫無終。

西方

七氣之天，太白流精。光曜金門，洞朗太冥。中有素皇，號曰帝靈。保神安鎮，衛我身形。斷截邪源，玉道正明。宮殿整肅，三景齊并。道合自然，飛昇紫庭。靈寶符命，普惠萬生。功加一切，天地咸寧。

北方

北方玄天，五氣徘徊。辰星煥爛，光曜太微。黑靈尊神，飛玄羽衣。備衛五門，檢精捕非。敢有干試，豁落斬摧。玉符所告，神真八威。邪門閉塞，正道明開。映照我身，三光同輝。策空駕浮，舉形仙飛。

中央

黃中理氣，總統玄真。鎮星吐輝，流煥九天。開光童子，一十二人。元

氣陽精，爛上朱煙。洞照天下，及臣等身。百邪摧落，殺鬼萬千。中山神呪，普天使然。五靈安鎮，身飛上仙。

太上大道君曰：此自然五篇衛靈神呪，舊出靈寶五文上篇。制魔召靈，役使群神，安鎮五嶽，保天長存，明理三光，致國太平，兆民享福，濟度群生。吾昔受之於元始天王，使依玄科四萬劫一傳。子位登高仙，總統三界，匡御群靈，今以相告。子擇其人，必合玄圖，依科以傳。凡欲修道求仙致真，安國寧家，截諸不祥，當奉行自然衛靈神呪。常以本命、太歲、甲子、庚申，及修齋之日，常東向誦之一徧，則神朗氣正，宮宅肅清，邪魔摧滅，五老降真，萬試寶伏，妖災喪亡，長齋修誦，剋成真

人。

太上大道君告高玄大法師曰：夫來入吾法門，上希神仙，飛騰華蒼。次願家國安寧，過度萬患，消災滅禍，請福求恩。當先修靈寶自然五篇，八齋悔罪，懺謝十方。上解宿世重過，拔度惡緣，下解己身積行以來所犯罪愆。

勤行齋直，廣建福田，救度一切，卹死護生，功成德普，乃合道心，惡對自滅，善緣來生。家門端整，所願咸從。神真玄降，坐致飛仙。此治行之本，求道之源。學無此法，徒勞心神，宿根不解，望道泯泯，至老無獲，不免諸患。大道廣慈，哀之在心。今故相告，子勤修行。吾昔受之於元始天王，使我祕之於靈都上館，四萬劫一出。子今當依先師舊科，若有至學之人，名書金簡，行合神仙，子當傳之焉。

道言：齋日燒香，東向祝曰：

臣今故燒香，歸身、歸神、歸命東方無極太上靈寶天尊。臣今仰謝東方九氣青天、太清玄元上三天無極大道、太上老君、太上丈人、天帝君、天帝丈人、太帝帝君、上皇老人、三十九真、七十二聖、高玄真君、九老仙都君、九氣丈人、始生青真東華玉寶高晨大司馬、上相青童君、元老九玄主仙真人，無鞅數量、百千萬重道氣、千二百官君、太清玉陛下、青帝九氣玉門神仙、四司真人、諸天至極上聖大神、東鄉無極世界

神仙正真。乞丐原臣宿世以來七祖父母，下及臣身積行所犯，殺害賢良，元逆醜惡，非人所行，淫色盜竊，敗人成功，離人骨肉，奪人所崇，爲子不孝，爲臣不忠，反上逆主，攻伐師宗，上不敬天地，下不畏鬼神，訾毀大道，泄露靈文，口是心非，勝己嫉能，輕慢四大，污穢三光，惡口兩舌，讒擊善人。諸如此罪，歷世纏綿，結固不解，積成丘山。乞今燒香行道，懺謝玄真，宿縛解散，七祖同懽，去離五道，拔度八難，窮魂解脫，上昇福堂，舉家无他，天下受恩，國土太平，四海興隆，帝王懽悅，國富民豐，惠加衆生，咸蒙道恩。今束身歸命靈寶天尊，賜臣得如所願，位登上仙，昇入无形，與道合同。

畢，九叩頭，九搏頰。次南向燒香，祝曰：

臣今故燒香，歸身、歸神、歸命南方无極太上靈寶天尊。臣今仰謝南方三氣丹天太清南極皇上老君、洞靈玉帝、上元禁君、三元丈人、始老玄真萬福君、萬福丈人、南昌上宮注生司馬、

太極真人、太和老子、玄和丈人、赤帝丹靈高仙萬真、諸天至極上聖大神、南鄉无極世界神仙正真。乞丐原臣宿世以來，七祖父母下及臣身。餘如上法。

畢，九叩頭搏頰。次西向燒香，祝曰：

臣今故燒香，歸身、歸神、歸命西方无極太上靈寶天尊。臣今仰謝西方七氣素天太清西華高上皇帝、太靈元始老君、萬始先生、太素三元君、金闕七寶後聖帝君、主仙丈人、太和玉女、西靈金母、白帝高仙、四極真人、諸天至極上聖大神、西鄉无極世界神仙正真。乞丐原臣宿世以來，七祖父母下及臣身。餘如上法。

畢，九叩頭搏頰。次北向燒香，祝曰：

臣今故燒香，歸身、歸神、歸命北方无極太上靈寶天尊。臣今仰謝北方五氣玄天太清太上高皇玉帝、虛皇道君、太上老君、太上丈人、太上大道玉晨君、北極真公文始先生、黑帝皇老、高玄真人、自然童子、北辰九真、斗中

大神、五靈夫人、太華九辰、高上萬重諸天至極上聖衆神、北鄉无極世界神仙正真。乞丐原臣宿世以來，七祖父母下及臣身。餘悉如上法。

畢，九叩頭搏頰。次東北向燒香，祝曰：

臣今故燒香，歸身、歸神、歸命東北无極太上靈寶天尊。臣今仰謝東北始蒼天太清無極虛無自然大道至真上聖、靈寶始青老君、九天真王、東明虛皇帝君、九靈先生、玉華真帝、高皇上真真人、諸天至極上聖衆神、東北方無極世界神仙正真。乞丐原臣宿世以來，七祖父母下及臣身。餘悉如上法。

畢，九叩頭、搏頰。次東南向燒香，祝曰：

臣今故燒香，歸身、歸神、歸命東南无極太上靈寶天尊。臣今仰謝東南始丹天太清洞極虛無自然至玄道君、上聖靈寶始赤陽元老君、南極老子、太和先生、三靈玄上萬福皇老丈人、丹靈高皇帝君、太陽真人、好生度命司馬、玄真三元君、紫晨大道君、南明洞靈虛

道君、朱宮赤精南昌司命、四極真人、諸天至極上聖、衆神、東南无極世界神仙正真。乞丐原臣宿世以來，七祖父母下及臣身。餘悉如上法。

畢，九叩頭搏頰。次西南向燒香，

祝曰：

臣今故燒香，歸身、歸神、歸命西南无極太上靈寶天尊。臣今仰謝西南始素天太清玄極虛無自然浩冥皇上元靈道君、金華至真靈寶始素老君、三天玉童紫陽真公、斗中四真、元陽帝君、紫精先生、萬福萬氣萬度萬生君、西明太靈虛皇道君、金門素靈七真玉華君、諸天至極上聖衆神、西南无極世界神仙正真。乞丐原臣宿世以來，七祖父母下及臣身。餘悉如上法。

畢，九叩頭搏頰。次西北向燒香，

祝曰：

臣今故燒香，歸身、歸神、歸命西北无極太上靈寶天尊。臣今仰謝西北始玄天高上元皇道君、九天元靈洞寶太上真老君、無量太華靈寶始玄老君、皇上丈人、北玄九真、華晨君、天門度

世飛天羽郎玉仙監、總靈司馬、上古三師大聖衆至真諸君丈人、諸天至極上聖衆神、西北无極世界神仙正真。乞丐原臣宿世以來，七祖父母下及臣身。餘悉如上法。

畢，九叩頭搏頰。次向上方燒香，

祝曰：

臣今故燒香，歸身、歸神、歸命上方无極太上靈寶天尊。臣今仰謝上方太上无極无形无名无頂无極至真太上大道高皇大帝、九天元父、元始天王、元始丈人、至極靈寶洞玄太上元靈老君、无極大聖衆至真諸君、丈人、諸天至極上聖衆神、上方无極世界神仙正真。乞丐原臣宿世以來，七祖父母下及臣身。餘悉如上法。

畢，九叩頭搏頰。次向下方燒香，

祝曰：

臣今故燒香，歸身、歸神、歸命下方无極太上靈寶天尊。臣今仰謝下方玄黄天无上无極无色无鞅无量數太上大道、九千九百九十九萬億重道天老、九天玄母、太黄元君、九天真王、无上

虛皇玄和老人、太極真人、黄老皇帝、黄老丈人、元黄中帝、五老上仙、諸天至極上聖衆神、下方无極世界五嶽四瀆神仙正真。乞丐原臣宿世以來，七祖父母下及臣身。餘悉如上法。

畢，九叩頭、搏頰。

行此十方懺謝畢，便依威儀舊典。此學道之本，上可以解七祖之宿對，下可以除身行醜惡之罪。衆愆既散，神明自祐。神明既降，天民歸心。功德廣載，福蔭无窮，普濟一切，護度群生。斯法妙重，難可具稱。

道言：夫欲修善建功，廣種福田，當爲天民修齋謝罪，放生然燈，拔度宿緣，解脫世羅，天民蒙恩也。

靈寶真文既竟，方諸宮中東華上房青童君，歌和魂致神之曲，有得誦之，天靈降衛，萬祿喪迹，神聰意朗，存念易感。有經之子，寶而祕之，勿妄傳焉。

東華上房靈妃歌曰：

紫桂植瑤園，朱華聲棲棲。月宮生藥淵，日中有瓊池。左拔圓靈曜，右

掣丹霞暉。流金煥絳庭，八景絕煙迴。  
綠蓋浮明空，羽節命太微。鳳精童華  
顏，琳腴充長飢。控晨挹太素，乘欬翔  
玉階。吐納六靈胎，玉嬪抱巾隨。彈  
徵南雲扇，香風鼓錦披。叩商百獸舞，  
六天攝神威。倏忽億萬春，齡絕鬱巍  
巍。小鮮未烹鼎，言我巖下悲。

青童大君，與太虛真人、西城太  
真、小有真王，集於瑤臺，瞻眄十方，垂  
悼萬生，耽慕世塗，不知玉晨之會，發  
歎興吟，各賦詠一篇。每至齋日讀之，  
以招四真之祐焉。

青童大君吟詠曰：  
欲殖滅度根，當拔生死栽。沈吟  
墮九泉，但坐惜形骸。

太虛真人吟詠曰：  
觀神載形時，亦如車從馬。車敗  
馬奔亡，牽連一時假。哀世莫識此，但  
是借風火。種罪天網上，受毒地獄下。

西城真人王君吟詠曰：  
神爲渡形舟，泊岸當別去。形非  
神常宅，神非形常載。徘徊生死輪，但  
苦心猶豫。

小有真人王君吟詠曰：  
失道從死津，三魂迷生道。生生  
日已遠，死死日已早。悲哉苦痛容，根  
華已顛倒。起就零落座，焉知返枯老。  
東海青童君，常以丁日登方諸東  
華臺，四望十方。子以此日，常可向日  
再拜。日出行之，適子所願，因此服日  
精爲佳也。

上清大道玉晨君，常以正月四日、  
二月八日、三月十五日、四月八日、五  
月九日、六月六日、七月七日、八月八  
日、九月九日、十月五日、十一月三日、  
十二月十二日，以此日登玉霄琳房，四  
盼天下十方，有志節遠，周旋棲尚，耽  
仰清真，修虔注之心者。兆始修學，未  
能憑想絕巔，欲自陶練宿愆，每造其  
日，清齋，平旦之時，北向再拜祈請，極  
陳子也。兼以禮訓，階隆福之漸，拜禮  
願畢，服玉池三十六過，微乎深哉，勤  
勗之焉。

太上洞玄靈寶真文要解上經

(郭清點校)



# 010 太上靈寶威儀洞玄

## 真一自然經訣(敦煌本)

經名：太上靈寶威儀洞玄真一自然經訣。全稱《太上太極太虛上真人演太上靈寶威儀洞玄真一自然經訣上》。簡稱《靈寶威儀經訣上》或《真一自然經訣》。撰人不詳，約出於東晉。係古《靈寶經》之一。原本一卷，《正統道藏》未收。今以敦煌 P. 2356、P. 2403、P. 2452 號抄本補錄<sup>①</sup>。

(以下 P. 2356。前缺)

也，多如恒沙之數。言要此靈寶  
 □□□□真佛也。諸世界今真人各  
 各教化道法□□。夫不得靈寶自然十  
 方真佛者，仙道衆妙莫能尅成矣。仙  
 之言佛，佛是胡語耳。諸如來受太上

教說法，使世界皆治道行，道行具足，自然好仙，好仙必得仙經。夫人不信仙道者，是其宿對未盡，道行未足，故不令得學仙道。不死之法具宣，道教流布，天人雖塗殊，而同歸太上矣。太上靈寶洞玄天書，道之至真，尊大無上。諸道士、沙門、百姓子男女人，欲棲名山，清靜無爲，永絕世務，志學仙道，長齋幽林，讀道德五千文、洞真玄經、卅九章、消魔智慧，舉身白日升天，而無是經，終不得上仙太真之道，永享無數劫。道欲時時威制魔王官屬、三界鬼神，使役六天，從心所願，而無是經，終不能服也。欲登名山精思，吐納服炁，夜練合丹金、飛八石、柔流珠，轉化七寶，而無是經，其道不成。欲旋行山林，採於芝英，取不死之藥，而無是經，終不可得也。欲隱遯山水，高尚絕世，守志吾經，而無是經，其道不足。沙門比丘尼、五戒清信弟子、男女人，欲於塔寺精舍持戒，讀佛神咒、大小品、維摩詰、法華、寶妙、三昧諸經，仰希禁譙，救濟苦厄，積功取滅度，轉輪

生死求仙道，而無是經，不能降福獲慶，後世得道也。天子王侯治天下，興太平之道，而無是經，四夷不化，賢聖不至，兆民不豐也。諸道士欲修齋行真道，轉誦衆經，濟渡一切灾厄疾急，積己功德，致升仙之大福，以安天下民，使咸得度脫憂苦，生死獲道，而無是經，終不能感會群聖，幽通道真也。

道言：國主王侯民人，本非道士，而稟姓仁和。忠孝，慈愛萬物，志樂山水，常好燒香淨潔，欽敬道士，財智精明，解了玄義。此皆前世已奉受供養靈寶經，功德高妙，道使其然也。是人若學道，必得仙道，而宗廟安寧，世出賢人。此其仙已近故也。但世求其人難得，百萬中有一，已爲多矣。仙公曰：所謂度八難者，仙聖交會，皆積善所至。

道言：王侯道士民人，得生爲人，轉女作男難也。既得爲男，才智明達，六情完具，形容端偉，聲如玉音，炁若熏香，眼有日光，衆顧欣欣，恒如不足，難也。諸善已修，得生有道之國，君父賢明，篤尚道德，難也。貧窮而好道

念，施惠不懈，難也。富貴而信尚道士，尊奉經書不殆，難也。能受人之惡而不與算計，制身命使不死壞，得度世仙道，難也。得見洞真洞玄洞神，太上

三洞寶經，尊奉讀誦，供養燒香，難也。得值見仙聖真人，說法教化之時，同志相遇，難也。是為八難矣。自非前世勤修道德，積善累功具足者，何緣得離愚癡三惡之道，而當斯靈會乎？太上真言明矣。太極真人曰：我歷觀如經說明夫道言者，是太上言太上大道文，故稱道言也。

道言：《靈寶經》常有十方自然佛、至真成神三萬六千真人、希釋神人廿五、十方無極過去見在法諸佛、真人大聖尊神、妙行真人上仙、八方諸天王，各各遣神通人得道。菩薩玉女燒香散華，供養禮拜尊經。

道言：靈寶經真文中，歲有六齋：正月、三月、五月、七月、九月、十一月；月有十齋：一日、八日、十

(P.2356 止於此，下文缺)

寶，天聖所尊，不得復與黃赤道士法師

雜處，卧息坐起，交袂飲食。若洞神洞真可同遊耳。仙公曰：洞真，卅九章是也。洞神一日洞仙，太上三皇天文是也。洞玄，靈寶是也。上清三洞主尊之書。

道言：世人有宿緣，當得供養太上三洞靈寶經法師一人，勝黃赤道士千、阿羅漢百。阿羅漢，謂已得神通滅度之道。夫羅漢去仙道猶尚遠焉。子得供養三洞法師。仙公曰：靈寶文亦包諸經，可名三洞法師也。

道言：由是與賢人結冥因，死生天堂，世世當值聖師，居家富貴，轉輪無有極時，長離愚惡十苦八難，當為人尊，福德巍巍，難可名喻。女人得轉為男，女受聖智大智慧。福田之上，譬如種一菓，獲實無數，漸漸滋生，慰茂成菓林，其子甚多，乃飽益衆人。亦如種稻數頃，得收萬斛之豐，足以濟度下人。有如取魚，當先善其苓，所施者微，得報者重。此分明實語，可不勉哉。但患是師難遇，遇者皆汝遭宿世有善緣，今得會耳。一乖賢域，何當復有會因。子常思道言。

道言：夫傳授靈寶甚難。七祖相

牽，令必得其人，依經劫數年歲，信法以用金錢。貴是經故也。使不得輕泄妄傳，毀慢尊文。金錢赤縣所省，可用衆寶準之。仙公曰：赤縣謂九州之域，地無金錢，可用衆寶。計二萬四千金錢輕重，折當之七寶，雜繒亦是，奉有經之師。世人饜貪，傳經故以重信，乃知其心也。

道言：先齋百日，或三月、或三十日、或廿四日，或十日。齋竟，師與弟子俱登名山之峰，壇石上傳經。弟子受經之後，若復有至人丹心好道真者，資寶信求受，可不須年限竟。年限竟而無其人，後聽并授也。經法信太上言以營齋(P.2403 止於此，下文缺)

(以下P.2452。前缺)

〔太極真人頌曰：〕

太上大道君，出是靈寶經。高妙難為喻，猶彼玄中玄。〔自然無為道，學之得高仙。大乎洞虛徑，安坐朝諸天。〕〔上寶紫微臺，下藏諸名山。煥爛龍鳳文〕，戢曜在無間。〔妙哉太上道，無為常自然。王侯及凡庶，所貴惟忠賢。〕〔宿命有福慶，卓拔在昔緣。法師〕轉相授，寶信劫數年。〔廣

念度一切，大禍報尔身」。供養必得道，奉行成至真。「大道無彼我，傳當得」其人。

〔太上玄一第一真人〕頌曰：

〔衆妙〕出洞真，煥爛曜太清。奉者號仙人，體無求長生。逍遙戲玄臺，宮殿羅無形。蒨粲七寶林，晃朗日月精。龍鱗交橫馳，鳳鳥翔悲鳴。太上治紫臺，衆真誦洞經。捻香稽首禮，旋行繞宮城。三周歸高坐，道王爲應聲。人主弘至道，天下普安寧。

太上玄一第二真人光妙因頌曰：

虛無常自然，強名字大道。緬邈無邊際，衆妙歸靈寶。閉眼存至真，精思降十老。升仙永無爲，靈顏常妙好。渴飲玉池醴，飢食金光草。淨急<sup>①</sup>度八難，濟世諸〔苦惱〕。

太上玄一第三真人真錠光頌曰：

妙哉靈寶經，太上自然書。奉者致得仙<sup>⑤</sup>，號曰真天尊<sup>⑥</sup>。受命宣道教，真爲超世才。事畢升神仙，宮殿治玄〔臺〕。時降須彌山<sup>⑦</sup>，逍遙憩蓬萊。

太上正一真人無上三天法師張道

陵<sup>⑧</sup>頌曰：

靈寶及大洞，至真道仙公<sup>⑨</sup>。如有五千文，高妙無〔等雙〕。奉行立飛仙，玄居治虛空。侍衛太上臺，逍遙紫〔微宮〕。萬劫如電頃，長存永無窮。道眼以備足，豁落自冥通。幽昧無不知，安坐觀十方。

太極真人傳經章辭要經

葛仙公所受用儀法如左：

某州郡縣鄉里某官先生道士王甲死罪辭：宿命因緣啓拔，得去魔俗，歸奉大道，委身正真，遂蒙玄施，不以頑愚，昔賜佩黃赤二一無終玄錄，金書玉字養身之道。玉券已畢，受恩過泰，不唯下賤，心樂真仙之道，進奉上清大洞玄經，已復有年，不能仙度，混同常人，魔俗不別。雖穢惡彰積，然精誠慕道，翹翹之不敢暫休。遭遇運會，今見太上靈寶洞玄寶經，達妙上清高旨，衆真所宗。甲不以肉人，竊好至真，依法賚金錢二萬四千，此物非赤縣貧窮小兆卒可得辦，請以某寶繒準。當謹奏辭上聞，恩唯明法師先生，垂愍一切有心

之臣，救甲飢渴之望，得爲身寶。若受道之後，輕泄至真，傳非<sup>⑩</sup>其人，甲當身謝天地水三官，七祖獲考於地獄，命過之日，不敢怨道咎師。甲自心好道真，時所不拘逼，乞得尊奉大法。如違手辭者，當依科受罪。謹辭。

言詣太上靈寶洞玄法師某先生門下。仙公曰：夫先生位重，隨德學稱號某先生也。

初度經章儀

若佛沙門尼，當言某沙門如干戒弟子、清信男女生。後臨度經時，有拜章亦如此。但易言：齋已竟，經寫畢，授定五過，不敢有遺脫，即日手付甲乙。

太上靈寶洞玄無上弟子法師臣甲，稽首再拜，死罪上言太上無極無上大道至真君自然金闕下：臣宿命運，得生道門。仙公曰：先人得真仙大道，弟子皆得言生長道門。自非仙道之後，不得稱生道門。曦日因緣遭值，見某道士有靈寶自然經，即甲年月日於某山嶺，賚金錢二萬四千奉受供養。某頑之未能致仙，今有同志上清道士王甲，隱身山林，修學

洞經，體性慈仁，行合道法，賚金錢二萬四千，誓辭求受真道。臣依法當傳。今不審王甲合受與不？請依法齋戒，分券授經。頃齋畢盡經竟，當重於名山壇石之上，啓手拜授。謹伏地拜表以聞，乞太上真官、典經仙郎仙伯仙王，諸真人垂神鑒察，時降靈寶經；威神真官監臨齋堂，入某身中，與某俱仙，白日升天，七祖受福仙宮。肉人元元，仰希玄告，願賜靈應。臣甲誠惶誠恐，頓首死罪奏，恩唯太上分別。求哀謹因真官飛仙值使、正一功曹左右官使者、陰陽神決吏、科車赤符吏、剛風騎置驛馬、上章飛龍騎、神龍騎、天仙飛真騎吏，各廿四人出，奏臣授王甲靈寶經素赤章一通，上詣上上太上曹，伏須告報。臣某誠惶，已下 太上無形無名虛無自然至真大道無上無尊金闕七寶陛下。凡廿四字。

於某山峯拜靈寶經上清真道畢金券文

太上靈寶洞玄自然至真大道無上弟子，奉行靈寶二洞法師王甲，宿命緣

會，以某年月日從靈寶法師王甲，於某山賚金信，拜受太上靈寶至真五篇太真道上經，今依法傳賢者道士沙門王甲。甲以某子生，今年若干歲，七世積德，福慶所及，稟姓慈仁，孝愛解物，志願道真，賚信求受靈寶經，永爲身寶，宗奉供養，不敢妄泄至真。傳非其人，某自受大考，七祖獲罪，不敢怨道咎師。當依承經旨，修行衆善，斷絕世想，唯志升仙度世，先人受福於天堂，一如太上真經大法律令。

太上無極大道無上太真自然經。

從此中分之。

丹書書黃素，金鑲貫甲。右弟子受書後，捉金鑲十口，告於十方不泄之信，並十口奉師投金龍，並於清泠之淵。求登仙之道信畢矣。

太極真人稱徐來勒，以己卯年正月一日日中時，於會稽上虞山傳太極左仙公葛玄，字孝先。玄於天臺山傳弟子鄭思遠、沙門竺法蘭、釋道微、吳先主孫權。思遠後於馬跡山傳葛洪，仙公之從孫也，號曰抱朴子，著外內書

典。鄭君子時說，先師仙公告曰：我日所受上清三洞太真道經，吾去世之日，一通副名山洞臺，一通傳弟子，一通付吾家門子弟，世世緣傳。至人門宗子弟，並務五經，馳騁世業，志在流俗，無堪任錄傳者，吾當以一通封付名山五岳，及傳子弟而已。吾去世後，家門子孫若有好道，思存仙度者，子可以吾今上清道業衆經傳之，當緣子度道。明識吾言。抱朴子君建元六年三月三日，於羅浮山付世世傳好之子弟。

靈寶威儀經訣上

①按敦煌三抄本中，前二件均首尾殘缺，無標題。P. 2452 首部殘，尾部完好，題「靈寶威儀經訣上」。大淵忍爾《敦煌道經目錄編》，考定此三件即《太上太極太虛上真人演太上靈寶威儀洞玄真一自然經訣上》之殘抄本。今姑從之，但經名省略。錄文中已將原卷部分俗寫異體字徑改作規範繁體字。

②稟姓：當作「稟性」，後文同此例。「仁和」，原卷作「人和」，據後文例改。

③括號中文字，係據陸修靜《太上靈寶授度儀》引文補。下皆同此。

④淨急：陸本作「靜急」，近是。

- ⑤「仙」字原本作「佛」，據陸本改。  
⑥敦本此句原作「號世尊□□」。據陸本改。  
⑦須彌山：陸本作「崑崙山」。  
⑧無上三天法師張道陵：陸本作「三天大法天師」。  
⑨仙公：陸本作「經王」，近是。  
⑩「非」字原缺，據文義補。

(王卡點校)

# 011 太極真人敷靈寶齋 戒威儀諸經要訣

經名：太極真人敷靈寶齋戒威儀諸經要訣。撰人不詳，約出於東晉。係古《靈寶經》之一。一卷。底本出處：《正統道藏》洞玄部威儀類。

太極真人曰：夫學真仙白日飛升之道，皆以齋戒爲立德之本矣。靈寶經有大法，正月、三月、五月、七月、九月、十一月，是歲六齋月。一日、八日、十四日、十五日、十八日、二十三日、二十四日、二十八日、二十九日、三十日，名爲月十齋。長齋久思，以期凌虛之道也。故靈寶無上齋，皇老天尊大聖，常奉修不倦，而況道士仙人，可不翹慕之乎。由來仙道之上，要請奉太上，教敷齋戒威儀節度口訣。此經幽妙，子

靜心諦聽焉。

太極真人曰：入齋堂，東向。向香鑪祝曰：

太上靈寶老君，當召真官功曹使者、左右龍虎直符捧香使者，關啓無上三天玄元大道，臣等正爾入靜，燒香朝真，願得太上十方正氣，來入臣等身中，所啓時聞，逕御真一玉皇几前。

次長跪，鳴天鼓二十四通。

謹出臣等身中五體真官功曹吏、曹、度道消灾散禍解厄君吏，各十二人。出臣身治職君吏、治中建節監功大將軍、前部效功後部效殺驛庭令、驛庭丞、四部監功謁者。臣等身中仙靈、直使、正一功曹、治病功曹、左右官使者、陰陽神決吏、科車赤符吏、剛風騎置吏、驛馬上章吏、飛龍騎吏等，各二人出。出者嚴裝顯服，冠帶垂纓，整其威儀。直使功曹戴通天之冠，衣皂紬單衣。正一功曹冠朱陽之幘，絳章單衣。使者冠九德之冠，五色壽命單衣，腰帶虎符，齊執玉板。直使功曹住立

四方，正一功曹住立中央，治病功曹營衛臣等身。左官使者建節在前，右官使者持幢在後，陽神決吏立左，陰神決吏立右，上部功曹遠望上天，中部功曹遠瞻八方，促氣功曹催促十方都官使者，匝繞臣等身。郎吏、虎賁、察姦鉤騎都官僕射、天驕甲卒、天丁力士、收氣食氣吏、收神食神吏、收鬼食鬼吏、收邪食邪吏、收精食精吏、收毒食毒吏、誅符破廟吏、科車赤符吏、剛風騎置吏、驛馬上章吏，飛龍騎吏，屯住臣等前後左右。功曹使者嚴裝事竟，羅列鹵簿，關啓靈寶官屬，領仙監齋諸君將吏。天師所布下二十四治，三十六靖廬、七十二福地、三百六十五名山崑崙等，上宮三萬六千神、日月星宿、璇璣玉衡、天地五帝、三界官屬君將吏等，及道上二玄三元四始四面方位風氣注氣、甲子諸官君吏、考召君、東九夷胡老君、南八蠻越老君、西六戎氏老君、北五狄羌老君、中央三秦僉老君、五嶽四瀆丘沼君、諸廟神祇所在山川溪谷山林孟長十二溪女，根源本始土

地之主社稷將吏，一時嚴裝，與臣等身中功曹使者、飛龍騎吏，上啓太上無極大道、太上大道君、太上老君、太上丈人、無上玄老，十方無極大道、道德衆聖天尊、至真大帝、天帝、天師君、靈寶監齋大法師、諸官君。臣等生長魔俗，沉淪季葉，翫樂榮華，宿命因緣，忽見啓拔，得奉大道。不以下愚好樂至真昇仙之道，而宿罪深積，結縛不解。今相率共修靈寶無上齋，請燒香轉經，以求所願，功曹使者、飛龍騎吏，分別關奏，以時上達。關啓事竟，各還臣等身中，復於宮室。須召又到，一如故事。因鳴天鼓三通畢。

仙公曰：此謂初建齋啓事儀。其日夕六時燒香，唯向香鑪祝耳，便禮拜。

次向香鑪祝曰：

香官使者、左右龍虎君、捧香使者，當令靖室齋堂之所，自然生金液丹碧芝英，百靈交會，在此香火鑪前，使臣等得道，遂獲神仙，舉家蒙福，天下受恩。十方仙童玉女，侍衛香煙，傳奏

臣等所言，徑御太上金闕玉皇几前。

次一時持齋者長跪，齋主自稱：某治祭酒某先生，臣某甲等今燒香。因捻香燒之，祝願。皆三燒香，三祝願。

第一燒香願曰：

臣等燒香，歸身歸神歸命大道。臣等首體投地，歸命太上三尊。願以是功德，歸流七世父母，乞免離十苦八難，上登天堂，衣食自然，常居無爲。今故燒香，自歸依師尊大聖衆至真之德。得道之後，昇入無形，與道合真。

夫三尊者，道尊、經尊、真人尊也。

三一之尊，通乎人身。

第二燒香祝願曰：

臣等燒香，歸身歸神歸命大道。臣等首體投地，歸命太上三尊，願以是功德，歸流帝王國主君臣。臣等受道法師，父母同學，諸道士賢者，願免離十苦八難，各保福祚，終入無爲。今故燒香，自歸依師尊大聖衆至真之德。得道之後，昇入無形，與道合真。

第三燒香祝願曰：

臣等燒香，歸身歸神歸命大道。

臣等首體投地，歸命太上三尊，願以是功德，歸流臣等身，令得仙度，昇入無爲，與四大合德。天下民人，蝱飛蠕動，一切衆生，免離十苦八難，五毒水火，賊疫鬼害衆厄，各保福祿，安居無爲。今故燒香，自歸依師尊大聖衆至真之德。得道之後，昇入無形，與道合真。

此一時燒香，以次人人上香，選高德一人為齋主，名曰法師。祝願不須人人祝願也。

燒香祝願畢，於是白燒香已訖，齋人一時向東拜，自陳言：

臣等今歸命東方無極太上靈寶天尊，賜所願隨心，求欲剋得。

次向南方，次向西方，次向北方，次向東北，次向東南，次向西南，次向西北，次向上方，次向下方。是謂十方願念，如先法，各方三拜，亦可一拜。畢。

正西向再拜言：

臣等今歸命西方已得道大聖衆至

真諸君丈人，賜所願者合。

次北向，次東向，次南向。面向經，三過祝願如初。畢。此皆回向香鑪，取其方面之正也。是爲靈寶齋禮十方，太上大法妙蹟矣。皆當安徐雅步，審整庠序，男女不得參雜，令威儀合於天典，則爲鬼神之所具瞻，飛仙之所嗟歎，三界之所軌範也。仙人修此齋，亦無已時，況凡賢者乎。拜既竟，齋人以次左行，旋繞香鑪三匝畢，是時亦當口詠步虛躡無披空洞章。所以旋繞香者，上法玄根無上玉洞之天，大羅天上太上大道君所治七寶自然之臺，無上諸真人持齋誦詠，旋繞太上七寶之臺，今法之焉。

又三洞弟子諸修齋法，皆當燒香歌誦，以上象真人大聖衆，繞太上道君臺時也。故求無上正真大道者，亦可繞高座上清靈寶經。所以繞香鑪者，直今世學者多浮淺，不能受至經。故示齋法，以委心香煙耳。行道心至，所願尋香煙，已御太上。太上道眼恒洞觀諸天下人善惡，亦無毫遺也，可不戰

戰慎之哉。

仙公曰：常想見太上真人在高座上，轉經而說法也。

### 轉經法

安小牀，向東轉經傳，案靈寶法，牀高五尺，廣長亦五尺。又法：牀高四尺五寸，廣長五尺。靜舍促可就容雅屋，此謂齋日權時行道耳。若欲長齋，久思求仙道，當別立齋堂，必令靜潔肅整，羅列經案香鑪，施安高座於其中也。次向高座禮經，都三拜。言：

臣等今歸命太上無極大道至真，無上三十六部尊經寶符，太上三尊。今燒香轉經，希仰太上濟度之恩，乞七世父母，以及帝王民人，一切衆生，臣等身及家門大小，願得赦除前世今世生死重罪惡過。或弑君父，或不孝二親，或背師欺友，或廢真就僞，或爲劫賊、攻伐家國，或伐他國，或殺害衆生，以爲快樂，或淫犯他妻，門族交通，或離母子，奪人所愛，或殺賢人道士，或爲君無道，或爲臣不忠，調上威下，酷虐百姓，已取榮名，或六親相殘，或敗

靖舍靈壇，或竊經書，或燒敗經書，或汙穢聖文，或評論道德以爲虛誕，或笑人作善，自言我是，或嫉賢妬能，不欲勝己，或不崇有道，不敬老人，不念六疾，或呵風罵雨，及天地日月星辰、帝王國主、師父道士，輕慢四大，或罵鬼神，呼謂無知，或口是心非，自欺形影。諸如此等，莫大之罪，不可憶識，積世結固，纏綿不解，冤對不已。乞今燒香行道，以自度脫，於是改悔，伏從禁戒，不敢又犯。亦任意所首謝，皆一時頭腦頓地，心中欣欣。如是聖人必得解脫諸苦八難，咸就無爲道場矣。

太極真人曰：靈寶齋法，然十燈火，以法十方。十是數之至，故人十月而生也。夾門然燈。七世父母然七燈於堂前，靖舍常然一燈，夾門然一燈，及符著門戶者，鬼神擊人，豈當不從門戶入耶。天常下六部使者，周行天下，伺人善惡，鬼神見符燈，皆曰善人之門，不可枉濫也。以此致分別，生死受福故也。日月星宿，病人行年本命，各然一燈。齋時，日夕各三時燒香悔過，



唯一心聽受經法妙蹟之義。故轉經說法，象古真人教化時也。聖人傳授經教，教化於後世，使未聞者聞，未知者知。欲以此法橋，普度一切人也。行道之時，故不可得亂語，論及世務，唯當請問法師經義禁戒，師當爲解說真要。人能使內外夷然，敬受經一句，司命加十筭。若內外躁競，毀經一句，司命奪十筭。故真人不言，言必有中。言皆令作法，言人能弘道，非道弘人，此之謂也。

仙公曰：以大齋法合得洞真，所以七祖致去地獄，昇天堂也。

齋人若妄言綺語，論及私鄙，罰香一斤，油五升，朱三兩。送齋主宣示百姓，然後供公家用也。夫齋直求道之本，莫不由斯成矣。此功德巍巍，無能比者。上可昇仙得道，中可安居寧國，延年益壽，保於福祿，得無爲之道；下除宿罪，赦見世過，救危難，消灾治病，解脫死人憂苦，度一切物，亦莫有不宜矣。行道千日，心盡於玄，必能降真人，見聖得道也。

晝夜六時禮拜，三時中講，三時思身中神。

太極真人曰：賢人有灾疾，道士當爲立靈寶齋，轉經燒香，悔罪請命，日數隨意。主人當盡心，內外信向，奉師香油、朱紙少許，以效精誠之至，示之不聊也。若是浮華之人，不得妄施此大法。大法微遠，非淺薄者所爲也。自志無大雅好幽識妙蹟，莫能宗矣。

太極真人曰：靈寶齋時也，太上真人、十方大聖、諸天帝王、飛仙仙人，如千億萬衆，不可稱數，千乘萬騎，寶蓋焯焯，飛華雪灑，香煙雲散，十絕靈幡，隨風飄颻，嘯歌邕邕，飛鳳和鳴，萬龍齊駕，洋洋浮空而來，看聽行道也。天人懽悅，鬼神稱善，魔王叉手作禮，欣暢大法，三界大千衆聖，同所嗟歎，所在神靈侍衛門戶，皆令護人，無敢行惡逆者也。讀經章句，咸當一心稱善哉善哉。魔王當有宣令言曰：此無爲賢人道士，功德巍巍，大聖所敬，我等各各當營護之，削其太山三官死名也。致白日昇天，七祖受慶，反胎生天堂，

兆身永保歷劫之利貞也。

太極真人曰：夫王侯皆受前世宿福，致富貴，才智精明，功德滿足，乃當復好道，此皆宿罪已盡。宿罪已盡者，其人必自篤好齋戒，學大經大法，則去仙近矣。若學持戒而不怠，剋得上仙也。道士樂齋者，悉是宿罪盡。宿罪未盡，終亦不好之矣。此去仙聖猶遠。學仙道欲長生久視，享無期之年劫，安宗廟，興門族，度七世父母苦厄，昇天堂，後世出賢明子孫，當受靈寶真文。行是齋，自得此大福。大福度人爲先，所以先人後己，倚伏兼忘，忘其所忘，志與玄同。上士聞道，勤而行之，中士若存若亡，下士大笑道矣。

太極真人曰：夫感天地，致羣神，通仙道，洞至真，解積世罪，滅凶咎，却冤家，修盛德，治疾病，濟一切物，莫近乎齋靜轉經者也。古聞其言，今希見其人矣。

太極真人曰：賢者欲修無爲之大法，是經可轉，及諸真人經傳亦善也。唯道德五千文，至尊無上正真之大經

也。大無不包，細無不入，道德之大宗矣。歷觀夫已得道真人，莫不學五千文者也。尹喜、松羨之徒是也。所謂大乘之經矣。又大洞真經三十九章，不得人間誦之。所以爾者，是真道幽昇之經也。諸天帝王下迎，散香花，六天大魔王官屬侍衛稱慶，皆來稽首受事，山海神靈莫不從己役使者也。詠之，一句，諸天爲設禮，况鬼神乎。故不可人間妄施行矣。靈寶經是道家之至經，大乘之玄宗，有俯仰之品。十方已得道真人，恒爲之作禮，燒香散華，衆道之本真矣。道士奉仰靈寶，朝拜齋戒，案法修之，皆使得道，豈有不然耶。此經若不能令至向獲長生，昇仙度世，故墮於塵壤者，天地無有仙人也。要在外想冥絕，內注玄真，然後景漢可凌也，長生可保矣。五千文感會衆妙，大歸等耳，勝得世間行也。諸齋法皆上宗於靈寶本齋矣。

仙公曰：此大齋上仙之道，所以七祖解脫羅網，飛昇太玄宮，身當先得五芝如芙蓉者也。五芝亦自生矣。

太極真人曰：五千文，仙人傳授之科，素與靈寶同限。高才至士好誦，求自然飛仙之道者，具法信紋繒五千尺，與靈寶一時，於名山峰受之。師南向立，弟子北向之三拜，分金環各半，佩身受經畢。弟子方各一拜，從北始，周十方。讀經亦先拜十方，如此法。太玄都舊典也，子今自明識之，子孫按法傳之於後世賢人。太上口訣，宜當祕之。子應常思虛無真人、高上大法王、大千乘賢、世號老子者也。老子，玄中大法師矣。其以道眼觀諸天人善惡，子弘此道，恐必飛仙。得妙之日，當知是經之不虛也。煥乎洞寂之文，大道之旨，盡於此矣。

仙公曰：世有高德人，欲諷誦期昇仙者，當與靈寶同時受之。法信效奉經之盟也。故曰：不出戶牖，以知天道，此之謂也。世將希有其人矣。若欲談虛無，持高於時者，不須依此法受之也。真人直以教學仙耳。道士學之求仙，不師受者，即道不行。

太極真人曰：真人體道虛無，無所畏忌也。俗間有汙穢者，直聖人爲世人魂神憂故耳。人經汙穢，不以香湯沐浴，多病害人，欲示民知清濁故也。夫鬼神之道，倍多汙穢也，汙便不行矣。但金尚不可穢耗，何況至道乎。大法真道，無所汙穢明矣。

太極真人曰：世人經汙，不問大小，應即解。解畢使燒香行道，本無日限也。

太極真人曰：飯賢福食，各有人數。外來之客，先亦同食。正一真人三天法師臨昇天，以百姓貧弊，爲復滅損，作福或十人饌。忽過十人他賓集，無以供之，既不盡周，一人不遍，猶是不普。故制法悉事畢，餘厨施一切人及衆生輩，爲主人祈福矣。後世不知之，故以相示也。酒不可都斷使之有數，隨人多少，不必令盡限也。故世教言：唯酒無量不及亂，斯之謂矣。酒多濁亂正氣，三真亡宮，故不可過量，考官司之，宜慎之。

太極真人曰：有人不學道者，聞

道士論至經幽蹟，妙義弘遠之旨，心不信用，而誣毀聖文，謂之虛誕，經教妄作耳，不足學也。已既不信，便嫉諸人經學，及導養之道，皆言不然。此人宿命前世時，不與仙聖作緣，賢人結因，今生無大智慧，故不得預賢聖之蘊韻矣。不信至道經教，而好學巫術雜書不真之事。其會同之日，唯酒肉爲先，口是心非，詭黠相攻，淫慾縱橫，放心所爲，嗜物無厭。或復爲師，初無教善之懷，強弱相凌，恒欲肆其虐意，意中貪妬譖害，淫盜詐僞，凶悖亂逆，此人身常有十惡。何以知其人有如是之行，不遭罹罪網，見世安穩者。有人從來不履非法，動遵經教，而更嬰憂苦者。夫人死身爛壞，魂神不朽，隨生時之行善惡，皆有對。是以世人爲惡顛倒，弑犯君父，酷逆無比，而不即被考者，由受先世宿福，福盡罪至。生或爲陽官所治，死入地獄，覆諸荼毒，楚痛難言也。若善人今不效者，是其宿世惡罪未盡，盡便福至。或見世當貴，或死得生王侯之家，或生天上，或作鬼

神。惡惡相緣，善善相因，是曰命根。學道者亦宜知此也。夫學道而至死不獲者，功德未備，宿無重緣，因緣微薄故也。後世無不藉此功，以得仙度也。若復學道數年，便望昇仙，未剋之間，忽然中息。或墮情慾，還隨流俗，身沒名滅，輪轉死道，更諸苦惱。或失人身，忽去人道，未有還期也。有挺世聰明，而不教化於人，後生頑癡也。奴婢亦無種，皆由前生時欺取人物，今以力償之。六畜以肉飴之。世人不信道經，狐疑正教，當受斯酷，豈不悲哉。道士若履善遇惡，能忍軼軻，守茲法戒者，保不失今之功矣。窮而不越道，道士也，死生王侯家。子於此得道，得道自當見宿命之根，由前世大布施，學道不倦，所以得仙矣。

左仙公曰：子其勉焉，歷代未有不學而得仙者也。學仙要在方寸盡，方寸不盡，是以學而不獲矣。聖人不誤人也。

太極真人曰：夫祭酒當奉行老君百八十大戒，此可言祭酒也。故曰不

受大戒，不得當百姓及弟子禮拜也。受此戒者，心念奉行，今爲祭酒之人矣。祭酒當斷念，捨衆惡，推行戒法，當如是也。黃老道妙，檢種人之法，非不真者，所參萬中有一多矣。

太極真人曰：學士若能棄世累，有遠遊山水之志，宗極法輪，稱先生。常坐高座讀經，教化愚賢，開度一切學人也。假令本命寅卯，屬東方二辰，稱東嶽先生。四方效此。辰戌、丑未生，稱中嶽先生。若復清真至德，能通玄妙義者，隨行弟子同學，爲稱某先生。某人鉤深致遠，才學玄洞，志在大乘，當稱玄稱先生，或遊玄先生，或遠遊先生，或宣道先生，或暢玄先生。略言其比，不可逆載。須世有其人，學者稱焉，大都法如是耳。言名上清，清齋七日。先生位重，不可妄稱，鬼神不承奉，以天考考人。夫先生者，道士也。於此學仙道成曰真人，體道大法，謂之真人矣。

太極真人曰：觀世爲道，希有欲齋戒轉經，尋明師受讀，請問義理，信

用奉行之者。多是浮華淺薄之人，聲色在心，志無大雅，好學小乘法。或有一人，欲齋戒學道，復無明師共相勸進。其志在仙道，圖濟一切人民，人民更非笑之。皆曰：彼不要之事，我未見人多學其法者，經書多虛妄語也。故不如我輩，並能消災散禍也。夫聾者不聞韶武，瞽者不覩白黑，豈言已病哉。遂令大道不行，正法不興，真經寢頓，精邪日滋，各稱三宮女郎，妖亂並作，百姓將捨真追偽矣。悉由師不動學，以勸弟子學正經、學正法。正真居其心，則魔魅遠矣。不知上經大義，無以持檢其心，邪魔鬼氣入心中動作，其意無所不至。猶抱石濟長津，豈不然哉。

太極真人曰：莊周者，太上南華仙人也。其前世學道時，願言：我得道成仙，才智洞達，當出世化生人中，敷演道德經五千文，宣暢道意。惠子是其弟子，爾時亦言：先生若得道，能出處自在，弟子願侍從，唱讚微言，通達玄旨，洞觀道源，以解世羅也。檢俗

人華競之心，導之以自然法門，故玄之又玄，衆妙之門也。後並得所願，著書皆通道意。世人于今不知是仙真人，以莊子所造多寓言。大鵬、大椿、冥靈，皆實錄語也，非虛發矣。夫大處則生此大物，今閩苑、崑崙、蓬萊、北海中，悉有是神物。小處則生小物。若欲皆眼見爲有，不見爲無，天下之所無多矣。道家經譬喻法中，說劫數久遠，有石乃如崑崙山芥子，四十里中，天人羅衣，百年一度，拂盡此石，取此芥子一枚，譬如一劫之終。若是之久，誰當信斯者矣。

太極真人曰：靈寶經者，衆經之宗，難以言宣。五千文微妙，衆經大歸義一也。洞真三十九篇，三十九真人說之者，蓋無生之文矣。此真人傳出之耳。其道德真氣，混化自然成真人，老子之儔矣。經歷無窮之劫，非學道之人也。世人非宿恩至功德滿足，得洞真經者，莫能知此義。所道者皆是無上三天自然宮室，萬物山川。其山川萬物，名有世上同者，非世之山川

萬物也，皆自然物，可聞難辯。洞真玉清經略解其義，不能覩縷，豈可思議也。奉之致大福，身得長生，宗廟安寧，誦之成真人之王，其道無上。昔之得上仙至真之道，皆是奉靈寶經者也。三天稱仙，梵天稱道。天地有終始，故有大小劫，諸經亦隨之滅盡也。後代聖人更出法，唯道德五千文、大洞真經、靈寶不滅不盡，傳告無窮矣。故曰無生之篇，衆經之王也。故代代教化應成仙道者，世世莫知其源。巍巍至尊，非鬼神所見，唯六天大魔王來奉承經師爾，上三天司直仙官監察之矣。亦非下仙之所聞也，真人乃能學之耳。世人不知道是仙人，又言仙非道，皆是其宿對未盡故也。對盡自得玄解大智慧，朗然知之，知之得道矣。五千文至難知，有知之人皆知之。故曰當解無上大慧也。

太極真人曰：建靈寶齋法，舉高德玄解經義者爲法師。次才智精明，能通妙理，聞見法度爲都講。次監齋，彈罰非法。次侍經，次侍香，次侍燈，

次第坐處。先受此經爲上，後受爲下。家一人受經，餘人有好齋者，聽齋。若時有黃赤太一祭酒，好見齋法者，聽齋，觀大法化，但不得同牀而坐。縱復至德，人間名望於世，悉當在後行，以其治錄爲次第也。燒香同爾。所以爾者，其人宿有微緣，故今得預之矣。

太極真人曰：齋時皆心注玄真，永無外想。想念在經師，先思三一在宮室，安居分明，具三魂七魄，太一鎮泥丸中，如迴風帝一法。然後與兆俱齋聽經，口受心存，則三尸亡走，邪氣滅去，內外受真，如此近仙矣。傍吐納導引和液，行上諸妙道，天真恐必降子也。上士得道於室內矣。雖處巖穴，而外想一毫不絕，亦徒勞損力爾。學道唯心盡，心盡，仙人當下觀試之也。子善詳察之焉。

太極真人曰：道士遠絕人跡，靜棲名山，修是長齋，獨處幽谷，則不復選法師，唯心與口談矣。人間修是齋，道士服食五穀，斷無所餌則已，若服藥物，正中服之也。過中聽飲，清飲而絕

食，平旦飲粥，日中菜食。齋限竟，解齋，如設大廚狀，唯宜潔淨爾。菓隨時珍，當先行香祝願也，願齋主昇仙度世。

太極真人曰：修齋之道，常行十善念：

第一爲道念四大，令得七世父母免脫憂苦，上昇天堂，衣食自然。

第二念帝王國主道化興隆，庠序濟濟，皇教恢弘，威儀翼翼，普天所瞻，民稱太平，六夷賓伏，妖惡日滅，賢聖日生。

第三念法師功德大建，教化明達，俱獲飛仙。

第四念同志學人，早得仙道，更相開度。

第五念親屬和睦，好尚仁義，貴道賤財，行爲物範。

第六念損身布施道士及飢寒者，天下民人，各得其所。

第七念蠕動蚊行，一切衆生，咸蒙成就。

第八念首謝前世今世生死罪對，

立功補過。

第九念家門隆盛，宗廟有人，世生賢才。

第十念尊受師經，無敢中怠，平等一心，廣度一切，我身昇仙，白日登天，拜見太上，永成真人，服五色靈液，與道合同。

鄭先生曰：登山受經時，亦不須拜章，口啓之爾。

頌曰：

道以齋爲先，勤行登金闕。故設大法橋，普度諸人物。宿世恩德報，道心超然發。身飛升玄都，七祖咸解脫。受竟，必頌此文。

南嶽先生鄭君曰：吾先師仙公，常祕此書，非至真不傳也，萬金不足珍矣。仙人相授於口，今故書之。仙公言：書一通封還名山，一通傳弟子，一通付家門子孫，世世錄傳，知道者也。與靈寶本經俱授之，道家要妙也。

抱朴子曰：洪意謂大齋日數多者，或是貴人，或是道士，體素羸弱不堪，日夕六時禮拜。愚欲晝三時燒香

禮拜，夜可闕也。爲當講法義而已，能六時燒香者，自當全法爾。恐人未得道，氣力極弱，但欲一日一夜齋此，可六時行道也。學者其善詳用焉。

建齋極，可食乾棗、鹿脯腊，是生鮮之物，一不得享也。

若非山學道士，居家修經者，豈能長齋久思哉。要當應齋，少可十日、九日、七日、三日、一日行道矣。斯功德弘普，學道之上法，七祖離苦毒，上昇福堂，此可謂至孝之道也。孝悌之至，通於神明，遠延七玄，何但祖考乎。故上仙祕之也。

太極真人敷靈寶齋戒威儀諸經要訣

①五千尺：疑當作「五十尺」。

（郭清點校、王卡復校）

# 012 太上洞玄靈寶智慧

## 本願大戒上品經<sup>①</sup>

經名：太上洞玄靈寶智慧本願大戒上品經。又名：《太上消魔保身安志智慧本願大戒上品經》。撰人不詳，約出於東晉。係古《靈寶經》之一。一卷。底本出處：《正統道藏》洞玄部本文類。參校本：敦煌 P. 2468、S. 6394、P. 2400 號抄本。

### 太極仙公請問太極法師

仙公於天台山靜齋念道，稽首禮拜，請問靈寶玄師太極太虛真人<sup>②</sup>曰：弟子有幸，得侍對天尊，自以微言，彌綸萬劫，洞觀道源，過泰之歡，莫有諭也。顧玄少好神仙白日飛騰之道，心想上聖，恒以髣佛，大經微遠，妙蹟難通，將稟口訣，釋我冥津，洞暢虛漠，有

無都盡矣。近而未究人生宿世因緣本行之由，今願天尊覺所未悟。

是時太上高玄真人嘯詠步虛洞章，歡然容豫<sup>③</sup>，耀金顏而含笑言曰：此子累劫念道，致太極玉名，寄慧人中，將獨步玉京，超逸三界，巍巍乎太上仙公之任矣。故慈心於天人，念度於後學也。常以外身而濟物，有德而弗名，玄都所銓，諒不虛矣。而謂太極真人曰：卿受太上虛皇道君之命，爲其師保，亦必盡教以高上大洞之淵蹟也，豈俟彼多陳乎。吾受任忝爲都教之法師耳<sup>④</sup>，至於執卷由子矣。

太極真人答曰：此童真之人，名刊金簡，才質清遠，景秀太上，玄微洞虛，故當爲仙公之任，弘道大度者也。吾忝受教化，愧<sup>⑤</sup>不足爲彼宗匠，太上<sup>⑥</sup>有命。何敢不傾軫<sup>⑦</sup>哉。衆妙之統，仰賴於法師矣。

太極真人曰：夫道，无也。彌綸無窮，子欲尋之，近在我身，乃復有也。因有以入无，積念以得妙。萬物芸芸，譬於幻耳，皆當歸空。人身亦然，身死

神逝。喻<sup>⑧</sup>之如屋，屋壞則人不立，身敗則神弗居，當制念以定志，靜身以安神，寶炁以存精，思慮兼忘，冥想內視，則身神並一。身神並一，近爲真身也。此實由宿世本行，積念累感，功濟一切，德蔭萬物，因緣輪轉，罪福相對，生死相滅，貴賤相使，賢愚相傾，貧富相欺，善惡相顯，其苦無量，皆人行願所得也。非道非天，非地非人，非萬物所爲矣，正由心耳。此對既鍾，亦難脫也。弱喪之徒，信道者少，宿命者多，不積善定念，修德其身，而欲忽德忘身，彊求外物，其可得哉，既已不克，莫不傷身矣。故有道之士，取諸我身，無求乎人，經云<sup>⑨</sup>：修之身，其德乃真，斯之謂也。夫學道，不受大智慧道行本願上品大戒，無緣上仙也。子有宿命，是以見此經。其文隱秘，立信效心，然後而傳，不可妄示不信。既其不信，必發異念，異念既生，彼此獲罪，是故藏之於無，待有應爲仙王者乃告焉。是時雲龍踊躍，諸天散華，飛香奏煙，山海靜波，觸類竄默，鬼魅<sup>⑩</sup>消亡，神魔降

伏，五苦咸解，長離地獄，惡者反善，信順受福。爾乃命太極侍經，仙人劉文靜披雲韞而授經也。

智慧本願大戒上品

太極真人曰：宿世禮奉經師，口誦身行，布施厄困，願樂三寶，君親忠孝，遠慕山水，栖憩賢儒，虚心有道，燒香散華，護度一切，修德補過，信順宿命，靜思忍情，其行也，上可昇仙度世，下可輪轉富貴，生為人尊，容貌偉秀，才智清遠，爲人之道，莫不具足。夫居世富貴，笑於貧賤，今報以貧賤；居世好殺，今報以夭傷；居世絕秀，笑於醜陋，今報以醜陋；居世聰明，不教於人，今報以頑塞；居世常康，笑於困病，今報以滯疾；居世不信道，笑於經教，今報以下愚，長與道隔；居世奪人夫婿，今報以少寡；居世誘人婦女，今報以鰥獨；居世發心爲夫妻，而後不得俱生人道，死爲下鬼，今報以本念，成於邪病也。自非大法，莫有解其宿纏而消此邪病矣。夫爲父母、兄弟、姊妹、夫妻、君臣、師保、朋友，皆前世所

念，願爲因緣，展轉相生也，莫不有對者哉，故曰倚伏難窮矣。唯學仙道士，當兼忘因緣，絕滅生死，同歸乎玄，以入妙門。能如是者，始可與言學道之夫也。

若見居家妻子，當願一切早出愛獄，攝意奉戒；若見飲酒，當願一切制於命門，以遠禍亂；若見采女，當願一切守清忍志，慕在賢貞；若見淫人，當願一切除棄邪念，翹心禁戒；若見婦人，當願一切忍割浮華，樂道自娛；若見真人，當願一切履信正化，日入法門；若見衆人，當願一切推仁無爭，懷道安世；若見善人，當願一切時刻存念，仰軌其道；若見惡人，當願一切弃凶即吉，不犯王法；若見貧人，當願一切損身施惠，後受大福；若見富人，當願一切救濟萬物，世世受祿；若見貴人，當願一切承其教旨，悉合典訓；若見賤人，當願一切勤修匪懈，各得所爲；若見帝王，當願一切奉仰王道，孝如父母；若見宰相，當願一切受其教制，四方歸仁；若見兵甲，當願一切各

念仁心，天下讓賢；若見王子，當願一切日歌太平，係國承家；若見賢人，當願一切履行其德，道爲世宗；若見法師，當願一切明解法度，得道無爲；若見栖山道士，當願一切悉見法門，速得昇仙；若見教化，當願一切親受聖教，皆爲淵博；若見聖人，當願一切尊禮侍見，諸國並瞻；若見仙人，當願一切真道悉成，飛昇天堂；若見城郭，當願一切嚴整修飾，以道爲基；若見大國，當願一切歸崇慕德，若水注海；若見小國，當願一切知止虛冲，安其所居；若見市朝，當願一切羣賢雲萃，悉弘正道；若見靜觀，當願一切功德巍巍，天人得志；若見齋戒行香，當願一切道德日新，庠序雅正；若見誦經，當願一切盡入法門，咸聞妙旨；若見經教，當願一切各各受讀禮習，普行教化；若見樓觀，當願一切洞觀十方，無所隱藏；若見高山，當願一切立德如彼，無復退轉；若見大海，當願一切智思無量，輔成家國；若見栖憩茂林，當願一切安居自在，廕庇含識；若見好



學，當願一切得成師宗<sup>①</sup>，養徒敷教；若見淨手，當願一切常執經書，無時暫輟；若見善口，當願一切耽詠洞經，日新不厭；若見動足，當願一切超步三界，飛行上清；若見靜止，當願一切滅景停真，安閑空寂；若見飲食，當願一切棄累入淨，存得道味；若見大藏，當願一切除其災害，施爲福田；若見疾病，當願一切以道自安，免此苦厄；若見死喪，當願一切學道常存，濟度三塗；若見畋獵，當願一切不爲始終，免無間罪<sup>②</sup>；若見夷狄，當願一切得生<sup>③</sup>中國，不生邊境；若見少年，當願一切及時學問，遂成學名<sup>④</sup>；若見老病，當願一切以道攝生，不更衰老；若見三光，當願一切普明靈曜，闇冥即消；若見雲雨，當願一切惠澤盈溢，無所不宜；若見素雪，當願一切常居潔白，逍遙自在；若見靈風，當願一切韞懷披散，德流遐邇；若見淨水，當願一切洗垢清虛，平等其心；若見名香，當願一切受茲芳淨<sup>⑤</sup>，衆穢蕭然；若見好華，當願一切樂敬諸聖，相好具足；若見

車馬，當願一切得道無爲，乘鳳駕龍；若見絃歌，當願一切翫經歎法<sup>⑥</sup>，以道娛樂；若見福食，當願一切無不飽滿，世享天厨，德流生人，如水歸海，宗廟胤長，常居貴盛，世與四輩，俱生王家；若見散施，當願一切禍滅九陰，福起十方，德如山海，莫不興隆，七祖生天，子孫賢忠，富貴巍巍，所欲皆從，學道飛仙，駕雲乘龍。道士坐卧，常願我等，四大合德，同體道真，長存玄都，師友自然，濟度十方，天下受恩，逍遙無爲，洞觀妙門。

### 禮經祝三首

真人口訣云：侍經仙童玉女聞此祝，皆歡悅而佑兆身也，是大經悉用此祝而禮拜矣。若冥心禮經者，亦心祝其文，乃上仙之祕祝也。

樂法以爲妻，愛經如珠玉。持戒制六情，念道遣所欲。淡泊正氣停，蕭然神靜默。天魔並敬護，世世受大福。鬱鬱家國盛，濟濟經道興。天人同其願，縹緲入大乘。因心立福田，摩摩法輪昇。七祖生天堂，我身白日騰。

大道洞玄虛，有念無不契<sup>⑦</sup>。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

此戒名智慧隱經道行本願上戒寶真品，太上虛皇傳太上大道君，道君傳太微帝君，帝君傳九微太真，太真傳太極大法師，及傳太極高仙王公，不告諸中仙矣。千年三傳，若無太上金簡仙名者，亦終不與此經戒相遇也。道士運會，脫有得之，當祕而奉焉。太上仙童十人隨侍<sup>⑧</sup>，視戒，營護弟子之身。時有賢儒、信道男女，兆不得閉絕於聖文矣，若本命、甲子、庚申、八節日，齋而誦一徧也。

太極真人曰：學昇仙之道，當立千二百善功，終不受報，立功三千，白日登天，皆濟人應死之難也，施惠其人尤善矣。學道當令衆行合法，廣建福田，發大慈之心，動靜常起道意，能如是也，吐納服藥，佩符，讀經，精思，終身不倦者，豈有不得仙乎。人無此德，服藥佩符，讀經齋戒，故終命而不驗矣，學士明思要言。

太極真人曰：立三百善功，可得長存地仙，若一功不全，則更從一始，而都失前功矣。常有其念在於心膂者，則是也。子導人作善，即為善功矣。

太極真人曰：常念嘯詠<sup>①</sup>，經行大慈，先人後身，揚善化惡，斷絕衆緣，滅念守虛，心如太玄，唯道是求，始謂能言神仙之道也。

太極真人曰：吾昔受太極智慧十善勸助功德戒於高上大道虛皇，世世宗奉，修行大法，度人甚易，此自然之福田也。太上以普教天人，今各得本願，始入法門<sup>②</sup>，長存無為，不更十苦八難，罪對罷散，地獄休息，三官寧閑，世世榮樂，咸脫羅網，後生安泰，天性恬然，所願隨行，其戒如上，以傳賢信。

十善勸戒曰：勸助禮敬三寶，供養法師，令人世為君子，賢孝高才，榮貴巍巍，生為人尊，門族昌熾。

三寶者，謂道經師也。能養生教善，行為人範，是名法師也。

戒曰：勸助治寫經書，令人世世

聰明，博聞妙蹟，恒值聖世，見諸經教，能誦章句。

戒曰：勸助建齋靜治<sup>③</sup>，令人世世門戶高貴，身登天堂，飲食自然，常居無為。

戒曰：勸助香油以濟衆乏，令人世世芳盛，香潔光明，容眸絕偉，天姿高秀。

戒曰：勸助法師法服，令人世世長雅，逍遙中國，不墮邊夷，男女端正，冠冕玉珮。

戒曰：勸助國王父母子民忠孝，令人世世多嗣，男女賢儒，不更諸苦。

戒曰：勸助齋靜讀經，令人世世不墮地獄，即昇天堂，禮見衆聖，速得反形，化生王家，在意所欲，玩好<sup>④</sup>備足，七祖同歡，善緣悉備，終始榮樂，法輪<sup>⑤</sup>運至，將得仙道。

戒曰：勸助衆人經學，令人世世才智洞達，動靜威儀，常為人師。

戒曰：勸助一切布施諫諍，令人世世壽考富樂，常無怨惱。

戒曰：勸助一切民人除嫉去欲，

履行衆善，令人世世安樂，禍亂不生，病者自愈，仕宦高遷，為衆所仰，莫不吉祐，門戶清貴，天人愛育，神魔敬護，常生福地。

此戒名太上智慧勸進要戒上品，皆大智慧經上卷所言也，法傳太極真人，以<sup>⑥</sup>治道行矣。兆有宿福，值見此文，祕而奉焉。妄示不信，禍及見世，死為下鬼，閉於地獄，旋轉五苦，後生失人道，毀經戒者亦然。

太極真人曰：人行之惡，莫大於嫉殺貪奢驕淫也。若此一在心，必伐爾年命矣。挾之<sup>⑦</sup>以學神仙者，不亦悲乎。

太極真人曰：道德五千文，經之大也。是道也，故通乎天地人，萬物從之以終始也。上士受誦為太上仙王，中士受誦為飛仙，下士受誦轉輪<sup>⑧</sup>聖王家，不經地獄，常生福國，命過之時，天帝雲車迎其魂神，安處福堂也。此度人無量<sup>⑨</sup>，不可具言也。

昔有婦人，受誦是經，夫恒愠怒之，終亦不退，婦遂白日昇天，夫死入

地獄，受考歷歲，婦飛行看之，令讀道德經，今當見救。時天人飛下，太山府君即呼問之，其具答。常<sup>⑧</sup>爲婦人所教，禮於是經，婦人升仙，我故緣昔恩求救耳。府君曰：子本雖不學，要是

常<sup>⑨</sup>禮大道，敬信經法，令可送著福堂，給其厨食，千年汝當生人中，可受誦是經。男人曰：我若得生人道，必宗受是經，以求度世。却千年，生人中，年十三歲，始好五千文，從師受誦口訣，高才聰明，國王禮聘不就，乃白日昇仙。其先敬經，賢妻相度，緣此宿恩也。

昔有賢明道士，齋於靜室，不能得中食。時俗姓男女<sup>⑩</sup>，敬樂大法，感此道士忍饑而誦經，日日爲設中食，時往聽經，道士哀其敬信，以經<sup>⑪</sup>傳男子女人，教以口訣，各誦之萬遍。太上龍輦下迎，白日昇天。此例甚多，非可悉記也。凡人雖不能學仙道，皆得受五千文禮敬，以致無爲之道，在世保延性命，家門安樂，死徑生天堂，不更三官地獄囚徒中也。其訣在信好，則此大

福可坐得矣。大洞真經，太上洞玄隱書寶經，不可傳凡人也，皆必是能學仙之士，所當修誦焉。若輕傳於凡夫者，將與七祖父母同幽於地獄，更五毒之考矣，慎之慎之。

太極真人曰：世人之惑也，而遠其先人，並競事鬼神，及殺生以求生，去生不亦遠哉。生時不修善治身，忍割可欲，死方厚葬<sup>⑫</sup>。其骸骨，不知魂魄已更五毒，幽囚地獄，苦惱三塗，輪轉五道也。生世無幾，而聚斂財寶，無有足時，爲己重擔，福盡罪至，身死名滅，財寶四散也，若疾風之扇塵矣。道士持齋燒香，清淨讀經，天下之盛事也。而不欲見，見之如不見矣。聞巫師鬼語，皆傾產厚禮奉之也。持齋靜漠而致福，巫師歌舞而招禍。禍之及也，彼我魂神俱致考罰，殃對無已，往返三惡之道，其苦難脫<sup>⑬</sup>。罪竟後生，或墮六畜，失於人道，設使還人中，當爲下賤矣，或六根不具，或形質醜陋，體炁臭穢，唯男唯女，頑癡可惡，爲衆所棄，流弊世間，至死饑寒。其人也，皆受先世

罪對，而從六畜中來，始還人道故也。若於今世忍苦甘貧，悔往修來，趣求奉法，以自解脫者，亦見世漸報，來生將受大福，當生富貴侯王之家，相好具足，容貌端偉，光華灼爍，衆見心歡，慈仁信好，高才宏略，欲男欲女，在我本願也。念尋善友，爲因緣知識，自當冥會，皆來爲兄弟子孫，所以世世賢孝，展轉相生，乃無絕矣。故曰倚伏因緣，孰知其極也，又云子孫以祭祀不輟<sup>⑭</sup>，此之謂也。

太極真人曰：玄素之道也，古人修之延年益命，以致長生矣，今人爲之，消年損命，以招早死矣。可復怨術邪，罪自己也，不亦悲哉。

太極真人曰：夫學道之爲<sup>⑮</sup>人也，先孝於所親，忠於所君，愍於所使，信於所友，言而可復，諫惡揚善，無彼無此，吾我之私，不違外教，能事人道也。次絕酒、聲色、嫉妬、殺害、奢貪、驕怠也。次斷五辛、肥生、滋味之肴也。次令想念兼冥，心觀清虛也。次服食休糧，奉持大戒，堅質勤志，導引

胎息，吐納和液，修建功德，忍人不能忍，割人不能割，行人不能行，居人不能居，衣人不能衣，食人不能食，守人不能守，學人不能學也。道行如此，乃可鎮以靈藥，餐於雲芽，尸蟲沉落，穢漏消滅，三宮滌盪，五臟安閑矣。將長齋久思，靜詠洞經，耽味衆妙，兼以丹液也。能如是者，豈有不得昇仙之道乎。

天尊告太極真人曰：若其不修人道，君親不忠，耽酒好色，殺伐貪殘，驕奢自恣，欺誘賢良，借貸不還，少已有如此之行矣，長不能革，使心夷然，而欲懷之，以齋戒學道，希肉飛之舉，弗亦哀乎，弗亦哀乎。斯人也，將長處地獄，履於五毒，刀山劍樹，湯火炎燎，煮瀆五體，求死不得，饑則食鐵，渴則飲火，出臨寒冰，傷肌切骨，方付三官，謫役山海，擔負土石，鞭笞考對，備經三徒五道，往返十苦八難之中，其苦無量，不可具言也。

太極真人曰：是人也，乃不如外學凡人，奉修仁義，敬信道德，唯

善而從矣，任化來往，在時遷易，逍遙域內，清淨自適，命過亦入福舍，不經囚徒，或爲鬼神也。後生人道，不失本願，轉得信根，賢聖結緣，穢累日盡，終入仙道。

太極真人曰：患人得生人道也，而不修德養性，以全於命矣；患聞經也，而不信矣；患信經也，貪財而不受矣；患受經也，而不講誦矣；患講誦也，而不修其事矣；患修其事也，而不恒其道矣；患奉師也，而不終其身矣；患服藥也，而未應中息矣；患道行不備也，而誇求昇騰矣；患靜齋讀經也，處幽山而不堪其憂矣。此十患在人一身也，若不戒之，身無濟理。所以云：有大患者，爲我有身，斯之謂矣，可不思與，可不思與。

太極真人傳經說法演戒竟，歌三徒五道苦痛，歎其辭曰：

三才及萬物，倚伏各有齡。終始待劫數，福盡天地傾。往返於五道，苦哉更死生。展轉三徒中，去來與禍并。

大賢慎茲戒，忍性念割情。愚夫

不信法，罪痛常自嬰。吾念世無已，今故重告明。若欲度斯患，歸命太上經。罪福不由他，諒自發爾身。大賢故閉口，欲絕諸惡緣。滅念歸兼忘，倚伏待長泯。弘道以安世，終當見正真。姪嫉爲禍首，滅身之至患。含養如此輩，恐必致夭殘。知惡而不革，豈是道所安。懷毒日齋直，令我發長歎。

宿命有信然，弱喪謂之無。皆欲眼前見，過目則言悠。大賢明道教，慘感愍頑夫。依依念子苦，勤勤令我憂。人命已消盡，亦猶膏中火。四大暫相遇，五物權時假。盛年當勤學，趣求存吾我。福盡身神散，冥冥地獄下。上聖畏是故，尋道度斯禍。

學仙行爲急，奉戒制情心。虛夷正氣居，仙聖自相尋。若不信法言，胡爲栖山林。

大賢樂經戒，受之爲身寶。就學恒苦晚，治身恨不早。比當披幽蹟，倏忽年已老。執卷吸爾極，將更死痛惱。吾故及弱齡，棄世以學道。

太極真人曰：吾昔學道時，受之於太上虛皇，奉而修之，遂成真人矣。道士若欲受吾大戒品文，師先讀一過，以示其心也，其必是學仙之士者，當賚信詣師門，乃對齋三日，念道思戒，然後傳矣。此戒至重，各各有威神部護其人，慎哉，慎哉。

仙公曰：此大戒施於學仙道士也。好尋世間非常，萬物皆當歸空，盡是法，可緣之度三徒之苦，以得道也。遇之者，子宿願也。受宜從之，勿不勤修。仙公以元正之日受戒，而作頌曰：

幽名山以靜漠兮，眇峻石之岑岑。素雪翳乎前庭兮，勁風肅於東林。對天尊之容與兮，耽冥蹟而散衿。愍世人之墮罪兮，悲念之不去心。背經戒以信邪魅兮，棄齋靜而美酒音。輪五道與三徒兮，經地獄之幽沉。斯苦痛之可言兮，更死生而難任，唯道德之濟物兮，豈待困而不尋。

仙公告弟子鄭思遠曰：吾少遊諸名山，履於嶮嶇，在禽獸之左右，辛苦

備至，忍情遣念，損口惠施，後身成人，懷道安世，恒修慈愛，念道存真，無時敢替也。齋直一年而未竟，其冬至之日，天真眇降，見授大經上仙之道。天真令我大齋長靜，按經施誦，次而學之，遂成真人矣。吾昔所受經道，太上所貴也，非中仙之所學矣。歷劫以來，常傳上仙，仙公仙王仙卿，不但我也。吾先世與子同發此願，施行善功，勤積不怠，致玄都有仙名，今相為師友，是以相授耳。吾去世也，將有樂道慈心居士，來生吾門者，子當以今道業，事一通通付之，法應世世錄傳也，皆是我前世與彼有宿恩，因緣使然也。子以一通依科傳付弟子佳者也。若無其人，一通封付五嶽名山矣。此太極真人口訣，子祕之，慎之慎之，時思之。

### 太上洞玄靈寶智慧本願大戒上品經

①案敦煌P.2468抄本（以下簡稱敦本），此經題名作「太上消魔寶真安志智慧本願大戒上品」。此名與宋文明靈寶經目、靈寶中盟經目、齋壇安鎮經目之著錄相近。

②靈寶玄師太極太虛真人：敦本作「太極法師真人徐來勒」。

③容豫：敦本作「容與」。

④「耳」字據敦本補。

⑤「愧」字原作「故」，據敦本改。

⑥輶：敦本作「蘊」。後文中「輶」字，敦本亦皆作「蘊」。不復出校記。

⑦喻：原作「諭」，據敦本改。

⑧經云：敦本作「道言」。

⑨鬼魁：敦本作「鬼魁」。

⑩絕秀：敦本作「絕易」。易，言貌美也。

⑪今：原作「或」，據敦本改。上文「下鬼」，敦本作「鬼神」。

⑫前世：敦本作「先身」。

⑬展轉：敦本作「輾轉」。後文皆同此。

⑭守清忍志慕在賢貞：敦本作「守情忍色，志慕在賢」。近是。

⑮合：原作「令」，據敦本改。

⑯法師：敦本作「沙門尼」。當係佛徒所改。

⑰得道無為：敦本作「得道如佛」。

⑱靜觀：敦本作「靜寺」。

⑲盡入法門：敦本作「盡上高座」。

⑳普行：敦本作「普見」。近是。

㉑師宗：敦本作「儒宗」。

㉒不為始終免無間罪：敦本作「不為罪始，終入無為」。上文「畋獵」，敦本作「魚獵」。

㉓得生：敦本作「寶王」，近是。下文「邊境」，敦本作「邊地」。

㉔學名：敦本作「盛令」。

㉕受茲芳淨：敦本作「受姿芳盛」。

㉖歎法：敦本作「敬說」。

- ①其：敦本作「期」，近是。
- ②契：敦本作「啓」，近是。
- ③隨侍：敦本作「隨傳」。
- ④常念嘯詠：敦本作「常念齋笑詠」。
- ⑤始入法門：敦本作「妙入道門」。
- ⑥靜治：敦本作「靜寺」。
- ⑦玩好：敦本作「玩服」。
- ⑧法輪：敦本作「轉輪」。
- ⑨「以」字原作「及」，據敦本改。
- ⑩挾之：敦本作「協之」。
- ⑪「轉輪」二字上原衍「生」字，據敦本刪。
- ⑫無量：原作「無數量」，據敦本刪「數」字。
- ⑬常：敦本作「嘗」。上文「具答」，敦本作「具言」。
- ⑭時俗姓男女：敦本作「時族姓男子」。案「俗」字當作「族」爲是。
- ⑮「經」字據敦本補。
- ⑯厚葬：原作「殯葬」，據敦本改。
- ⑰難脫：敦本作「難說」。
- ⑱不輟：敦本作「不餒」。
- ⑲⑳敦本無「太極」二字。
- ㉑「爲」字據敦本補。
- ㉒割人不能割：五字據敦本補。
- ㉓學人不能學：五字據敦本補。
- ㉔三宮滌盪：敦本作「三宮調暢」，近是。
- ㉕敦本無「天尊告太極」五字。
- ㉖凡人：敦本作「凡賢」。
- ㉗仁義：敦本作「人道」。
- ㉘道德：敦本作「道經」，近是。
- ㉙「矣」字據敦本補。
- ㉚爲我有身：敦本作「及我身也」。

- ㉛輩：敦本作「害」。
- ㉜乃：原作「及」，據敦本改。
- ㉝邪魅：原作「邪魁」，據敦本改。
- ㉞「豈」字上原衍「更」字，據敦本刪。

(王卡點校)

# 013 太極左仙公請問經

經名：太極左仙公請問經。撰人不詳，約出於東晉。係古《靈寶經》之一。原本二卷。現存兩種文本。一、敦煌S.1351號抄本，題作《太極左仙公請問經卷上》。二、《正統道藏》太平部所收《太上洞玄靈寶本行宿緣經》，據考應為《太極左仙公請問經卷下》。今合並為一。

## 太極左仙公請問經卷上

仙公稽首，禮太上太極高上老子无上法師，夫為善功之法，脩行等事，願聞其旨。法師答曰：子之所問要也。夫學道脩德，以善功為上，然後當齋戒，吐納元和，挹漱流霞五華之英也。學道不動，脩善功齋戒，亦徒勞於

山林矣。故《太極智慧經》上篇曰：救疾治病，奉侍師寶，營靜建舍，書經校定，脩齋念道，燒香然燈，念濟一切，宣化愚俗，諫諍解惡，施惠窮困，拔度厄難，卹死護生，邊道立井，殖種果林，教化瞳矇，勸人作善，有德於家國，動靜可觀，施為可法，教制可軌。此謂道士之行矣。與人君言則惠於國，人父言則慈於子，人師言則愛於衆，人兄言則悌於行，人臣言則忠於上，人子言則孝於親，人友言則信於交，人婦言則貞於夫，人夫言則和於室，人弟子言則恭於禮，野人言則勤於農，與人道士言則止於道，異國人言則各守其域，奴婢言則慎於事也。令心口相應，心為口主，口為心客，心念便是矣。故曰：功滿三千，白日升天，脩善有餘，坐降雲車，弘道无已，自致不死，斯之謂也。善德之人，太上所貴，諸天大聖所敬，名曰隨俗教化，大乘之業矣，非上士弗能奉也。

高上老子曰：善古之時，人民純朴，各懷道德，虚心玄寂。无為為事。

此風既散，百競烟起，萬流分析，姦巧互攻，愚智相凌，鬼神執威，衆聖並出，制作教化，惟令民脩善自守。是以有五經儒俗之業，道仙各教，其大歸善也。仙之言亦同於大梵天人語耳，仙者彌羅無上天人語也。玄宗无異，故分化天人，廣開法門，使同入无為之堂也。

高上老子曰：夫道家所先，莫近乎齋，齋法甚多，大同小異耳。其功德重者，惟太上靈寶齋也。但世希能學之矣。學之者皆大乘之士，前世積慶所鍾，去仙近也。又有三天齋法，與靈寶相似。仙公曰：三天齋者，是三天法師天師所受法，名為旨教經也。抑亦其次矣。此法悉在五稱文中，莫不畢載也。但天書弘妙，非世賢可思議者耳。能究之，皆上仙上真之人，玄同於太上者也。故中仙及地仙、下仙，莫有關其文旨矣。徒見而不知，復何所言哉。是以凡賢有終思之歌也。

高上老子曰：清齋誦經，脩德立行，仙道亦自成，何必藏山藪也。直欲

避可欲，去穢亂耳，山林非獨有道者矣。道家經之大者，莫過五千文，大洞玄真之詠也。此經虛遠，誦之致大聖爲降雲車寶蓋，馳騁龍駕，白日升天。五千文是道德之祖宗，真中之真，不簡穢賤，終始可輪讀。敷演妙義，則王侯致治；齋而誦之，則身得飛仙，七祖獲慶，反胎受形，上生天堂，下生人中王侯之門也。皆須口訣洞真，道欲成，可誦之以致雲龍，不得人間詠之，人間詠之，大魔王敗之也。洞玄步虛詠，乃上清高旨，蕭滌玄暢，微妙之至文，亦得終始脩詠，以齋戒也。洞真可終不可始，始之者眇有得道者也。其餘經各有次第階級，不可超矣。超之由勇猛精進，立大功德，弱喪之徒，未之敢聞也。

高上老子曰：夫人脩善精進，慈心觸物，奉受大經於家，禮拜專心不怠，亦必獲滅度，得無爲之道，會當升仙，世生王侯家，是謂轉輪聖王家，終入真仙之道也。

高上老子曰：人根各有因緣，種

種相生，悉從願來，非願不成，小乘之學故與大乘乖，不爲因緣妙絕玄流也。

高上法師歌辭曰：見有道士勇猛精進，端坐家門，撰心受經，晨夜誦習，思念仙道；見有道士勇猛精進，侍從明師，請受經文，晨夜誦習，思念仙道；見有道士勇猛精進，不貴珍寶，仰慕經法，晨夜誦習，思念仙道；見有賢者勇猛精進，幽隱山林，誦習經文，思念仙道；見有賢者勇猛精進，奉師受經，於家禮拜，晨夜不怠，思念仙道；見有賢者勇猛精進，棄欲去室，端坐巖穴，思念仙道；見有賢者勇猛精進，隨師彌恭，入於山澤，思念仙道；見有賢者勇猛精進，撥去榮華，遠遊尋經，請受誦習，思念仙道；見有賢者勇猛精進，忠孝奉上，安坐高堂，華麗貴盛，執心不移，忽若山藪，誦習經文，思念仙道；見有賢者勇猛精進，飢寒切肌，請經不已，志在大乘，思念仙道；見有賢者生於貴門，蕭條高才，勇猛精進，一心誦經，思念仙道；見有賢者常居厄疾，勇猛精進，晝夜誦經，思念仙道；

見有賢者勇猛精進，屢嬰疾病，請受至經，思念仙道；見有女人勇猛精進，求轉身爲男，誦習經文，思念仙道；見有女人勇猛精進，端坐幽房，誦習至經，思念仙道；見有女人勇猛精進，逼上不從，翹翹至心，思念仙道；見有賢者勇猛精進，父母不同，好樂經文，思念仙道；見有賢者勇猛精進，无因見經，思念仙道；見有賢者勇猛精進，厄於囹圄，晝夜執心，思念仙道；見有賢者遭難觸惡，精進不已，思念仙道；見有賢者勇猛精進，家人終亡，悲哀別離，命過七日，齋戒請罪，晝夜不懈，思念仙道；見有賢者勇猛精進，師友命過，爲之立齋，思念仙道；見有賢者勇猛精進，高尚玄真，上拔七世父母，思念仙道；見有賢者勇猛精進，世間求安，思念仙道。人有如此因緣，太上道眼早已見之，故歷歌其德，以勸其志也。仙公稽首曰：請事斯語矣。是時諸天人並起作禮，而各去矣。

太極左仙公請問經卷上



①動：疑當作「勤」。

②據《無上秘要》等書引文，此抄本文字有遺漏。

## 太極左仙公請問經卷下<sup>①</sup>

### 太上洞玄靈寶本行宿緣經<sup>②</sup>

仙公請問太極真人高上法師曰：人根本行何修，而見世受福，家門端正，子孫昌熾，與善因緣，世世不絕，死上生天堂，下生人間侯王之家，聰明儒仁，敬信經教，愛樂山林，常誦微言，終得仙道。

法師答言：善哉，子之問也。夫人生各有本行宿緣命根，種種相因，願願相隨，以類相從，展轉相生，禍福相引，是以世世不絕，玩好不同，用心各異，皆由先願也。欲修道結緣賢聖，當奉行大誠，廣建福田，弘施功德也。或致飛仙；或致天仙；或致地仙；或致命過生天堂；或致為鬼神；或致為六天大魔王官屬；或致命過逕生侯王家，人中之尊；或為一切所仰賴，富有天下；或致才智聰明；或致姿容端偉，華炁清香；或致仁愛忠孝，貞潔簡

素；或致善屬文翰，動靜可以取則；或致威嚴震肅，衆人所歎；或致篤好三寶，供養彌勤；或致愛樂山水，清靜玩經，燒香齋戒；或致禮拜玄宗；或致轉女為男，華容秀穎；或致家門肅清，世世因緣，順其本願，善賢才者，為我子孫，安貴無極；或致見世受福，命終受報；或致後生獲慶，得我宿功也。夫道何謂哉，以无心而應。衆生四輩修福德，要當有本願。福之報也，皆緣子于時立願耳。功德既設，志願亦定，其報廣，乃猶暮以待旦矣。世間民人偽薄，不信法言，各稱鬼黠，自用其意，輕忽宿命，以為妄造。非笑至經，以為虛誕，而厚積嗜欲，坐施立待報，望速而應悠。遂令玄教遲昧，世道交喪，天人塗炭，皆由其身立行致之，太上所以痛心矣。

仙公曰：宿命因緣，生死報應，聞之矣。當何以為本行上誠乎。

答言：太上智慧上誠、百八十誠，皆上誠律也。能奉太上十誠，亦得此福也。今當為子說之，豈不願奉之乎。

仙公避席稽首曰：唯唯。天尊願便傳之矣，我即奉之焉。

法師曰：十誠者，一者不得嫉妬勝己，抑絕賢明。二者不得飲酒食肉，穢亂三宮。三者不得淫犯他妻女，好貪細滑。四者不得棄薄老病窮賤之人。五者不得誹謗善人，毀攻同學。六者不得貪積財寶，不肯施散。七者不得殺生，祠祀六天鬼神。八者不得臆論經典，以爲虛誕。九者不得背師恩愛，欺詐新學。十者平等一心，仁孝一切。能奉此十誠，分明立願，无不必報也。夫人見世行惡而不報者，是其先世餘福未盡，福盡而禍至。見世行善而不報者，是其先世餘殃未盡，殃盡而福至，或後生受報，不必在今世也。人能見世大建善功，必以功過相補，乃可免先世殃對。施恩望報則不報，陰陽必然矣。欲入仙道者，功加塵沙之比，其可爲合也。十惡不可犯。一者飲酒淫色，貪欲无已。二者陰賊世間，訕謗道士。三者輕師慢法，傲忽三寶。四者竊取經書，妄宣道要。五者借換

不還，欺誘萬民。六者殺生貪味，口是心非。七者背恩違義，犯諸禁戒。八者誦經忽略，嘖嘖自是。九者責望人意，嗔恚四輩。十者臆斷經旨，損益聖典，不信宿命，快情所爲，穢慢四大，不念生道。是爲十惡之戒。犯之者，或見爲鬼神所枉殺，陽官所考治，居安即危，履善遇惡，可事不偶。或死入地獄，幽閉重檻，不覩三光，晝夜拷毒，抱銅柱，履刀山，攀劍樹，入鑊湯，吞火煙，臨寒冰，五苦備經。地獄既竟，乃補三官徒役，謫作山海，鞭笞無數。既竟，當下生於世，常爲下賤人。或作僕使，有人之形，無人之情。或生邊夷異國。或生業疾，惡惡相緣，善善相因，其罪福難說。罪福之報，如日月之垂光，大海之朝宗，必至之期，萬无一失也。罪福之不滅，若影之隨形，輪轉之對，若車之輪矣。

太極真人於是作奉誠頌曰：

道以无心宗，一切作福田。立功无定主，本願各由人。虛己應衆生，注心莫不均。大聖宏至教，亦由雨隆天。

高陵靡不周，常卑固成淵。海爲百川王，是能舍龍鱗。萬劫保制用，豈但在厥年。奉戒不暫停，世世善結緣。精思念大乘，會當體道真。

大極真人乃復作違誠頌曰：

人根由本願，願定剋大患。淨想奉十誠，故能超八難。前生犯玄教，今生那得安。愚瞽忽性命，罪至乃長歎。對來如影響，視之令心寒。生值處下賤，慘戚无暫歡。

仙公敢問：齋之深淺，功德高卑，衆惡十善輪轉，運周无停，德深功成，入寂定虛，階級緣何。

法師答言：夫一切云云，皆當空

盡，有无相陶，修德養神，積功凝真，真身乃空，出入有无，隱寂極妙，保景希微，濟度一切，爲衆法橋。輪轉學道，莫先乎齋。齋者，莫過靈寶。其法高妙，不可宣於世凡流之人，常傳諸有宿世功德之子。自无前生重緣，不令見之，遇見亦不好，皆有本願而然也，故不可強訓矣。萬劫以來，仙聖口訣相傳，祕而不書。吾被太上命令，授仙公

之子，善書之焉。此法饒益一切求道之士也。雖劫數運周，是經不易矣。道與世隆，德隨化興。聖人難值，道亦難見，經亦難聞，聖世難遭，賢人難遇也。故非有善功之人，不得預斯會矣。昔正一真人學道時，受靈寶齋，道成後，謂此齋尊重，乃撰《靈寶五稱文》，中出齋法，爲《旨教經》，大同小異，亦次本經齋法也。太乙齋法，於此大齋玄之玄矣，教初學小乘之階級耳。宗三洞玄經，謂之大乘之士，先度人，後度身。坐起卧息，常慈心一切，皆念經營之无有怠倦，德並太上，道超虛皇，恩滿十方，齊契玄真，携提諸天，願極道原。

夫學道常淨潔衣服，別靖燒香，安高香，座盛經。禮拜精思，存真吐納導養，悔謝七世父母，及今世前世重罪惡緣，布施立功，長齋幽靜，定其本願。當令心虛意玄，然後真道可成也。善備巾褐單裙，讀經被衣服法制，則不得妄借人，著不淨處。名曰法服，法服恒有三神童侍之。昔有賢者，迎一道士，

道士不得即往，以披褐赴之。行至家，其人敬信燒香，禮之如見道士。神童見形云：道士使我來。主人于時不知是神童。主人病即除愈，家門无恙。神童語主人曰：病者已愈，道士无煩復來，賢者可送法服，還道士也。主人如其語送至。道士訊問，答曰：一日疾苦，奉請先生齋，先生多事，但遣仙童，不見顧齋。病人今已愈，奉送法服。道士愕然駭聽，言畢，答曰：貧道一日整頓法事，竟往，主人許賢者去，亦不更來，貧道是以不去。非爲負信，亦无人可遣。又不知君家病愈，此乃當由主人心盡所致。問往人形貌何似。主人答言：年可十五六，姿容端正，似書生人也。道士思唯我弟子都無此人，恐神人降耳。故法服當必令淨潔，制作得法。不爾，鬼反害人，威禁俱如明科也。若朽敗，當白衣之，不得他用也。

仙公曰：始聞法服之威神矣。請問十誠，可得便奉耶。

真人答言：我昔受之太上大道

君，吾奉行，世世與善結緣，當在福中，致得仙道。今以傳子，念宗之焉。昔有凡人奉持此戒，念道不虧，延壽益筭，家門隆盛。願念後生大學，聰明經典，終入仙道，滅度之日，徑昇福堂，衣食自然，歡樂適意。後下生於世，乃學大道經，聰明洞達，爲世法師，无不曉了。復有凡人大作功德齋誠，然燈供養三寶，翹勤不怠，願生侯王之家，得爲貴人，形容端偉。命過之日，飛天迎之，徑昇天堂，衣食自然，歡樂无爲。後下生諸侯王家，爲貴人之子，聰明智慧，姿容端正，華炁清香。復有貴人居政以道，善作功德，齋誠施惠，然燈悔罪，解七世父母宿對緣結，供養三寶。願我後生世爲貴人，展轉福緣，姿容艷悅，才識洞達，恒值賢明，供養三寶。命過之日，飛天迎之，徑上福堂，快樂不可言。後即生國王之家，富貴倍先，識度秀穎，清高遠邁，民豐家安。復有貴人行是功德，願念後生終入仙道。其後世果好道受經，無文不覽，即得昇仙，白日飛行。復有凡人行是功德，願

我後生常見三洞大經。後生便見大經，受而誦之，三界所敬。復有凡人行是功德，願爲上學道士，大博至經。後生便爲道士，大學至經，爲衆法師。復有凡人行是功德，願我後生入山學道。後生乃山棲巖側，精思念道。復有女人行是功德，願轉身爲男，後生即爲男子。復有賢人行是功德，助法師治經，願我後生得遇經道，仍如所願。復有賢人行是功德，誦經齋誠，供養三寶，一心念道，願報七世父母因緣之恩，上生天堂，反胎人間侯王之家，我身昇仙，長寂無爲。吾歷觀施惠修道者，所求莫有不得，要須本願。願定，无不報也。其報喻如影響之應，四時之節矣。但罪福不俱報，其相差次，功過推移，或在來生，或在見世。罪福由人本行所習，蓋非道德之悠誕也。而人民皆欲交報爲有驗，推移後世，謂之無靈。愚夫因茲快情極慾，輕忽天網，而遭遇八難，履觸十苦。當斯之時，莫曉所由。不亦悲哉，不亦悲哉。人身假借暫會耳，因炁而生。炁散人死，神真各

去，身亦分離，變蟲而食之灰土，爲一切鬼，受苦毒，殊於生時。豈不哀哉，豈不哀哉。惟得道體，真身常安全，得道之由，積德行善，輪身鍊神，故致成真身焉。復有凡人見道士靜齋然燈，燒香禮拜，旋行濟濟，便發道心，欲供養三寶。其人家窮，無他珍餚，以數莖菜勸助中食，是時心念：使我後世富有，得大供養三寶，廣施福田。既見世安穩，壽極天命。命終之日，當入地獄受對之時，太上有教，其人先雖有少罪，而翹勤精進，功以補過。便令昇福堂，後生貴家，世世公子，福祿自然，好樂道德，供養三寶，才識淵遠。復有一人，見真人道士齋靜讀經，乃笑曰：彼向空吟空經，將欲何所希耶。虛腹日中一食，此罪人耳。道士乃慈心喻之，故執意不釋。其人後死，徑入地獄拷毒，五苦備致，獄吏責辭，列言生時非笑道士，毀辱三寶，今被此對，後生方爲下賤貧陋之民。復有一人，姿容端正，亦外學世經，會見道書，經義妙遠，乃曰：此似古人虛妄之談耳，吾求解

道士及賢貴，耽玩之終日，將欲何求乎。其人即見世爲惡鬼所殺，強天天命也。死入地獄，諸苦備受，後生頑癡，不在人倫。復有道士輕法妄宣，泄慢寶經，見世爲考鬼所殺，幽沈地獄，後生業疾，其苦難說。是故經文不可不秘之，恐有不能寶用，使彼此得罪。又爲人師，甚亦不易，授弟子不善，罪皆相及。人心難測，莫不慳貪。故聖人遺法，以法信效之，聖聖相傳，不言須信。愚愚相授，則非信不盡。子豈不可慎之。

夫學道，當先忠孝，善行持誠，慈心一切，事師恭肅，吐納養神，尊受大經，禮仰法師，如奉聖人，齋靜誦經，施惠困厄，勸人以善。然後服藥致益，吐納神和，齋誠有感，誦經真降，魔衆伏使，敢爲試害，如此必得道。道德上下經，及洞真、洞玄經、三皇天文、上清衆篇詠等，皆是太上虛皇衆真、十方自然真仙，及帝君之隱位，及諸天大聖衆諸天宮殿城臺，山海立池，或是太上之靈觀，自然之寶闕，並諸天之日月星辰，

城郭及門戶之銘，或是大魔王官屬之內諱密字，宮室之處所，太上故撰而爲文也。是以不可毀謗妄宣矣。若齋靜禮預，於玄上注心道真，而誦經數句者，則所言華華而響對。

是時太上玉京玄都、八方諸天、三千大千世界，衆聖真人亦來到。玉京山東方无極諸天安大堂鄉大千納善之世界衆聖；玉京山東南无極諸天元福田大千用賢之世界衆聖；玉京山南方无極諸天宛黎城境大乘棄賢之世界衆聖；玉京山西南无極諸天延福鄉大千仁靜之世界衆聖；玉京山西方无極諸天福堂州大千靜行之世界衆聖；玉京山西北无極諸天福德之野大千延賢之世界衆聖；玉京山北方無極諸天鬱單之野大千清靜之世界衆聖；玉京山東北方无極諸天福集都大千長安之世界衆聖。蓋太上玉京山虚无玄都，无極八方諸天諸地世界大聖真人位號，亦悉在其中矣。

經語與世書語相似者，此非世流俗之常辭也。皆敷演玄真，寂暢自然，

披散太上蔚羅天尊，理蹟希微，滌滯清神，住年回劫，遂成昇仙，長存无極，七祖生天堂。是經高妙，故曰玄之又玄。子其勗哉。道之至淵，道體虚无，弘之由人。

言三寶者，道寶太上，經寶，師寶，是爲三寶。三尊者，道尊太上，經尊，師尊，是爲三尊也。人身中稱三尊，身中有三宮。太一帝君、公子、无英，是爲三一之尊。經言七祖父母，上生天堂，解結散滯，或反胎人間侯王之家，我身昇仙，恒保福根者，是七世父母因緣之報。我身絕愛，斷割胞元，禮願之云。七世父母，上生天堂，下生人中侯王之家，此大孝之道，洞經之旨矣。至人之鍊形，過於太陰，政十月耳。亦復須頃之間，隱寂胞胎。夫處胞胎之時，亦未爲陋矣。人在胎中，皆憶宿命之事，既生頓而忘之。惟得道洞真，自然知之。所以語世人者，欲使其修善行，爲來世作津梁耳。

夫言仙者，遷也，自凡至聖之漸也。真者，堅也，更无敗壞也。從仙修

之，以成真人。故仙人有階級，真人有品次矣。六天爲三界，大魔王領六天鬼神之事，魔王承奉太上衆真天尊上人。道士功成，魔王即保舉焉。當成之時，魔喜試之，神正之與不正也。道士魔王上官，其尊太上經，故以魔王位主鬼神，皆其先世積福所致耳，衆聖亦然。

夫學道宜知先師。我師是太上玉晨大道虛皇，道之至尊也。我是師第六弟子，大聖衆皆師之弟子。弟子无鞅數也。我師名波悅宗，字維那訶。今以告子，子祕之哉。蓋真人之名字，亦難究矣。此名字多是隱語也。我名徐來勒，字洪元甫。夫學道不存師，齋誦无感。若妄宣不信之人，則得罪於三官。地獄三界六天北帝大魔王之下治，在大北海，天地之北方，羅酆之山，高二千六百里，周旋三萬里，內外皆七寶宮室，亦盛都也，天下鬼神之所宗處。今以此天宮名號相示，人能呪誦之者，惡鬼不敢近，妖邪伏滅，禍害不侵，魂精澄正，神精澄正，神炁常存也。

我師告曰：吾學道修齋讀經，立功濟物，事師恭勤，彌劫歷年。或生王家，或生公門，或生賤人，或生諸天，或生魔王，或還墮地獄，徒作三官，經履十苦八難，而執志不虧，轉輪求道，常為世人所笑，亦不與言。默自勗勵，秉操日固，行業愈新，每事依經。初不敢疑惑，真值聖文，遂得上仙，身如金剛，體真入妙，希微洞質，永享无量之壽也。此故由吾專密，柔仁慈愛，受經不倦故耳，非自然得道也。

夫道士之於家學者，當建精舍清靜齋，及施高座，盛經並讀誦。存思床方五尺，其高亦然。常燒香，然燈不輟，非同學者不令入也。法服又不得妄借人，經皆當師授，校定本文，盛其事，欣欣常如對太上也。勿得傲慢交笑，論及流俗榮利之務。若犯此者，侍經仙童即奏入於三天司直。三天司直上奏太上。三奏太上，子必失經也。鬼神亂考，恐不得以壽死，將何仙之有哉。經不從師受，則无神炁，修之不行，侍經仙童恒司考人，殃及七世父

母。受道不敬存師，則三官紀錄，鬼必橫害。人受經穢慢，不清靜者，則見被誹謗之罪，死後入地獄，竟當生六畜中。經洩，不以香湯洗沐，則魂魄奔落，為他鬼所拘錄。受經未應宣傳，便擅宣泄者，則七祖囚於地獄，身履三惡之考。雖合傳，非其人者，罪同此科。

道士欲山居幽處，宜先受經，恭肅事師，修諸善功，以伏山神。山无大小，皆有神靈。山大則神大，山小則神小。山神壞人，亦不立也。人不解至法，不知修善立功，此何以能久山棲乎。水亦有神，八海則有神王居焉。江湖河濟，皆有神也。又龍王鬼神治其清淵矣。河伯水官，各有宮殿府寺，亦七寶銅瑒，皆類酆都之中，悉為諸仙人之下宮也。並由人生時而學，行業深淺，功德大小，計品受今之報也。後世當更生人道，隨其所行而報之，萬无一失。天地水三官，書人功過善惡之事，未有不備矣。昔有貴人，善信道教，供養三寶，治寫經書，建立靖舍。當成之時，而貴人病篤，弟子親迎，醫

藥欲加苦治。貴人曰：吾少來敬順科誠，敢慙忘之，亦布施貧乏，供養三寶，建諸靜舍，太上豈不知之。人生有死，死非所辭。今所以恨者，恨未得親持齋誠讀經，然燈行道，禮謝七世之愆痾耳。為我來生作橋梁者也。我病之困，將以命盡壽終。醫藥可救狂癘耳，當如我命何哉。

爾時，太上遙觀十方善惡之人，即勅司命延此人壽三十年，於是豁然而愈，身康便如未病之時。曩尚將展，精進日新，修齋持誠，奉行眾善，供養三寶，致世世富貴，善人來生其家，轉輪得道。是人今為太上東華仙王也。積善之教民，豈不然哉，豈不然哉。

太極左仙公請問經卷下

① 此經名係整理者補。後尾題同此。

② 此係《道藏》本原標題。

# 014 仙人請問本行因緣

## 衆聖難經（敦煌本）<sup>①</sup>

經名：仙人請問本行因緣衆聖難經。簡稱《本行因緣經》或《衆聖難經》。撰人不詳，約出於東晉。係古《靈寶經》之一。原本一卷。有敦煌本及《正統道藏》兩本，文字頗有不同，今並存之。底本出處：敦煌P.2454號抄本。

□□□□□□年<sup>②</sup>，歲在庚申，正月一日壬子，□□□□□<sup>③</sup>，靜齋念道。是日中時，有地仙道士卅三人，詣坐燒香，禮經旋行。都畢，各還先處，安住如也。仙人於是避席請問曰：下官等學道彌齡，積稔于今九百歲矣。而故婆婆爲地仙，又無職任，散於山林間耶。天尊始學道，而昔被錫爲太極左仙公，便應登太上玉京，入金闕，禮無

上虛皇乎。不審前世有何功德，遵受奚經，致此巍巍三界，北酆所宗仰，願爲說宿命所由，因緣根本也。

仙公俄而答曰：子之所問，遠乎要焉。復坐，吾將告尔曹矣。夫二儀既分，便有精粗，罪福壽夭，富貴貧賤，盛衰万事兆形，人參三材，賢愚才訥，蓋由人本行所尚，志願立德。子輩前世學道受經，少作功薄，志願淺狹，惟欲度身，不念度人，自學不念教人，自求道不念人得道，不信大經弘遠之辭，不務齋戒，不遵三洞法師，好樂小乘法。故得地仙尸解之道，然亦出處由意，去來自在，長生不死，但未得超陵三界，遊乎十方，仰瞻太上玉京金闕耳。子欲使法輪速升，飛行上清諸天者，當更立功，救度國王民人灾厄疾苦，大功德滿，太上錫迎子矣。是以彭祖八百歲，安期生千年，白石生三千齡，故遊散民間，皆坐其前世學法小功德薄故也。乃有萬餘歲在山洞中，猶未升天，子但數百載，何足爲久耶。夫仙人密於山林，行陰德而升仙，及尸解

託形滅度者，多顯迹於世，國人所稱，名書經傳者少矣。

時仙人有姓紀，字法成，仙公指之曰：彼即我前世弟子也，其未見宿命之根耳。吾能令汝達前世時事也。法成曰：唯唯天尊。須臾乃悟，又手作礼：弟子闇塞，未識本行，願垂愍矣。

仙公曰：昔帝堯之世，汝隨我入嵩高山學道，汝志小望速，每譏吾虛誕，所期遼遠，所行難行，復嘆許由、巢甫絕尚箕山，能辭堯禪，交奢之悔，亦所未安。常勸汝學上清道，其於不從。雖飲海不得滿腹，徒叩石不獲玉。巢許早升太極宮，吾今又方登左仙公之任，而汝獨爲地仙，但不死而已，其德交幾階，子豈不悒悒乎。於今乃知我言之有徵，信而不欺矣。法成慙愧，憶此未久，心中了然。昔不奉教，此歎何深，願見拔擢，侍給雲車執御，親對天顏，故是弟子宿緣之會矣。

仙公曰：汝超卓高舉，裁可升天而已，那得隨我之太極宮，朝太上玉京金闕乎，吾无所惜矣。

仙人又請問仙公：宿世本行，爲盡是耶，未竟者，願爲說之。

仙公曰：我先世經歷，施行罪福，輪轉化形，終天說之，亦當不盡。子欲知之，爲可略舉一隅耳。吾昔曾生爲貴人，而凌貧賤，挾強抑弱，死入地獄，後生爲小人，貧窮陋疾，孤寒煢然。時乃發念：我宿命何行，而致此辛苦，彼宿命何德，而享其富貴。思念作善，然心不自解，憂毒難言。死升福堂，後生富家，珍寶內足，无有所乏，而苦酷奴婢，死入地獄徒考。三官罪竟，後生爲下使，視人氣息，伏事自效，動得鞭笞，慙苦茶炭，靡所不履。時乃發念：先世何辜，當作此下使耶。而以私產供給貧人，敬仰道士，上香奉油，唯願生貴家，死升福堂，衣食自然。後生爲貴人，乃復煞害衆生，魚獮爲事，死入地獄，經履刀山劍樹，湯煮吞火，五苦備至，罪竟後生爲猪羊，以報昔怨。後受形爲下賤人，臭惡可憎之極，欺取人財而不還，死入地獄。後生爲牛，以力償人，以肉飴人。後更形作中人，珍寶近

足，是時乃念作功德，常供養道士，奉經承戒，謙謙下人，布施厄困，每事從道，聞善欲從，年八十乃死，徑升福舍，衣食天厨。後生貴家，乃習好武勇，煞伐爲事，然故敬順道士，信向至法，死入地獄，當經考毒。時太上有教：此人雖犯煞伐，而已經入地獄，在世信法敬道，布施厄困，今原其考罰，可令升福堂，給以天厨。後生爲貴人，怨對將至，是時發願念道，敬受經教，施行陰德，拯濟厄急，政事以道，慈心於物，供養道士，奉君以忠，使臣以禮，恒念辭榮棄祿，乃免怨家，壽終升天堂，後生復爲貴人，敬信尤精，而才乏，時乃發念燒香，願我後生智慧精明，玄解妙義，得作道士，死昇福堂。後生中土家，遂爲法師道士，帔服法衣，持戒而行道。時經誦誦聰明，動爲法師衆人所敬，時乃發念云：此一生不能得道，而不如女人，惜寂无事，可致閑樂。命終即生爲女人，姿容端正，才思玄拔，發言成章。時乃備齋讀經，於是發念爲男子，才略宏落，通玄徹虛，洞解希

微，而願爲國王，與道士周旋，在意所願，遊遁山水，妓樂內足，常有經講，命過升天堂，衣食自然。尋生國王家，爲太子，縱容諸宮，承統王業，時延引道士，賢儒學人，行禮講道，脩齋靜寂，肆意所尚，國安民豐，肅然無事。是時三侍臣同皆發願：後生作道士，我爲隱士。其道微、竺法開、鄭思遠、張泰等，普皆願爲道士，普志升仙度世，斷絕王務，死徑升天堂，衣食天厨。我後生爲隱士，開微張鄭等亦同爲道士，俱入山學道求仙。吾後爲諸人作師，志大乘行，常齋戒讀經，並賚珍寶，詣大法師，受三洞大經，供養禮願，齋戒行道，服食吐納。因緣未盡，命過太陰，即生賢家，復爲道士法師，還得同學，相爲師徒，復受大經，齋戒行道。是故上聖矚目，虧真降教於我也。尔時開微張鄭盡侍座，今日相隨，是宿世因緣之本願故尔，諸仙莫不釋然，四座咨嗟，乃歎曰：天尊上人，求道積久，彌劫歷稔，故以得仙公之位，諒有由矣。我等今盡見宿世所行功薄，稟受經少，那責求



高仙乎。於此當念更受大洞經道，勲行慈心，度諸困厄，以冀升天之舉矣。

仙公曰：子不遵上道洞經，衆妙无成理，各自念懃，大作功德，度諸苦厄，如是之志，何憂不速昇天乎。但便欲登太上金闕，猶當未有日耳。仙公曰：我无所不履，非筆札所載，懃苦難說矣，始蒙今報也。

仙人問曰：前與上人俱入洞庭，看天王別宮，初登茅山時，見有一輩仙人，求隨上人看戲，盡何等仙人，乃多如此。答曰：彼仙人皆是諸名山洞室仙人，其已不多。子不見崑崙、蓬萊、鍾山、嵩高、華岳、靈鳥諸大山洞室，仙人无數矣。

仙人曰：不知洞庭通何處。答曰：乃通此上諸大山，及巨海、北鄩、岱宗，五岳无所不通矣。有五仙人言歸句曲山，彼上人鄉里乎。答曰：句曲山乃吾舉眼所見，亦江左之佳山，是九泉洞庭西掖門，其下洞臺方卅里，宮室煥日，乃卅六小天之數也。不受穢氣，道士行正可栖庇之耳。常有人，昔

茅先生得道，今故在彼山洞宮山上虛中，名爲空洞，立玄宮觀，舍仙人也。

仙人請問：近登崑崙玄圃宮侍座，見正一真人三天法師張道陵降座，鄩都司迎，三界稽首，諸天禮問，動靜龍駕曜虛，項負圓明，身生天光，文章煥爛，先世何功德，故是得道其獨如是乎。願聞之。答曰：天師本行所歷，亦弥劫勤苦，齋戒讀經，弘道大度，高範玄真，耽味希微，轉輪求道，尤過於吾。不可具說。其志大經，行大道，故得三天法師之任，太上正一真人之号矣。豈不大乎。時東華青童及衆仙，盡嵩高洞中，靜齋詠經。始學之者，聞仙公說諸本行，莫不思念大法，以自篤厲。

青童曰：仙公妙唱，辭遠事要，信而可尊者也。衆仙作禮而曰：請事斯語矣。青童曰：吾前與卿盡獲報承眷，至恒不暫忘。足下受太上錫，吾乃應先有脩敬，情好相親，未即展公，每爲反側，願不孤此懷也。仙公曰：前辱卿盡慰眷殊過，深爲踧踖，益用虛

位，情何已已乎。不以乏短忝上聖，顯徵書命赤奔，愧所不勝，相與道德，周旋三界，每念逍遙，同遊玄虛，斯情可言，公家之敬，奚復及也。但尋登上任，遠遠日近，逆有戀恨，如何。

青童君答曰：銜顧至願，數有恩慰耳。仙公曰：天師言月旦十五日，能齋於靜室，讀所受道經及諸仙道迹者，皆當爲後聖之民，生值斯世，豈不樂乎。丁卯日禮東華青童於靖中，北向三拜，求所願神仙之事。又本命日讀經，不交人事，皆是求仙之要言也。道家此事亦多矣，適人所奉者矣。大歸訣在情丹，行合玄教，有願无不尅也。

#### 太上洞玄靈寶妙經衆聖難<sup>①</sup>

<sup>①</sup>按敦煌P.2454抄本卷首殘損，首行題「□□□□□□因緣衆聖難經第十五」。缺「仙人請問本行」六字，今刪去句末「第十五」三字，並據《齋壇安鎮經目》擬定經名。

<sup>②</sup>敦煌本缺損句首六字。據《道藏》本，此句當作「吳先主赤鳥三年」。

③ 敦煌本缺四字。據《道藏》本，當補「仙公登山」。

④ 原本尾題作「太上洞玄靈寶妙經卷第十五衆聖難」。今刪去「卷第十五」等字。

(王卡點校)

# 015 太上洞玄靈寶本行

## 因緣經

經名：太上洞玄靈寶本行因緣經。又名《仙人請問本行因緣衆聖難經》。撰人不詳。約出於東晉。係古《靈寶經》之一。一卷。底本出處：《正統道藏》太平部。此書另有敦煌本，文字與《道藏》本頗有出入。今並存。

吳赤烏三年，歲在庚申，正月一日壬子，仙公登勞盛山，靜齋念道。是日中時，有地仙道士三十三人，詣座燒香，禮經旋行。甫畢，仙公命坐。良久，道士於是避席請問曰：下官等學道彌齡，積稔于今六百甲子矣，而尚散跡於山林間，師尊始學道，幸早被錫爲太極左仙公，登玉京，入金闕，禮无上虛皇，不審夙因作何功德，爰受天職，

致此巍巍，三界北酆所仰，願爲啓說宿命所由因緣根本也。

仙公曰：子之所問，遠乎微哉。

復坐，吾將告爾。夫一氣由虛无而生，二儀由一氣而分，清者爲天，濁者爲地，人受中氣而生，與天地參爲三才。初无凡聖之異，壽夭之殊，混混沌沌，不假修爲，而道自居，既而混沌既鑿，大朴既散，人事錯錯，而道違矣。子輩前世學道受經，少作善功，唯欲度身，不念度人，唯自求道，不念人得道，不信大經弘遠之辭，不務齋戒，不尊三洞法師，好樂小乘。故得地仙之道，然亦出處由意，去來自在，長生不死，但未得超凌三界，遊乎十方，仰瞻太上玉京金闕耳。子欲使法輪速昇，飛行上清諸天者，當更立功，救度國土民人灾厄疾苦，大功德滿，太上錫迎子矣。是以彭祖八百歲，安期生千年，白石生三千齡，故遊民間，皆坐其前世學法小功德薄故也。乃有萬餘歲在山河中，猶未昇天，子但數百歲，何足爲久耶。夫仙人密於山林行陰德而昇仙，及尸解託

形者，多顯迹於世，國人所稱，名書經傳者少矣。

時仙人有姓紀，字法成，仙公相之曰：彼即我前世弟子也，其未見宿命之根耳，吾能令汝見前世時事也。法成曰：唯唯，天尊。須臾乃悟，又手作禮：弟子闇塞，未識本行，願垂愍矣。

仙公曰：昔帝堯之世，汝隨我入嵩高山學，汝志小望速，每譏吾虛誕，所期遼遠，所行難行，復笑許由、巢父絕尚箕山，能辭堯禪，交奢之誨，亦所未安。常勸法成，學上清道，其於不從。雖飲海不得滿腹，徒叩石不獲玉。巢許早昇太極宮，吾今又方登左仙公之任，汝獨爲地仙，但不死而已，其德交幾階，子豈不悒悒乎。於今乃知我言之有徵，信而不欺矣。法成慙悅，憶此未久，心中了然，昔不奉教，此難可得，願見拔度，侍給雲車執御，親對天顏，故是弟子宿緣之會矣。

仙公曰：汝超卓高舉，裁可昇天而已，那得隨我之太極宮，朝太上玉京金闕乎，吾无所惜矣。

仙人又請問仙公曰：宿世本行，爲盡是耶，未竟者願教之。

仙公曰：我先世經歷，施行罪福，輪轉化形，經天說之，亦當不盡，子欲知之，爲可略舉一隅耳。吾昔嘗生爲貴人，而凌貧賤，扶彊抑弱，死入地獄。後生爲小人，貧窮陋疾，孤寒煢然，時乃發念，我宿命何行，而致此辛苦？彼宿命何德，而享其富貴？思念作善，然心不自解，憂毒難言，死昇福堂。後生富家，珍寶內足，无有所乏，而苦酷奴婢，死入地獄徒考。三官罪竟，後生爲下使，視人氣息，伏事自效，動得鞭笞，勤苦塗炭，靡所不履。時乃發念：先世何辜，當作此下使耶？而以私產供給貧人，敬仰道士，上香奉油，惟願生貴家，死昇福堂，衣食自然。後生爲貴人，乃復殺害衆生，漁獵爲事，死入地獄，經履刀山劍樹，湯煮吞火，五苦備至。罪竟後生爲猪羊，以報昔怨。後受形爲下賤人，臭惡可憎之極，欺取人財而不還，死入地獄。後生爲牛，以力償人，以肉飴人。後受形作中人，珍寶

近足，是時乃念作功德，常供養道士，奉經承戒，謙謙下人，布施厄困，每事從道，聞善欲從，年八十乃死，逕昇福舍，衣食天厨。後生貴家，乃習好武勇，殺伐爲事，然故敬順道士，信向正法，死入地獄，當經考毒，時太上有教，此人雖犯殺伐，而已經入地獄，在世信法敬道，布施厄困，今原其考罰，可令昇福堂，給以天厨。後生爲貴人，怨對將至，是時發願念道，敬受經教，施行陰德，拯濟危急，政事以道，慈心於物，供養道士，奉君以忠，使臣以禮，恒念辭榮棄祿，乃免怨家，壽終昇天堂。生復爲貴人，敬信尤精，而少之時乃發念燒香，願我後生智慧精明，玄解妙義，死昇福堂。後生中士家，遂爲道士，被服法衣而行道，時經講聰明，動爲法師衆人所推，檀越所敬，時乃發念云：此一生不能得道，而不如女人，惛寂无事，可致閑樂。命終即生爲女人，姿容端正，才思玄拔，發言成章，時乃修齋讀經，於是發念爲男子，才略宏落，通玄徹虛，洞解希微，而願爲國王，與道

士周旋，在意所願，遊看山水，妓樂內足，常有經講，命過昇天堂，衣食自然。尋生國王家爲太子，從容儲宮，承統王業，時快引道士賢儒學人行禮講道，修齋寂靜，肆意所尚，國安民豐，肅然无事。是時三侍臣同發願：後生作道士，我爲隱士，釋道微、竺法蘭願爲沙門，鄭思遠、張泰爲道士，普志昇仙度世，絕王務，死逕昇天堂，衣食天厨。我後生爲隱士，蘭微爲沙門，張鄭爲道士，俱入學道求仙。吾後爲諸人作師，志大乘，行常齋誠讀經，並齎珍寶詣大法師，受三洞大經，供養禮願，齋誠行道，服食吐納。因緣未盡，命過太陰，即生賢家，復爲道士沙門，復得同學，相爲師徒，復受大經，齋戒行道，是故上聖矚目，覩真降教於我也。爾時蘭微張鄭盡侍座，今日相隨，是宿世之緣願故爾，諸仙莫不釋然，四座咨嗟，乃嘆曰：天尊上人，求道積久，彌劫歷稔，故以得仙公之位，諒有由矣。我等今盡見宿世所行功薄，受經少那責求高仙乎，於此當念更受大洞經，慕道勤

行，慈心度諸困厄，以冀昇天之道矣。

仙公曰：子不尊上道洞經，衆妙元理，各自念勤，大作功德，度諸苦厄，如是之志，何憂不速昇天乎？但便欲登太上金闕，猶當未有日耳。

仙公曰：我无所不履，非筆札所載，勤苦難說矣，始蒙今報也。

仙人問曰：前與上人俱入洞庭，看天王別宮，初登苞山，時見一輩仙人求隨上人看戲，盡何等仙人？乃多如此。答曰：彼仙人皆是諸名山洞臺仙人，其已不多，子不見崑崙、蓬萊、鍾山、嵩高、須彌、人鳥諸大山洞室，仙人無數矣。

仙人曰：不知洞庭通何處？答曰：乃通此上諸大山及巨海，北艷岱宗五嶽，无所不通矣。有五仙人言歸句曲山，彼上人鄉里乎？答曰：句曲山乃吾舉眼所見，亦江左之佳山，是九泉洞庭西掖門，其下洞臺方四十里，宮室煥日，乃三十六小天之數也，不受穢炁，道士正可棲庇之耳。常有聖人，昔茅先生得道，今故在彼山洞宮山上虛

中，名爲空洞，立玄宮觀，舍仙人也。

仙人請問曰：近登崑崙玄圃宮侍座，見正一真人三天法師張道陵降座，艷都伺迎，三界稽首，諸天禮問動靜，龍駕曜虛，頂負圓明，身生天光，文章煥爛，先世何功德，故是得道，其獨如是乎？願聞之。答曰：天師本行所歷，亦彌劫勤苦，齋戒讀經，弘道大度，高範玄真，耽味希微，轉輪求道，尤過於吾，不可具。其志大經，行大道，故得三天法師之任，太上正一真人之號矣，豈不大乎。時東華青童子，衆仙盡嵩高洞中，靜齋詠經。如學之者，聞仙公說諸本行，莫不思念大法，以自篤勵。

青童曰：仙公妙唱辭遠，事要信而可尊者也。衆仙作禮而曰：請事斯語矣。青童曰：吾前與卿書，獲報承眷，至恒不暫忘，足下受太上錫，吾乃應先有修敬，情好相親，未即展某，每爲反側，願不負此懷也。仙公曰：前辱卿書，慰眷殊過，深爲踧踖，益用虛伫，情何已已乎。不以短乏，德忝上聖

顯徵，書命赫奕，愧所不勝。相與道德，周旋三界，每念逍遙，同遊敬虛，斯情可言，公家之敬，奚復及也，但尋登上任，遠遠日近，逆有戀恨如何。

青童答曰：銜願至願，數有恩慰耳。仙公曰：天師言月旦十五日，能齋於靜室，讀所受道經，及諸仙道迹者，皆當爲後聖之民，生值斯世，豈不樂乎。丁卯日禮東華青童君於靖中，北向三拜，求所願神仙之事，又本命日讀經，不交人事，皆是求仙之要言也。道家此事亦多矣，適人所奉者也，大歸訣在丹，情行玄教，有願无不尅也。

太上洞玄靈寶本行因緣經

①「對」字原誤作「封」，據敦煌本改。

（汪桂平點校）

# 016 太極真人問功德行業經

## 業經（敦煌本）

經名：太極真人問功德行業經。  
撰人不詳。約出於南北朝。內容文字與《太極左仙公請問經》等古《靈寶經》近似。一卷。《正統道藏》未收。底本出處：敦煌S.425號抄本。

太極太虛真人問高上老子曰：昔奉聖教，令勸諸男女，勤脩功德行業。不審何名功德行業。高上老子曰：以力勤行謂之功，功及於物謂之德，身行諸善謂之行，以此爲事謂之業。四者万行之統，衆德之紀。十方得道諸天尊等，莫不勤行至乎極果。

真人曰：功德行業，爲復一種，亦〔有〕優劣？老子曰：亦有優劣。真人曰：何等爲優，何等爲劣？老子曰：

志學大乘，先人後己，此則爲優。心來小法，唯存於己，此則爲劣。

真人曰：爲物之中，亦有昇降不邪？老子曰：亦有昇降。太極真曰：何者爲昇，何者爲降？老子曰：如救人死厄，拯濟貧窮，施藥活人，代人勞苦，養育老病，憂人所憂，此爲上上。若宥赦囚徒，放贖生命，布施貧窮老病囚徒，衣食飼養鳥獸虫魚，免諸僕賤，出家入道，此爲上中。若修理道路，造立舟梁，植種果林，建屋鑿井，施漿及火，求拔危難，供養山栖道士賢者，給侍道士，持經持誡，施齋施衣，此爲上中。若於諸城郭都邑，宮苑山林，立觀造壇，度人置像，作當來見在歸依處所，勸諸男女，發起道心，係想虔誠，進善止惡，此爲中上。若造諸天尊真應化像，仙真聖品，及諸天帝、金剛神王、仙童玉女、香官使者、龍虎君等，金銀銅鐵，珠玉繡畫，彫檀刻石，泥素夾佗，隨分所堪，在處安置，令衆歸依，此爲中中。若抄寫黃治三洞經教，常住流通人間山岳，安置藏舉，講讀開化，永

劫住持，此爲中下。若造諸堂殿樓閣，房廊屋宇，帳座幡花，光鄣幢蓋，香鑪几案，鍾磬法具，供養天尊，及以經法次第莊嚴，員滿明淨，此爲下上。若施諸香油，莊田園苑，僮僕碾磑，車馬器服，法衣法具，香鑪澡灌，如意几拂，繩床坐褥，屨履雜器，入常住中，供養天尊及諸道士，此爲下中。若施諸種子，粟麥麻豆，稻叔菓菜，及紋繒綿綺，金銀珠玉，供三寶所須，是其下下。以此九等，大略可知，皆在厥心，丹誠懇到。

真人曰：如上上等，救人活命，爲復種亦有等差。老子曰：上等之人，夙植善業，果報自足，不求於人。中等之人，功行自濟，亦不資物，各能立身。唯下等之人，先世責重，雖報人形，衆苦備集，痛惱縈纏，不自解免，須人拯濟。其功平等，永无階差，唯在發心時輕重耳。

真人曰：如上中等，鳥獸虫魚，有差等不？老子曰：昔常安救數螳沈溺，仁感於天；張霸活飢虎數頭，地官舉善。以此言之，大小雖殊，其命均

也。汝但仁心感惻，誠應物緣，則善響聞天，功書福簡，豈隔虫魚之巨細，鳥獸之大小乎。夫所以令人立功積德者，欲觀其意，練其心也。苟心丹意玄，智惠明了，洞悟道理，物我兩忘，形神一致，內外清淨，遠近均同，靜亂不興，境智齊泯，妄想都遣，煩惱總除，自會真源，豈須諸行。若心鏡暗或，道性不明，彼我在懷，是非未息，煩惱妄想，行住紛馳，雖立德積功，而真道猶隔。大士忘功，中士積德，小人勤行，各在機緣，未可偏也。汝宜識之。於是太極太虛真人稽首稱善，歡喜而去。

太極真人問功德行業經

(王卡點校)

# 017 太上洞玄靈寶衆篇序經

(敦煌本)

經名：太上洞玄靈寶衆篇序經<sup>①</sup>。撰人不詳，約出於南北朝。係節錄三種古《靈寶經》改編而成。原本一卷，《正統道藏》未收。底本出處：敦煌S.6659號殘抄本。參校本：敦煌P.2386、京都253號抄本。

(前缺)<sup>②</sup>

年不老，華容偉貌，精采光明。十九者，鳥狩六畜，懷胎含孕，已生未生，得皆生育，无有折傷。廿者，婦女懷妊，普天生男。廿一者，地藏發泄，金玉露形，散滿道路，無有幽隱。廿二者，天振地裂，枯骨更生，沉尸飛魂，普起成人，天下歌唱，欣國太平。廿三者，地生蓮華，天人稱慶，莫不昕昕。廿四者

五岳開洞，符經並出，教導天人，是時學者，莫不飛仙。其廿四應，上讚元始之靈囿，欣五老之開明，靈文既振，道乃行焉。天地開張，正法興隆，神風遐著，萬炁揚津，五帝輔翼，駢策天仙，役御神官，運導陰陽，固三景於玄根，保天地以長存，鎮五岳於靈館，制劫運於三關，建國祚以應圖，導五炁以育民，敷弘天元，普教十方，威靈恢廓，无幽不闕<sup>③</sup>，神奇堂堂，難可稱焉。

是時上聖太上大道君、高上玉帝、十方至真，並乘五色瓊輪琅輿碧輦，九色玄龍，十絕羽蓋，三素流雲。諸天大聖，妙行真人，皆乘碧霞九靈流景飛雲玉輦。慶霄四會，三晨吐芳，飛香八奏，流電揚烽，華精灌日，三景合明，神霞煥爛，流盼太无。從五帝神仙，桑林千真，師子白鶴，虎豹龍麟，靈妃散華，金童揚烟，五道開塗，三界通津，徘徊雲路，嘯命十天。上詣上清太玄玉都寒靈丹殿紫微上官，建天寶羽服，詣元始天尊金闕之下，請受《元始靈寶赤書五篇真文》。於是天尊命引衆真，入太

空金臺玉寶之殿九光華房。靈童玉女，侍衛左右，九千万人。飛龍毒獸，備守八門，奔蛇擊劍，長牙叩鍾，神虎仰號，師子府鳴，麟儼鳳唱，嘯歌邕邕。天鈞奏其旌蓋，玉音激乎雲庭。上聖五老太上大道君，稽首而言：伏聞元始革運，玄像開圖，靈文鬱秀，神表五方。天地乘之以分判，三光從之以開明。此大宗之業，可得暫披於靈蘊乎。臣過承未天之先，於大劫之中，殖真於九靈之府，稟液於五瑛之關，受生玄孕之胞，覩陽於冥感之魂，拔領太虚，高步長津，朗秀三會，濯瀾上玄，流景冥華之都，抗志於八圓之中，叨受開明之司，過蒙玄師之宗。撫念羣生，悼運流遷，皇道既暢，真亦宜行。私心實欲使雲廕八遐，風灑蘭林，寒條仰希華陽之繁，朽骸蒙受靈關之津。不審靈寶五篇玉文，可得見授下教於未聞者乎。

元始天尊方凝真遐想，俯机高抗，命召五帝，論定陰陽，推數僉會，移校河源，檢錄天度，選擇種人，指拈太無，嘯朗九玄，永无開聽於陳辭，乃閉闔於



求真之路。太上大道君啓向不已，元始良久乃垂盼皆之容，慨尔歎曰：微乎深哉，子今所叩，豈不遠乎。此元始之玄根，空洞自然之文，保劫運於天機，鎮五靈以立真。今三天整運，六天道行，雜法開化，當有一万六千種道，以擇來者之心。此法運訖，三龍之後，庚子之年，雜炁普消，吾真道乃行。今且可相付，償錄於上館，未得行於下世，教始學之人。玄科有禁，不得便傳。君自可詣靈都紫微上宮，視天音於金格，取俯仰於神王也。然後當使得備天文，以總御元始之天也。於是太上大道君、衆真同時退齋三月，詣靈都紫微宮，受俯仰之格。乃知天真貴重，難可即聞，還乃更詣元始天尊，諮以禁戒之儀，遜謝不逮。天顏愍喻，靈關開廓，登命五老上真，披九光八色之蘊，雲錦之囊，出元始赤書五篇真文靈寶上經，以付太上大道君、高上玉帝、十方至真、諸天大聖、妙行真人。使依玄科，六天炁消，案法以傳。

### 三元品戒經道君問難罪福第二

道君稽首敢問天尊：功德輕重，拔度階級，高下次第，何者爲先。先世負重，爲責止一身，爲流及乎子孫。己身行惡，爲身自受對，爲上誤先亡。如今所見百姓子男女人，見世生身充受徒炭，百苦備嬰，不能自解。又見死者形魂憂惱，流曳三徒五苦之中，長河寒庭，風刀萬仞，不得解脫。經傳或云先身行惡，殃流子孫。或云己身罪重，上誤先亡。或云善惡各有緣對，生死罪福各有命根。如此報應善惡緣對，則各歸一身，不應復有延誤之言。又云自非功德拔度先世謫魂，則无由解脫。功德既建，則生死開泰。若各有緣對，行惡之者，死則長淪萬仞，幽繫長夜，何緣復得建此大功，以自拔贖。若子孫建功，上爲亡者，則與延誤，理无復異。愚情淺夾，所未能了。天尊既開大宥之化，生死普明，宜使幽顯盡然有判，不令愚闇或於二論。既蒙飭

擢，位任摠司，當宣正法，開示來生。欲使法音流演諸天，億劫不絕，正一長存，生死蒙福，大宥明焉。緣慈上白，伏願天尊直垂哀憐。

於是天尊權喜答曰：善哉善哉。子之所問，要乎深矣。子雖洞靈墟，而幽源未盡，雖覽大宥，而龍漢難明。炁不可極，數難可窮，死而復生，幽而復明。天地運轉，如車之輪，人之不滅，如影隨形，故難終也。炁炁相續，種種生緣，善惡福禍，各有命根。非天非地，亦又非人，正由心也。心則神也，形非我有也，我所以得生者，從虛無自然中來，因緣寄胎，受化而生也。我受胎父母，亦非我始生父母也，真父母不在此也。父母愛重，尊高无上。今所生父母，是我寄備因緣，稟受育養之恩，故以禮報，而稱爲父母焉。故我受形，亦非我形也。寄之爲屋宅，因之爲營室，以舍我也。附之以爲形，示之以有无。故得道者，无復有形也。及我无身，我有何患。所以有患者，爲我有身尔。有身則百惡生，無身則入自然，

立行合道，則身神一也。身神並一，則爲真身，歸於始生父母，而成道也，無復患也，終不死也。縱使滅度，則神往而形不灰也。終身歸其本，不相去也。身犯百惡，罪竟而死，名曰死也。死則滅壞，歸於寄胎父母。罪緣未盡，不得歸於真父母也。神充徒役，形成灰塵，灰塵飛化而成爽也。魂神解脫，則與爽混合，故魂爽變化，合成一也，而得更生。還爲人也。形神相隨，終不相去也。如此善惡，身各有對，豈可咎於先亡及後子孫乎。龍漢之前，逮至赤明，舊文生死各由一身，亦不上延，亦不下流，福罪止一，各以身當。赤明以後，逮及上皇，人心破壞，男女不純，嫉害爭競，更相殘傷，心不自固，上引祖父，下引子孫，以爲證誓，質告神明，竟不自信，負違誓言，致三官結薄，身沒鬼官，上誤先亡，下流子孫，致有殃逮，大小相牽，終天無解，禍及一宗。此罪惡之人，自求大殃。至法明言，永不得同。達士積行，當取諸我身，無求乎人。明真舊典，豈虛言哉。

天尊重告太上道君曰：大慈之道，度人爲先，非功不賞，非德不遷，非信不度，非行不仙也。夫建功德者，一爲天地，一爲三光，一爲帝王，一爲兆民，一爲祖世，一爲家門，一爲衆生，一爲己身。經云：夫欲度身，當先度人。衆人不得度，終不度我身。大慈廣遠，惠逮無窮，天人所仰，況在七祖父母乎。罪福可不相加，至於功德。故有因緣之恩，精誠自責，天爲迴度，一至之感，人神同開，況於寄胎稟炁，而生受其育養生者哉。慈愛既濃，豈可不爲重建功德，以相開度，施報窮魂乎。自龍漢以來，至于赤明，得道者及見在福中，門戶清貴，善緣來生，莫非積功累德，勳感諸天，以致交報。及九幽長夜宿責之身，得解脫者，莫非功德拔贖開度，以還人中也。南陵朱宮九都上格，悉有其名，報應之理，豪分無失也。年月相推，甚有分明。

道君作禮：今聞天尊告諸緣對功德報應，諸疑頓盡，心懽意釋，無復餘滯。輒當勤心奉宣大法，普示諸天無極世界百姓子男女人，咸令尊承，一切見明。

太上道君上白天尊：既垂開悟，諸疑並了，不審功德，何者爲先。見明真科文，及智慧上品拔贖罪根，爲盡如是，爲復有餘方，信誓拔贖，及教化瞳矇，建立靜舍<sup>⑦</sup>，供養師寶，市諸香油，燃燈照夜，心行善念，救度衆生，慈愛忠孝，布散窮乏，餉飴百鳥，無有悋惜。其中功德，爲有輕重，爲同一等高下尊卑，願垂告誨。

天尊告曰：凡建功德，无大无小，无高无下，其功等尔。輕重報應，由人心也。心行不怠，苦而不退，此功難稱，德亦難名。徒有至心，行之不專，政可得免罪而已。无心而浮好，徒施而无獲也。富室之家，愛惜財寶，弗肯施散，拔贖罪根，徒推心求，希望大報，此將徒勞而无益也。天道何其責人財寶，強使作功德，故觀其慳心，質求其意，有而弗散，將何求哉。窮而發心，意志堅明，懃苦師門，勞不爲憚，道已鑒之。如此之輩，則功感諸天。故施

財以對心，推心以對財，其功等尔。古人求心，末世求財，古人非心不仙，末世非財不度。所以尔者，末世貴財而不貴道也。以黃金万斤，仙經一部，施於窮山，末世乃當貪取此金，豈貪仙經也。黃金尅爲身患，仙經尅得命長，亦公知如此，只自不能免於慳貪。既自不能免於慳貪，安得爲咎。道耶。故非道弘人，此之謂也。明真科法，智慧上品，拔度罪根，施於生死，其法甚重。至於學士，身未入定，處於囂塵，能无愆失，舉動施爲，罪福併行，故三官九府百廿曹，左右陰陽水火考官，司人得失，善功者列言左官，行惡者列言右官，各隨年月日數遠近，以考促之，輕重報應，如濤水之會，必至之期，万无一失也。但以輕重遠近言之尔。今故相告，勤爲宣示，咸令衆生男女善人，普知天地有不欺之響應，實之言也。今以三元謝罪之法相付。元始上道舊文，秘藏於三元宮中，萬仞一行，不傳下世。有盼其篇目，宿根自拔，結縛自解，寶而行之，必招大福，輕而泄之，

禍至滅族。言丹心盡，深慎科法。道君權喜，稽首作礼。是時諸天同時稱善。

### 靈寶諸天內音自然玉字下第三

元始天尊，時與五老上帝、十方大聖衆、无極至真諸君丈人，同於赤明世界栢陵舍，座香園之中長桑之下。天尊迴駕，諸天降席。是時雲霧鬱勃，四景冥合，三日三夜，玄陰不解，天地无光，有如龍漢之前，幽幽冥冥。五老上帝前進作礼，上白天尊：今日侍座，所未嘗經。天尊出遊，則諸天傾駕。上帝高真，神仙玉女，日月星宿，璇璣玉衡，三界官屬，五岳神山，河海水帝，一切神靈，莫不振肅，侍衛天真。當尔之日，天朗炁清，風不搖條，地无飛塵，河海靜嘿，山岳藏烟，時和炁定，使生死同權。而閉天光明，白日晝陰，天人惶怖，四座不寧。不審何故，所緣如是，願垂告誨，令衆見明，饒益一切，普得安全。

天尊告曰：今日同座，懽樂難遇，諸天發瑞，靈應自然，玉宇煥爛，彰弊天光，未通之始，致如晝冥，日慶時合，希所嘗有。今當普爲四衆開天妙瑞，度一切人，咸令四座閉眼伏地。於是大聖衆同時閉眼，伏地聽命。俄頃之間，天炁朗除，冥闇豁消，五色光明，洞徹五方。忽有天書，字方一丈，自然而見空玄之上五色光中。文采煥爛，八角垂芒，精光亂眼，不可得看。天尊普問四座大衆：靈書八會，字无正形，其趣宛奧，難可尋詳，天既降應，妙道宜明，便可注筆，解其正音，使皇道既暢，澤被十方。

天真皇人稽首作礼，上白天尊：自隨運生死，輾轉億劫，屢經侍座，未有今日遭值聖道，開諸法門，得見天書，自然至真。斯八會之炁，合五和之音，非愚情短思所能洞明。今既厠座次，仰觀玄妙，被命狼狽，不敢藏情，逆用振惶，若无神守，輒竭所見，解注其音，冀万有一合，開示來生不及之體，惟蒙曲愍。於是晏筆，太真拂筵，玉女

執巾，金童揚香，月宮散華，日精觀津，五老監試，三界衛真，分其分<sup>①</sup>度。卅二天，天有八字。其太黃皇曾天、太明玉完天、清明何童天、玄胎平育天、元明文舉天、七曜摩夷天、虛无越衡天、太極濛翳天，八天合六十四字，位屬東方九炁青天。其赤明和陽天、玄明恭華天、耀明宗飄天、竺落皇笏<sup>①</sup>天、虛明堂耀天、觀明端靖天、玄明恭慶天、太煥極搖天，八天合六十四字，位屬南方三炁丹天。其元載孔昇天、太安皇崖天、顯定極風天、始黃孝芒天、太黃翁重天、无思江由天、上揲阮樂天、无極曇誓天，八天合六十四字，位屬西方七炁素天。其皓庭霄度天、淵通元洞天、翰寵妙成天、秀樂禁上天、无上常融天、大釋騰勝天、龍變梵度天、太極平育賈奕天，八天合六十四字，位屬北方五炁玄天。四八卅二天，合二百五十六字，皆卅二天大梵隱語，无量之音。天有飛玄自然之炁，合和五音，以成天中无量洞章。上演諸天之玄澳，讚大有之開明，中理自然之炁，普度學仙之

人，下度生死之命，拔出長夜之魂。元始妙法，億劫長存，其音既朗，其道行焉。大法開明，諸天稱慶，无極大聖衆，至真諸君丈人，五老上帝，十方尊神，神仙玉女，一時行香，旋行三匝，而作誦曰：

天尊迴玉駕，降席香園中。至真大聖衆，无極天中王。神仙導日月，鬱鬱披雲宮。五帝翼華轅，三界備十方。日慶衆真座，歡樂難爲雙。妙會自然感，靈瑞發空洞。煥爛啓幽期，鄣蔽日月光。玄陰不解夜，四衆並恭恭。靈運自應圖，儵欵朗太空。靈書八會字，五音合成章。天真解妙韻，琅琅大有通。玉音難爲辟，普成天地功。上植諸天根，落落神仙宗。中演玄洞府，坦明八幽房。開度生死命，拔出長夜公。地獄五苦解，刀山不生峰。五道無對魂，億劫並少童。堂堂大乘化，一切不偏功。無極大聖衆<sup>①</sup>，是爲王中王。不勝情懽樂，飛步誦靈章。天尊開大有，落落諸天明。妙哉龍漢道，八會結成形。煥爛飛空內，流光三界庭。神圖

啓靈會，玉書應景生。天真通妙趣，五和合成經。琅琅玉音響，飄飄翠上清。開度無終劫，九幽受光明。鬼鬼大法門，教導一切生。斯功不可勝，懽樂慶萬齡。

是時惠澤普流，恩被十方，信向不死，皆得長年，老者還少，病者即康，枯骨生炁，死魂還人，五苦咸解，地獄寧閑，預以有心，皆得神仙。

天尊告四衆至真：今日同座，一劫之中，開天靈奧，自然玉書，度一切人，其福弘普，廣益衆生。大法既陶，恩无不匝，无極世界，皆受光明，九幽開宥，長夜赦魂，生者懽樂，死者蒙還。諸天人民，宿對種親，是男是女，善惡命根，元始而來，至于今座。生死輾轉，殃對相牽，天地成敗，功過難明。今一依大有，普告諸天，日月星宿，璇璣玉衡，南斗北斗，司命司煞，韓君主錄，南昌上宮，諸地諸水，五岳靈山，三官九署，十二河源，長夜之府九幽之中，四司五帝一切神靈，採筭錄籍，推校本原，无善无惡，輕重之根，生死右

別，條名列言，一切削除，斷絕因緣，普同一慶，以今爲新，令此一劫，咸得道真，大福所普，勿使有偏。

天尊有命，諸天敬從。於是四衆同起作禮，舉手指上，俛手指下，无上无下，无極无窮，无深无遠，无幽无隱，无大无小，无數无終，一切普度，同更光明，揮指告衆，一切咸聞。是時四衆同時抗手，仰天彈指，卅二天，日月星宿，一時俱明，地下九幽，无極之底，光景洞徹，无復闇冥，幽隱普見，地藏露形，山川溪澗，一等緬平，冬華結實，枯樹發榮，慶加一切，功載衆生，魚龍踊躍，鳥獸欣鳴，靈歌交會，路无悲聲，天静地嘿，三官潛寧，簡對休息，五道不生，人神懽泰，聖道太平。

天真皇人曰：諸天内音自然玉字，皆諸天之中大梵隱語，結飛玄之炁，合和五方之音，生於元始之上，出空洞之中，隨運開度，普成天地之功。斯文尊妙，不辟於常，是故開有之始，而閉天光明，以寶其道而尊其文。其字宛奧，非天書之无形，植●貴其妙象，

而隱其至真，妙感應圖，其法運行。天尊不以我之才呐，而見命勅，使解其義，通其玉音。玄科有制，不敢違命，晏筆之日，形魂頓喪，率我所見，聊注其文，是之與非，極我乃心。皇道既明，諸天稱慶，一切獲載，生死並懽，大福普匝，我情自欣，惟願四衆，咸見體明。

於是四衆至真尊神，一時稱善。天上天下，地上地下，无窮无極，彌羅世界，一切神靈，莫不範德，尊崇大聖，欣道開明。惟願大法廣度无終，福流億劫，世世長存，慶加願會，普得道真，不勝罔極。四衆同時俱起，作禮稽首受命。

天真皇人稽首上白天尊：自受日月，隨運流遷，去來輪轉，一光一冥，一滅一度，一死一生，身受破壞，一敗一成，經履天地，改易光明，幽幽妙邈，非可思議。自龍漢以來，已九万九千九百万重劫，緣對相牽，世世不絕，至于今日。亦嘗生王門，亦嘗生賤家，亦嘗生富室，亦嘗生窮寒，亦嘗生人尊，亦

嘗爲僕使，亦嘗嬰六疾，亦嘗受光明，亦嘗受智慧，亦嘗受愚聾。諸行備經，身未入定，惡對緣生，而作无道，非人所行。不敬天地，不畏鬼神，不慈不孝，傷害衆生，死循劍樹，足踐刀山。或入寒夜，或入鑊湯，流曳三塗五苦之中，形魂楚撻，痛毒備嬰，万劫對苦，乃得還生六畜之中。年命无幾，更受死壞，方復還充五岳長徒，東西作役，无所不更，千劫受苦，乃得還生邊夷之中。雖有人形而无人情。年命无幾，身復死壞，魂擔四瀆，漣汲溟波，徒炭寒冰，晝夜無寧，百劫對盡，乃得還生賤人之中，六疾醜陋，可憎之極。年命无幾，復受死壞，魂入長夜九幽之中。配役三河，卑塞長源，寒厲切肌，諸苦備經，一劫緣盡，乃得更生中人之門，形容端正，人道備足。年命无幾，復受死壞，魂魄方還三官，都使駟馳百極，流離鬼庭，万年罪竟，乃得還生善人之門，則財寶无乏。雖受寬泰，年命无幾，復受死壞，魂神方還三官，善鬼受任都伯，統承生死，千年根斷，乃得受

生，通靈徹視，座見鬼神，役使召制，助國治民，或輔帝王平斷四方。年命無幾，復受死壞，魂神乃得爲五帝賓友，交遊神仙，百年根對並消，地責周竟，三官絕簿，諸天記名，乃得受生富貴之門，侯王之家，榮祿難勝。根盡福生，發心大願，布散窮乏，廣作功德，而受滅度，逕上天堂，逍遙懽樂，衣食自然。廿四年，更生貴門，受炁智慧，五心開聰，脩奉經法，賤財重道，慈心一切，奉敬師寶。功德未全，復受滅度，上升南宮，朱陵定我命籍，三界書我功名，周流十方卅二天，交遊上聖，爲太上之寶，十年還在人中，身作師宗，宣通法音，開度天人，教化羣生。輾轉億劫，无所不經，備三官徒對，年限垂竟，而

雲輿八景瓊輪，駕空乘浮，白日升晨，被蒙天尊，曲逮重恩，拂飭朽骸，得見光明，超陵三界，位登天真。今日侍座，懽樂難言，天尊不以光音所見淺狹，觸事无能，見使注筆，解說天音，命重教嚴，不敢隱情，輒極所見，率表乃心。雖不羅縷，然經歷前生億劫以來，遊涉天元，隨法生死，恒值真文，自不履其玄化，洞於本根，將敢以私短，而竊申自然之書，以解曲逮之文，振琳琅之嚮，叩瓊瑤之音，義體雖不都備，由足申演天地之根矣。其諸天之中，闕夾度數，炁象變化，日月星宿，宮室山林，真人城臺，及魔王鬼神，應承之所由，其事深奧，亦非可都詳。且問難因緣，亦已舊書載，不復一二，論爲煩重。今粗解天書五合之義，其道足以開度天人，拔諸苦根，大法開張，澤被十方，今生來生，男女善人，當得此恩。然案元陽玉匱，九天推數運行，靈關周迴，卅二天一交，僞道出行，万姓心壞，諍共崇奉，此文當還大羅之上，七寶宮中。三五周竟，万道勢訖，大聖龍興，

下世度人，誅罷僞座，退翦逆民，道德興隆，天下太平，國主享祚，十方寧焉。真經輔世，善瑞日生，壬子之初，乙卯之年，至甲子之旬，當有青帝九種仙人，乘九色之龍，出遊太山，賚此真經，以掃不祥。真經下世，角音龍精，遇吾此道，其祚自強，以保甲申，普度天人，其時懽樂，此經之功也。奉之者享福，脩之者神仙。斯文玄奧，廣覆無窮，大法尊重，伏願天尊，普告諸天上帝，大聖尊神，日月星宿，地上地下五岳四瀆，及河海水帝，神仙真人，十方世界諸靈官，一切依大有之格，府仰之科，禁償漏慢，秘而奉焉。

是時天尊舉手揮指，天上天下，地上地下，無極世界一切神靈，莫不秘奉。諸天大聖衆，同時稽首，長跪稱善。天尊告四座大聖衆，無極太上帝道君、卅二天十方尊神等天真真人龍漢之前，在延康之中，隨運生死。至于龍漢，乃受緣對，魂形艱苦，塗炭三官，緣盡根斷，得入福門，經履天地一成一敗，無復限極，涉見天元，恒值靈寶，

世世出法，化度天人。是以洞究天中之事，能解天書自然之文，大法開明，諸天所宗，宜宣至理，音究朗然。故令注筆解其曲逮，合和五方无量之音，以成諸天，普度來生，其中玄奧，信而可尊。靈音既琅，諸天光明，天上天下，地上地下，十方無極世界一切神靈，莫不宗奉。依明真玄科具制，以玉童玉女各廿四人，燒香侍真，檢慢糾非，不得輕宣。四万劫一出，下世度人，明各檢慎，勿使有言。是時四衆一時作禮，稽首稱善。

天真皇人曰：天書尊重，度人无量，貴而亨福，慢而禍臻。諸是上天已得道過去無極大聖，至真尊神，及飛天神人，五岳神仙，莫不備受宗奉，天文自然之音，以成至真者矣。自非宿名金錄，玉字上清，終不得見。脫於漏慢之中，見其篇目，神迷其心，終不開悟。有其宿分，自當發心，願樂神文，生遇其世，與文相值，當賚七寶文繒之信，詣師告盟，上關諸天，受而備身。得備此文，諸天所敬，三界所稱，五帝所侍，

地祇奉迎，一切神靈莫不朝門，將拔九祖於長夜，開度死魂於九冥，反更胎於靈炁，得受生富貴之門，長與諸天交遊，携提太山之寶也。

五老帝君宣告諸天，地上五岳靈山，三河九海，神仙真人玉女，一切神明：天真皇人開大有之妙法，通自然之靈文，天書尊重，禁不輕傳。今生男女，心不懷貳，敬信自然，受之者皆得升度，奉之者皆得長年，輕財重法，致魔不言。來生男女，心當破壞，各懷偽黠，貴財賤道，不信至真，縱有歸向，多以浮華，意志不專，貪竊闕闕，致魔有言。故玄科告禁，以七寶文繒，質求人心。有至學之士，依科賚信，便言名諸天，斑告五岳，地上神仙，一切記名，宣示魔王，保舉三清，然〔後〕而傳。有違玄科，身負風刀，万劫無還，九祖填夜，長役河源，一切神靈，明識此言。

天真皇人告五老帝君：我當於龍漢之中，受文於无名常存之君。俯仰之儀，以丹筆書諸天八字之音，合二百五十六字，以黃繒爲地備身。依明真

玄科，以金銀、蘇牙、流離、水精、車渠、馬腦，七寶鎮靈。五色文繒各卅尺，以奉神真。玄科之言，法不得虧。至於有心，窮乏不備，貴得表冥，當量其輕重，宜而授焉。出內音。

### 衆篇序經

① 按此經名係據敦煌S. 6659抄本擬補。該鈔本卷首殘缺，尾部完好，題「衆篇序經」。即《靈寶中盟經目》所著錄之「衆經序一卷」。京都253號抄本題作「太上洞玄靈寶妙經衆篇序章」。

② 按據後文內容推測，S. 6659前缺文字，應爲《太上洞玄靈寶五篇真文赤書經》卷上。

③ 不閑：P. 2386作「不關」。《道藏》本《元始五老赤書》作「不閑」，近是。

④ 「先」字原缺，據京都253抄本補。

⑤ 淺夾：京都253作「淺陝」。《道藏》本《三元品戒功德輕重經》作「淺狹」，近是。

⑥ 豪分：京都253作「毫分」。

⑦ 靜舍：P. 2386作「靜觀」。京都253作「靜寺」。

⑧ 咎：原作「名」，據京都253改。

⑨ 會：原作「食」，據京都253改。

⑩ 響應：原作「響應」，據P. 2386改。

⑪ 自解：P. 2386及京都253均作「自釋」。

⑫ 同時：P. 2386及京都253均作「同立」。

- ①「分」字原缺，據P.2386及京都253補。
- ②「加」字原缺，據P.2386及京都253改。
- ③無極大聖衆：P.2386作「元始出玉文」。
- ④植：P.2386及京都253均作「直」。《道藏》本《諸天内音自然玉字》作「真」。
- ⑤「宣」字原缺，據P.2386及京都253補。
- ⑥「愍」：P.2386及京都253均作「愍」。
- ⑦「俯仰」：P.2386及京都253均作「俯仰」。
- ⑧「衆」字據P.2386及京都253補。
- ⑨「一成一敗」：原作「一敗一成」，據P.2386及京都253改。
- ⑩P.2386「京都253抄本均止於此。京都本尾題：「太上洞玄靈寶妙經衆篇序章。承聖三年三月七日道士朱世元書」。
- ⑪「後」字《諸天内音玉字》補。

(王卡點校)



# 018 洞玄靈寶諸天世界造化經

經名：洞玄靈寶諸天世界造化經。撰人不詳，約出於南北朝或隋唐。言劫運災變及濟度之法。一卷。底本出處：《正統道藏》洞玄部本文類。


## 天尊說經開叙品第一

太上天尊居靈鳥山中，與諸天人說十二部經。於是乃分四十萬品，弟子書之，故曰妙道。爾時天尊化爲居士，而智慧無窮，而告衆曰：我學道以來，九十一劫，斷求念空，故得無想定通衆聖中王。以洞達之照，得見天地敗而更成，衆生死而復生，無有窮已。如日月圍繞崑崙之山，旋照四方。天下周而復始，無止息時。有四千崑崙，四千日月，四千天下；有大海水四千，

大龍王宮四千，大金翅鳥王宮四千；大惡道高數萬里，大神山高數千里，大神樹萬種種大地獄。合爾所名，爲小劫世界數；是小劫世界千，名爲中劫世界數；是中劫世界千，名爲三界。大劫世界從彼始成，至後七日並出，悉燒敗之，一切蕩盡，後復更成，一如往法，無休止時。自然如是，無神爲也。亦如衆生死而復生，但其壽長遠，人不知之。又衆生死時，形滅而神移，皆緣其生時所作罪福，至彼五道之處。何謂五道。一者天道，二者人道，三者地獄之道，四者餓鬼之道，五者畜生蟲獸之道。若其人生世積德深厚，得入上福，則生天道，長壽好形，安樂無極，還知宿命因緣之事。若其生世得在中福，則生人道，得其富貴之門，無所不足。若其人生世福微罪多，得在下福，則生貧賤之門，凡事下惡，所向無可，或得盲聾瘡癩六疾，醜惡奴婢臭處臊穢之身。是上二道，雖有優劣，猶勝是下三塗有生之苦。若其人生世慳貪悻悻，不施飢渴，不濟窮急，即生餓鬼之

道。當受鬼形，腹如懸鼓，喉中容縷，縱見美饌，不能得食，長受飢餓，形色醜惡，兼有長年，思滅不得。若其人生世奉親無孝，九族無仁，惡及百姓，羣衆所忌者，則生地獄之道。受其罪鬼之形，常被考毒，不可勝說。若其人生世好殺害衆生，射獵爲事，屠割爲業，不知修福，但行惡事，即生畜生之道，爲彼羊牛猪鵝鷄鴨，受其屠割秤賣之報。如先身所爲，誰能見是，唯得道者知之，謂汝未信，故說偈頌：

天地諒改換，何等能常存。出生必入死，神隨五道緣。敢或有欺誑，地獄相拘連。但當修善業，悔過滅罪根。



太上耀靈之符，行之無怠，超凌三界，得離五苦，轉輪不滅，位爲真人。


## 崑崙山王四天下品第二

道言：我在玄化之前，故有太上號，見彼崑崙山王，以金銀琉璃水精作

之。上高三百三十六萬里，下有大海圍之，深亦三百三十六萬里，廣亦三百三十六萬里。地深二十億萬里。次下有地，亦深二十億萬里。次下有粟金二十億萬里，次下有剛鐵二十億萬里，次下有水深八十億萬里，次下有風，深厚五百二十億萬里。以是大風持地，使有墮落地浮水上，水浮風上，其下大空，異天地也。崑崙山北以金光照之，其天下名鬱單越，地方四十萬里，人壽千歲，其髮紺色，男女長短同等，無有高下，民悉好善，不復相教作惡者也。凡四天下，是天下最勝三天下也。又崑崙山西，以水精照之，其天下名大唐界，其地如半月之形，廣長三十二萬里，人壽二百歲。其人長短皆有人間之事，壽夭之年。又崑崙山東天下，以銀光照之，名碧落界，地方四十六萬里，地正圓，人壽三百歲，或長或短，皆有人間之事，壽夭之年。又此崑崙山南，以琉璃光照之，地方二十八萬里，其地名棄賢界。其人或長或短，於人間最苦，不如彼三天下人也。年

壽無定，猶有一事勝三天下，及上諸天人者，其人勇猛，求道易也。若能修福，從我道者，逕上生天堂，或出三界，得無上道。如其積罪者，死入地獄，俄頃之間，無有定品。又崑崙之山在黃曾天下，太微帝君或居中央，有四天王，各鎮四邊，各掌一方天下，常以月一日、八日，遣使者下，案行天下，伺察帝王臣民龍鬼，蜺飛蚊行蠕動之類，心念口言，身行善惡。十四日遣真人下，十五日、十八日仙王下，二十三日、二十四日使者復下，二十八日、二十九日仙王下，三十日諸天王下。四下者，日月五星、二十八宿，其中諸天森然俱下，伺察衆惡罪犯之者。汝曹當以是日，改心易行，持齋悔過，誦經持戒，唯行善事，能如是者，天官愛護，司命益筭，盡其本壽，不遭枉橫。至其壽盡，上生天堂，衣食自然，安樂無窮。是言至實而汝未信，故說偈頌：

爾觀四天下，矜是無祕言。受生若電過，那不修福田。冥冥地獄中，萬萬億劫年。天津無原赦，爲欲訴何尊。




天津乘真，正魔邪神，符騰福至，與道昇遐，玄都司契，犯法不赦，急急如律令。

### 日月旋照四天下及天上品第三

道言：崑崙山上方三十六萬里，其中神聖居之，各有方位。又有日月天子，光明具足，普照天下。唯月城之中，有五風轉行，月中有四宮，五夫人，有騫樹，上高四千里，所以影見月中，善人見之，其樹有實，不可稱說。又有七仙精舍，及七寶之山，七寶之樹。此等仙人，常修我道，終無橫夭損壽也。汝曹若欲生是長壽天中者，當修是下五事。一者慈心不殺，愛存物命。二者賢良不盜，濟救窮急。三者用心貞潔，不犯外色。四者奉齋護戒，精進無倦。五者誠信不欺，減酒慎過。行是五事，必得生天。謂汝不信，故說偈頌：

時行回能制，哀哉生世促。如何萌罪辜，天官所糾錄。一往無拯拔，沈魂淪地獄。速願生天好，三塗不可觸。




太上尊靈經之符，濟育羣生，開悟盲冥，雜妙華香，修心恭敬，得金光之身，無量壽命，急急如律令。

#### 諸天世界大洞品第四

道言：三界之人，凡有三生。一者花生，二者化生，三者胎生。花生者，積福深厚，於蓮花中生，為彼天人。化生者，福有神力，於變化中生。唯有胎生，福德微淺，最為下劣，託神肉形，年壽短促，不如天人。天人雖樂，猶有三界之內，至其壽盡，還生下土，無由得道。真人無死，能有能無，金剛不能為固，石壁不能為障，雷霆不能為駛，水火不能為患，諸天不能為隔，智慧不能為長，鬼神無不降伏，有生無不宗仰。是為無上三界之人，得道者與虛

空合體，無盡者也。其化生者，先有善功，應化故也。欲希昇度，喻如脫身救獸，忘死求道。當行萬善，斷棄俗緣，隱居山林，奉禮羣聖，日夜齋直，沐浴潔清，洗蕩口齒，不食臭惡。今精神附著，不害羣生，唯道是從，誓願不絕，得道飛仙。如是之教，語諸仙官，道士有法服之身，非是帝王臣民所能行之。但能尊行十善，修奉五戒，不染十惡，必生上天，八劫之壽，有兼聖則得生道，非誑汝也。



諸天齊功，隨願即報，紀德仙都，及諸羣魔鬼神，有來聽者，增官益族，早得天道，為金光真人，不輕慢玄都律，吏明如律令。


#### 小劫大劫天地敗成品第五

道言：地有三災。一者火災，二者水災，三者風災。先為小劫，後為大劫。小劫至時，陰陽氣變，水旱不調，

五穀匱乏，一切木石草棘，及衆生指爪，盡成刀劍，互相殺伐，人民死盡，兼人命短淺，忽自誑惑，七日之內，相殺都盡。是洪水滔溢，洗蕩天地，山川改換，土地平坦。甘露降臻，真人下生，身有明光，名曰崑崙。爾時洪水美好，味甘除患，一種七獲，如有便利不淨，地即裂之，受已還合。人壽八萬歲，女年五百歲，方乃行嫁，天下快樂，同彼上天。其後真人過去，後生之徒，漸漸積罪，經是數千萬年，地獄滿溢，大劫欲至。帝王臣民父子，上下相殘，民無忠孝，君無慈仁，劫盜橫起，逆暴相仍，為惡之苦，劇於大劫之前。及四天之下，人情盡惡，無有往日淳風之俗，於是大劫始至，大災先起，二日並出，乃至三日、四日、五日、六日、七日，一時俱為是數萬億年，河海乾涸，衆生死盡。天尊觀地上，其中男女，散戲地味之草，顏色變惡，失其光明，其身即重，不能飛去，常居下苦。於是天尊愍此衆苦，令日月還生，星宿復度，風雨順時，天降甘露，地出醴泉，人無疾病，華

色赫奕。其壽六萬，食自然之米，衣自然之服。後世人性行轉薄，罪根萌生，年壽漸短，自然衣食，忽自殄滅，乃食鳥獸之肉，衣其皮羽，更相殘害，罪負日積，陰陽不調，雨旱不節，冬則穴處，夏則巢居，以避時害，未有衣食禮義之節，死入地獄，不得生天。如是萬億年，方生聖智，感降教化，伏牛乘馬，造火田蠶，衣食君人之事，以相維制，有高下貴賤之差，能行至善。行合道教，則得生天。如其不然，悉入地獄。冥冥萬劫，無有出期。以是之故，今說偈頌：

地獄徒罪苦，永劫無出期。釁毒由身植，信哉莫爾嗤。形滅反泉壤，神魄隨功基。天地猶一忽，汝無疾風時。



下敷元生，和神之度，翼是靈經，天人慶慕，扶福三界，除汝罪故。敢有毀墮，獄律無恕，急急如律令。

### 九幽地獄品第六

道言：其黃曾天下，凡有九州，皆以小海環之，流通崑崙大海。我今教化之處，名曰赤縣小洲，中為九州，法彼大洲者也。是小九州之人，聰明巧偽，少有真實，希得生天，多入九幽地獄，縱橫數十萬里，其中冥冥，盡是罪人。或洋銅灌口，或鑊湯煮之，或猛火燒之，或鐵叉刺之，或鐵鎚鎚之，或火杖拷之，或屠解其形，懸其頭首，或擔砂負石，填河塞海，大神結政，徒罪無赦。或為一劫、二劫、三劫、四劫，乃至百劫。是劫有大深坑，方四十里，告令罪人，作役百年，投一芥子，至是坑平滿，名為一劫。又有大石方四十里，告令罪人，徒作百年，以天衣一拂，須是大石消盡，名為一劫。爾時罪人哭泣相向，相謂曰：芥子至小，是坑深廣，何當平滿。是石堅勁，天衣輕眇，百年一拂，何當消盡。而獄吏聞之，怒而告曰：如是之劫，其數二十，未名半小劫也。罪人聞之，氣思哀咽，死而復生，將知入是科罪，無復出期。方恨先身

不孝惡逆，為賊殺生，誹謗經道，奪人之命，負人之財，姦巧盜取，不奉神道，致有是報者也。我見如是，念汝士女不可為罪，故說偈頌：

坑石不為名，二十非大劫。悠悠徒罪中，神魄不為滅。須臾起身形，暫爾復屠裂。鑊湯為蒸煮，刀風為俎切。愍哉下天人，何不建福業。生天必可果，況復神仙法。

### 告衆聖品第七

太上天尊說是經已，爾時衆聖諸君丈人、九老仙都君、九炁丈人等，悉皆在座，咸曰善哉，上白天尊：如是悟道，無不宗仰。請問彼諸天世界，復有至化不。天尊告曰：自我學道九十一劫，因學教化六十二億塵沙世界，或分神散體，同其生死，或化作金剛瑠璃之光，或為帝王聖智長老童子，或為神瑞仁獸，師子白鹿、麒麟鳳凰，種種方便，無所不通。但天下衆生，罪業深重，緣期未至，不能受化，終歸地獄。其中受化之者，悉得至道，不生三界。汝曹既覩道場，唯當闡揚道教，濟度羣生，為

發大願，普令國主帝王，總及諸天地法界，一切臣民，下至蝸飛蠕動蚊行之類，皆使開悟，不入三塗十苦八難，死得無極之樂，生得法身無量之壽。七寶宮殿，無物不足。汝能如是濟度，則爲天人之師，可不勉也。

天尊告曰：是經出世，未可隱藏。同契相授，景福由昌。謬傳流俗，獲罪招殃。於是衆聖稽首，悉皆稱善，信受奉行。

洞玄靈寶諸天世界造化經

（郭清點校、王卡復校）

# 019 太上洞玄靈寶天關經

經名：太上洞玄靈寶天關經。  
撰人不詳，似出於南北朝或隋唐。言宇宙生成及天地境界，勸人歸依天尊。一卷。底本出處：《正統道藏》太玄部。

大道，妙用也。有太易，未見氣也。太初，氣之始也。太始，形之始也。太素，質之始也。且氣形質三具，而未相離散，曰混沌，是萬物未分判也。輕清爲天，重濁爲地。故造天地章云：老君者，乃天地之根本，萬物莫不由之而生成也。故立乎不疾之途，遊於無待之場，御空洞以昇降，乘陰陽以陶埏，抱無名之大朴，乃善貸而成焉。故於九萬九千九百九十九億萬氣之初，復列玄元始，而生天地焉。號無名之君，演自然之道，以化天地。經大

劫一交，天地崩淪，又積氣御運，重立乾坤，號曰無上玄老，開導兆人。經大劫之周，天地復壞，又造化二儀，號太上老君，秉持仙籙，以度十方。至一劫運終，天地復淪，又託生玄妙，號高上老君，而混成天地焉。分別元氣，清者爲天，濁者爲地，太陽之精爲日，太陰之精爲月。復分日月之精爲星辰，置二十八宿，布二十四氣，建八節、四時、五行，立五星，立五嶽，分五帝主之，日月星各立宮室，主理其中。以春夏秋冬輔二十四氣，復立三百六十名山、七十二福地以鎮地理。天地之氣交，然後人及禽獸草木，螻飛蠕動，森然皆生，乃置立三皇五帝，胤胄百姓，更相產化。天地相去四萬八千里，東西南北相去萬萬九千里，日月各徑三千里，周圍各九千里。崑崙山爲天地之齊，北辰玄君其上，北斗一星面百里，相去九萬里，如是置立，凡有九天九地焉。九天者，從下第一波利天，第二迦夷天，第三梵寶天，第四化應天，第五不驕天，第六寂然天，第七須延天，第八

禪善天，第九鬱單天。九地者，自上第一色潤地，第二潤色地，第三色澤地，第四潤澤地，第五金粟澤地，第六金剛澤地，第七水澤地，第八風澤地，第九洞泉綱維地，此亦名九壘也。然天位乃多，今略舉三十六名，分爲三界、四天、三清境域也。從下第一欲界六天。六天者，太皇天、太明天、清明天、玄胎天、元明天、七曜天是也。第二色界十八天者，虛無天、太極天、赤明天、恭華天、曜明天、竺落天、虛明天、觀明天、恭慶天、太煥天、元載天、太安天、顯定天、始黃天、太黃天、無思天、上揲天、無極天是也。第三無色界四天者，霄度天、元洞天、妙成天、禁上天。凡二十八天，名爲三界也。次上四人天，有四者：常融天、玉隆天、梵度天、賈奕天。此四天名爲種民天也。合前凡三十二天，並在三清之下矣。次上三天，號曰三清者，第一大赤天，曰太清境；第二禹餘天，曰上清境；第三清微天，曰玉清境；最上一天，號曰無上大羅高蓋天，謂包羅諸天，極高無上故也。

通前凡三十六天，各立一帝。地亦有三十六名，各置一皇。是爲三十六天帝、三十六土皇也。天地之外，其狀如雞子，又如車輪，元氣繞之，如日之暈，黃精之所散也。如是天地，各有五億五萬五千五百五十五重也。其中立天文地理，土水火風，陰陽之所，生育皆從我始，故二儀得之以分判，三景得之以光明，四氣得之以調和，五行得之以相生，江海得之以深澄，山谷得之以虛盈，道士得之以神仙，王侯得之以太平，品物得之以滋興，神祇得之以致靈，幽魂得之以開度，枯骸得之以發榮，寔上善之廣洽，咸享自然之福也。

是知太上老君乃爲元氣之父母，爲天地之本根，爲陰陽之祖首，爲萬神之帝君，爲先王之柄蒂，爲萬物之魄魂。陶冶虛無，造化應因，衿帶八極，載地懸天，遊馳日月，運走星辰，呼吸六甲，御制乾坤，改易四時，推移寒溫，驅使風雨，鼓奮雷雲，分別青黃，歷數虛盈，君臣父子，禮義備焉。論者以爲：欲界之人，有陰陽色欲，更相產育；色界人

言有色而不交，人皆化生；無色界人謂性識微妙，無復色想便止。種人者，次仙也。謂壽有億萬，身能飛行也。雖漸階長壽，猶未斷生死，壽盡下生，各隨業厚薄，若能修習增進，則昇入三清道境，永免輪迴矣。其中立三元宮，置三官九府、百二十曹，列考官吏，各書人生死罪福，毫分無失，庶向方之子，其勉之焉。

子可歸命於十方天尊，而延道氣。東方玉寶皇上天尊，見曲直之形儀，衣甲乙之冠履，拽龍虎之杖，主寅卯之民，子可歸之。南方玄真萬福天尊，見炎上之形儀，衣丙丁之冠履，秉朱雀之笏，主巳午之民，子可歸之。西方太妙至極天尊，見從革之形儀，衣庚辛之冠履，揮雪霜之刃，主申酉之民，子可歸之。北方玄上玉晨天尊，見潤下之形儀，衣壬癸之冠履，秉玄武之簡，主亥子之民，子可歸之。東北方度仙上聖天尊，見木水之形儀，衣青黑之冠履，仗鬼門之劍，主艮極之民，子可歸之。東南方好生度命天尊，見木火之形儀，

衣青赤之冠履，掌風門之印，主巽極之民，子可歸之。西南方太靈虛皇天尊，見金火之形儀，衣白赤之冠履，掌地戶之簿，主坤極之民，子可歸之。西北方无量太華天尊，見金水之形儀，衣白黑之冠履，掌天門之鏡，主乾極之民，子可歸之。上方玉虛明皇天尊，見輕清之形儀，衣蒼穹之冠履，運春夏秋冬之動植，主君臣父子之枯榮，子可歸之。下方真皇洞神天尊，見重濁之形儀，衣戊己之冠履，施東南西北之願，主辰戌丑未之民，子可歸之。凡三十六天，天各立一帝，三十六地，地各置一皇。其天帝、地皇，各有形儀、冠履，所表所主，具列仙班圖籍，即七十二天帝地皇。俱尊十方天尊，而統三界仙凡脩短，禍福增減。而不歸命於十方天尊，而歸何所乎。是以五嶽各圖形儀，欲世民歸命矣。頌曰：

三清降靈，八極歸命。六宮無塵，十天景行。朝真誦此，普禮十方天尊，而求長生。子宜歸之。

太上洞玄靈寶天關經（王卡點校）

# 020 太上洞玄靈寶誠業本行上品妙經

經名：太上洞玄靈寶誠業本行上品妙經。撰人不詳，約出於南北朝或隋唐。勸人修行無上金真誠業。一卷。底本出處：《正統道藏》洞玄部本文類。

道言：昔我於洞明丹陵天中玉臺，受元一金真法輪誠業本行。因緣上品，與我無上高上洞明大法王之號，常鎮玉清高上大囿都開飛天。法輪上本誠業之功，開度萬有生死之場，天人罪福諸源，運載三乘，登步上清，十轉真人，光明幽夜，弘廣十方，迴十惡之根，使從十善而行，咸得徑生無量大囿天堂，有能從者，克獲道真。

道言：我常隨運降下十方飛天元生大福堂洞明寶庭，開是法輪，十善法

門，咸使十惡從法而遷，從是法輪轉昇上天，悉得妙通，廣明本行。宿業因緣，吾觀天地，希有其人，自非上德，何能奉焉。

道言：誠業至行，惟上德弘遠，金真本行，長存之源，善當正念，魔無敢言，斷諸惑亂，諸天朝真，彼諸生惡，爾勿從之，斯罪根深，會當入吾法輪，彼之起禍，莫與之爭，墮身三惡，望反甚艱，障道者無明，嫉人者自刑，謗人者始從畜生道中出也，樂淫色者，由之先業六畜根未斷矣，貪狠者自傷，貪味者吞毒，斯酷之本，善當遠之乎。

道言：元一天尊當說是誠業本行之時，天尊以手指點十方虛空之中，命召十方飛天帝王，至真皇人，飛天無極神王，妙行真人，高上玉皇，無極大聖尊神，三十六天上帝，諸天至真，九宮真人，五老上真，天真地仙，無極世界神仙玉女，無量大聖衆，三界靈官，三元正真執法官屬，無鞅之衆，一時同駕，乘空而來，上詣玉都天光四朗紫蓋迴天，威靈濟濟，流激十方，敷明諸天，

燒香散華，飛玄步虛，三匝復位，稽首朝真，同登金真法輪諸場，仰觀法音，莫不歡悅，咸同稱善。

道言：無上金真誠業，普隆萬囿誠行之本，萬無其人，天理妙旨，上真行焉。但十方天人，空生禍府，造立萬端，通惡所釋，訣在乎心，開建道場，普轉法輪，光明六道，開度天人，孤魂苦爽，同登福天，終身歡樂，劫劫長存，自斯以往，皆由法輪，上品之恩。爾時諸天大聖無鞅之衆，同時稱善，左迴三匝，叉手作禮，伏受誠言。

天尊告諸天聖衆曰：吾開金真法輪，運化諸因，有諸難得，惟形是難。夫至德身，亦為一國之域，利用招禍，心之能造，故通制包藏之境，由善惡之門，惟有至人知覺，得道無為，若能從之，諦受勿忘。

天尊告諸天聖衆曰：元氣輕微，運導不淳，本業易造，動至亡身，五心所起，十惡生焉，長淪毒刃，莫能覺乎，自受痛哉。吾為十方天人轉度生死之源，十善備立，悟其來生一切因緣，伏



承誠業，即得道真。

天尊告道君曰：吾開法輪上品，金真誠業，十善正本，萬行之門，爾若從之，咸當伏聽。於是道君稽手作禮，伏受誠文。

誠曰：一品正觀衆妙本，皆得神通業。二品正聽玄妙音，神通知十方。三品正知香光入，神通靈氣存。四品正音開妙門，神通利益無量果。五品正存法誠行，神通道真降。六品正念衆生苦，神通光明報。七品正想無二惑，神通正道界。八品正行大慈業，神通無上真。九品正定形影，不動衆行，神通妙覺。十品正具形神，剛明執正，神通玄妙。

天尊言：金真上品十正神通誠業，萬行之首，執正十方，無量通微之本。吾開法輪，故演其文，以度劫灾，生死諸滯，咸使從茲而轉，登乎長存，道真成就，終身不見十惡之門。

天尊言：金真本行十品，上善之功。一品斷五色貪利緣，正見不邪視。二品斷五音六塵之聲，內外無邪聽之

聞。三品斷六觸之因，邪氣不入。四品斷虛談假論，邪言綺語不前。五品斷衆禍之害，衆邪不侵。六品斷想五陰，邪惡不干。七品斷行非造作，邪灾不生。八品斷諸惑亂，衆邪不犯於物。九品斷無端之行，邪疾自消。十品斷十惡之業，常當心取法輪，萬魔邪神自却，無敢當矣。

天尊告道君曰：此是無上金真本行上品，澄真自鍊空寂，通稱上業，能如是者，金真可期矣。吾觀天人，萬無其一，自非至人，莫能從焉。

天尊言：金真觀行十品，常能如是者，萬善備立。一品見五色不貪者，淫風不行。二品聞五音不聽者，魔風自除。三品聞衆氣馨香不樂者，六府不傷，邪風自退。四品見五味不貪甘進者，衆塵不汙身。五品聞衆樂不觀者，即外塵惡風不驚。六品守一無諸假想者，終身不染，邪氣不生。七品舉動乘誠本行者，諸塵自消，形色光淨。八品見寶貨非橫不取者，萬善來臻，終身安存。九品和性無嫉無妬，見事不

觸者，萬福降真，靈魔禮焉。十品安身閑想，慈念一切宿命者，十方護身，高上奏功，克獲上真。

天尊告道君曰：吾開金真上品法輪誠業本行之由，十方天人，若能如是者，即與十聖齊功，得入長存法界，得道自然者也，終身光明，億劫同慶，福流萬代，常與法輪不絕矣。

天尊言：吾開法輪十聖之場，一品轉通，立能心知一方中輕重事，位次別覺聖；二品轉通，得知世界有無吉凶事，位次得覺聖；三品轉通，能達知罪福，一切宿命來往生處，果報由趣，位次正覺聖；四品轉通，能以心往見衆生心，逆照未然，禍福陰中事，位次通覺聖；五品轉通，普知十方無極世界一切緣運由趣休否事，位次大覺聖；六品轉通，通玄觀知悉達十方界域衆聖處所，只如指掌，分形散影，虛空無礙，位次妙覺聖；七品轉通，普知天地運趣機數，有無遠近，悉無障礙，位次洞覺聖；八品轉通，身居立忘，形如日中景，一切觀徹，位次觀覺聖；九

品轉通，普能開明，放身中寶光，普照十方，一切普見，上下無不洞達，位次普明大覺聖；十品轉通，普觀普察，普明普照，無幽無冥，洞知天地，光顯十方，湛然長存，位次洞明大覺至真大聖者也。斯行之業，皆從法輪而轉，八十通大聖，其德高妙，自非法輪之功，莫能轉焉。十聖果緣，乃從無量恒沙劫來，施功布德，備滿天地，弘廣十方，致得轉位，入十聖之功，妙通上品。夫十方天人，能如是者，道真成焉。

天尊即勅无上高上洞明大法王曰：可誦无上金真法輪誠業本行妙通轉位玉章，无上高上洞明大法王即起，作禮朝真，左迴三匝。

誦法輪誠業玉章頌曰：

湛寂法誠功，觀行極大乘。金真衆妙好，正位諸天朝。法輪无上德，皆轉无上真。神通六度外，飛天多福人。開度大梵仙，十品悉成真。巍巍自然道，逍遙大光天。念得恒沙劫，歷觀一切緣。自无上品業，何由拔苦根。

法輪本行上品玉章頌曰：

通觀十本源，朗朗凝成真。斷去十惡場，品行入法輪。內外香光起，倏忽登金真。一昇雲明宮，威光煥諸天。皆從本行起。稽首朝天尊。

法輪觀行玉章頌曰：

仰觀金真行，絕景無諸塵。形容七寶相，雲明照諸天。飄飄大乘境，飛天轉法輪。萬福同一慶，轉度十苦人。身登玉池上，沐浴鍊成仙。十方無孤魂，普開恒沙恩。妙通至真德，束首天寶前。

法輪轉通十聖洞明玉章頌曰：

无上開妙化，運功皆齊晨。法輪十位場，大羅諸法門。通稱大光品，十聖並高真。妙德轉十通，湛然十飛天。安和樂未央，普明昔往緣。命合長存壽，洞覺應自然。眇眇難爲雙，六時朝天尊。

天尊告道君曰：是四篇玉章，此乃是无上金真誠業之首，法輪轉通妙覺本行之源。其文封在无上玉都流明宮中，金真元君保賞，金靈童子、八千四百真常誦其章，聲響十方，嘯朗諸

天，羣真叉手稱善，至真朝焉，高上即開法輪上品，轉度十方諸得道大聖衆，以登无上金真者矣。夫是天人有知其章，受持修齋執誠，禮誦靈文者，靈音即上徹十方，九天稱慶，高上讚嘆，即開法輪之品，轉度其人，得登无上至真諸場。其道高妙，自非大光開運十方，莫能聞焉。

天尊言：吾開法輪十善諸場，一品慈孝順物，萬行同心；二品愛念一切衆生，皆如我身；三品信向經誠，罪福所由之源；四品能捨寶貨，布施天下無量諸人窮厄者；五品能廣建功德，營建道場，福因萬代；六品能守善而死，忍辱不殺不盜；七品能救濟一切厄急，無量衆生性命，捨放無窮，皆得存其本命；八品能供養三寶，晨夕禮誦，執戒持齋，恒無怠倦；九品常能開化天人，愛念國主，享祚長存，恒以財物潤益貧窮孤老、無量苦人，常無貪惜；十品行常使然，不進不退，一心行善。夫天人能如是者，即可謂十善之功，萬行同慶之本也。此皆是十方飛

天無極至真皇人無上誠業本行之源，天人能從之者，即以十方飛天無極至真齊功矣。

无上飛天法輪轉十善妙通玉章頌曰：

流明大範品，開道無量功。轉度十善行，梵景飛天堂。逍遙七寶宮，仰觀法輪王。靈顏絕妙好，常降十道場。齊駕三寶乘，運載諸天人。倏忽雲光發，衆相並金容。皆從斯福起，受位高上真。遊憩天寶臺，慶此劫數迴。三匝朝道主，稽首禮天尊。

天尊告道君曰：是玉章一篇，乃是十方无上金光童子各十真，鎮於飛天法輪天寶宮中，保賞靈文，常隨法輪十善品轉法輪，誦其章，以度十方諸天持行無量善人，策駕三乘寶乘，嘯誦其音，羣真讚和，震響十方，諸天設禮，莫不恭心，開津三界，三真奉迎，香華伎樂，營衛善人，直登法輪諸場矣。

天尊告道君曰：吾開法輪十善上品，咸使十方諸天人，皆去十惡諸場。其有如是行十惡者，爾莫從之行，其中

唱言快樂者，爾宜避之言。其欲來害者，爾但當一心念誠業，存真而受之殺，其理自不能有害我身，此即轉成无上至真者乎，其人自當殺報也。其有賢聖出者，爾當尋之，一覩神顏，萬劫常得其力矣。夫理甚微，故以上天十福堂以對下十惡場者也。

天尊言：法輪開度十惡諸場，一品不行慈孝之道，尊卑上下失禮，恒無和順之心相向；二品不行愛念衆生，常懷凶勃；三品不行信向心，快情所爲，作諸惡業，反逆君王；四品不行愛善，不捨不施，心常破傷他物，自言得快，無諸慈悲；五品不行建功德心，惟建非禍事爲樂；六品行不能忍辱，心常欺妄於他，萬端無信；七品不行救濟厄急心，常懷執著性，常願人墮惡道；八品不行恭敬經誠心，常謗毀天真，以入邪論，害生祭祀；九品不行利益心，常以財利割剔貧窮孤老，自貪潤己身；十品行常殺害無量衆生，淫欲無度，萬惡備立，進退疑惑，行常使然者，可謂十惡矣。斯行皆非天非地，止

由於心。夫上德至人，唯以十善爲功，常以己心爲十方飛天福堂，逕往法輪爲因緣，執持誠業，尋本行微，取果報上真之德，是以不經十苦，不入八難，不見煩惱，不履三塗也。夫下士諸人，唯以己心常爲執殺之官，逕尋地獄循環諸報，背十善，向十惡，行十苦，自以身投八難，往取煩惱之根，形履三塗之門，日有沉淪，億劫長罹塗炭，去福遠矣。吾開法輪，普度諸人矣。

无上飛天法輪轉十惡入妙通上品玉章頌曰：

鬱秀玉清，太無自然，蔭影十方，開津法輪，拔度八難，轉諸福天，流景冠帶，解滯胞根，積尸受鍊，滅惡通真，玉皇命召，十善並原，諸天稱慶，五老侍晨，帝君執符，齊送道前，飛天大囿，無量度人，劫劫承化，運載三乘，法王品位，無上至真，三元除惡，九夜光明，束身天寶，形登長存，妙德高上，洞明金真。

天尊告道君曰：是玉章鎮於飛天法輪右宮，十方玉童玉女各十真保賞

靈文，常隨法輪上品轉十惡諸場，遷度天人生死苦魂，咸使劫劫運化，常與法輪有緣。天人有知其章，修齋行香禮誦者，法王降真，道成不久矣。

天尊告道君曰：吾開法輪以轉十惡諸場，上品之福，其功無量，靜心絕想，此爲上德。聞樂不聞，浮華美色，此是十惡之根，形非長有，財不長存，道真无上，故開法輪。世界有欲尋真棄俗因緣，保固元氣，凝素自然，魔來忤者，慎口勿言，生惡起惑，終入法輪，障道者苦，後身如然。

天尊言：法輪開度十苦諸場，一品履刀山苦，二品上劍樹苦，三品入鑊湯苦，四品抱銅柱苦，五品卧鐵床苦，六品火車載入寒池苦，七品拘頭拔舌苦，八品吞火食炭苦，九品三官鎖械徒役，金槌鐵杖考掠苦，十品生身受鎖械，煩惱形殺苦。如是十方，有斯十苦，皆由先身集因所得。吾觀諸苦，塗炭難言，故開法輪，普度諸天，十方歡樂，原赦之焉，六道光明，法橋路通，一切同慶，道真降矣。

无上飛天法輪轉度十苦品玉章頌曰：

歷觀十方，無量罪根，流曳十苦，焦體爛壞，大小相牽，彌劫塗炭，毒刃傷身，沉沒九夜，望反甚難，方思十善，念是因緣，櫻承痛切，風刀往還，吞陰食毒，魂神無閑，仰視无上，飛天法輪，開度上品，轉諸昇遷，榮身玉庭，妙通十天，無極世界，洞識諸緣，修行誠業，稽首道前。

天尊告道君曰：是玉章鎮於飛天法輪中宮，十方丹靈童子各十真保賞靈文，常隨法輪上品轉度十苦諸場，開度天人生死，咸得法緣，天人有誦其章，上聞九天，法王命真來度之焉。

天尊告道君曰：吾開法輪以轉八難諸場，上品之功，無量法門。夫人心淨，十善降焉，生貪業惡，物心不淳，彼有懷惡，爾當善之，三元執法，近在身中，陰私皆結，以上奏諸天，考官速至，坐徵疾傷。試行上本，善當從之，無聞倒見，故知無緣，正具形神，晨夕恭心，道真下降，度爾福天。

天尊言：法輪開度八難諸場，一品受身出邊夷難，二品受身為奴婢下使難，三品受身出爲貧窮孤陋人難，四品受身六疾人難，五品受身愚癡，六根不具足難，六品受身鎖械，煩惱徒役難，七品受身出不孝不慈生亡難，八品受身出於無道國中難者也。夫是八難者，皆由先身集行所得，從十苦中出，方生八難中。但上德至人，常以十善以擬將來，往生十方無量福堂也。夫無明倒見者，恒以十惡爲本，故生亡十善，一生一死，億劫苦惱，恒出八難受報。吾開法輪，以度斯人矣。

无上飛天法輪轉八難上品玉章頌曰：

仰觀八門，輪轉罪田，受諸苦惱，形魂不閑，先無誠業，終身八難，無量罪門，一生一死，十惡往還，於是冥冥，受諸沉淪，飛天大赦，普轉法轉，高上八觀，洞開玉城，七寶宮臺，乘運相迎，雲明煥照，十方大庭，金容絕妙，雙光自生，策龍駕鳳，遊憩玉京，寶林羅列，身中光明，三羅自解，八難齊并。

天尊告道君曰：是玉章鎮於飛天法輪右玄臺上，十方靈光玉童玉女各十真保賞靈文，常隨法輪上品誦其章，轉度八難諸場，以暢天人生死之魂，咸得光明，普見法緣。夫天人有知其章，拔度存亡滯苦，齋而誦之者，諸天降下，即度兆生死命籍遷上長存之福堂矣。

天尊告道君曰：吾開法輪以轉三惡道之場，上品之福，無量羣生，悉令得轉度十方福堂，運化生天。斯惡深重，皆由先身害生萬物無量衆生之命，致生彼道，以報昔緣，一生一死，業對所因，今轉諸身，普入善根，自覺往生，一切因緣，生死蒙惠，莫不歡焉。

天尊言：法輪開度三惡道諸場，一品地獄幽閉塗炭，二品餓鬼自相食噉煩惱之苦，三品畜生同類怨對相擊之毒。夫如斯等，衆生若反化，即生三惡中，一品生蟲中，二品生鳥中，三品生獸中者矣。先身行業，元逆之本，其罪負重，致招斯惡，彌劫聚集，應得是報。吾開上品無量法輪，普拔斯惡，以

還福門。

无上飛天法輪轉三惡道上品玉章頌曰：

歷觀十方中，無極世界人。豪貴不畏罪，快意害衆生。興伐逆國主，不顧後身櫻。罪滿九河內，形履刀山庭。舉手循劍樹，流血落如星。坐待鑊湯煮，鐵錐刺身形。迴身入餓鬼，只聞悲哭聲。仰頭看鐵網，足立流火庭。六畜相割剔，以報昔往生。但見十福天，乘景負圓明。逍遙三界外，方念三寶經。法王萬善行，普開無量功。轉度三惡道，受鍊十天仙。身生五色光，妙覺諸惡緣。一超三便去，閑居十飛天。

天尊告道君曰：是玉章鎮於飛天法輪上品玉城中，十方法法輪玉童玉女各十真保賞靈文，常隨高上上品法輪誦其章，轉度三惡苦道諸場，以鍊滯尸苦骸，咸得光鮮，普登十天福堂。天人知其章，命過之日，齋而誦之，魂爽即不過三惡，逕昇十方品入法輪者也。

天尊告道君曰：吾開法輪，以轉十邪不正道諸場，上品之行。夫衆生

貪欲，萬端無厭，自以身命投於十惡，纏骸苦想，自役罪狀，釁滿天地，形名作道，非法妄生，淫佚邪氣，生無善教，死必有重考，億劫委身屠割，生死往還，長處盲道，終身邪言，疾病櫻苦，終歸八門，吾開法門，普轉還入道真。

天尊言：法輪開度十邪惡道諸場，一品背正入鬼道，終身生邪魅，永嬰諸疾苦，受報無窮期。二品輕毀道法，將入邪徑，信順邪言，謗道欺師。三品不信道真，捨身入鬼魅。四品無明倒見，衆生常懷五濁，執結魔魅，自稱聖名，以亂正道。五品常生殺害，淫祀鬼魅，詐稱神真，貪味甘美，種種無端。六品因人休否，假稱正神，責望天人，受取無厭，噉食無度。七品魔魅衆生，遊行世界，或作邪譎鬼語，自稱道神，伺人衰厄，妄言占相。八品衆生觸法邪見，一心背真入偽，承事鬼神形像，師巫之徒。九品淫亂宗親，生邪苦想，行不正法。十品棄正法，往入魔徑邪道，噴囂欺誘天人，自稱賢聖，放蕩非法，陰私逆順，爲人咒誓，魔禱國王，

指天畫地，殺害衆生，真偽無別，以稱天真。夫如斯者，自取十苦八難，集因爲惡，煩惱中生，塗炭九幽，執罰無生。吾開飛天無量之恩，普拔生死一切罪因，同得免脫十邪惡道之根，普登十方，長存福天，身受威光，永超法輪。

无上飛天法輪轉十邪惡道上品玉章頌曰：

眇眇飛天堂，煥朗曜上清。景王降寶乘，策駕十道場。但見諸邪道，墮墜地獄中。洋銅以灌口，裸身劍樹峰。巨天飛刀割，鐵錐刺心肝。饑餐流火精，負石踐刀山。不見福樂處，唯聞塗炭聲。仰觀十正道，形光負圓明。安坐寶林內，妙相自然生。高上轉法輪，普度諸邪形。開津五道界，超步南陵庭。身詣玉池鍊，寶光身中生。飄飄太虛上，三匝禮真經。

天尊告道君曰：是玉章鎮於十方飛天雲明上宮，十方丹童玉女各十真保賞靈文，常隨法輪轉運誦其章，轉度十邪道諸場，以解天人積滯之苦，普入法門者也。天人有知其章者，思念存

亡之苦，齋而誦之，苦魂即得超神十方矣。

天尊告道君曰：吾開法輪十正道諸場，上品本行之首，夫廣幽理顯，有是業力，但澄真甚難物色，不淳受學者精集，因至道玄象者希，合道應真，其理微簡，可謂自然，九萬劫一降，爾議思焉，吾開真寶，轉運法輪，劫災不動，天地存焉。

天尊言：法輪開十正道諸場，一品遠惡離邪道，觀行無爲，通建福因，執心明淨，不行陰賊。二品尋真求道，信向大經，持誠入法，通行陰德。三品不邪不偽，常行正法，一心守道。四品愛念衆生，常得安存，同入法輪。五品慈念萬物，恭敬國王，普天隆盛，三寶弘化。六品修學上道，捨身棄世，一無假想滯惑。七品起動乘誠，言無假說。八品開導天人，流暢法音，廣宣道教，增廣無量。九品萬範同正，普弘十方，慈善一切。十品法輪開張，普度天人，衆生同慶，皆入正道，執心剛明者也。夫是十正道上品，唯有上德至人，能行

之矣。吾開十方無量法門，普濟無偏，一入正道，去邪日遠，道真无上，與法結緣者焉。

无上飛天法輪開十正道上品玉章頌曰：

紫虛勃煙，中有玄臺。流明瓊闕，七寶自然。煥朗十方，彌覆諸天。无上法輪，轉度十方。正道明開，元皇符命。飛天至真，浮空稱善。玉帝侍身，左右金童。歷觀諸緣，玄化大運，齊真道前。

天尊告道君曰：是玉章鎮於无上金真玄宮，十方金童玄女各十真保賞靈文，常隨大運轉十方正道法輪，誦其章，聲參十方，九天元皇叉手以稱慶，无上玉皇稽首作禮，即大光法門，以度諸天，無極世界，萬兆一切衆生，悉得身登十正道福堂，皆合道真矣。諸天大聖至真有知其章，齋而誦者，皆得開度衆生諸苦，亦可保劫不動，安固靈根者焉。

天尊告道君曰：吾開法輪十轉諸場，上品無量至真之本業，自非法輪，

莫能轉焉。存真守道，以期斯衆，自始劫以來，得道者皆入法門，修學上德，位極至真，未見安豪守貴，而望生天者矣。吾觀十方衆生，執結甚多，財寶雖貴，終不能使人得道，聚積珍寶，必有餘殃，安貧樂道，其實寶真，道成之日，道主降兆矣。身披九光寶帔，七色飛羅之裙，頭戴通天寶冠，足著玉文獅子之履，項負雙炎天光，上蓋流明寶蓋，身登七寶之輦，駕乘金龍，超越无上帝界，鬱鬱羽儀，威光芳飭，梵行太虛，左右天真，手把十絕靈幡，諸天各各奉獻自然妓樂，燒香散華，彌翳十方，衆真下降迎兆，玉清天寶受位，長存金真。當爾之時，實自樂焉。斯人皆是安貧守道，使得如然，世緒華盛，不足貪乎。身役十惡，財即散焉，巨億之財，終爲毒門。吾開法輪，普告十方，飛天至真，開度十方，無量世界，一切衆生，咸得成就齋功十轉真人矣。

天尊言：法輪開十轉至真諸場，一品受持誠者，即爲地仙；能修行法誠，轉位入第二品中，得爲遊仙；倍向

正心者，轉位入第三品中，得爲仙人；奉行誠業者，轉位入第四品中，得爲飛仙；常從經誡，不犯衆行者，轉位入第五品中，得爲靈仙；絕口斷貪味，長齋誦經執誠者，轉位入第六品中，得爲神仙；若能無色貪欲，平等行諸功德，捨心抱素者，轉位入第七品中，得爲真仙；建心廣念十方，常行救厄，口無過行，濟物無偏者，轉位入第八品中，得爲飛天真人；守一不動，持行萬善，敬念法誠，常如對神者，轉位入第九品中，得爲太上真人；恒能餐霞飲炁，苦行修道，誦經行香，朝真開化十方，普濟無量衆生，惠潤天地，常無怠倦者，轉位入第十品中，得爲无上帝清真人者也。夫物自無心耳，但能行八誠者，以得十方飛天齊功，況於持十誠業本行也。但未劫衆生，惟能破誠，豈有能修者乎。夫人五濁，羸行甚多，至人受持，以將擬終身之寶，羸人受取，以望世之高位，破滅十善之行，自以擬長還十惡之道，但夫人自負道，非道負人矣，未見有心者求而不得焉。

无上金真法輪十轉上品玉章頌  
曰：  
大圍開化，上有寶城，玄虛而治，元一洞明，八方玉樹，七寶羅生，靈風應節，衆音和聲，中有法輪，號曰法王，高上所寶，玉皇高尊，金真妙德，降下飛天，歷觀十方，無量罪因，轉度上品，拔諸苦緣，身免十惡，得入法門，形脫鋒刃，爽得真仙，十轉無上，妙通自然，至真諸場，長存道真。

无上金真誠業歷觀十方妙通玉章頌曰：

遊觀諸天，中有三羅，鐵網八據，流火飛車，鋒刃楚撻，萬痛交行，頭首分裂，苦哉自傷，一生一死，輪轉惡場，泣涕流血，無復人形，塗炭彌劫，不識命根，命命相對，種種相牽，十善閑靜，蕭條十天，衣厨無爲，救諸無緣，金真開法，普放威光，流激天地，照明十方，演誠度人，業力大功，十苦解脫，沐浴金容，通覺本行，三羅豁通，高上轉位，身登寶宮，上朝道主，稽首三週。

无上金真誠業本行上品玉章頌

曰：雲明鬱秀，流煥十方，金晨映發，蔭藹玉堂，七寶凝結，八會澄靈，玄覆三象，自然靈清，天光朗徹，普照諸形，元始萬行，誠業爲宗，把持法輪，弘化諸功，無量本行，萬範因緣，至真通稱，衆法靈根，乘虛躡空，與之通津，元皇上寶，故鎮法輪，三界開道，駕景紫烟，羽蓋垂覆，上謁天尊。

天尊告道君曰：是三偈玉章，鎮於无上大有玉都，无上金真童子萬二千真保賞靈文，常隨劫運轉十方諸天十轉真人上品法輪。方誦其章，靈音激響，十方無極世界諸天高真一時設禮，無上至真稱善，法王告召，普開法門，品度萬生，皆得道真。諸天大聖至真，有知其章，齋而誦之者，十方天真降下，六時朝矣，萬結自散，不久道成焉。

天尊告道君曰：吾開無上金真法輪，誠業本行十二無量上品因緣，輪轉妙通至真諸場，斯經上業，無所不通，普爲法輪，灌頂衆淵，十方輪轉，開度無量萬生罪惡，入諸福場。金真誠行，

致得長存，其道高妙，普救無窮，飛天上寶，不傳諸仙，自然應運，其文洞煥，無所不通矣。天地運化，皆由法輪，其功无上，自非上德至人，莫能奉焉。上聖轉位，以成高真，悉從其文。萬惡迴善，解滯拔苦，除罪降福，皆由是經。廣濟十方，弘教諸天，其德大通，其道普真，運駕三乘，度諸無量。吾演是經，以付子之奉行，九劫一降，飛天玉庭，依品開度，不以爲難矣。

天尊告道君曰：吾開無上飛天法輪上品諸場，以擬五濁之劫。一品十方無極世界灾兵殺伐濁；二品劫運短促，日月虧盈濁；三品陰陽逆順，星宿失度，萬物不生濁；四品五方鬼兵交會，殺害天人無量生亡濁；五品國政凶亂天人，兵甲煩惱濁者矣。子若見此五濁之世，善當依法法輪之品，開度轉運，保固萬品，咸使天地、日月、星宿各復其位，安鎮萬國，皆得存焉。

天尊告道君曰：吾開无上飛天法輪上品諸場，以擬三灾之劫，轉度十方無極世界萬生，皆使得免脫劫難，故以

三乘寶藏以度之矣。一品劫火流行，三界同然；二品洪水激溢，八極溟合，涌波滔天；三品暴風彌劫，震裂衝天，十方淪沒，萬無一遺。此是大運應期，名曰三灾，如是之時，子勤用心轉法輪，開三乘上品，以度天人之灾，咸使安存，得見太真。

天尊告道君曰：隱顯六塵，觸視玄根，魔氣形色，聽者空生，雲門晨昏，夕翳身心，不存物想，最苦招禍。神童知者不動，彼惡自傷，非法所行，偽黠相同，萬善一棄，終身莫及，害一對十，萬劫無生，手殺與想，同況於伐人命乎。金真上品誠業，善當從之矣，萬稱之由，本行爲先也。

天尊告道君曰：夫轉法輪開度上品，當用金龍十枚，各重一兩，以鎮十方，紋繒各隨方，東方碧紋九尺，南方絳紋三尺，西方白紋七尺，北方皂紋五尺，四維紫紋各八尺，上方青紋丈二，下方黃紋丈四，十方香案香鑪各十枚。建壇法依三元塗炭，禮謝皆法三元拔罪品，三重然燈，外壇方各十燈，中壇



方各八燈，上壇方各九燈，皆如法品。三寶鎮壇，三日三夜，法衆行香誦經，發露大謝，轉飛天法輪明科，以開度十方萬生罪根滯苦，十惡諸場，咸使遷進十方飛天無量福堂矣。

天尊告道君曰：夫天人修真上道，可自依法修建，是法開度十方幽廣生死苦魂，並及祖考諸罪，皆得轉度十福堂也。若見天地運度，亦當建是大功；若見日月虧盈，亦當修建是齋；星宿錯度，亦當修建是齋；諸天國土不寧，亦當修建是齋；天下鬼兵興亂，萬兆死亡，陰陽不調，亦當修建是齋；師徒厄急，命過之日，亦當修建是齋者也。夫是法輪上品齋業，無量大功，十方得道，莫不從之，以得至真諸場。上聖修行是功，轉位得爲金真，諸天修建是齋，真仙自然開度萬生，普弘法門。生死因緣，皆由法輪，其法高妙，无上所寶，九劫一轉，天地洞明，無量生死，齊得福慶，光明十方，普得長存。夫天人上德至人有知其法，受持開化法門，修建是功者，道真克成矣。

天尊言：法輪上品，運載十方，无上至真妙道誠業，普會無窮，玄覺一切，無量本行，萬範因緣，洞觀天地，普入法門。業惡行惡，沉形九夜者，吾轉法輪，咸使得仙，衆生反化，以生人天。法輪運道，九萬劫一傳，自非高上玉皇之儔，莫能降真。吾今相告，封著中宮，諦受奉行，須擬劫災，依法上品，轉度諸天，十方無極世界，一切萬生，同得法緣，普見大光開運，覺觀道真。其功廣明，弘道三乘，衆法之母，至真之尊，普爲十方之光景，是爲天地萬道之宗。其福无上，湛然長存，大劫方降，普見道真，普度衆生，皆登十方，常住福天。爾受法王上位，勤當用心。於是道君即起，叉手作禮，奉受金真法輪誠業本行上品。事竟，元一天尊勅諸大聖衆策駕而去，諸天復位，億劫長存。

道言：吾受無上金真法輪誠業本行，長存上品，無量因緣，自從洞明劫始已來，開運度十方無極世界無量恒沙衆生生死苦魂，迴化十惡，拔諸罪

根，解羅出滯，煩惱諸場，咸得同詣玉池鍊形，冠帶寶服光明，十住福堂。其功隨運而轉，自非玄覺，莫能降焉，其文舊典萬道勢訖，其道方行，晨暉八會，當是其時，雲明下降，以保劫災，若有福德之國，先得道真者矣。

太上洞玄靈寶誠業本行上品妙經

（汪桂平點校）

# 021 太上洞玄靈寶三元無量壽經

經名：太上洞玄靈寶三元無量壽經。撰人不詳，約出於南北朝或隋唐。言修行觀慧之法。一卷。底本出處：《正統道藏》洞玄部本文類。

爾時太上道君於三元宮中大會說法，衆內有一真人名曰儀可，則智力無畏，從座而起，雅步前跪，諮論請訣：不審一切諸法，從何而生。既得生已，云何觀行而得成道。作是語已，儼然而立。

太上道君撫几微笑曰：夫三界諸法，皆從道生，若欲求道，當修觀慧。觀慧增益，漸至常道。常道無邊，行亦非一。子欲知之，當一心聽，有數十事，不可稱量。何謂爲數十事。一者

智慧遠身行法，不可稱量。二者慈悲遠身行法，不可稱量。三者含忍遠身行法，不可稱量。四者行功遠身行法，不可稱量。五者修心遠身行法，不可稱量。六者善業遠身行法，不可稱量。七者精進遠身行法，不可稱量。八者飾身遠身行法，不可稱量。九者遣情遠身行法，不可稱量。十者普心遠身行法，不可稱量。是爲十種遠身行法。

太上曰：復有十種離口過法，不可稱量。何等爲十種離口過法。一者智慧離口過法，不可稱量。二者慈悲離口過法，不可稱量。三者含忍離口過法，不可稱量。四者行功離口過法，不可稱量。五者修心離口過法，不可稱量。六者善業離口過法，不可稱量。七者精進離口過法，不可稱量。八者飾身離口過法，不可稱量。九者遣情離口過法，不可稱量。十者普心離口過法，不可稱量。是爲十種離口過法。

太上曰：復有十種除惡想法，不可稱量。何等爲十種除惡想法。一者智慧除惡想法，不可稱量。二者慈悲

除惡想法，不可稱量。三者含忍除惡想法，不可稱量。四者行功除惡想法，不可稱量。五者修心除惡想法，不可稱量。六者善業除惡想法，不可稱量。七者精進除惡想法，不可稱量。八者飾身除惡想法，不可稱量。九者遣情除惡想法，不可稱量。十者普心除惡想法，不可稱量。是爲十種除惡想法。

太上曰：復有十種拔速根法，不可稱量。何等爲十種拔速根法。一者智慧拔速根法，不可稱量。二者慈悲拔速根法，不可稱量。三者含忍拔速根法，不可稱量。四者行功拔速根法，不可稱量。五者修心拔速根法，不可稱量。六者善業拔速根法，不可稱量。七者精進拔速根法，不可稱量。八者飾身拔速根法，不可稱量。九者遣情拔速根法，不可稱量。十者普心拔速根法，不可稱量。是爲十種拔速根法。

太上曰：復有十種絕聲色法，不可稱量。何等爲十種絕聲色法。一者智慧絕聲色法，不可稱量。二者慈悲絕聲色法，不可稱量。三者含忍絕聲

色法，不可稱量。四者行功絕聲色法，不可稱量。五者修心絕聲色法，不可稱量。六者善業絕聲色法，不可稱量。七者精進絕聲色法，不可稱量。八者飾身絕聲色法，不可稱量。九者遣情絕聲色法，不可稱量。十者普心絕聲色法，不可稱量。是爲十種絕聲色法。

太上曰：復有十種儉愛欲法，不可稱量。何等爲十種儉愛欲法。一者智慧儉愛欲法，不可稱量。二者慈悲儉愛欲法，不可稱量。三者含忍儉愛欲法，不可稱量。四者行功儉愛欲法，不可稱量。五者修心儉愛欲法，不可稱量。六者善業儉愛欲法，不可稱量。七者精進儉愛欲法，不可稱量。八者飾身儉愛欲法，不可稱量。九者遣情儉愛欲法，不可稱量。十者普心儉愛欲法，不可稱量。是爲十種儉愛欲法。

太上曰：復有十種放翫習法，不可稱量。何等爲十種放翫習法。一者智慧放翫習法，不可稱量。二者慈悲放翫習法，不可稱量。三者含忍放翫習法，不可稱量。四者行功放翫習法，

不可稱量。五者修心放翫習法，不可稱量。六者善業放翫習法，不可稱量。七者精進放翫習法，不可稱量。八者飾身放翫習法，不可稱量。九者遣情放翫習法，不可稱量。十者普心放翫習法，不可稱量。是謂十種放翫習法。

太上曰：復有十種洗垢穢法，不可稱量。何等爲十種洗垢穢法。一者智慧洗垢穢法，不可稱量。二者慈悲洗垢穢法，不可稱量。三者含忍洗垢穢法，不可稱量。四者行功洗垢穢法，不可稱量。五者修心洗垢穢法，不可稱量。六者善業洗垢穢法，不可稱量。七者精進洗垢穢法，不可稱量。八者飾身洗垢穢法，不可稱量。九者遣情洗垢穢法，不可稱量。十者普心洗垢穢法，不可稱量。是謂十種洗垢穢法。

太上曰：復有十種無昏惑法，不可稱量。何等爲十種無昏惑法。一者智慧無昏惑法，不可稱量。二者慈悲無昏惑法，不可稱量。三者含忍無昏惑法，不可稱量。四者行功無昏惑法，不可稱量。五者修心無昏惑法，不可稱量。

稱量。六者善業無昏惑法，不可稱量。七者精進無昏惑法，不可稱量。八者飾身無昏惑法，不可稱量。九者遣情無昏惑法，不可稱量。十者普心無昏惑法，不可稱量。是謂十種無昏惑法。

太上曰：復有十種不淫想法，不可稱量。何等爲十種不淫想法。一者智慧不淫想法，不可稱量。二者慈悲不淫想法，不可稱量。三者含忍不淫想法，不可稱量。四者行功不淫想法，不可稱量。五者修心不淫想法，不可稱量。六者善業不淫想法，不可稱量。七者精進不淫想法，不可稱量。八者飾身不淫想法，不可稱量。九者遣情不淫想法，不可稱量。十者普心不淫想法，不可稱量。是謂十種不淫想法。

太上曰：復有十種不疑空法，不可稱量。何等爲十種不疑空法。一者智慧不疑空法，不可稱量。二者慈悲不疑空法，不可稱量。三者含忍不疑空法，不可稱量。四者行功不疑空法，不可稱量。五者修心不疑空法，不可稱量。六者善業不疑空法，不可稱量。

七者精進不疑空法，不可稱量。八者飾身不疑空法，不可稱量。九者遣情不疑空法，不可稱量。十者普心不疑空法，不可稱量。是謂十種不疑空法。

太上曰：復有十種平好醜法，不可稱量。何等爲十種平好醜法。一者智慧平好醜法，不可稱量。二者慈悲平好醜法，不可稱量。三者含忍平好醜法，不可稱量。四者行功平好醜法，不可稱量。五者修心平好醜法，不可稱量。六者善業平好醜法，不可稱量。七者精進平好醜法，不可稱量。八者飾身平好醜法，不可稱量。九者遣情平好醜法，不可稱量。十者普心平好醜法，不可稱量。是謂十種平好醜法。

太上曰：復有十種不邪還法，不可稱量。何等爲十種不邪還法。一者智慧不邪還法，不可稱量。二者慈悲不邪還法，不可稱量。三者含忍不邪還法，不可稱量。四者行功不邪還法，不可稱量。五者修心不邪還法，不可稱量。六者善業不邪還法，不可稱量。七者精進不邪還法，不可稱量。八者

飾身不邪還法，不可稱量。九者遣情不邪還法，不可稱量。十者普心不邪還法，不可稱量。是謂十種不邪還法。

太上曰：復有十種常住無法，不可稱量。何等爲十種常住無法。一者智慧常住無法，不可稱量。二者慈悲常住無法，不可稱量。三者含忍常住無法，不可稱量。四者行功常住無法，不可稱量。五者修心常住無法，不可稱量。六者善業常住無法，不可稱量。七者精進常住無法，不可稱量。八者飾身常住無法，不可稱量。九者遣情常住無法，不可稱量。十者普心常住無法，不可稱量。是謂十種常住無法。

太上曰：復有十種絕心想法，不可稱量。何等爲十種絕心想法。一者智慧絕心想法，不可稱量。二者慈悲絕心想法，不可稱量。三者含忍絕心想法，不可稱量。四者行功絕心想法，不可稱量。五者修心絕心想法，不可稱量。六者善業絕心想法，不可稱量。七者精進絕心想法，不可稱量。八者飾身絕心想法，不可稱量。九者遣情

絕心想法，不可稱量。十者普心絕心想法，不可稱量。是謂十種絕心想法。

太上曰：復有十種習悉意法，不可稱量。何等爲十種習悉意法。一者智慧習悉意法，不可稱量。二者慈悲習悉意法，不可稱量。三者含忍習悉意法，不可稱量。四者行功習悉意法，不可稱量。五者修心習悉意法，不可稱量。六者善業習悉意法，不可稱量。七者精進習悉意法，不可稱量。八者飾身習悉意法，不可稱量。九者遣情習悉意法，不可稱量。十者普心習悉意法，不可稱量。是謂十種習悉意法。

太上曰：復有十種善防言法，不可稱量。何等爲十種善防言法。一者智慧善防言法，不可稱量。二者慈悲善防言法，不可稱量。三者含忍善防言法，不可稱量。四者行功善防言法，不可稱量。五者修心善防言法，不可稱量。六者善業善防言法，不可稱量。七者精進善防言法，不可稱量。八者飾身善防言法，不可稱量。九者遣情善防言法，不可稱量。十者普心善防

言法，不可稱量。是謂十種善防言法。

太上曰：復有十種不亂轉法，不可稱量。何等爲十種不亂轉法。一者智慧不亂轉法，不可稱量。二者慈悲不亂轉法，不可稱量。三者含忍不亂轉法，不可稱量。四者行功不亂轉法，不可稱量。五者修心不亂轉法，不可稱量。六者善業不亂轉法，不可稱量。七者精進不亂轉法，不可稱量。八者飾身不亂轉法，不可稱量。九者遣情不亂轉法，不可稱量。十者普心不亂轉法，不可稱量。是謂十種不亂轉法。

太上曰：復有十種不悟念法，不可稱量。何等爲十種不悟念法。一者智慧不悟念法，不可稱量。二者慈悲不悟念法，不可稱量。三者含忍不悟念法，不可稱量。四者行功不悟念法，不可稱量。五者修心不悟念法，不可稱量。六者善業不悟念法，不可稱量。七者精進不悟念法，不可稱量。八者飾身不悟念法，不可稱量。九者遣情不悟念法，不可稱量。十者普心不悟念法，不可稱量。是謂十種不悟念法。

太上曰：復有十種不彼念法，不可稱量。何等爲十種不彼念法。一者智慧不彼念法，不可稱量。二者慈悲不彼念法，不可稱量。三者含忍不彼念法，不可稱量。四者行功不彼念法，不可稱量。五者修心不彼念法，不可稱量。六者善業不彼念法，不可稱量。七者精進不彼念法，不可稱量。八者飾身不彼念法，不可稱量。九者遣情不彼念法，不可稱量。十者普心不彼念法，不可稱量。是謂十種不彼念法。

太上曰：復有十種不悠想法，不可稱量。何等爲十種不悠想法。一者智慧不悠想法，不可稱量。二者慈悲不悠想法，不可稱量。三者含忍不悠想法，不可稱量。四者行功不悠想法，不可稱量。五者修心不悠想法，不可稱量。六者善業不悠想法，不可稱量。七者精進不悠想法，不可稱量。八者飾身不悠想法，不可稱量。九者遣情不悠想法，不可稱量。十者普心不悠想法，不可稱量。是謂十種不悠想法。

太上曰：復有十種無常定法，不可稱量。何等爲十種無常定法。一者智慧無常定法，不可稱量。二者慈悲無常定法，不可稱量。三者含忍無常定法，不可稱量。四者行功無常定法，不可稱量。五者修心無常定法，不可稱量。六者善業無常定法，不可稱量。七者精進無常定法，不可稱量。八者飾身無常定法，不可稱量。九者遣情無常定法，不可稱量。十者普心無常定法，不可稱量。是謂十種無常定法。

太上曰：復有十種無常定法，不可稱量。何等爲十種無常定法。一者智慧無常定法，不可稱量。二者慈悲無常定法，不可稱量。三者含忍無常定法，不可稱量。四者行功無常定法，不可稱量。五者修心無常定法，不可稱量。六者善業無常定法，不可稱量。七者精進無常定法，不可稱量。八者飾身無常定法，不可稱量。九者遣情無常定法，不可稱量。十者普心無常定法，不可稱量。是謂十種無常定法。

太上曰：復有十種無常顧法，不可稱量。何等爲十種無常顧法。一者智慧無常顧法，不可稱量。二者慈悲無常顧法，不可稱量。三者含忍無常顧法，不可稱量。四者行功無常顧法，不可稱量。五者修心無常顧法，不可稱量。六者善業無常顧法，不可稱量。七者精進無常顧法，不可稱量。八者飾身無常顧法，不可稱量。九者遣情無常顧法，不可稱量。十者普心無常顧法，不可稱量。是謂十種無常顧法。

智慧無常顧法，不可稱量。二者慈悲無常顧法，不可稱量。三者含忍無常顧法，不可稱量。四者行功無常顧法，不可稱量。五者修心無常顧法，不可稱量。六者善業無常顧法，不可稱量。七者精進無常顧法，不可稱量。八者飾身無常顧法，不可稱量。九者遣情無常顧法，不可稱量。十者普心無常顧法，不可稱量。是謂十種無常顧法。

太上曰：復有十種不追懷法，不可稱量。何等爲十種不追懷法。一者智慧不追懷法，不可稱量。二者慈悲不追懷法，不可稱量。三者含忍不追懷法，不可稱量。四者行功不追懷法，不可稱量。五者修心不追懷法，不可稱量。六者善業不追懷法，不可稱量。七者精進不追懷法，不可稱量。八者飾身不追懷法，不可稱量。九者遣情不追懷法，不可稱量。十者普心不追懷法，不可稱量。是謂十種不追懷法。

太上曰：復有十種無猶豫法，不可稱量。何等爲十種無猶豫法。一者智慧無猶豫法，不可稱量。二者慈悲

無猶豫法，不可稱量。三者含忍無猶豫法，不可稱量。四者行功無猶豫法，不可稱量。五者修心無猶豫法，不可稱量。六者善業無猶豫法，不可稱量。七者精進無猶豫法，不可稱量。八者飾身無猶豫法，不可稱量。九者遣情無猶豫法，不可稱量。十者普心無猶豫法，不可稱量。是謂十種無猶豫法。

太上曰：復有十種忍不可忍法，不可稱量。何等爲十種忍不可忍法。一者智慧忍不可忍法，不可稱量。二者慈悲忍不可忍法，不可稱量。三者含忍忍不可忍法，不可稱量。四者行功忍不可忍法，不可稱量。五者修心忍不可忍法，不可稱量。六者善業忍不可忍法，不可稱量。七者精進忍不可忍法，不可稱量。八者飾身忍不可忍法，不可稱量。九者遣情忍不可忍法，不可稱量。十者普心忍不可忍法，不可稱量。是謂十種忍不可忍法。

道言：夫洞玄經者，蓋天地之源，道德之宗，上聖所尊貴，鬼神所畏伏。其高則出九天之上，其深則通九地之

下。千變萬化，道盡於此。若復有人能於此經受持讀誦，心無懈怠，即得生無量智慧，增無量善因，滅無量業障，消無量煩惱，延無量壽筭，長無量福田。世世歡榮，生生快樂。恒須恭敬，抄寫流傳，利益衆生，是爲無量，真人聞說，信受奉行。

太上洞玄靈寶三元無量壽經

（郭清點校）

# 022 太上洞玄靈寶三元

## 玉京玄都大獻經

經名：太上洞玄靈寶三元玉京玄都大獻經。原不題撰人。唐玄嶷《甄正論》稱此經為『道士劉無待造，以擬孟蘭盆』。原本一卷，收入《正統道藏》洞玄部本文類，係注疏本。另有敦煌S.3061號殘寫本，無注疏。今以《道藏》本為底本，以敦煌本參校①。

若夫至人妙本，出萬象之先，大聖深源，超六合之外。不生不滅，視聽之所未階，無待無為，形名之所不及。雖窈冥玄絕，而能應化無方，眇邈虛冲，而實濟益斯在。若乃現金容於玉闕，示百萬之法身，備玉簡於玉京，開五方之要典，莫不橋梁庶類，開悟羣迷，應感赴緣，逗機行化。至

如今靈寶妙本，理淨平夷，但一切衆生，違真喪實，虛想妄見，縱蕩六情，方纏愛網，遂使業淪五濁，苦海所以無邊；流浪三塗，生死於茲浩漫。自非至人引導，無由出苦。在我大

聖天尊，智周空有，位過寰極，道貫大羅，闢衆妙之門，洞重玄之境，能以慈悲救物，常善度人。故乃託跡西那，現山陽而演教桑林之下。薦寶玉以粧嚴，發奇瑞於雲霞，散靈香於淨域。遍開妙相，含笑而吐五光；匝照諸天，朗神輝於十界。愍諸惡趣受苦衆生，幽厄三塗，沈纏八難，因道君之請問，告惡對之緣由，說禍福之前徵，論拔贖之功行。故演此玄都大獻之法，以教人天。普願五道還除罪源，將令四生復保命籍。

此經題云《太上洞玄靈寶三元玉京玄都大獻經》。夫經者，感應為宗，慈救為體，願行為用。然今題釋，詳略不同，或汎解二乘，或約陳三寶，皆是後人臆度，非關題經本意。今

研窮名理，考尋事跡，舉其指要，以成一字，仍於題中分為二別。所言二者，前六字是通題，後八字明其別題。既前通題之中，又分為二。初太上二字，舉天尊聖號，明能說之聖人。次洞玄靈寶四字，顯至教之深名，明所說之正法。初舉天尊聖號者。太者，泰也。極大之尊名，以明其體。上者，尚也。窮高之美稱，以語其德。明天尊德高無上，體大無窮，德體雙陳，故云太上。次明所說之正法洞玄經者。洞者，通也同也。玄者，深也遠也。言此經妙理深澄，真途寥廓，通而無礙，同而不隔，是其洞也。深而難測，遠而莫窮，是其玄也。故曰洞玄。靈寶者，靈變不測之義。寶者，寶重珍貴之名。言此妙經，理致幽玄，靈變不測，勸令行者，皆可寶持。故德經云：我有三寶，寶而持之。即其義也。次明別題者，又分為二。前三元至大獻八字，明目經意由。後經一字，明法教之通稱。明目經意由者，三

元方欲顯明善惡之報，懲勸之妙法，故述上元、中元、下元以曉之。言一切衆生，生死命籍，善惡簿錄，普皆係在三元九府，天地水三官，考校功過，毫分無失。所言三元者，正月十五日為上元，即天官檢勾。七月十五日為中元，即地官檢勾。十月十五日為下元，即水官檢勾。一切衆生，皆是天地水三官之所統攝。所以正月十五日為上元，天官校錄者。十一月一陽生，正月三陽生，三陽成乾。乾者，天之用也。正月天道數成，故一切天官主當校錄。所以七月十五日為中元，地官檢錄者。五月一陰生，六月二陰生，七月三陰生，三陰成坤。坤者，地之用也。七月坤氣王周，故一切地官主當校錄。所以十月十五日為下元，水官校錄者。十月建亥，亥屬北方，北方是坎，坎是水位，正是水司建王之時，故一切水官主當校錄。又三元者，元本也。但此上三官，為萬物之本，故曰三元。玉京者，三清妙境之

山名。玄都者，大羅天中之官號。大獻者，此經普校人天，做學玄都大獻之法，拔贖一切亡靈，願行該廣，故稱大獻。明天尊慈憐兆庶，故發神光。道君愍念羣生，為轉經法，具陳天地水官，三官九府百二十曹，四司五帝考錄諸官，各以三元之晨，上詣玄都宮內，校定人天善惡，分別生死簿書，所有善功，咸蒙記錄，冥司謫罰，並無收贖。拔度之宜，經文具載。故上從天子，下及兆人，若能遇此寶經，依文修選，採諸花果百味芬芳，備盡人間珍奇異物，列情勵志，造大獻盤，種種裝嚴，虔心供養，十方衆聖，鑒照分明，三代天尊，流恩授受，此乃目經意由也。後明法教之通稱者，尋三洞真文，七部玄教，討其題目，僉號曰經。是知經者，法教之總名，至人之洪範。經之為美，其大矣哉，蓋羣品之舟航者也。但經乃多種，大略有三。一者五德三元，凝空雲篆，垂芒八角，祕妙之文。二者青林紫筆，金簡玉字，包以

鳳文，蘊藏於七寶玄臺，或在山洞之中，或在諸天之上。三者簡策縑紙，篆隸隨時，傳授流通，見行於代。雖復有三迹，而麤妙不同，皆是大聖天尊詮至，咸能治病，悉名良藥。但經之義訓，訓亦多途。舉其樞要，略釋為四。所言四者，一由，二徑，三法，四常。

第一訓由者，言三代天尊，十方衆聖，莫不因由經戒，而得成道，故曰由也。

第二訓徑者，能開通萬物，導達四生，作學者之津梁，實修真之要徑，故曰徑也。

第三訓法者，言能為旨趣玄妙，所致精微，可以軌則蒼生，楷模衆聖，故曰法也。

第四訓常者，言非但妙理深遠，湛寂凝然，抑亦三代法王不刊之術。具斯四義，故得稱經。

就此一卷之中，又為四也：

第一從初至徹照諸天，名為序分；

第二從爾時衆聖下，至難可拔贖，名



為正說分；

第三從爾時太上道君得聞命旨下，盡頌終，名為通傳分；

第四從爾時聖衆下，名為總結。

就初序分之中，又分為五：

第一舉天尊與徒衆雲集；

第二從俱在西那玉國下，次明淨土方所；

第三從敷黃金薦地白玉緣階下，至正述國土裝嚴；

第四從黃雲四纏紫霞三匝下，表諸祥瑞；

第五從是時天尊含笑下，明出威光。

### 太上洞玄靈寶三元玉京玄都大獻經

元始天尊與太上道君、十方大聖、飛天神王、七千二百四十童子，俱在西那玉國鬱察之山，浮羅之嶽長桑林中。

釋曰：此則開宗發迹之道，備諸賢聖之目，即是第一，舉天尊與徒衆雲集之時，并明淨土方所。元始天尊者，至聖之洪名，生成之大號，遠窮

溟滓，難以為言，近尋教迹，方可立稱。又元始者，言其最先。天尊者，語其高妙。故曰元始天尊。太上道君者，得道之聖人。飛天神王者，自在之靈智。童子者，內無嗜慾，外絕營求，至性不虧，湛然凝寂。俱在西那玉國鬱察山中浮羅之嶽。此為淨土方所，即玉京之妙境，碧虛之上界。亦言此土之人，純淨潔白，或如白玉，乍等嚴霜，因此立名稱玉國。又更山名鬱察，嶽號浮羅，林有長桑，便為題目。此說經之處，乃具而言之。猶如孔子定書，老君說經於函谷。向來既標說經之聖人，并顯說法之處所，更顯所居之處，有何珍異。

敷黃金薦地，白玉緣階，七寶琳琅，光明煥日，黃雲四纏，紫霞三匝，香光纏蒼，衝溢虛空。

釋曰：此是天尊所居之處，即是第三，述國土莊嚴，并表祥瑞。敷者，布也。言其說法之所，悉以黃金遍布，其地階之邊，并用白玉而為緣

飾。七寶者，金銀、琉璃、珊瑚、琥珀、瑇瑁、瑪瑙之類。琳琅者，即玉之別名也。天尊所居之處，衆寶珍奇，莊嚴妙麗，光彩煥爛，朗徹十方，照耀諸天，明於日月，故云光明煥日。黃雲四纏，紫霞三匝者，此是表諸祥瑞。黃即中方之色也。復有正色呈祥，喜雲顯瑞，一時俱合，四面而來。蔚蔚駢闐，周旋圍遶。又更紫氣輕霞，縈盤三匝，靈風扇動，香氣氤氳，鬱溢虛空，而為供養。

釋曰：不道餘事，而言紫霞者，朱黑相雜而為紫霞。朱曰陽，曰道。黑曰陰，曰德。明天尊道德，猶若慈雲，蔭覆衆生，恩隆父母。但以上界天堂珍奇、雅妙華飾，果報自然，與俗不同，將音樂奇能，亦應殊異。天鈞大樂，奇雅妙音，萬種互作。

釋曰：天鈞者，自然之奇響。大樂者，非常之妙曲。故曰奇雅妙音。萬種互作者，言所奏音聲，皆自然而至，千種萬伎，娛樂天尊，諸天既獻諸珍奇，并奏雅音，天尊歡喜，顯所

靈相。

天尊含笑，五色光明，從口中出，徹照諸天。

此是天尊歡喜顯靈相，即是第五，明出威光。從上至此，總為序分。但天尊常適，故若含笑，照同春景，每有光明，所在蒙恩，無不徹照。但道眼清淨，衆聖共同，俱在會中，宜應利見。

爾時衆聖俱在一處，普見十方無極世界地獄之中，

此是衆聖乘天尊威光，地獄之中，無不覩見。爾時者，即是天尊說法之時。衆聖者，不一之稱。但衆既同，悉皆普見，未知地獄之中，有何責罰。

囚徒謫役，餓鬼死魂，裸身無衣，頸腳鎖械，

此明衆生宿業，不修善根，諸惡備造，死入地獄餓鬼道中，裸形飢羸，頭頸鎖械。但餓鬼死魂，身既無衣，項上著鎖，脚上連械，未知中間，甚為楚痛。

足立劍樹，頭戴火山，

此皆隨緣所受，言豈直飢餓裸形，每令身負鐵杖，足立劍樹，頭戴火山，焚割其痛毒難忍。或頭然火炭，足立刀山，摧逼驅馳，考以鐵杖，四肢鎖械，運動無由，萬劫之中，恒受斯罪。此類衆生，既受斯苦痛，未審中間，更有何色類。

大小相牽，五體爛壞，頭面焦燎，鑊湯煮漬，萬痛切身，

釋曰：此等狀跡，即文可知，皆由前身彈射飛鳥，殺害衆生，布網張羅，飛鷹走犬，剗胎探卵，鼎鑊烹燂，廣造諸愆，有此報對。

金錘亂拷，食息無閑，飢即食炭，渴飲火精，

此是惡業衆生，造罪非一，慳貪過重，餓鬼報身。飢欲求食，食成火炭。渴方就飲，水變火精。此緣慳貪，障閉功德。此乃諸經具明，非唯今為子說。

萬劫恒在餓鬼道中。大衆慈悲，稱無量善，一時舉手彈指，敬禮尋聲救苦天

尊，願生生世世，莫作慳貪，障閉功德，受如此報。非直只餓鬼道中，亦更餘處，流曳三塗五苦之中。

此言非直一處受報，乃更流曳三塗八難之中，無不周遍。三塗者，即是地獄道，畜生、餓鬼道。五苦者，抱銅柱，履刀山，循劍樹，入鑊湯，吞火食炭。并三塗地獄，是名八難。但衆聖慈悲，恒懷愍念，既斯痛切，應有問端，其次之若為起請。

道君稽首上白天尊，未審此輩罪人，生世之日，行何罪業，作何因緣，受斯楚痛。伏願天尊賜垂訓勵，告所未聞，如蒙開悟，仰受聖恩。

此明道君為請問，欲令未悟咸悉知聞。道君既是聖人，先已悟知業報，於茲<sup>③</sup>為其發問，欲以教化衆生。道君既問因緣，天尊作何酬答。

天尊告曰：斯罪人也，皆由前緣不見明教，不聞法音，慳貪無度，殺害無辜，口是心非，禁繫<sup>④</sup>賢人，飲酒食肉，禍亂五神。

此是天尊道君所問，告示因緣。諸

如此言等，皆衆生之惡業。但大道天尊慈悲救度，神光普被，遠照十方，故使道君承威，語問既知，敬請具辯因緣。言此業障罪人，前有過，不見明科聖教，不聞正法靈音，唯事慳貪，不崇功德，絕天堂路，作地獄因，沈溺愛河，漂流生死。五神者，即五藏神也，魂魄神精志是也。但飲酒食肉，罪業既深，非直濁亂五神，抑亦輪迴八難，遂使六根三業，廣造諸愆，匿惡潛怨，身心不善，任情殺生，貪恡無端，失道乖真，不知迴向，一入地獄，終無出期。

罵詈呪詛，叫喚神明，欺師罔道，穢慢三光，篡君殺父，侵暴宗親。

如此之義，分明可知。但其呪詛之時，冀欲前人早敗，呼神喚鬼，無所不為。如此言詞，造次難盡。此言過去生中，愚癡欺慢，心無敬忌，增上驕奢，或欺慢法師，口誣真聖，穢觸日月，輕慢星辰，為臣不忠，為子不孝，篡殺君父之處。聖人難之，取其漸而害之，故云篡弑。易曰：臣

弑其君，子弑其父，非一朝一夕之故，其所由來者，漸矣。篡即奪也，弑即殺也。聖人惡之，易其名也。

心懷諂曲，不念衆生，潛行竊盜，嘖嘖無端，割奪功德，以饒一身。不肯布施，散乞貧人。今受斯苦，以酬宿怨。

其目如此，此等皆是人中所行之事，其義可知。諂，希意之意，謂之諂。布施者，以己有濟人之急，遍布均，名之布施。莊子曰：青青之麥，生於陵陂。生不布施，死何含珠。為生有攻劫之憂，死有掘塚探棺之患。但俗間惡業，其數極多，略說而言之，難以窮悉，大綱名目，有如此等。

天尊以次而說偈言<sup>⑤</sup>。

天尊以其向來問答次序，重申其意，詳而說之，其名曰偈。偈者，讚頌之別名也。重明其義，故易之曰偈。

篡殺於君父，殺害無辜人。死受金鎖打<sup>⑥</sup>，鐵杖不去身。

此即偈之文也。前文中篡殺在後，今偈則篡殺在前者，但君父之重，自

古為先，三千之條無殺，故於偈中而為稱首。此重明上長行中篡君父義。

乘間入他家，掠奪人財物。死魂墮幽獄，萬劫不得出<sup>⑦</sup>。

此等之言，其義可解。故莊論云：為不善於顯明之中者，人得而誅之。為不善於幽闇之中者，鬼得而誅之。明於人明於鬼者，然後能獨行。故知冥司叵罔，神道難欺，所有罪愆，纖毫必錄，善惡報應，如影隨形，一墮三塗，萬劫無出。此重明上長行竊盜之罪。

奢姪好細滑，穢慢於三光。死魂受幽閉，後生並癡狂<sup>⑧</sup>。

此明身之業罪。言邪行之人，耽姪無度，唯貪色慾，細滑是求，觸犯日月星辰，不避三光。明受罪既終，始生人道，雖得人身，乃被顛狂愚癡之報。此即明其身業之罪，次陳口業，更後若為。

凶橫作口舌，鬪亂於宗親。死受鎔銅灌，後身<sup>⑨</sup>恒吠人。

此即明其口業。但口業之人，專行綺語，虛傳口舌，鬪亂宗親，反是為非，破他和合，妄生禍福，損陷於人，死入地獄之中。即鎔銅灌口，受罪之後，餘業更生，報處狗身，見人恒吠。

食噉於衆生，飲酒亂五神。死受鑊湯煮，鐵杖不去身<sup>①</sup>。

此言噉食之人，殘他性命，飲酒食肉，不念衆生，遂令五藏之神，昏迷濁亂，口貪肥飽，不悟業報隨身，及至命終，沈淪地獄，鑊湯爐炭，煎煮其身，萬痛交連，恒不去體。此重明上長行中飲酒食肉之罪。

噴噉虛爲實，欺誘頑益己<sup>①</sup>。死受拔舌報，後生不得語。

此言妄語之人，公行譎詐，以至欺誑眩誘，巧作多端，恒為不軌，謀之以求益己之事。死後魂沈地獄，乃受拔舌之殃，罪畢報生，仍令啞啞。此明妄語之罪，覆上長行中噴噉無端。欺師不信道，叫喚於神明。流曳三塗中，後生六畜身。

但以誑惑師尊，罔誣真聖，輕三寶，穢靈文，於道中謾生分別，口彰麤橫，呪詛為言，牽引神明，高呼大喚，嬰纏惡業，墜陷三塗，輪轉去來，死生勞曳。受罪既畢，更處六畜之形，沈滯多身，失於人道。此明欺天之罪，覆上長<sup>②</sup>行中欺師罔道，叫喚神明。

讒謗擊賢人，諂曲作無端。死墮毒獸螫<sup>①</sup>，輾轉無一歡。

但讒諛謗讟，潛擊賢人，諂進曲巧，陳詐其人，命蜂蠆之身，或作虻蚋，或蝮蝎諸毒蟲等，次遞遍為，輾轉穢惡，受生何時，更知歡樂。從凶橫作口舌，至此總明口業報對。自此以下，舉其意業。

減割功德物，以縱慳貪心。死魂爲餓鬼，飢渴飲火精<sup>①</sup>。

此具明意業，但崇善之減己削身，布施財物，造經像以為存亡。或有貪人中間，割截功德物，一時雖得潤己，報罪如影隨形，死墮餓鬼之中，飢則吞火食炭。貪欲之罪，招報如

斯，萬劫千生，不聞漿水名字，飢即食炭，渴飲火精。此明貪欲之罪，覆上長行中割奪功德，以饒一身。侮慢於耆德，不敬有道人。後生爲下賤，報處六畜形<sup>①</sup>。

此明是非人我，不敬師尊，侮慢耆德，即於賤之人報。生不敬崇三寶，死受六畜之身。業報相隨，一無差失。或生於邊地下賤，外遠蠻夷，雖復受得人身，不聞三寶名字，真經正法，萬劫難逢，聖教靈文，何由可見。割減功德物至此，明其意業。天尊說偈既了，道君作禮請。

天尊說此偈已，太上道君前進作禮，上白天尊：今日欣會，慶亦難言。天尊垂盼，賜告罪根，未審斯等罪人，皆有眷屬，見在親羅，爲當即身更無後嗣<sup>①</sup>。

天尊說偈既終，道君懷疑將問，若不教拔贖，衆生無出苦門。冀垂救度之方，所以殷勤請問，前進稽首，作禮興言，天尊慈悲，賜垂指訣，謹聞命旨，慶幸難言。道君又知衆生男女子孫，代代不絕，將欲教其胤緒，

救拔先亡，故起問端，以招後義。

天尊告曰：雖有男女種前業根，不修功德，不作因緣，何由可免，輾轉增篤，沈淪罪田<sup>①</sup>，億劫辛苦，無由得還。衆惡備履，望反綿綿。

天尊言其罪人後代男女子孫眷屬，既無功德，唯有地獄因緣，輾轉增多，彌加篤厚，終既悲魂，苦爽沈滯，淪迴罪穢，心田種前惡業。又云積惡之人，罪可滋植，猶如枳棘藂生荒穢之田，縱有五穀善芽，落在其中，終被沈蕪淪翳，不得秀苗成實，故云罪田。天尊以其地獄罪深，將與救拔盛淪難免之義，以招更問之端。

道君稽首又問天尊：作何因緣，得離衆苦。行何福業，得還人中。

釋曰：道君愍念衆生沈淪地獄，重與告問，以樹福田，欲使孝子順孫，念先亡之苦痛，慈兄悌弟，憶骨肉之淪沒，減削家財，以相救拔。重為斯問，崇起福田。此下舉天尊告罪，罪類不同，令作大獻拔贖之法。就此之中，分為三段：

初明罪衆不同，卒難救濟；

第二舉元校錄，令識歸崇；

第三爾時衆奉之儀，勸令做學。

天尊告曰：斯等罪人，造罪既多，非是一類。若欲救拔，亦難可同<sup>②</sup>。非一人力，得以濟免。

問此是第一，明罪衆不同，卒難救濟。天尊以其業報相隨，罪根難拔，但立功樹福田，非願廣不遷移，謝罪除殃，非功多不克，若以一人之力，不可免濟羣凶，故知行惡之人，卒難救拔，自非多崇緣業，廣建福田，若不憑藉衆緣，造次何能濟度。既須功德，欲為何等。次去以下功德若為。

當依玄都大獻法，七月十五日中元之辰，地官校戒，擢選衆人，分別善惡，諸天大聖，普詣宮中，簡定劫數，人鬼簿錄，餓鬼囚徒，一時俱集<sup>③</sup>。

問此是第二段，令識歸崇。言天尊三元大會之日，兼陳九府檢勾之由，具明搜之晨，委示諸官校定善惡之際，使來世衆生，令依此三元之日，

各各上做玉京玄都大獻軌則，供養三代天尊、十方聖衆、九玄七祖、法界蒼生，咸蒙拔贖之因，俱得解脫。此七月十五日，是中元地官校戒之日。十方衆聖普來集會，於是天官、水官及諸曹等，五億五萬五千五百五十五億賢聖俱會，簡定劫數，考校罪人輕重等級，欲於此日以設供養，拔度父母亡靈，未知作何法用。

以其日夜燒香然燈，照耀諸天九幽長夜八門之中。作玄都大獻，做玉京山，採諸花果，依以五色，世間所有衆奇異物，道具名珍，綾文錦綺，翫弄服飾，十絕幡幢，寶蓋莊嚴，供養之具，餽膳飲食，百味芬芳，獻諸衆聖，及道士等<sup>④</sup>。

釋曰：此是第三，示修奉之儀，勸令做學。說五色者，即是青、黃、赤、白、黑是也。交復五色之繒，以為幡蓋，莊嚴供養。天尊以見地獄罪人，動經億劫，故令孝養父母，為過去先亡採拾人間所有珍奇異物，做效玄都玉京，以為供養之具，獻諸十方衆聖及道士等，救拔過往亡靈地獄之

苦。當願九玄七祖，法界蒼生，憑茲供養之因，並護天堂之果報。欲屈十方衆聖，及道士等，作何功德。

於其日夜講說是經，十方大聖齊詠靈篇，囚徒餓鬼，當得解脫，一俱飽滿，免於衆苦，得還人中。自非如斯，難可拔贖。

釋曰：天尊廣陳諸法，冀在勸示因緣。當恐正信者稀，所以重重付囑。每於大獻之命，皆令啓請法師，日夜六時，修齋講說。其日夜者，即是今七月十五日夜，於此日當修齋建講，燒香然燈，照耀諸天九幽之內，八門之中。九幽者，九幽地獄也。八門者，八難之門，並是衆生受罪之處。至此三元齋日，做玄都玉京作大獻之法，備盡人間所有珍奇異果，百味芬芳，供養三寶。

於是十方及道士等，感此至言，爲之誦詠，上通九億，下徹六天，地獄罪人，一時解脫。吾過去後，東善非極，西惡非深，苦縣君子，當之大秦。上皇之後三萬六千年，此劫數盡，天地將壞，人人

塗炭。

釋曰：天尊說此經時，言我過去之後，皆有教化之人累起，相襲代代，常有聖明王，紹隆三寶。東善非極，西惡非深者，言東方未必極善而無惡，西方未必深惡而無善。苦縣君子，即是老君應身，玄妙玉女割左腋而生於陳郡苦縣，故云苦縣。堂玉之際，東西南北行九步，因即能言，自指李樹為姓，天上天下，唯我獨尊。即九龍從地湧出，吐水沐浴。出龍之地，便為九井，至今見在。又云：老君應身三界火宅苦海之中，亦是一苦縣也。當之大秦，即西方天竺之別名也。之，適也。老君西至流沙，適於罽賓，行浮圖之教，以化戎俗。故《後漢書》云：老君說浮圖經，以化戎俗。言浮圖好清淨，今之釋中浮圖經者，即老君之所說也。但以僧衆無知，妄為添解訛義，前聖疑惑，後人致更作偽返真，更相引導，淳朴之教，於茲遂澆。

華文競興，姦訛彌煩。朴散淳澆，邪偽

紛葩。無極世界男女之人，性習慳貪，死為餓鬼，飢其魂神，授食不得，變為埃塵。

釋曰：未斷澆訛，專行浮詐，無極世界，即此方之名也，亦名閻浮之界。但此土衆生，承為嬌怪，邪淫顛倒，迷惑糾紛，既慳貪，是非人我，死為餓鬼，以報宿愆，與食變作埃塵，眼見不能入口。

浩劫辛苦，塗炭沈淪。輾轉五道，以報昔怨。今故相告，宜遵之焉。來生男女，當自翹勤，勤情勵己，勿為罪由也。

釋曰：浩者，大也。言廣大劫來，常為餓鬼。縱令更受罪得了，還生下賤之家，輪迴五道之間，必竟不能成聖。五道者，即為天堂道，人道，畜生道，地獄道，餓鬼道。天尊更勸勵以告道君，來生男女，當自克翹，心勤勵志，勿作罪由。罪由者，即罪業也。言人所為善惡，必獲其報，猶如種田收子，各隨種類，春種秋收，故曰罪田。

爾時，太上道君得聞命旨，稽首作禮而說偈言。

此即名道分。爾時者，即是天尊說法緣訖，付前道君之時。太上道君既聞天尊說是大獻拔度之經，又說今生來生之誠，殷勤教誨，宣布流轉，稽首尊前，讚歎其美，奉承妙旨，慶幸難言。善既不可思議，遂即因而說偈。

前生有緣會，今得見天尊。先說今劫已，復告後劫愆。

釋曰：此則道君自欣幸，故遂作偈，讚天尊前代今生，道緣相會，遂得親承至道，覲謁天尊。又蒙告示因緣，以相拔度，傳授付囑，速轉法輪，立誓勤行，不生怠慢。前劫後劫，皆蒙道恩。又後劫愆者，二云。後身道君以誠衆生貪嗔癡罪，故說此偈。但貪欲之人，好為積貯，廣求財物，唯事驕奢，各擅豪華，不崇功德，心無慈悲，不念衆生，今生不豎福田，死後沈淪惡道。如此之報，決定無疑。皆前身不修善功，後身受其殃苦，諸

如此等，並是後劫之深愆也。勤行修至道，勿與有為怨。貪欲成大患，嗔癡為禍源。

釋曰：此偈誠貪欲嗔癡罪。道君意欲覺悟羣迷，故作頌論其因緣之本，禍福之源。言貪欲者累身之患，嗔癡者為禍敗之根源。故略述所由，勸令除斷。又道君既開天尊之教，因而演說，以此為將來之誠，但以財色名利，是禍患之源，貪欲嗔癡，是滅身之本。然豈為修真，妨人道行，抑亦喪失福田。若能三毒不興，六根清淨，即是修生之道，塵觸不嬰，可為拔苦之津梁，更有何災難。

斷除煩惱障，三業自清閑。邪魔不能亂，豈遭地獄艱。

釋曰：但煩惱所生，因由三業，邪魔擾亂，緣起六根。但能抱道守真，塵觸豈能相染。只如亂心之始，色欲為先。地獄之因，邪淫是本。若欲斷除煩惱，當須清閑，求其長樂之因，會是六根無染。若能修行天尊之教，常依玄都大獻之日，供養十方

天尊，則逍遙金闕之前，長無地獄之患。

遊涉琳瑯苑，高步七寶園。逍遙恣無欲，稽首禮天尊。

釋曰：道君言若後有人於三元日修齋建講，依玄都獻法，供養十方大聖及道士等，功成業著，得為天尊，遊行上界西那玉國，自然珍寶無有窮盡，過往亡靈皆離苦難，不落三塗。次下明諸衆聖，歡喜旋遶。

爾時。十方衆聖得聞天尊妙法，拔度之因，聞所未聞，悟所未悟，遂乃同聲讚善，歡喜奉行。

誦詠步虛，周迴旋遶，稽首禮謝，讚歎天尊。太上道君、十方衆聖，既說偈已，天尊更有何訓勵。

太上道君、十方大聖，說偈頌已，天尊告曰：三元齋日，皆須講說是經，勤修禮拜，六時行道，香湯潔己，過中不味，內外恬夷，淡泊無為，不交人事，先授十戒，靜心閉意，思神念真，想存在法。爾時衆聖一時稽首，請奉戒文。

釋文：此則天尊慈悲，重垂訓勵，

又復宣傳戒法，修奉之儀。但以聖人常修淨行，湛然無慾，不涉垢塵，冀在垂教化凡，拯救愚昧。故於此日誘引殷勤，更說戒文，令遣保護，清齋潔己，思神念真，日夜受持，存念三寶，當來成道，得見天尊，遊宴玉京，逍遙金闕。此是三元之日建講設齋，拔度先亡，得福如是。天尊既垂戒法，其文若為。

天尊告曰：

第一戒者，不得殺生，淫祀六天神鬼。  
第二戒者，不得竊盜為非，取他財物。  
第三戒者，不得愛樂美色，嫉妬非法。  
第四戒者，不得妄言綺語，以為口過。  
第五戒者，不得耽酒沈酗，縱橫無度。  
第六戒者，不得嘖嘖自是，欺謗兆人。  
第七戒者，不得欺師罔道，損棄聖典。  
第八戒者，不得嘖恚四輩，訕謗道士。  
第九戒者，不得貪覓過度，損物益己。  
第十戒者，不得觸罵宗親，不敬耆老。  
此十戒者，身之大患，犯之者風刀萬劫，恒值惡緣。善心信敬，開導後人，勤行諦聽，受勿忘言。行之如法，生不

犯過，死無拘閉，天降雲輶，自然得道。

釋曰：此即是其十戒，并是修奉之儀。護持者尅獲於人天，犯之者必沈於地獄。若有善男子善女人，能持此十戒，踴猛精進，心不懈倦，行與道合，乃無違失生，則為教所仰，死則升彼上清，駕躡雲車，往來無礙，超越三界，金剛之軀。若犯之者，則淪五苦，歷三塗，劍樹刀山，每令巡履，牛頭獄卒，催逼馳驅，肉散如星，骨消如雨，萬劫受苦，不捨須臾，恒值惡緣，怨怨相對。違經犯戒，地獄獲殃。如法修行，天堂受樂。自次以下，道君重問三元齋法，此舉下文，更作若為啓請。  
太上道君稽首禮曰：三元齋法，中元之旨，前已具聞。未審上下二元，依何法式。

釋曰：此三元齋法，俱在衆經。道君恐來代愚蒙，多所不悟，再興高問，冀垂未聞，於此會中，殷勤重請。天尊所答，其此若為。

天尊告曰：此三元齋，三錄定簡，靈寶

要文。正月十五日者，此為上元天官檢勾。十月十五日者，此為下元水官檢勾。此者所攝不同。

釋曰：此即天尊告示三元由委。言此三元之法，是三錄定簡，出靈寶要文。所攝不同者，為上元左府主生，太陽火官考。下元即右府主死，太陰水官考。中元主生死簿錄，一切地獄囚徒罪福之事，風刀之考。各領察九萬衆，凡有一十二月。其中元、下元，三府兩同。然香旋遶者，各為上元知生，下元知死之途。既別統攝，是以不同，故云所攝不同。

今所陳說，七月十五日作玄都大獻者，此乃總管上下二元，故以相告，宜遵之焉。

釋曰：此言中元通括上下，一切都和勘當，餓鬼囚徒，並在今日。但今日中元道，攝上下二元，其功最重。故玄都獻法，拔度先亡，所以不言天官、水官，唯稱中元者，唯中元地官。地官處中，中是正色，故舉中元，以



攝上下。又萬物至秋，皆悉成結，所以取其方金即熟。故以七月十五日中元之辰，以為供養。又一切餓鬼罪魂，今日皆蒙釋放。

中元教戒之日，玄都大獻之晨，常須建福修齋，行道講經，供養三寶，拔度亡靈，既此一時，地獄囚徒，咸蒙福祐，遵則享祚，洩則禍臻。

釋曰：但天尊奉大獻之供，享福無極，輕洩大獻之輕，則禍臻萬劫。

太上道君、十方大聖、飛天神王、七千二百四十童子，聞是說已，一時歡喜，作禮而去。

釋曰：上聖慈悲，常惟救度。至於宣揚妙法，光闡玄風，冀其至言，寧不歡喜。於是虔心踴躍，作禮而行。各適彼方，殷勤教化。

太上洞玄靈寶三元玉京玄都大獻經

①案敦煌本與《道藏》本經文差異頗多。今僅校正其與文義有關者。非關文義之異文不校。

②案「萬劫」以下至此數十字，原本作注文。核諸前後文義，當作經文為是。今改作經文。

③茲：原作「慈」，據文義改。

④禁繫：敦煌本作「攻擊」。

⑤天尊以次而說偈言：敦煌本作「其因如此，今為卿等略說是言」。

⑥死受金鎚打：敦煌本作「死魂受槌考」。

⑦萬劫不得出：敦煌本作「歷劫難可出」。

⑧並癡狂：敦煌本作「顛癡狂」。

⑨後身：敦煌本作「後生」。

⑩鐵杖不去身：敦煌本作「痛切恒在身」。

⑪欺誘頑益己：敦煌本作「欺誘益己取」。

⑫「長」字原缺，據前後文例補。

⑬死墮毒獸螫：敦煌本作「無變為小虫」。

⑭飢渴飲火精：敦煌本作「飢則食火精」。

⑮六畜形：敦煌本作「邊夷身」。

⑯後嗣：敦煌本作「後根」。

⑰罪田：敦煌本作「罪因」，近是。

⑱同：原作「周」，據敦煌本改。

⑲敦煌本此段經文作：「當依玄都舊法，正月十五日、七月十五日、十月十五日，三元之晨，地官校句，授選眾戒，分別善惡。諸天仙聖，普詣靈華宮中，簡定劫數簿錄及惡鬼囚徒」。此與《道藏》本頗不同。

⑳敦煌本此段經文作「世間當以其日清淨室宅，夜則燒香燃燈，是時起願，照耀諸天及九幽長夜八門之中。又學上聖靈真，作玄都大獻於玉京山，法下界應採諸妙花菓，盡世間所有眾奇異甘彌上饌，幡幢寶蓋，莊嚴供養，遙心丹到，獻諸眾聖及諸道士」。

㉑敦煌本此段經文作：「於其日夜講誦是經，谷（欲）為其家九玄七祖父母，一切眷屬，廣及他人，懺悔諸罪，發心

懇勤，則囚徒餓鬼，當得解脫，與食俱飽，免於眾苦，得還人中，隨業受樂。自非如斯，難可拔贖」。

㉒敦煌本無此段經文。

㉓堂玉：據前後文義，當作「誕降」。

㉔敦煌本無此段經文。

㉕敦煌本無此段經文。

㉖而說偈言：敦煌本作「而說頌曰」。

㉗敦煌本無「先說今劫已，復告後劫愆」二句。

㉘二云：據前後文義，當作「一云」。

㉙案敦煌本「爾時」以下至卷末，經文較《道藏》本大為簡化。僅作「爾時十方聖眾齊得開悟，一時歡喜，稽首受命而退」。凡二十字。

㉚釋文：據前後文例，當作「釋曰」。

㉛「三元」，敦煌本尾題作「中元」，近是。

（王卡點校）

## 023 洞玄靈寶九真人五 復三歸行道觀門經

經名：洞玄靈寶九真人五復三歸行道觀門經。撰人不詳，約出於隋唐。言修行五觀門法。一卷。底本出處：《正統道藏》太玄部。

道言：善男女等，修行正道，當須無欲自觀，妙見真心，洞然明照。有爲想念，見在心中，非起照心，知取心法。但了心了心法，勿起了心了心法；但心寂，勿起寂心寂；但寂非寂，勿非寂不寂。又言：木無火，土無火，是二無同；木無火，木無人，是一無同；心無知，木無知，是二無同；心無知，心無木，是二無同。同中亂，故取真則謬；同外斷，故取真則無。故大混之中，有無量性，無量之性，同依正性，感致生

相，如木出火，如心起知，化現世間，無常生滅，真道正性，實無生滅。人能淨心，與道合者，則是反本，復命真常。爾時玄中而作頌曰：

知起因於境，火發生於緣。各是真種性，乘流失道源。起心欲息知，心起知更煩，了知性本空，知即衆妙門。

道言：散朴爲器，乘流識境，識境法中，有四妄知：一內心知，二外境知，三中共知，四捨無知。然此妄知，但有名字，離此四妄，亦無別真。所以者何？知非二，故內外妄；知非一，故中間妄；知非無，故斷而妄；知非有，故常而妄。是故識境，如露如泡。又云：凡夫作奇爲幻，聖人神通爲化，影響夢想爲虛，同相取真爲謬。唯有慧力，明照其真。了心即道，真妄不二；不捨內外，真妄不一。隨境現識，隨識見境，識之與境，無正有無。無後無先，不常不斷，畢竟清靜，善寂無爲，自然而然，登太一果，是爲復道，反本真常。爾時空中而作頌曰：

散朴爲諸器，輪像出無形。中持

不殆信，乘流運死生。識境互依起，內外妄知成。了明真妄一，歸心與道冥。

道言：從青至黃爲波浪，捨青等色入眼爲歸身，從眼至耳爲輪識，捨眼等根復心爲歸神，從念至念爲生滅，捨念等數反寂爲歸命，歸命合道，道亦合之，內外同真，自在無礙，無礙之性，法界徧通，徧通道眼，照諸品相，青等諸相，現道眼中，眼之與相，非即非離，等行真體，不斷不常。於是法中而作頌曰：

心淨真根現，根淨妙境彰。境妙通心淨，心清復命常。道心本不二，同流五趣方。離物離生死，非人非道場。

道言：從夷至秦爲流轉，從人至鬼爲方馳，從俗入仙爲却死，從凡入聖爲歸常。歸常復命，復命證道，道性澄淨，普徧圓明，故能持照夷等諸相，相之與性相依，依而有念，念不住，共生共滅。此生滅性，不生不滅，不生不滅，故非假非真。是故諸道境界，同入大道性中，超出有爲，離諸緣相。於是性中而作頌曰：

夷秦等諸界，識感同業鄉。人鬼等道殊，有無互不妨。却死行歸道，復命反真常。澄心道眼淨，衆妙現其方。

道言：真人所行四種法門，天人男女有能修行不懈，則得昇入無爲，與道合真。

道言：道德真妙，體元無極，洞運陰陽，凝靈天地，流精散朴，裁品成形，形倫所感，不受地業，業性之應，開併萬端，識地冥元，無復增減，唯有生死，遂染成因，九獄五真，乘行而受。何謂九獄？

一者違大道，契窈冥，自然謝，真常隱，量鬼來加法體，伏報清真獄，玉皇主之，寂等以持罪。

二者違冥德，致化元，清受濁，至性波，癡鬼來加種識，變報三結獄，天皇主之，躁等以持罪。

三者違性本，起染情，玄精喪，真惠沒，畸鬼來加緣體，滅報終甫獄，地皇主之，妄等以持罪。

四者違理性，趣亂煩，意性感，識本殘，詐鬼來加方身，壞報五倫獄，人

皇主之，苦等以持罪。

五者違信行誑，口擁脾勞，蒼天鬼加志廢身，亡報普掠獄，黃帝主之，杖等以持罪。

六者違仁行殺，眼閻肝壞，素天鬼加魂散身，亡報風雷獄，青帝主之，刀等以持罪。

七者違義行劫，鼻塞肺枯，丹天鬼加魄去身，亡報金剛獄，白帝主之，熾等以持罪。

八者違禮行淫，舌爽心驚，玄天鬼加神逝身，亡報火翳獄，赤帝主之，冰等以持罪。

九者違智行愚，耳聾腎竭，鎮天鬼加精枯身，亡報溟泠獄，黑帝主之，壓等以持罪。

然此獄中所受之罪，重者計劫，輕者計年，隨其業力，歷周方數諸上之獄，逮而輪之。若欲離者，當修五勝之行。何謂五勝？

一者初察五知，明十行，有無妄門。

二者次觀心智，了無常，生滅化

門。

三者進修信惠，淨業田，復命寂門。

四者妙致種玄，混冥蒂，洞真明門。

五者染契照道，登通明，真洞證門。

此之五真所修之行，身心洞妙，具足圓成，出離無常，得真常道，真常道者，並徧無窮，非有非無，不常不斷，是爲真道正性，自然而然。於是法中而作頌曰：

真常持六道，貫境起違倫。昭昭依寂野，冥冥萬象分。感業稟形化，形感致心神。神形互依止，動爲來業因。九犯致其獄，五勝登其真。道妙通心海，心妙道自然。爲無非絕性，爲有非兩邊。在物非生死，離物非常存。

道言：善男女等，若能修行五勝，昇入真門，則得出離九獄，登無上位，具足法界，證道真常。爾時仙衆聞說是義，心懷歡喜，而讚偈曰：

十方無極界，一道一衆生。六趣

連淪海，一常一敗成。真妄無二實，罪福不虛名。唯當證道體，三界即三清。

真人行道任證頌

道言：善男女等，欲得絕離諸苦，昇入無爲，當修習九真進道之行。夫道行者，持戒止念，淨心守一，外斷諸見，內除衆垢，出離三有，證彼無爲，自然而然，得無上位。爾時真人聞說是義，心生解脫，即至道場，隨淺隨深，俱蒙益利，各稱其力，而說頌曰：

初第一真人頌曰：

了出諸見諦，心靜外垢除。六邪虛妄盡，正一自然居。致得證無我，至獨而不孤。昇遊衆妙門，永洞空無虛。

上第二真人頌曰：

至人證法空，性淨內無垢。心欲既已除，無染無所有。是故得解脫，不受於諸受。到彼無爲場，常貴而食母。

上第三真人頌曰：

無處無終始，不亡亦不依。無念無色愛，冥合希夷微。得等真一遊，變化莫能推。洞豁洞無相，昇玄歸不歸。

上第四真人頌曰：

無空無無色，無識無見習。無心無無想，無性無緣集。神形不相隨，相依不相入。永斷生死流，衆苦莫能及。

上第五真人頌曰：

心體無方所，實性虛中存。欲習既滅盡，神洞入無間。不住諸有空，不舍太清門。自然通妙極，遊居真淨天。

上第六真人頌曰：

正性無取捨，色習自然亡。不盡於有爲，不處於道場。常於無邊境，順物而不明。無礙無區分，玄同至道綱。

上第七真人頌曰：

照智入緣起，神朗太虛冲。無色習已滅，宿結盡虛融。乃於生死海，逍遙解脫宮。無起於太定，運慧曠無窮。

上第八真人頌曰：

心道不二倫，無際亦無處。在用而常寂，無生無所主。真妄體同源，應變無常所。百法自開明，三密洞然舉。

上第九真人頌曰：

空慧自在力，感證致法身。二諦即常寂，三代照員珍。今古無先後，所

主人非人。七變無恒相，六通非異神。是時真人各各頌已，咸皆恭敬，處在其位，心懷歡喜，具整威儀，迴向道君，設禮而去。

洞玄靈寶九真人五復三歸行道觀門經

（汪桂平點校）

# 024 太上洞玄靈寶淨供 妙經

經名：太上洞玄靈寶淨供妙經。  
撰人不詳，約出於隋唐。與《玄  
都大獻經》同時。一卷。底本出  
處：《正統道藏》洞玄部本文類。

爾時太極左仙公於若耶山崇高之  
頂最極雲峰，精思靜處，永息六塵，內  
虛冲素，身心不動，亦不緣馳，是七日  
中而得寂定。來日午時，忽聞上方鐘  
鼓亂鳴，浮雲之際，作天大樂。俄頃之  
間，天雨香花，乃及大花，或復小花，花  
皆百葉，縱廣圓大，有如車輪，大小不  
定，色相無常。或青，或黃，或朱，或  
紫，或成七寶，種種變異，殊妙希有。  
是諸天花，非可具顯。復有諸香、未  
香、珠香、百和之香、七寶香等，如是諸  
香，香皆衝天，其氣苾芬，亘滿山林。

爾時雲中復有五色飛雲，八景輦輿，神  
仙眷屬三萬人俱。是諸仙等，皆善智  
慧，明了辯才，六通成就，不可思議。  
見三輿內並有真人，項負圓光，光皆五  
色，晃曜虛空，首冠寶冠，衣皆雲錦，金  
鏤莊嚴，珠皆明月，用爲纓絡。三十二  
相，八十種好，顯照淨明，各乘輦輿而  
住於前。第一寶輿真人，自稱名曰我  
鬱羅翹。第二玉輿真人，自稱名曰我  
光妙音。第三綠輿真人，自稱名曰我  
真定光。三真同聲讚言：善哉善哉。  
善男子，汝於無量無邊之劫，建大精  
進，常行忍辱，運慈悲心，得於今日，不  
緣他事，身心不動，得無我心。既無我  
心，亦無他心，既無他心，亦無別心。  
既無別心，得平等心。善男子，汝於此  
山得無是心，成就道果，不可思議。我  
等今者，奉天尊言，聞子功德，滿於世  
界，上應諸天，令我來此，與諸眷屬，證  
明實行，成就子道。使諸來生，得有所  
知；使諸來生，得入法城；使諸來生，  
得無相法。以是因緣，故來而降。

是時仙公即從座起，頭面著地，聽

真人鬱羅翹說言已畢，良久乃起，作禮  
而言：云何大真，光相如是，復雨香  
花，種種變異，瑞相如此。不審今日，  
是何因緣，以何義故，曲垂恩逮，乃至  
如是。特願大真示我，令悟決了因緣。  
當令愚瞽，覺曉諸緣，必竟成就無上道  
果。

爾時第一真人鬱羅翹言：善哉善  
哉，善男子。汝昔所願，爲念云何。仙  
公曰：實緘在口，未敢便言。大真  
曰：我今來者，成就子願，欲使將來，  
興大法橋，作大舟楫，開大因緣，弘大  
功德。以是義故，而降此也。仙公復  
起作禮，而重白言：真人大師，悟我愚  
蒙，欲有所問，未敢諮請。唯願大真，  
採我鄙言。真人曰：大善大善，隨汝  
所問。仙公曰：我已今七月七日，於  
一念中，觀見十方，是諸地獄，幽魂餓  
鬼，吞火食炭，履陟刀山，頭手異處。  
或身入鑊湯，五體爛壞，無復鬼形，諸  
苦諸痛，不可思議。法界中苦，實不能  
加，而我一念，見如是苦，不覺身體百  
節毛孔，並皆流血，有如支解。是昔所

念，具如今言。不審大真，作何功德，能救如是一切幽魂，得無煩惱，具諸飽滿，而得解脫。

爾時真人得斯語已，彈指歡言：

善哉善哉，善男子，作如是言，實不可思議。吾今告子，諦而聽之，當爲汝說是。大真人即告言曰：唯三元吉日，五臘節者，總名八日。能於玄壇精舍，奉請道士，宿宵行道，及供香油，作諸甘果，積聚爲山，隨其大小，或復拌合，種種莊嚴，上獻天尊。因此慈悲，惠及十方，無量無邊，地獄囚徒餓鬼，皆得解脫。若犯重罪，謗於大道，及毀諸經淨戒道士，是名重罪。若殺父害母，攻伐師主，謀逆國君，亦名重罪。若犯此罪，由得暫時應其供獻，而得解脫。若罪輕者，因此供獻，宿宵行道，永得解脫，俱時飽滿。善男子，善弘建之福，使來生慈悲道士及孝子，皆得餉於先人，或亡父母、姊妹弟兄，皆得解脫，飽滿無飢。若不同此八日，不奉餉先人者，即爲不孝。告諸來生，勤修淨供，非但鬼神而得解脫，見世之人財寶增

益，不爲七世先人之所傷害。非但七世先人不能傷害，一切鬼神、外魔鬼賊不能傷害。何以故。世間凡夫，或於所見，求諸魔鬼，祠祭先人，不依八日，而祠餉之，番悞先人，而更得罪。何以故。祠餉不依八日，則魂靈飢餓，於飢餓中，即生傷害，招引外魔，合爲凶害。若祠餉得所，依於八日，則先亡歡悅，不爲禍害，一切魔鬼賊等，不能爲害，理致如是。

仙公又言：善哉。天真向所說者，淨供獻大而可知。云言八日，未辯是何，賜垂分別。

真人言：是八日者，正月十五日、七月十五日、十月十五日，是名三元之日。復有正月一日，是名天臘；五月初五日，是名地臘；七月七日，是名道德臘；十月一日，是名民歲臘；十二月遇臘日，是名王侯臘。是名而言，總名八日。若非八日而祠餉之，終不得達罪福之報，具如前說。善男子，堅持在心，吾今說者，是上三天之所科格，紫書金題天地常儀，不可思議，可不尊

重，善奉行之。

第二真人光妙音告仙公言：善哉善哉，善男子。功德巨大，不可限量。我奉天尊言，令我與諸神仙眷屬，降於子耶。何以故。爲不可思議故，爲無所得故。善男子，向所說者，是名八日，不可思議，名八解脫。當於此日卯時，安六道座，清淨香湯，及諸衣服卧具，甘饌飲食，次第安之。道士於道場中所，清旦奏沐浴章表一道。午時行道懺謝，施主等家先靈已往，皆於今日解脫清淨。

仙公曰：善哉。大真能爲一切衆生開解脫門，爲無所得迂降此耶。不審今說六道爲是何道，請具說之。

真人曰：一者天道，二者人道，三者畜生道，四者神道，五者鬼道，六者地獄道，是名六道。善男子，善緘在心，可不遵耶。

復次第三真人真定光言：善哉善哉。善男子，是八日者，二大真人具說已竟，功德次第，理大分明。吾今最後說大因緣，使欲告子。子欲聞耶。仙

公作禮而起，自言：慈悲廣被，不棄凡夫。今日踴躍，非意能陳。特願大真，照我愚蒙，豈煩諮請。

真人云：我等奉天尊言，實爲過去重成就，子心云何不說。若不說者，即墮無明，斷真道種。且子往劫因修功德成辦，云何不說。善男子，向言供獻功德因緣，有二種意。何等二種。一者住相供獻，名爲有盡。二者不住相供獻，名爲淨供，名爲無盡，何以故。譬如江海之水，輪轉無窮。是故此經明無盡義，亦復如是。又如虛空，無邊無際，不可限量。是故我今明無盡義，亦復如是。若江海之水，輪轉有盡，是故我今明無盡之義，便應有盡。若虛空江海，畢竟不可得知多少邊際，故示無盡之義，亦復如是。善男子，復應須知有盡之義，辯了分明。夫有盡者，譬如有人誦諸經句，一句兩偈，從三至四，乃至百千萬億之句，亦不爲多。何以故。若爲他說，不盈數歲，便爲有盡。是故我今明有盡之義，亦復如是。復如有人得大王位，富貴累世，金銀、

琉璃、珊瑚、琥珀、金剛，諸珍鱗甲等，寶滿一城中，亦不爲多。何以故。若用布施，不盈旬朔，便爾有盡。是故我今明有盡之義，亦復如是。若誦經句，口說無盡，及諸珍等，手施無窮，是故當知我今說者，住相供獻，名爲有盡。何以故。夫一切有限之物，施隨日消，無限之物，非劫能盡。是故我今明有盡之義，必竟如是。善男子，理趣皆然，非但此供功德如是，凡爲齋者，一會宿宵，亦復如是。可不勤行。若能常勵其心，行不住相，善知無盡義者，決定令汝成無上道。何以故，無我身故，無我心故。既無我身，即無我心。既無我心，亦無他心。諸心即滅，是名清淨。得無心定，得無我定。善男子，今復決了斯言。若有我心，息於他心，即我心不滅，是名得身心無我，未得身界無我。若欲求法界無我者，應須當知本無今無，既知本無今無，即知亦無法界。法界既無，則不生不滅。不生不滅，是故當知亦非不生，亦非不滅。所言不生不滅者，何以

故，爲說法故。是故云言不生不滅。得如是理，則名能爲淨供，則名爲得法界無我，則名爲得法界清淨。善男子，我今最後說者，並是往古無量無邊天尊真人仙真聖道，并及十方諸大力鬼神王等之所履行，得無上道。子於今雖不名編，然位號曰太極左仙公。仙階之大，今可不履行。必定當得登真人聖，具足六通，成無上道。

爾時仙公即從座起，作禮謝言：我今頓遭大真，賜如是言，實爲希有。我從無量劫來，行諸功德，亦遇仙人，常爲我說小乘小智養生之法。未有如今大真所說微妙，無邊無際，不可思議。我今結累，由如久積凝冰，一旦逢火，釋然消解，無復遺餘。我今無滯，亦復如是。復如法解賣兒，父母兄弟，四人悲號，不可思議，不期須臾，金銀諸庫，悉皆盈滿，遂得兒還，歡喜無量。我今歡喜，亦復如是。又如昔日國王有女，名曰絳音，六極不言，棄之深山，飢餓困乏，性命憊然，逐感真人下降示之，於是病便即愈，具足能言，而得飽

滿，歡喜無量。我今歡喜，亦復如是。特願大真，命諸靈駕，暫停林藪，希未便騰。

大真言：我等今去，不久便來。

別言已畢，是三輿輦，次第而去，諸仙伎樂，導從騰空，至於雲表。俄頃之間，不知所在。仙公敬而奉行，至十五日，謹依說法，弘建淨供，具如威儀。作大果山，山高丈八，種種莊嚴，微妙希有。諸雜甘果，徧滿山林，及諸米飯，亦復甚多。是日午時，十方地獄六道含靈，身相各異，無量無邊，俱來集會。是諸鬼中，有一大王，王名大威，前進與諸鬼等，俱時作禮，同聲讚言：善哉善哉。大威王言：淨界道士，能為我等，開解脫門，得於今日，是我眷屬，非我眷屬，無量無邊，並來雲集，俱蒙清淨，而得解脫。若非淨戒慈悲，何能為我是諸眷屬，營建淨供。唯願法師不久成就大仙，證無上道。及諸天人、畜生神鬼，地獄幽魂，並同斯言。是言已畢，皆沐浴香湯，衣服莊嚴，依位而坐，飲食具足。午時了竟，

大王與諸眷屬各辭仙公，言：法師，善哉善哉，不可思議。我等因此慈悲，有無量魂靈，而得解脫。作斯言已，稽首而去。

仙公告諸來生善男子善女人：我於無量無邊劫來，至於今日，始蒙大真說此要言，不可思議。雖前奉大真授我獻經，其議少略，不頓如今說諸因緣，其議深遠，乃至如此。復見有經，名曰《大獻》，直說三元，不明八日，不說功德廣大如是，無邊無際，不可思議。善男女等，可不尊奉，若能遵敬奉行此經，是人名曰孝子，報其父母生長之恩。非但胎生父母，亦得報其真父母也。得報真已，漸階道果。若有誹謗不信，不餉先人，是名不孝，違真父母。何以故。若不餉先人，鬼魂飢餓，是名不孝。既不孝已，既生誹謗，若誹謗已，則誤先人。是亡父母，受諸苦惱，其身現世，魔王鬼賊之所傷害，風癩之病，諸苦痛者，具足受之。將來男女，明各慎之。

太上洞玄靈寶淨供妙經

(郭清點校)



# 025 洞玄靈寶太上六齋

## 十直聖紀經

經名：洞玄靈寶太上六齋十直聖紀經。撰人不詳，約出於隋唐。言齋戒日期及齋法。一卷。底本出處：《正統道藏》正一部。

### 道教五戒

一者不得殺生，二者不得嗜酒，三者不得口是心非，四者不得偷盜，五者不得淫色。

### 十善

一念孝順父母。二念忠事君師。三念慈心萬物。四念忍性容非。五念諫爭解惡。六念損己救窮。七念放生養物，種諸果林。八念道邊舍井，種樹立橋。九念為人興利除害，教化未悟。十念讀三寶經律，恒奉香花供養之具。凡人常行此五誠十善，恒有天人

善神衛之，永滅灾殃，長臻福祐，唯在堅志。

### 年六齋

正月、三月、五月、七月、九月、十一月。

### 月十齋

一日、北斗下。八日、北斗司殺鬼下。十四日、太一使者下。十五日、天帝及三官俱下。十八日、太一下。二十三日、太一八神使者下。二十四日、北辰下。二十八日、下太一下。二十九日、中太一下。三十日。上太一下。

自下中上三太一下日，皆天地水一切尊神俱下，周行天下，伺人善惡。

甲子日，太一簡閱神祇。

庚申日，伏尸言人罪過。

本命日，計人功行。

八節日，有八神記人善惡。

三元日。天地水三官校人之罪福。

### 三會日

正月七日、舉遷賞會。七月七日、慶生中會。十月五日。建生大會。

### 五臘日

正月一日、名天臘。五月五日、名地

臘。七月七日、名道德臘。十月一日、名民歲臘。十二月臘日。名侯王臘。

三會日，三官考覈功過，宜受符籙，齋戒呈章以祈景福。

五臘日，常當祠獻先亡，名為孝子，得福無量。餘日，皆是淫祀。通前三元日，為八解日，皆可設淨供奉福焉。

夫齋直之法，要在乎絕甘肥葷辛酒色，陰賊嫉妬妄想，一切諸惡。唯宜燒香然燈，誦經禮懺，願諸一切普免灾厄，乃為齋矣。昔孔子謂老子曰：丘居貧，唯不飲酒、不茹葷久矣。老子曰：是祭祀之齋也。汝一志，無以耳聽，而以心聽，無以心聽，而以氣聽，疏淪汝心，澡雪汝精神，掇擊汝智，吾將語汝。

論曰：按諸經齋法，略有三種。一者設供齋，可以積德解愆。二者節食齋，可以和神保壽，斯謂祭祀齋，中士所行也。三者心齋，謂疏淪其心，除嗜慾也。澡雪精神，去穢累也。掇擊其智，絕思慮也。夫無思無慮則專道，

無嗜無慾則樂道，無穢無累則合道。既心無二想，故曰一志焉。蓋上士所行也。詳夫齋者，齊也。要以齊整三業，乃爲齋矣。若空守節食，既心識未齊，又唯在一志，則口無貪味。謂茲二法，表裏相資。故《大戒經》云：夷心靜嘿，專想不二，過中不味，內外清虛是也。孔子雖薄閑節食，未解調心，故示茲齋法，令其受道。而末學之徒，孰能虛心一志哉。夫鄙乎祭祀之教，自謂得心齋理，蓋噴嗃怠慢之夫矣。雖口譚玄寂，無解其目，是自矜焉。《易》云：聖人以此齋戒。

人生各有歲月日時，隨其所屬星宿，以定貧富貴賤、性命長短焉。然六家之物，有合則有散，有生則有死，有成則有敗，有盛則有衰，此天下之恒數，自然之對也。五色者，陷目之錐也。五音者，塞耳之鎚也。五味者，截舌之斧也。財貨者，亂人之物也。故禍莫大於死，福莫大於生。是以有名之名，喪我之橐。無名之名，養我之宅。有貨之貨，喪我之賊。無貨之貨，

養我之福。罪莫大於淫，禍莫大於貪，咎莫大於僭，此三者禍之車也。小則亡身，大則亡家。

營生養性，載神扶命，則離苦昇樂，福慶流延矣。人之生也，皆由於神，神鎮則生，神斷則死，故勤心積感，則能舉形上昇玄宮矣。

夫人唯知豐饒以甘其口，爵祿以榮其身，而不顧甘口之食，是傷命之斧，爵祿奢麗，刑對天下之怨矣。

元君曰：道者，靈通之至真。術者，變化之玄技也。形之無形，因術以濟人。人之有靈，因修而會道。人能學之，則變化自然矣。夫道之要者，在乎深簡而易攻也。術之祕者，唯符藥炁也。符者，三光之靈文，天之真信也。藥者，五行之華英，地之精液也。炁者，陰陽之和炁，萬物之靈爽也。爾雖得一事未畢，要資符藥道乃訖。藥能鍊形，符能致神。夫人愛其身，天地莫能害也。守其志，天下莫能敗也。安其貧，天下莫能富也。樂其賤，天下莫能貴也。未有敬焉而無不敬，未有讓焉而

無不讓，未有矜焉而無不矜，未有惠焉而無不惠也。守直以曲，守白以辱，守辯以訥，守巧以拙，以無伐爲盈，以無知爲貴，以愛寵爲驚。非無患之地則不蹈，故百禍不能罹也。非夷易之塗則不由，故險阻不能危也。不以祿位穢其志，故刑罰不能加也。不以毀譽爲喜怒，故謗讟不能隨也。百禍不能罹，是以總萬物之要也。險阻不能危，是以保永安之祚也。刑罰不能加，是以充其壽考之年也。謗讟不能隨，是以完其純粹之真也。人能虛無清淨，慈惠忠信，孝敬和順，謙勤儉柔淳素，則與道同也。故以道理之於身，則心達志通，重神愛氣，輕物賤名，思慮不惑，血氣和平，筋骨便利，耳目聰明，肌膚潤澤，面有光榮，精神專固，身體輕強，虛實相從，鬢髮潤光。理之於家，則父慈子孝，夫信婦貞，兄良弟順，九族和睦，耕桑時豐，倉廩積蔚，六畜蕃殖，事業修理，常有餘矣。故君臣有道，即忠惠。父子有道，則慈惠。士庶有道，則相愛。故有道則和，無道則

乖。由此觀之，道之於人，不可須臾而去矣。

文子問老子曰：何謂道德仁義禮邪。老子曰：無形無爲，內以修身，外以理人，功成事立，與天爲鄰，道也。畜之養之，遂之長之，兼利無擇，與天地合，德也。爲上不矜其功，爲下不羞其病，於大不矜，於小不偷，兼愛無私，久而不衰，仁也。爲上輔弱，爲下守節，達不肆意，窮不易操，一度順理，不私枉撓，義也。爲上恭嚴，爲下卑敬，退讓守柔，爲天下雌，立於不敢，設於不能，禮也。故修道即下歸服，修德即下從令，修仁即下不爭，修義即下平正，修禮即下尊敬。五者皆修，即國家安寧。

凡當代之士，聰明深察，而近於死者，好議人之罪也。博辯闊大，而危其身者，好發人之惡也。若夫法天象地，恩及動植，忘而不持，乃合大道焉。故曰：深行之爲道德，淺行之爲仁義，薄行之爲禮樂也。由是觀之，不若懷道抱德，自然淳朴矣。

老君謂陵陽子曰：吾前與關令尹喜妙真要解百萬言，虛白九章。虛而白者，吾宅也。清而淨者，吾舍也。無爲自然者，吾素也。易而爲一者，吾號也。和而無體者，吾用也。應化無窮者，吾變也。夫自然者，道之真也。無爲者，道之常也。虛無者，德之尊也。淡泊者，德之宮也。靜嘿者，德之泉也。清淨者，神之鄰也。精誠者，神之門也。中和者，事之原也。人爲道，能自然者，故道可得而通也。能無爲者，故生可得而長也。能虛無者，故氣可得而行也。能淡泊者，故志可得而共也。能靜嘿者，故聲可得而滅也。能清淨者，故神可得而光也。能精誠者，故志可得而從也。能中和者，故化可得而從也。是故凡人爲道，當以自然成其名，以無爲養其形，以虛無而養其神，以淡泊而存其志，以靜嘿而養其身，以清淨而平其心，以精誠而守其志，以中和而存其神矣。夫安心游志，使若大水之自澹也。深居靖處，使若蛟龍之潛藏也。懷虛不屈，使若橐籥

之挹空也。化得存神，使若社稷之保功也。立尊居神，使若宗廟之守仁也。使不我見，若巨魚之居大水也。使人莫我知，若日出而無東也。使我生無窮，若大道之無方也。道之相致，譬如高山大澤之自致禽獸豺狼也，若深林巨木之自致飛鳥百蟲也，若江海湖池之自致魚鼈蛟龍也，若盛德太平之自致麒麟鳳凰也，若精誠潔白之自致玉女芝英也，若中和嘉應之自致德瑞吉祥也，若災異惡行之自致妖孽殃禍也。夫人常去道，非道去人。人常失生，非生失人。若使道與生相保，生與道相守，二者不相離，乃能得長久。夫有形之內，人爲最靈，天性雖同，因修各異，何者。以之習善，即漸成真人之風，用之涉惡，即轉爲兇卒。故老君哀之，令其學道。夫修身之道，乃國之寶也。不可不愛，不可不貴也。然一身之根有三。一爲神，二爲精，三爲氣也。此三者，本天地之氣也。神者，受於天。精者，受於地。氣者，受於中和也。相與共

爲一道也。故神者，形乃乘也。氣者，神之輿也。精者，居其中也。三者相助爲理。夫人欲壽者，乃當愛氣尊神重精也。故氣生於精，精生於神，神生於明，人本爲陰陽之氣，氣轉爲精，精轉爲神，神轉生明。是故不欲老者，當念守元氣而合精者也。令不去其形，合而爲一也。即淋淋自見，身益輕，意欲精也。此神光欲生也。心中大安，欣欣若喜也。若冥目卧，著志意於身內，內意不出，則身鍊形變也。如此則真理已得，太平自應矣。神哉此道。神者，君也。精者，臣也。氣者，人也。故修身之道，安神養氣，不欲其喜怒，若能制之，氣自強也，意自得也，百邪自去，衆病自消，光明自見，善神自應也。故曰：大道坦坦，去身不遠。第一初果，行人之中，九轉仙行。一者可從於善，二者閉塞於惡，三者廣生濟物，四者勸助良善，五者布施財力，六者大願利人，七者身慈，不害於物；八者口慈，言不害物；九者心慈，常念於善。常行九行，一不可闕。

太上洞玄靈寶六齋十直聖紀經

（郭清點校）

# 026 太上洞玄靈寶福日妙經

經名：太上洞玄靈寶福日妙經。  
撰人不詳，約出於隋唐。言齋戒日期。一卷。底本出處：《正統道藏》洞玄部本文類。

天尊言：善男子，善女人，欲得過去見在未來三世之中，不墮眾難者，至心受持此經，及諸福日修善建功，見身安樂，命過飛天。

天尊言：正月、三月、五月、七月、九月、十一月，此長齋月。能畢是月修齋者，見身仙度，舉家康泰，七祖無爲。

天尊言：正月七日，天曹遷賞會。七月七日，地府度生會。十月五日，水府建生會。是三會吉日，能於此日長齋者，萬劫家門不遭瘟氣。

天尊言：正月十五日，七月十五

日，十月十五日，是三元齋日。能於此日長齋者，延壽益筭，不見眾苦。

天尊言：正月一日，天臘。五月五日，地臘。七月七日，道德臘。十月一日，民歲臘。十二月遇臘，王侯臘。每月一日、十五日、甲子、本命、庚申日，有人能於此日長齋，誦詠經文，無願不會。

天尊言：每月一日、八日、十四日、十五日、十八日、二十三日、二十四日、二十八日、二十九日、三十日，是十直之日，長齋者，生死受福，萬劫安樂。

天尊言：立春、春分、立夏、夏至、立秋、秋分、立冬、冬至，是八節齋日，行道持戒，長齋誦經，居門欣慶，七祖歡樂。

天尊言：能於福日長齋，萬劫無殃，見世安樂。若復有人，自能書寫此經十卷，除罪萬劫。百卷，魔王護念。千卷，飛行，眾邪魍魎、五部瘟疫不過門戶，當境善神，常來利益，前劫今劫，罪皆除滅。能爲善人書寫受持者，福報無窮。若復有人，臨難鬥爭，虎狼毒

蟲怨結，惡人征戰，生產及是風波盜賊，諸所疾病，即欲壽終，誦詠是經，上聖飛仙，馳來救度，一時解脫，無願不會。此經是至極真人受持之本，得道之宗若見斯經，受持誦詠，無不仙度。不見是經，無由得道。於是眾等聞是說已，稽首禮謝天尊，信受奉行。

太上洞玄靈寶福日妙經

(郭清點校)

## 027 太極真人說二十四 門戒經

經名：太極真人說二十四門戒經。撰人不詳，約出於隋唐。言齋戒日期及二十四戒。一卷。底本出處：《正統道藏》洞真部戒律類。

爾時元始天尊，先天地生，布炁十方，成就萬象。人天之主，河嶽之君，日月因之以運行，四時稟之以成像。作修道梯航，爲生死津梁。出有入无，應時方便，隨緣設教，濟度蒼生。爲作法身，周徧天下，成一切智，起無邊心。或作帝王身，或作宰官身，或作郎吏身，或作出家身，或作法師身，或作龍王身，或作男子身，或作女人身，或作乞士身，或作下賤身。種種形變，隨順世間，肉眼凡夫，不能見我。以不識

故，多生顛倒，是非人我。貪癡因隨愛欲生，從執著起，便生地獄，結成冤家。從生至生，從劫至劫，不曾覺悟正念，身心未入定源，起離虛假，沈淪惡道，漂浪愛河，被業風吹，豈能正定？三業自種，十惡心生，於正法中，盡作分別，永沈苦海，解脫無緣。常念衆生苦惱無量，我今傳戒，止惡防愆，能自依行，是成道果。

太極真人又曰：我前五百生中，發念修道，見一切法，無非真法。何以故？不以假見故。知一切法，無有非真。何以故？以真知故。故知假者見假，真者見真，但作真心，即是真智。真不離假，變假還真；假不離真，妄真成假。但能斷假歸真，戒成如說奉行，晝夜讀誦，自無地獄，皆證天堂。凡念戒時，每月一日、八日、十四日、十五日、十八日、二十三日、二十四日、二十八日、二十九日、三十日，月小却取二十七日，此名十直齋日。立春日、春分日、立夏日、夏至日、立秋日、秋分日、立冬日、冬至日，此名八節齋日。正月

十五日、七月十五日、十月十五日，此名三元齋日。正月一日、四月一日、七月一日、十月一日，此名四始齋日。正月七日、七月七日、十月五日，此名三會齋日。如此等日，同業共行，修道戒人，或少或多，同居靜室，清齋讚唱，念誠燒香；或在觀中，名爲福地，掃洒房院，即是玄壇，能屈法師，誦我妙誡，燒衆妙香。是時即有左右官使者、三十二天真仙帝君、十方靈官、五嶽將吏、九州社令、山林孟長、水府靈祇、十二溪女、飛天神王、諸天童子、無鞅數衆，一時同會念誡之所。錄其功德，記發心人。當必爲之削除罪業。若能堅固抄寫受持，每能念之，劫劫生生，不墮地獄。真人說諸戒偈，我今衆等，深心慚愧，各各受持，唯願戒師，時時爲說。

第一誡者，不得殺生、割斷他命，煎煮美味，以饒一身。或自殺、教他殺、見殺隨喜，噉食衆生。犯者過去，受鑊湯地獄罪。

第二誡者，不得偷盜，取非義財，夜入人家，晝窺園圃，承其便勢，遂起

賊心。或自偷、教人偷、見偷隨喜。犯者過去，受刀山、劍樹地獄罪。

第三誠者，不得心懷陰謀，枉陷良善。見人勝己，便欲害他，計較不平，自求饒益，他好我認，我惡怨他。犯者過去，受爐炭地獄罪。

第四誠者，不得口是心非，鬥亂親戚，談說三寶，讒謗出家。走作唇舌，非笑良善，誹謗聖教，疑惑兩心。說語不平，勸生分別。犯者過去，受鐵犁耕舌地獄罪。

第五誠者，不得違經慢道，欺誘他人，敗壞靈壇，侵損常住，隱沒功德，踐踏福地。犯者過去，受剉確剉身地獄罪。

第六誠者，不得飲酒。醉亂心神，凶橫無度，不存禮樂，喧悖尊親，叫喚神靈，驚心損氣。犯者過去，受毒蛇食心地獄罪。

第七誠者，不得妄言綺語，惡口兩舌。罵詈尊親，毀辱師長，善言惡對，轉為怨讎。犯者過去，受鎔銅灌口地獄罪。

第八誠者，不得行邪心曲，耽淫愛色，執著生迷，離他恩愛，奪人寵念，隔絕他家。犯者過去，受抱銅柱地獄罪。

第九誠者，不得慳貪吝惜財物，自求饒益。妬妬他人，呪詛一切，更相猜忌，彼此怨深。犯者過去，受鐵輪地獄罪。

第十誠者，不得破齋破戒，不孝不仁。偷竊齋食，隱沒厨供，令彼功德使不周圓。犯者過去，受運石培山地獄罪。

第十一誠者，不得毀拆尊像，偷竊幡花，自將供養，充衣裳卧具。犯者過去，受卧鐵床地獄罪。

第十二誠者，不得見功德破壞，屋舍傾崩，不好修營，心懷虛過。犯者過去，受劍林割切身心地獄罪。

第十三誠者，不得因到人家、見他有物、便即貸借、方便不還。羅織貧窮，非理逼奪。犯者過去，受寒冰地獄罪。

第十四誠者，不得見人有憂心生歡喜，見人苦惱心即快他，見人有財常

思下脫，見人好心常自憎嫌。犯者過去，受鐵釘釘身、身生猛火地獄罪。

第十五誠者，不得不洗手漱口，直進道場，侵觸經像，穢污靈文。心不恭敬，多生懶慢。犯者過去，受鐵杖亂考地獄罪。

第十六誠者，不得探巢破卵，傷胎墮子，非理枉橫，截斷生路。犯者過去，受大石壓身地獄罪。

第十七誠者，不得裸形露體於天地日月星辰之下，三明六昧之中。犯者過去，受鐵錐刺身地獄罪。

第十八誠者，不得耗蠹常住，攀摘花果，損折園林，穢污觀舍。不生慚愧，是輕福地。犯者過去，受吞鐵丸地獄罪。

第十九誠者，不得雜食葷辛，葱蒜韭薤，身中臭穢，神靈不居。念誦修持，觸犯靈聖。犯者過去，受吞火食炭地獄罪。

第二十誠者，不得自以為是，非笑他家，於諸法中橫起人我，執心自著，不見正真。犯者過去，受磔磨確擣地

獄罪。

第二十一誠者，不得將諸毒藥方便施人，損他性命，每結怨嫌。犯者過去，受百毒惡汁、灌煮身心地獄罪。

第二十二誠者，不得計筭三寶，離隔六親，不念捨施，唯求自饒。言作兩心，不行一信。犯者過去，受拔舌地獄罪。

第二十三誠者，不得將齋食就葷辛酒肉相和共食，不敬齋法，諸天罰人。犯者過去，受鐵鎖鎖身、不得託生地獄罪。

第二十四誠者，不得自倚豪強，欺誘貧賤，離拆男女，不信天真。生兩見心，不斷人我，自行非去，不識罪因。犯者過去，受鋸解身心地獄罪。

太極真人又曰：此二十四門誠者，身之大患。犯者鋒刀萬劫，常考生魂。凡人或遍身楚痛，或身自青赤，心懷憂愁。此是生魂冥司將考，當須各隨力分，燒香入齋，行道禮懺，持心受誠，念无上天尊，布施然燈，廣造功德，更無再犯，其罪必除。

真人又曰：凡欲學道，先須齋戒，

洗心防患。持戒功德多於微塵。微塵之數，見而可量；齋戒之功，无窮无盡。一人持戒，九祖生天，合家蒙恩，臨難分解。縱盡家產已將布施，還須持此戒經。若學道不持此戒，終各不成就。能持此戒者，即有諸天帝王、天真大聖、神仙玉女、无極世界一切靈司，燒香然燈，證持戒者得福无量。尅成道真，諸天香花因便迎接，必將此輩隨願往生。若善男子、善女人聞此戒經，心生歡喜，惡業便除。能捨慳貪，將清淨財贖所傳戒經，發起回向，持心精勤。若為亡人臨送之家，或經初七，乃至終七，持誦此戒，即得魂飛淨境，託生天堂。懷妊婦人聞此戒經，臨難分解，若為己身厄難，消除苦緣，闔家得福无量。戒約煩惱，隔絕魔心，努力勤修，早求解脫。諸天同唱，而說偈言：

一切修學人，誓願成真道。慈悲念誠文，隨聲斷煩惱。永離生死苦，得成无上道。歸心向正真，紅顏不衰老。

太極真人說二十四門戒經

（陳咏明點校）



# 028 太上十二上品飛天

## 法輪勸戒妙經

太極真人傳左仙翁

經名：太上十二上品飛天法輪勸戒妙經。撰人不詳，約出於隋唐。言持戒滅罪法。一卷。底本出處：《正統道藏》洞真部戒律類。

我本師元始天尊，時在大羅蓋天衆寶宮殿，自然香界道德花臺，不捨因心，誓度含生。即寂而動，運平等心，以方便故，啓衆妙門，開大慈惠，以無爲法，利濟三世，乃以化身，名之虛皇。虛皇之號，稱爲道君，道君之化，周遍十方三千大千無極世界。一一世界，有諸國土；一一國土，現諸化身；一一化身，放無量光；一一光中，顯諸真像；一一真像，圓光晃日，明耀通天。

天日之表，無幽不燭，圓明之妙，有礙皆通。含生受賜，動植感恩，三途罷對，六道昇遷。天人盈溢，地獄空閑，觸處清淨，法界光明。然後收諸光明，反道合身，真儀湛然，示啓微妙。復彈金指，開發玉音。是時鐘鼓自鳴，天仙踴躍，金爐寶杓，香煙自薰。一切天人，及無量衆，各增惠力，同會無爲，神開悟解，塵慮頓忘，入定慧源，見無極聖，同見無上元始天尊。

爾時天尊告妙行真人及諸大衆，而作是說：今日既善，今時亦善，汝心亦善，大衆亦善。我故爲汝，啓運慈悲，將護世間，少福劣功，一切衆生，皆可昇進，不令退沒。故我今制無上隄防，孚護衆生，增進賢善，所謂九真妙戒，智照之光，三界十方，歸依信受。故我今說，安樂衆生，實如所言。是時衆會，預見說者，各各定心，長跪稽首，歸命聖尊，普願大慈，授我尊戒。如是勤請，經半劫時，諸天散香，衆聖獻寶，叩頭三請，無退轉心。

爾時天尊見是勤請，怡然稱善。

於是慈尊，復作是言：一切衆生以愚癡故，以貪著故，終於長夜，遂至磨滅。我之憂念，慈過父母，恩重含容。譬如孩童，墮大深窞，其窞幽險，多黑毒蛇，父母聞之，生大憂愍，先誦神呪，禁止毒蛇，令子身全，不遭吞噬。以牢縛寶竿，及以鈎梯，又令力人，入內扶接，皆使得出，處於坦途。諸子愚癡，不知畏遠，忽有再墮，必喪其命。父母再告天尊，又出籌策，教以神呪，降伏毒蛇，復遺於寶竿，方去危窞。唯我今者，其法亦然。夫無底三途，不過深窞，諸苦惱毒，有極毒蛇。一切有情，皆是吾子，而尊此戒。是神文呪，能使無明，一念消盡。是安樂法，是勝進方，三世聖賢，同所崇奉。乃至四八天界、五億地居，帝王后妃、太子公主，一切宰官，初就位時，皆應持誦。復次一切道心、出家在家、四輩男女，若貴若賤，若山若世，一切有情，無位異類等人。欲受戒時，先須清淨，發弘誓願，往詣師門，行道禮念。若無師可授，要得諸善，應當於三寶座前，而授誦之云：何名爲得

見善，應若於行道禮念之處，目洞神光，明照如日，初小後大，三界煥然。天地山河，無有障礙，乃至一切，無量妙因，是謂光明，清淨戒相。若不爾者，非得戒因。若遇大善師，是名宿緣慶會，不須別見相也。今告爾等，得遇戒因，浩劫難逢，此時際會，汝發志心，齊起善念。

爾時天尊而說偈頌：

我以平等心，說是真妙戒。欲令一切衆，安樂坐道場。天龍魔鬼神，夜叉非人等。上首能言者，普得於受持。當知得戒人，即入真聖品。若天若凡聖，咸應恭敬心。月朔月望時，昇諸獅子座。端心調正氣，和順說是戒。凡有聞法音，各各默然聽。諸有不自誦，由信入福堂。我故今善時，爲汝宣妙戒。汝等得戒已，復當流布聞。凡欲受戒時，及讀若持誦。先當皈三寶，次後宣戒文。如法持誦人，見世七種福。汝等當善信，無生疑惑心。一者短命人，應時得增壽。二者愚昧性，咸開廣大心。三者卑賤形，漸易尊貴相。四

者諸貧乏，不久成富饒。五者醜陋容，增益諸端正。六者內外病，日向得除愈。七者惱害緣，尋獲大安康。當知受戒者，其福德若斯。未來勝善因，億載無窮已。昇陟三九位，得成無上道。

隨心滿願天尊。

天尊說是偈已，普告四衆：欲聞大道法音真人戒者，內外端正，三業清淨，諦聽諦受，如法受持。凡受持戒者，歸依三寶，同誠稱善，無生異念。

歸依道、經、師三寶。

天尊言：弟子受真戒者，不得屠業爲殺，及以自殺，教他殺，方便殺，隨喜殺，乃至因緣殺，不得已殺，報殺，悞殺，如是種殺，皆不可爲之。愍念有情，如己身命。殺害之人，六種罪報。一者見世轉軻，常值惡報。二者與一切衆生，常爲怨讎。三者鬼神賊害，招集凶禍。四者正報，死墮地獄，劍樹刀山，受諸苦惱，無時暫息。五者雜報，禽獸畜生，遞相啖食。六者縱得人身，復遭刑戮。是大惡業，非真人行。

殺生惡業罪消滅。

天尊言：弟子受真戒者，不得偷盜，及取非義財。乃至道路遺失，風吹禽銜，野間拾得，皆不可受。或復殺人，威勢取與，方便歡喜，引誘他物，毫分錙銖，皆不得爲。盜偷之人，五種罪報。一者乞托庸身，貧窮下賤。二者經營不遂，百物虛耗，水火蟲傷。三者常遭口舌，財寶散亡。四者正報，普掠地獄，痛毒難伸。五者餘報，牛馬畜生。是大惡業，非真人行。

偷盜惡業罪消滅

天尊言：弟子受真戒者，不得邪淫，苟合男女，入於濁亂，染污出家，侵凌貞潔，不別老幼，豈論親疏，寧揀醜妍，那分兄弟，如是等緣，皆不可爲。邪淫之人，七種罪報。一者生死根本。二者穢惱之源。三者廢修善行。四者短命因緣，弊失魂爽。五者寤寐顛倒，識性荒迷。六者死墮地獄，鐵床銅柱，身焦骨爛，出沒寒池，冰戟霜刃，死而復生，轉輪無息，受大苦惱。七者雜報，猪狗不淨，禽獸等身。是大惡業，非真人行。

淫邪惡業罪消滅。

天尊言：弟子受真戒者，不得妄語誹謗，訾毀三寶，帝王師尊，乃至出家在家，持法破法，無問凡聖，皆應恭敬，如法奉承。或復異相法門，殊教同善，可隨順者，無起是非。誹謗之人，六種罪報。一者見世惡疾所加。二者未來幽暗無曉。三者百劫雜報，作無日等蟲。四者雖處人中，常無舌根。五者常滯怨憎，無人愛敬。六者生生世世，與善無緣，言說不信，人所不親。是大惡業，非真人行。

毀謗惡業罪消滅。

天尊言：弟子受真戒者，不得兩舌惡罵，非分毒語，傷損有情，合造是非，兩邊作語。乃至鬼神，及以凡夫，不喜聞見，何況聖賢之所聞也。惡口之人，六種罪報。一者見世常遭凌辱。二者死墮地獄，拔舌犁耕。三者爲人瘖啞。四者人所憎害。五者凡百所向，常不稱心。六者受報，猪狗蜂蝎，毒蟲之類，乃至兩頭之蛇，九首之鳥。是大惡業，非真人行。

惡口兩舌罪消滅。

天尊言：弟子受真戒者，不得嫉妬勝己，抑絕賢明，自無道德，強生謗毀，遂起惡心，方便中傷，令其破壞。起此心者，已損福田，何望到頭，成就善果。嫉妬之人，五種罪報。一者永不見三寶聖賢。二者斷諸善緣，兇惡纏繞。三者正報，愚癡聾盲。四者多涉險難，自取滅亡。五者惡緣惱害，無時解脫。是大惡業，非真人行。

嫉妬惡業罪消滅。

天尊言：弟子受真戒者，不得慳貪，損他利己。若見衆生，心無止足，方便曉諭，少欲爲心，貪愛之緣，如飲鹹水，亦如漏器，不可盈滿。慳貪之人，四種罪報。一者令人見世多得多失。二者過後卑賤饑寒。三者餓鬼之身，吞火食炭。四者當墮豺狼禽蟲，畜生等報。是大惡業，非真人行。

慳貪惡業罪消滅。

天尊言：弟子受真戒者，不得縱恣嗔怒，惡口毒語，兇暴酷虐。嗔怒之人，四種罪報。一者耗費神氣，勢毒所

傷。二者有情不喜見聞。三者死作鳩禽蜂蛇，惡獸之類。四者縱生人道，卑賤愚下，是物所輕，常無威勢。是人惡業，非真人行。

嗔怒惡業罪消滅。

天尊言：弟子受真戒者，不得縱恣庸愚，自用悖戾，欺罔賢善，教誨無改。愚戾之人，四種罪報。一者神明不祐。二者斷絕善根。三者失正入邪。四者鬼魅纏繞。是大惡業，非真人行。

庸愚惡業罪消滅。

天尊言：弟子受真戒者，不得叛背國王，心不忠正，興兵動衆，傷害無辜。不忠之人，六種罪報。一者自身被苦。二者破累家族。三者歿後常處三塗，累劫無出。四者報得毒蛇惡獸等身。五者雖還人中，餘報殘戮。六者常生惡處，無自在身。是大惡業，非真人行。

不忠惡業罪消滅。

天尊言：弟子受真戒者，不得無孝順心，違逆父母，不生敬愛，疏背宗

親，不念慈恩，不生慚愧。不孝之人，六種罪報。一者王法所加。二者有情同所棄薄。三者當墮地獄，十苦加身。四者鴟梟等形，遞相殘害。五者縱生人道，不孝因緣，以爲男女，更相惱害。六者縱橫所加，天雷馘斬。是大惡業，非真人行。

不孝惡業罪消滅。

天尊言：弟子受真戒者，不得飲酒食肉，及勸人飲酒食肉。飲酒之人，有三種罪報。一者見世妨失善法，乃至未來神識暗鈍。二者顛狂昏亂，無決照心，兼墮蝙蝠，往往等身。三者縱得人身，識性荒迷，惡癡等報。食肉之人，有二種罪報。一者善法不行，斷慈悲種，所在常與衆生報酬爲冤。二者眷屬離散，多悲少歡，死墮餓鬼地獄，豺狼等身。是大惡業，非真人行。

飲酒食肉罪消滅。

天尊曰：已上十二種大惡業，速宜退省，勤行懺悔。若不懺悔，身謝之後，風刀考身，長淪惡趣，生生世世，與道無緣。有識無情，不喜聞見，何況真

智身心，自爲忍辱。

天尊說是戒已，復唱是言：弟子受真戒，次當發弘願。使得戒根牢固，如玄都山。戒相端嚴，如玉京殿。戒德光明，如琉璃珠。天人同唱，而說偈曰：

稽首三界主，歸命萬道尊。願垂真妙戒，開度於天人。能發片善心，精誠心不退。威力常加護，同歸七寶林。

太上十二上品飛天法輪勸戒妙經

（郭清點校）

# 029 太上洞玄靈寶淨土

## 生神經<sup>①</sup>（敦煌本）

經名：太上洞玄靈寶淨土生神經。撰人不詳，約出於南北朝。言修積功德往生淨土。一卷。《正統道藏》未收。《道藏缺經目錄》著錄。底本出處：敦煌P.2383號抄本。參校：P.2401V、P.4703號殘抄本。

元始天尊，時在龍羅世界香積國中九華雲殿，坐大蓮花，與十方聖衆、無量國人，大會說法，一百日中，不起于座。天下天上、若有識若無識，無量衆生，悉皆離苦，獲沾利益，悟身浮假，不淨臭穢。念念無常，入深妙定，捨諸結縛，能悟真道，迴發善心，一意歸向，專誠不退。元始天尊，大悲觀惠，平等教化，皆使悟解，會真常境，證果無爲。

天尊凝神反<sup>②</sup>景，將歸常樂空寂福堂，忽有弃賢世界十華仙等，五百四十人，同時合掌，首體投地，上白天尊：弟子等各從無量劫來，輪轉生死，因緣運會，得遇天尊。今日之慶，實爲無量，不可思議。然弟子等雖叨仙品，諸漏未盡，常恐輪轉，未免生死。此別天尊，動經萬劫，莫知後會，定在何時。欲有諮問，懼觸尊顏，特願大慈，少垂開宥。

天尊告曰：汝等累劫發心，雖學仙道，而未入大乘，致今仙位既不登上境，實未免死生。一與我別，萬劫難遇，汝今有問，正是其時。宜各安心，勿懷憂懼。是諸仙等稽首叩頭，白天尊曰：當隨天尊教化，見十方國土，男女清淨，快樂無爲；復見十方國土，男女臭穢，憂惱百端。未審修何行業，得此清淨，形容端正；作何行業，受此臭穢，煩惱纏身。伏願天尊賜垂分別，明示將來。

天尊告曰：罪福無門，唯人所召，善惡報對，皆自尔身。若修善行，即得

生淨土，形容端正，受命長遠。若造惡作罪，便居穢土，形容醜陋，年命夭傷。善惡因緣，皆由身造，諒不從他。汝等諦聽，當解說。

天尊告曰：夫人生時，建大功德，修諸行業，過去隨願，得生淨土，自在無爲。凡諸功德，總有五種，攝衆福門。

一者說法功德。謂常以天尊三洞經法，教化衆生，善巧方便，隨其根性，上中下品，稟識愚智，利鈍平人，或廣或略，譬喻權實，咸令開悟，使入正真，見世人天，保護一切，尊崇過去，得生諸天，或聰明智惠，爲大法師。

二者布施功德。謂捨身命財，無有吝惜，有四種緣。一者內施，謂頭目髓腦，手足毛髮，以用布施，飢鷹餓虎，毒蛇猛獸，諸親異類，隨其所欲，乞頭與頭，乞目與目，乞身與身，乞手與手，無所愛惜，救濟衆生。二者外施，復有四種緣。一者慈施，謂飢寒老病，囚徒餓狗，貧窮困乏，大設悲田，施衣及食，隨其所須，以用布施，拯救人民。二者

法施，謂修營靈觀，造像寫經，幡花鍾

磬，香油法具，齋誠常住，供養三寶，種

種所須。三者難施，謂國城妻子，人共

愛重，過於身命，布施爲難；能知一切

萬法，並是无常，妻子國城，暫時依倚，

因緣運會，不久分張，悟身浮虛，本來

无我，況其妻子，寄託因緣，以用布施，

不生恠惜，捨其難捨，不可思議。四者

易施，謂車馬僮僕，衣服飲食，金銀繒

綵，米麥器具，皆是浮託，易可捨弃，是

爲易施，普及一切，不擇聖凡。以此四

者，復爲廿種。一者以身布施，二者以

力布施，三者以妻子布施，四者以國城

布施，五者以園宅布施，六者以僮僕布

施，七者以車馬布施，八者以衣服布

施，九者以器物布施，十者以珍寶布

施，十一者以繒綵布施，十二者以米麥

布施，十三者以材木布施，十四者以香

油布施，十五者以飲食布施，十六者以

音樂布施，十七者以花藥布施，十八者

以法服布施，十九者以法具布施，廿者

以威勢布施。凡廿事，攝布施門。以

謂爲布施者，布謂遍布无窮，施謂施與

一切，故曰布施。

三者建立功德。謂建立營造，作

過去未來三世，歸依一切係想，凡有十

五種，隨分發心。一者造諸靈觀。聖

真仙迹，玄壇精舍，殿堂樓閣，師房廓

宇，臺榭庭苑，周匝具足，使永劫常存。

二者造諸形像。三世十方天尊、太上

聖真仙品、金剛力士、玉童玉女、護法

神王，鑄金刻玉，銅鐵木石，繡畫泥瓦，

隨其所堪，莊嚴彫飾，相好員滿，使一

切歸依。三者造諸經法。三洞七部、

聖真仙傳、符圖方法、記頌讚述，紙素

簡碣，莊黃韜軸，勘校刊定，流通讀誦，

教化人天。四者造諸帳座，大小高下，

隨時莊飾，使得精華。五者造諸幡花，

金銀珠玉，繡畫彫鏤，結縷織成，任力

所辦，供養三尊。六者造諸幢旛旌節

車輿，九光七寶，沈水旃檀，精麗微妙，

以備威儀。七者造諸香鑪，花盤燭擎，

金銀銅鐵，玉石瓦木，隨分所有，不闕

所須。八者造諸床座，氈褥茵席，因時

所出，皆使精新。九者造諸經藏，函籠

箱匣，畫繪彫飾，金銀莊校，安置寶經，

令不穢雜。十者造諸巾帕裘服，綾羅

綿綺，三色五色，悉令香潔，敷設座前。

十一者造諸几案，經架夾膝，香檀文

木，彫鏤隱起，各盡一時，供養經像，及

以出家。十二者造諸鍾磬，金銀銅鐵，

玉石等輩，大小隨時，使晝夜恒鳴，遠

近歸向，長充法器，永劫福田。十三者

造諸器物，盤盃盤椀，盆瓮釜鑊，常以

供養，齋誠所須，勿使乏少，功德難思。

十四者造諸几杖，澡灌坐褥，齋器巾

帕，供給出家，无量福田。十五者造諸

法服，巾冠履屨，衣服卧具，繩床之屬，

布施十方出家法身。凡十五者，過去

未來，功德巍巍。

四者救濟功德。謂諸人王，及以

凡庶，虫魚鳥獸，有衆危苦，皆當扶護，

爲作福田，必令安隱，不使憂惱，其福

无量，不可思議。五者智惠功德。謂

常以智惠安樂衆生，使諸人天皆歸善

道，永離苦獄，長處福堂。所以名爲功

德者，常行不倦謂之功，功遍一切謂之

德。凡此五者，恒發一十六願，大啓善

心。一爲天地，願永劫常存。二爲日

月，願光明普照，三爲星辰，願恒依分度。四爲山海，願鎮泄泉源。五爲人

王，願長守國土。六爲宰輔，願位祿恒安。七爲九玄，願克生淨土。八爲父母，願永保天齡。九爲兄弟，願行仁孝。十爲姊妹，願守清貞。十一爲親緣，願皆和穆。十二爲天下，願悉安寧。十三爲三塗，願離楚毒。十四爲一切，願各生成。十五爲己身，願與經道相遇。十六爲法界，願三洞流通。若能常行勿倦，使一切歸依，過去未來，克登淨土。

行業者，謂常淨三業，清蕩六根，行道誦經，持齋禮拜，燒香發願，懺悔然燈，奉誠散花，放贖生命，不殺不盜，不淫不妬，不憎不妬，不貪不欲。常爲國主人王，及以妃后，大臣宰輔，諸王子弟，公侯牧伯，天下人民，三塗五苦，餓鬼畜生，常建百座，召諸大德法師，及以明達有善心者，講說三十六部尊經，无上妙旨，開悟一切，晝夜不倦，燒香散花，然燈照夜，助天光明，道邊立井，種菓作屋，建造橋梁，拯救勞苦，无

輟須臾。以此爲業，勤苦行之，故日行業。

諸仙稽首問曰：衆生劣弱，力所不堪，未審有何要法，得生淨土。天尊告曰：若善男子善女子，但能造我形像，讀誦此經，晝夜禮拜，憶念在心，即得往生。若依前脩行，諸惡不犯，諸天下降，白日登天。

諸仙又曰：衆生愚迷，耽著世事，而不能依天尊教命。未審臨命終時，及已亡後，作何功德，隨願往生。天尊告曰：若當來男女，臨終之時，先當懺悔一生已來无量重罪，次爲受誠，設齋行道，造像寫經，及諸功德，布施常住，供養出家，各隨分力，唯多爲佳。閉眼之日，即生淨土，不入三塗。若已亡之後，當爲建黃錄、明真、五練等行道，從初一日，乃至百日。造幡造像，寫經燃燈，隨日計數，晝夜禮拜，誦經懺悔，燒香散花。又以生時衣服卧具，車馬僮僕，金銀珠玉，綾羅錦綺，資用財物，分爲一十七分。布施一分，修營靈觀，玄壇精舍，殿堂樓閣，房廊屋宇；一分造

諸天尊、聖真仙像；一分寫諸經教；一分陪諸常住；一分供齋中所須；一分施諸持誡，及山林學道；一分供養出家，服飲食湯藥所須；一分入諸鍾磬；一分造諸幡花；一分供諸帳座；一分以給香油；一分給濟囚徒；一分施諸貧窮老病；一分救贖生命；一分施諸悲田；一分營造橋梁道路，一分无礙布施。如此分別布施，克得生神淨土，福祐見存。凡諸灾厄疾病，造諸福田，此爲第一不可思議。今爲汝等具說，十方淨土福德之處。是諸男女，隨願往生。

天尊曰：東方淨土仁愛世界，福德莊嚴，微妙第一，自然化出寶臺寶殿，寶樓寶閣，皆以九色青玉莊嚴，內外洞徹，不可思議。玉寶皇上天尊，常處九光瓊殿，坐九色寶蓮，講說三洞无上經典，教化國中。復有慈上真人，慈惠真人，慈悲真人，慈愛真人，慈善真人，慈德真人，慈明真人，慈等真人，慈覺真人，慈濟真人，恒問難諮請，開度衆生。又有九華童子，九光童子，九合

童子，九色童子，九真童子，九仙童子，九重童子，九明童子，九靈童子，九成童子，常誦經行道，持齋禮拜，勸說人民。又有青華玉女，青宮玉女，青要玉女，青靈玉女，青蓮玉女，青芝玉女，青光玉女，青元玉女，青明玉女，青城玉女，常散花燒香，歌詠讚歎，供養天尊。又有善力金剛，善威金剛，善勝金剛，善迹金剛，善生金剛，善化金剛，善福金剛，善道金剛，善忍金剛，善惠金剛，常護國土，保佑人民，降魔伏鬼，益筭延年。又有仁德神王，仁菓神王，仁威神王，仁智神王，仁遠神王，仁勝神王，仁惠神王，仁明神王，仁安神王，仁敬神王，常制斷妖精，驅除溫癘，守護境界，消弭耶魔。又有保國將軍，保齡將軍，保命將軍，保筭將軍，保民將軍，保土將軍，保勝將軍，保威將軍，保成將軍，保信將軍，常領神仙兵馬九億萬衆，辟斥兇渠，清淨寇沘，保護人民。國中男女，年命長遠，无有夭傷。若男女臨終，神生淨土，衆聖來迎。

天尊曰：東南方淨土慈和世界，

福德莊嚴，微妙第一，自然化出寶臺寶殿，寶樓寶閣，皆以一色碧玉莊嚴，內外洞徹，不可思議。好生度命天尊，常處四明寶殿，坐四轉花臺，講說三洞无上經典，教化國中。復有明上真人，明惠真人，明德真人，明道真人，明寶真人，明智真人，明法真人，明玉真人，明相真人，明空真人，常問難諮請，開度衆生。又有真一童子，真靈童子，真相童子，真空童子，真上童子，真惠童子，真智童子，真際童子，真元童子，真道童子，常誦經行道，持齋禮拜，勸說人民。又有飛空玉女，飛香玉女，飛玄玉女，飛雲玉女，飛靈玉女，飛烟玉女，飛華玉女，飛蓋玉女，飛青玉女，飛金玉女，常散花燒香，歌詠讚歎，供養天尊。又有遊玄金剛，遊空金剛，遊上金剛，遊真金剛，遊虛金剛，遊雲金剛，遊仙金剛，遊神金剛，遊遠金剛，遊靈金剛，常護國土，保佑人民，降魔伏鬼，益筭延年。又有智山神王，智精神王，智果神王，智明神王，智忍神王，智力神王，智威神王，智遠神王，智勝神王，智德

天尊曰：南方淨土禮教世界，福

神王，常制斷妖精，驅除溫癘，守護境界，消弭耶魔。又有通明將軍，通遠將軍，通達將軍，通天將軍，通靈將軍，通德將軍，通真將軍，通道將軍，通惠將軍，通光將軍，常領神仙兵馬一十三萬衆，辟斥兇渠，清蕩寇沘，保護人民。國中男女，年命長遠，无有夭傷。若男女臨終，神生淨土，衆聖來迎。

天尊曰：南方淨土禮教世界，福



清玉女，浮霄玉女，浮輪玉女，浮明玉女，常散花燒香，歌詠讚歎，供養天尊。又有獨見金剛，獨立金剛，獨坐金剛，獨行金劍，獨輪金剛，獨光金剛，獨相金剛，獨力金剛，獨明金剛，獨照金剛，常護國土，保佑人民，降魔伏鬼，益筭延年。又有禮照神王，禮上神王，禮空神王，禮明神王，禮正神王，禮讓神王，禮惠神王，禮智神王，禮安神王，禮道神王，常制斷妖精，驅除溫癘，守護境界，消弥邪精。又有大力將軍，大智將軍，大勝將軍，大威將軍，大明將軍，大惠將軍，大集將軍，大義將軍，大煞將軍，大德將軍，常領神仙兵馬三億萬衆，辟斥兇渠，清蕩寇沘，保護人民。國中男女，年命長遠，无有天傷。若男女臨終，神生淨土，衆聖來迎。

天尊曰：西南方淨土威範世界，福德莊嚴，微妙第一，自然化出寶臺寶殿，寶樓寶閣，皆以一色黃玉莊嚴，內外洞徹，不可思議。大靈虛皇大尊，常處黃玉寶殿<sup>①</sup>，坐千葉蓮花，講說三洞无上經典，教化國中。復有素靈真人，

素華真人，素德真人，素元真人，素明真人，素玄真人，素雲真人，素誠真人，素貞真人，素寶真人，常問難諮請，開度衆生。又有黃靈童子，黃上童子，黃元童子，黃玉童子，黃雲童子，黃素童子，黃常童子，黃明童子，黃華童子，黃宮童子，常誦經行道，持齋禮拜，勸說人民。又有雲華玉女，雲宮玉女，雲開玉女，雲房玉女，雲光玉女，雲臺玉女，雲裳玉女，雲中玉女，雲成玉女，雲庭玉女，常散花燒香，歌詠讚歎，供養天尊。又有揮靈金剛，揮劍金剛，揮幢金剛，揮戈金剛，揮神金剛，揮玄金剛，揮空金剛，揮魔金剛，揮刀金剛，揮雲金剛，常護國土，保佑人民，降魔伏鬼，益筭延年。又有伏鬼神王，伏邪神王，伏魔神王，伏兇神王，伏毒神王，伏非神王，伏獸神王，伏虎神王，伏龍神王，伏妖神王，常制斷邪精，驅除溫癘，守護境界，消弥邪魔。又有冠威將軍，冠山將軍，冠海將軍，冠武將軍，冠獸將軍，冠邪將軍，冠玉將軍，冠金將軍，冠天將軍，冠靈將軍，常領神仙兵馬一十三

萬衆，辟斥兇渠，清蕩寇沘，保護人民。國中男女，年命長遠，无有天傷，若男女臨終，神生淨土，衆聖來迎。

天尊曰：西方淨土義讓世界，福德莊嚴，微妙第一，自然化出寶臺寶殿，寶樓寶閣，皆以七色白玉莊嚴，內外洞徹，不可思議。太妙至極天尊，常處七寶雲殿，坐大金床，講說三洞无上經典，教化國中。復有寶玄真人，寶首真人，寶光真人，寶愛真人，寶相真人，寶德真人，寶明真人，寶華真人，寶惠真人，寶雲真人，常問難諮請，開度衆生。又有金光童子，金華童子，金首童子，金相童子，金冠童子，金印童子，金真童子，金英童子，金芝童子，金香童子，常誦經行道，持齋禮拜，勸說人民。又有洞明玉女，洞光玉女，洞神玉女，洞玄玉女，洞真玉女，洞仙玉女，洞虛玉女，洞靈玉女，洞華玉女，洞天玉女，常散花燒香，歌詠讚歎，供養天尊。又有望雲金剛，望山金剛，望月金剛，望遠金剛，望日金剛，望空金剛，望仙金剛，望天金剛，望風金剛，望氣金剛，常

護國土，保佑人民，降魔伏鬼，益筭延年。又有乘雲神王，乘風神王，乘虛神王，乘龍神王，乘虎神王，乘日神王，乘月神王，乘烟神王，乘獸神王，乘山神王，常制斷妖精，驅除溫癘，守護境界，消殲邪魔。又有馭虎將軍，馭龍將軍，馭風將軍，馭雲將軍，馭氣將軍，馭日將軍，馭月將軍，馭空將軍，馭邪將軍，馭天將軍，常領神仙兵馬七億萬眾，辟斥凶渠，清蕩寇沘，保護人民。國中男女，年命長遠，無有夭傷。若男女臨終，神生淨土，眾聖來迎。

天尊曰：西北方淨土成化世界，福德莊嚴，微妙第一，自然化出寶臺寶殿，寶樓寶閣，皆以八色縹玉莊嚴，內外洞徹，不可思議。无量大華天尊，常處八霞花殿，坐耀天鳳臺，講說三洞无上經典，教化國中。復有无上真人，无等真人，无爲真人，无名真人，无畏真人，无色真人，无相真人，无形真人，无染真人，无量真人，常問難諮請，開度眾生。又有清靈童子，清明童子，清虛童子，清玄童子，清源童子，清通童子，

清上童子，清淨童子，清和童子，清正童子，常誦經行道，持齋禮拜，勸說人民。又有元靈玉女，元明玉女，元華玉女，元真玉女，元貞玉女，元首玉女，元皇玉女，元上玉女，元和玉女，元初玉女，常散花燒香，歌詠讚歎，供養天尊，又有振威金剛，振武金剛，振勇金剛，振力金剛，振明金剛，振山金剛，振海金剛，振天金剛，振惠金剛，振德金剛，常護國土，保佑人民，降魔伏鬼，益筭延年。又有高天神王，高上神王，高明神王，高虛神王，高靈神王，高觀神王，高山神王，高遠神王，高惠神王，高視神王，常制斷妖精，驅除溫癘，守護境界，消殲邪魔。又有宣道將軍，宣明將軍，宣威將軍，宣力將軍，宣德將軍，宣惠將軍，宣遠將軍，宣勇將軍，宣成道將軍，宣武道將軍，常領神仙兵馬一十二萬眾，辟斥兇渠，清蕩寇沘，保護人民。國中男女，年命長遠，無有夭傷。若男女臨終，神生淨土，眾聖來迎。

天尊曰：北方淨土智德世界，福德莊嚴，微妙第一，自然化出寶臺寶

殿，寶樓寶閣，皆以五色玄玉莊嚴，內外洞徹，不可思議。玄上玉晨天尊，常處五雲華殿，坐五明寶花，講說三洞无上經典，教化國中。復有玄靈真人，玄一真人，玄明真人，玄元真人，玄德真人，玄通真人，玄冥真人，玄上真人，玄和真人，玄覺真人，常問難諮請，度開眾生。又有月光童子，月相童子，月愛童子，月香童子，月上童子，月滿童子，月惠童子，月淨童子，月明童子，月智童子，常誦經行道，持齋禮拜，勸說人民。又有香雲玉女，香烟玉女，香燈玉女，香積玉女，香山玉女，香園玉女，香花玉女，香林玉女，香光玉女，香印玉女，常散花<sup>⑥</sup>燒香，歌詠讚歎，供養天尊。又有護意金剛，護身金剛，護法金剛，護印金剛，護命金剛，護力金剛，護國金剛，護壇金剛，護香金剛，護善金剛，常護國土，保佑人民，降魔伏鬼，益筭延年。又有守道神王，守印神王，守法神王，守壇神王，守善神王，守香神王，守護神王，守堂神王，守德神王，守衛神王，常制斷妖精，驅除溫癘，守護

境界，消弥邪魔。又有制邪將軍，制兇將軍，制鬼將軍，制魔將軍，制非將軍，制煞將軍，制威將軍，制神將軍，制武將軍，制力將軍，常領神仙兵馬五億萬衆，辟斥兇渠，清蕩寇沘，保護人民。國中男女，年命長遠，无有夭傷。若男女臨終，神生淨土，衆聖來迎。

天尊曰：東北方淨土智積世界，福德莊嚴，微妙第一，自然化出寶臺寶殿，寶樓寶閣，皆以十色紺玉莊嚴，內外洞徹，不可思議。度仙上聖天尊，常處六合寶殿，坐六合玄臺，講說三洞无上經典，教化國中。復有等愛真人，等上真人，等慈真人，等相真人，等明真人，等照真人，等惠真人，等智真人，等觀真人，等覺真人，常問難諮請，開度衆生。又有救苦童子，救命童子，救厄童子，救危童子，救難童子，救度童子，救善童子，救濟童子，救法童子，救護童子，常誦經行道，持齋禮拜，勸說人民。又有福堂玉女，福德玉女，福集玉女，福成玉女，福林玉女，福上玉女，福智玉女，福惠玉女，福山玉女，福淨玉

女，常散花燒香，歌詠讚歎，供養天尊。又有断邪金剛，断愛金剛，断見金剛，断畏金剛，断鬼金剛，断或金剛，断郭金剛，断疑金剛，断魔金剛，断力金剛，常護國土，保佑人民，降魔伏鬼，益筭延年。又有禦兇神王，禦邪神王，禦非神王，禦煞神王，禦魔神王，禦毒神王，禦虎神王，禦獸神王，禦靈神王，禦寇神王，常制断妖精，駢除温癘，守護淨土，消弥邪魔。又有建節將軍，建旆將軍，建旗將軍，建鐘將軍，建鼓將軍，建武將軍，建勝將軍，建符將軍，建幢將軍，建麾將軍，常領神仙兵馬一十二萬衆，辟斥兇渠，清蕩寇沘，保護人民。國中男女，年命長遠，無有夭傷。若男女臨終，神生淨土，衆聖來迎。

天尊曰：上方淨土无量世界，福德莊嚴，微妙第一，自然化出寶臺寶殿，寶樓寶閣，皆以萬種莊嚴，內外洞徹，不可思議。玉虛明皇天尊，處萬寶光明雲殿，坐萬種清淨寶花，講說三洞无上經典，教化國中，復有紫虛真人，紫房真人，紫臺真人，紫微真人，紫府

真人，紫靈真人，紫華真人，紫陽真人，紫清真人，紫元真人，常問難諮請，開度衆生。又有上靈童子，上玄童子，上元童子，上虛童子，上空童子，上仙童子，上真童子，上智童子，上相童子，上德童子，常誦經行道，持齋禮拜，勸說人民。又有景華玉女，景雲玉女，景上玉女，景明玉女，景虛玉女，景光玉女，景陽玉女，景玄玉女，景靈玉女，景相玉女，常散花燒香，歌詠讚歎，供養天尊。又有自在金剛，自達金剛，自惠金剛，自力金剛，自智金剛，自德金剛，自明金剛，自成金剛，自通金剛，自照金剛，常護國土，保佑人民，降魔伏鬼，益筭延年。又有有智神王，有力神王，有惠神王，有威神王，有相神王，有德神王，有靈神王，有畏神王，有見神王，有通神王，常制断妖精，驅除温癘，守護境界，消弥邪魔。又有天大將軍，天力將軍，天威將軍，天上將軍，天通將軍，天光將軍，天智將軍，天靈將軍，天菓將軍，天盖將軍，常領神仙兵馬、天丁力士百億萬衆，保護國土，滅滅精邪。

國中男女，與天同年。若男女臨終，神生淨土，衆聖來迎。

天尊曰：下方淨土載德世界，福德莊嚴，微妙第一，自然化出寶臺寶殿，寶樓寶閣，皆以百寶莊嚴，內外洞徹，不可思議。中黃洞淵天尊，常處百寶虛明靈殿，坐百變洞耀蓮花，講說三洞无上經典，教化國中。復有中黃真人，中明真人，中天真人，中華真人，中臺真人，中元真人，中仙真人，中靈真人，中玄真人，中輝真人，常問難諮請，開度衆生。又有光明童子，光華童子，光相童子，光惠童子，光遠童子，光耀童子，光道童子，光靈童子，光滿童子，光虛童子，常誦經行道，持齋禮拜，勸說人民。又有妙香玉女，妙花玉女，妙靈玉女，妙勝玉女，妙雲玉女，妙真玉女，妙仙玉女，妙安玉女，妙玄玉女，妙月玉女，常散花燒香，歌詠讚歎，供養天尊。又有橫天金剛，橫<sup>⑧</sup>金剛，橫山金剛，橫威金剛，橫風金剛，橫靈金剛，橫勝金剛，橫遠金剛，橫越金剛，橫蓋金剛，常護國土，保佑人民，降魔伏

鬼，益筭延年。又有案劍神王，案節神王，案武神王，案旆神王，案戟神王，案麾神王，案寇神王，案鉞神王，案虎神王，案幢神王，常斷妖精，驅除溫癘，守護境界，消弭邪魔。又有周天將軍，周<sup>⑨</sup>將軍，周鉞將軍，周正將軍，周捍將軍，周衛將軍，周成將軍，周庭將軍，周遠將軍，周通將軍，常領神仙兵馬，天丁力士百億萬衆，保護國土，滅滅精邪。國中男女，隨劫終始。若男女臨終，隨願往生。

天尊曰：十方淨土，國界莊嚴，福力自在，山林草木，皆異世間，臺閣殿堂，不同凡界。各有浮雲之觀，大道之觀，獻壽之觀，萬壽之觀，昌樂之觀，弘道之觀，至真之觀，昌國之觀，啓聖之觀，集靈之觀，薦福之觀，道德之觀。靜念之樓，燒香之樓，望仙之樓，浮空之樓，四明之樓，九華之樓，長命之樓，香風之樓，通明之樓，照虛之樓，定志之樓，靜意之樓。延真之臺，舞鳳之臺，飛龍之臺，散花之臺，結香之臺，集聖之臺，空明之臺，九光之臺，六合之

臺，霄靈之臺，萬福之臺，念真之臺。凝靈之閣，祥鸞之閣，飛香之閣，澄真之閣，凝仙之閣，化生之閣，安壽之閣，保齡之閣，長壽之閣，存真之閣，知神之閣，練心之閣。八真之宮，十輪之宮，光明之宮，洞陽之宮，青元之宮，玉華之宮，金精之宮，興靈之宮，寶運之宮，自然之宮。萬歲之殿，寒靈之殿，紫霞之殿，福德之殿，興聖之殿，安樂之殿，逍遙之殿，千香之殿，百寶之殿，通神之殿，明相之殿，說法之殿。无爲之堂，迎真之堂，九合之堂，華月之堂，萬寶之堂，十靈之堂，常樂之堂，自在之堂，香玉之堂，紫瓊之堂，洞玄之堂，萬華之堂。紫翠之房，寶蓮之房，雲碧之房，瑤芝之房，靜神之房，息心之房，寂觀之房，等相之房，明玄之房，寶命之房，安志之房，滅念之房。皆自然化出，微妙莊嚴。或結氣所成，或凝雲而作，或九光洞照，或七寶光明，或空裏自移，或迎風獨轉，隨心所念，應境而來。復有寶蓮之池，浮金之池，清香之池，沐浴之池，含香之池，浮香之池，澄

空之池，耀月之池，洞天之池，洗心之池，淨境之池，照神之池。皆清明洞徹，常湛不流，七寶爲岸，裹有金沙。復有智慧之水，濯靈之水，洞明之水，開心之水，滿虛之水，負明之水，常輪之水，環光之水，流香之水，香烟之水，照心之水，澄神之水，定心之水。皆香美芳潔，晝夜常流。復有延靈之草，長命之草，安神之草，保年之草，神仙之甘露之草，霄□<sup>①</sup>之草，華烟之草，明心之草，養神之草，和氣之草，无憂之草。皆金玉葉，不落不凋，含露迎風，飛香散馥。復有環剛之菓，蓮瓊之菓，分香之菓，合景之菓，香露之菓，鳳頭之菓，鸞心之菓，景龍之菓，明鵠之菓，磬風之菓，千金之菓，九瓊之菓。皆隨時結實，應念所甘，味列千般，形分萬品。復有耀金之花，照玉之花，飛香之花，浮霄之花，起雲之花，合露之花，迎風之花，照神之花，洞景之花，寶光之花，如意之花，觀心之花。皆如金如玉，洞景流光，隨處即生，香聞數里。復有說法之鳥，講經之鳥，共命之鳥，合氣之

鳥，同心之鳥，銜香之鳥，吐玉之鳥，漱珠之鳥，玉光之鳥，金耀之鳥，香羽之鳥，金翅之鳥。皆有五色，毛羽光明。復有開明之獸，金精之獸，披光之獸，玉面之獸，吐香之獸，鼓樂之獸，鳴鍾之獸，叩瓊之獸，散花之獸，吟靈之獸，舞空之獸，歌仙之獸。皆音聲和雅，識解人心。復有千合之香，萬和之香，百和之香，十和之香，生神之香，反魂之香，化形之香，飛景之香，凝空之香，結雲之香，度命之香，和樂之香，壽命之香。復有名香之樹，寶器之樹，音樂之樹，衣服之樹，飲食之樹，香花之樹，七寶之樹，九光之樹，龍霄之樹，鳳雲之樹，觀虹之樹，披金之樹。其樹大者高三十里，次者廿里，小者十里，皆不凋不落，花葉常榮。名香寶器，音樂衣服，飲食等輩，皆出花中，自然清淨，稱念而來。復有鳳皇孔雀，青鸞白鶴，幽昌集明發生，鸚鵡金翅等鳥，栖鳥其間，飛鳴翔舞，吟詠洞章。復有神龍靈虎，騏驎猛獸，天鹿辟耶，師子金精，遊戲其間，鳴鐘叩磬，吐玉銜珠。復有千

葉之蓮，九色之蓮，百丈之蓮，萬葉之蓮，香風之蓮，甘露之蓮，隨處而生，縱廣三里五里。國中男女，於中止息遊戲，聽經說法，自在逍遙。復有天花天菓，天香天供，天衣天樂，遍滿空中，應念而至，安樂衆生。復有車馬輿輦，皆是七寶九光，因風御氣，任意東西。復有天男天女，仙童仙媛，行道誦經，乘空出虛，散花燒香，飛行問法。復有天王仙伯，善以道德，和雅人民。復有天師太上，翼贊天尊，教化說法，開悟无边。國中男女，常誦經聞法，散花燒香，面對天尊，諮求上道。金容玉貌，相好端雅，无有憂悲。以黃金薦地，白玉緣階，内外光明，清淨第一。若男女臨終，隨願往生。

天尊告諸仙曰：夫罪極報對，宿命因緣，皆是衆生業緣所感。猶如鏡像，隨分見形，好醜短長，永不差失。若持齋奉誠，行道誦經，發願懺悔，造像寫經，建立玄壇，脩營靈觀，供養三寶，布施貧窮，放贖衆生，作諸功德，常行敬信，清淨六根，制斷欲心，不造諸

惡，正心至念，隨願往生，克之淨土，快樂無爲。若行妄想，煞生偷盜，邪媼放蕩，慳貪瞋怒，顛到愚癡，綺言妄語，惡口兩舌，祝咀罵詈，輕慢三寶，皆毀經文，不敬出家，五逆不孝，造諸惡業，不信善緣，一旦捨生，即入九幽地獄，受諸苦惱，萬劫沈淪，後得受生，處於穢土，形容醜陋，年命夭傷，聾盲六疾，怨家惡對，蟲獸虎狼，荆棘毒草，杻械枷鎖，飢寒困苦，種種惡緣，鎮相仇對，辛酸惱難，一切及身，晝夜煩冤，不曾歡樂，輪迴生死，永劫未期。皆是衆生業緣所得。吾今爲汝說此因緣，汝等勤心勸示男女，勤修善道，淨土生神，隨願應心，永不差矣。

是諸仙等，聞天尊說此十方淨土，國界莊嚴，歡喜踴躍，同聲稱善，稽首而退。

太上洞玄靈寶淨土生神經

- ⑧「子」字據前後文例補。
- ④「殿」字據前後文例補。
- ⑤「軍」字據前後文例補。
- ⑥「花」字據前後文例補。
- ⑦制：原誤作「將」，據前後文例改。
- ⑧⑨⑩原本此處缺一字。

(王卡點校)

- ①敦煌本卷首標題句末原有「一卷」二字，刪。
- ②反：原作「及」，據文義改。

# 030 洞玄靈寶太上真人問疾經

經名：洞玄靈寶太上真人問疾經。撰人不詳，約出於隋唐。言世人疾苦緣由，勸人齋戒行道。一卷。底本出處：《正統道藏》太平部。

## 洞玄靈寶太上真人問疾經序

如是一時，靈耀寶藏天尊於北龍玄幾仁賢世界，龍牙山中騫華樹下，與十方大聖衆，有若干千億萬衆，俱會法座，論講說議，研詳大乘經，詔曰五千文。終日竟夜，共美之味，常如不足，不厭不勞，不倦不懈。四方得道，及次道果，未得道果，已得道果，如此之衆，亦如塵沙。及四天王，梵炁天王，諸天帝釋，十方千億崑崙王，一切崑崙所

統，三十二天諸梵天王鬼神，諸天魔王，山海神王，暘谷神王，有若干千億萬人。三界衆生，人非人類，是含血之類，有若干千億萬衆。外道諸生，有九十八種，外道諸鬼神，復有若干千億萬衆。復有轉輪聖王，復有日月天子，十方世界諸天子，有若干千億萬衆。各各身居騎乘，及其宮殿，妻妾俱到騫華樹下，聽天尊說法。大乘經義，其義淵奧，難可尋詳。如此諸衆生，莫能解者，雖不能解，然心意歡喜，忘諸塵汗，各各散諸香華，供養天尊，願解明了。

天尊言：我說大乘經，及言三達之事，非所能解。衆中有常住高真，及過去高真，見在高真，亦有若干千億萬人。其有衆中大明了大乘弟子，有八萬六千人。其名曰无始真人、天皇真人、太極真人、高皇真人、上皇真人、太一真人、太平真人、太素真人、太始真人、景皇真人、長夜真人、正一真人、定光真人、羅翹真人、妙音真人、留羅真人、太虛真人、玄妙真人、智稱真人、大通真人、无量真人、玄寂真人、自在真

人、統三界真人、大力真人、无量力真人、相好真人、明了真人、智慧真人、无常真人、導師真人、破惡真人、保長真人。如此等真人，並皆明了大乘經法，是其先劫中修學上業，致居是真。衆中小劫身，其數如沙塵，當其先身時，不樂大乘法，是居小劫身，聞說大乘經，心意亦欣然，未有敢問者。衆中第五弟子无始真人而起作禮，上白天尊言：今說大乘法，不解者衆，未能有知，不堪受此，但使常供養，心願果後，成无上真。

天尊言：我今說大乘法，汝等悉明了，後劫諸衆生，未能解是趣。遂舉左手，指第五弟子、第六弟子，无始真人、定光真人，汝二人當於賢劫中而爲導師，汝當受號爲无始天師，定光受號爲定光天師。又指第七弟子正一真人，第八弟子玄妙真人，汝等當於濁劫中導我三乘法，正一真人當受號爲三天法師，玄妙真人受號爲六度法師。汝等四弟子，累嘗經當來過去見在，經羸入妙，及因大人國家法王之子胎孕

之恩，皆導諸羣生，濟地獄諸苦，化諸天大運，勤爲用心，令賢濁之中，使得知明了我法趣。我今分身分號，其成百千億萬，是我病痛故耳。夷是第一名，希是第二名，微是第三名，是三乘之首，一名三洞之始，其中分散，亦爲千億品經。後第一劫爲玉清宮，天寶君是我第一名；後第二劫中爲紫微宮，靈寶君是我第二名；後三劫中爲太極宮，神寶君是我第三名。詔曰：當來之劫，第一住玉清，第二散靈寶，第三制魔精。靈者是我第一號，是萬物之父，能成萬物。寶者是我第二號，是萬物之母，能生萬物之子。而爲靈寶法，以度後劫中濁世諸衆生，明導如是法，記文於虛皇。我又有十名，一爲當來，二爲過去，三爲見在，四爲常住，五爲導世，六爲慈悲，七爲清淨，八爲虛空，九爲有无，十爲天地，汝等當知敬受我言，憶識此數。時諸真等，及四方一切真，及諸天子，諸王鬼神，人非人等，咸共起作禮，同稱善哉，願我當知。爾時无始真人又問：如今所說，

法分爲千億萬，亦難可解，難可了，弟子自當知濁世中諸衆生，卒未究了，願以細者近者而言，使一切衆生咸得明了。天尊常有諸病苦，願爲分別說之，何故有斯病疾，痛惱如是，難堪如是，遂致死變，死非常死，變非常變，大聖所不免，弟子常自憂慮，常自愁煎，雖非愁毒，要有是苦。天尊含笑，八色之光從口出，狀如密雲，於是彈指告衆：未有如是問，今有此大弟子，善能問我死病之惱，死事難知易知，今當告病之由，而爲說之，一切靜心，我生諸病，從有劫至无劫，亦如流沙無數入無數，不足以爲多，常自憂惱，皆以我有身，有身則病。

### 洞玄靈寶太上真人問疾經

#### 問疾品第一

於是天尊言：後世學仙士，外披法服，內懷陰惡，是我大病；外飾華競，內无專信，是我大病；不常行道悔過，是我大病；不念濟衆生，是我大病；不慈一切，是我大病；心意懈怠，是我大病；傳授至法，不關天地，是我大病；傳經不究儀格，是我大病；以害身任行受戒，是我大病；爲魔所試不過，是我大病；國王臣民居高自驕，是我大病；富貴不以道理，是我大病；慳貪是我大病；殺害貪味，是我大病；室家不睦，六親不和，是我大病；不孝父母，不慈妻子，是我大病；不行仁義，是我大病；毀敗靜舍齋堂，是我大病；不信三寶，是我大病；不畏鬼神，是我大病；爲偷劫盜，是我大病；謀圖君主，是我大病；不順君父，是我大病；君父无道，是我大病；輕慢星辰日月，是我大病；先世惡根未



盡，中遭轆軻，還被冤家尤人咎道，是我大病；背師恩愛，是我大病；欺詐義友，是我大病；輕師忽友，是我大病；笑師非是，是我大病；不愛弟子，是我大病；不教悟弟子，是我大病；藏真出偽，是我大病；貪著聲色，是我大病；棄法入偽，是我大病；貪著小乘，是我大病；願樂外道，是我大病；事餉邪神，是我大病；嫉能稱己，是我大病；不讓德於他，是我大病；嘖嘖自是，是我大病；未知云知，未解云解，是我大病；未見云見，欺誘貧人，是我大病；換貸不還，是我大病；出債長取，大斗入小斗出，輕秤出重秤入，是我大病；惡口罵詈，是我大病；非實妄語，是我大病；飲酒過量，是我大病；衣食過量，是我大病；噉血魚腥，是我大病；貪食五辛，是我大病；出入行來卧息，不起慈悲，是我大病；諸天齋日嗔怨恚妬，是我大病；吉齋之日殺生，是我大病；夫妻陰陽，不依科法，是我大病；呵風罵雨，是我大病；笑薄貧病，是我大病；言人得失，

是我大病；憎人成敗，是我大病；穢汗清流道路，是我大病；殺生葬死骸，是我大病；愛惜財寶，不肯受法，以解其先身罪根，立善因緣，是我大病；傷胎去子，是我大病；伐斫樹木果林，是我大病；不信宿命，是我大病；云天地无有鬼神，是我大病；不知布施一切，是我大病；布施追悛，是我大病；罵逐乞兒，是我大病；聚積衣服珍寶，是我大病；論薄人爲善惡，是我大病；不救窮厄飢急，是我大病；不過一切死敗，是我大病。我有此等七十二病，彌劫不脫，不能免之，是以故變形散氣，化神分身，以成七十二聖。聖中有真，真中有品，品中有章，章中有句，句中有辭，辭中有氣，氣中有象，象中有微，微中有細，細中有无，无中有有，是謂微妙。妙中上氣无氣而成真身，下氣有氣而成肉身，故有水火風地，合成四大身。我身大病者，爲有四大，无此者有何患哉，我實无四大，有何大患。以知我身，則是我身，弗知我身，則非我身，知我身則長存，不知我

身則夭傷，痛毒於地獄，長更於五道，輪轉於无窮，故我以此變也。自非大業，莫能奪之，奪之之法，如說聞之。我死苦者，以老病故也，生必有死，盛必有衰，人物一統，无生不終。物生於春，長於夏，秋枯冬凋。事成有敗，高則有危，安則有悲，樂少苦多，孰能知乎。死者煩毒，精神難化，沈彌積夜，苦哉由行，諸天雖樂，長憂无常，精神散者，四大難會，故宅難還。我有此苦，實非我苦，我死非死，我生亦非生，我老亦非老。苦哉有之，有之者非我身，无之者是我身，詔曰我死，詔曰我生，生死之對，我免之，不免者衆生是也。座中大衆，有悟及未悟，一時願得時解，而起作禮稱善。

天尊言：修大乘以解縛者，每行齋戒，佩三洞大符，帶三洞大錄，及契策，依法行道轉經，六時不倦。所以制作六時者，人受四大生於六情，六情不去，要有罪源，一時除眼，二時除鼻，三時除口，四時除耳，五時除心，六時除手，能晝夜行之，六情自消，六慧便通，

六度行也，則無復有闕，神通衆魔，自在具足，長生久視，無諸苦毒憂惱。然燈者，光映長夜之府，以解七世父母，天下父母衆生之闇，燒香者，以除三界中臭穢，使地獄還香潔。猶之如蘋香之草，一名鬼藥，一名薏蘭，方圓四百里中常揚氣，以薰三界衆生，使成諸氣，病以沈水栴檀薰陸等香攘之，三界地獄還香潔，魂神得化，衆生得蘇，天下歡心，六情消滅，五常自息。五常自息，能報五德，一者父母，二者師徒，三者主人，四者國王君父，五者百姓父母，恩愛師徒，關津主人，供養國王，撫卹鎮愛百姓孤窮，是謂五德。數中明之，明之自知，言如所說，非以虛妄，真實之語，衆生可知可學，諦思諦思。

### 治耳戒神通普聞品第二

聞上真吟嘯聲，七寶宮殿自然妓樂聲，諸天說法講誦聲，龍鳳嘯歌聲，靈風散華聲，魔王謠亂聲，仙童玉女從真和音聲，天鼓自然鳴聲，衆聖上朝聲，五帝度仙品聲，北帝校死籍聲，南斗定生錄聲，中斗注仙簡聲，三界分別

善惡聲，太山判罪網聲，國王宮殿妓樂聲，耀兵教武聲，文思詩章說議聲，諸道士行香禮願聲，講習通義聲，教化童蒙聲，救疾度厄聲，童男童女聲，山林河海鬼神言語善惡聲，隱士幽谷中耽味至經聲，地獄餓鬼東西乞食聲，地獄魍魎鬼被考掠苦惱呼喚聲，責役三官勤苦求死不得聲，陽官囚圜考對苦痛聲，六畜爲人所殺苦喚聲，禽獸魚鳥更相噉食聲，鬥爭牽引鬼神聲，殺生祭祀邪神聲，鼓音鐘鈴聲，嬉戲悲哀悼聲，貧人稱怨聲，疾痛呻吟聲，富貴自驕聲，劫盜殺害聲，奸姪色味聲，天上天下如此種種之音聲，皆悉能聞知，猶不亂耳根，皆治戒所得神通故也。

### 治眼戒神通普見品第三

見諸天宮殿中上真說法時，十方高聖安然不動時，日月分景時，宮商相和時，陰陽相生時，龍鳳嘯鳴時，飛天散華時，天尊空中導引時，大會道場教化諸天時，三界度仙真品時，五帝記名時，國王臣人嬉戲時，道士講論經法時，悔過行道時，生死別離時，悲哭哀

悼時，地獄苦魂惱毒時，陽官囚徒痛劇時，飢渴不得飲食時，禽獸魚鳥更相害食時，殺生祭祀鬼神時，淫色花落時，妄語非實時，陰惡讒嫉時，懈退稱怨時，天上天下如此種種時，皆悉能見，猶不亂眼根，皆治戒所得神通故也。

### 治鼻戒神通普聞香品第四

諸天自然香，陀羅微妙香，沙摩泥鱗香，波提漫華香，風生密河香，青華白華香，紫華赤華香，蒼華黃華香，兩地陰雲香，金剛色名香，十方高真身形之美香，諸天彩女之氣香，栴檀沈水香，高涼青桂香，安息雀頭香，艾蒨葶蒜香，蟲蟀菴檔香，薰陸安息香，芝草明蘭香，美水藥品香，畜華真形香，人頭鳥羽香，童男童女香，毛鮮軻月香，口氣柔嫩香，天上天下如此種種之香氣，皆悉能聞知，猶不亂鼻根，皆治戒所得神通故也。

### 治口戒神通普知味品第五

諸天甘靈味，嚙日服華味，引月餐精味，食无吸光味，羅生映玄味，綠水黃精味，英草美薤味，玉璽通玄味，風

生玉石味，松柏甘口味，无生生薰味，天上天下如此種種味，皆悉能美知，猶不亂口根，皆治戒所得神通故也。

#### 治手戒神通普通力品第六

手不取自足，不動自盈，不搖自豐，不移自平，不運自力，不執自來，不握自舉，不把自滿，與神手同，皆治戒所得神通故也。

#### 治心戒神通普妙品第七

心能攝三界，能運太虛，能使魔靈，能伏衆精，能爲宮殿，能爲陰陽，能導日月，能戲道場，能遊上真，能爲光華，能入細微，能爲大象，能爲水火，能爲風地，能濟天地，能救地獄，能過諸厄惱，能解諸形，能同萬物，種種悉能爲，猶不亂心根，皆治戒所得神通故也。

天尊言：此是受四大之體，能順法治戒者，見世今身普得神通，雖未證道真，且令神足，從此進學，漸入微妙，從一至三，克果之期，便是久視之道，雖遠三惡，无諸愁惱煩毒，六者既通，則與一神爲合，則俱然飛騰上清也。

#### 語來生學仙一切人求欲果報品

#### 第八

若欲變化飛行，修誦是經，果而如願；若欲服藥自鍊求道，修誦是經，果而如願；若欲餐精嚙氣，身在无爲，修誦是經，果而如願；若欲導引吐納，去遠憂惱，修誦是經，果而如願；若欲講讀大乘經，以求昇騰太空，修誦是經，果而如願；若欲乘景輪之車，遊戲太虛，修誦是經，果而如願；若欲戲龍鳳擊節，修誦是經，果而如願；若欲入常住正真，修誦是經，果而如願；若欲作自然妓樂，修誦是經，果而如願；若欲入當來過去，修誦是經，果而如願；若欲破大魔軍，修誦是經，果而如願；若欲能无能有，修誦是經，果而如願；若欲能成能敗，修誦是經，果而如願；若欲能大能小，能妙能微，修誦是經，果而如願；若欲能天能地，能山能海，修誦是經，果而如願；若欲能寒能暑，能和能柔，修誦是經，果而如願；若欲見十方常住衆真，而爲說法，果後而見是真；若欲見過去衆真，而爲說法，果後

而見是真；若欲見見在諸真，而爲說法，果後而見是真；若欲見空中自然宮殿，而爲說法，果後而見此宮殿；若欲見諸天妓樂，而爲說法，果後而見此妓樂；若欲見一須彌所統三十二天帝，而爲說法，果後而見此天帝；若欲見梵炁天王，而爲說法，果後而見此王身；若欲見轉輪聖王，而爲說法，果後而見此王身；若欲見天大將軍身，而爲說法，果後而見此將軍身；若欲見諸梵天王，而爲說法，果後而見此王身；若欲見十方千億須彌王身，而爲說法，果後而見此王身；若欲見十方世界諸天子，而爲說法，果後而見此天子身；若欲見十方世界諸天王身，而爲說法，果後而見此王身；若欲見魔王宮殿，而爲說法，果後而見此宮殿；若欲見三界鬼神身，而爲說法，果後而見此鬼神身；若欲見陽谷神王身，而爲說法，果後而見此王身；若欲見五帝身，而爲說法，果後而見此帝身；若欲見龍鳳諸獸身，而爲說法，果後而見此龍鳳諸獸身；若欲得聰明智慧身，

而爲說法，果後而得是身，若欲去離窮厄，而爲說法，果後而爲福身；若欲轉女爲男，而爲說法，果後而爲男身；若欲求轉男爲女，而爲說法，果後得爲女身；若欲爲隱士，而爲說法，果後而爲隱士；若欲爲導師，而爲說法，果後而爲導師；若欲制役魔精，而爲說法，果後而能制魔精；若欲世間求安，而爲說法，而見世得安；若人宅墓不寧而爲說法，而得潛寧；若惡緣未斷，居家輻軻，死喪不止，而爲說法，而獲消散，還得利貞；若欲斷世間禁忌鬼神爲祟，而爲說法，而得解釋不爲禍累；若欲朱門榮宦求得通達，而爲說法，果如所願；若欲治生供衣食之用，而爲說法，而如所願；若欲免冤家之責咎，而爲說法，而得解斷；若欲常生福德之國，有道之境，而爲說法，而如所願；若欲宗廟胤長，多嗣輯睦，而爲說法，而如所願；若欲生國王家，而爲說法，而後生國王家。衆生聞不解，不知我

真實之語，常能香燈飯食珍寶寶蓋華幡繒帳衣服床席高座堂屋供養法師，

志行如是，果報克至，種一獲萬，如田稻之實，善自力勵，勿生疑惑，失汝因緣，墮落長夜，輪轉五道，此悟量難也。

### 前劫時衆生爲功德受報品第九

天尊言：前劫中諸衆生，學無上道，供養三寶者，早已成真道；誦詠洞經者，早已成真道；修行齋戒者，早已成真道；吞精嚙氣者，早已成真道；服御導引者，早已成真道；八節奏簡於五嶽三河者，早已成真道；供養法師衣服者，早已成真道，勸助香腴衆者，早已成真道；發願隨喜大乘者，早已成真道；布施放生者，早已成真道；助人營精舍靜室者，早已成真道；種植果林供養法師堂宇者，早已成真道；助人讀誦經者，早已成真道；助人營齋運力者，早已成真道；觀聽行道悔過發信解者，早已成真道；信心唱句善哉者，早已成真道；檢身畏敬法者，早已成真道；出入臥息坐起常行慈悲者，早已成真道；放生度死者，早已成真道；不嫉妬志學者，早已成真道；常歎善佳者，早已成

真道；不念殺生者，早已成真道；賜乞貧窮者，早已成真道；救厄卹急者，早已成真道；然燈照夜者，早已成真道；善明護法者，早已成真道。有如此之功，真人得道甚多，略言其事，皆記名金格玉簡，皆前劫時發是因緣故也。

### 德覆譬喻品第十

天尊言：我是衆生之父母，憐汝愛汝，慈愍一切，覆育一切，潤澤一切，一切物得我，如魚之得淵，如兒得母，如飢得飯，如渴得飲，如病得醫，如民得王，如恐得旅，如溺得船，如貧得寶，如刑得赦，如絕得蘇，如敗得成，我法普度衆生，如大雲彌天，布靄隸細雨，无不蒙澤。衆生知我不，我成汝生汝養汝育汝長汝愍汝，汝等何不知慈悲以報我恩，行諸善行。而見我經法不知悔立緣，趣墮惡道，沈落地獄，可痛可哀。明各修勵，以得免罪根，果報長樂，如我所說義。

衆生本行因緣受不善報品第十一  
先身誅人滅族，今報其無後；先

身殺人小兒及傷胎去子，今報其有子多夭傷，成冤家之子；先身憎人喪禍，今報其常嬰輻軻；先身憎人得失，今報其常被誹謗；先身笑人貧，今報其此厄；先身偷劫，及富貴无道，誘取貧賤，及換貸不還，今報其爲牛之身，常負重擔，但念水草；先身出債一求償十，今報其常苦乏；先身憎人病疽疥癩癱瘓，今報其此疾；先身嫉人聰明，今報其愚闇；先身著履上靜堂宇，今報其脚折及无間關，行出不便；先身夜入人家姦盜，今報其无眼，亦憎人盲也；先身居富室獨食，假借不通，不卹危急，仁義不達，輕慢貧賤，今報其生邊夷之國，非人之類；先身不聞云聞，及憎人聾疾，今報此疾；先身姪色中外骨肉，今報其驢馬身；先身殺害含血之類，貪食其肉，今報其生六畜及野獸之身，爲人所害，以酬先冤；先身殺生葬死骸，今報其所殺之形；先身殺人墮，今報其无墮；先身殺人婦，今報其无婦；先身憎人成敗，今報其常嬰凶禍；先身始人至學，今報其不知

學；先身爲臣吏人，更相憎嫉，讒害无道，致令橫敗，冤對相牽，今報其爲人所讒害；先身飲飼鬼神，今報其常不足流弊世間；先身惡口罵詈，今報其常爲人所罵憎惡，爲狗犬身；先身飲酒无節，過量犯惡，今報其性理倒錯；先身不孝父母，今報其生不孝之子；先身不慈愛兄弟妻婦，今報其爲家不厚，常自鬥爭，爲人所笑薄；先身願人爲己奴婢，今報爲奴婢。有如此緣甚多，今略言其一，粗令悟知也。衆生勿發如是願，如是行，善惡之報，立在信然。若无是緣，俱是生人中受四大同

中來；居世聰明智慧，從先身敬信學問經法中來；居世爲人所敬畏，從先身戒慎三寶中來；居世衣食有足，從先身濟諸窮乏中來；居世仕宦朱門高

一，而有愚智相去何；若才不才相去何；若高貴貧賤相去何；若明不明相去何；若六情完具及不完具相去何；若談講論及議及不議相去何；若爲人所敬愛及不敬愛相去何；若尊禮及不尊禮相去何。若斯等略言其事也。

### 衆生行業受善報品第十二

無始真人言：天尊所說要事，斯妙極之，足令衆生回心，其中品目有億千，衆生未能解了，惟道與道，對共解道，惟真與真，對共解真，惟无與无，對共解无。我受號後劫中，當爲无始天師，導太上大乘法，自究今言，諸大衆

居世富有，從先身布施中來；居世爲人王，從先身供養三寶中來；居世爲法師，善能導化，從先身思念大乘

中未悟此真實，其數亦多。

天尊劫身猶如陽谷宮殿，有水靈之臺，方圓八十萬里，等高亦然，中有金沙，沙大如芥子，滿其中，萬齡一枚自消，如此消盡。以爲天尊小劫身，其猶如北方有一百八十崑崙所統，三萬八千世界中，山陵丘瓦土地林木，一時末爲細塵，若於大虛空中揚之，其數猶如天尊身。大劫一周，衆生未悟也，不信也，座中四衆小乘身，小劫身，諸天子諸天王諸天帝，亦復不知聞，今說之，亦咸有疑，何況濁世諸衆生發有疑惑，是以說之，自可明了。信者亦難，知者亦難，悟者亦難，受者亦難，遇者亦難，見者亦難，奉者亦難，則是我身之難，我爲導師，猶難之以爲難，爲難審无有難。

无始真人言：五千文是靈耀寶藏，天尊五體中神，神亦爲老子詔曰五百，老子共集此義，靈爲衆生之父，寶爲衆生之母，耀爲太陽之光，以明澤一切，藏爲包含，萬物而生其中，我亦嘗經之。

天尊瞻千億須彌中諸世界衆中善

惡，學與不學，人及非人，一足兩足，四足多足，濁生濕生，卵生胎生化生，如是諸惡，悉皆我眼前從身生，常去眼數寸耳。衆生云不知不見，不見其真父母，或云真聖高遠，或云无有神明，能孝父母，則靈氣降，不孝父母，則禍罰至，胎生父母是因緣寄孕，其義一等，孰能知乎。學大乘爲緣，但願生非是至願果得道者，及功德未足，復應輪轉寄生，而福根常不絕，後生常在賢貴富有，德爲人尊，相好具足，動爲善神所導，學遇明師，葬遇吉山，妻遇好女，出遇食祿，凶神敢干。不樂與三寶爲緣，不信有聖言，惡聲罵詈，所爲不善，常生下賤，學遇闇師，葬遇凶山，妻遇羸婦，出輒失財，縣官相連，舉向不利，善神不祐，凶神所牽。皆由前緣宿命所爲，各各星主之，善者屬善星，惡者屬惡星，生死有對，甚有分明，自非大乘所濟，莫能免也。衆生知不，而敬信外道，諸述書籍，此迷誤可哀將深。有百九十八種道者，亦是天尊身。所以爾

者，十方世界中衆生心行各異，不知有

鬼神，故惡以化惡方便導之，善勸悟之，隨順其本心，漸令知道，悟審上道。爲正一者，无内无外，无表无裏，无精无羸，无二亦无三，无十亦无百，以行求之，求之由心，幽明之理，甚有微妙。諸衆生見不見，常如見，畏不畏，常如畏，慎不慎，常如慎，行不行，常如行，受不受，常如受，愛不愛，常如愛，脩不脩，常如脩，要使如是三百六十契令，是真非真，是一非一，如我所說明之也。

此經是天尊金口所出，不得輕毀，輕則禍罰，崇則福宥。若有志大乘之子，必能耽向供養讀誦，思詳是義，以解見世之罪，以滅先緣之惡，以釋九祖之殃，以濟一切之苦。將來求道，使精神澄正，鬼神擁護，魔王敬禮者，齋金寶，質心長齋千日，然後而付焉。

无始真人言：我受无爲以萬物之氣息也，始者是萬物結精氣也，生死之理，我身是也。一名龍牙山，二名龍身，三名龍肝，四名鳳鳴，五名師子頭，

六名小劫，七名常住，八名見在，九名當來，十名過去，此山方圓八千億萬里，騫華樹下方圓四百億萬里，上聖高真一劫而降此山，說大乘經，集會大眾。

天尊爾時種種說法，一切各各自知，悟其語種類相隨，無誤謬鳥蛾之王，俱同一解，起於此山，山以黃金爲壇，白銀爲階，七寶爲樹，慶雲爲華，龍鳳天獸所依棲，衆中諸衆生亦有未嘗見遇。

天尊開大宥而爲見其山形，亦是先身之緣，諸是學者，勤脩大乘法，果後得會此山。其山亦有七寶宮殿，自然妓樂，是國無春夏秋冬夏，陰陽氣候，自然常存。大乘經其一耳，支散爲千億萬，龍車所不能載，東井不足爲洿。一者，五千文是也，是空也，是虛也，是無也，是有也，是天也，是地也，是萬物也。十方常住高真，共所思議無厭也。厥一字者，天尊內名常示世間，衆生弗悟耳，後世衆生有得道果者，及至賢聖聰明智慧儒學之人，而思惟是義，或用

爲外教虛談，亦善也。此經是大聖之身，內引氣靈，外敷妙義，莫能究也，過去劫中諸衆生思惟是趣，各各信言，其意此已消也，言談是理非理，得與不得，知趣及不知趣，我亦能納受，不責於人，順百姓之心，詔曰以百姓心爲心也。

无始真人言：道家治身之法，如恒河沙，非可盡學，但令執一者耳。服符道引，吐納隱藪，先功未滿，其不能也，可勤供養是經，禮拜祝願，讀誦修研，善心信向，無有疑惑，懈退怠倦，志意日新，亦克得飛騰策駕龍車，九祖同輪，善自思之，是經者，五千文也。

元始真人勤學頌，其辭曰：妙哉无上道，道真五千文。空无本无跡，有跡霞散分。分者難思測，三一合帝君。三乘无有二，虛皇敷導宣。衆生多疑惑，說法悟以傳。解根惡緣速，去離老病煩。長生居久視，果業乘景雲。逍遙太虛中，高聖乃齊群。億劫由朝晨，未有憂惱冤。顧看後學子，懈退信不專。平相稱嫉妬，那得同升

轅。沈滅九夜下，考楚是汝魂。轉輪三塗中，善緣不復聞。

无始真人言：前劫時人學上仙長生之道，不死之法，不念居世，居世則多想，多想則有憂，有憂則累心，累心則忘道，有妻子則憂妻子，有財寶則憂財寶，有疾病則憂疾病，有死喪則憂死喪，有貧窮則憂貧窮，諸有此行，豈離死痛，與長生便乖。有一身者不知憂，不知憂則道法長存也。後世學惑也，惟知愛惜身命，不知保愛精神，形是四大之屋室，爲屋豈能長久，人去屋則不立，使精神散，精神轉輪不滅，不沈不絕。愚人厚營廣塚大材，殺生葬送，以此爲孝慈，不知應有長夜之對，惑哉惑哉。其不願爲太上寶，趣爲國王民，此之謂苦也。聖人有子弟者，非其子弟，是前人有福寄其聖姓耳，聖人無有種學者，要令解之至如解。前劫時其功未滿，學上道仙品，未足運應滅度，身經太陰，有子弟請諸法師，及其義友親表，爲行三七齋，轉五千文，十過以拔其魂神。夫學上道之士，求轉輪速騰，

不必有年壽，如世間凡人愚者，保愛命長未悟耳，既未悟，則有哭，有哭則見身之病也，可哀世人本有成敗，長短有哭。所以三七齋者，一七水官除罪，二七土官解過，三七三界度生，離地獄苦，無復有對，便得速化。竟三七日，營法是佳，弗者日數中節，節亦善也，六時勤苦，以過命者先。所有衆物爲信，供養法師三寶，善思之焉，斯妙矣，並是後世一切人之惑也，生時不知爲善，立福田之業，死時所有衣服衆寶珍物埋送棺塚之中，益爲亡者惱累，不知以爲作開度其死者，津塗其亡者。生人不忍者，自可寒夏各一通，不須有長此忘衆生之實。明思我言。

无始真人言：當來之世，衆生心多麤惡，不悟善緣，不如今生朴實，自當有後賢智者告諸法則，禮教之文，夫因緣之理，則生父母兄弟伯叔姊妹姑姨六親之義，有哀服之科，此是爲一切凡人之施，非學上道之士所可同其科也。父母以下命終，每發爲功德之心，願同更化生其真父母前，不復生死，无

祭靈之目，益爲喪道心。詔曰而亂之首，善詳之焉。

无始真人言：後學之子，最忌非分貪婪，枉遏人理，而彊爲己潤，爲人所怨責，喚告鬼神，雖受經法服符，導引吐納，齋戒行道，及服靈藥，節食飲，徒自勞形體於外形，僊亦无所感致，更被考速耳，麤事不能奢，挾此學道，詔曰求競世間，非謂真實也。見世爲惡鬼所殺不覺，死時既如此，精神沈墮地獄，受對難明識我言。學者行心入蟲蟻中，亦使和心入六畜中，亦使和心入鳥獸中，亦使和心入鬼神中，亦使和心入好惡人中，亦使和心入林木中，亦使和心入一切，萬物同善其行，无分毫惱責之心，如此克爲鬼神所擁護，三界所保舉，自然成真。

无始真人言：天尊及我身觀未然及過去見在之事，朗然如在我心。

天尊爾時即放額頂之中紫毫相光，普照十方千億崑崙三萬六千大千世界，其中種種衆生，无有不見了然，其光如金色，光中有百千種音聲，衆生

樂聞，從光中尋之，不覺至騫華樹下，一切善得而聞說法因緣之根，是天尊喻取一切大威神故也，一劫一遇耳，宜監臨後學，善自行焉。

天尊有大威神力，是勉濟諸衆生，故其猶如三界中，无形有大聲，无形大力，有攬之不得，如虛空中日月星辰，玄居不著，下至自然，運轉人身亦爾。所以氣通神力，如是人存真，真存人，人敬神，神敬人，人愛靈，靈愛人，人忘氣，氣忘人，人忽道，道忽人，故曰有善緣，從明入明，從見入見，從解入解，從樂入樂，不爲善緣，徒過入過，從冥入冥，從苦入苦，其對有斯，是衆生之本，後劫中能信能行，能奉能修，能善能勤，有爲是法師，善說我語，而爲導師，勸一切令入法門，行齋修經，悔過祈請，以救生死之縛，其儀律甚多，要用後聖所撰集詳行焉。立功覲願，從一至十，從百至千，從千至萬。集繒寶物，以施齋官，中分爲三，一分供養靈寶三師，二分供養至真上聖，三分供養善緣。果報之理，亦如有无，有无中



真，從此爲之。

真人言三分者，一施齋官，一施供養法師，一年三年一施供養度師祖師，二師不存，以付籍師，傳送依三天法，爲之如此也。

夫真人之號，其有儀格，去上道猶遠，是神通自在，不復退落，役鬼使神，猶尚有爲，勤爲大功，歷劫入微，漸至上道，諸有如此，比例皆是。前劫中學道之人，而爲其真，非卒可求，希生爲緣，係著幽冥，自然不忘，忽爲懈怠，被試退落，方復淪沈五道，未有反時。明識我言，我受天尊教勅，後劫中爲衆生父母，教子生長之緣，避惡之人，善慎詳我之言。

夫導運應開之劫，惟天師出世，其在一也，非爲聖聖所出，經戒亦无大小，亦无前後，亦无高下，同爲一耳，其有品格，詔品等帙，聖聖各有爲者，爲衆生故也。非二非三，同如我身，學者善能解之，玄都舊格，玉清三十一卷，紫微三十六卷，太極三卷，其品及部數各有盟，有盟以爲身寶，保其氣故也。

夫死者皆從內起，非外入，既從內發，外便有應，有應則致大災，內固不動不耀，湛然安神，詔曰默神神自居。故曰上學无爲，无爲氣治，下學有爲，有爲則身心同勞，同勞則宿縛披散，漸至氣治，非爲默神，行罪既消滅，自然神靜，神靜便久視，其功未滿，默神亦不立，要令勞身苦體，救濟萬物，不倦其苦。

國王有災，修誦是經；君父不安，修誦是經；疫毒流行，修誦是經；人民死病，修誦是經；日月失昏，修誦是經；星宿錯度，修誦是經；劫運有終，修誦是經；風雨不時，修誦是經；師友疾病，修誦是經；室家終亡，修誦是經；五穀不熟，修誦是經；盜賊多有，修誦是經；衆生相詛，修誦是經；學退不固，修誦是經；罵詈嗔恚，修誦是經；諸天齋日，修誦是經。行齋誦經，聲徹太虛，舉響有降，令爲梵音，梵音微妙，感應衆聖，魔王敬禮，諸真稱善，有如此之功，上與天真齊德，漸入神定。身中三十二相，自得具足，髮青長，項紫光，眉月形，耳玄聽，目明精，鼻涕冷，

口方圓，齒濡剛，白銀潔，數四十，細等平，舌灌泉，引月精，洩宮津，喉婁高，柱強堅，手柔握，內外攬，脚力彊，步玄空，心正安，制魔王，肝耀明，入岱宗，肺氣素，著華陰，腎發力，觀恒山，脾受氣，藹嵩高，瞻威聲，振靈響，誦通微，入无間，此皆是學所得，非自然也。

洞玄靈寶太上真人問疾經

（汪桂平點校）

# 031 太上洞玄靈寶十號功德因緣妙經

經名：太上洞玄靈寶十號功德因緣妙經。撰人不詳。約出於隋唐。言天尊名號及三洞真經源流。一卷。底本出處：《正統道藏》洞玄部本文類。

太上大道君與五老上帝、無極飛天大聖、無上高真、十極真人、左玄真人、右玄真人、妙行真人、普濟真人、施命真人、濟厄真人、救苦真人、大慈大悲真人、大慈大慧真人、正一帝君、諸大天師、金剛神王、力士、天龍、鬼神等，於棄賢世界，以神通力忽變無數紅玉牀座，光明晶皎，諸真聖衆，而列其上。

爾時道君乃登七寶獅子之座，其座以雜寶瑠璃、真珠、火珠、明月珠、碼碯、珊瑚、琥珀、紅玉、白玉、碧玉、綠

玉、黃玉、玻璃、黃金、紫金、青火金、香檀木，嚴飾其上。於此座上，自然生百寶蓮花、百千層葉，一一蓮葉之上，現出十方淨土，悉皆具足。會中有大七寶騫林，細葉交密，香氣郁結，廣高莫測，風動和雅，有微妙音。其間自然飛化，種種天樂，不鼓自鳴。是時道君即於蓮臺之上，正箕而坐，放身中五色光明，照耀無邊天界。空中聖衆步虛旋

遠，歌咏讚嘆，即時天雨香花、大妙真花、小妙真花、紅金焰花、紫金焰花、鳳頭火花、郁馥火花。妙服珍果、白鶴、鳳凰、喜祥鸚鵡、青鸞孔雀、大善金鳥、光明金鳥、念道金鳥、人言金鳥、樂音金鳥，悉銜異花，飛翔會上。即有十方神仙、飛仙、天仙、地仙、水仙、火仙、五嶽諸仙，及諸大小洞天一切大仙，各持符執節，幡蓋寶幢，歌詠讚嘆，吟和靈章，奏大妙樂，供養道君。即時大地振動，會中相視，奇異莫測。有一真人，名曰普濟，於衆中出，整理衣巾，安詳雅步，到道君前。稽首頓顙，上白道君曰：賤臣愚昧，不測道君修何道果，證

是神通自在，與元始天尊無異。伏願哀念賤臣，及未來世衆生，及愍後學道士，演說斯理，令悟甚深法要，登无上道，獲難思果，賤臣幸也。

道君聞普濟語，歎言：善哉善哉。汝有宿本大智，能為未來濁劫衆生抑揚妙法。汝可存念，為汝說此因果。我於無數劫來，念本師元始天尊十號功德，讚嘆吟詠，鑄寫圖飾，想念元始天尊。禮拜供養恭敬，千萬珠金捨施，無慳惜心，至於今日，無一念怠慢，而成此功德。

普濟復白道君：未審元始大聖天尊十號，賤臣及與會衆，得而聞不？臣願與諸真仙衆，讚歎歌詠。言訖，叩頭稽顙悲涕，仰視道君。一座大衆，皆自默念，仰望真容，而希宣說。

道君開顏微笑，告普濟曰：汝可精思一聞，得證无上道果。道君復告普濟曰：我本師大聖元始天尊，虛无自然，妙道化身。從不可名言塵沙劫來，濟度一切衆生，入无上道，具七十七相，八十一好，十號圓滿。或現千光

相，或現無邊相，或現大身相，或現小身相，或變身入黍米之中。或開毛孔，納無邊世界；或掌三千大千世界；或兩甘露，灑熱惱衆生；或作帝王，制伏暴亂；或爲賢佐，匡乎有道；或有聖君，爰降爲師。有如是功德，神通妙相，莫能窮嘆，而有十號，讚揚總名。是故十號者，无上道、元始、太極、高皇、光明、玉帝、正法王、大慈父、仙真師、天尊。

普濟復告道君言：賤臣雖聞十號功德，未審有何解說，令我及諸大衆，乃至未來濁劫衆生，令得了悟至真法要。伏願愍念賤臣告請，一一宣揚十號微妙功德行相之法，賤臣幸也。

道君復告普濟曰：所言十號者，是諸真聖衆天人，與天真皇人，開赤明和陽天中白玉殿內百寶之匣，風錦之笈，譯大梵隱言，而爲正音。所言无上道者，乃是元始天尊道果成時，於諸衆法無祖無宗無根無係，而一相俄立，乃萬法依憑，爲萬法王，爲萬相之祖，爲一氣始，虛无不測，溟滓何知，居於萬

衆之先，故名无上道。所言元始者，居至道源，作窈冥本，故曰元始。太極者，從無數劫來，判朴之際，報身乃現，於是始青天中而現化身，故名太極。高皇之號者，尊居無頂天中，逍遙大羅之上，名无上之上，超有象之先，是故號曰高皇。所云光明者，是謂法性真體瑩若瑠璃，易功德光，照昏闇處，銷衆生障，破煩惱山，故號光明也。玉帝者，位居玉闕之中，尊極萬天之帝，凝然真性，妙相具足，巍巍蕩蕩，出衆真之中，同星拱月，故稱玉帝。所言正法王者，演說正法，破邪異宗，開無爲道，滅一切苦，明無邊法門，印可三天經籙，降伏魔邪，除諸小見，令入大乘之道，如大醫王，法藥治苦，若春雷震，發動萌芽，滋長含生，如灑甘露雨，沃潤衆根性，故號正法王。大慈父者，從無量無邊劫，不可測微塵沙劫，出現大聖身，濟度羣生，脫生死羅，入正真道，或於惡趣拯救罪苦衆生，過於赤子，是名大慈父。

所言仙真師者，道君告普濟言：

我與汝及無邊無量劫來，天尊大聖、諸真大仙，昇無上道果，一切天尊，諸真聖衆、天王天帝、玉帝大帝、三華帝、五帝大魔，名山洞府、虛空水陸，一切含生，已得果、今得果，及未得果者，皆是我本師元始天尊，現虛无法身、自然報身、元始化身，以真諦法種種引導，說三十六部尊經。或於林泉名山大嶽，或於大洞天、小洞天，或在三十六天之中，或在三十二帝宮內，或在三清大羅及無邊界，或諸異域，及一切含生類聚之處，有形有相，如是種種，隨根察其言語，變現化引。未開度者，誓與開度。未得道者，誓令得道。未安樂者，誓使安樂。未解脫者，誓化解脫。未昇玄者，誓引昇玄。以此弘誓，開導一切，演說三洞要術，大藏妙文，天書玉字，金寶祕篇，皆悉具足。傳授諸法，雖復無邊，我總括流通，十二事部類，分別隨根不同，令一切衆生各歸一趣，得悟正法。一者本文，二者神符，三者寶訣，四者靈圖，五者譜籙，六者戒律，七者威儀，八者方法，九者術數，十者

記傳，十一者讚誦，十二者章表。具足如是智慧，開如是法門，導化接引濁劫衆生，視如諸子。諸子而自不曉悟，雖布大慈如是，設悲念之網，衆生戀於聲色，種種纏愛，而遊還三界，不歸正道，唯執邪見。而遇天尊化誘至真之法，皆以開悟，而從劫已來救苦無倦，故號仙真師。

普濟白言道君：未審十二部事，妙理法要，有何相化。如大法雨，隨器充滿，變動衆生根性，賤臣未曉微妙之理，乞爲解說一一悟解，賤臣幸也。

道君告普濟曰：第一本文者，天書八會鳳篆龍章，是爲天地萬物之本，開化人神，成立諸法，主召九天神仙上帝，較定圖籙，調政璇璣，攝制鄴都，降魔伏鬼，勅命水帝，召龍止雲，天地劫期，聖真名諱，所治臺城，衆聖境界，廣宣分別，種種皆差，服御元精化形之法，皆演玄妙，明了具足。第二神符者，雲篆之文，神真之信，召攝衆魔，威制神鬼，總氣御運，保命留年。第三寶訣者，天真上聖述釋天書八會之字，以

爲正音，開視大道。第四靈圖者，衆聖化跡，應現無方，圖寫變通，令物悟解。第五譜籙者，衆聖記述仙真名諱，宗本胄胤，神官位緒。第六戒律者，條制勅禦，防非檢過，詮量罪福，分別輕重。第七威儀者，具視齋戒進退楷模，俯仰節度，軌式容止。第八方法者，衆聖著述丹藥祕要、神草靈芝，柔金水玉，修養之道。第九術數者，明辨思神，存真念道，心齋虛忘，遊空飛步，餐吸六氣，導引三光，鍊質化形，仙度之法。第十傳記者，是衆聖載述學業，得道成真，通玄入妙，修因方所，證果時節。第十一讚頌者，衆真大聖巧飾法言，稱揚正道，令物信樂，發起回向，生尊重心。第十二章表者，師資授受，妙寶奇文，三元八節，登壇告盟，啓誓傳度，悔謝請福，關告之辭。此十二事部，總彰正道，一切意趣，無不周備。化引三乘，證无上道。我大聖本師，號天尊者，常處三清之上，超衆聖道界，顯世地卑，獨居天爲最尊，故號天尊。此是元始天尊十號功德，法門妙趣。

道君復告普濟曰：若有未來濁劫衆生，得聞我本師大聖元始天尊十號因緣功德，更能圖鑄形像，歌詠讚嘆，禮拜恭敬，演說是法。此人九祖生天，宿業消滅，身得長生不死之道。家門安泰，子孫昌熾，世世遇道，不遭厄橫。若有人書修此經，功德無量。說是十號功德已，於是在會大衆，皆得昇進仙階，超拔聖位，悉悟无上正真道果。普濟真人證天中尊號，曰尋聲救苦天尊。具八十一好，七十二相。十號滿足，光明瑩徹，空中讚言普濟，有如是告請功德，不可思議，難測智慧。當於來世，與一切衆生爲道師中王，爲大法眼，與道君神通何異。於是一切來者衆生，聞是法要，離生死苦，悟正真道。於是普濟承道君神力，欲昇三天，而作頌曰：

道君大慈悲，金口演真藏。十號今得聞，令我證真道。稽首無爲師，千光具足相。

太上洞玄靈寶十號功德因緣妙經

（郭清點校）

# 032 太上洞玄靈寶三十

## 二天天尊應號經

經名：太上洞玄靈寶三十二天天尊應號經。撰人不詳。約出於隋唐。原本二十六卷。言歸命朝禮三十二天尊名號。現僅殘存第十二卷及二十二卷。底本出處：《正統道藏》太平部。

### 太上洞玄靈寶三十二天天尊應號經第十二卷

自第一卷至十一卷原缺

#### 慾界

#### 清明何童天

爾時衆會，有一仙人名曰梵明，從座而起，嚴整衣冠，前進上問清明何童天帝君曰：我昔侍覲天尊，歷游靈館，

得見法會，不可思議。今日之光，未曾有此。聖真仙品，咸進秩位，歡喜踴躍，不能自勝。十方天尊，冠華晨之冠，衣雲錦之服，一音說法，度諸天人。左侍上聖真仙，右衛金剛力士。飛霜紫密，瓊藥芝英，反風靈香，衝天翳日。是時應會，欣躍難言。預是衆生，咸得安樂。不審下界諸男女人，無數生來，積習成業，生生世世因緣，得免考責，當何歸向，可解深尤。

清明何童天帝君曰：汝大慈行，愍諸衆生，如此因緣，功勳甚重，爲汝解說，諦而奉之。衆生緣報，非一可原，遍祈真靈，方得解免。今開金華宮中銀簡玉錄天尊應號，以示將來，祕而奉之，勿妄宣泄。有心男女，當勤敬禮，乞削深尤，燒香明燈，思神禮師，一如科法。鳴天鐘十二，咽液三過，調聲正氣，詠无量洞章：

清明稼祿滋，那逕反龍山。阿秀玉林條，奕奕四垂騫。忽覺靈劫化，訶摩以敷辰。流真三界庭，吟嘯來運動。清明何童天金華宮中銀簡玉錄，

東方九氣天中无極世界一百天尊慈悲應號，燒香齋靜，禮拜願念，削落明真九幽玉匱長夜之函，普使人天離苦解脫，消塵沙罪累，獲无量善緣。

- 至心信禮十極妙光天尊。
- 至心信禮八威結成天尊。
- 至心信禮玄通道會天尊。
- 至心信禮高虛道運天尊。
- 至心信禮高光運明天尊。
- 至心信禮三華西靈天尊。
- 至心信禮靜定長存天尊。
- 至心信禮至景靈曜天尊。
- 至心信禮玄道四梵天尊。
- 至心信禮真道照度天尊。
- 至心信禮真寶寂然天尊。
- 至心信禮聖真東華天尊。
- 至心信禮戒生洞玄天尊。
- 至心信禮靜定光一天尊。
- 至心信禮四天高尊天尊。
- 至心信禮慧虛運明天尊。
- 至心信禮南極洞明天尊。
- 至心信禮重玄保存天尊。
- 至心信禮三華聖真天尊。

至心信禮三天太上天尊。  
至心信禮智功開朗天尊。  
至心信禮金晃凝寂天尊。  
至心信禮素通妙樂天尊。  
至心信禮混成太一天尊。  
至心信禮空洞无礙天尊。  
至心信禮仙道混成天尊。  
至心信禮衆妙方便天尊。  
至心信禮妙運明化天尊。  
至心信禮四明逍遙天尊。  
至心信禮方便正智天尊。  
至心信禮至道智明天尊。  
至心信禮金經凝寂天尊。  
至心信禮朱苑妙彩天尊。  
至心信禮玄悟三天天尊。  
至心信禮感妙開光天尊。  
至心信禮紫真南明天尊。  
至心信禮法王虛皇天尊。  
至心信禮寶經上元天尊。  
至心信禮上元運明天尊。  
至心信禮地皇八素天尊。  
至心信禮因果福慶天尊。  
至心信禮北真妙光天尊。

至心信禮朱暎玄元天尊。  
至心信禮空寂洞智天尊。  
至心信禮太玄太極天尊。  
至心信禮高真救生天尊。  
至心信禮明應皇運天尊。  
至心信禮方便善巧天尊。  
至心信禮妙容化成天尊。  
至心信禮運明真廣天尊。  
至心信禮衆妙真空天尊。  
至心信禮高運廣明天尊。  
至心信禮洞性空寂天尊。  
至心信禮玄元長樂天尊。  
至心信禮朱聖妙尊天尊。  
至心信禮南極真空天尊。  
至心信禮上聖因緣天尊。  
至心信禮玄運至道天尊。  
至心信禮桃康玉光天尊。  
至心信禮拔苦慈恩天尊。  
至心信禮皓暎虛无天尊。  
至心信禮妙果丹素天尊。  
至心信禮朱輪妙尊天尊。  
至心信禮中黃運道天尊。  
至心信禮妙光金彩天尊。

至心信禮化道妙運天尊。  
至心信禮靈官西明天尊。  
至心信禮地皇太一天尊。  
至心信禮靜定三業天尊。  
至心信禮真道化明天尊。  
至心信禮方便保護天尊。  
至心信禮上品天皇天尊。  
至心信禮仙德洞元天尊。  
至心信禮上清真元天尊。  
至心信禮內暎三光天尊。  
至心信禮妙光丹格天尊。  
至心信禮仙道光度天尊。  
至心信禮定慧上品天尊。  
至心信禮遍明慧道天尊。  
至心信禮真一最勝天尊。  
至心信禮聖真无窮天尊。  
至心信禮拔苦青華天尊。  
至心信禮法王寶海天尊。  
至心信禮文明高運天尊。  
至心信禮慧道明空天尊。  
至心信禮空相衆善天尊。  
至心信禮因果克成天尊。  
至心信禮真應運明天尊。

至心信禮變見最勝天尊。  
至心信禮凝寂金宮天尊。  
至心信禮空寂洞元天尊。  
至心信禮青元妙力天尊。  
至心信禮无相普潤天尊。  
至心信禮法會青華天尊。  
至心信禮九光洞真天尊。  
至心信禮妙彩金格天尊。  
至心信禮瓊瑤法海天尊。  
至心信禮玄響運明天尊。  
至心信禮无滯上生天尊。  
至心信禮神清上洞天尊。

清明何童天帝君曰：若諸男女至心歸命歸依，頓首金華宮中銀簡玉錄，東方无極世界一百天尊慈悲應號，稱揚讚歎，吟詠洞章，思神念真，燒香然燈，清齋靜室，乞得滅除自无始劫至于今生，存亡二世積行所犯言无信實詭誑之罪。爲東方十直之神、天帝使者、司命司錄，著名罪錄，上奏天曹，歷世纏結，不能解脫。罪繫清明何童天東方无極世界靈官之府玉匱之函，下考酆都狂風飄浪地獄，歷劫辛苦，无由解

脫，衆罪備履，望返何期。如此之罪，咸乞滅除，五苦長解，形魂安寧，衣食自然，逍遙適樂。上賴天尊大慈之惠，下獎男女歸依之誠。

清明何童天金華宮中銀簡玉錄，南方三氣天中无極世界一百天尊慈悲應號，燒香齋靜，禮拜願念，削落明真九幽玉匱長夜之函，普使人天離苦解脫，消塵沙罪累，獲无量善緣。

至心信禮内音上品天尊。  
至心信禮金殿妙寂天尊。  
至心信禮解脫常映天尊。  
至心信禮三清法王天尊。  
至心信禮貴生玉真天尊。  
至心信禮西明高聖天尊。  
至心信禮金玄妙彩天尊。  
至心信禮寶都法寶天尊。  
至心信禮地皇青真天尊。  
至心信禮妙果丹果天尊。  
至心信禮戒生正真天尊。  
至心信禮空仙法海天尊。  
至心信禮紫清光遍天尊。  
至心信禮應帝高勝天尊。

至心信禮朱輿妙彩天尊。  
至心信禮威光淨明天尊。  
至心信禮大道化明天尊。  
至心信禮化寂應感天尊。  
至心信禮真空德應天尊。  
至心信禮真明太虛天尊。  
至心信禮真品普潤天尊。  
至心信禮丹紫妙首天尊。  
至心信禮瓊映法海天尊。  
至心信禮光照仙靈天尊。  
至心信禮玄應度明天尊。  
至心信禮飛仙上靈天尊。  
至心信禮一切常度天尊。  
至心信禮中品真覺天尊。  
至心信禮長樂方便天尊。  
至心信禮九光大洞天尊。  
至心信禮青華法舟天尊。  
至心信禮度死聖王天尊。  
至心信禮明光玉光天尊。  
至心信禮妙光正法天尊。  
至心信禮寶煥法海天尊。  
至心信禮銀臺妙樂天尊。  
至心信禮中元玉京天尊。

至心信禮慈恩真品天尊。  
至心信禮真君天皇天尊。  
至心信禮妙音无量天尊。  
至心信禮无量遍度天尊。  
至心信禮金都凝寂天尊。  
至心信禮神通萬變天尊。  
至心信禮保存太玄天尊。  
至心信禮法燈常有天尊。  
至心信禮大運明玄天尊。  
至心信禮聖王虛遊天尊。  
至心信禮紫清上洞天尊。  
至心信禮冲虛三乘天尊。  
至心信禮神變道運天尊。  
至心信禮空浮上品天尊。  
至心信禮明行玄元天尊。  
至心信禮常一中千天尊。  
至心信禮丹紫二觀天尊。  
至心信禮延筭元慧天尊。  
至心信禮萬廣運明天尊。  
至心信禮上運行明天尊。  
至心信禮神通五音天尊。  
至心信禮虛道玄運天尊。  
至心信禮方便長樂天尊。

至心信禮大道廣明天尊。  
至心信禮上清大洞天尊。  
至心信禮北真七暎天尊。  
至心信禮空觀玄會天尊。  
至心信禮常運照道天尊。  
至心信禮青華太上天尊。  
至心信禮自然化靈天尊。  
至心信禮聖真南極天尊。  
至心信禮上運廣道天尊。  
至心信禮東華護命天尊。  
至心信禮救生法雲天尊。  
至心信禮高勝諸法天尊。  
至心信禮丹元玄都天尊。  
至心信禮玉寶金都天尊。  
至心信禮方便隨分天尊。  
至心信禮真道行成天尊。  
至心信禮三光神精天尊。  
至心信禮妙樂空洞天尊。  
至心信禮遷昇隨方天尊。  
至心信禮金根聖真天尊。  
至心信禮中仙主錄天尊。  
至心信禮湛寂玄應天尊。  
至心信禮明廣上道天尊。

至心信禮玉寶金闕天尊。  
至心信禮常虛運明天尊。  
至心信禮北真玉晨天尊。  
至心信禮大光南極天尊。  
至心信禮照迷仙靈天尊。  
至心信禮照明道運天尊。  
至心信禮慧玄運明天尊。  
至心信禮廣照道運天尊。  
至心信禮鬱羅法王天尊。  
至心信禮玄通真一天尊。  
至心信禮洞真北元天尊。  
至心信禮西明八威天尊。  
至心信禮高尊朱尊天尊。  
至心信禮普慈妙虛天尊。  
至心信禮聖王无量天尊。  
至心信禮道運慧文天尊。  
至心信禮玄運慧明天尊。

清明何童天帝君曰：若諸男女至心歸命歸依，頓首金華宮中銀簡玉錄，南方无極世界一百天尊慈悲應號，稱揚讚歎，吟詠洞章，思神念真，燒香然燈，清齋靜室，乞得滅除自无始劫至于今生，存亡二世積行所犯嫉妬他人有



才勝己之罪，爲南方十直之神、太一八神使者、司命司錄著名罪錄，上奏天曹，歷世纏結，不能解脫。罪繫清明何童天南方无極世界靈官之府玉匱之函，下考酆都煇煇地獄，歷劫辛苦，无由解脫，衆罪備履，望返何期。如此之罪，咸乞滅除，五苦長解，形魂安寧，衣食自然，逍遙適樂，上賴天尊大慈之惠，下獎男女歸依之誠。

太上洞玄靈寶三十二天天尊應號經

第十二卷

卷十三至二十一原缺。

太上洞玄靈寶三十二天天尊應號經第二十二卷

自二十三卷至二十六卷原缺

无思江由天明真之臺紫元寶藏瓊簡玄文，西方七炁天中无極世界一百天尊慈悲應號，燒香齋靜，禮拜願念，削落明真九幽玉匱長夜之函，普使人天離苦解脫，消恒沙罪累，獲塵數善緣。

至心信禮丹天洞空天尊。  
至心信禮洞空三元天尊。  
至心信禮金藏妙靈天尊。  
至心信禮洞元仙元天尊。  
至心信禮華苑妙尊天尊。  
至心信禮紫清无等天尊。  
至心信禮運明神空天尊。  
至心信禮瓊瑤法成天尊。  
至心信禮淨明無礙天尊。  
至心信禮玄響道音天尊。  
至心信禮金彩高尊天尊。  
至心信禮太元性一天尊。

至心信禮金變妙用天尊。  
至心信禮隨方開度天尊。  
至心信禮仙解光暎天尊。  
至心信禮太真无等天尊。  
至心信禮无礙太極天尊。  
至心信禮真空大梵天尊。  
至心信禮真光上昇天尊。  
至心信禮上元運明天尊。  
至心信禮延壽青華天尊。  
至心信禮法海寶真天尊。  
至心信禮光煥法海天尊。  
至心信禮太清大洞天尊。  
至心信禮天運智明天尊。  
至心信禮真品天帝天尊。  
至心信禮王道廣明天尊。  
至心信禮明智本通天尊。  
至心信禮高智道運天尊。  
至心信禮萬會真元天尊。  
至心信禮混成真觀天尊。  
至心信禮慧德自然天尊。  
至心信禮瓊質法海天尊。  
至心信禮洞明丹天天尊。  
至心信禮朱極寶輪天尊。

至心信禮高文道邁天尊。  
至心信禮一乘玄景天尊。  
至心信禮開通保生天尊。  
至心信禮洞玄救生天尊。  
至心信禮丹元平等天尊。  
至心信禮廣訓普慈天尊。  
至心信禮運明玄光天尊。  
至心信禮自然真品天尊。  
至心信禮无相澄湛天尊。  
至心信禮道行洞空天尊。  
至心信禮北元真玄天尊。  
至心信禮素相妙樂天尊。  
至心信禮无滯太混天尊。  
至心信禮萬悟洞元天尊。  
至心信禮八會北真天尊。  
至心信禮開光應妙天尊。  
至心信禮太清慈恩天尊。  
至心信禮機感上靈天尊。  
至心信禮七道真尊天尊。  
至心信禮洞視西靈天尊。  
至心信禮海空戒生天尊。  
至心信禮方便延年天尊。  
至心信禮運明妙道天尊。

至心信禮高運明皇天尊。  
至心信禮運明高仙天尊。  
至心信禮方便開光天尊。  
至心信禮妙彩慈慧天尊。  
至心信禮慈力拔苦天尊。  
至心信禮法被无極天尊。  
至心信禮昇玄天通天尊。  
至心信禮化周无垠天尊。  
至心信禮明道玄運天尊。  
至心信禮寶明神通天尊。  
至心信禮應明神運天尊。  
至心信禮高尊衆善天尊。  
至心信禮真空妙觀天尊。  
至心信禮玄光上宮天尊。  
至心信禮常闡一乘天尊。  
至心信禮太一太元天尊。  
至心信禮上靈善慧天尊。  
至心信禮洞元仙門天尊。  
至心信禮響音神運天尊。  
至心信禮結成流鈴天尊。  
至心信禮威顏法寶天尊。  
至心信禮生成妙光天尊。  
至心信禮迷解普慈天尊。

至心信禮玄元朱暎天尊。  
至心信禮弘法玄應天尊。  
至心信禮丹元肅然天尊。  
至心信禮丹紫大有天尊。  
至心信禮應見慧能天尊。  
至心信禮慧眼仙靈天尊。  
至心信禮丹紫羽蓋天尊。  
至心信禮妙彩玄靈天尊。  
至心信禮太空真侶天尊。  
至心信禮玄宰北元天尊。  
至心信禮妙樂丹輿天尊。  
至心信禮保命開靈天尊。  
至心信禮神行運明天尊。  
至心信禮紫清開淨天尊。  
至心信禮丹紫祕密天尊。  
至心信禮法藏遍明天尊。  
至心信禮運明慧應天尊。  
至心信禮玄應有觀天尊。  
至心信禮法化妙應天尊。

无思江由天帝君告真人曰：若有  
百姓男子女人，至心信禮明真之臺紫  
元寶藏瓊簡玄文，西方无極世界一百  
天尊慈悲應號，稱揚讚歎，吟詠洞章，

思神念真，燒香然燈，清齋靜室。乞得滅除无始劫來生生世世，家門宗室，九親姻族、內外緣羅，積行所犯誘取經書而傳弟子之罪，爲西方十直之神、太一司命司錄，定其罪目，上聞天曹，歷世纏結，不能解脫。罪繫无思江由天西方无極世界靈官之府玉匱之函，下考太玄女青下元考正曹，歷劫辛苦，无由解脫，往返循環，无有限極，死而復生，幽而復明，受諸苦報，備歷異形。如此之罪，咸乞解免，九幽罷對，三惡道空，長夜光明，逍遙適樂，上荷天尊大哀之惠，下獎男女歸命之誠。

无思江由天明真之臺紫元寶藏瓊簡玄文，北方五炁天中无極世界一百天尊慈悲應號，燒香齋靜，禮拜願念，削落明真九幽玉匱長夜之函，普使人天離苦解脫，消恒沙罪累，獲塵數善緣。

至心信禮普德聖真天尊。  
至心信禮三天真一天尊。  
至心信禮丹景上洞天尊。  
至心信禮玄元妙寶天尊。

至心信禮玄行運明天尊。  
至心信禮北真聖真天尊。  
至心信禮真空德重天尊。  
至心信禮神通照朗天尊。  
至心信禮寂然大道天尊。  
至心信禮天真度苦天尊。  
至心信禮寶成无等天尊。  
至心信禮真道得度天尊。  
至心信禮梵明天真天尊。  
至心信禮神運明玄天尊。  
至心信禮感應虚无天尊。  
至心信禮八景法王天尊。  
至心信禮金映妙素天尊。  
至心信禮隨心應會天尊。  
至心信禮慈應拔苦天尊。  
至心信禮元光紫清天尊。  
至心信禮真通德化天尊。  
至心信禮寶德難思天尊。  
至心信禮慧德寂然天尊。  
至心信禮度真道要天尊。  
至心信禮妙金法相天尊。  
至心信禮金真妙絢天尊。  
至心信禮廣運真行天尊。

至心信禮常一空性天尊。  
至心信禮太元玄真天尊。  
至心信禮金都妙尊天尊。  
至心信禮昇玄真明天尊。  
至心信禮妙寶變生天尊。  
至心信禮道運神照天尊。  
至心信禮慧道玄泰天尊。  
至心信禮運明本應天尊。  
至心信禮法王度人天尊。  
至心信禮空歌結成天尊。  
至心信禮至微應明天尊。  
至心信禮神通開照天尊。  
至心信禮大洞无色天尊。  
至心信禮戒生上宰天尊。  
至心信禮大道延壽天尊。  
至心信禮至達明虚天尊。  
至心信禮照明皇極天尊。  
至心信禮真訓朗清天尊。  
至心信禮長樂太元天尊。  
至心信禮高運明飛天尊。  
至心信禮玄常解脫天尊。  
至心信禮太平寂然天尊。

至心信禮妙彩玉清天尊。  
至心信禮慧玄運明天尊。  
至心信禮金開妙尊天尊。  
至心信禮虛極上虛天尊。  
至心信禮天姿妙行天尊。  
至心信禮救生洞寂天尊。  
至心信禮空觀上宮天尊。  
至心信禮周感三界天尊。  
至心信禮金威凝相天尊。  
至心信禮普開慈光天尊。  
至心信禮神慧普朗天尊。  
至心信禮真珠妙果天尊。  
至心信禮道開高化天尊。  
至心信禮空中萬變天尊。  
至心信禮合成高尊天尊。  
至心信禮太玄梵行天尊。  
至心信禮道勝天運天尊。  
至心信禮五運通明天尊。  
至心信禮左玄紫清天尊。  
至心信禮妙觀仙城天尊。  
至心信禮洞玄海空天尊。  
至心信禮常昇上道天尊。  
至心信禮靜樂銀皇天尊。

至心信禮普洞光明天尊。  
至心信禮德充最勝天尊。  
至心信禮太真丹天天尊。  
至心信禮行功德滿天尊。  
至心信禮苦魂真救天尊。  
至心信禮玄通八朗天尊。  
至心信禮玉真貴生天尊。  
至心信禮真運明清天尊。  
至心信禮南極法王天尊。  
至心信禮素煥妙樂天尊。  
至心信禮金彩素玉天尊。

太上洞玄靈寶三十二天天尊應號經  
第二十二卷

(郭清點校)

# 033 太上靈寶洪福滅罪 像名經

經名：太上靈寶洪福滅罪像名經。撰人不詳，約出於唐代。言歸名信禮天尊以滅罪之法。一卷。底本出處：《正統道藏》洞玄部本文類。

昔時安忍國王太子，名太虛，字海空，行心至願，出家修道。父王愍其執心秉直，非可斷遏，乃召國中真士無上真人，降天宮內。太子匍匐膝行前進，叩頭頓首乞恩。太虛千載有幸，得遇真師，仰愧天地一切神靈，喜懼屏營，不知所謝。弟子伏聞靈寶大法、三元真經、上清紫書，金簡玉籙，字方一丈，文彩煥明。丹誠所依，仰希韜蘊，願垂敷演，下慰塵心。無上真人欣然答曰：善哉善哉。汝精心求道，頂拜歸

依，累劫以來，實未曾有。聞吾真經下世，度諸天人，科禁威嚴，靈文寶祕，至道之奧，非中仙所知。雖位貴儲君，洗心慕法，而臭滓濁穢，莫敢輕傳。太子於是五體頓地，順風膝行，上啓真人曰：在世浮虛，無一真實，生老病死，劫劫不停，位雖居高，誰能長保，石火逝水，浮泡電光，莫有喻也。雖至法高祕，希眇篇題，幸願弘慈，賜垂開示。太虛請辭儲位，栖託幽林，父王愍之，允其誠願。真人知太虛誠心可錄，真道有期，爲開紫陽玉笈，雲錦之囊，具依法科，盟天而傳靈寶真文三元品戒。太虛於是叩頭搏頰，仰謝鴻恩。自稟受真經，固辭父王，入人鳥山中，清齋研思。十二年中，五老帝君爲太虛受書，得爲真人。以中元之日，於宮正殿嚴淨粧飾，神旛寶蓋，靈果名花，國中所有珍玩之彩，名香貴寶，百味飲食，鮮潔精華，建立山盤，隨方布施，反風名香，徑衝九天，上至天宮。

時元始天尊照見太虛堪可化度，與飛天神仙、諸天帝君、玉童玉女、金

剛神王、天丁力士，前導後從，自天西北而來，隘空降席。是時天宮之中，上聖雲集，亦無迫迍。俄頃之間，天尊口吐五色，微妙光明，照徹諸天三千大千世界，洞視如一，無有障闕，如觀指掌，不可思議。

天尊告四衆曰：我聞國人若男若女，累劫已來，不能清淨，驕奢自恣，煩惱自纏，年命短促，無由解脫。吾爲諸來生開方便門，拔治衆苦，普使安樂，咸歸善道，同趨玄津。爾時四衆擎奉，敬聽法音。

天尊告曰：衆生行業，非只一源。善惡苦空，徧諸法界。雜惡報對，無量無邊。爲諸來生，略示科簡，遂演二十四門戒約，誘勸迷途，究竟道場，隨分獲果，作斷煩惱之寶劍，爲照四迷之法燈。內靜塵勞，外除纏縛，諸根咸淨，登正觀門，並令衆生，到解脫地。於是無上真人，及諸仙衆，咸受戒示，作禮奉行。

爾時會中有一真人，名曰仙威，見是妙會，難可譬喻，歡喜無量。上問天

帝君曰：昔聞大會說法，威光煥明，不謂於今親得遭遇，諸天諸聖，同一法音。此土他方，明如指掌。元始天尊，威光赫奕，驚駭神祇，左侍仙卿，右衛真伯，朱鳳玄龜，青龍白虎，天男天女，無鞅之衆，浮空隘然，大開寶藏。是時會衆，進高真位，其初學者，咸入仙階。伏聞下界衆生，染習三惡，不慈不孝，不愛不仁，累繫三官，無由解脫，當何歸向，可得原愆，復何修行，而得赦貸。

天尊曰：汝宜諦受。吾今爲汝開示未聞，解釋煩惱，斷除惑障，當開玄都之境瓊簡真文天尊應號，以悟來生，皈命至誠，清齋燒香，然燈志心，信禮元尊玄號，寶秘靈文，及諸仙衆，禮拜願念，削落明真九幽玉匱長夜之函，得生人天，離苦解脫，消恒沙罪累，獲塵數善緣。是故志心，歸命信禮。

信禮虛無自然元始天尊。

信禮天上金闕玉房虛無自然天尊。

信禮香林園內放大光明拔度諸苦天尊。

信禮天皇大帝天尊。

信禮妙觀仙慧天尊。

信禮道慧真空天尊。

信禮長樂空寂天尊。

信禮救生平等天尊。

信禮橋梁一切天尊。

信禮一乘雲羅天尊。

信禮金號妙寂天尊。

信禮至德普慈天尊。

信禮慧明慧空天尊。

信禮無爲無惠天尊。

信禮真空妙有天尊。

信禮法王混同天尊。

信禮重玄妙勝天尊。

信禮元同無礙天尊。

信禮梵氣元功天尊。

信禮結成瓊瑤天尊。

信禮金華凝始天尊。

信禮道海寶山天尊。

信禮上洞三天天尊。

信禮三境逍遙天尊。

信禮寶真法寶天尊。

信禮百寶太清天尊。

信禮廣訓方便天尊。

信禮太玄元真天尊。

信禮中山常寂天尊。

信禮三天高皇天尊。

信禮太妙重玄天尊。

信禮仙素上真天尊。

信禮香光混成天尊。

信禮淨空雲宮天尊。

信禮政智玄元天尊。

信禮梵行法寶天尊。

信禮因果常一天尊。

信禮因緣慶流天尊。

信禮高勝光相天尊。

信禮最勝救苦天尊。

信禮道運高慧天尊。

信禮法政三天天尊。

信禮太真聖王天尊。

信禮玄紀戒生天尊。

信禮玄會法輪天尊。

信禮常行運度天尊。

信禮法海聖真天尊。

信禮神道智運天尊。

信禮玉真飛天天尊。

信禮空淨雲宮天尊。

信禮紫清九聖天尊。

信禮碧落結成天尊。  
信禮正啓空寂天尊。  
信禮逍遙金光天尊。  
信禮金姿凝尊天尊。  
信禮銀簡妙樂天尊。  
信禮道運神化天尊。  
信禮寂然玉光天尊。  
信禮戒生自然天尊。  
信禮決定常德天尊。  
信禮玄光妙寶天尊。  
信禮凝寂金天天尊。  
信禮高勝法燈天尊。  
信禮上靈開輝天尊。  
信禮感因開導天尊。  
信禮光敷百變天尊。  
信禮空洞德徧天尊。  
信禮感赴香林天尊。  
信禮度世長樂天尊。  
信禮西明妙化天尊。  
信禮素元妙樂天尊。  
信禮萬道光明天尊。  
信禮道元廣運天尊。  
信禮萬清真元天尊。

信禮西明妙化天尊。  
信禮明都西明天尊。  
信禮法王南極天尊。  
信禮法輪東華天尊。  
信禮金臺妙尊天尊。  
信禮金法凝空天尊。  
信禮希微無滯天尊。  
信禮無等大慈天尊。  
信禮方便衆妙天尊。  
信禮六度三乘天尊。  
信禮玄明真通天尊。  
信禮運明廣行天尊。  
信禮明慧至道天尊。  
信禮應期仙階天尊。  
信禮無爲上品天尊。  
信禮神應方便天尊。  
信禮朱極開度天尊。  
信禮金聖妙尊天尊。  
信禮西靈三華天尊。  
信禮妙言常宣天尊。  
信禮常除煩惱天尊。  
信禮高勝舟航天尊。  
信禮升玄法濟天尊。

信禮戒生度厄天尊。  
信禮紫霄結成天尊。  
信禮東華上品天尊。  
信禮救生無色天尊。  
信禮凝寂金城天尊。  
信禮十華無滯天尊。  
信禮道應真空天尊。  
信禮拔苦真濟天尊。  
信禮寶明紫虛天尊。  
信禮素顏妙樂天尊。  
信禮難思普慈天尊。  
信禮慧道高運天尊。  
信禮上京玉真天尊。  
信禮安演雲宮天尊。  
信禮玄救解脫天尊。  
信禮大道虛明天尊。  
信禮空明高勝天尊。  
信禮玄明真道天尊。  
信禮照明至運天尊。  
信禮妙靜方便天尊。  
信禮真道業成天尊。  
信禮湛然常樂天尊。  
信禮救苦法王天尊。

爾時一百二十應號、三十六部尊經，一切賢聖天尊等，俱在妙樂真境，化度三界羣生，使普入樂境，契道合真。若百姓男女，至心徧禮此天尊慈悲應號，即得無極世界靈官之府玉匱之函，下考酆都諸惡地獄，歷劫辛苦，無由解脫，萬惡備履，望返何期。如此之罪，咸乞滅除，三塗並解，五道清閑，長離幽夜，更生天堂，逍遙無爲，衣食自然。上賴天尊慈悲廣被，下副男女歸命之誠。

信禮東方普慈救度天尊。  
信禮南方大慈救苦天尊。  
信禮西方慈敬護魂天尊。  
信禮北方延生却死天尊。  
信禮東北方護魂保命天尊。  
信禮東南方萬善慈救天尊。  
信禮西南方延壽度人天尊。  
信禮西北方弘普救度天尊。  
信禮上方大慈普救天尊。  
信禮下方扶衰延命天尊。  
次禮洞真十二部尊經：  
信禮上清經。

信禮妙真經。  
信禮太一仙經。  
信禮妙林仙記經。  
信禮開化經。  
信禮仙人品經。  
信禮黃林先生經。  
信禮太上真經。  
信禮道教經。  
信禮太上練精經。  
信禮太上功德經。  
信禮道德經。  
右經十二部，天寶君爲教主，在玉清境清微天玉清宮中，計二十三萬五千四百四十卷。  
次禮洞玄十二部尊經：  
信禮太上洞玄靈寶經。  
信禮元陽經。  
信禮原辰經。  
信禮太劫經。  
信禮太上開山海經。  
信禮諸天内音經。  
信禮太上八練生尸經。  
信禮靈懺經。

信禮太上消魔經。  
信禮太上無量壽經。  
信禮老君按摩經。  
信禮太上通身經。  
右十二部經，靈寶君爲教主，在上清境禹餘天玄都元陽七寶紫微宮，計八十五萬八千一百二十卷。  
次禮洞神十二部尊經：  
信禮太清經。  
信禮老君徹視經。  
信禮太上集仙品經。  
信禮洞淵神呪經。  
信禮無上內祕經。  
信禮真一志經。  
信禮太上集靈經。  
信禮太上小中精經。  
信禮元置品經。  
信禮黃老集靈經。  
信禮老君黃庭經。  
信禮大小劫經。  
右十二部經，神寶君爲教主，在太清境大赤天太清太極宮，計七十萬二千八十卷。



右三十六部尊經符圖，金書玉字，凝結三洞飛玄之氣，五合成文，文彩煥耀，洞照八方。元始天尊以延康劫延康元年，於大羅天中金耀玉殿明霞之館，傳授太上大道君、三元太素君，以教三十六天，各攢成一部，遂成三十六部，流演大梵天中無極世界。高真大士宗奉敬禮，以爲契仙之妙門。

次禮十方一切得道諸仙聖衆：

信禮鬱羅翹真人。  
信禮光妙音真人。  
信禮真定光真人。  
信禮普德妙行真人。  
信禮正一真人。  
信禮廣成子真人。  
信禮若士真人。  
信禮沈文泰真人。  
信禮道當真人。  
信禮白石真人。  
信禮黃山君真人。  
信禮皇初平真人。  
信禮華子期真人。  
信禮樂子長真人。

信禮衛叔卿真人。  
信禮魏伯陽真人。  
信禮陳安世真人。  
信禮李八百真人。  
信禮南極子柳融真人。  
信禮天門子王剛真人。  
信禮九靈子黃化真人。  
信禮絕洞子李修真人。

禮三寶已，次復至心懺悔：

弟子等各從無量劫來，至于今日，身口意業，造惡爲愆，數若塵沙，不可臆測。或盛年放逸，馳騁百端，姦盜損傷，恣心快意，寵用凶悖，不顧顛危，奉上事親，不忠不孝，酷虐爲行，謀害係懷，侵削平人，妄生相妬，遂使天民畏懼，上下憎嫌。若有此愆，請從首謝。或三春放火燒殺蟲蛇，畋獵捕圍，害諸物命，胎卵濕化，水陸飛沈，潛竄無方，悉被屠戮，快情悅目，無改悔心。若有此愆，請從首謝。或浮詞綺語，讒毀善人，鬪亂親朋，扇惑鄰里，遂使內外懷恨，遠近輕疏，致生嫌隙之讎，各起謀害之意。若有此愆，請從首謝。或貪

積世財，不知厭足，方便刻削，對面侵欺，割他自饒，損人益己，不濟貧苦，專事慳貪。若有此愆，請爲首謝。或受法誠，不精不勤，慕利資身，無惠念想，假設方便，誑惑人天，取功德錢，私己破用，無慙無耻，不懼當來。若有此愆，今日運上至誠，求哀懺悔已，歸命禮三寶。

至心啓願：

願弟子等從今懺悔已後，所造功德，願生生世世永離慳貪，無欺奪想，常行施惠，起慈悲心，廣造橋梁，濟度羣品，天民足用，上下和同。福德果報，世世莊嚴，長生具足。願共四生六趣，俱契良緣，同證妙門，成無上道。啓願已，皈命禮三寶。

信禮上品濟度天尊。  
信禮丹天萬靈天尊。  
信禮北元玄應天尊。  
信禮金光法王天尊。  
信禮金寶妙光天尊。  
信禮玉清洞真天尊。  
信禮玉寶金顏天尊。

信禮玄解上官天尊。  
信禮上靈普度天尊。  
信禮明化萬運天尊。  
信禮神通洞達天尊。  
信禮紫虛靜明天尊。  
信禮西明妙道天尊。  
信禮上靈善慧天尊。  
信禮玉清洞真天尊。  
信禮天皇真一天尊。  
信禮地皇五君天尊。  
信禮混成應化天尊。  
信禮上運徧明天尊。  
信禮東華智慧天尊。  
信禮西明妙化天尊。  
信禮衆真真品天尊。  
信禮法寶寶慈天尊。  
信禮太清五帝天尊。  
信禮飛駕九空天尊。  
信禮神道行運天尊。  
信禮化成真空天尊。  
信禮道智洞虛天尊。  
信禮紫清重悟天尊。  
信禮方便廣訓天尊。

信禮安化慧元天尊。  
信禮妙光丹闕天尊。  
信禮陽光太元天尊。  
信禮普朗救難天尊。  
信禮大道玄明天尊。  
信禮一切雨露天尊。  
信禮方便慧日天尊。  
信禮珠妙素光天尊。  
信禮慧觀上官天尊。  
信禮布化紫極天尊。  
信禮萬智運明天尊。  
信禮普度無爲天尊。  
信禮正徧高勝天尊。  
信禮丹霞妙果天尊。  
信禮妙果正法天尊。  
信禮流鈴自然天尊。  
信禮真徧運明天尊。  
信禮玄會妙法天尊。  
信禮西明咸化天尊。  
信禮一切衆慧天尊。  
信禮拔苦慈威天尊。  
信禮明照玄道天尊。  
信禮朱煥妙樂天尊。

信禮拔苦真仙天尊。  
信禮運時高徧天尊。  
信禮凝尊金城天尊。  
信禮上道廣運天尊。  
信禮真解升玄天尊。  
信禮開訓保命天尊。  
信禮玄元千齡天尊。  
信禮神運照明天尊。  
信禮真元衆妙天尊。  
信禮成就太玄天尊。  
信禮三乘玄寂天尊。  
信禮玉晨救生天尊。  
信禮最勝諸有天尊。  
信禮法海瓊顏天尊。  
信禮妙寶上品天尊。  
信禮丹紫道空天尊。  
信禮法寶無爲天尊。  
信禮神通慧明天尊。  
信禮浮雲紫素天尊。  
信禮朱光太元天尊。  
信禮上道明慧天尊。  
信禮三業善清天尊。  
信禮玄應垂光天尊。

信禮天真月光天尊。  
信禮凝光金洞天尊。  
信禮太元玉音天尊。  
信禮瓊法海空天尊。  
信禮六度一乘天尊。  
信禮萬國真元天尊。  
信禮真道法乘天尊。  
信禮寶靈法海天尊。  
信禮化成妙容天尊。  
信禮威摧外道天尊。  
信禮緣感太元天尊。  
信禮七寶重玄天尊。  
信禮十轉莊嚴天尊。  
信禮出有寂然天尊。  
信禮果化普慈天尊。  
信禮寶集西靈天尊。  
信禮八遐北元天尊。  
信禮千中寶運天尊。  
信禮太清徧明天尊。  
信禮法橋善設天尊。  
信禮仙階上元天尊。  
信禮先因玉光天尊。  
信禮神真無礙天尊。

信禮平等雲宮天尊。  
信禮應緣洞陽天尊。  
信禮無爲度脫天尊。  
信禮空歌碧落天尊。  
信禮虛舟廣濟天尊。  
信禮洞空道玄天尊。  
信禮威明九夜天尊。  
信禮緣起四方天尊。  
信禮常敷道奧天尊。  
信禮輪轉丹天天尊。  
信禮慈航苦海天尊。  
信禮結氣混成天尊。  
信禮一乘靜定天尊。  
信禮妙果素靈天尊。  
信禮生死常樂天尊。  
信禮真相常明天尊。  
信禮金苑妙寶天尊。  
信禮玉清法王天尊。  
信禮道運玄行天尊。  
信禮道君廣明天尊。  
信禮流精上品天尊。  
信禮三天降魔天尊。  
信禮化被無垠天尊。

信禮六道普同天尊。  
信禮開道微明天尊。  
信禮注錄中仙天尊。  
信禮重玄靜默天尊。  
信禮羅玄聖王天尊。  
信禮自然九聖天尊。  
信禮妙光十號天尊。  
信禮逍遙妙有天尊。  
信禮逍遙太霞天尊。  
信禮三玄結成天尊。  
信禮七寶太玄天尊。  
信禮道冲衆妙天尊。  
信禮重玄華蓋天尊。  
信禮四氣生成天尊。  
信禮靜定太平天尊。  
信禮上靈浮香天尊。  
信禮玄會長樂天尊。  
信禮方空大運天尊。  
信禮真清等真天尊。  
信禮感念法橋天尊。  
信禮仙巖洞元天尊。  
信禮化通三宮天尊。  
信禮寶明四天天尊。

信禮法海瓊湛天尊。

信禮聖王傾光天尊。

信禮梵行雲錦天尊。

信禮元梵升軒天尊。

信禮八方等一天尊。

信禮玄通三有天尊。

信禮無滯無形天尊。

信禮妙有真空天尊。

次禮三十六部尊經：

信禮大洞玉經。

信禮上清經。

信禮無上祕要經。

信禮老君黃庭經。

信禮妙林仙記傳經。

信禮太上集仙經。

信禮太上開天化經。

信禮太上八史經。

信禮黃林先生經。

信禮老君鍊精養生經。

信禮老君黃書經。

信禮道教經。

右出洞真部。

信禮太上靈寶經。

信禮功德經。

信禮元陽經。

信禮大小劫經。

信禮太上開山海經。

信禮諸天內音經。

信禮太上鳴寶經。

信禮太上集靈經。

信禮無量壽經。

信禮太上靈祕經。

信禮太上濟眾經。

信禮太平經。

右出洞玄部。

信禮高上玉皇經。

信禮太清經。

信禮正一消魔章儀經。

信禮老子經。

信禮玄妙真經。

信禮太上洞淵神呪經。

信禮老君玄中精經。

信禮黃老集官捍厄圖經。

信禮無上金真上妙玄經。

信禮太上真一經。

信禮太上一乘海空經。

信禮玄門道德經。

右出洞神部。

如是三洞寶經，蓋以混成，鬱積玄景，分以兩參，陰陽潛化，乾坤列而覆載，三五啓緒，八會結文。或作金書鳳篆，或造玉字龍章，洞治瑩鮮，紫林繡豔，或浮黎而現八角垂芒，太虛而呈五篇煥爛，光輝耀於三界，映朗照於九冥。分其分度，演教諸天，天各一部，合爲三十六部，置安玉臺玄座七寶藏中。九色錦雲懸覆經上，金童在左捧香，玉女在右散花供養。或四萬劫一出，三千載一傳。是以天真奉之以清升，地仙受之以謐寧，日月磨之以高明，五嶽捧之以鎮靈，天子崇之以聖化，公王敬之以太平，士庶恭而福佑，學士修而長生。若能稱揚禮唱，福被無邊，是故至心歸依信禮。

次禮十方一切得道諸仙聖。

信禮馬明生真人。

信禮張道陵真人。

信禮李少君真人。

信禮王真真人。

信禮壺公真人。

信禮薊子訓真人。

信禮董君異真人。

信禮李常在真人。

信禮陳永伯真人。

信禮葛孝先真人。

信禮泰山下老人真人。

信禮河上公真人。

信禮赤容公真人。

信禮青烏公真人。

信禮秀眉公真人。

信禮離婁公真人。

信禮務光真人。

信禮高丘公真人。

信禮羨門子真人。

信禮容成公真人。

信禮靈壽光真人。

信禮不肯來子真人。

禮三寶已，次復至心懺悔：

弟子等各從無量曠劫已來，至于今日，身心狂亂，不識因緣，惡業彌多，無所知覺，迷聾倒見，難可具陳。今對道場三寶前，求哀懺悔。伏願十方天

尊慈悲道場，三十六部尊經玄中法師，一切真仙，虛空聖衆，有天耳者，有天眼者，願使知聞證明，懺悔所有罪根，願皆消滅。懺悔弟子無量生中至于今日，或違神背道，不懼明靈，麤行惡言，誹謗正教，見像聞經，無恭敬心，怪他修功德，笑人習善因，未曾改悔，無廉耻心。今日至誠，悉皆懺悔。

次復懺悔不識因果，及父母恩，造作非爲，自恃種性，悖逆麤行，對於尊卑，父母在生堂中，甘脆終身不見，死於曠野，祭享永劫不聞，遂使冥靈有考逮之殃，人世無善福之應。如此之罪，無量無邊，至誠悉皆懺悔。

次復懺悔劫盜之罪。經中說言，若物屬他，他所守護，一毫一線，不與不取，何況盜竊。但自衆生不能覺悟，興意劫奪，仍作縱橫，致使未來受諸殃考。若有此愆，請從首謝。又復經中說言凡夫之人，造罪尤甚，死入冥靈阿鼻地獄。然阿鼻地獄者，縱廣正等八萬由旬，七重鐵城，地上有七重鐵網，下有十八隔，周匝七重，皆是刀林。其

七重城內，復有劍林，下有十八隔。其一隔八萬四千重。於其四角，復有大銅狗，其身長大四千由旬，眼如電光，牙如劍樹，齒如刀山，舌如鐵鈎，爪似鐵叉，尾如鐵蟒，一一尾光，皆出猛大，其煙鼻斃惡，無有比者。其獄四門，一一門邊，復有十八獄卒，一如羅刹，頭上十八角，手把鐵叉，又著罪人，望心而撞，從背而出。一一隔門，復有八萬四千鐵蟒大蛇，口吐毒火，徧滿城中，其聲哮吼，如大雷風雨。大鐵丸亦滿城中，此城甚苦。又四方門，一一門外各有猛火，東南西北，交過通徹，周匝鐵牆，鐵網彌覆，上火徹下，下火徹上，四維上下，周匝一時，苦事俱起。如上所說，犯戒五逆，及毀謗功德，若依經文懺悔，而不慚愧，其人命終，必嬰此苦。有輕三寶、偷盜常住淨財，污他梵行，不出此獄。罪人受苦之時，猛火入心，悶絕而死。一日一夜，萬死萬生，受諸苦惱。如上所說，從阿鼻地獄出，以破戒因緣，虛稱信施，復入於諸小十八地獄。所謂寒冰地獄，黑暗地

獄，焦然地獄，刀輪地獄，劍輪地獄，火車地獄，鑊湯地獄，劍林地獄，鐵牀地獄，銅柱地獄，鐵機地獄，鐵輪地獄，鐵丸地獄，尖石地獄，飲銅地獄，各八百萬歲。然後得出，常生下處。五百劫中，不識三寶，值善知識，得發無上道心。不值善知識者，無復出期。是故弟子宿值良緣，今復聞經教，身心踴躍，一意虔誠，懺洗已往之愆，願修自新之業。願從九祖下至見存，不聞不見此之惡緣，永離此苦。懺悔已，歸命禮三寶。

至心發願：

願弟子等承此懺悔所修功德，願生生世世不行三惡趣，常修十善，因果報具莊嚴，福德皆圓滿，千殃從此捨，萬慶自斯臻。妙慧資身心，聖功增壽筭，先亡九祖，咸沐道恩，洗志靈津，遊神道岸，逍遙真境，散誕無為，一切有緣，離苦解脫。發願已，歸命禮。

信禮青華延壽天尊。

信禮善說妙法天尊。

信禮玄通靜行天尊。

信禮明照道空天尊。

信禮浮空真品天尊。

信禮慈威拔苦天尊。

信禮元始丹天天尊。

信禮道光妙運天尊。

信禮萬光道元天尊。

信禮開慧保生天尊。

信禮徧悟真經天尊。

信禮五老大元天尊。

信禮救生護命天尊。

信禮高勝天人天尊。

信禮上仙真元天尊。

信禮雲宮空淨天尊。

信禮高運遷化天尊。

信禮廣運大智天尊。

信禮丹老道元天尊。

信禮道要運明天尊。

信禮妙光十號天尊。

信禮玄都三元天尊。

信禮空境混成天尊。

信禮真品玄虛天尊。

信禮長樂萬變天尊。

信禮聖真玉房天尊。

信禮真意重悟天尊。

信禮皇上保明天尊。

信禮開行度命天尊。

信禮虛無觀空天尊。

信禮真道度明天尊。

信禮徧照玄會天尊。

信禮光相玄通天尊。

信禮珠相妙光天尊。

信禮天真嘉慶天尊。

信禮光映真人天尊。

信禮延康上品天尊。

信禮降魔三天天尊。

信禮救生真境天尊。

信禮黃層運空天尊。

信禮聖王度人天尊。

信禮素老天皇天尊。

信禮靈真隱光天尊。

信禮大千神化天尊。

信禮丹老地皇天尊。

信禮靜空日馭天尊。

信禮妙光光映天尊。

信禮鳳文仙素天尊。

信禮益筭法王天尊。

信禮法輪無爲天尊。  
信禮金靈湛一天尊。  
信禮鳳臺上洞天尊。  
信禮玄會奉修天尊。  
信禮混元長生天尊。  
信禮玄風廣扇天尊。  
信禮靜定太平天尊。  
信禮一乘高上天尊。  
信禮至運明慈天尊。  
信禮玄元真一天尊。  
信禮啓悟道心天尊。  
信禮神通自在天尊。  
信禮常燭長夜天尊。  
信禮諸天玄號老子天尊。  
信禮太玄老子總謂天尊。  
信禮老子八明天尊。  
信禮玄御老子流霞天尊。  
信禮太丹老子三真天尊。  
信禮黃庭老子太一天尊。  
信禮北帝老子太皇天尊。  
信禮天威老子浩氣天尊。  
信禮紫極老子迴真天尊。  
信禮龜山老子五氣天尊。

信禮圓行老子保練天尊。  
信禮道通老子侍德天尊。  
信禮千通老子迴道天尊。  
信禮四座老子隨生天尊。  
信禮曇慶老子雲光天尊。  
信禮遊言老子上景天尊。  
信禮寶量老子元老天尊。  
信禮太微老子三度天尊。  
信禮九極老子百唱天尊。  
信禮太皇老子慶生天尊。  
信禮紫陽老子養神天尊。  
信禮定相老子飛行天尊。  
信禮高業老子觀天天尊。  
信禮飛黃老子九光天尊。  
信禮大法老子玄極天尊。  
信禮元孫老子素黃天尊。  
信禮迴元老子三度天尊。  
信禮六合老子八辰天尊。  
信禮紫度老子流嬰天尊。  
信禮與相老子真氣天尊。  
信禮觀化老子至容天尊。  
信禮百仙老子延真天尊。  
信禮劫仞老子五氣天尊。

信禮九變老子清淨天尊。  
次禮三十六部尊經甚深法藏。  
信禮雲龜西室王屋南山寶祕真文  
甚深法藏。  
信禮凝空雲篆八角垂芒寶祕真文  
甚深法藏。  
信禮香林紫筆玉簡金書寶祕真文  
甚深法藏。  
信禮鳳文紫蘊七寶臺中寶祕真文  
甚深法藏。  
信禮太清仙境人鳥山中寶祕真文  
甚深法藏。  
信禮玉清聖境玄都山中寶祕真文  
甚深法藏。  
信禮三天祕策五老玉篇寶祕真文  
甚深法藏。  
信禮皇人玉訣玄老金書寶祕真文  
甚深法藏。  
信禮太玄真一九光瓊章寶祕真文  
甚深法藏。  
信禮正一盟威神符寶錄寶祕真文  
甚深法藏。  
信禮長生祕訣召制靈圖寶祕真文

甚深法藏。

信禮寂境開化九色雲羅寶祕真文甚深法藏。

次禮十方一切得道諸仙聖衆。

信禮蓬萊山上黃褐玄巾子明真人玄中法師。

信禮天台山上頂負圓光監度三真玄中法師。

信禮人天教主得道真人玄中法師。

信禮正一真人三天法師道陵真人玄中法師。

信禮妙樂國土七寶臺中善緣真人玄中法師。

信禮弟子侍經真人普得妙行真人玄中法師。

信禮傳經演教拔度羣迷太極真人玄中法師。

信禮高上老子河上真人文儒先生玄中法師。

信禮過見未來常住世間救度苦厄玄中法師。

信禮塵沙得道隨世應緣饒益衆生

玄中法師。

信禮成就十方恒沙衆生解悟真性玄中法師。

如是盡虛空徧法界一切三寶，皈命懺悔。弟子等自從無量劫來，至于今日，或前生今世，不識因緣，觸事乖違，所行顛倒，混同塵俗，無平等心，既於凡倫，有邪僻行，疏薄門族，親眄他人，假繼身名，詐稱豪傑，淫行色慾，非分慳貪，嚇掠愚蒙，侵奪善政，輕欺老病，抑壓孤寡。或自處於家，日夜凌辱驅役僕妾，枉加鞭笞，乘馬駕牛，不料飢困，心懷惡想，口出狂言，觸突神祇，訶風罵雨，無故呪詛，橫造人愆，此世來生，受諸殃累。如此之罪，無量無邊，今日至誠，悉皆懺悔。

弟子等稟受障惱，舉止成愆，或醉酒昏酗，凌突尊卑，妖言荒語，詐妄無度，求人過惡，諂曲生情，違負二恩，常行欺冒。或安經置像，闕絕香火，以不淨手，披讀靈文，將觸穢體，而臨法席，撥齋不能行施，受供而無愧心，取債負約，不還放錢，倍生子利。如此等罪，

無量無邊，今日至誠，悉皆懺悔。

弟子等存歿二緣，身是凡夫，無明障蔽，不識慈忍，性好損傷。或邪祀鬼神，諂延賓侶，及有男婚女禮，社節歲時，廣致庖厨，恣情烹宰血肉，充羞之味，脂膏可繼，永夜明燈，殃對無窮，難可計測，冤家債主，冥密道中，逮訟無休，牽引生死，所以魂囚九夜，魄繫三塗，洗雪無門，求哀無路。謹當設齋造像，披露誠心，所獲功德善緣，迴奉前冤宿債。願承福力，託蔭人天，永捨惡緣，不相執對，重於四生六趣，廣施慈恩，若見臨危迫難，諸惡苦惱，方便解救，令得解脫。然後爲說微妙正法，開度因緣，使覩形見影，聞名聽聲，恐怖悉除，煩惱釋散。得如是者，畢竟安樂。懺悔已，皈命禮三寶。

至心發願：

願弟子等存亡兩代，承是懺悔，所建功德，願生生世世，永離三塗，長辭八苦，不爲冤家所執，不見惡相來前，逍遙解脫鄉，遊翫無爲境，隨喜人天供，常聞雅樂音。見世保安和，不爲煩



惱著。門多善瑞，宅足豐饒，福慶自  
新，灾殃未滅。發願已，皈命禮三寶。

太上靈寶洪福滅罪像名經

(郭清點校)

# 034 太上洞玄靈寶天尊 名（敦煌本）

經名：太上洞玄靈寶天尊名。  
撰人不詳，約出於南北朝或隋唐。內容與《佛名經》相似。原書卷數不詳，《正統道藏》未收。底本出處：敦煌抄本北列18、P.3755、北麗47、北金18號。  
參校：《太上洞真賢門經》。

## 太上洞玄靈寶天尊名卷上

元始天尊千五百名號及諸懺悔文  
是時元始天尊，七月十五日於西那玉國鬱察山浮羅之岳長桑林中，度一切人民。天尊與諸弟子真君上聖，及諸天帝，天龍鬼神，雜類人等，俱還長樂舍中。騫木之下，自然踊出太玄真一九光瓊障七寶之座。其座高廣，

皆以黃金、白銀、真珠、碧玉、珊瑚、虎魄、車渠、馬瑙裝校，彫飾嚴麗華整，雜以寶幢，懸諸幡蓋，內外光明，映照十方無極世界，香華妓樂，周匝圍遶，師子辟耶，龍麟猛狩，騰蛇神虎，備衛左右，鳳皇孔雀，金翅朱鳥，皆吐雅音，飛鳴其上。雖有座形，不鄣於物，人衆往來，無所隔礙。復有諸小琉璃之座，各從蓮華臺中自然踊出，四邊圍遶。天尊尔時即登寶座，正基而坐，恬神安漠，端寂無爲，入衆妙門，離言說道。是諸大衆，各禮一拜，依位而坐，見是事已，咸自思惟，嘆未曾有。第一弟子左玄真人，名曰法解，即從座起，共十方同類徒衆，前進作禮，五體投地，一心正念，上白天尊言：此七寶座，妙麗希有，形相宛然，不礙於物。天尊座上，即知法解來問義趣，從其面門，即放五色光明，遍照十方無極國土，種種異類世界，天堂地獄，悉於中見；復有十方天尊，諸大仙人，悉於中見；生死苦樂，福報多少，悉於中見；脩道階梯，亦於中見；淨穢國土，亦於中見。

十方來衆，猶如微塵，不可稱數，悉見天堂極樂，地獄酸切，極苦無邊。復見大福堂國長樂之舍，極樂無比，勝於南宮。法解真人、太極真人、大慧真人、救脫真人，四大真人前白天尊：今於光中，見種種國土，苦樂不同，天堂地獄，受報差別。唯願天尊大慈哀愍，救護衆生，爲作利益，令得解脫，永離憂悲，速生淨土。

天尊告救脫真人：善哉善哉，汝等諦聽，我今爲汝分別解說十方諸天尊名字，至心禮拜懺悔，滅无量罪，生无量福，即得往生諸天極樂世界。必須作无量功德，施散貧乏，觀行成就，夷心無二，永斷愛染，即得出離無量煩惱。救脫真人言：此宛利天棄賢世界，雜惡之處，地獄餓鬼畜生盈滿，多不善聚。願我未來，不聞惡聲，不見惡人。觀此之言，此處實尔國土不淨，人無樂事。如此世界中，有四時八節，剋食人命，春秋冬夏，風雨寒熱，晝明夜闇，日月相催，土地砂礫，高下傾危，山河嶮阻，草木棘刺，無一可樂。所受人

身，生老病死，不淨假合，危難停其報，身體須衣須食，難可充足，飢渴常生，復王法駢馳，无由自在。假令聚集，唯有童蒙无識，共爲伴侶，正用牛馬猪羊，雜類畜生，衆怨事物，以爲果報。眼見惡色，耳聞惡聲，鼻嗅惡香，舌嘗惡味，身受惡觸，意緣惡法，如此之事，何由可樂。方復年命無常，特甚可畏，出息入息，念謝往死<sup>②</sup>。假令百年，計其日數，適得三萬六千日活，况復命有多少短促，死事何疑。既不勉死事，須求生安樂世界，欲得往生長樂淨土，但生彼快樂無極，衣以天繒，食則行厨，無有四時寒暑，日夜明闇，亦無生老病死，三塗八難痛苦之名，地

(北列18號抄本止於此，下文缺)

(P.3775, 前缺)

願共諸衆生，往生福堂國。  
見十方天尊，常願盡供養。  
救脫真人白元始，稽首聖中真法王。  
衆生心中無價寶，常被六賊來劫剥。  
瞋恚怒箭竄射心，無明愛鑱關籥強。

人欲枷杻防禁身，六親眷屬共相煎。五濁穢土何時出，无明大水无方渡。救脫大慈白天尊，唯願慈悲多方便。爲諸衆生作當來，無價法船善濟度，運載衆生到彼岸，不食酒肉及薰辛，清淨灑掃入一房，四面置像及幢節，嚴持香華及幡蓋，念道禮拜□□□，七日七夜夢相見，即有真人來教授，天尊現形作種種，名同天尊十方億，化度衆生不可量。唯願天尊時爲說，我等頂禮永不退。

時有左玄真人及救脫真人，稽首讚揚西那玉國真淨天尊國土事相，願共法界衆生，同往彼淨土西那玉國。願見光明寶林，有七寶道場，樹上高四百万里，其本周圍<sup>③</sup>五千四万里，枝葉四布廿万里。見此樹者，罪障雲除，□□生法上品，往生西那玉國。願見長樂國土真淨天尊，威德巍巍，出過一切諸世界，上光明照，相好莊嚴。願見長樂國土七寶浴池，上善之水，湛然盈滿，底有寶沙，岸有香樹，若入寶池，開神悅體，蕩除心垢，得成正道。願見長

樂玉國真淨天尊，身衣七寶明珠褐，披九光寶雲帔，坐千葉蓮華寶臺，金底有師子、九色蛟龍，仙童玉女，奉香散花。願見長樂玉國日蓋大慈真人，具卅二相，八十一好，身見金色，頂有寶冠，項有圓光，瓔珞光明，處處垂下。願化真人，相好莊嚴，善能隨順接引衆生，淨除業障。願見長樂國土月淨大悲真人，舉身光明，照十方作紫金，有緣衆生，皆悉得見。願蒙威力，除生死罪，得蒙開悟，迴向正道。願見彼土真人，大衆，智慧光明，神通洞達，虛無之身，無極之體。願皆親覲，脩諸功德上品，往生長樂國土。若有人念誦，日夜禮拜此長樂國土真淨天尊，洗除衆生無量罪垢，不可思議。

是時元始天尊即說十方天尊名字，一百八<sup>④</sup>道君、千二百老子。若廣說天尊名字，如微塵數，窮劫說之，亦不可盡。同名天尊，亦不可盡。略說十方一千五百天尊名字，禮拜讚誦，功德難勝。如是作禮。其禮五十後，着二大真人稱禮，不可思議。各三稱。

至心歸命北方玄上玉晨天尊，  
至心歸命太極天尊，  
至心歸命無爲天尊，  
至心歸命託質天尊，  
至心歸命不極天尊，  
至心歸命共舒天尊，  
至心歸命隱德天尊，  
至心歸命慧道天尊，  
至心歸命靈符天尊，  
至心歸命高上玄靈真王天尊，  
至心歸命玉清上極天尊，  
至心歸命高清太極元景天尊，  
至心歸命龍形九色天尊，  
至心歸命高極天尊，  
至心歸命西那天尊，  
至心歸命乞食天尊，  
至心歸命紫烟天尊，  
至心歸命三清天尊，  
至心歸命十轉天尊，  
至心歸命制魄天尊，  
至心歸命高上空洞天尊，  
至心歸命玉清靈明紫簡天尊，  
至心歸命高清皇初天尊，

至心歸命瓊藏說法天尊，  
至心歸命善力天尊，  
至心歸命寶林天尊，  
至心歸命无得天尊，  
至心歸命寶首天尊，  
至心歸命左真天尊，  
至心歸命含慈天尊，  
至心歸命天父天尊，  
至心歸命高上玉寶天尊，  
至心歸命紫虛玉皇天尊，  
至心歸命高清上真天尊，  
至心歸命傳經天尊，  
至心歸命慈悲天尊，  
至心歸命廣濟天尊，  
至心歸命信惠天尊，  
至心歸命嚴淨天尊，  
至心歸命法忍天尊，  
至心歸命右真天尊，  
至心歸命應變天尊，  
至心歸命高上九霄天尊，  
至心歸命紫精天尊，  
至心歸命高玄清靈太真天尊，  
至心歸命闡教天尊，

至心歸命普濟平等天尊，  
至心歸命大智海天尊，  
至心歸命大浮羅天尊，  
至心歸命三空天尊。  
禮三寶已，次復懺悔。

至心歸命十方常住三寶，懺悔貪愛之罪。經中說言，但爲貪欲，閉在癡獄，沒生死河，莫之能出。衆生爲是五欲因緣，從昔已來，流浪生死。於一一衆生，一劫之中所積身骨，如大山岳，所飯母乳，如四海水，身所出血，復過於此。父母兄弟，六親眷屬，命終哭泣，所出目淚，亦如四大海水。是故說言：有愛則生，愛盡則滅。故知生死貪愛爲本。所以經言：淫欲之罪，能令衆生墮於地獄，餓鬼受苦。若在畜生，則受鴿雀鴉梟等身。若生人中，妻不貞良，得不隨意眷屬。淫欲既有如此惡業，是故清信男女，今日至到稽顙，歸命三寶。

至心歸命力无畏天尊，  
至心歸命龍漢梵度天尊，  
至心歸命寶藏天尊，

至心歸命高上无始天尊，  
至心歸命无上紫虛天尊，  
至心歸命玉虛玄覽天尊，  
至心歸命來勒天尊，  
至心歸命大智惠海天尊，  
至心歸命仙真上聖天尊，  
至心歸命碧落浮黎天尊，  
至心歸命惠覺天尊，  
至心歸命法海天尊，  
至心歸命九鳳天尊，  
至心歸命玄中天尊，  
至心歸命鬱丹无量天尊，  
至心歸命紫晨天尊，  
至心歸命玉虛九索金華天尊，  
至心歸命十城天尊，  
至心歸命大慧眼天尊，  
至心歸命□□天尊，  
至心歸命轉法輪天尊，  
至心歸命玉虛无上天尊，  
至心歸命三素飛雲天尊，  
至心歸命无壽天尊，  
至心歸命紫虛太帝天尊，  
至心歸命八方天尊，

至心歸命道力天尊，  
至心歸命玉虛九皇天尊，  
至心歸命御龍天尊，  
至心歸命万道天尊，  
至心歸命十種天尊，  
至心歸命迴峰天尊，  
至心歸命傳書天尊，  
至心歸命五色流霞天尊，  
至心歸命上監天王天尊，  
至心歸命紫虛聖天尊，  
至心歸命玉虛天皇天尊，  
至心歸命太妙天尊，  
至心歸命自然天尊，  
至心歸命法无畏天尊，  
至心歸命惠命天尊，  
至心歸命員象天尊，  
至心歸命玄元天尊，  
至心歸命極玄妙天尊，  
至心歸命清帝飛輪天尊，  
至心歸命不驕樂天尊，  
至心歸命紫虛清淨天尊，  
至心歸命玉虛太一天尊。  
禮三寶已，次復懺悔。

至心歸命十方常住三寶，臣等自  
從无始已來，至于今日，或通人妻妾，  
奪他婦女，侵陵貞潔，汙淨行男女，破  
他精思，逼迫无道，濁心耶視，言語嘲  
調，或復耻他門戶，汙賢善名，或於男  
女起不淨行。如是等罪，今皆懺悔。

至心歸命十方常住三寶，臣等无  
始已來，或墮胎落子，毒藥蠱道，傷殺  
衆生，墾土掘地，養蠶煮繭，傷殺滋甚，  
或打撲蚊蚋，咋齒蜂蠆，焚燒糞掃，開  
決溝渠，枉害一切，或噉（下文缺）

（北麗<sub>レ</sub>，前缺。）

至心歸命華生德天尊，  
至心歸命於衆堅固天尊，  
至心歸命智明天尊，  
至心歸命智衆天尊，  
至心歸命離胎天尊，  
至心歸命大醫天尊，  
至心歸命壞諸煩惱天尊，  
至心歸命无量智讚天尊，  
至心歸命華生天尊，  
至心歸命轉諸難天尊，

至心歸命施名聞天尊，

至心歸命名親天尊，

至心歸命名堅固天尊。

禮三寶已，次復懺悔。

至心歸命十方常住三寶，臣等懺悔无量劫來，至于今日，或於道法之間，一切諸部，經中所說，人身難得，道尊難聞，衆師難值，信心難生，六根難具，善友難逢。而今相與，宿殖善根，得此人身，六根完具。又值善友，得聞大道正法，於其中間，復各不能盡心，精勤苦行，恐於未來長溺万苦，无有出期。是故今日應須至心慚愧，稽首歸依，今皆懺悔。

至心歸命十方常住三寶，衆等自從无始已來，至于今日，常以无明覆心，煩惱鄣弊，見尊形像，不能盡心恭敬，輕慢衆師，殘害善友，破壇毀觀，焚燒形像，或自處華堂，安置尊像，卑猥之處，使今煙薰日暴，風吹雨露，塵土汙點，雀鼠殘毀，共同住宿，曾无禮敬，或裸露像身，初不嚴飾，或遮掩燈燭，關閉殿堂，鄣像光明。如是等罪，今日

至誠，悉皆懺悔。

至心歸命北方度仙上聖天尊，

至心歸命冥想天尊。

至心歸命當度衆生天尊，

至心歸命得道天尊，

至心歸命保命天尊，

至心歸命金寶天尊，

至心歸命宣遵天尊，

至心歸命誠有天尊，

至心歸命無礙天尊，

至心歸命大法施天尊，

至心歸命上清天尊，

至心歸命靈陰天尊，

至心歸命信天尊，

至心歸命嚴整天尊，

至心歸命太華天尊，

至心歸命玄都天尊，

至心歸命入妙門天尊，

至心歸命若注海天尊，

至心歸命八冥天尊，

至心歸命普度天尊，

至心歸命除愛獄天尊，

至心歸命弘正道天尊，

至心歸命細微天尊，

至心歸命感應天尊，

至心歸命制命門天尊，

至心歸命斷口業天尊，

至心歸命泥丸天尊，

至心歸命變化天尊，

至心歸命遊玄天尊，

至心歸命度仙天尊，

至心歸命達靈天尊，

至心歸命受號无爲天尊，

至心歸命宿世因緣天尊，

至心歸命高上慈救天尊，

至心歸命真身天尊，

至心歸命忍垢天尊，

至心歸命存濟天尊，

至心歸命貴生天尊，

至心歸命應感天尊，

至心歸命遠遊天尊，

至心歸命九關天尊，

至心歸命流光天尊，

至心歸命法喜天尊，

至心歸命太上高玄天尊，

至心歸命玉簡天尊，

至心歸命威聖天尊，  
至心歸命棄耶天尊，  
至心歸命入无爲天尊，  
至心歸命鎮生天尊，  
至心歸命寶藏天尊，  
至心歸命華都天尊，  
禮三寶已，次復懺悔。

至心歸命十方常住三寶，衆等自從无始已來，至于今日，或於道法之間，以不淨手把捉經卷，或臨經書，非法俗話，或安置床頭，坐起不敬，或開閉箱篋，虫噉朽爛，或標袖脫落，部黨失次，或遺脫漏誤，紙墨破列，自不脩理，或自道恭敬，云他輕賤，不肯流轉。如是等罪，今皆懺悔。

至心歸命十方常住三寶，衆等自從无始已來，或卧地聽經，仰眠讀誦，高聲語咲，亂他聽法，或耶解尊語，僻說聖意，非法說法，法說非法，非犯說犯，犯說非犯，輕罪說重，重罪說輕，或抄前著後，抄後著前，前後著中，中著前後，倚飾文辭，安置不典，或爲利養，名與爲人說法，無道德心，求法師過，

而爲論議，非理彈說，不爲長解。求出世法，或輕慢尊言，尊重耶教，毀皆大乘，讚譽小道。如是等罪，今日至誠，皆悉懺悔。

至心歸命華英天尊，  
至心歸命玉真天尊，  
至心歸命寶林天尊，  
至心歸命玉寶天尊，  
至心歸命弘智天尊，  
至心歸命保賢天尊，  
至心歸命翹心天尊，  
至心歸命化夷狄天尊，  
至心歸命威神无尊，  
至心歸命化生天尊，  
至心歸命盟魔天尊，  
至心歸命拍空天尊，  
至心歸命梵形天尊，  
至心歸命即生人中天尊，  
至心歸命步虛天尊，  
至心歸命大度天尊，  
至心歸命預善天尊，  
至心歸命持禁戒天尊，  
至心歸命无畏老天尊，

至心歸命迴靈天尊，  
至心歸命南陵天尊，  
至心歸命四象天尊，  
至心歸命自育天尊，  
至心歸命香林天尊，  
至心歸命徐來天尊，  
至心歸命容與天尊，  
至心歸命教化萬物天尊，  
至心歸命定念天尊，  
至心歸命常樂道天尊，  
至心歸命三光天尊，  
至心歸命更生天尊，  
至心歸命受功天尊，  
至心歸命玉都天尊，  
至心歸命道乾天尊，  
至心歸命威光天尊，  
至心歸命彌綸天尊，  
（北麗止於此，下缺。）  
（北金<sup>18</sup>，前缺）<sup>6</sup>  
至心歸命金顏天尊，  
至心歸命宗匠天尊，  
至心歸命識宿命天尊，

至心歸命入法門天尊，

至心歸命散流德天尊，

至心歸命生門天尊，

至心歸命靜氣天尊，

至心歸命九虛天尊，

至心歸命妙炁天尊，

至心歸命明徹天尊，

至心歸命洞觀天尊，

至心歸命含咲天尊，

至心歸命授經蘊天尊，

至心歸命有道天尊。

至心歸命十方常住三寶，衆等又從无始已來，至于今日，或於師間有鄣，殺害尊人，破和合衆，不發无上正真之心，有人斷滅法教，使聖道不行。或罷脫人道，鞭笞善士，楚韃駢役，苦言加謗。或破戒行，虧於威儀，或勸他人捨弃正道，受行耶法。或假託形儀，闕竊賊盜。如是等罪，今皆懺悔。

至心歸命十方常住三寶，衆等從无始已來，或裸形單衣，在經像前，不淨脚履，昇上壇靜，或著屨屐，入於觀舍經室，涕唾堂房，汙三寶地，乘車策

馬，排突觀舍。今如是等於三寶間所起罪業，无量无边。今日至心於十方天尊聖衆前，皆悉懺悔。

至心歸命懷道天尊，

至心歸命駕龍天尊，

至心歸命六洞天尊，

至心歸命寶明天尊，

至心歸命靈元天尊，

至心歸命大千天尊，

至心歸命長樂身天尊，

至心歸命道原天尊，

至心歸命太極玉名天尊，

至心歸命衆妙之元天尊，

至心歸命大信惠天尊，

至心歸命出世天尊，

至心歸命玄虛天尊，

至心歸命得自在天尊，

至心歸命日樂天尊，

至心歸命善自天尊，

至心歸命稱增益天尊，

至心歸命端嚴天尊，

至心歸命善香天尊，

至心歸命眼勝天尊，

至心歸命善觀天尊，

至心歸命攝聚義天尊，

至心歸命善意願天尊，

至心歸命勝慧天尊，

至心歸命金幢天尊。

至心歸命天明天尊，

至心歸命功德淨天尊，

至心歸命寶光明天尊，

至心歸命師子稱天尊，

至心歸命善見天尊，

至心歸命功德王天尊，

至心歸命雨法華天尊，

至心歸命造光明天尊，

至心歸命增益山王天尊，

至心歸命普明觀天尊，

至心歸命愛淨天尊，

至心歸命日月光天尊，

至心歸命普光自在王天尊，

至心歸命純寶藏天尊，

至心歸命栴檀德王天尊，

至心歸命日月燈明天尊。

至心歸命名聞光天尊，

至心歸命虛空住天尊，



至心歸命常寂滅天尊，  
至心歸命寶辯天尊，  
至心歸命破煩惱光明天尊，  
至心歸命无憂德天尊，  
至心歸命无憂天尊，  
至心歸命无退轉天尊，  
至心歸命无相嚴天尊，  
至心歸命大慈大悲救脫真人，  
至心歸命大慈大悲大慧真人，  
二真人各三稱。

禮三寶已，次復懺悔。

夫論懺悔者，本是改往脩來，滅惡興善。人生居世，誰能无過，學人失念，尚起煩惱，仙人結習，動有口業。豈況凡夫，而當无過？但智者先學，便能改悔者，覆藏遂使滋湯，所以積習長夜，曉悟无期。若能慚愧，發露懺悔者，豈唯正是滅罪而已，亦復增長无量功德，樹立天尊勝上妙果。若欲行此法者，先當外宿肅形儀，瞻奉尊象，內起敬意，緣於相法，謙功至到，生二種心。何等爲二？一者自念，我此形命，難可常保，一朝散壞，不知此身何時可

復，若不值遇天尊賢聖，忽遭逢惡友，造衆罪業，復應墮落三塗惡趣。二者自念，我此生中雖得值遇天尊正法，得解正法者，紹繼聖種，淨身口意，善法自居。而今我等公自作惡，而復覆藏，言他不知，謂彼不見，隱匿在心，傲然无愧，此實天下遇或之甚。即今現有十方天尊，諸大真人，諸天神仙，何曾不以清淨大眼，觀於我等所作諸罪惡業。又復幽顯靈祇，注記罪福，纖豪无差。然作罪之人，命終之後，牛頭獄卒錄其精神，在羅酆宮北帝之所，辯覈是非，考論愆過。當尔之時，一切惡對皆來證據，各云汝先屠戮我身，炮煮蒸炙，或言汝先剝奪於我一切財寶，離我眷屬，我於今者始得汝，便于時現前證據，何得敢諱？唯應甘心分受宿殃。如經所明，地獄之中，不枉治人。若生平素所作罪，心自妄失者是。

至心歸命不思議天尊，  
至心歸命妙樂天尊，  
至心歸命金鬘律天尊，  
至心歸命普通天尊，

至心歸命乘璣天尊，  
至心歸命常淨天尊，  
至心歸命寂求天尊，  
至心歸命勇身天尊，  
至心歸命絕言地天尊，  
至心歸命湛常存天尊，  
至心歸命致福天尊，  
至心歸命道德天尊，  
至心歸命无鄣導天尊，  
至心歸命等空天尊，  
至心歸命善事天尊，  
至心歸命化會天尊，  
至心歸命降魔天尊，  
至心歸命光真天尊，  
至心歸命智力天尊，  
至心歸命戒行相天尊，  
至心歸命香精天尊，  
至心歸命不生死天尊，  
至心歸命玄應天尊，  
至心歸命功德本天尊，  
至心歸命正道天尊，  
至心歸命淨法天尊，  
至心歸命慈悲天尊，

至心歸命松真天尊，  
至心歸命融觀天尊，  
至心歸命道斷天尊，  
至心歸命德重天尊，  
至心歸命長壽天尊，  
至心歸命大智量天尊。  
禮三寶已，次復懺悔。

至心歸命十方常住三寶，臣等又懺悔畜生道中无所識知罪報，懺悔畜生道中不得自在，爲其生時造惡之處，一切諸相，皆現在前，各言汝昔在於我邊，作如是罪，今何得諱，是爲作罪，無藏隱處。於是酆都北帝切齒呵責，將付地獄，歷劫窮年，求出莫由。此事不遠，□□□人，正是我身自作自受，雖父子至親□□□□□受者，衆等相與，及其形休體□□衆疾苦，各自努力，與性命競怖，復事至時，悔无所及。是故清信男女，至心稽首歸命十方天尊，今皆懺悔。

天尊言曰：出家道士及清信男女、諸賢者等，口學大乘，常說玄義，心在有中，不信果報，我慢嘖高，持威作

儀勢，自說己利，動爲非法，不依戒律，以不淨手，即捉經卷，不置淨巾，復不□□安置，地上及諸卧處（下文缺）

①案敦煌本北列<sup>18</sup>號，卷首完好，題「太上洞玄靈寶天尊名卷上」。尾部殘缺。P.3755、北麗47、北金<sup>18</sup>號抄本均首尾殘缺，無標題。從內容及字跡判斷，四件抄本原當屬同一寫卷，但文字不直接連續。

②「死」字據文義補。

③周圍：原作「周圍」，據文義改。

④一百八：當作「一百八十」。參見《太上洞真賢門經》。

⑤按此句疑當作「東方玉寶皇上天尊。」參見《太上洞真賢門經》。

⑥按北金<sup>18</sup>號抄本原與北麗<sup>47</sup>爲同一抄本。二者之間僅缺損一行，即「至心歸命退轉天尊、至心歸命端嚴天尊」。參見《太上洞真賢門經》。

（王卡點校）

# 035 太上洞真賢門經

經名：太上洞真賢門經。撰人不詳，約出於唐代。假託元始天尊說十方天尊靈像名號。與敦煌本《太上洞玄靈寶天尊名》、《老子十方像名經》近似。一卷。底本出處：《正統道藏》洞真部本文類。

爾時元始天尊即說十方天尊靈像，一百八十道君、千二百老君。若廣說前劫天尊名號，數若微塵，窮劫說之，亦不可盡。今說近劫成道十方天尊，應身乃有五百七十三天尊之名號者，禮拜讚歎，功德難勝。若男若女，聞此老君賢門經，一句一偈，獲福壽報，滅除三業大罪，如是種種功德，不可具陳，不可具載，彈指頂禮，唯諾而答，敬奉教言。

是時高上元始天尊又告東方普濟真人及諸仙衆曰：東方九氣無極世界之中，應身乃有一百天尊靈像之名號者，今須至心歸命信禮：

至心歸命信禮東方玉寶皇上天尊，  
至心歸命信禮太極沖用天尊，  
至心歸命信禮無爲湛然天尊，  
至心歸命信禮託質靈應天尊，  
至心歸命信禮無因獨濟天尊，  
至心歸命信禮安和萬有天尊，  
至心歸命信禮隱德沖變天尊，  
至心歸命信禮大惠品慈天尊，  
至心歸命信禮靈符威力天尊，  
至心歸命信禮高上玄虛天尊，  
至心歸命信禮玉清上極天尊，  
至心歸命信禮高上清太素天尊，  
至心歸命信禮龍威九變天尊，  
至心歸命信禮高極明皇天尊，  
至心歸命信禮西那應化天尊，  
至心歸命信禮斷滅邪惑天尊，  
至心歸命信禮太虛至極天尊，  
至心歸命信禮上清運感天尊，  
至心歸命信禮名起十轉天尊，

至心歸命信禮力制魔試天尊，  
至心歸命信禮高上空洞天尊，  
至心歸命信禮珍藏說法天尊，  
至心歸命信禮善力救護天尊，  
至心歸命信禮寶林敷果天尊，  
至心歸命信禮無見得化天尊，  
至心歸命信禮寶慧自在天尊，  
至心歸命信禮上真凝智天尊，  
至心歸命信禮含慈慧妙天尊，  
至心歸命信禮垂化太和天尊，  
至心歸命信禮高上玉保天尊，  
至心歸命信禮紫虛玉皇天尊，  
至心歸命信禮傳經教授天尊，  
至心歸命信禮高上清至聖天尊，  
至心歸命信禮慈悲應感天尊，  
至心歸命信禮高濟危難天尊，  
至心歸命信禮敷信惠愛天尊，  
至心歸命信禮嚴淨洞曜天尊，  
至心歸命信禮法忍含和天尊，  
至心歸命信禮崇真吐妙天尊，  
至心歸命信禮應變無窮天尊，  
至心歸命信禮高上化感天尊，  
至心歸命信禮紫虛煥曜天尊，

至心歸命信禮高上清玄天尊，  
至心歸命信禮常樂玄教天尊，  
至心歸命信禮普濟平等天尊，  
至心歸命信禮大智慧海天尊，  
至心歸命信禮常寂大羅天尊，  
至心歸命信禮乘空慧覺天尊，  
至心歸命信禮大慈大悲天尊，  
至心歸命信禮慈悲救度天尊，  
至心歸命信禮長樂太平天尊，  
至心歸命信禮尋聲救苦天尊，  
至心歸命信禮拔苦與樂天尊，  
至心歸命信禮長生保命天尊，  
至心歸命信禮太華瓊曜天尊，  
至心歸命信禮內景通真天尊，  
至心歸命信禮通靈迴化天尊，  
至心歸命信禮飛步九空天尊，  
至心歸命信禮步紀七元天尊，  
至心歸命信禮豁落長耀天尊，  
至心歸命信禮元耀延靈天尊，  
至心歸命信禮混成開化天尊，  
至心歸命信禮太霄曜景天尊，  
至心歸命信禮啓明元極天尊，  
至心歸命信禮空玄明梵天尊，

至心歸命信禮太空玄蔭天尊，  
至心歸命信禮靈都集慶天尊，  
至心歸命信禮景雲普被天尊，  
至心歸命信禮洞浮七耀天尊，  
至心歸命信禮靈光四照天尊，  
至心歸命信禮保命護魂天尊，  
至心歸命信禮洞空圓極天尊，  
至心歸命信禮丹華皓映天尊，  
至心歸命信禮流耀帝一天尊，  
至心歸命信禮洞啓幽玄天尊，  
至心歸命信禮玄圃靈耀天尊，  
至心歸命信禮神通虛朗天尊，  
至心歸命信禮紫庭會聖天尊，  
至心歸命信禮四會衆真天尊，  
至心歸命信禮廣運弘化天尊，  
至心歸命信禮靈元普潤天尊，  
至心歸命信禮崇真玄古天尊，  
至心歸命信禮安化太元天尊，  
至心歸命信禮耀景西真天尊，  
至心歸命信禮保耀洞明天尊，  
至心歸命信禮八景迴化天尊，  
至心歸命信禮圓景耀霞天尊，  
至心歸命信禮光明晨極天尊，

至心歸命信禮玉虛瓊耀天尊，  
至心歸命信禮金光朗耀天尊，  
至心歸命信禮八景齊耀天尊，  
至心歸命信禮總御衆真天尊，  
至心歸命信禮法明靈鑒天尊，  
至心歸命信禮結朗輝明天尊，  
至心歸命信禮啓真玄素天尊，  
至心歸命信禮混化變生天尊，  
至心歸命信禮思玄會籍天尊，  
至心歸命信禮凝原流耀天尊，  
至心歸命信禮惠原玄暢天尊，  
至心歸命信禮凝虛善寂天尊，  
禮足至心懺悔。

復次懺悔。

天尊說言：一切衆生，捨身受身，沈淪苦海，動經累劫，不蒙解脫，皆是心口造諸重罪，三業十惡，滯染聲聞，欲求出離，證常樂果，去離三塗五苦八難，並乞消除，既得罪滅，無量無邊歸命懺悔。

至心歸命信禮無上天尊，重復懺悔殺生之罪。衆等自從無量劫來，至于今日，捨身父母兄弟六親眷屬，過去

見在不念慈悲，或因征戰，殺害就敵；或爲吏胥，巧文曲判，枉人直道；或因嫉妬，斷絕人命，墮胎落子，毒藥傷命，殺害一切衆生，啖食骨肉；或爲父母及以己身兄弟親族，聚集鄉閭，噉食衆生；或婚男嫁女，三朝滿月；或祭祀神鬼，傷殺衆生，不可計數，或殺牛羊驢馬、猪狗鷄鴨六畜之屬；或殺麀鹿狐兔、虎豹豺狼野獸之屬；或殺含血鳥鵲之屬；或殺黿龜魚鼈之屬，如此等罪，無量無邊。今日慙愧至誠，皆悉懺悔。

是時元始天尊又告南方延壽真人及諸仙衆曰：南方梵氣無極世界之中，應身乃有九十九天尊靈像之名號者，今須至心歸命信禮：

至心歸命信禮南方景福護魂天尊，  
至心歸命信禮龍漢梵度天尊，  
至心歸命信禮光啓寶藏天尊，  
至心歸命信禮高上玄微天尊，  
至心歸命信禮無上微妙天尊，  
至心歸命信禮勤化方便天尊，  
至心歸命信禮玉虛玄鑑天尊，

至心歸命信禮大慈慧海天尊，  
至心歸命信禮玄微上聖天尊，  
至心歸命信禮真容碧落天尊，  
至心歸命信禮慧覺洞照天尊，  
至心歸命信禮法海常湛天尊，  
至心歸命信禮九光普照天尊，  
至心歸命信禮苦海得度天尊，  
至心歸命信禮惠用無窮天尊，  
至心歸命信禮玄虛紫晨天尊，  
至心歸命信禮玉虛三素天尊，  
至心歸命信禮大智勝光天尊，  
至心歸命信禮能弘至教天尊，  
至心歸命信禮方便惠人天尊，  
至心歸命信禮高虛不動天尊，  
至心歸命信禮常轉法輪天尊，  
至心歸命信禮玉虛無上天尊，  
至心歸命信禮三素飛靈天尊，  
至心歸命信禮無量常樂天尊，  
至心歸命信禮紫虛太素天尊，  
至心歸命信禮德冠無窮天尊，  
至心歸命信禮十華高上天尊，  
至心歸命信禮太微金簡天尊，  
至心歸命信禮延福皇極天尊，

至心歸命信禮五明通耀天尊，  
至心歸命信禮九光神極天尊，  
至心歸命信禮素靈慈善天尊，  
至心歸命信禮丹靈弘濟天尊，  
至心歸命信禮大通靈應天尊，  
至心歸命信禮常道慧解天尊，  
至心歸命信禮八威拒遏天尊，  
至心歸命信禮四明洞曜天尊，  
至心歸命信禮流煥明空天尊，  
至心歸命信禮常虛玄一天尊，  
至心歸命信禮抱素懷玉天尊，  
至心歸命信禮誅除氛氲天尊，  
至心歸命信禮收魔束鬼天尊，  
至心歸命信禮映素流天天尊，  
至心歸命信禮玄上玉華天尊，  
至心歸命信禮帝光洞景天尊，  
至心歸命信禮飛丹流彩天尊，  
至心歸命信禮玄耀晨光天尊，  
至心歸命信禮靈光瓊耀天尊，  
至心歸命信禮慧通景洞天尊，  
至心歸命信禮寶光通照天尊，  
至心歸命信禮瓊光流潤天尊，

至心歸命信禮大定安祚天尊，  
至心歸命信禮珠琅洞宴天尊，  
至心歸命信禮平等洞虛天尊，  
至心歸命信禮玉明玄耀天尊，  
至心歸命信禮金簡法藏天尊，  
至心歸命信禮元和敬愛天尊，  
至心歸命信禮智明空解天尊，  
至心歸命信禮丹洞玉皇天尊，  
至心歸命信禮七耀神真天尊，  
至心歸命信禮天景玄微天尊，  
至心歸命信禮金映光華天尊，  
至心歸命信禮元陽龍景天尊，  
至心歸命信禮玄都總德天尊，  
至心歸命信禮景寧萬善天尊，  
至心歸命信禮耀靈興國天尊，  
至心歸命信禮輔真靈妙天尊，  
至心歸命信禮流珠光照天尊，  
至心歸命信禮寶光元洞天尊，  
至心歸命信禮齊真總聖天尊，  
至心歸命信禮帝圖淨惠天尊，  
至心歸命信禮玄真元耀天尊，  
至心歸命信禮保命長存天尊，  
至心歸命信禮洞靈玄照天尊，

至心歸命信禮長生司命天尊，  
至心歸命信禮紫極流霞天尊，  
至心歸命信禮飛步明靈天尊，  
至心歸命信禮飛煙結素天尊，  
至心歸命信禮丹華耀日天尊，  
至心歸命信禮玄臺虛極天尊，  
至心歸命信禮瓊洞空解天尊，  
至心歸命信禮玄珠耀彩天尊，  
至心歸命信禮明玉皓素天尊，  
至心歸命信禮太極金華天尊，  
至心歸命信禮日耀流光天尊，  
至心歸命信禮碧堂流煥天尊，  
至心歸命信禮金華慈惠天尊，  
至心歸命信禮降靈保耀天尊，  
至心歸命信禮明霞煥彩天尊，  
至心歸命信禮延生主筭天尊，  
至心歸命信禮慈陰普蔭天尊，  
至心歸命信禮重光遠照天尊，  
至心歸命信禮玉琳流液天尊，  
至心歸命信禮務降景耀天尊，  
至心歸命信禮慶雲常蔭天尊，  
至心歸命信禮靈通福慶天尊，  
至心歸命信禮道潤光善天尊。

禮足至心懺悔。

至心歸命信禮無上天尊，重復懺悔殺生之罪。衆等自從無量劫來至于今日，殺生害命，不可勝記，或祀鬼神殺害衆生，或割截其頭足，燬去皮毛，猛火煎煮，生分父母，斷其胎孕；或故絕命根，令其磨滅，枉殺賢人、道士、百姓男女；或殺債主冤家、四方良善，或以毒殺、藥殺、呪殺、罵殺、自殺、教他殺，見聞隨喜，如斯等殺，舉手動意，殘害無數，如是等罪，無量無邊，今日發露，皆悉懺悔。

是時高上元始天尊又告西方慈悲真人及諸仙衆曰：西方七氣無極世界之中，應身乃有七十二天尊靈像之名號者，今須至心歸命信禮：

至心歸命信禮西方慈悲救苦天尊，  
至心歸命信禮大慈等覺天尊，  
至心歸命信禮當來救苦天尊，  
至心歸命信禮流布法力天尊，  
至心歸命信禮九華敷保天尊，  
至心歸命信禮無邊明慧天尊，  
至心歸命信禮轉輪不極天尊，

至心歸命信禮上德無形天尊，  
至心歸命信禮承寶華臺天尊，  
至心歸命信禮一切智海天尊，  
至心歸命信禮智德行化天尊，  
至心歸命信禮無礙莊嚴天尊，  
至心歸命信禮大乘法藏天尊，  
至心歸命信禮不動威力天尊，  
至心歸命信禮示因緣天尊，  
至心歸命信禮慧照天尊，  
至心歸命信禮法利天尊，  
至心歸命信禮妙德天尊，  
至心歸命信禮上德王天尊，  
至心歸命信禮破衆疑天尊，  
至心歸命信禮得玄微天尊，  
至心歸命信禮運宿緣天尊，  
至心歸命信禮威德普天尊，  
至心歸命信禮無量光相天尊，  
至心歸命信禮香林邊界天尊，  
至心歸命信禮無相端嚴天尊，  
至心歸命信禮無邊自在天尊，  
至心歸命信禮示一切法天尊，  
至心歸命信禮普見諸法天尊，  
至心歸命信禮無邊王天尊，

至心歸命信禮智光天尊，  
至心歸命信禮最勝上天尊，  
至心歸命信禮萬重惠天尊，  
至心歸命信禮金華妙德天尊，  
至心歸命信禮能堅固天尊，  
至心歸命信禮智慧明照天尊，  
至心歸命信禮衆智具足天尊，  
至心歸命信禮欲精進法天尊，  
至心歸命信禮大醫王天尊，  
至心歸命信禮離煩惱障天尊，  
至心歸命信禮無邊智天尊，  
至心歸命信禮妙王生解天尊，  
至心歸命信禮轉諸難天尊，  
至心歸命信禮藏名聞天尊，  
至心歸命信禮常親善天尊，  
至心歸命信禮志堅固天尊，  
至心歸命信禮華觀惠天尊，  
至心歸命信禮貞皇玉虛天尊，  
至心歸命信禮金真妙寶天尊，  
至心歸命信禮貞素元景天尊，  
至心歸命信禮皓映真極天尊，  
至心歸命信禮妙相崇古天尊，  
至心歸命信禮崇寂凌空天尊，

至心歸命信禮高真妙果天尊，  
至心歸命信禮監王大施天尊，  
至心歸命信禮盛光普照天尊，  
至心歸命信禮開化度人天尊，  
至心歸命信禮威光威德天尊，  
至心歸命信禮玄宗仙度天尊，  
至心歸命信禮玉隆法寶天尊，  
至心歸命信禮妙成慧覺天尊，  
至心歸命信禮顯明開度天尊，  
至心歸命信禮顯明梵度天尊，  
至心歸命信禮定光大煥天尊，  
至心歸命信禮明梵太華天尊，  
至心歸命信禮華恭上妙天尊，  
至心歸命信禮玄明梵行天尊，  
至心歸命信禮度生太明天尊，  
至心歸命信禮寶光法教天尊，  
至心歸命信禮寶雲妙果天尊，  
至心歸命信禮法雷慧眼天尊，  
至心歸命信禮梵氣妙解天尊，  
禮足至心懺悔。  
至心歸命信禮無上天尊，重複懺  
悔偷盜之罪。衆等自從無始劫來至于

今日，過去見在，六親眷屬、父母己身、九祖七玄，因緣骨肉，捨身受身，運心動意，常行偷盜天尊財物，或盜法師出家財物，或盜天尊供養財物，或盜出家供養財物，或盜講說財物，或盜玄壇供養財物，或盜靈觀供養之物，或盜經戒供養之物，或盜修尊像之物，或盜經法之物，或盜玄壇之物，或盜修造觀宇之物，或盜供養清淨之物，或盜護戒信心之物，或盜常住大眾之物，如是等罪，無量無邊，今日至心皆悉懺悔。

是時元始天尊普告北方保命真人及諸仙衆曰：北方五氣無極世界之中，應身乃有九十九天尊靈像之名號者，今須至心歸命信禮：

- 至心歸命信禮北方慈悲與樂天尊，
- 至心歸命信禮真冥衆相天尊，
- 至心歸命信禮常度衆生天尊，
- 至心歸命信禮得妙道天尊，
- 至心歸命信禮保物命天尊，
- 至心歸命信禮金寶相天尊，
- 至心歸命信禮宣道慧天尊，
- 至心歸命信禮念慈施天尊，

- 至心歸命信禮無礙天尊，
- 至心歸命信禮大法施天尊，
- 至心歸命信禮上清凝寂天尊，
- 至心歸命信禮靈感天尊，
- 至心歸命信禮弘信道惠天尊，
- 至心歸命信禮嚴整相天尊，
- 至心歸命信禮莊嚴寶華天尊，
- 至心歸命信禮玄都湛寂天尊，
- 至心歸命信禮歸妙門天尊，
- 至心歸命信禮慧意天尊，
- 至心歸命信禮破冥昧天尊，
- 至心歸命信禮常普度天尊，
- 至心歸命信禮除愛慾天尊，
- 至心歸命信禮弘正道天尊，
- 至心歸命信禮光照微隱天尊，
- 至心歸命信禮隨感應天尊，
- 至心歸命信禮制魔護命天尊，
- 至心歸命信禮斷除宿瘴天尊，
- 至心歸命信禮分身應化天尊，
- 至心歸命信禮隨變化天尊，
- 至心歸命信禮開祕藏天尊，
- 至心歸命信禮廣度真仙天尊，
- 至心歸命信禮靈化無極天尊，

- 至心歸命信禮常應世界天尊，
- 至心歸命信禮宿世因緣天尊，
- 至心歸命信禮高上慈救天尊，
- 至心歸命信禮常寂真身天尊，
- 至心歸命信禮忍垢天尊，
- 至心歸命信禮普濟度天尊，
- 至心歸命信禮延生濟厄天尊，
- 至心歸命信禮隨緣應感天尊，
- 至心歸命信禮常遊化天尊，
- 至心歸命信禮法無礙天尊，
- 至心歸命信禮流光遍照天尊，
- 至心歸命信禮垂法要天尊，
- 至心歸命信禮高上玄極天尊，
- 至心歸命信禮流規玉簡天尊，
- 至心歸命信禮玄聖天尊，
- 至心歸命信禮棄邪念天尊，
- 至心歸命信禮入無爲天尊，
- 至心歸命信禮鎮法長生天尊，
- 至心歸命信禮梵形景德天尊，
- 至心歸命信禮元曜明皇天尊，
- 至心歸命信禮玉虛真洞天尊，
- 至心歸命信禮大靈慈蔭天尊，
- 至心歸命信禮法本元靈天尊，



至心歸命信禮迴真法相天尊，  
至心歸命信禮法本好生天尊，  
至心歸命信禮元靈法相天尊，  
至心歸命信禮普壽長樂天尊，  
至心歸命信禮香林寶相天尊，  
至心歸命信禮大保報身天尊，  
至心歸命信禮大智光明天尊，  
至心歸命信禮報應善天尊，  
至心歸命信禮虛無善天尊，  
至心歸命信禮大慈悲天尊，  
至心歸命信禮月光明天尊，  
至心歸命信禮萬福大慈天尊，  
至心歸命信禮六度大悲天尊，  
至心歸命信禮玄妙福堂天尊，  
至心歸命信禮法雲普光天尊，  
至心歸命信禮慈善敬愛天尊，  
至心歸命信禮慈敬流思天尊，  
至心歸命信禮法王普濟天尊，  
至心歸命信禮妙真弘教天尊，  
至心歸命信禮普明大度天尊，  
至心歸命信禮廣明度脫天尊，  
至心歸命信禮弘濟威德天尊，  
至心歸命信禮普度王天尊。

至心歸命信禮寶真相天尊，  
至心歸命信禮制消魔天尊，  
至心歸命信禮太平國天尊，  
至心歸命信禮鎮國境天尊，  
至心歸命信禮玄徹應真天尊，  
至心歸命信禮會景寧天尊，  
至心歸命信禮太霞景德天尊，  
至心歸命信禮慈忍保命天尊，  
至心歸命信禮度脫延筭天尊，  
至心歸命信禮德普照天尊，  
至心歸命信禮簡寂崇信天尊，  
至心歸命信禮含光洞曜天尊，  
至心歸命信禮通玄入寂天尊，  
至心歸命信禮洞照幽寂天尊，  
至心歸命信禮思微慧解天尊，  
至心歸命信禮真宗慧朗天尊，  
至心歸命信禮玄朗普覺天尊，  
至心歸命信禮興教道天尊，  
至心歸命信禮碧落空歌天尊，  
至心歸命信禮玄寂通天尊，  
至心歸命信禮谷神靈天尊，  
至心歸命信禮福勝常樂天尊，  
禮足至心懺悔。

至心歸命信禮無上天尊，重復懺悔偷盜之罪。衆等自從無量劫來，至于今日，運身發意，常行偷盜人等財物，或以方便取，或以迫脇取，或以非法取，或以下脫取，或以借貸不還，或罔冒欺負不償，凡非己物，華果草木，一草一葉，起一念心，皆為偷盜，乃至路上拾得，野間逢遇，風吹鳥銜，車馬布帛米麥微塵，不論多少，無量劫來，隱藏在身，未曾發露，今既懺悔，滅除累劫之罪，萬劫蒙原七祖父母過去見在六親眷屬。各乞子孫興盛，穀帛盈豐。宅宇清吉，歷代衣纓，今日慙愧，皆悉懺悔。

是時元始天尊又告上方太極真人及諸仙衆曰：上方梵氣無極世界之中，應身乃有九十五天尊靈像之名號者，今須至心歸命信禮：

至心歸命信禮上方大慈大悲天尊，  
至心歸命信禮惠海天尊，  
至心歸命信禮玉真相好天尊，  
至心歸命信禮寶林敷化天尊，  
至心歸命信禮玉寶流華天尊。

至心歸命信禮大弘智慧天尊，  
至心歸命信禮保護賢德天尊，  
至心歸命信禮弘慈訓道天尊，  
至心歸命信禮遍通夷狄天尊，  
至心歸命信禮示現威神天尊，  
至心歸命信禮化身法身天尊，  
至心歸命信禮降魔制變天尊，  
至心歸命信禮通達慧命天尊，  
至心歸命信禮步虛慧化天尊，  
至心歸命信禮廣大濟度天尊，  
至心歸命信禮預善濟天尊，  
至心歸命信禮堅持禁戒天尊，  
至心歸命信禮常無畏天尊，  
至心歸命信禮迴靈變滅天尊，  
至心歸命信禮南昌普濟天尊，  
至心歸命信禮綱維四象天尊，  
至心歸命信禮慈育天尊，  
至心歸命信禮香林說法天尊，  
至心歸命信禮淨智慧天尊，  
至心歸命信禮常見金容天尊，  
至心歸命信禮化萬物天尊，  
至心歸命信禮定慧念天尊，  
至心歸命信禮常樂導天尊，

至心歸命信禮慈念玉光天尊，  
至心歸命信禮更生垂惠天尊，  
至心歸命信禮不受功報天尊，  
至心歸命信禮玄都下化天尊，  
至心歸命信禮行道化天尊，  
至心歸命信禮布衣威光天尊，  
至心歸命信禮弘綸萬象天尊，  
至心歸命信禮退轉天王天尊，  
至心歸命信禮端嚴定相天尊，  
至心歸命信禮金顏寶曜天尊，  
至心歸命信禮宗匠無爲天尊，  
至心歸命信禮遍識宿命天尊，  
至心歸命信禮化入法門天尊，  
至心歸命信禮散功流德天尊，  
至心歸命信禮示物生源天尊，  
至心歸命信禮靜生和氣天尊，  
至心歸命信禮九靈應慧天尊，  
至心歸命信禮垂妙氣天尊，  
至心歸命信禮圓光明徹天尊，  
至心歸命信禮洞觀有無天尊，  
至心歸命信禮含弘萬品天尊，  
至心歸命信禮傳示旨教天尊，  
至心歸命信禮遍照除疑天尊，

至心歸命信禮大慈大悲天尊，  
至心歸命信禮尋聲救苦天尊，  
至心歸命信禮香光過界天尊，  
至心歸命信禮慧明遍照天尊，  
至心歸命信禮梵音開化天尊，  
至心歸命信禮無相端嚴天尊，  
至心歸命信禮無邊自在天尊，  
至心歸命信禮善緣天尊，  
至心歸命信禮普現諸法天尊，  
至心歸命信禮金華妙德天尊，  
至心歸命信禮衆智具足天尊，  
至心歸命信禮無量光相天尊，  
至心歸命信禮飛步明靈天尊，  
至心歸命信禮靈曜保華天尊，  
至心歸命信禮丹華曜日天尊，  
至心歸命信禮日曜流光天尊，  
至心歸命信禮明玉皓齒天尊，  
至心歸命信禮延生主筭天尊，  
至心歸命信禮玉琳流液天尊，  
至心歸命信禮重光遠照天尊，  
至心歸命信禮保命長存天尊，  
至心歸命信禮七曜神真天尊，  
至心歸命信禮帝圖靜慧天尊，

至心歸命信禮寶光元洞天尊，  
至心歸命信禮天景玄微天尊，  
至心歸命信禮長生司命天尊，  
至心歸命信禮玄上玉華天尊，  
至心歸命信禮慧通景洞天尊，  
至心歸命信禮玉明玄曜天尊，  
至心歸命信禮平等洞虛天尊，  
至心歸命信禮元和愛敬天尊，  
至心歸命信禮丹洞玉皇天尊，  
至心歸命信禮玄微上聖天尊，  
至心歸命信禮大通靈應天尊，  
至心歸命信禮五明通曜天尊，  
至心歸命信禮常道慧解天尊，  
至心歸命信禮九光神極天尊，  
至心歸命信禮十華高上天尊，  
至心歸命信禮玉虛無上天尊，  
至心歸命信禮紫虛太素天尊，  
至心歸命信禮大智光明天尊，  
至心歸命信禮能弘至教天尊，  
至心歸命信禮九光普照天尊，  
至心歸命信禮苦海得度天尊，  
禮足至心懺悔。

至心歸命信禮無上天尊，重復懺

悔邪淫之罪。衆等自從無量劫來至于今日，父母兄弟眷屬、過去見在捨身受身，所在生身，恒滯邪淫，不能清靜，常行姪慾，或對天尊起諸慾想，或對經法起諸慾想，或對法師起諸慾想，或對善男女起諸慾想，或對衣服玄黃繒綵起諸慾想，或對華果起諸慾想，或見牛馬起諸慾想，或見山林起諸慾想，如是等罪，無量無邊，今日至誠，皆悉懺悔。

是時元始天尊又告下方玉虛真人及諸仙像曰：下方梵氣無極世界之中，應身乃有九十七天尊靈像之名號者，今須至心歸命信禮：

至心歸命信禮下方迴屍起死天尊，  
至心歸命信禮太虛凝寂天尊，  
至心歸命信禮龍漢威德天尊，  
至心歸命信禮光明三景天尊，  
至心歸命信禮寶慈天尊，  
至心歸命信禮大千赴感天尊，  
至心歸命信禮靈元妙極天尊，  
至心歸命信禮長樂濟世天尊，  
至心歸命信禮導化原寂天尊，  
至心歸命信禮太極無上天尊，

至心歸命信禮衆妙空寂天尊，  
至心歸命信禮大信慧天尊，  
至心歸命信禮出世智天尊，  
至心歸命信禮智光明天尊，  
至心歸命信禮運因緣天尊，  
至心歸命信禮萬重光天尊，  
至心歸命信禮無量法天尊，  
至心歸命信禮大醫王天尊，  
至心歸命信禮最尊上天尊，  
至心歸命信禮欲精進法天尊，  
至心歸命信禮智慧明照天尊，  
至心歸命信禮明梵太華天尊，  
至心歸命信禮玄明梵行天尊，  
至心歸命信禮度生太明天尊，  
至心歸命信禮寶雲妙果天尊，  
至心歸命信禮玄宗仙度天尊，  
至心歸命信禮玉陵法寶天尊，  
至心歸命信禮玄靈洞化天尊，  
至心歸命信禮得自在天尊，  
至心歸命信禮施法樂天尊，  
至心歸命信禮善救無遺天尊，  
至心歸命信禮視現玄義天尊，  
至心歸命信禮自在勝樂天尊，

至心歸命信禮善增益天尊，  
至心歸命信禮端嚴妙相天尊，  
至心歸命信禮妙香王天尊，  
至心歸命信禮高勝慈因天尊，  
至心歸命信禮善光照天尊，  
至心歸命信禮勝慧光天尊，  
至心歸命信禮量廣相天尊，  
至心歸命信禮垂光歷化天尊，  
至心歸命信禮善現燈天尊，  
至心歸命信禮淨德魔天尊，  
至心歸命信禮智光明天尊，  
至心歸命信禮妙元魂天尊，  
至心歸命信禮功德王天尊，  
至心歸命信禮羽保華天尊，  
至心歸命信禮智勝德天尊，  
至心歸命信禮辯正惠天尊，  
至心歸命信禮喜明照天尊，  
至心歸命信禮愛清靜天尊，  
至心歸命信禮日月光天尊，  
至心歸命信禮保度生天尊，  
至心歸命信禮保海王天尊，  
至心歸命信禮常保祕藏天尊，  
至心歸命信禮散香華王天尊，

至心歸命信禮日月光明天尊，  
至心歸命信禮無量慈悲天尊，  
至心歸命信禮常住虛空天尊，  
至心歸命信禮凝常寂靜天尊，  
至心歸命信禮姿勝慧光天尊，  
至心歸命信禮常破滯惑天尊，  
至心歸命信禮無憂德天尊，  
至心歸命信禮離愛敬天尊，  
至心歸命信禮大慈大悲天尊，  
至心歸命信禮大慈大惠天尊，  
至心歸命信禮平等救苦天尊，  
至心歸命信禮化生救苦天尊，  
至心歸命信禮慈忍救苦天尊，  
至心歸命信禮三光洞晏天尊，  
至心歸命信禮玉晨上境天尊，  
至心歸命信禮通真得道天尊，  
至心歸命信禮扶桑玄天尊，  
至心歸命信禮昇玄飛天尊，  
至心歸命信禮圃流光天尊，  
至心歸命信禮五雲七曜天尊，  
至心歸命信禮雲善蔭天尊，  
至心歸命信禮月華明天尊，  
至心歸命信禮曲晨鏡天尊，

至心歸命信禮碧流珠天尊，  
至心歸命信禮靈華境天尊，  
至心歸命信禮玄飛涉天尊，  
至心歸命信禮太微下景天尊，  
至心歸命信禮金光景化天尊，  
至心歸命信禮丹華清映天尊，  
至心歸命信禮景丹霞天尊，  
至心歸命信禮含日明天尊，  
至心歸命信禮明三景天尊，  
至心歸命信禮空清靈天尊，  
至心歸命信禮延生保命天尊，  
至心歸命信禮日光曜天尊，  
至心歸命信禮靈暉相天尊，  
至心歸命信禮黃素老天尊，  
至心歸命信禮流光四照天尊，  
至心歸命信禮洞扶法輪天尊，  
至心歸命信禮大梵都天尊，  
至心歸命信禮玉誕玄天尊。  
禮足至心懺悔。

於是高上老君普告無上天尊：重復懺悔邪姪等罪，不可一一具說因緣，或離人母子，別人恩愛，隔人憐念，不擇好醜，不避親疏，或抑人男女，和合

陰陽，體露三光，侵凌四輩，耳淫音聲，  
眼觀玄黃，鼻受馨香，口貪滋味，身貪  
細滑，如此等罪，無量無邊，結在身心，  
今日至誠懇禱，皆悉懺悔，衆等彈指頂  
禮，共結因緣，各受千春，同霑福慶，再  
拜奉行。

太上洞真賢門經

(曾召南點校)

## 036 太上洞玄靈寶出家 因緣經

經名：太上洞玄靈寶出家因緣經。撰人不詳，約出於隋唐。言宿命因緣及出家科戒。一卷。底本出處：《正統道藏》洞玄部本文類。

道言：昔開皇元年七月十五日午時，於赤明國朱陽上觀三明寶壇，詣太上天尊，受无上三洞大乘妙經一萬三千五百篇，符圖七千章已。天尊將歸太空無爲之境，時會有二百國王，及以妃后，并諸大臣、國民男女，同發道意，稽首天尊，捨棄國城妻子，求欲出家，誓願受持三洞經典，終身供養，作當來三世福業。天尊含笑，放九色寶光，照此大會，及諸王等國人男女，內外明徹，如琉璃珠，臟腑毛髮，莫不皆見。

是諸王等於其光內，自見己身，表裏洞朗，悉知宿命，過去未來三世善惡，皎在目前。是諸王等，及以男女，一切會人，咸皆震懼，更發無上最勝之心，匍匐禮拜，上白天尊言：弟子宿因運會，得遇慈尊無上勝會，復值太上，奉受三洞大法。更逢經典，昭示昔緣，實非凡夫千載慶幸，特由天尊弘慈之澤，欲以開度，曲逮之恩，頓集今日。蟲蟻微物，豈覺深仁，然喁喁之誠，實欲捨棄穢土及以妻子，願得出家，持奉經戒，作出世福田。恩惟天尊特垂開許。

天尊曰：汝未發心，吾已知之。所以放此光者，將欲示汝宿命，令識善惡因緣。夫出家者，因緣甚重。汝能發意，是不可思議，但恐汝等耽染世事，放蕩已久，不能甘苦，受此勤勞，有始無終，初勤後怠，匪專守道，終落惡門，輕師慢法，自取沈淪。是諸王等，一時頓顙稽首叩頭，聲淚俱下，遂作誓言：弟子等若出家後，有始無終，初勤後怠，違其本誓，中道退惰，即與九祖父母，同淪地獄，萬劫難原，後報受生

非人之類，不敢有言。

天尊曰：汝各諦聽，吾今爲汝說出家因緣。夫出家者，或先世建立靈觀玄壇及諸精舍，聖真仙迹廣修堂殿，造諸形像，真應化身，莊嚴供養，抄經講說，誦念流通，開悟人天。或先世捨施國城妻子，頭目髓腦，金銀珠玉，綾羅錦綺，車馬僮僕，卧具服飾，玩弄器物，入三寶中，用作諸福田。或先世持齋奉戒，禮拜燒香，行道讚誦，謝罪除愆，常行善願，不捨須臾。或先世放贖生命，救濟貧窮、囚徒老病，及諸鳥獸，盲聾六疾，一切衆生。或先世救疾治病，活諸危苦已死之人。或先世廣讀經論，講說教化，勸獎童蒙，令知善道。或先世種植果林，道邊立井，造作舟梁，濟度一切。或先世大設義田，施衣及食，饑寒病苦，蟲魚鳥獸，一切貧窮，皆令飽足。或先世建立義堂，愍念寒熱，施漿及火，救助行旅，使得安居。或先世所在發心，平等一相，廣化男女，勸助道場，立觀度人，寫經鑄像，授經傳戒，禮拜燒香，然燈念誦，布施懺

悔，開悟群迷。或先世忠貞仁孝，助國興化，正直清廉，淳和良善，不損於物，安樂衆生。或先世爲君，大行慈善，卑宮菲食，憐念人民，平等萬物，國土安寧，而諸惡未盡，衆善未圓，功名雖著，不得遷昇，隨其高下來生人中，更值經法，而得出家。或七祖積福，慶流子孫。或見世立功，名聞諸天，非起一朝而得之也。汝等先世信向三寶，寫經造像，建立玄壇，度人濟物，持齋禮拜念誦，燒香供養，行道布施，懺悔願念不絕，大作功德，致令國王之報，人中第一，是不可思議。更能捨國城妻子，棄世歡樂，求乞出家，持奉經誡，發無上心，作當來過去長生道業，甚爲希有，不可思議，不可思議。是諸王等，一時稽首，五體投地，悲喜不寧。

天尊於是即命九地真官，敷延真之座，四天王列度仙之錄，三天真王下證真之信，五帝持幢，三界執符，四司齋簡，三官案簿，諸天帝君、仙童玉女、神仙兵馬巨億萬衆，一時來下，散花燒香，揚旛振旌，鏗鍾叩磬，天樂萬

種，羅列左右，同聲稱善，俱到道場，監臨法會，開度善緣。天尊命我與玉清高聖，授諸王等入道科誡、節度威儀。四天王等爲加法服，北面禮天尊，三拜。回禮吾及諸天仙真聖等，東面伏地，受初真誡也。

誡曰：出家之後，第一不得輕慢經道，及以本師。第二不得泄慢法服，損道威儀。第三不得中道退敗，趨世榮華。第四不得捨我法衣，更從異學。第五不得與非出家及諸異學交遊居處，穢辱法服。第六不得啖食酒肉，懷殺害想。第七不得與諸男女交遊，生姪邪想。第八不得違犯經誡，生諸過惡。第九不得傲誕狠戾，欺凌同道及非出家人。第十不得不敬父母國君，不忠不孝。一當常發大心，立觀度人，寫經造像，紹隆聖教。二當常發大心，講說三洞經教，勸化衆生，令廣悟解。三當常發大心，持齋禮拜，奉誠燒香，作過去未來生死道果。四當常發大心，爲國主人王、大臣宰輔、天下人民作大功德。五當常發大心，爲九玄七

祖、所生父母、眷屬妻子，一切衆生作歷劫福田。六當常發大心，遍爲天下地上、有識無識、有緣無緣、若人非人，一切含識，讀經禮拜，念道念師，皆令離苦，同昇道岸。七當常發大心，願一切衆生皆悟正道，永免生死。八當常發大心，願前劫後劫，今身生身，大道興隆，永無淪壞，開度衆生。

是諸王等，各禮三拜，又回心禮十方，各一拜。因對天尊，自發誓願：第一誓者，出家之後，誓不輕慢經道及以本師。第二誓者，出家之後，誓不泄慢法服，損道威儀。第三誓者，出家之後，誓不中道退敗，趨世榮華。第四誓者，出家之後，誓不捨其法服，更從異學。第五誓者，出家之後，誓不與非出家及諸異學交遊居處，穢辱法服。第六誓者，出家之後，誓不啖食酒肉，懷殺害想。第七誓者，出家之後，誓不與諸男女交遊，生姪慾想。第八誓者，出家之後，誓不違經誡，生諸過惡。第九誓者，出家之後，誓不做誕狠戾，欺凌同學及非出家人。第十誓者，出家之

後，誓不敢不敬父母國君，不忠不孝。一願立觀度人，寫經造像，紹隆三寶。二願講說三洞經教，令廣開悟解。三願持齋禮拜，奉誠燒香，旦夕不替。四願爲國主人王、大臣宰輔、天下人民，作諸功德。五願爲九玄七祖、所生父母、眷屬因緣，作歷劫福田。六願遍爲天下地上一切衆生，讀經禮拜，令登道岸。七願一切衆生皆悟正道。八願前劫後劫，常在道門，心不退轉。九願十方世界一切男女，有道心者，同得出家。十願劫劫種因，早得仙道，永無生滅。發此誓願已，是諸大衆，一時稱善，各住本位。

於是諸天仙真聖，衆玉童玉女，建節持幢，散花燒香，歌詠天尊無量功德，奏天音樂，引諸王等新出家者，行道三匝，十聲稱善，歎願畢已，逕就福堂，飲食天供，持齋清淨。諸天男女，及以國人，下萬種花果，珍奇法味，次第周行，供養訖已，將諸府庫七寶珠玉、綾羅綿綺、衣服卧具、玩弄器物，香爐几拂、如意履杖、食器坐褥、繩牀夾

膝、旛幢澡罐、巾帕匕筴、僮僕車馬、園宅苑囿、竹樹果林、花藥池沼，種種法物，捨施供養。新出家者，及諸會人，同發聲言：我等宿幸，得逢今日。天尊慈悲，大弘度脫，有是王等，棄國出家，而爲我等作大福利，開盲愚心，得見真道。唯願王等堅持法相，住大法門，行天尊教，開度我等，使我滅罪，生無量善，當來世中，得出家法身。說是願已，三聲稱善，瞻仰天尊，稽首而坐。

天尊曰：汝等男女，無量劫來，持奉齋戒，供養禮拜，得遇今日，不可思議。更當布施新出家者，及諸衆會，功德無量，天人歡欣，必當閉眼即生富貴國王之門。聰明賢達，還得出家，定不差也。是諸男女，同聲稱善，一時禮拜，依位而坐。

天尊曰：出家者有三種義，一曰出家，二曰入道，三曰捨凡。何謂出家。家有二義。一者恩愛之家，謂父母恩愛，兄弟恩愛，姊妹恩愛，男女恩愛，眷屬恩愛，共相纏縛，繫戀在心，造諸惡業，種種貪著，令生煩惱，不得自

在，修正真道。今出此家，永斷恩愛，常得自在，念道無爲。二者諸有之家，謂我此身，五陰四大，聚集相成，處在世間，妄生染著，六根三業，廣構諸塵，世境攀緣，造衆惡業，色聲香味，煩惱淨心，弊穢既生，輪迴生死，不能解脫，永劫沈淪，世世生生，受非人類。令知身非身，不淨臭穢，膿血聚合，暫寄少時，一旦化消，百骸無主，譬諸泡幻，聚散須臾，萬法參差，同一虛假，總非我有，與我自殊，妄繫有無，而生染著，穢累識神，遂幽地獄。今出此家，永斷煩惱，觀身空假，諸境洞然，運想舉心，皆歸至道，體神入妙，鍊質歸無，不死不生，永證常樂，故曰出家。何謂入道。道有二種。一者道境，謂玄壇靈觀、山林靖治、樹下花園，清淨無爲，不交凡世，身登此地，面對真容，口誦靈文，無諸囂雜，燒香禮拜，行道誦經，講說大乘，專精守一，棄彼俗境，入此道場，陶鍊心形，必至常樂，克成真聖，證果玉清，無去無來，湛然常住。二者道體，謂端身靜慮，觀想內身，省察己形，遠



觀諸物，同爲有待，俱是空無，黯爾暫生，倏然俄化即滅，歛有歛無，萬法不停，一生非久，熟看世界，念念無常，好體我身，誰爲真者，當知假合，既備因緣，聚散須臾，豈能常住，當須存三守一，鍊質成真，長與道同，免其生死，常樂我淨，證果道場，轉此漏身，名爲入道。何謂捨凡。凡有二種。一者凡境，謂天地日月、山河石壁、草木蟲魚，一切衆生，皆是有物，暫生暫滅，即破即壞，消散少時，不可耽著，染穢我身，當知三界，悉爲空假，並能捨棄，永絕貪求。二者凡身，謂我此身，眼耳鼻口，身肉皮膚，手足毛髮，百骸九竅，總相聚合，名之爲人。究竟尋求，人無有處，生老病死，念念無常，不淨臭穢，暫時依倚，何須執著，而有是非彼我，殺生偷盜，邪淫放蕩、嫉妬慳貪，罵詈嗔怒，綺言妄語，兩舌惡口，嘖嘖欺凌，富貴貧窮，更相侵取，愛憎取捨，種種攀緣，流浪色聲，貪著香味，常聚金寶玉帛，綾羅繒綺，米麥穀粟，積歛無厭，將充萬世，豈知一旦，形化灰塵。今捨我

身，息諸貪著，眼斷諸色，耳斷諸聲，鼻斷諸香，口斷諸味，意斷諸法，身斷諸欲，乃至六根六識、六欲六賊、六入六染，六塵更相因起，三十六緣，諸惡根本，並皆棄捨，澄淨一心，永斷煩惱，故曰捨凡。總此三者，名爲道士。

所以名爲道士者，謂行住坐卧、舉心運意，唯道爲務，持齋禮拜，奉誦經，燒香散花，然燈懺悔，布施願念，講說大乘，教導衆生，發大道心，造諸功德，普爲一切，後已先人，不雜塵勞，唯行道業。士者事也。事有多少，學致差殊，凡有七階，俱稱道士。一者天真，謂體合自然，內外淳淨。二者神仙，謂變化不測，超離凡界。三者幽逸，謂含光藏輝，不拘世累。四者山居，謂幽潛默遁，仁者自安。五者出家，謂捨諸有愛，脫落囂塵。六者在家人，謂和光同塵，抱道懷德。七者祭酒，謂屈己下凡，救度危苦，故得天下地上，六道四生，禮拜歸敬，最爲尊勝，不朝天子，不揖公侯，作人天福業，受三界供養。所以者何。由稟我法教，

衣我法服，持奉經誡，開導衆生，令過去未來三世，永脫憂苦，入常樂門，是諸人天法身父母故也。帝王者雖富有萬國，貴爲人尊，而不免生死，不免疾病，不免煩惱，不免破壞，不免寒暑，不免往反，能若道士脫其患矣。若出家不依我法，不持法衣；或背道入俗，棄真就僞；或從異學邪道，崇奉外教；或趨世榮華，苟貪名利；或王法逼迫，官私枉橫，脫其衣服，損辱法身；或自捨法服，却沈凡界；或人不信敬，罵詈凌辱，打揸出家法身；或生輕慢，心不恭肅；或戲弄調笑，嘖嘖傲誕。如此之人，見世必遭蟲癩之病，眉毛墮落，遍身瘡腫，舉體爛壞，人不喜見。或遭官司牢獄，桎械枷鎖，痛楚切身。或盲聾瘖啞，手攣腳跛，形容醜陋，貧窮下賤。或風狂顛癲，邪神惡鬼，冤家凶對，以相報值，病苦加身。或毒蛇猛獸、水火刀兵、凶人劫賊，非意損害。或所生男女，形容醜陋，貧窮下賤，常不具足。或長病在身，求生不得，求死不得，常居牀枕。或生落邊夷，更相殺

伐，旦夕驚恐，父子分離，一旦身死，逕入地獄，吞火食炭，足履刀山，手攀劍樹，身負鐵杖，鑊湯煮漬，碓擣磔磨，寒冰逼體，萬痛切身，晝夜考掠，辛苦備經，動則萬劫，後得受生，還爲六畜，貧窮下賤，盲聾六疾，種種苦惱，切割其身。若出家之後，心生退轉，輕慢法服，違犯經誡，飲食酒肉，殺生偷盜，邪淫放蕩，不持法相，損汙道門，亦復如是。時諸衆等，同聲稱善，禮拜天尊，而說頌曰：

善哉無上尊，慈悲普救護。授與太上經，諸王得開悟。因茲同發願，投誠永傾慕。捨國求出家，隨緣總開度。受誠說誓願，人天感丹慄。廣演因緣法，並入歸依路。永作生死果，萬劫常流布。我等諸會人，同歡飲甘露。

若四時失度，陰陽不調，當須立觀度人。若水火刀兵，天下損傷，當須立觀度人。若疫毒流行，人民死亡，當須立觀度人。若國主有災，厄運相逢，當須立觀度人。若國祚將危，兵革四興，當須立觀度人。若初登王位，化治人

民，當須立觀度人。若統領天下，國土不安，當須立觀度人。若誕育男女，疾病厄難，當須立觀度人。凡有災厄，及諸變異，一切危苦，當須立觀度人。或爲父母，或爲己身，或爲妻子，或爲臣民，或爲祖世，或爲見存，或爲終亡，或爲三塗，皆當立觀度人。夫立觀度人，上消天災，安鎮國祚，保護帝王，消穢毒害，開度人民，生死獲慶，其福巍巍，普今一切，使有歸依，功德無量，不可思議。

道言：夫出家者，作生死福田，受人天勝報。常當禮拜供養，給其所須，衣服卧具，玩弄器物，香油几杖，車輿僕從，殿堂屋宇，臺榭樓閣，花林藥園，浴池果園，飲食滋味，珍寶繒綵，幡花燈燭，鍾磬法具，香爐澡罐，如意塵拂，隨其所有，以用布施，供養出家法身，令得安樂。開發智慧，轉讀尊經，禮拜燒香，持齋奉誠，建百寶座，講說大乘，常爲國主人王、大臣宰輔、人民男女，一切衆生，作三世福田。帝主國王、大臣宰輔，及以人庶，生不信心，罵詈呪

詛，訶責凌辱，禁閉枷鎖，損壞法身，或致傷殺，鞭笞考楚，使其辛苦，汙辱法服，逼令入俗，見世蟲癩，衆厄備經，過去魂神，逕入地獄，受諸苦惱，萬劫不原。若出家之人，自愛凌辱，不持法相，生憎慢心，令諸衆生，起不信者，過去當作猪狗蛇虺之身。汝等男女，慎之慎之。

道言：汝諸男女，寧剝五百人衣，不得脫一出家法衣。寧害一切惡人，不得害一出家法身。寧犯三千猛獸，不得犯一出家。寧辱五千力士，不得辱一出家。寧輕欺一萬惡鬼，不得輕欺一出家。寧坐大火之中，不得與出家同席。寧卧熱鐵之牀，不得共出家同寢。寧觸五萬毒蛇，不得觸出家法衣。寧吹大山爲塵，不得道說出家。寧吞萬斛猛火，不得食出家人物。寧沒萬丈穢中，不得淫犯出家。寧出百千人身血，不得見出家是非。所以者何。出家是天尊弟子紹隆經教故；出家是一切人天無上法師故；出家是一切衆生生死橋梁故；出家是一切人民

歸依父母故；出家是國主人王修善因緣故；出家是九玄七祖拔度功力故；出家是諸仙真聖發生初心故；出家是三塗五苦彼岸法舟故。受國主人王，父母眷屬禮信供養，諸天魔王、三界鬼神，稽首束形，自稱下官受教出家法門。何以故？爲受天尊遺教，行天尊經法，誦天尊法言，佩天尊誠籙，持天尊符圖。常有三界五帝、將軍吏兵，守衛迎送，犯之者獲罪。若帝主國王、大臣宰輔、人民男女，能發善心，出家入道者，九祖父母，得上天宮，七世子孫，不入地獄。若道士廣勸有緣，令出家者，一人益筭一千五百，三人已上，名登仙格，見世歡樂，衣食自然，過去生天，福報無窮。

道言：汝諸男女，既出家已，當須護持法服，尊師念道，持奉經誡，勤修行業，禮拜燒香，長齋奉戒，誦經行道，講說大乘，廣達功德，更相開度，化喻衆生，紹隆法教，常行慈悲，救濟一切，精研上道，轉神入妙，在在長存，念念增進，永不退墮，克得道真。

道言：汝等男女，皆從無量劫來，捨身受身，行諸善道，持奉齋戒，今得出家，須知宿命生身因緣。夫人承昔功業，資道之力，得生人中，寄胎父母，和合善緣，兩半成身，法天象地，具足六根，稟受元氣，生化百神，運動陰陽，遍滿身形，眼耳鼻口，骨節皮膚，臟腑血脉，內外相連，結聚真氣，榮衛五神，致得堅固，內本一源，日月流照，生化百神，三元八景，轉變無窮，內外相合，三萬六千，從初至終，次第有倫。今爲汝說，須識之焉。人始受胎，因緣道一，天地陰陽，各以一半。未身之前，寄父母胎，九天構氣，三元布神。一月爲胞，胞者包也，元氣包裹，結聚混黃，運轉生化，中有真精。二月爲胎，胎者恢也，神乘宿命，來降父母身中，構造陰陽，恢廓其形。三月爲魂，魂者云也，陽之粹精，薄而生神，云云不住，運轉經營。四月爲魄，魄者泊也，陰之淳氣，凝神鎮形，泊然安靜，以定厥身。五月爲臟，臟者藏也，陰陽有象，五行列分，置立五臟，肝心脾肺腎，以藏五

神，攝御萬靈，生化一身。六月爲腑，腑者聚也，積聚淳液，溉灌五神，大小腸胃，膽焦膀胱，消息穀津，百體成焉。七月爲竅，竅者通也，出入視聽，內外開明。八月爲景，景者警也，三部八景，警備人身。九月神具，天地日月，星辰五行，四時生化，一切神明，內外相合，出入身中，上下三部，環繞三宮，萬有八千，表裏影照，一時生身，金堂玉室，十二重樓，紫戶玉閣，日月星辰，五嶽四瀆，象地法天，宛轉備具，遍滿其身。十月天地神祇，五帝四司，九天司馬，十方善神，仙童玉女，一時監臨，太一衛軒，玄母守房，感天動地，衆聖齊歡，司命注籍，天帝定年，隨其宿業，受報不差，保形守神，澄心自然，變鍊滓滯，重修善功，以道通神，以德育形，形神合契，歸於虛無，不生不死，常住獨存，人須保養形神，慎勿損焉。汝道士當須保守形神，愛養精氣，不損毛髮，不損皮膚，內全精神，外具身形，首冠蓮花，足履太山，中披日月，四象分明，天地在體，日月存身，有道可法，有

德可尊，萬物服從，一切歸依，故謂法服，出家法身。

道言：吾過去後，上皇半劫，當有邪學鬼道，不從我教，自作一法，人民信向，天下歸伏，損形滅身，多積財寶，大造形像，廣設屋宅，妄稱聖果，過去得福，淫慾姦矯，惑亂人心，漸漸滋蔓，男女敬信，永不開悟，國破家亡，身滅族散，繼踵相仍，舉世沉迷，終無覺察。當此之時，我法大壞，人不肯行，唯崇鬼法，寂滅之教，長生久視，而不信用，痛哉痛哉。道士無知，亦復奉也，一習此法，永無仙分長生之冀，可不慎哉。何以故，爲是陰教鬼道，死滅之法。喻如五穀朽壞，有生相不；亦如腐壤，能生物不；亦如死灰，更有然不；復如枯木，得重榮不；消散朽壞，化爲糞土，此爲寂滅不生法也。世以生爲善事，死是惡事，皆欲其生，悉悲其死，故我爲說長生之法，令其不死，永劫長存。但爲衆生顛倒，不能信奉，致有死壞，而乃求學死滅之法，可不誤哉。且死者豈復須學矣。故仙道貴全身，鬼

道貴滅形。仙道貴光明，鬼道貴幽冥。仙道貴長存，鬼道貴消亡。仙道貴清虛，鬼道貴濁辱。仙道貴保安，鬼道貴浮危。仙道貴有身，鬼道貴無形。有道者長生無爲，鍊神入妙，歸於大道，形神合契，常存不亡是也。無身者死滅灰塵，形朽神逝，沉淪九夜，冥冥幽暗是也。汝等道士，宜志之焉。吾故預記，令有心者識矣。

道言：吾過去後，有諸道士，身披法服，形似出家，而心實凶惡，飲食酒肉，殺生偷盜，邪淫顛倒，種種過惡，悉能行之。專學小道，貪求名利，攻根伐本，背正入邪，不信神仙長生真法，而求邪學死滅道者，千千萬萬，吾當遣五天魔王，次第誅之。

道言：有諸道士，及以女男，持經奉戒，禮拜燒香，布施救貧，造諸靈觀，抄經鑄像，講說開導，引接有心，吞津咽液，存三守一，灰心滅想，志求真仙不死之法，專誠無退者，吾遣諸天靈官、九地主司，教其大法，更受真經，神丹靈藥，仙芝玉英，延年變化，鍊質易

神，常存之道，隨其學業，召入仙宮，五嶽洞天，漸致通靈，轉神入妙，飛騰諸天。此之學者，世亦難量，仙道隱密，人不知矣。是諸王等，及以眷屬，仙真聖衆，一時稱善，稽首而退。

太上洞玄靈寶出家因緣經

（王卡點校）

# 037 太上洞玄靈寶轉神

## 度命經

經名：太上洞玄靈寶轉神度命經。撰人不詳，約出於隋唐。言超度亡靈罪業。一卷。底本出處：《正統道藏》洞玄部本文類。

太上道君告南極度命真人曰：夫人臨欲終時，及其生氣，安置經像，請諸道士，懺悔受戒，施散財物。衣服卧具，玩弄器用，車輿駝馬，田宅苑囿，侍從僮僕，茵褥帳幔，几杖盤盂，履履環珮，冠幘帶綬，劍烏璋玦，珠玉金銀，紋繒綺縠，綉畫彩纈，氈席牀榻，隨有捨施。造像寫經，入諸功德，幡花幢蓋，香爐鍾磬，及以道士，山居貧病，行道禮拜，講讀設齋，燒香誦念，散花然燈，放生贖命，立觀度人，開赦囚徒，免諸僕賤，放令入道，供養天尊，利益存亡，

難思功德。若消灾却禍，拯濟病人，福力最深，實為第一。

太上道君曰：今日男女，受命應終，普告十方，證明懺悔。上從無始，逮至此身，三業六根，造罪無數。會中時有衆等，須為虔誠，使一切宿愆，並得消滅。既消滅已，便為說戒。

第一戒者，不得殺害。當來託生，受長壽之身。持心勿犯。

第二戒者，不得邪淫。當來託生，受清淨之身。持心勿犯。

第三戒者，不得偷盜。當來託生，受富貴之身。持心勿犯。

第四戒者，不得欺誑。當來託生，受敬信之身。持心勿犯。

第五戒者，不得飲酒。當來託生，受智慧之身。持心勿犯。

太上道君曰：今日男女，受戒畢已，持是戒根，轉神入妙，生清淨國，坐大蓮花，觀聽法音，永無退墮，證成真道。

太上道君曰：為諸男女，若存若亡，禮拜十方，歸心懺悔。衆等志心歸

命東方救苦無上慈尊、東方無極世界得道天尊、仙真聖品無鞅數衆。一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、邪淫放蕩、貪愛恠惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、輕師叛道、訾毀經文、穢汙玄壇、損壞尊像、逆天違地、祝鬼詛神、裸露星辰、吹噓風雨、五逆不孝、萬罪千愆、無量無邊，悉為除滅。隨願往生東方淨土，聞經聽法，面對天尊，衣食自然，逍遙快樂，展轉託生，成無上道。稽首歸依東方聖衆。

衆等志心歸命南方救苦無上慈尊、南方無極世界得道天尊、仙真聖品無鞅數衆。一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、邪淫放蕩、慳愛恠惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、輕師叛道、訾毀經文、穢汙玄壇、損壞尊像、逆天違地、祝鬼

詛神、裸露星辰、吹噓風雨、五逆不孝，萬罪千愆，無量無邊，悉爲除滅。隨願往生南方淨土，聞經聽法，面對天尊，衣食自然，逍遙快樂，展轉託生，成無上道。稽首歸依南方聖衆。

衆等志心歸命西方救苦無上慈尊、西方無極世界得道天尊、仙真聖品無鞅數衆。一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、邪淫放蕩、慳貪恠惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、輕師慢道、訾毀經文、穢汙玄壇、損壞尊像、逆天違地、祝鬼詛神、裸露星辰、吹噓風雨、五逆不孝，萬罪千愆，無量無邊，悉爲除滅。隨願往生西方淨土，聞經聽法，面對天尊，衣食自然，逍遙快樂，展轉託生，成無上道。稽首歸依西方聖衆。

衆等志心歸命北方救苦無上慈尊、北方無極世界得道天尊、仙真聖品無鞅數衆。一切敬禮，遍悉歸依，證明懺悔。即令亡者無始以來，受身生身，

從劫至劫，三業六根，構造諸罪，殺生偷盜、放蕩邪淫、慳貪恠惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、叛道輕師、訾毀經文、損壞尊像、穢汙玄壇、逆天違地、祝鬼詛神、裸露三光、欺凌四輩、吹噓風雨、不孝五逆，萬罪千愆，無量無邊，悉爲除滅。隨願往生北方淨土，聞經聽法，面對天尊，衣食自然，逍遙快樂，展轉託生，成無上道。稽首歸依北方聖衆。

衆等志心歸命東北方救苦無上慈尊、東北方無極世界得道天尊、仙真聖品無鞅數衆。一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、放蕩邪淫、慳貪恠惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、叛道輕師、訾毀經文、損壞尊像、穢汙玄壇、逆天違地、祝鬼詛神、裸露三光、欺凌四輩、吹噓風雨、不孝五逆，萬罪千愆，無量無邊，悉爲除滅。隨願往生東北方淨土，聞經聽法，面對天尊，衣食自然，逍遙快樂，

展轉託生，成無上道。稽首歸依東北方聖衆。

衆等志心歸命東南方救苦無上慈尊、東南方無極世界得道天尊、仙真聖品無鞅數衆。一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、放蕩邪淫、慳貪恠惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、叛道輕師、訾毀經文、損壞尊像、穢汙玄壇、踐踏靈觀、逆天違地、祝鬼詛神、裸露三光、欺凌四輩、吹噓風雨、不孝五逆，萬罪千愆，無量無邊，悉爲除滅。隨願往生東南方淨土，聞經聽法，面對天尊，衣食自然，逍遙快樂，展轉託生，成無上道。稽首歸依東南方聖衆。

衆等志心歸命西南方救苦無上慈尊、西南方無極世界得道天尊、仙真聖品無鞅數衆。一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、放蕩邪淫、慳貪恠惜、嗔怒罵

晉、愚癡顛倒、綺言妄語、惡口兩舌、飲酒食肉、破齋犯戒、叛道輕師、訾毀經文、損壞尊像、踐踏靈觀、穢汙玄壇、祝鬼詛神、逆天違地、欺凌四輩、裸露三光、五逆不孝、吹噓風雨、萬罪千愆、無邊無量，悉爲除滅。隨願往生西南方淨土，聞經聽法，面對天尊，衣食自然，逍遙快樂，展轉託生，成無上道。稽首歸依西南方聖衆。

衆等志心歸命西北方救苦無上慈尊、西北方無極世界得道天尊、仙真聖品無鞅數衆，一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、放蕩邪淫、慳貪吝惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、叛道輕師、訾毀經文、損壞尊像、踐踏靈觀、穢汙玄壇、祝鬼詛神、逆天違地、欺凌四輩、裸露三光、五逆不孝、吹噓風雨，萬罪千愆，無邊無量，悉爲除滅。隨願往生西北方淨土，聞經聽法，面對天尊，衣食自然，逍遙快樂，展轉託生，成無上道。稽首

歸依西北方聖衆。

衆等志心歸命上方救苦無上慈尊、上方無極世界得道天尊、仙真聖品無鞅數衆，一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、放蕩邪淫、慳貪吝惜、嗔怒罵詈、愚癡顛倒、綺言妄語、惡口兩舌、飲酒食肉、破齋犯戒、叛道輕師、訾毀經文、損壞尊像、踐踏靈觀、穢汙玄壇、祝鬼詛神、逆天違地、欺凌四輩、裸露三光、五逆不孝、吹噓風雨，萬罪千愆，無邊無量，悉爲除滅。隨願往生上方淨土，聞經聽法，面對天尊，衣食自然，逍遙快樂，展轉託生，成無上道。稽首歸依上方聖衆。

衆等志心歸命下方救苦無上慈尊、下方無極世界得道天尊、仙真聖品無鞅數衆，一切敬禮，遍悉歸依，證明懺悔。即令亡者無始以來，受身生身，從劫至劫，三業六根，構造諸罪，殺生偷盜、放蕩邪淫、慳貪吝惜、嗔怒罵詈、愚癡顛倒、妄言綺語、惡口兩舌、飲酒

食肉、啖嚼五辛、犯戒破齋、輕師叛道、損壞尊像、訾毀經文、口是心非、說人長短、嫉妬勝己、陷害賢良、讒擊忠貞、鬥亂家國、違盟犯約、泄漏真科、穢汙玄壇、踐踏靈觀、禱祀神鬼、鼓舞妖言、背正入邪、疑真信俗、祝詛神鬼、厭蠱賢明、逆地違天、訶風叱雨、欺凌四輩、裸露三光、不孝不忠、不仁不義、千愆萬罪，無量無邊，眼耳鼻舌身意，六根諸罪，悉爲除滅。隨願往生下方淨土，聞經聽法，面對天尊，衣食自然，逍遙快樂，展轉託生，成無上道。稽首歸依下方聖衆。

太上道君告南極度命真人曰：元始布化，遍滿十方，五億諸天，三千道境，分身散影，真應化法，緣感立形，說法度人，救濟一切，教化男女，成就衆生。一一境中，皆有帝主天尊、太上老君、真師、玉女玉童、仙真聖品、將軍力士、金剛神王、二萬四千靈司、一百一十曹局，星宮雲殿，水府仙宮，咸有司存，考校罪福，持幢建節，把籙執符，飛空步虛，誦經行道，益善輟惡，却禍消

灾，晝夜巡行，檢勘得失，俱遵元始，朝會大羅。雖劫運推移，立法無改。十方三界，同一軌儀，三洞分門，隨機所受，首過請福，自下之高，謝罪求恩，由心入道。若違此旨，便從邪法。所以告啓，先詣十方，神運感通，自獲靈應。普告三界一切男女，宜各用心，依令遵奉。

太上道君曰：人死轉形，各隨先業。或生富貴國王之門，或生端正賢善之家，或生智慧聰明之身，或生具足清淨之身，或生長壽快樂之身，或生貧賤奴婢之身，或生醜陋毒惡之身，或生愚癡濁鈍之身，或生破壞臭穢之身，或生夭折煩惱之身，或生病患苦痛之身，或生邊夷殺害之身，或生六畜猪狗之身，或生鳥獸豺狼之身，或生魚鼈蟲蝮之身，或生鬼神魔邪之身，或處九幽長夜之中，皆由本業所受。過去未來，與今無異，今身所受，從先業來。見世所種，作過去業。世人凡愚，眼觀見世罪福，報應分明，而不信宿命因緣，亦猶食五穀不知播種所得。罪福之驗，如

影響也。勤能懺悔，則罪不生。勤能修善，則福常在。

太上道君曰：人初亡，從一日至百日，安置繪像，請道士行道誦念，晝夜不倦，魂生善處，不墮三塗。若隨初一日，然燈造幡，寫經鑄像，度人各滿百數，亡者即得受生十方淨土，快樂之國，見世福利，無諸灾禍。

太上道君曰：送終之時，請道士路左燒香，念誦布施，放生道路。靈官不拘亡魂，飛尸注鬼，不咎生人。若墓左燒香誦經，則土地真官安穩亡魂，家宅不驚，凶注殺鬼，不干子孫。南極真人，及諸聖衆，同聲稱善，稽首奉行。

太上洞玄靈寶轉神度命經

（郭清點校、王卡復校）



# 038 太上洞玄靈寶十師度人妙經

經名：太上洞玄靈寶十師度人妙經。撰人不詳，約出於隋唐。演說十師科戒。一卷。底本出處：《正統道藏》洞玄部本文類。

道言：昔龍漢之年，崑崙山西六十萬里海洲之上，有國名鳩耶梨國。國王號曰盛首羅，領十九小國，地方二十萬里。其土人民，利根智慧，易可化度。其王夫人，宿植德本，曉了無上大道，慧解一切，欲度於王。故來爲王妻，奉侍齋戒，飭不近身，爲王說法。王意達悟，堪任受持。時有神仙真人，名稱蓋世，廣博法典，靡經不綜。十九小國，謂其廣博，未曾聞斯真要之義，乃以正法助王治國。其王夫人親自供養，如事父母，爲作舍館。壁方百丈，

七寶莊嚴，黃金爲棟，珊瑚爲柱，白玉爲壁，瑠璃爲地，瑪瑙爲牀，水晶爲帳，紫金爲鈴，懸垂四角，月光摩尼，環釘四壁，晝夜常明。上妙奇玩，以爲卧具，甘膳軟滑，以用供養。王與夫人，坦然意解，心大歡喜。得未曾有，倍加恭敬，即遣使者，召十九國中諸大臣等，一時俱至。王自宣言：卿等知不，我有國師，人中無雙。卿等皆應往詣，稽首作禮，咸共請受治國之法。諸大臣等，是時各受王勅，往仙人所，咸共作禮，叉手當心，長跪白言：我等暗蔽，頑愚斯極。有何功德，今生尊貴，爲王所念，得享斯位。

仙人答曰：善哉善哉，諦聽諦聽，當爲卿等解其要義。卿等前生，好喜布施，禮事三寶，慈念一切，獲福報生，尊貴豐財，爲人所念，故得斯位。爾時十九大臣，各自思惟，意解歡喜，白仙人曰：唯願大師，教我等王治正之法，使國無患，風雨時若，五穀豐登，人民安樂，恒蒙親暱，國內得濟。

仙人答曰：治正甚易。何謂爲

易。愛卹孤老，不枉人民，辭無滯訴，獄無停囚，使役以時，不廢民務，撫民如子。治正如是，國安民泰，皆稱讚王之德。妖星隱沒，風雨以時，君禮臣忠，邊境靖嘿，四夷來王也。國安民寧，有何災患。夫爲王者，賞罰之主。所以賞者，賞有功。所以罰者，罰有罪。故有功不賞，有罪不罰，何以爲君。治正苟乖，則君暴虐於上，臣亂於下，四海糜沸。所以彗星夜現，風雨不時，人民窮困，蝗蟲暴食，陰陽錯亂。皆由國王諸大臣等，橫枉無辜，使役失度，自恃豪貴，傲忽自驕，不憂國政，萬民患之，皆思去亂。天神地祇，不復衛護，衆惡來前。如此自害之道，喻之天下，有四者名爲自害。何者爲四。一者樹繁花果，自折其枝。二者如鐵依格，自毀其形。三者蛇含毒，還自害身。四者如王無道，自害其國。如影隨形，如響隨聲，天之自然。是時諸大臣等，心開意解，前起作禮，辭退而去。爾時十九大臣，各還其國，具向王說正法之治。王大歡喜，各還遣臣，齎持珍

寶，供養大齋，七日七夜，講說大乘經典。

是時天尊於大羅天上，端拱于座，遠以道眼，見此十九國王，皆發道心，即化作仙人，與彼無異。入其館殿，便相勞問，講說無上正真道要，無有疲厭。爾時仙人以威神力，令彼仙人不別識是天尊。是時王與夫人，及十九大臣，見二仙人儼然在座，心各念言：此二大士，何者是師，誰為弟子。爾時天尊知其心念，即化作瑠璃珠一枚，置正掌中，遍見諸臣，普告之曰：卿觀此珠，內外明徹，無有障礙。天尊告曰：我觀汝等，猶如此珠，亦無障礙。

天尊欲現示神化而已，方便告之曰：現汝道力。於是天尊湧身於虛空中，上無所投，下無所依，忽然下地，履地如水，履水如地，還其本座。王及夫人，并諸大臣，見此神力，而相與言：此之大師，神力第一，我昔以來，未曾見此希有之事。爾時天尊知其心念，即自變三十二相、八十種好，頂放光明，遍照十方，暗蔽日月，都不復現。

土石諸山、一切草木，皆作金色，譬如劫水，滉洋浩汗，是諸萬物，沉溺不現，唯見大水，天尊光明，亦復如是。其處幽冥，日月盛光，所不能照，皆悉大明，其中衆生，兩得相見，自謂而言：此中云何，忽生汝等。

是時天尊復現大身，廣大無數，遍滿虛空，間隙無容。忽復身小，細如微塵。如是事已，於虛空中，口吐五色妙光，變成寶蓋，獅子蓮花之座。白銀為眉，瑠璃為根，瑠璃為本，紫金為柱，水晶為條，瑠璃為葉，蠲勝嘉寶，以為其臺，明月寶珠，以為花色，文瓊妙珍，以為法飾。天尊現身而坐其上，有十九大王，及十方國土一切人民，皆見天尊在虛空中，於七寶蓮花座上。各以衣帔，盛衆名花，尋光而來，散天尊上，圍遶三匝，禮敬而坐。爾時天尊復於虛空中，化作百千寶帳，下有百千獅子之座，一一座上，有百千天尊，一天尊，各有百千仙童玉女，而侍衛之。復有千萬諸無量之衆，從地湧出，各以諸天妙花，散天尊上。所散之花，各從十方

來至，繽紛而下，如天降雪。諸天妓樂，於虛空中一時俱作。復有諸天魔王，從諸兵士，中有一人，人身獸頭，或作龍蛇，種種異形，尋光而來，詣天尊所，皆前作禮，却坐一面。復有諸大鬼王、夜叉羅刹、諸農人鬼、無量之衆，皆同共集。復有異類妙音之鳥，其聲八種，圍遶天尊，吐其雅音。復有四大龍王。東海龍王，青衣青冠、青幢青蓋，將從青者無鞅之衆；南海龍王，赤衣赤冠，赤幢赤蓋，將從赤者無鞅之衆；西海龍王，白衣白冠、白幢白蓋，將從白者無鞅之衆；北海龍王，黑衣黑冠、黑幢黑蓋，將從黑者無鞅之衆。皆尋光而來，俱到天尊所，圍遶三匝，禮敬而坐。

爾時天尊見是無量之衆，皆悉以集，既化身而現無量百千天尊，從頂而來俱入，忽不復見，而以一音聲，為是大衆、諸天人民，及鬼神等，說大乘經典。於是大衆天龍八部，各隨其類，各解天尊一音之語，自相謂言：天尊今日為說正法深義，開喻多矣。爾時仙

人見是神化，不可思議。復有天尊無量百千，皆在七寶獅子座上，今從頂入，都不復見。而白天尊言：向見百千諸無量天尊，并諸侍者，今皆隱沒，得無疑乎。衆魔欲來惱我。

爾時天尊告仙人及諸大衆曰：譬如靜夜置百盆水，其中各有一月，百盆百月，天上有百月不。仙人白言：無也。天尊曰：今我此身，亦復如是，如天上月應百盆水，有何怪哉。此日說是語時，三百六十人皆得下仙，三萬人皆得上仙，十九大王悉得神仙。爾時大王心各念言：如是大衆，相謂我等，皆須香湯澡浴。爾時天尊知其心念，即作淨池，黃金爲底，白銀爲沙。其池水中清淨薰香，不冷不熱，調和冷暖，悅可衆心。爾時浴竟，欲令水沒足，水即沒足，欲令水至膝，水即至膝，欲令水至腰，水即至腰，欲令水灌身，水即灌身。爾時入池者，皆發無上正真大道之心，衆病除愈。其池底遍生衆妙之花，若寶之花、千葉蓮花、諸天雜花，紛馥香熏八種，世俗人民聞香即

得天仙，又得无上道。无上道者，不生不死，不滅不壞，不變不易，不來不去，非實非空，不離於空，凝湛淡泊，是名无上大道。說是語時，十方天人得无上道，三十七仙人皆得六通道果。爾時大王心口自言：中食時至，如是無量大衆，食不可遍。爾時天尊知其心念，即告王曰：但非一盆飯。爾時天尊以威神力演一盆飯，令是無量大衆，皆得飽足，食餘飯如崑崙山。爾時天尊復以神力取崑崙山，敬置掌中，騰上大羅天。爾時大衆莫不皆見，以崑崙山擎右掌中，弗起于座，遍示十方，猶如壯士屈伸臂肘，還置本處，不令虧損。是諸大衆聞法要者，其懈怠者，其樂聞者，即演七日以爲一劫，令諸聽者謂之爲食時。爾時十九大王，見是威神功德，成就第一，大施法事，度諸無量衆生，是事何師，學誰大乘，願示我等本師之處。

天尊告曰：善哉善哉。諦聽諦聽。我有十師，近在不遠。十九王起，前進作禮長跪，白天尊言：願示我等

本師之處。

天尊告曰：我見世人貪味殺生，漁獵爲事，飛鷹走狗，彈射飛鳥，斷絕衆生之命，死入地獄，億劫乃得出，牛作蜉蝣蟲，朝生暮死。坐其前世斷他命故。我見是故，斷不殺生，今得長壽不壞之身，是吾一師。我見世人私竊偷盜，負債不償，違忤逃避，死入地獄，億劫乃得出，生爲驢畜中，身負諸重，加苦鞭打，後死人剥其皮，甚痛甚痛。我見是故，斷不偷盜，自然財寶，是吾二師。我見世人常懷嗔恚，沉毒相怒，結忿胸心，不離愁毒，死入地獄，而墮惡道，億劫乃得出，生蝮蛇之中。我見是故，斷不嗔恚，得堅固力，是吾三師。我見世人貪慾奸淫，犯盜他妻，死入地獄，男抱銅柱，女卧鐵牀，舉體焦爛，痛不可當，億劫乃得出，生黃門石女之中，經五百世。我見是故，斷不奸淫，常淨身心，是吾四師。我見世人兩舌鬥亂，說人長短，妄言綺語，誹謗彼此，令人君臣父母，朋友知識，恩義疏絕，展轉無信，死入地獄，拔出其舌，洋銅

灌口，億劫乃得出，生牛畜之中，但念水草，餘無所知，若得爲人，生輒聾啞，口氣腥臭，人見不喜，有所言說，人不聽受。我見是故，斷不兩舌。是故我今語聲八種，言成法律，一切天人，莫不樂聞，是吾五師。我見世人嫉妬勝己，爭競功名，嘖嘖彼此，無先讓心，死入地獄，億劫乃得出，生邊夷之國，聾盲啞啞，有人之形，無人之情。我見是故，斷不嫉妬。是故我今智慧如海，種種方便，諸妄無著，說法無盡，於大眾中最尊無上，猶如在於暗室，舉入炬火，除一切暗，是吾六師。我見世人貪酒嗜味，昏亂罵詈，去失正法，清淨道性，成就惡業，死入沸屎地獄，晝夜常見諸臭，億劫乃得出生，若得爲人，狂聾心亂，永不得聞正法妙音。我見是故，斷不飲酒。是故我今心如日月，照臨一切，幽暗皆令明了，是吾七師。我見世人積聚錢財，不肯施惠，兄弟妻子，都不給與，坐守而死，後生餓鬼中，飲水成膿，食飯成炭。我見是故，斷不慳貪。是故我今飲食天厨，百味自然，

是吾八師。我見世人自恃豪貴，輕慢孤老，試弄誹笑，後生卑賤，爲人矧小，衆人輕試，還受其罪，死受惡報。是故我今見諸貧窮，矧陋癱瘓，諸根不具，爲之悲傷。是故我今得清淨妙身，光明第一，一切諸天人中，一切法中，更無及者，是吾九師。我見世人不敬父母，不宗伯叔，不愛子孫，父母教誨，言令不從，爲子不孝，爲父不慈，爲兄不恭，爲弟不順，爲夫不信，爲妻不貞，死入地獄，輪轉五道，無有出期，後生蟻螻之中，自然化生，無有父母妻子眷屬，如是經一劫，乃得爲人，生在邊夷，無禮義處。我見是故，勤心行道，七祖父母，皆得生天，是吾十師。吾行諸善，得六神通，見無量慧，得自在神通力，直至道場。

說是語時，十方天人皆得真道，有諸魔王鬼等，皆見道跡，不可思議。時說正法，是諸神仙，亦得高真。爾時仙人從座而起，頭足作禮長跪，白言天尊：今日大經，云何奉持。天尊說言：是爲名《靈寶天尊神通變化十師

度人妙經》，當奉持之。若復有人擔負乾草入於大火，火不能燒，亦未爲難。若復有人以崑崙山遠擲他方，亦未爲難。若能讀此經，爲人解說，則爲是難。欲求神仙，亦當讀此經。欲求名聲高貴，亦當讀此經。欲求富貴長壽者，亦當讀此經。欲求與明師世世相值，亦當讀此經。此經尊貴，猛於我神，有能奉持書寫，讀誦是經之者，別見於我。我亦未現於汝，當令是人坐於道場，則與十方天尊，以手摩其頭頂，威神覆護，令無衰患。說是經訖，諸天龍神，及諸大眾，咸聞正典歡喜，即共皆起，前進作禮，辭退而去。

太上洞玄靈寶十師度人妙經

（郭清點校、王卡復校）

# 039 太上洞玄靈寶國王

## 行道經

經名：太上洞玄靈寶國王行道經。撰人不詳，約出於唐代。勸國王行道施捨。底本出處：《正統道藏》太平部。

元始天尊告太上道君曰：吾念萬兆愚迷，分靈布化，遍滿十方無極世界，天上人間一切國王，說經演教，隨代淺深，導引衆生，令歸善路，永去煩惱，登解脫地，入正法門。是故變身，應其緣感，因機散景，順俗和光，撫接人天，善勸方便，勞謙忍苦，安樂衆生。或見大身滿虛空界，或見小身入細微塵，或爲國主，或作天王，或應世師，或居宰輔，賢人道士，博學儒宗，牧伯大臣，儲宮妃后，忠良貞正，翊贊君王，設法教人，勸化愚鄙，普令離苦，咸入信

根，轉向至真，成無上道，永登常樂，安住湛然，同彼虛空，無生無滅，十方衆聖，從此歸根。

太上道君稽首問曰：衆生劣弱，識見未深。雖觀經文，不能信解，如何開悟，得斷衆疑。

天尊答曰：衆生愚癡，根性闇弱，猶如孩子，智慧未明，當漸導引，方便使悟，豈得頓爾即入正真。諭如慈母，養所愛子，漸漸教訓，智慧增明，轉處人間，無事不解，學業超勝，成大丈夫。勸誘凡愚，亦復如是，轉展增進，令人昇玄。

太上問曰：欲以經教付與國主人王，其意云何。

天尊答曰：吾所以周遍十方，教化說法，勸導天人，分諸境域，國界方所，立君置主，順俗隨時，軌儀制度，善巧方便，祇欲安樂衆生，開悟一切。而國主人王者，或請聖真仙應身下代，教化人間。諸天帝王，託生凡境，作人父母，或星精降世，或氣象垂靈，或宿福報來，或先因授得，人中天上，統御群

司，攝化衆生，是其教首，一切經法，咸付國王，敬度人，皆由之耳。云何今日，而有此疑。

太上道君啓曰：昔從天尊遊歷十方，教化國王，說法度人。經戒軌儀，雖傳於世，使國王行道，而未見囑付人君，所以今日敢此諮問。伏蒙大慈，廣爲弘演，經教興廢，莫不由之。願從今後，一切聖教，悉付與之。

天尊告曰：吾今普告十方天上天下無極世界，諸天帝王及諸國王、儲宮妃后、宰輔大臣，統御人首，行王教者，當各從吾此言。吾過去後，應以經教付囑於汝。汝諸國王，弘道救物，開度天人。

天尊告曰：國主人王，先當立觀度人，住持供養，引諸男女，令歸正道，永捨苦因。勅宰輔大臣，儲宮妃后所任之處，建諸法座，百千萬數，廣召道士，明解經教，常敷妙義，講說大乘，三洞幽微，七部玄旨。使遠近開悟，一切聞知。願國土安寧，人民快樂，存亡獲果，地獄休閒，男女賢明，普令離苦，克

成真道，長慶自然。

天尊曰：次當造諸形像，真應化身，過去未來見在三世、十方三界得道天尊、仙真聖品、仙童玉女、金剛神王、左右香官、龍虎君等，隨其所有，金銀珠玉，繡畫織成，刻木範泥，鑿龕琢石，雕牙鏤骨，印紙圖畫。一念發心，大小隨力。莊嚴朴素，各盡當時，如事我身，至誠供養。隨心獲福，果報不差。普使人天歸依禮拜，幽明享祚，功德難思。

天尊曰：次當抄寫諸經三十六部，金書玉字，建碣立碑，紙素精微，隸篆巧拙，各隨心力。遠近流通，標軸莊嚴，函笥藏舉，比字校定，卷目齊同，分布人天，傳授男女，常令轉讀，願國安寧。使諸道士講習妙義，敷揚大化，普遣聞知，一切衆生悉令悟道，識身浮幻，聚散須臾，不浮臭穢，妄想煩惱，晝夜相煎，念念无常，生老病死，世間名利，本悉是空。內觀我身，元无有處，當依正道，制伏迷心，永斷愚癡，長登解脫，遠超生死，常住湛然。

天尊曰：常當造諸堂殿，樓閣臺榭，齋厨別院，諸雜屋宇，師房講室，福地所須，修創營建，補緝舊居，護持破壞，永令常住，不使丘墟。廣度人民，勤心保護，勸諸男女，禮拜歸依。願國安寧，道教隆盛，功德无量，不可思議。

天尊曰：常當造諸鍾磬，幡花帳座，供養法具，牀席茵褥，香鑪澡罐，帕複函篋，如意几拂，幢蓋節輿，香山寶樹，一切器具，金銀珠玉，供養及諸經法出家道士。願國安寧，勸諸男女，普發善心，平等歸依，永无二想，供養功德，不可思議。

天尊曰：常當造諸法衣法服，冠履劍杖，乘床坐褥，卧具帳帷，食器匙筯，巾刀櫛笥，出家法具，供養道士。願國安寧，常為衆生紹隆正法，施諸良藥，救療人民，普上法橋，脫生死海，共諸男女，同登玉清。

天尊曰：常當布施金銀珠玉，綾羅錦繡，衣服器具，車輿駝馬，田園屋宅，僮僕玩弄，香花燈燭，飲食滋味，米麥之屬，入諸常住，供養天尊，及以經

法，山棲道士，出家法身，齋戒中食，貧窮老病、囚徒行役、鳥獸蟲魚，普施一切。願國安寧，百穀豐登，人民歡樂，天下開泰，國土太平，功德巍巍，不可稱量。

天尊曰：常當慈悲，放生贖命，開宥囚徒，免人死罪，救拔危苦，醫療女男，廣設福田，惠諸齋會，放其僕賤，更使出家。行大慈悲，安樂一切，及諸鳥獸草木蟲魚。願國安寧，普皆快樂，功德至重，不可思議。

天尊曰：常當施諸香油於玄壇靈觀，及聖真化迹有經像處，供養虛空十方得道无量天尊，過去未來三世仙真聖衆，普皆注念。願國安寧，當願香花遍照三界，十方道境，五億諸天，若聖若凡，咸蒙明淨，普聞芳徹，俱覩光明，男女有心，同誠歸向，永離黑暗，長享自然。

天尊曰：常當修造尊像經法，玄壇聖迹，使相好光明，文字齊整，殿堂妙麗，基址寬平。若洗拭真容，裝潢卷軸，常令清淨。願國安寧，百姓歡娛，

兆民慶悅，男女端嚴，相貌如華，過去受生，六根具足，聰明智慧，壽命無窮，天下太平，一切安樂，十方三界，稱讚善功，享福長生，共成真道。

天尊曰：常當於諸靈觀，然長明燈，使晝夜不絕，佐天光明。願國安寧，兵戈不起，水火消除，妖怪潛亡，疾病平復，諸災永殄，衆禍不興，壽命延長，國土安樂，諸天稱慶，聖衆監臨，生死蒙恩，人天享祚。

天尊曰：常當供養道士，給其所需，香油飲食，法衣法具。願國安寧，仁義自興，禮教自行，男女昌樂，欣國太平，嘉祥日見，善瑞同臻，甘露醴泉，充滿郊甸，兆人歡慶，百穀豐登。

天尊曰：常當召諸道士，建三洞衆齋，行道禮懺，燒香然燈，悔謝存亡，无量罪業。願國安寧，生死同慶，男女歡欣。四天王十部威神，燒香散花，浮空而來。條牒罪福，列功上清，普天快樂，國富人豐。

天尊曰：常當以月朔中晦、十直八節、甲子庚申、三元五臘、本命三會

吉辰，建齋行道，供養三寶，施散貧寒，開放囚徒，免人死罪，放贖生命，出賤從良，廣行慈救，大設福田，造諸功德。願國安寧，天人稱慶，仙聖降臨，風雨順調，疾病不生，男女昌熾，國土興隆。

天尊曰：常當朝晡，禮拜十方三界得道諸天尊等，无量衆聖，懺謝存亡宿罪，一切重愆，乞除死錄，注名長生，燒香散花，勤心不息。願國安寧，年命延續，祚曆無窮，子孫賢孝，智慧聰明，祭祀不絕，天下太平。

天尊曰：常當召諸道士，轉讀三洞一切衆經，及抄寫校定。願國安寧，刀兵止息，水旱消除，百穀熟成，兆民歡樂，男女欣慶，疾病康和，靈芝神草，生於宮庭，四時合度，星宿光明，妖災殄滅，禎瑞繁興。

天尊曰：常當詣道士，請受三洞經誡符籙，佩帶在身，檢持心口，調正身神，依科修奉，旦夕勤行，普爲一切。願國安寧，三界敬護，五帝扶迎，魔王束手，萬邪虔恭，諸天福祐，注名仙宮，飛行上清，長享自然。

天尊曰：常當勸諸男女，就道士法師受戒懺悔，止罪防非，消除罪累。願國安寧，善神保佑，衆惡消亡，疾病平復，男女貞良，君信臣忠，上下和平，三光合度，四氣循常，草木滋茂，國富人豐。

天尊曰：常當以正月、四月、七月、十月一日，於宮中庭闕，都治城郭，通衢迴路，鄽市坊巷，門亭衆所，玄壇靈觀，建大寶輪，然萬卮神燈，法諸天象。凡十五日，召道士法衆，行道禮拜，燒香散花，立百座千座，講說三洞衆經。願國安寧，使兵戈不起，疾病不生，災怪潛伏，厄難消除，星辰合度，日月光明，水旱蟲霜，衆災不興，男女昌樂，存亡受恩。

天尊曰：常當以天之八正日，燒香行道，建大齋供，誦讀真經，敷演妙義，講說大乘，然燈散花，懺謝重愆，注名八天黃籙白簡，削死上生，供養道士。願國安寧，君臣一意，上下忠良，百穀滋茂，兆民興隆，男女欣樂，天下太平。

天尊曰：常當以正月十五日、七月十五日、十月十五日，三元考校罪福之辰，當先七日，召諸道士，敷百法座，講說衆經，行道禮拜，散花燒香，然萬卮燈，作玄都大獻，採諸花果，名衣上服，七寶珍奇，綾羅錦綺，玩弄調度器具，飲食香藥雜物，隨世所有。米麥車輿，幡花幢蓋，卧具几杖，瓶盂茵褥種種。發心建玄都寶盤，大小多少，惟在厥誠，羅列供養，上獻天尊、十方諸聖、虚无道鏡一切真仙；中獻天上天下應化威靈，下及三塗五苦受苦幽魂，一切男女諸衆生等，遍皆享祚，俱捨惡因。願國安寧，普天慶樂，生死蒙恩。

天尊曰：常當以八正、甲子、本命，三元八會之日，投告山水跪獻，龍璧環鈕，簡名列詞，削罪三官，錄字上清，啓告諸天。願國安寧，祚曆延長，壽筭無窮，天下昌樂，欣國太平，人民歡泰，疫癘消除。

天尊曰：若天地否革，日月乖違，五星失度，七曜差移，兆民疾疫，水旱不調，兵戈四起，鬼哭山鳴，妖怪潛興，

萬禍千凶，當立百座千座，講說三洞一切衆經。行道禮謝，散花燒香，然萬卮燈，上法天象，念誦讚歎，設齋布施，廣行慈救，大建福田，放生贖命，開宥囚徒，免諸死罪，拯濟危苦，施惠貧窮，度人造觀，鑄像抄經，於國八方，及有灾分野，五嶽名山，造八方天尊、仙真聖衆，安置供養，保鎮國土，降福消灾。使國土安寧，星宿合度，日月貞明，百姓安樂，疫癘消亡，一切凶寇，應時殄滅，穀稼豐登，男女欣泰，普天和平。

天尊曰：吾常當以大慈平等，憐念衆生，開度一切，令離諸苦，使得安樂，入衆妙門，成无上道。但衆生愚迷，不從我教，背正向邪，動犯諸惡，妄想顛倒，煩惱纏身，自落地獄，謂吾不慈。是故從劫到劫，遍歷十方，天上人間，隨代變見，真應化法，撫接因時，善巧機宜，和光救物，濟度一切，廣設因緣，演法說經，普行開度。及諸弟子數若塵沙，充滿人天，行吾經教，救拔危苦，彌歷世間，萬法千方，本期入道。是諸男女，當各至誠，從法觀心，從心

取法，明心了法，悟道成真，自竈入妙，由近至遠，轉轉增進，智慧圓明，昇入无形，會乎空寂，湛然不動，方證至真。未階此地，須建大功，從有相中，次第修習，勇猛精進，勤苦至誠，念念發心，吾悉知覺，凡諸舉意，造衆福田。天上世間，仙真聖衆，善惡童子，金剛神王，三界四司，五帝官屬，隨其起念，記錄抄條，罪福因緣，毫分不失，計功補過，罰罪賞功，積惡滅身，累善隆德，猶彼影響，以應形聲，又如鑑照隨形，好醜終不差也。汝諸男女，宜各慎之。

天尊曰：凡人修善行惡，皆諸天鑒照，衆聖聞知，而國主人王，又復審之，舉動施爲，悉天應之。吉則應善，凶則應灾。觀其兆象，以誠其身，清淨無爲，天地和平，擾蕩陰陽，煩濁人鬼，水旱灾癘，草木榮枯，唯國王感之。故爲人主，當順天化人，教以道德，愛民養物，寡欲少私，清淨無爲，則身長久，國祚安也。

太上道君及諸會衆，燒香散花，圍遶天尊，一時禮拜，同聲稱善，天地振



動，山海波蕩，草木飄揚，一日一夜。天人恐怖，不知所由。於是天尊放五色光，遍照十方，如正中日，天上天下、地上地下、照耀明徹，洞觀無礙。一切男女，有緣無緣，咸覩天尊，猶日中像，清淨希有，微妙第一，不可思議。當爾國中諸男女等，身相明了，衆惱消除，智慧增進，咸得長生。時諸聖衆，稽首而退。

太上洞玄靈寶國王行道經

（郭清點校、王卡復校）

# 040 太上洞玄靈寶太玄 普慈勸世經

經名：太上洞玄靈寶太玄普慈勸世經。撰人不詳，約出於隋唐。勸人修道結緣。一卷。底本出處：《正統道藏》洞玄部本文類。

爾時尋聲救苦無上天尊，為衆生故，權應現身於雜報世界，染欲愛天，與諸真仙同與眷屬，詣真多舍，坐以金牀，而我等比得蒙親近，曾不用心，恭敬圍繞。此時衆內有一真人，名普慈，就地長跪，稽首禮足，上白天尊：凡修功德，何者為最？免離諸苦，何者為先？

是時天尊答普慈言：善男子等，汝可諦聽。譬如有人，莊嚴寶相，不離衆色，亦如世人，莊嚴一身，不離衣服，

冠巾靴帶，光飾目前，人所愛悅。汝今所問，亦復如是，不離五戒十善之業，莊嚴善因，為後世緣。汝應思惟，世間衆生，唯知莊嚴世間之法，不知莊嚴未來之法。何以故？戀著世間，不能捨故。我觀衆生，戀著世法，如濁溷蛆，多諸糞穢，將為快樂，不願出生人中受樂。衆生亦爾，耽著五欲，自以為樂，不願生天受天堂樂。善男子，諸天處，視於人間，即如世人觀穢溷蛆，共處不淨。何以故？膿囊涕唾，大小便利，是身不淨。是身不淨者，是義云何？如世間人，飲食酒肉，從身外入，便將為淨，及至身內，大小便利，如此等事，以為不淨。世人唯知酒肉為淨，諸天觀之，非為淨也。是故衆生耽著酒肉，及五欲樂，明知不淨，所以我言如穢溷蛆。善男子，我觀世人，罪多福少，貧多富少，如是種義，皆由不能莊嚴福業。汝今慇懃，為勸世緣。爾時普慈心生歡喜，饑不望餐，願聞斯義，流布世間。

天尊告普慈真人言：汝今當知，

若復有人，安心不動，遊入定門，坐精思室，不貪香味，及以色聲，如是因緣，得不動果，生不動國。將來男女，欲求不動之果報者，應須入定，端坐觀心，於諸法門，甚為第一。善男子，若人懈怠，聞有道場，說法施戒，乘閑高枕，不肯受持，夏取風涼，冬求溫暖，歌詠吟嘯，悅樂一生，恣口肥鮮，縱心邪蕩，填塞善路，開通惡門，如是等人，無一善果。善男子，若人於世，無他事故，亦無私惱，不著色聲，香味觸法，常運其心，觀聽大乘，受戒懺悔，如是等人，勝於前人，百千萬倍，功德果報。善男子，若人受法，撥除他事，權停雜技，於逼迫中，於憂樂中，於富貴中，於貧寒中，並能捨離，觀聽妙經，受戒懺悔，復勝前人，百千萬倍功德果報。善男子，若復有人，耳聾目盲，手脚不遂，諸處無寧，親近道場，傍求妙善，如是等人，得功德力，將來果報，復其身形，無諸疾惱。若人慈心，常將衣食施與此人，未來生中，功德果報，多於今生百千萬倍，況能布施三寶尊經，說法道場，寫

經造像，功德果報，不可稱量。

復次普慈應作是念，若復有人，不曾一時腳踐淨地，如是凡夫，謂之無足；不曾一時執持經卷，如是等人，謂之無手；若人遊入道場，眼見天尊，并諸經典，心不歸依，謂之無目；若人聞說諸經句偈，心不記憶，謂之無耳。何以故？脚手眼耳，不生功德，以無功德，故未來生中，不受果報，雖生中國，或墮邊夷，決定不全脚手眼耳。善男子，世間衆生，罪多福少，云何不經十人地獄。時普慈真人聞斯說已，不覺流涕，稽首天尊，以偈白言：

九幽考對無閑日，晝夜常聞受苦聲。  
皆由前身不念善，死後相牽入鐵城。  
牛頭本自無情者，獄卒何能有慈仁。  
鐵丸炎炎充饑餒，鐵鳥飛來啄眼睛。  
冤家債主無頭數，一一酬還業報明。  
願將此偈，流布世間，唯願天人，聞斯演說，成就福田。

天尊爾時再告普慈曰：衆生愚暗，如人夜行之於前途，恣其足力，踐大毒蛇，傷害身形，痛苦交切，不經旬

日，便致夭傷。人亦如是，心性剛彊，恣情造罪，不滿百年，乃墮地獄，手攀劍樹，足履刀山，確擣磴磨，屑屑如粉，遙觀此輩，傷切我心。我今助汝，以偈曰：

生時不肯親三寶，死後何能免九幽。  
一墮無明長夜獄，千年不悟死生由。  
鐵牀晝夜常如火，劍樹枝條不識秋。  
啼哭衆生并餓鬼，怨憎獄卒與牛頭。  
刀山巖巖傷手足，爐炭炎炎慘酷人。  
萬八千劫無歸日，縱出還生猪狗身。  
爲人不肯行方便，作鬼何緣有善因。  
此是三塗八難處，憂悲苦惱向誰陳。

爾時天尊說此偈已，復告普慈：然諸衆生，居此世界作地獄，本心常逼迫，煩惱自纏，疾病侵身，寒溫痛痒，饑窮凍餓，諸不稱心，終劫說之，亦不能盡。是故當知，凡夫衆生，於諸世間，不得自在。若復有人，衣食豐足，饒諸牛馬，多有資財，奴婢僮僕，如此凡夫，亦不自在。以不自在，故多嗔恚生，多妄想生，多殺害生，多噴噉生，以是因緣，必墮地獄，無有出期。復告普慈：

有凡夫身，有無嗔恚者不？普慈答曰：不也，無身則無，有身則有。

天尊又言普慈真人：如法所說，若無嗔恚，及以殺生，如是等法，則非凡夫，有嗔恚故。凡夫自生，以是因緣，嗔恚凡夫，凡夫嗔恚。何以故？嗔恚若盡，凡夫亦盡，嗔恚未盡，凡夫未盡，如此嗔恚，從凡夫生，如此地獄，從嗔恚起，以是因緣，凡夫地獄，地獄凡夫。何以故？凡夫若盡，地獄即盡，凡夫未盡，地獄未盡，當息嗔恚，即無凡夫，以無凡夫，即無地獄。復次普慈爲勸世緣，應語衆生，世因不定，皆須及時。時來物新，時去物衰，是名不定。是不定人，云何不定？如人初生，名嬰孩時，須臾匍匐，漸次小年少年，長年壯年，中年老年，如是之年，衰老不定。又如病時，煩惱時，憂愁時，苦痛時，死亡時，如是之時，無常不定。若人居世，從生至死，造作諸惡，不可格量，死入三塗，毒痛憂苦，牛頭怒眼，心膽俱摧，叩頭向天，無救無護，又循劍樹，入於鑊湯，寒冰治庭，鐵牀銅柱，備諸苦

楚，無復人形，如是之時，受苦不定。是故我說，皆須及時，栽種福田。云何名爲及時因緣？如人菜食，應須及少，比至老年，時過食難。長齋讀經，燒香禮拜，常近道場，聽法懺悔，施食及財，如是等例，皆須及時。時過無堪，如寒月桑。善男子應作是念，如世間人，不能蔬食，焉能長齋，不能長齋，焉能斷穀，不能斷穀，焉能學仙，不能學仙，焉能學道，不能學道，焉能得道，不能得道，焉能離苦。以是因緣，持齋斷穀，求仙學道，如此等人，應須供養。何以故？是學道人，名爲及時，是供養人，亦名及時。如人種穀，春種秋望，名爲及時，不種無望，名爲失時。凡一切惡，以智慧斷，但一切善，以智慧修，爲後世緣，名爲及時，後世無緣，名爲失時。又如今世，富樂長壽，名爲及時，貧窮夭逝，皆爲失時。我觀世人，得時者少，失時者多。

復次普慈曰：若人慈心，捨家資財，及身上衣，施與道士，寫經造像，共立善根，如是等人，所得功德，不可格

量，當來必應，坐蓮花座，衣食豐足，親近我身。何以故？施財寫經，是發一切衆生耳目，是建衆生諸大法橋，當知此人，獲大果報。是故男女，欲求長年，及未來果，應須捨財與清淨道士，修寫藏經，亦名及時，若無此心，名爲失時。善男子，若人慈心能爲二親，及親亡歿，報生長恩，於說法處，解身上衣爲父母施，如是等人，今生在世，爲諸男女，生慈孝心。何以故？作父不孝，子必無情，如荆棘林，多諸惡木，以是義故，當知此人，解身上衣爲父母施，所生男女如梅檀園，多諸香木，必不應如荆棘毒林，如是之人，亦名及時。善男子，若復有人，五逆不孝，給養妻子，不敬二親，嗜酒猖狂，歐打罵詈，如是等人，其罪多於十八地獄受苦衆生所犯之罪，十八地獄如其空竭，此人之罪方可得除，十八地獄如其未盡，此人受罪亦復未盡，如此衆生，名爲失時。善男子，若人慈悲，見他布施，生歡喜心，生勇猛心，生精進心，求諸因果，解身上衣爲父母施，所得功德，多

於前人一倍之善。如是等人，名爲及時。若無慈悲，見他布施，生嫉妬心，生嗤笑心，無歡喜心，如是等人，無一果報，便大得罪，死入三塗，身充餓鬼，報其前身妬他作善，亦名失時。善男子，求地仙者修地仙因，求飛仙者修飛仙因，求自在者修自在因，求無漏者修無漏因，求無爲者修無爲因。昔我曾於寶聚國中，爲海空智藏說此因緣，海空聞已，速得無爲，亦名及時，若不作此心，名爲失時。設有一人，於說法處，多諸睡寐，心自念言，每常抑責，我生何緣，坐道場時，多諸睡寐，我今坐此，無益善功，此人於中，便生退惰。我觀凡境，人及非人，諸五藏中，一一肢節，皆有真神，並能爲人受持妙法，未來生世必致聰明，汝等男女，應作是知，寧於道場睡寐端坐，猶勝歸家閑自遊戲，名爲及時，是退惰者，名爲失時。諸善男子，復作是念，若有世人，能爲亡者齎持財鏹，及諸名珍，於說法處啓白法衆，施與三寶，願爲亡者懺悔罪愆，如是等人，心所爲處，若父若母，亡

歿六親，必得解脫，何以故？懺悔施財，名爲贖罪，財多福重，財少福輕，亦隨前人，貧富而已，能生此意，名爲及時，若無此心，不名及時。若復有人，善解妙法，爲他人說，令衆受持，此人功德，盡虛空際，難可格量。若復有人，聽說妙法，復能稱揚，經中句偈，無忘善說，傳授於人，是名見法，是名行法，此人功德，與說法師等無有異。若復有人，聽說妙法，三四五句，後能共人同來道場，懺悔滅罪，修種福田，如是等人，爲善知識，爲法橋梁，於後命終，不入地獄，吾令救苦應世真人，迎將此人，逕昇淨土。如是等例，名爲及時，不生此心，不名及時。若復有人，齋持珠玉，金銀等寶，綾羅錦繡，錢布香油，於道場中，說法處所，千萬衆前，證明功德，爲己乞懺，悔謝罪愆，如是等人，全得果報，猶勝死後留財物與人。爾時天尊爲說偈曰：

一念觀身並虛假，四大五體本非真。  
三百六十碎骨節，皮肉合成膿血身。  
念念無常恒不住，朝夕煩惱亂心神。

父母妻子權相寄，兄弟姊妹少時因。  
一朝氣斷空歸去，百骸爛壞總成塵。  
縱有男女頭邊哭，終難救拔免沉淪。  
各自勤修今日善，慎莫留財付後人。

說此偈已，是諸大衆，覺無常苦，無處容身，爲衆生悲涕交切，重問天尊：夫三界中有得常不？

天尊告曰：不也，普慈汝從何來，不解此義，我昔曾於協晨館委囑斯言，三清衆聖，念念無常，是故世間，無可保者，善男子，五濁躁競，世間無常，汝今慇懃，爲勸世緣，可令衆生，得離苦際。此時衆內玄一真人因聲歎言：善哉天尊，爲說此偈，於當來世，俱沐此恩，我等今者，書寫受持，不敢輕慢。

天尊重告：玄一真人，汝等大衆，往昔劫時，我爲衆生，出現於世，說種種法，於事將休，言歸妙樂，有無量天人來聽後說，無量衆生來修後善，無量羅刹來作後因，無量鬼神來霑後福，無量男女來修後供，無量男女來行後施，吾於爾時受與記別，何以故？最後施者，名最後福田，是故男女，欲求因果，

於道場中，修最後善，爲最後結緣，無復疑惑。時真多舍，一切大衆，人及非人，聞此妙義，一時洗心，證無爲果。

太上洞玄靈寶太玄普慈勸世經

（汪桂平點校）

# 041 靈寶天尊說祿庫受生經

經名：靈寶天尊說祿庫受生經。  
撰人不詳，約出於隋唐。勸人燒還地獄受生錢。一卷。底本出處：《正統道藏》洞玄部本文類。

爾時靈寶天尊在浮羅世界淨明國土，善積山中七寶樹下，與無量飛天神王，及諸仙聖衆演說妙法。乃放九色彩光，徧照十方一切衆生善惡果報，或貴或賤，或富或貧。大衆懷疑此等衆生，有如上果，未敢議問。時有光妙音真人，從座而起，嚴整衣冠，叩頭長跪，上白天尊曰：適見威光，照耀十方。或男或女，富貴貧賤，苦樂不同。此等衆生，有何異因。伏願聖慈憫，以所請賜以訣言。

天尊曰：善哉善哉。汝當復坐，

靜默安神，一心諦聽。

天尊言：十方一切衆生，命屬天曹，身繫地府，當得人身之日，曾於地府所屬冥司，借貸祿庫受生錢財。方以祿簿注財，爲人富貴。其有貧賤者，爲從劫至劫，負欠冥司奪祿，在世窮乏，皆冥官所尅，陽祿填於陰債。是使貴賤貧富，苦樂不同，汝當省知。

天尊言：吾昔賜寶樹一株，付與酆都北帝，植於冥京，明察衆生善惡果報。以聖箭三隻，神弓三張，給與得生人身男女。將此弓箭望寶樹而射，射得東枝，得官爵長命身。射得南枝，得延年康健身。射得西枝，得富貴榮華身。射得北枝，得貧窮困苦身。如上述之寶樹者，乃是業鏡果報之緣。若在生欽敬三寶，方便布施，設齋誦經，行種種善緣，及依吾教誦念此經，燒還祿庫受生錢者，得三生爲男子身。若復死亡，不經地獄，再復人身。酆都若以弓箭施爲寶樹，我以神力扶持，無使中於北枝，再得榮貴之身。若復有人在世慳貪愚癡，不信經法，負債不還，更

相嫉妬，不念善因，惟惡是修，致使罪簿注名，天曹減筭，及負欠冥司受生錢財，在世不還，更相誑妄，死入地獄，萬劫方生畜獸身，輪轉果報。若復得爲人身，再以神弓聖箭，於寶樹自然果報。射中北枝，既得爲人，貧窮下賤，及不信善緣之報。

真人又白天尊言：未審人之生身，從何所屬冥曹庫借過受生錢，在世貢還何庫分。雖蒙開悟，未測此因，幸望慈尊，爲衆分別。

天尊曰：人之生身，便有十二年直官分，各有曹典，主掌祿庫。我今爲汝顯說十二官曹姓屬。子生人，欠錢一萬三千貫，屬第一庫，曹官姓李。丑生人，欠錢二十八萬貫，屬第二庫，曹官姓田。寅生人，欠錢八萬貫，屬第三庫，曹官姓雷。卯生人，欠錢八萬貫，屬第四庫，曹官姓柳。辰生人，欠錢五萬貫，屬第五庫，曹官姓袁。巳生人，欠錢七萬貫，屬第六庫，曹官姓紀。午生人，欠錢二十六萬貫，屬第七庫，曹官姓許。未生人，欠錢十萬貫，屬第八

庫，曹官姓朱。申生人，欠錢四萬貫，屬第九庫，曹官姓車。酉生人，欠錢五萬貫，屬第十庫，曹官姓鄭。戌生人，欠錢二萬五千貫，屬第十一庫，曹官姓成。亥生人，欠錢九千貫，屬第十二庫，曹官姓亢。

天尊又言：前十二宮庫官，各主局生人欠受生錢簿，及得爲人身，曾許所屬元辰錢財，乞註受生祿庫之簿，合同冥司之籍。

真人曰：此之元辰，亦未審於名位錢數，更望慈憫，盡其所說。

天尊含笑而言曰：善哉。汝當盡力，爲於衆生。吾當再爲汝開演十二所屬元辰姓名錢數。子生人，本命元辰劉文真，當得人身，許錢七千貫。丑生人，本命元辰孟候，當得人身，許錢九千貫。寅生人，本命元辰鍾元，當得人身，許錢六千貫。卯生人，本命元辰郝元，當得人身，許錢一萬貫。辰生人，本命元辰李文亮，當得人身，許錢五千四百貫。巳生人，本命元辰曹交，當得人身，許錢一千貫。午生人，本命

元辰張巳，當得人身，許錢九千貫。未生人，本命元辰孫恭，當得人身，許錢四千貫。申生人，本命元辰杜準，當得人身，許錢八千貫。酉生人，本命元辰田交佑，當得人身，許錢五千貫。戌生人，本命元辰崔漸進，當得人身，許錢五千貫。亥生人，本命元辰王爽，當得人身，許錢六千貫。

爾時天尊告諸四衆，若有善信男女，意樂經法，布施貨財，依此經典，建立道場，嚴備香花，燈燭莊嚴，供養三寶大道、諸仙大聖，六時行道，十徧轉經，修齋設醮，準備所欠受生錢數，及許元辰之財，一一明具，合同疏牒，燒還本屬庫分者，即得見世獲福，榮貴果報，來生永無苦難。若有衆生不信前緣，返生惡業者，一墮九泉，若不具陳，故有生死苦樂之報。汝等大衆，各自省知。

是時光妙音真人，及諸仙衆，酆都北帝、閻羅冥官、祿庫曹典、本屬元辰、在會大衆，一切稽首，瞻仰尊顏，頂禮而退。於是光妙音真人傳教世間，濟

度存亡，讚歡敷揚，信受奉行。

靈寶天尊說祿庫受生經

（郭清點校）

# 042 太上洞玄靈寶護諸童子經

經名：太上洞玄靈寶護諸童子經。撰人不詳，約出於唐宋。勸人誦經召十方諸善童子護衛。一卷。底本出處：《正統道藏》洞玄部本文類。

道言：天地父母，日月五星，運炁自然。凡人居世，命屬北斗，七星三台，輔弼華蓋，本命星官，元辰真君，二十八宿，南斗北斗，東斗西斗，衆星官屬，天地水三官，河姑織女，天河星衆，一切神仙。世間男女立身濁世，出入門戶，衝突天狗天河、惡星醜宿，致有刑剋。三煞六害，禍釁相仍，豈知趣向。若能虔心祝誦，降福流恩，使諸男女，或求嗣胤，或保長年，普謝衆靈，皆如是願。身中七傷六害，胎娠元辰，應

是迍災可倚，十方諸善童子，重賜威光，爲除厄難，保壽延生。

道言：道能生成，道能育養。七神童子者，是中天北斗七星之精炁也。凡人蔭在胎中，七月之時，下降人身，開明九竅，記於姓名，便屬管係。一曰天蓬，二曰天內，三曰天衝，四曰天輔，五曰天禽，六曰天心，七曰天柱。

道言：諸善童子，各乘飛雲七明之車，五綵之衣，從十方神仙兵馬七億萬衆。常在人間，分身變化，或長或短，或男或女，執符把籙，檢校罪福善惡因緣，男女年命長短。人能知之，不死長生。若諸世俗夫妻男女，命隔星河，身居樓閣，或男女有隔越之難，橋梁不通，滯在三十六星河之畔，夕被天狗所隔，曉爲地狗所越，眷屬咨嗟，憂惕無路，但當虔懇燒香轉經，謹請七元真炁童子，流恩降福，爲度災厄，放赦男子女人，得過星河，孤神不犯於孩童，河母無侵於幼稚。男女成立，身命延長，南斗添益筭之符，北斗落死籍之字。父母安泰，各保吉昌。

一請東方九炁天中九神童子，爲諸男女度脫春三月所有疾病，三刑四殺，七傷八難，河神侵撓之厄，悉令消散。二請南方三炁天中三神童子，爲諸男女度脫夏三月所有疾病，三刑四殺，七傷八難，河神侵撓之厄，悉令消散。三請西方七炁天中七神童子，爲諸男女度脫秋三月所有疾病，三刑四殺，七傷八難，河神侵撓之厄，悉令消散。四請北方五炁天中五神童子，爲諸男女度脫冬三月所有疾病，三刑四殺，七傷八難，河神侵撓之厄，悉令消散。五請中央一炁天中一神童子，爲諸男女度脫四季之內所有疾病，星河浸撓，三災九厄，悉令解除度脫。

道言：汝等善男子善女人，但當讀誦此經，則令五神童子，及十方聖衆，即來擁護，降福消災，滅除罪咎，即說頌言：一切空無本，皆先稟運炁。有識即非識，無留亦無滯。名字居多衆，混然積年啓。仙度甚久遠，得一歸真理。遊經無定方，權應非一體。皆由此經



得，歷劫自澄洗。歸依太上經，壽筭得長存。吏兵常擁護，禍去福來臻。

爾時北斗七星童子、五神童子、十方諸善童子，其數如沙塵，委炁聚功德。將來五濁世，七傷與六害，自然歸正旨。天地陰陽炁，周匝輪迴轉。長育於人民，司馬定命章。萬神唱恭諾，更無有留滯。男則志聰明，女則質端惠。妖患不能生，終天保慶裔。如此至心誠，歸命太上經。

太上洞玄靈寶護諸童子經

(郭清點校)

# 043 太上洞玄靈寶四方大願經

經名：太上洞玄靈寶四方大願經。撰人不詳，約出於隋唐。勸人發願祈福。一卷。底本出處：《正統道藏》洞玄部本文類。

天尊言：學道之士深處山林，或宮觀壇靖，積行修功，輔元贊化，以冀仙道。當發四方大願，朝夕行之，自然與道合真，萬神協助。一飲一食，皆有祝願。念念不忘，於國於己，以及一切，能依修之，仙道可冀，於道近矣。

先發四方大願，歸身歸神歸命東方已得道大聖衆，至真諸君丈人，乞賜臣等十四福。一者身無疾病，不遭衆患，永離痛惱十苦八難。二者爲地祇所畏，天神所敬，妖惡自滅，心神端正。三者天神識別，得在福地。四者制鬼

治病，舉向如願。五者行來坐起，天神衛護。六者諸所造詣，災禍自消，福德臻集，道德日至。七者居危得福，苦痛安寧。八者爲三界所稱，列號真人。九者邪穢悉除，身香體潔，淨如金玉，德行清白，表裏精堅。十者願無不獲，志無不克。十一者爲諸天神聖，一切所宗。十二者道成德就，白日昇天。十三者福慶之兆，上延先祖，福流子孫。十四者門內眷屬，普得延年，與道合同。

歸身歸神歸命南方已得道大聖衆，至真諸君丈人。乞成十一念願。一者念帝王國主，吏長官屬，福慶日臻。二者念德行自然，不犯經戒，道德尊大，普所希願。三者念悔過首罪，不敢有所蔽匿，叩頭自搏，禮拜盡心。四者念願求神仙，得見真君，免度世厄，爲後世種民。五者念永離苦難，所求如願。六者念願昇度，乘雲駕鶴。七者念爲億曾萬祖、上世父母，逮及臣身，解除生死宿考重罪。八者念爲合家所有戚屬，常承慶福。九者念後世

子孫，求恩獲利。十者念爲一切衆生、蜎飛蠹動之類，普蒙恩潤。十一者念遠離榮華、奸妖邪諂，殫孽鬼神，收鬼制奸，免度災厄，十苦八難，克獲上仙，白日昇天。仙度之後，與道合同。

歸身歸神歸命西方已得道大聖衆，至真諸君丈人。乞賜九福。一者見世安穩，不遭衆橫。二者相好澄明，終不迷惑。三者所願分明，不落闇冥之處。四者榮名赫赫，奸邪退伏。五者功成德就，爲大聖所敬。六者疾病除愈，不墮惡道。七者福慶之兆，上延先祖，下流子孫。八者享福獲慶，災害消亡。九者克得上仙，白日昇天。仙度之後，與道合同。

歸身歸神歸命北方已得道大聖衆，至真諸君丈人。乞願七福。一者令無勞塵耻辱之事。二者德行清白，容貌端正，光色鮮明，有如珠玉，衆人樂見。三者奸邪諂僞，妖孽雜俗，所不能穢。四者三界一切大聖鬼神，莫不恭敬。五者善功日昇，惡道消滅。六者收鬼治病，使役鬼神。七者身香體

潔，骨髓芳馨，勇猛智慧，高才聰明，克昇上仙，白日登天。仙度之後，與道合同。

### 祝中食法

元始大聖，朗達玄微，日月齊明，三寶同輝，曾治梵行，度人不衰，三塗永離，五苦咸解，是名飛天法輪。今日齋主至德，奉請衆賢，行香設禮，獻供隨方，歸命法門，戒身立德，施設厨飯。願四海清寧，七祖歡泰，三道濟濟，帝王延祚。當令齋主某甲，祈請之後，承是功德，普通十方，仰徹諸天，禍滅九陰，福生十極，慶有盈餘。七世父母，去離九陰長夜三塗，薦懺之後，徑昇天堂，長處光輝，鍊形朱宮，輪轉化生。合門大小，聰明智慧，百病除愈，四體輕強，運度惡世，逍遙三界，德鍾天下。一切衆生，普同福願，行與神合，得道自然。

### 祝人布施中食及解厨并齋飯法

今爲某甲請設齋食，當願一切，無不飽滿，世享天厨，德流齋主，如水歸海，宗枝徹長，常處貴盛。世與四輩，

俱生快樂。七世父母，得免長夜九幽之府。魂神自在，灾消福降，生死昇仙。當願齋主，世世願得善心，立德敬道，護法種因，所向得福，行道得道，求仙得仙，身神安寧，華色精光，行來四出，善神開導。若荷戒錄，吏兵衛從，合門見在，咸得安全。若有疾病，皆得除愈，各保年壽，所願必從，位祿自至，不令屯蹇，惡魔消滅，鬼妖降伏。日月星辰，天地神祇，常當保護，侍衛門戶，千灾不干，萬難咸脫，見世受福，終得仙道。

### 布施衆生祝法

勤修大道法，精誠感太冥。真降魔魅散，衆妖皆滅形。七祖昇南宮，兆身登上清。福利無不普，餘食賜衆生。

### 受布施祝願法

歸身歸神歸命太上三尊。今是布施，當願齋主慶及一切，禍滅九陰，福生十方，德如山海，莫不興昌。七祖生天，子孫賢忠，富貴巍巍，所欲皆從。學道昇仙，駕雲乘龍。齋生某甲，歸心道法，能減損財寶餘物，施爲功德。當

願施一之財，無量之報。功多報重，恒與善會。世世因緣，豐樂不絕。見在大小，常無疾病，終保高壽，世生賢才，智慧明徹，三界保敬，真神衛侍。五方正神，擁護門戶，常居安全，邪魔束形，鬼精滅爽，宅舍安穩，灾異不起，受福無極。遂得昇度，分形變化，一切預是有情，導以法文，皆得與道合同。

### 解齋餘食乞衆生祝法

今日是何日，齋戒向太上。服食天行厨，役使今月將。兆等昇南仙，齋主福無量。燒香奏至誠，功德普盡暢。吾今所說四方願祝大法，若能精心修持，得福無量，戒慎之焉。

太上洞玄靈寶四方大願經

(郭清點校)

## 044 太清五十八願文

經名：太清五十八願文。撰人不詳，約出於隋唐。列舉五十八願念。與《靈寶智慧本願大成上品經》略同。一卷。底本出處：《正統道藏》洞真部戒律類。

若見居家妻子，當願一切早出愛獄，攝意奉戒。若見飲酒，當願一切制於命門，以遠禍亂。若見娼女，當願一切守情忍色，志慕在賢。若見姪人，當願一切除棄邪念，翹心禁戒。若見婦人，當願一切忍割浮華，樂道自然。若見真人，當願一切履信正化，日入法門。若見衆人，當願一切推仁無爭，懷道安世。若見善人，當願一切時尅存念，仰軌其道。若見惡人，當願一切棄凶即吉，不犯王法。若見貧人，當願一切損身施惠，後受大福。若見富人，當

願一切救濟萬物，世世受祿。若見貴人，當願一切承其教旨，悉合典訓。若見賤人，當願一切勤修匪懈，各得所爲。若見帝王，當願一切奉仰王道，孝如父母。若見主相，當願一切受其教制，四方歸仁。若見兵甲，當願一切各念仁心，天下讓賢。若見王子，當願一切日歌太平，系國承家。若見賢人，當願一切履行其德，道爲世宗。若見道士、賢士，當願一切明解法度，得道登真。若見山棲道士，當願一切悉見道門，速得飛仙。若見教化，當願一切親受聖教，皆爲淵博，名曰聖人。若見聖人，當願一切尊禮侍見，諸國並瞻。若見仙人，當願一切真道悉成，飛昇天堂。若見城郭，當願一切嚴整修飾，以道爲基。若見大國，當願一切歸崇慕德，若水歸海。若見小國，當願一切知止冲虛，安其所居。若見市朝，當願一切羣賢蜂萃，悉弘正道。若見靜觀，當願一切功德巍巍，天人得志。若見齋戒行香，當願一切道德日新，庠序容止。若見誦經，當願一切盡上高座，咸

聞經旨。若見經教，當願一切各各受讀，禮習經教。若見樓觀，當願一切洞觀十方，無所隱藏。若見高山，當願一切立德如彼，無復退轉。若見大海，當願一切智慧無量，輔成家國。若見茂材，當願一切學成儒宗，訓徒敷教。若見淨手，當願一切常執經書，無時暫輟。若見善口，當願一切耽詠洞經，日新不厭。若見動足，當願一切超出三界，飛行上清。若見靜山，當願一切滅景得真，安閑空寂。若見飲食，當願一切棄累入靜，存得道味。若見火藏，當願一切除其災害，施爲福田。若見疾病，當願一切以道自安，免此苦厄。若見死喪，當願一切學道常存，濟度三塗。若見漁獵，當願一切不爲罪垢，終入無爲。若見夷狄，當願一切賓王中國，不生邊地。若見少年，當願一切及時學問，遂成盛令。若見老病，當願一切以道攝生，不更衰耄。若見三光，當願一切普明靈曜，冥闇俱消。若見雲雨，當願一切惠澤盈溢，無所不生。若見素雪，當願一切常居潔白，逍遙自

在。若見靈風，當願一切蘊懷披散，德

流遐邇。若見淨水，當願一切洗垢清

虛，平等其心。若見名香，當願一切受

姿芳盛，衆穢蕭然。若見好華，當願一

切樂散諸聖，相好具足。若見車馬，當

願一切得道無爲，乘鳳駕龍。若見弦

歌，當願一切玩經散說，以道娛樂。若

見福食，當願一切無不飽滿，世享天

厨，德流主人，如水歸海，宗廟胤長，常

居貴盛，世與四輩，俱生王家。若見散

施，當願一切禍滅九陰，福起十方，德

如北海，莫不興隆，七祖生天，子孫賢

忠，富貴巍巍，所欲皆從，學道飛仙，駕

雲乘龍。

道士坐卧，常願我等四大合德，同

體道真，長存玄都，師友自然，濟度十

方，天下受恩，逍遙有無，洞觀妙門。

### 十善勸

戒曰：勸助禮敬三寶，供養法師。

三寶者，謂道、經、師也。能養生教化，爲人軌範，是

法師也。令人世世爲君子，賢孝高才，榮

貴巍巍，生爲人尊，門族昌熾。

戒曰：勸助治寫經書，令人世世

聰明，博聞妙蹟。

戒曰：勸助建齋堂靖院，令人世

世門戶高貴，身登天堂，衣食自然，常

居無爲。

戒曰：勸助香油供養，令人世世

芳盛，香潔光明，容眸絕偉，天姿高秀。

戒曰：勸助法師法服，令人世世

長延，逍遙中國，不墮邊夷，男女端正

冠帶玉珮。

戒曰：勸助王父母子民忠孝，令

人世世多嗣，男女賢儒，不更諸苦。

戒曰：勸助齋靖讀經，令人世世

不墮地獄，即昇天堂，禮見衆聖，速得

反形，化生王家，在意所欲，玩服備足，

七祖同歡，善緣悉會，終始榮樂，法輪

運至，將得仙道。

戒曰：勸助衆人經學，令人世世

才智洞達，動靜威儀，常爲人師。

戒曰：勸助一切布施諫諍，令人

世世壽考富樂，常無怨惱。

戒曰：勸助一切民人除嫉去欲，

履行衆戒，令人世世安樂，禍亂不生，

病者自愈，仕宦高遷，爲衆所仰，莫不

吉祐，門戶清貴，天人愛育，神魔敬護，常生福地。

是名太上智慧勸進要戒品，皆《大

智慧經》上卷所言也。法傳太極真人，

以治道行矣。兆有宿福，值見此文，祕

而奉焉。妄示不信，禍交見世，死爲下

鬼，閉於地獄，旋輪五苦，後生失人道。

毀經戒者，亦然。

太極真人曰：爲行之惡，莫大於

嫉殺貪奢驕淫也。若此一在心，必伐

爾年命矣。挾之以學神仙者，不亦悲

乎。道士持齋燒香，清淨讀經，天下之

盛也，而不欲見，見如不見矣。

太極真人曰：世人惑也，遠其仙

人，並競事鬼神，及殺生以求生，去生

不亦遠。生時不修善治身，忍割可欲，

死方厚葬其骸骨，不知魂魄，己身五

毒，幽囚地獄，苦惱三塗，輪轉五道也。

生世無幾，而聚斂財寶，無有足時，爲

己重擔，福盡罪至，身死名滅，財寶四

散也。若疾風之扇塵矣。

真人曰：夫學道爲人，先孝於所

親，忠於所君，憫於所使，言於所友，信

而可復，諫惡揚善，無彼無此，吾我之私，不違外教，能事人道也。次絕酒聲色、嫉妬殺害、奢貪驕怠也。次斷五辛肥生，滋味之餽也。次令想念幽冥，心觀清虛。次服食休糧，奉持大戒，堅質勤志，導引胎息，吐納和液，修建功德。

真人曰：忍人不能忍，割人不能割，行人不能行，居人不能居，衣人不能衣，食人不能食，守人不能守，學人不能學。乃鎮以靈藥，餐於雲芽，尸蟲沉落，穢漏消滅，六宮滌蕩，五藏安閑矣。將長齋久思，靜詠洞經，耽味衆妙，兼以丹液，心能如是者，豈有不得昇仙之道乎。

真人曰：若不修人道君親，不斷耽酒好色，殺伐貪狠，奢驕自恣，欺誘賢良，借貸不還，他不少已有，如此之行矣，長不能革，使心夷然，而欲懷之以齋戒學道，希肉飛之舉，弗亦哀乎，弗亦哀乎。斯人也，將長處地獄，履於五毒，刀山劍樹，湯火炎燒，煮瀆五體，求死不得。饑則食鐵，渴則飲火，出臨寒冰，傷肌切骨，方付三官，謫作出海，

擔負土石，鞭笞考對，備經三塗五道，往返十苦八難之中。其苦無量，不可具言也。

真人曰：是人也，乃不如外覺凡賢，奉修人道，敬信道經，唯善而從矣。任化來往，在時遷易，逍遙域內，清靜自適，命過亦入福堂，不經囚塗，或爲鬼神也。後生人道，不失本願，轉得信根，賢聖結緣，穢累日盡，終入仙道也。

太清五十八願文

（郭清點校）

# 045 太上洞玄靈寶三途五苦拔度生死妙經

經名：太上洞玄靈寶三途五苦拔度生死妙經。撰人不詳，約出於南北朝或隋唐。言輪迴果報，勸修功德福田。一卷。底本出處：《正統道藏》洞玄部本文類。

靈寶天尊時於長樂世界香林園中，與五老上帝、十極天真、三清諸天無極聖衆，演說微妙玄一真經，不二妙門重玄之理。預是來衆，咸聞法音，了達希微，到真常境。人天歡悅，難可稱焉。爾時天尊即放九色微妙光明，徧照十方無極世界。天上地下，內外洞明，等若琉璃，無所隔礙。乃見九幽之下地獄之中，無量衆生受諸苦惱。三十六獄，考治罪魂，執罰神兵，巨天力士，三官九府，百二十曹，考掠縱橫，無

時暫歇。或抱銅柱，或卧鐵床，或上山，或攀劍樹，身負鐵杖，頭戴火山，或入鑊湯，或經鑪炭，倒懸倒立，確擣磔磨，渴飲火精，飢則食炭，或洋銅灌口，百節火然。或硤石逼身，針鋒貫體。或塘煨之內，南北跳踉。或寒冰之中，肌骨分裂，鋸解刀斫，鳥啄蛇吞。或長釘釘身，或鐵犁耕舌，或糞穢臭處，或漣汲溟波，或負鐵擎山，填河灌海。或牛頭折脊，或銅狗嚼身。倏忽之間，萬生萬死，受諸苦痛，億劫無原。或報訖受生，方爲異類。或爲猪鵝鷄鴨，生殺由人。或爲駝馬牛驢，受人駕馭。或爲麀鹿野獸，飛鳥禽魚，毒虺惡蛇，豺狼虎豹，遞相啖食，展轉無窮。或得爲人，身嬰六疾，盲聾啞啞，足跛手攣，徧體膿瘡，舉身爛壞，鼻梁崩倒，癩病癡狂。或長病纏綿，困苦床枕。或形容醜陋，智慧不圓。或凍餓飢寒，貧窮孤露。或爲下賤奴婢之身，拘抑由人，不得自在。如是等罪，如影隨形，億劫輪迴，未嘗休息。

是時衆會，見此因緣，悲歎驚嗟，

咸懷慈愍。於是衆內，有一真人，名曰法解，即從座起，從容雅步，嚴整衣冠，稽首天尊，五體投地，前進作禮，上白天尊言：臣奉侍以來，于茲累劫，三清境界，金闕瓊宮，恬淡無爲，逍遙快樂。宴遊真域，餐聽法音。自此歡娛，動經載劫。不曾見此生死因緣，六道循環，無窮苦惱。不審向來光內所見罪魂，衆苦備經，受罪無已。前生何犯，今世何緣，致受此身纏諸痛苦。恩惟大聖示以未聞，得悟罪根因緣所起。施大法藥，醫救沈淪。震大法音，開悟愚暗。灑大法雨，灌沐身心。散大法雲，廕覆羣品。秉大法炬，照燭幽昏。開大法門，汲引羣迷。如蒙慈誨，仰荷玄恩。

爾時天尊答法解曰：善哉善哉。汝以慈憫，念此衆生，善得機宜，請問妙法，爲將來世一切有情，作法舟航，作法燈燭，作法梯凳，作法橋梁。濟度羣生，出離罪惱。破諸地獄，升彼天堂。彌歷劫年，度人無量。諦聽諦聽，當爲說之。夫世末時訛，人民澆僞，爲

善者少，爲惡者多，不孝不忠，不仁不義，不慈不信，不讓不廉，傲忽正真，輕慢三寶，訾毀經典，誹謗法門，害物傷生，貪殘無厭，六情五慾，三業十纏，營造罪根，結諸惡業，自作自受，猶響應聲，終劫說之，亦難可盡，略舉其要。罪惡源由，名曰三塗五苦八難。此等惡趣，出離最難。非我法門，無由超度。所言三塗者，一者地獄，考對前非；二者畜生，償酬往業；三者餓鬼，苦對最深，渴飲火精，飢則食炭。五苦者，刀山劍樹，銅柱鑊湯，漣汲溟波，是名五苦。八難者，一者得生人道，二者去女爲男，三者形體完全，四者得生中國，五者值有道君父，六者稟性慈仁，七者值國土太平，八者與三寶相遇。八者備足，是大善因，有不備者，是名爲難。以此諸苦，流浪不還，展轉漂沈，與道長隔。耽淫五濁，執滯六情，外觸內侵，殃纏禍染，眼耳鼻舌身意六塵，好醜是非，念念相續，一失人路，墮地獄中，長夜冥冥，無由解脫。

法解又曰：衆生妄想，不識正真，

執繫是非，循環罪業，運心任意，皆是罪緣。人生幾何，即生即滅。如彼石火，不得久長。如彼浮泡，曾無堅固。生老病死，日夜相侵。變滅不常，須臾散壞，苟得富貴，猶暫片時。況更飢貧，憂悲苦惱，或嬰六疾，不具足身，及至死亡，又還地獄。如是之苦，甚可哀傷。惟願大慈，廣開方便，示以大道，拯拔之門，使此輩罪魂，及來生男女，咸得法利，普入福堂。

天尊答曰：若有衆生三業淨者，不墮三塗。所言三業者，身業、心業、口業是也。身業者，姪殺偷盜。心業者，嗔貪愚癡。口業者，綺言妄語，兩舌惡罵。此三業者，是十業根，障蔽善緣，滋生罪惱，若能清淨，永免三塗。若有衆生，五毒淨者，即離五苦。所言五毒者，眼觀五色，耳聽五聲，鼻貪五香，舌知五味，心生五慾，爲五毒根，終劫纏綿，無有解脫。若能清淨，五苦永除。若有衆生，修八行者，超度八難，與道合真。所言八行者，一者孝行，二者仁慈，三者貞廉，四者忠信，五者善

忍，六者柔和，七者奉戒持齋，冥心大道，八者平等接物，無有冤親。以此熏修，善功充滿，身超八難，永契仙階。此上法門，修行要義，轉羸入妙，證道登真。三世天尊，十方大聖，皆修此行，升入無爲。汝以慈悲，愍念羣品，應當敷演，宣示未聞，於苦海之中，愛河之內，以吾法教，撈漉衆生，使來世男女，咸知修奉，出煩惱網，斷疑惑根，登解脫山，到逍遙境。身心清淨，深入法門。

法解又曰：三業五毒、八行等門，不可思議，最真最妙。將來之世，及見在人天，聞此法音，便應解悟。況更精進，依按修行，當知是人，決定成道。然地獄之內，見在幽魂，拘閉寒庭，往來長夜，風刀切骨，衆苦嬰身，食息無停，輪迴不已。及諸來世，一切之人，或有死亡，應當遷拔，願垂開悟，賜以訣言，使人鬼蒙恩，死生開度。

天尊答曰：遷拔之格，救度之文，三洞衆經，具有成典。今當爲汝宣說要言，諦聽受持，廣加流布。夫學道之



士，立德立功，鍊氣坐忘，修真服御，宣經演教，佐國度人。種種皆修，是真行業。功行雖備，果業雖圓。亦須先度九玄七祖，父母亡靈，遷拔生天，鬼錄盡除，身方得道。況復世界流俗之人，若孝順男女，父母亡歿，及諸眷屬，應有終亡，恐彼鬼靈，墮三惡道。或入地獄，或入羅剎，幽閻冥冥，備經衆苦。須憑功德，廣修福田。救度窮魂，解消冤結。過此境界，東極宮中，有尋聲救苦天尊，大慈仁者。發弘誓願，普救衆生，億億劫中，度人無量。但能回向，一念歸依，注想尊容，稱揚名號，尋聲赴感，應念垂慈，一切苦中，無不救護，是故名號救苦天尊。廣勸衆生，勤加禮念。復次三洞經典之中，濟苦拔亡，然燈爲上，五方八極，地獄幽牢，存陰極之鄉，長夜之境，死魂囚閉，不見三光。冥閻之間，經諸拷掠，宜造一燈樹，然九卮燈，自初終亡，至於七七，燈光相續，下照九幽，覩此光明，即當解脫。又以繒綵，造遷神寶幡，長四十九尺，或作小幡七首，懸於長竿，任風飛

颺，萬罪皆滅。又紙墨縑素，書寫此經，散施學人，流傳讀誦，亡魂超度，地獄寧閑，福善所資，慶延後世。其有珍玩服飾，平昔資財，廣施寒栖，濟卹貧乏，此之功德，亦類於前，黑籍落名，地司除簡，神升淨土，隨願往生。利佑子孫，斷絕殃疰，巍巍福善，難可稱量。是故應當勤心諦受，宣行付囑，普度人天。

爾時會中聞此法緣，高尊上聖、三界真仙、侍衛威靈、天兵騎吏、無鞅數衆，一切職司，洞達無爲，齊升道果，三臺地獄，無量罪魂，俱獲善功，應時解脫，十方諸獄，鑪炭鑊湯，盡變清涼，無復憂苦。天真太上，天人龍鬼，預在法筵，聞此經典，歡喜信受，恭敬奉行，作禮而退。

太上洞玄靈寶三途五苦拔度生死  
妙經

（郭清點校、王卡復校）

# 046 太上洞玄靈寶往生救苦妙經

經名：太上洞玄靈寶往生救苦妙經。撰人不詳，約出於南北朝或隋唐。勸修道祈福滅罪。一卷。底本出處：《正統道藏》洞玄部本文類。參校本：敦煌P.2384號殘寫本<sup>①</sup>。

天尊昔遊香林園中，爲一切衆生宣說妙法，開闡妙門。爾時即有五色微妙光明，從口中出，其光徧照十方無極世界，及無極九幽地獄之中。天上地下，無不光照。衆中有一真人，名曰法解，從座而起，嚴整衣冠，稽首長跪，上白天尊言：合座諸衆，前生前業，積福累功，萬劫一會，得遇天尊，宣說妙法。諸徒弟子，稽首叩頭，五體投地，殷勤請法，血流滿地。

於是天尊施大慈悲，舉手彈指，念諸弟子：善哉善哉，可念衆生，殷勤珍重。此法實深，非是真人，不能啓請。吾今所以爲汝等故，說此因緣，諦聽諦聽，護淨遵奉，珍重受持，晝夜恭敬，勿使失儀。若有衆生，高心不信，輕慢受持，心生誹謗，不生信敬，心不護淨。若當來世作畜生，一切蠢動，又及見存受生之日，眉鬚墮落，徧體生瘡，舉身爛壞<sup>②</sup>，鳥栖露宿，棄於人間。百姓見者，皆悉惡心，父母妻兒，肝腸斷絕。如此之輩，受苦之人，痛當奈何。並是衆生，緣身自造，非是他悞，各各自思，審而奉行<sup>③</sup>。

法解曰：不審此等罪人，前生何劫，受罪之根，緣對何因。惟願天尊曲垂慈澤，喻以罪根。

天尊答左玄真人<sup>④</sup>曰：此等罪人，前生各有因緣。劫劫代代，立福造怨，種種相生，悉由身造。十方大聖，終不悞人。吾今欲告汝等，各自諦聽，聞我說是三塗五苦之經。汝等弟子，一切男女，一念之中，發心精進，七日七夜，

菜食長齋。月當十直，一日之中，十二時節，燒香行道，請諸道師，建立道場。然四十九燈，懸諸幡蓋，轉讀此經，晝夜七徧，七日七夜懺悔，汝等諸徒弟，香火知識，七祖父母，過去亡人，宿業罪根，並得解脫。若有諸人，未遇此經，墮落地獄，一聲稱揚三寶名者，我即尋聲往救，出離地獄，即上天堂。況復汝等七日七夜，菜食長齋，燒香然燈，轉讀此經懺悔，汝等一切弟子，身中所有宿罪，並得除滅。若不懺悔，罪難可除。汝等弟子，審諦聽之。或有十方真人，一切男女，或爲亡人，或爲見在，又及己身，或將金銀、象馬車乘、衣服卧具之物，或捨田宅，脫身上珍奇及諸雜寶，勸造經像，或將布施與法師<sup>⑤</sup>，以財質心，就師請法，轉讀經文，及以受戒，披心懺悔，叩頭尊前，聽師講說，自懺己身千罪萬惱，願得消滅。

天尊曰：若有真心，能發善意<sup>⑥</sup>，欲造經像，當時隨其多少分數，即以具辦。勿留在後，恐失前願。與身爲怨，萬劫口過，若有施物與齋食，及與法師

布施之物，當即分付，勿留在後。心不<sup>⑦</sup>東西，與人作業，若當過去，必入地獄，受諸苦惱，身爲餓鬼。或作畜生，縱得人身，聾瞽六疾，貧窮下賤。或作孤兒，寄他養育，飢寒困苦，無人憐愛。半夜三更，思憶號哭，愁惱在心，未嘗有樂<sup>⑧</sup>。或作猪狗，牛羊雜獸，恒被生殺，以報前愆，衆劫說之，亦難可盡。吾今告汝諸徒弟，審諦修身。

左玄真人稽首作禮<sup>⑨</sup>，上白天尊言：願爲一切衆劫罪根衆生，說此三塗五苦八難之經。盲聾衆生，齊皆<sup>⑩</sup>仰聽，聞經之者，普受快樂，皆悉歡喜，稽首願聞。

天尊告一切衆生<sup>⑪</sup>曰：善男子，善女人等，我嘗歷觀諸天，及遊於地獄之中，見有受罪衆生，項負<sup>⑫</sup>大枷，臂掛雙杻，脚著大械，身負鐵錐，口中銜火，刀針刺背，劍樹撞心，惡鳥啄睛，鐵犁耕舌，鎔銅灌口，百節火然，燒鐵爲丸，入喉<sup>⑬</sup>喉爛，鑊湯煎煮，銅柱逼身。或上刀山，骨肉糜碎。或入鑪炭，脂滴火然，轉入寒冰，傷心切骨，遣卧鐵床，潰

爛<sup>⑭</sup>床間，變作鬼身，毀形難見。或在雪田之內，分擘<sup>⑮</sup>心腸，鋒刃剉身，血肉如泥<sup>⑯</sup>，磔作微塵，揚骨聚筋，還成餓鬼，牛頭舉棒，獄卒<sup>⑰</sup>擎叉，驅役罪人，未嘗有歇，輪迴億劫，何日得還。汝等衆生，努力尅己削身，勤修功德。汝等弟子，及諸衆等，各勵本心，當得解脫。

言語未訖，左玄真人又白天尊曰<sup>⑱</sup>：未審此等衆生，前生前業，作何罪孽，行何楚毒，觸何戒律。衆等愚癡，不自曉了，唯願天尊，哀愍衆等受罪之人，示以所犯<sup>⑲</sup>，當使慎之，勿得更造。不知修建行何功德，拔此罪根。時諸衆等，各發道心，稽首天尊，願聞顯說。

天尊告曰<sup>⑳</sup>：卿等諸衆，心欲樂聞，說此三塗五苦八難之經者，宜各<sup>㉑</sup>諦聽在心。此經微妙，不可思議。衆經之中，最爲第一。上品之中，最爲第一。懺悔拔出過去亡人，救難之中，最爲第一。此經尊貴，衆經中王。向言三塗者，地獄道一，畜生道二，餓鬼道三。是名三塗。五苦者，抱銅柱一，履

刀山二，循劍樹三，入鑊湯四，吞火食炭五，是名五苦。八難者，夫人生得免三惡道一；既得爲人，去女爲男二；即得男身，六情四體貌具三；六情具足，得生中國四；得生中國，更值<sup>㉒</sup>有道國君父母五；值有道之君，一生樂道<sup>㉓</sup>，慈仁善心六；善心既發，信道長生七；既信道德，不生<sup>㉔</sup>逢太平帝主，萬劫與三寶相遇八。故曰八難。三灾者，征行大兵，爲一灾；終年長病，爲二灾；行住逢大水，爲三灾。是名三灾。五苦<sup>㉕</sup>者，一水漂溺之苦，二火燔灼<sup>㉖</sup>之苦，三盜賊殺傷之苦，四鬼魅著人之苦，五一切毒螫觸嚙痛深之苦。是名五苦<sup>㉗</sup>。五濁者，一見濁邪物<sup>㉘</sup>；二劫運濁，日月短促；三衆生濁，精神不明；四煩惱濁，嗔恚鬪爭；五命限濁，短夭少亡，婦兒妻子，中道離別，孤男孤女，痛苦傷心。是名五濁。八行者，一能身受非事，不自申訴；二能讓德與人；三能不欲人之所<sup>㉙</sup>欲；四能容物事<sup>㉚</sup>不申理；五能遠離無道之人，藏身在靜處；六能一心奉國，心念三

寶，日月燒香，長齋不絕，供養出家人，不違仁信；七能不負經戒，一生在俗，恒不破齋，勤能灑掃靜室，修燈炷火，救拔一切貧窮，下賤產婦，老病孤弱，不具足衆生，所見之者，皆發慈心；八能一生念道，不謗毀出家人，心無是非，口恒念誦，見一切蠢動，皆發慈念之心，一切平等，無有彼我，善惡好醜，與我身無異。是名八行。四等者，一者惟慈，二者惟愛，三者惟善，四者惟忍。是名四等。六塵者，一耳聽宮商，二眼見青黃白黑赤，三鼻知香臭，四身知剛柔燥濕，五舌知辛酸鹹苦甘，六心知善惡喜怒哀樂，外來曰塵，內動曰情。是名六情六塵。六通者，耳眼鼻身舌心，是名六通，六根<sup>①</sup>共同。三毒者，貪婬一，嗔恚二，愚癡三。是名三毒。

天尊重<sup>②</sup>告左玄真人曰：向爲一切衆生說此三塗五苦經者，一切遠近，皆蒙慧解，並入法門。

左玄真人又白天尊曰<sup>③</sup>：一切罪根衆生，今蒙天尊說罪福報對，向於座

下及諸弟子，飢寒乏劣餓鬼畜生，聞說此經，皆悉曉然。各自薰修，不敢更造。爲過去亡者，若在地獄之中，受三塗五苦八難之愆，欲救亡人，其法若箇最得爲先，濟亡人之苦。

天尊告真人曰：汝等欲救亡人，當捨壽之時，諸方覓師，爲亡人宣戒懺悔，即爲轉讀路上墳所，請師爲亡人燒香，讚嘆懺悔<sup>④</sup>，捨<sup>⑤</sup>資亡人，及以男女緣身之資，迴將布施，得福最深。至七日、百日割減，造經及像，齋戒然四十九燈，造四十九尺繒幡，懸在長竿。若不可得辦，即造<sup>⑥</sup>小幡七尺，造靈寶及五苦之經，讀誦晝夜七徧。亡人七七之內，定其罪名。百日之中，配入五道。向說此經，救亡人之苦，此法最爲第一。

左玄真人又白天尊言<sup>⑦</sup>：向者三塗五苦八難之中，一切衆生既聞經已，一切亡人隨願往生快樂之處，可得聞否。

天尊告左玄真人曰：一切存亡，聞我說此經者，當修福德，隨願往生，

聽吾五念，爲存爲亡誦經七徧者，一切衆生及過去亡人，隨願往生童子，出家供養三寶。

法解曰：今聞天尊欲說五念之文，一切衆生歡喜踴躍，一心樂聞。

天尊告左玄真人曰：欲誦吾五念者，長齋護淨，著淨潔之衣，一心請師，依法受行。若不如此，必墮落地獄，無有還期。努力精進，護淨受持，一心奉事，不敢失儀。

天尊告左玄真及諸人鬼，一心靜聽五念之經。

一念三寶常慈愍，願得拔度出火坑。萬罪千災盡消散，跛痾積速皆能行。邪魔惡鬼在獄禁，百姓男女道心生。五逆冤家並歡樂，鑊湯變作蓮花池。法界衆生口念善，過去亡人隨往生。二念見前諸衆等，努力長齋作橋梁。憶此地獄三塗苦，勤行布施盡燒香。受戒讀經珍重禮，一切過去上天堂。天尊彈指告諸衆，黑闇地獄早生光。法界衆生<sup>⑧</sup>勤修道，一旦往生在中央。三念亡人甚可憐，一入墳中難見天。

道場建立不肯施，四時八節得泥錢。地獄之中受苦惱，口中唱枉告皇天。平生不肯修功德，過去枷杻鐵杖鞭。一日之中萬生死，縱作六畜經數年。飢寒脊破不能語，年過一二穿鼻牽。慈孝男女爲作福，五逆男女斷因緣。飽食酒肉覓生業，未爲亡人捨一錢。一旦生時多作福，亡去往生三寶前。四念衆生無善心，謗毀三寶自沈淪。雖入道場不正意，稱揚說道出家人。銅柱鐵床遭抱卧，劍樹刀山來逼身。苦痛尋師覓不得，牛頭獄卒強來親。鐵叉又著鑊湯裏，碓擣磑磨作微塵。種種苦惱常經歷，直爲毀謗出家人。出家未必入地獄，一切衆生慢道心。告語蒼生諸衆等，努力堅持好道心。一切衆生迴正念，隨願往生在香林。五念同學早出家，愚癡重障生慧芽。地獄翻作天堂樂，鐵牀銅柱出蓮花。一切衆生受快樂，三五相伴升雲霞。六時恒聞鍾磬響，唯願子孫常出家。身披法服化諸衆，口誦靈寶斷魔邪。七祖父母天堂上，過去往生侍香華。

天尊告左玄真人曰：向者說此五念，爲諸衆生顯說此經，猶恐未解。卿等十方諸真人等，方便重說，珍重殷勤。若有衆生，心中悟解，一心正念，護淨受持，善行讀誦此經者，及爲存亡遠行，疾病一切，舉心回向，彼此滅罪萬劫。夢想之中，常見三寶，逢善知識，在處受生，恒值快樂。若能長齋受戒，晝夜六時燒香禮拜，心無暫忘。在生過去，身懷經戒，童子出家，供養三寶。若能建立靜堂，抄寫受持，裝潢輶軸，宣布未聞者，皆令聞見。如此福德，最爲無量。

左玄真人稽首作禮，上白天尊曰：一切衆生，癡盲耽著，貪怒嗔恚，心未迴向。或心迴向，乃將駿馬百疋，寶車千乘，及諸卧具，而將布施，心乃羸疏號叫，不審得福如何。天尊慈悲，重爲說之。時諸衆等，叩頭正念，一心奉行。

於相好，不及人次。若有衆生，身欲布施，心中不生信敬，不貴三寶，如此等輩，必獲此報。譬如鏡中照人，清白隨其本身，更無雜見，黑即見黑，白即見白，隨其本根。罪亦如是。汝若不信，有地獄見在。地獄在人身中，無勞遠覓。十方諸衆，稽首作禮，一心歸向，願得見聞。

天尊告諸衆等：我過去後，若有一切衆生，得吾此經，受行讀誦，堅持護淨，及爲諸人方便顯說。若有衆生，心中不信，故汙不淨，當來受罪，還爲六畜。若有衆生，能捨資財，及諸寶物卧具之輩，以將布施，來入經像，及以齋食贖生，當來獲福，定得生天，恒居貴門，劫劫代代，與善因緣，滅罪萬劫，拔度升仙。

天尊告曰：汝等衆生，諦聽吾說五種捨施之功，念念之中，不離其心。第一者，若有衆生，能自發心捨施勸助諸人，施與法師，營造經像。一錢以上，皆與四十萬倍報。一萬以上，報不可勝。萬劫之中，常見快樂。

教化一切，恒爲人師。

第二者，若有衆生，布施勸助持寫經書，及靜堂旛花燈燭，一錢以上，皆與四十萬<sup>④</sup>倍報。一萬以上，報不可勝。過去生中國，聰明智慧，清淨具足，常見三寶，永無煩惱，快樂無爲。

第三者，若有衆生，忽發大慈之心，勸助一切人，布施貧窮下賤，孤弱老病，餓嫗嫠婦<sup>⑤</sup>，飢寒遠行，寄客衆生等。一錢以上，皆與二十五萬<sup>①</sup>倍報。一萬以上，報不可勝。願在處托生<sup>②</sup>，恒得富貴，衣食自然。

第四者，若有衆生，爲過去及見存父母，忽發洪願，勸助一切衆生，布施衆中法師童子<sup>③</sup>、清信男子女人<sup>④</sup>。一錢以上，皆<sup>⑤</sup>二十萬倍報。一萬以上，報不可勝。方便勸助，令得迴心。一生受報，願得出家，久視長生，恒演經教，勸生善心。

第五者，若有一切衆生，能生善心，憐念一切，勸助布施，教化屠兒休殺，迴心贖生，口恒念道，奉戒而行。及獄囚產難<sup>⑥</sup>，飢寒，一切蠢動，五逆不

孝，反生慈心，鉗口<sup>⑦</sup>，合舌，迴稱三寶，永斷酒肉，憐念聾盲，百姓男女，皆似我生。布施一錢以上，一十八萬倍報。一萬以上，報不可勝。過去受生，恒在三寶前<sup>⑧</sup>。

天尊重告諸弟子等：我說勸助布施，其中有人，施一之功，覓萬之報。布施雖多，將罪對福，福乃至有餘，然可報之萬倍。其福雖多，補罪不足，福無一片<sup>⑨</sup>，計功補過，罪福始知。告諸男女，勿更造罪，福乃長爲，以此因緣，名爲萬倍。一切衆等，慎之慎之。

時諸衆等，稱善稽首，各禮天尊，珍重而退<sup>⑩</sup>。天尊慈悲，重說頌曰：一切諸法本，清淨常湛然。報對從心起，苦樂非外緣。地獄與天堂，分明在眼前。未來甚冥昧，審諦熟精研。念爾一生中，顛倒相引牽。心不能明了，結縛自縈纏。冥冥何見曉，悠悠如逝川。儻歎紅顏滅，揮霍入黃泉。善惡無二法，是非同一源。見者生分別，良由心識昏。稱意天仙戶，違心地獄門。深思自了悟，乃成無上尊。哀哉

迷惑子，正道不知存。朽索馭六馬，常恐有驚奔。攀緣念念起，爲過在心猿。遺形忘善惡，塞兌閉諸根。生死是對報，諒自因爾身。若然辯存歿，寂滅即歸真。出生乃差別，入死甚平均。地水火風散，隨處自相親。天地爲大治，無意在人人。計校受生理，非果亦非因。攝心修內行，悟道不盈旬。馳心向外境，幽昧無涯津。凡諸功德藏，以讚嘆爲首。方便接迷津，慈悲能善誘。積善爲福田，積惡成殃咎。假名本自無，權變何常有。顛倒不覺悟，昏迷來日久。怖畏於地獄，煎懸生受苦。吾開定水源，洗除習塵垢。身心既清淨，永劫無灰朽。昔聞持戒者，忍辱生端正。今得見天尊，非言所歌詠。八十好明，七十二相淨。玉潤金剛身，永劫無衰盛。丹唇如欲開，皓齒因斯映。音聲自柔軟，慈悲出本性。慧源猶橐籥，定心如水鏡。此由持戒來，證果爲大聖。

# 太上洞玄靈寶往生救苦妙經

- ①案P.2384抄本卷首殘缺，卷尾完好。題：「天尊爲一切衆生說三塗五苦存亡往生救苦拔出地獄妙經」。與《道藏》本標題頗爲不同。
- ②爛壞：敦煌本作「洪爛」。
- ③奉行：敦煌本作「覺察」。
- ④左玄真人：四字據敦煌本補。
- ⑤敦煌本此句作「或將來布施，施與法師」。
- ⑥若有真心，能發善意：敦煌本作「所有出心有意」。
- ⑦心不：敦煌本作「万一」。
- ⑧有樂：敦煌本作「有忘」。
- ⑨左玄真人稽首作禮：敦煌本作「右玄真人叉手作禮」。
- ⑩齊皆：敦煌本作「齋心」。
- ⑪一切衆生：四字據敦煌本補。
- ⑫項負：敦煌本作「咽著」。
- ⑬入喉：原作「入口」，據敦煌本改。
- ⑭潰爛：敦煌本作「肉爛」。
- ⑮分孽：敦煌本作「分百」。
- ⑯鋒刃剗身，血肉如泥：敦煌本作「剗對斬身，細將入磔，血肉分別」。
- ⑰獄卒：敦煌本作「獄師」。
- ⑱左玄真人又白天尊曰：敦煌本作「右玄真人從衆中出，稽首作禮，五體投地，上白天尊言」。凡二十一字。
- ⑲所犯：敦煌本作「勿犯」。
- ⑳天尊告曰：敦煌本作「天尊告右玄真人」。
- ㉑者，宜各：敦煌本作「汝等弟子」。

- ㉒更值：敦煌本作「便值」。
- ㉓樂道：敦煌本作「學道」。
- ㉔「不生」二字據敦煌本補。
- ㉕五苦：敦煌本作「五毒」。
- ㉖燔灼：敦煌本作「熾燃」。
- ㉗邪物：敦煌本作「耶見」。
- ㉘「所」字據敦煌本補。
- ㉙物事：敦煌本作「无事」。
- ㉚六根：敦煌本作「並六根」。
- ㉛「重」字據敦煌本補。
- ㉜又白天尊曰：敦煌本作「曰法解稽首作禮，上白天尊言」。凡十二字。
- ㉝讚嘆懺悔：敦煌本作「嘆懺」二字。
- ㉞「捨」字據敦煌本補。
- ㉟「造」字據敦煌本補。
- ㊱又白天尊言：敦煌本作「曰法解稽首作禮，上白天尊言」。凡十二字。
- ㊲法界衆生：敦煌本作「寄語後生」。
- ㊳告語蒼生：敦煌本作「寄語後生」。
- ㊴敦煌本此句作「過去亡人出地獄」。
- ㊵升雲霞：敦煌本作「禮三寶」。
- ㊶輶軸：敦煌本作「綽軸」。
- ㊷號叫：敦煌本作「豪意」。
- ㊸罪亦如是：原作「罪一如此」。據敦煌本改。
- ㊹告曰：汝等衆生：敦煌本作「告諸衆等」。
- ㊺「諸」字據敦煌本補。
- ㊻四十萬：敦煌本作「卅萬」。
- ㊼餓羸嫠婦：敦煌本作「餓苟產婦」。苟，當作姁。
- ㊽皆與二十五萬：敦煌本作「皆廿萬」。
- ㊾托生：敦煌本作「墮生」。

- ㊿布施衆中法師童子：敦煌本作「布施法師、山中師童子」。
- ①清信男子女人：敦煌本作「清信男女人等」。
- ②皆：原作「者」，據敦煌本改。
- ③產難：敦煌本作「產苟」。苟，通姁。
- ④鉗口：敦煌本作「傳口」，近是。
- ⑤三寶前：敦煌本作「三寶座前」。
- ⑥一片：原作「一斤」，據敦煌本改。
- ⑦敦煌本經文止於此，無以下大段頌詩。

(王卡點校)

# 047 天尊說隨願往生罪

## 福報對次說預修科

### 文妙經 (敦煌本)

經名：天尊說隨願往生罪福報對次說預修科文妙經。撰人不詳，約出於南北朝或隋唐。一卷。《正統道藏》未收。《道藏缺經目錄》著錄。底本出處：敦煌 P. 2868、龍谷 539、P. 2433 號抄本<sup>①</sup>。

余時天尊時遊十方世界，天上地下，无所不經。遊至大福唐國，見虛皇道君為十方國土一切衆生，善男子善女人等，心生厭故，遂即分神變化，舉眉間一豪瓊光，遍照十方，无不明徹。余時男女一切人等，及諸聖衆，晝夜惶懼，悲聲嘆泣，哽咽嗒慕，稽首合掌，叩

(P. 2868 抄本)

頭搏頰，肘行膝步。諸禽雜獸，普皆如是。一切衆生，諸方仰視，寂絕形影，莫知所尋。余時虛皇道君慈愍衆生，飛身下界，安坐碧瑕神寶之座，念往衆生，如常說法，演法化人。一切衆等，及以禽獸，皆來投座，稽首作禮，步步而前，重過道君，慈愍衆生，珍重矜念。所以余者，道君在座，演說欲說，重加慈念：汝等衆生，若有疑者，各自思惟，隨事問難，皆來諦聽，受我法教，所欲行者，濟死度生，聽我所說。

余時座下有一真人，名曰普救，從衆中出，稽首作禮，上白天尊言：所有四輩弟子，若臨終之日，先為亡者心願，往生十方快樂之國。作何功德，脩何戒行，作何方救，而得往生？

天尊告普救真人曰：汝能愍念四輩弟子，及有未來諸衆生等，聞此願生因緣之福。汝等弟子，諦聽善思，吾今為汝而重說之。汝等男女，各厲本心，而聽我言。

天尊告普救真人曰：若有四輩弟子，若臨終之時，及未終者，願生東方

華林境界者，其有<sup>②</sup>真人，名曰靜境無極之國，慧靜莊嚴。若臨□□□□□□

□□隨願往生。

□□□□□□□□□□善男子善女人等，(P. 2868 寫本止於此。下缺)

(龍谷大學藏本 539。前缺)

天尊重告太上道君曰：若有善男子善女人等，終亡之人在生之時，多有過患，及有債負，并諸怨結，恚恨煩怨，用三寶財物，或為男女，又為鄉閭，或為朋友，亦為己身，昌狂重造，不生畏懼。諸如等罪，難可陳說。汝等過去亡者男女，及以見存因緣眷屬，為其亡人臨終之後，一七二七三七，乃至七七日内，即造繒幡廿一口，青黃碧綠各長七尺，於家宅中建立道場，請諸尊象，并諸幡蓋，及以法師。見在男女，香火知識，齊同勸助，為此亡人，多少任力，重造經象，及以布施出家法身，三日三夜，或七日七夜，轉經行道。遠近親屬，率厲相就，同至道場，各厲本心，為其亡者，皆乞歡喜。一切男女，內外親



情，傍及徒衆，爲其亡者救拔苦厄，各發慈心，重乞歡喜，莫生計念。當爲亡人，雖造片福，計罪補過，得減少多。遠近內外，諸善知識，若有一人，生此計念，縱爲亡者抄經寫象救拔，終不免難，生人怨恨，亡者重入地獄，受諸苦惱，无有出期。見存男女，各各減己布施，爲此過往亡人，重請法師，當道場內，各自稱名，踴猛精進，并乞歡喜。若不重恨，爲其亡人造諸功德，供辦香油，然燈續明<sup>④</sup>，轉經行道，亡者即得捨離地獄，而上天堂。諸是男女，臨終之後，七七之內，定其罪名，百日之中，配入五道，所欲造諸功德者。尔時普救真人不曉次第，重白天尊，願爲說之。見在衆生，稽首奉行。

尔時天尊告普救真人曰：汝等諦聽。一切衆生從初終之後，一七二七三七之內，造諸<sup>①</sup>功德者，最爲上法。七七之內，造諸功德者，此爲次法。百日之內，造諸功德者，此名爲下法。七七、百日，造諸功德次第法者，汝等諦聽。第一造象，第二造經，第三造齋

戒，第四造幡華，第五造然燈，第六脩道場，第七贖生命，第八持布施，第九廣救濟，第十持慳心，第十一慈悲捨，第十二平等心。

尔時天尊重告道君、普救真人曰：爲過去亡者，能行此十二脩福，及諸功德者，名曰具足脩福，亦名曰慈孝之輩。所有男女，備脩前福具足者，一切亡人定獲快樂。若不如此，臨終之人必當墮落三塗地獄。若未終之者，身抱諸患，痾疾難除。能脩此者，滅罪万劫。福德具足。行此十二脩福，而上天堂，計功補過<sup>⑤</sup>，豪分不失。所以尔者，昔有俗人，將一米投厨，乃得无殃數報，童子獻土，變成珠沙。罪福之輩，藏顯亦難。譬如淨鏡，照人形面，青白隨身，更无異見。汝等弟子，及諸男女，若有衆生聽吾此法，懃心聽受，慈悲柔弱，恒如持戒，勿作高心。父母之恩，昊天罔極，各自養子，始察己身。若未養子，如似醉人昏昏度日，其罪更深，存亡俱損，地獄之咎，難可出頭。汝等男女，各慎己身，受罪之時，走避

無處，身在地獄，苦痛自當，善惡業別，無人浪受。今告汝等，各自慎之。

尔時天尊告道君曰：一切衆生，生之時，爲終亡之人，七七百日，乃至長年，造諸經象，并貨諸物，施來入齋，造供極多，成功微少。或有殘供，浪費諸食，薰辛酒肉，通同共食，不生畏懼，三分支一，或造經象，亦復如是。名聲雖有，計福全无，一施一惜，或休或作，以是義故，右曰<sup>⑥</sup>名聲功德也。譬如女人，裁諸衣服，裁截雖了，竟久不縫，必欲人着在身，從何慣帶。譬造經象，以衣相喻。若造經象齋食，施與法師等物，一分失洛<sup>⑦</sup>，隱沒差殊，其福不成，何勞須造，徒費尔功，財貨浪費，存亡罪重，轉更加深，終无片益。如此衆等，作何方計，而得利益亡人，脩何功德，而得拔脫亡者，滅罪除愆。尔時道君曰：衆等愚癡，不自曉了，惟願天尊重爲說之。一切衆等，叩頭作禮，稽首奉行。

尔時天尊告太上道君曰：善哉善哉，如卿所言，護持世戒，能爲衆生，方

便問難，諮請諸疑，隨意科數，一一具問，實所希有。我今重嘆，不可思議，告諸衆生諦聽之。

### 次說衆生用三寶常住等物報對品

天尊曰：一切衆生，減削造經及象，并齋食施物等，私將入己用者，若是象物直一錢以上，十年十倍，又復不還者，身當重病，失於相好，鳥栖露宿，棄於人間，永无出期，縱得人身，聾盲六疾，恒不具足。若用經幡物者，七年七倍，又不還者，身當囚徒，在於囹圄，身着枷鎖，縱得人身，失於相好，不及人次，欲出无緣，終身破壞。若用齋食物者，六年六倍，又復不還者，身爲餓鬼，頸似布綻，腹如懸鼓，身負鐵輪，火徹左右，或作衣着，身如火山，若作飲食，變爲膿血，若作鞋履，化爲杻械，耶病在床，身體臭爛，人不用見，逕年累月，骨盡筋消，終成失好，一入地獄，難出生天。若用布施法師物者，五年五倍，又復不還，身爲貧賤窮寒，衣食乏少，或爲牛馬，以力報酬，或作猪羊。雜獸之屬，以命相求，或作四夷，不知善

惡，或逢惡知識，衆橫湊身，萬劫无解，縱生在人中，聾盲六疾，失於相好，不及人次，一切眷屬，悉皆棄之，或作夫妻，中道離別，有孤男女，倚博傍親，或患病疾，无人侍養，或加困篤，發語先悲，縱發孝心，依附无處。如此等罪，實可悲哉。今告女男，耳聞眼見，實可悲傷。忽若身遭，如何當處，如此等罪，實可重悲。告諸衆等，珍重殷懃，念念用心，勿生豪強，一生脩福，猶不足身，况造罪根，晝夜无數，有財强健，意氣陵天，受罪飢寒，藏身无處。計斯十惡，亦猶本心，煞害衆生，爲他人故，當時作樂，快不可勝，債命酬怨，惟汝獨自在生受罪，憑伏親緣，死入三塗，遣誰救拔斯楚痛，切骨傷心。若入三塗，悔之何及，地獄受罪，數種役身，縱欲說之，亦難可盡。是諸男女，各自思惟，四大假身，破壞立至。告諸男女，努力慎之。

尔時道君從座而起，五體投地，長跪叉手，上白天尊言：若有善男子善女人等，後生至死，或毀壞尊象，剔破

道場，或剥脫淨行人，出家之衆，或破諸禁戒，及五逆不孝，或傳口合舌，謗說出家人，或說道三寶，謗聲曾祖，怒氣耶孃，或角眼斜眉，愛夫憐婦，或造立私物，親於妻子，疏隔耶孃，或姊妹弟兄，看如陌路，或用三寶物，无有愧心，負債彌多，舐蔓不与，或煞生偷盜，兩舌吱咽，或罵詈他人，耶姪穢濁，恒常惡口，音毒在心。諸如此罪，說亦叵周，衆等愚癡，實不能決。惟願天尊，哀愍衆等，重請罪福，而爲說之。（龍谷大學藏本539止於此。）

（P. 2433 抄本）

### 次說罪福報對品

天尊答道君曰：卿之所問，无不遍周。此等衆生，在生受罪，猶未得除，死入三塗，次第而受。汝等男女，各自諦聽，報對之中，次第而說。鐵床銅柱，焦筋碎骨，以報耶孃之罪。寒冰雪山，分烈形體，以報劫盜之愆。吞火拔舌，融銅灌口，以報舌端之咎。塘煨埋體，熅火燒身，劍樹撞心，以報煞生

食肉飲酒之罪。鐵犁耕背，惡鳥啄睛，碓擣磴磨，以報斜眉角眼之罪。身爲餓鬼，脩歷溲湯，燒鐵爲丸，充飢當食，以報破齋違戒之罪。眉鬚墮落，遍體生瘡，舉身洪爛，以報破壞經象道場之罪。口中出火，眼裏生瘡，遍體膿流，藏身無地，以報剝脫出家人之罪。舌不得語，永啞喉中，盲目亡精，口脣橫烈，以報說道出家人父母之罪。癡聾少短，生死不分，或作夫妻，中道離別，以報疏隔耶孃譁聲之罪。或爲牛馬，或作豬羊。鳥獸犬鷹，以報舐債之罪。或爲人僕使，後母前翁，或作孤兒，婦人難產，或貧窮饑餓，長病在床，以報五逆賤薄兄弟姊妹之罪。諸餘等罪，皆在人身，不及遠親，任茲近視。汝等男女，善自思惟，報對逼身，實難忍受。告諸男女，脩福立功，預造善緣，當得解脫。

尔時太上道君從座而起，稽首作禮，上白天尊曰：一切衆生在生之時，堅貪<sup>①</sup>，悛惜，積聚財錢，競作有爲，不能割捨，延時引日，造罪弥輪，凡偌愚癡，

惛惛度日，心恒惡想，不解預脩，縱作善因，失於次第。天尊慈愍，重示男女預脩之因。尔時男女叩頭稽首，依法奉行。

### 次說見存預脩科文品下

天尊告太上道君曰：若有善男子善女人等，一爲天地，二爲帝王，三爲父母，四爲衆生，五爲血屬，六爲己身。諸是男女，初出父母胞胎以後，至一歲、一十、廿卅五十，乃至百歲，百廿歲，必欲<sup>①</sup>預脩，還從一七、二七、三七、乃至五七、七七、百日，周而復始，乃至永年，所造功德，還依次第而作，第一造象，第二造經，次即造卅九尺長幡，設卅九人齋食，安置道場，請諸尊象，并及法師，香火知識，然燈卅九支，任力更多，燈如車輪，三日三夜，或七日七夜，披心懺悔，盡心布施，稱揚三寶，各自首罪，不得藏隱。一懺已後，改往脩來，精進齋戒，迴心贖生卅九命，或百或千，任力更多，施及悲田，貧窮下賤，不具足衆生，產婦餓苟<sup>②</sup>，病人孤老，囚徒餓鬼，救死度生不仁之者，勸

成善因。他方遠客有急，投人而爲開度，濟其厄難，施及衣食，悉令具足。重更發心，慈孝父母，當爲寫象，抄靈寶經，救拔三塗五苦，出家功德，父母報恩，隨願往生。卅六部經內，任力寫之。如此人等，各寫一通十通百通，千億萬通，無極數通。及諸幡象齋戒，亦復如是。若然十燈百燈，千燈萬燈，無極數燈，亦復如是。

尔時道君上白天尊曰：今見細細微塵，無億之數，寧爲多不。天尊曰：甚多甚多。道君曰：今將此經象幡燈，贖生散施功德等，寧爲多不。天尊曰：甚多甚多。道君曰：今將細塵劫數，辟於此經象幡燈等功德，亦如塵沙，數之不得，甚多甚多，不可稱量。如此功德，最爲第一。其經象幡等造訖，建立道場，七日七夜，吟咏讚嘆，誦經解結，令一切怨讎，悉皆解脫，及以眷屬，遠近皆來，同至道場，同乞懺悔，勿生計念，布施懺悔，罪可除滅，七祖父母，出離地獄，而上天堂。告汝男女，脩齋禮拜，受戒持心，忍辱柔弱，供

養三寶，及出家人，斷諸酒肉，燒香燈燭贖生，救拔一切等命，皆譬我身，更无別異，汝之男女，依法修行。

天尊言曰：我過去後，當為一切存亡衆生，遺諸經戒，種種功德，皆有次第。若有衆生，得吾此經者，香湯灑地，及身沐浴，著鮮潔淨衣，燒香燈燭，幡華寶蓋，周匝圍遶，禮拜供養，懽喜踴躍，長跪叉手，護淨精進，受行讀誦，堅持遵奉。為諸人等，未聞之者，皆悉遣聞。

天尊言曰：汝等善男子善女人，若將黃金，如崑崙山大，遍滿天地，而將布施，其功雖大，猶復不如方便教人，一句一偈。經言永為身寶，黃金雖貴，不寶我身。此經雖微，生死因果，汝等男女，勿生癡故，恡此黃金，竟久惜金，不貨脩功，與身為患，必无利益，即是煩惱枷鎖，不出火坑。

天尊曰：若能周匝作此功德者，見世過去一切宿罪，悉皆除滅，見存過去所在之處，逍遙快樂，上界生長，童子出家，供養三寶，如斯功德，不可思

議。時諸衆等，既聞經已，稽首作禮，稱善奉行。

天尊言曰：若有衆生，得吾此經，生不信想，若不護淨，心生不信，誹謗此經者，及口氣不淨，心粗意高，惡口罵詈，交頭亂語，心生我慢，毀滅經象，幡華燈燭，法衣齋食，絞亂道場，輕師欺法，五逆不孝者，當當<sup>①</sup>來世眉鬚墮落，遍體生瘡，舉身洪爛，長淪地獄。若說出家人者，舌根永爛，一日之內，万死万生，縱得人身，□□□具，終日破壞，長病在床，或作六畜鳥獸之屬，命力相讎，百病湊身，聾盲六疾，惡風瘡癬，沉淪地獄，生男五逆，生女啞啞，破壞經象，說出家人，五逆不孝，陵虐貧賤，地獄□□□最深，杻械枷鎖，禁繫罪人，斬斫糜碎，聚骨成人，巡歷地獄，解脫无因，千罪萬惱，都猶汝身。告諸男女，各慎己身。

尔時道君上白天尊曰：若善男子善女人等，既聞經已，受行讀誦，堅持護淨，燒香然燈，安坐念道。心无暫妄，不生懈怠，懽喜踴躍，長齋受戒，持

心忍辱，行檀布施，供養出家人，救生度死，濟拔一切，平等慈心，不敢重造，各厲本心，捨惡脩善，慈孝贖生，憐貧愛老，□□□□□□□□當，幡華燈燭，稱力供養，六長月十，脩□□□，道心增長，永斷酒肉，卑心念善，斷諸煩惱，恒遇道場，常聞鍾磬，讚詠讀誦，永斷□□，見存快樂，死者往生，求男得男，□□□□□□□□□□處安樂，皆□□□時說

(P. 2433 止於此，下文缺)

① 案敦煌 P. 2868 號寫本卷首完好，卷尾殘缺，卷首有標題：「天尊說隨願往生罪福報對次脩科文妙經一卷」；龍谷大學藏 S39 號寫本及 P. 2433 寫本，均首尾殘缺，無標題。據其內容及字迹，可知兩件原為同一抄本，且與 P. 2868 抄本有關。詳見大淵忍爾《敦煌道經目錄編》考訂。本篇錄文中，已將原卷中某些俗寫異體字改作通行繁體字，不復詳出校記。  
② 其有：原作「其有有」，刪一「有」字。  
③ 續明：原作「續明」，據文義改。  
④ 造諸：原作「造諸諸」，刪一「諸」字。  
⑤ 補過：原作「捕過」，據文義改。  
⑥ 右曰：疑當作「名曰」。  
⑦ 失洛：當作「失落」。

- ⑧ 猪羊：原作「猪羊」，據文義改。
- ⑨ 堅貪：當作「慳貪」。
- ⑩ 必欲：原作「必欲欲」，刪一「欲」字。
- ⑪ 餓苟：當作「餓狗」。
- ⑫ 當當：應作「當於」。

(王卡點校)

# 048 太上洞玄靈寶天尊 說濟苦經

經名：太上洞玄靈寶天尊說濟苦經。撰人不詳，約出於南北朝。言召請天尊護衛消災。一卷。底本出處：《正統道藏》洞玄部本文類。另有敦煌本，并存。

天尊言：我窮乎無窮，極乎無極。我有七道之法，曰隱光，曰處光，曰隱相，曰明隱，曰隱變，曰隱真，曰大德。歷化世間，觀察衆生，鍊其善惡。若男若女，能崇我法，精進信敬，行坐念道，恒持齋戒，著淨衣服，清潔之所，晝夜燒香，依時禮拜，供養十方，行道吟詠，讚歎諸聖，月直長齋，日日不闕。是人若遭病困，痛苦無療，及在繫閉，并諸婦人，臨產不分，當爲誦此七道名字，

呪請於我。我則尋聲，將徒衆乘空而來，徑赴是家，救拔病人，追其遊魂，令還本身，則得除愈。若在牢獄厄難之中，亦令枷鎖解脫。若有婦人難產，便得易產。復於宅中有諸穢惡，浮遊病鬼，邪魔魍魎，毒氣魑魅，無辜虛耗，驅除遠去。呪詛蠱道，妬忌赤口，遣還本主，動作觸犯，受其過尤。我使侍童玉女，衛護其家，常居福慶，老命更延，少年益壽，諸善附體，萬惡冰消。一心信受，奉行自然，得獲道真。

天尊言：我法行化，以爲信者，勤身受持讀誦。如是道民，我恒圍衛，愍其鍊行，能敬道法，爲除煩惱，終無枉橫。生無憂苦，死無殃咎，去處無爲，常樂善緣，獲福自然，超越升仙。

天尊言：我臣道士，是汝門師，受汝供養，爲汝授法，轉讀經文。過齋度戒，通傳我前。啓請精誠，我自知之。若不依法，我亦知之。汝等道民，但好供養，勿有悔慢，謗生口業，生施有悔，死必無功。我當觀察，罪無兩主，直心取念，多施多獲，少施少得。造經造

像，亦復如是。及能安立宮觀，坐我形像，幡花圍遶，然燈續明，施力成就者，其功巍巍，計不可勝。時登善福，得入升仙。

天尊言：惟我先天地前，我獨有之。無生無滅，變易自然。有天有地，始有君民。我出經教，歷帝爲師，復爲天真大神，撫接蒼生。東化碧落，南化炎明，西化大堂，北化鬱單。化緣既徧，遷還帝境。濟度十方，皆來奉道。未覩因果，至心樂法，得入升仙。

一者無極大道，二者無上正真道，三者無爲太平清約大道。

天尊言：此經一卷，日誦三徧，稱我三寶，彰衛此人，令無怖畏。若有罪犯，亦復除滅。汝等道民，若讀此經，口氣不淨，故汗不慎，未來染罪，穢濁之中。若欲讀誦，必當漱口潔淨，持心正念。求男得男，求女得女，求長命得最安樂，衣食豐足。此經一卷，大有神德，濟度生死，若男若女，抄寫受持，清淨安置。即宅舍安穩，男女昌熾，衆聖助衛，世人敬愛。富樂無爲，福力之

故。善行增廣，七世生天，法界有類，俱持斯福，信受奉行。

太上洞玄靈寶天尊說濟苦經

①參見敦煌《靈真戒拔除生死濟苦經》。

(郭清點校)

# 049 靈真戒拔除生死濟苦經 (敦煌本)

經名：靈真戒拔除生死濟苦經。  
 又稱《天尊說濟苦經》。撰人不詳。底本出自敦煌 P.4559、S.793 抄本。參校本：敦煌 P.2385、北大 D117 抄本①。

- 第一隱光道    第二處光道
- 第三隱相道    第四隱明道
- 第五隱真道    第六隱變道
- 第七普德道

天尊言曰：我窮乎無窮，極乎無極。我令隱光七道，歷化世間，觀察衆生，練其善惡。若男若女，能崇我法，精進信敬，行坐念道，恒持齋戒，着淨衣服，清淨之所晝夜燒香，依時禮拜，供養十方，行道吟詠，讚嘆諸聖，月直長齋，日日不闕。是人若遭病困，痛苦

無療，及在繫閉，並諸婦人，臨難不分，當爲讀此七道名字，叩請於我，我即尋聲將諸徒衆，乘空而來，徑赴是家，救拔病人，追其遊魂，令還本身，即得除愈。若在牢獄厄難之中，亦令枷杻解脫②，若有〔婦人〕臨難③，便得分解。復於宅中趕除④穢惡，浮遊病鬼，魔耶魍魎，毒氣魑魅，無辜虛耗，駢馳遠去。呪咀蠱道，妬忌⑤惡口，令還本主，動作觸犯，源其過有。我使侍童玉女，衛護此家，常居福慶，考命更延，少生益壽，衆善附身，萬惡消滅。一心奉行，自獲真道。

天尊言曰：我法行化，以爲信者，勤身受持，讀誦抄寫，如是弟子，恒圍衛我，愍其練行，能敬道法，爲除煩惱，終无枉橫，生无憂苦，死无殃流⑥，去處无爲，常樂善緣，福獲自然，超越昇仙。

天尊言曰：我臣道士，是汝門師，受汝供養，爲汝授法，轉讀經文，過齋度戒，通傳我前，啓請精誠，我自知之，若不依法，我亦知之。汝等道民，好心供養，勿有侮慢，謗生口業，生施有悔，

死必无功，我當觀察，罪无兩主。直心取念，多施多得，少施少得，造經造像，亦復如是。及能安立觀廟⑦，坐我形像，幡華圍繞，燃燈續明，施力成就，其功巍巍，計不可量，時登善福，得入昇仙。

天尊言曰：我道寬廓，無法不經，無物不度。若在胡國，稱之恒河沙諸佛；若在漢地，名曰太上老君。在漢在漢，止轉我身。阿難者，君喜先生身是；維摩詰者，無極先生身是；舍利弗者，鬼谷先生身是；文殊師利者，郭子先生身是。此等先生，隨我形變名位二處⑧，恒從侍我，歷化還宮，得道合真。

天尊言曰：惟我先天地前，我獨有之，無生无滅，變易自然，有天有地，始有君民，我出經教，歷帝爲師，復爲天真大神，府接⑨蒼生。東化碧落，南化炎明，西化大堂，北化鬱單。化緣既遍，遷還常境，濟度十方，皆來奉道。未覩佛因，至心樂法，得入昇仙。

一者无極大道，二者无上正真之



道，三者太平无爲清約之道。

天尊言曰：此經一卷，日誦三遍，稱我三寶，鄣衛是人，令無怖畏，若有罪犯，亦復除滅。汝等敬信，「若」讀此經<sup>①</sup>，口氣不淨，手捉穢惡，故汗不慎，未來染罪穢濁之中。若欲讀誦，必當漱口潔淨，持心正念，求男得男，求女得女，求長命得長命，居家安樂，衣食豐足。是經大有神德，濟度生死，若男若女，抄寫受持，清淨安置，即令宅舍安隱，男女昌熾，衆聖助衛，富樂無爲，福力之故。善行增廣，七世生天，法界有形，俱時<sup>②</sup>斯福。

### 天尊說濟苦經一卷

①按本篇有敦煌抄本七件，均殘損。P.4559首題《靈真戒拔除生死濟苦經》；S.793、北大D117尾題《天尊說濟苦經》一卷；P.2385尾題《靈真戒拔除生死濟苦經》。經文與《正統道藏》所收《太上洞玄靈寶天尊說濟苦經》大致相同。本篇錄文，已將敦煌本部分異體俗字改作規範繁體字。

②以上文字以P.4559爲底本，以下用S.793爲底本。又「枉」字，S.793作「樂」。

③「婦人」字原本缺損，據道藏本補。

④「趕除」，當作「驅除」。

⑤「妬忌」，當作「妒忌」。

⑥「殃流」，P.2385作「殃留」。

⑦「觀廟」，P.2385作「厝廟」。

⑧「二處」，P.2385作「二者」。

⑨「府接」當作「俯接」。

⑩「若」字據P.2385補。道藏本此句作「汝等道民若讀此經」。

⑪「時」字，當從道藏本作「持」。

(王卡點校)

# 050 太上洞玄靈寶救苦妙經

經名：太上洞玄靈寶救苦妙經。  
 撰人不詳，約出於唐宋間。贊頌救苦天尊功德，并附北宋末池州莫氏子誦經靈驗。一卷。底本出處：《正統道藏》洞玄部本文類。

爾時救苦天尊，徧滿十方界，常以威神力，救拔諸衆生，得離於迷途，衆生不知覺，如盲見日月。我本太無中，拔領無邊際。慶雲開生門，祥煙塞死戶。初發玄元始，以統祥感機。救一切罪，度一切厄。渺渺超仙源，蕩蕩自然清。皆承大道力，以伏諸魔精。空中何灼灼，名曰泥丸仙。紫雲覆黃老，是名三寶君。還將上天氣，以制九天魂。救苦諸妙神，善見救苦時。天上

混無分，天氣歸一身。皆成自然人，自然有別體。本在空洞中，空洞跡非跡，徧體皆虛空。第一委氣立，第二順氣生，第三成萬法，第四主光明。天上三十六，地下三十六，太玄無邊際，妙哉大洞經。歸命太上尊，能消一切罪。

東方玉寶皇天尊，  
 南方玄真萬福天尊，  
 西方太妙至極天尊，  
 北方玄上玉宸天尊，  
 東北方度仙上聖天尊，  
 東南方好生度命天尊，  
 西南方太靈虛皇天尊，  
 西北方無量太華天尊，  
 上方玉虛明皇天尊，  
 下方真皇洞神天尊。

道言：十方諸天尊，其數如沙塵。化形十方界，普濟度天人。委氣聚功德，同聲救罪魂。罪魂實可哀，我今說妙經。念誦無休息，歸身不暫停。天堂享大福，地獄無苦聲。火翳成清署，劍樹化爲鶩。上登朱陵府，下入開光門。超度三界難，徑上元始天。於是

飛天神王、無鞅數衆，瞻仰尊顏，而作頌曰：

天尊說經教，引接於浮生。勤修學無爲，悟真道自成。不迷亦不荒，無我亦無名。朗詠罪福句，萬徧心垢清。

爾時飛天神王及諸仙衆說是頌畢，稽首天尊，奉辭而退。

太上洞玄靈寶救苦妙經

宣和甲辰秋，池州城下景德禪院，有僧童莫道祖，偶緣母親傾逝，追慕不已，日誦本教經，薦擢用酬罔極之恩。至秋末，有太平州田功曹宣教，到院安下。每見功曹常以天樞法，救人疾苦，能追攝死魂，以詰升沈。道祖見其靈異，遂具狀申陳，乞行拯拔。其官人受狀，判押燒令神將去，即時追攝道祖母氏到壇前，問曰：你兒道祖，日夕誦經追擢，尚羈冥司，如何。母對曰：雖得吾兒道祖念經報薦，其誠志未孚。若作六六功德，幽冥普獲霑恩，妾即得超生。是時若男若女，數百餘人，咸罹痛苦。功曹復問曰：何謂六六。答云：

黃籙水陸。道祖泣告曰：自幼捨慈親，依棲梵刹，身計未成，何緣有力，爲大功果。母曰：不然。但志心轉誦，道教有《太上救苦經》，及持念太乙救苦天尊御號。冥司簡奏上天，功即應聲至矣。又曰：冥司限促，不敢久留。乃作禮謝而去。道祖即告功曹，求受《太上救苦經》及天尊號，日夜虔誠，兼而誦之，各積千徧，具疏焚化。是夜母

親見夢於道祖曰：汝今不負鞠育之恩，誦經持號，誠格高真，蒙上帝符命，我已得生天矣。自後無復見汝，汝宜自勉力，勿忘正教。言訖，乘雲冉冉而去。忠翊郎添差池州監押趙子休述。

（郭清點校）

# 051 太上洞玄靈寶天尊 說救苦妙經註解

經名：太上洞玄靈寶天尊說救苦妙經註解。宋元間道士洞陽子撰。一卷。底本出處：《正統道藏》洞玄部玉訣類。

## 太上洞玄靈寶救苦妙經序

夫學長生久視之道，在乎鍊炁養神，兼施並行。然鍊養之功，本乎一心，心能勤修，則學仙何患乎不得。《真誥》曰：仙者心學，奧哉斯旨也。僕夙慕修真，未逢上士，有果能明生死，達性命者，僕將跪履而問焉。比遊武夷西湖，與四明呂君邂逅，一見歡然，遂定交為煙蘿友，因俱載以歸，館于靜舍。呂君號洞陽子，蚤遇至人，刻意莊老之學，博極仙書，問靡不知。一

日謂愚曰：世有所謂《救苦經》者，實大洞之密旨，上道之祕言也。以其隱奧玄微，難窮妙理，所以傳自往古，而詮註未彰，思欲殫所蘊，發揮其義。未幾書成，滔滔萬言，首明一點，指慶雲祥煙為泰和，辯生門死戶為玄牝，分二炁之清濁，判三昧之火符，以泥丸仙明真性之所歸，還上天炁為命寶之所集，總談上道之樞要，粲然包括其中，不惟警未聞裨後學而已，抑亦使人洞明修鍊，默識天機，豈架空言銜虛文之比哉。噫，此經之妙道至言，晦久而未明，今日顯矣。夫天中之尊，演教法弘濟，所謂救苦者，非獨為幽魂苦爽而設，其所救者，普天之下生靈耳。蓋欲使人人體道，咸離迷途，湛壺天之朗徹，悟真性之無為，然後服天氣，盜虛无，結聖胎，通神明，使形與神妙，白日飛昇，是謂大丈夫越世表，出三界輪迴之難，始名真救苦耳。大矣哉，超死度生，無出是經，有遇斯解，留神不捨者，必見其得道矣。錦江葆真子周準謹序。

## 太上洞玄靈寶天尊說救苦 妙經註解

道神庵洞陽子註解

太上

太者至大之稱，上者尊崇之號。以其始乎太初太易之上，故曰太上。夫太易者，未見炁也，元始之初炁未之見也。太易變而為太初，太初者，炁之始也，先天元炁始見微芒。太初變而為太始，太始者，形之始也，漸有元炁之形矣。太始變而為太素，太素者，質之始也，元炁之形質具矣。太素變而為太極，太極者，混沌也，溟滓鴻濛，狀如鷄子，其中有精，彌綸無外，元炁凝而清濁未分也。太極既變則混沌開，而鴻濛裂，於是清陽之炁昇而為天，濁陰之炁降而為地。《易》曰：太極生兩儀，是也。兩儀生三才，即非濁非清，中和之炁，結而成人倫也。是謂道生一，一炁之混沌也；一生二，二儀之

清濁也；二生三，三才之人倫也，然後三生萬物。萬物始之於天地，天地不能自有，有天地者太極也；太極不能自生，生太極者太素也；太素不能自育，育太素者太始也；太始不能自孕，孕太始者太初也。未以太初，先有太易。夫太上者，謂始乎太初太易之上，是無大之大，故曰太，高出乎八極之表，故曰上也。又太者甚也，上者高也，言是經妙義甚高，則無以過矣。昔者聖人製此太字，其文從人從一從一點者，蓋人得一謂之大，大人能卓然獨存，常正此一點者，可與太上全體也。此一點亘古亘今，不生不滅，在道則謂之元神，在儒則謂之真性，在釋則謂之本來；在眼能視，在耳能聽，在鼻能嗅，在舌能嘗，在手能執持，在足能步履。以致語默動靜，千轉萬變，未嘗不因此一點而通靈也。是以老君之鍊養，養此一點而已；莊周之寓言，言此一點而已；周公仰思，思此一點而已；孔子之潛心，潛此一點

而已；如來之大覺，覺此一點而已；祖師之相傳，傳此一點而已。百姓日用而不知，外為聲色所蕩，內為嗜欲所汨，晝隨情愛，夜逐夢飛，念想攀緣，未嘗暫息，此一點不正，心影常偏，為情慾誘之，使出於外，故成大字，以言乎流浪輪轉，或為畜類也。夫上字之文，從卜從一。卜，度也；一，性也。卜爾之一性，能謙遜居下者，則為上士矣。江海以下百谷，則為百谷王；小國以下大國，則取大國。此孔子所以下漁父也。夫下人不精，不得其真，井雖千仞，汲之水上，是以聖人不降則不昇。故曰貴以賤為本，高以下為基。是知未嘗先人而常隨人，後其身而身先者，謙尊而光，此真人應世之道也。故曰卜爾之一居下，則為上士，其理昭然，卜爾之一性，若乃自矜自伐，自是自彰，而好居人上者，斯則下人矣。若夫體合太虛，廓然無我，所為一點者，內外俱忘，上下雙遣，斯則至聖之道，可謂自己三清，何勞

仰望，自己太上，何勞外求也。

### 洞玄

洞者通也，上通於天，下通於地，中有神仙，幽相往來。天下十大洞、三十六小洞，居乎太虛磅礴之中，莫不洞洞相通，惟仙聖聚則成形，散則為氣，自然往來虛通，而無窒礙。是以聖人遠取諸物，近取諸身。則人一身之中，亦有洞者。頭有九宮，上有寥天，共為十大洞天；柱骨二十四節，共十二重樓。共三十六洞，上通泥丸之九天，下徹尾閭之九地，中有真炁幽相往來。是以聖人於虛極靜篤之中，斡轉璇璣，神通炁洞，上與天通，所謂三宮昇降，上下往來，無窮者也。且洞之一字，從水從同，即是洞與水同也。夫巨海之水，八紘九野天漢之流，酌焉而不竭，注焉而不滿，渺渺漫漫，無垠無際，不可得而測其淵深也。故造道者，皆自麤至細，自細至微，微極而後至於妙，妙極而後至於玄，道之玄則無乎不通矣。故洞也者，以其幽深而不可

測也；玄也者，以其微妙而不可窮也。言是奧旨遠邈，深如洞玄，非玉虛之夙挺，其孰能通之哉。

### 靈寶天尊說救苦妙經

靈寶天尊即太上道君也。以身言之，靈者神也，寶者炁也，形者靈寶之宅舍也。夫人有耳目，乃元神之門，晝則心寤，神遊於耳，夜而目寐，則神歸絳宮。衆人視聽於外，則神遊於外，見聞聲色，動蕩乎中，神性化而為情，情受牽纏，故心有念，動有著，晝有想，夜有夢，齠然馳逐。馳逐於無涯之欲，百靈疲役而消散，宅舍無寶而崩頽。此皆用神於外，而不能守之於內者也。若夫至人，萬法俱忘，惟神是守，目內視而神光煥於玉闕，耳返聽而妙韻響於瓊房，神宇泰定，一念不生，智恬交養，久而道靈，上際於天，下蟠於地，六通四闢，妙用無窮，造化莫移，陰陽莫測，故能駕景乘飈，登真合道，莫不由於神性者也，得不謂之靈乎。夫人有鼻口，乃命寶出入之戶，息息通

於天地，元炁之所往來，凡一呼則穀炁出，一吸則元炁入，不死之機，長生之要，實隱於此矣。衆人心靈外馳，情躁炁促，息之以喉，胎元蕩散，真炁凋零，炁竭命終，可不惜哉。惟至人深達造化之源，呼吸太和之炁，奪本還元，歸根復命，息之以踵，寶莫寶於炁，達斯理者，泥丸玉闕所以棲其神，玄門牝戶所以襲其炁，炁以制神，神以攝炁，母子相守，性命混融，然後萬神不散，故能靈，一炁凝結則成寶，是謂一身之靈寶也。夫衆生之苦，莫大於輪迴生死，天尊大慈，演說洞妙，開滯塞之門，指光明之路，解悟之者，得脫生死，永免輪迴，故曰救苦也。經者徑也，常也，欲令上學之人依此徑路常行之也。

### 爾時救苦天尊，

天尊則元炁是也，法身無相，積炁成真，為天中之尊，聚則成形，散復為炁。

### 徧滿十方界，

元炁大無不包，細無不入，在谷滿

谷，在坑滿坑，彌滿八極，無往不在，故曰徧滿十方界。

### 常以威神力，救拔諸衆生，

夫威神力莫大於元炁，元炁之運，獨秉造化之權。衆生者所謂胎卵濕化之四生，至於花卉草木，禽獸魚鼈，蠕飛蠢動，有情無情，皆含育元炁而生，故元炁在則柔弱滋養而生，元炁去則堅強枯槁而死。老子曰：柔弱者生之徒，堅強者死之徒。凡有貌象聲色者，皆物也，悉得元炁而後生，故曰救拔諸衆生。

得離於迷途。衆生不知覺，如盲見日月。

衆生耽染聲色嗜慾，因於迷途之中，殊不知魚在水中，水在魚中，人在炁中，炁在人中，魚失水死，人失炁亡。吞舟之魚碭而失水，則蟻能苦之，故曰魚不可脫於淵，人不可離於炁，魚能吐納而化水則不死，人能吐納而化炁則長生。舉世但知日食穀肉果菜以養命，而不知穀肉果菜乃戮形之物也，夫有故以其有形者屬於陰，

乃土地之精也，惟元炁屬陽，且人一呼則炁出三寸，一吸則炁入三寸，一呼一吸為一息，一日一夜一萬三千五百息，真炁計八百一十丈，昇降於鼻口呼吸之間，凡夫不能掌握，皆歸空而散，則一息不返，人命卒矣。此經有養炁留神不死之訣，世愚不達其旨，譬如盲者雖有日月之大明，莫能見之，故曰如盲見日月。

我本太无中，拔領无邊際。

元炁在太空虚无之中，其猶橐籥噓張不息，以其無有，能入於無間，故曰有而无形，無而有精，失之則死，得之則生。亘古通今，得道昇仙者，莫計其數，皆得冲炁以為用始成真，故曰拔領無邊際。

慶雲開生門，祥煙塞死戶。

一經之眼目，救苦之樞機，在於此也。慶雲祥煙乃太和妙炁之異名，生門死戶乃玄門牝戶之列號，或曰天門地戶，或曰乾坤門戶，凡言門戶者，必有物從茲而出入也。開者闢也，闢者塞也，易曰闢戶謂之坤，闢

戶謂之乾，一闢一闢謂之變，往來不窮謂之道，天地所以能長且久者，以此也。人欲長生久視，與天地齊其年，當於生門死戶之中，窮通塞之端，究造化之妙，使通天地陰陽二炁，往來昇降之不窮，謂之出入月，亦曰出清入玄也。不遇至人所指，非碩學之所能聞，以其性須自悟，命假師傅也。僕曩承師旨決以淵微，輒將太上不泄真機顯露聖訣，學者宜精究之，訣曰：

生門死戶兮千般異呼，一曰朱淵兮一曰神廬，下士不達兮鼻吸口吐，上仙樞要兮萬類莫如，慶雲祥煙兮既昇且降，開通充塞兮雲英紫腴，採集素英兮飛空之景，炁來入身兮味勝醍醐，像龜引息兮通靈不死，效蚌吸月兮涵養結珠，天機斯泄兮遇者祕密，功成輕舉兮駕馭瓊輿。

初發玄元始，以通祥感機。

大道始初發生乎一炁，一炁初為玄元始三炁，故曰初發玄元始。三炁結而為三清，三色混沌，煥爛太空，

三炁復各生三炁，疊三成九，即成九霄，而為九天也。《生神章》云：須延總三靈，玄元始炁分。《黃庭經》所謂三炁右迴九道明，又曰九炁映明出霄間，即是三炁為天地之尊，九炁為萬物之根。人能採鍊玄元始三炁之炁，通感祥煙慶雲之際，是謂得造化之樞機，故言以通祥感機。

救一切罪，度一切厄。渺渺超仙源，蕩蕩自然清。皆承大道力，以伏諸魔精。

一切罪莫大於死罪，一切厄莫大於死厄，人死雖有萬殊，總歸三路，聖人死之曰神，賢人死之曰復，衆人死之曰物。何謂聖人死之曰神，聖人養聖胎於神室，身内生身，陽神脫質，死而不亡，脫胎神化者，謂之神仙也。何謂賢人死之曰復，賢人在世，不與物交，性無所著，以生為寄，以死為歸，歸者復也，精神入其門，骨骸返其根，我尚何存，蓋能虛諸所有，而神識靈明出乎物外，輪迴不入，陰官莫拘，儵然自在，雖南面王樂，亦不及也，明心達性，賢人君子，

禪伯之流，超證真常，永無係累，稍或見地未明，修為有缺，著於談空，滯於觀想，終則謂之陰靈苦爽鬼仙是也，或欲出世，則能奪舍投胎。何謂衆人死之曰物，衆人在世，魂夢念想，常與物交，不能外物，安出物外，故命將絕時，形神不能相離，如生龜脫殼，螃蟹入湯，疼痛苦楚，萬狀千般，既死之後，境界黑暗，猶如夜半之禽飛，懵然妄投，不知所歸何地，在造物之陶鑄，隨業識以受生，或化異類而不自覺，蓋心之所化而不得不化也，亦猶至暴者化為猛虎，至淫者化為婦人，或為傍生六畜禽蟲之類，及再得為人，皆謂之物也，故曰衆人死之曰物。若人臨終之時，諸處俱冷，惟頂門尚自溫暖者，此人得道，徑歸淨域。諸處俱冷，心頭尚溫，再得為人身。不慕修道，惶惶汲汲，奔逐利名，沉滯聲色，日復一日，如牽牛羊赴於屠肆，步行一步去死轉近。未死之前，可不速求至道，勤而行之，成真度世，求免生死之罪

厄，故曰救一切罪，度一切厄。道成則名刊金籙，位列仙卿，玉女麾幢，仙童鼓節，逍遙上清，上上渺渺，大羅之鄉，諸天梵炁，蕩蕩至清，故曰渺渺超仙源，蕩蕩自然清。佩符則千魔喪膽，流金則萬精滅形，故曰皆承大道力，以伏諸魔精。

空中何灼灼，名曰泥丸仙。

空彼萬法，而妙用在中，故曰空中。內景煥爛，返視獨見，故曰何灼灼。泥丸在兩眉間直入三寸，為腦血之瓊房，魂精之玉室，百靈之命宅，津液之山源，一名上一赤子，乃形軀之上神，故曰泥丸仙。

紫雲覆黃老，

金木之炁，青白交會，則化碧霞，水火之炁，黑赤既濟，則化紫雲。夫受鍊形質，莫先於真水真火也，真水非涕唾津液谷炁，所以化之濁水，在乎採太和，妙炁之中自有真一之水，謂之玄泉，要當明其水源之清濁也。火本無形，因物而生，用無法則禍發必克，仙家行火，亦有數等，用之則

滅屍鍊魄，體變純陽，則有符數契合周天日月之躔度，皆口口相傳，難書竹帛。仙彥有之曰：神仙祕易不祕難，聖人傳藥不傳火。夫行水不行火，則氣難上騰，行火不行水，則不能薰蒸，是以水火既濟，而氤氳炁乃化為紫雲，神聚處氣必朝之，故紫雲蒼鬱，上朝於泥丸，覆蓋於中央黃老君，故曰紫雲覆黃老。

是名三寶君。

三寶君者，因神炁精凝化而有也。神有陰陽，炁有清濁，精有逆順。何謂神有陰陽，若因存思念想而後通靈者，亦能出入天門，預知未然，謂之陰神也。若夫積陰陽之炁，結而成祥身內生身胎仙舞蛻者，是謂陽神也。陽神為仙，陰神為鬼也。何謂炁有清濁，天有形質，含血氣者穀肉果菜之類，滋地根而生長，其字從死從火，是謂谷炁，亦名地炁，故曰濁也。夫太和妙炁生天生地，神鬼神帝，強名為道即炁也，炁即道也，視之不見，聽之不聞，搏之不得，無



形之形，無物之象，透金貫石，充塞八荒，其字從死從火，火陽也，乃虛无之中清陽之炁也。積陰炁者則死，服陽炁者則生。何謂精有逆順，順則成人，逆為丹母，斯皆行火而有昇降也。凡夫婦之接名為劫火，亦通三關而透尾間，故順出則成人，若乃提縮金龜，是謂文火，閉息而行，是謂武火，契合日月，謂之符火，故仙人道士開金鎖，徹玉關，運璇璣，斡日月，金精貫頂，銀浪衝天，是謂汭流，故曰逆為丹母也，順則形斃，逆則骨堅也。夫人有眼目者，乃神之門，鼻口者炁之戶，尾間者精之路，神微妙用天真聖功盡隱於此矣，於是至人內視返聽凝其神，呼吸太和襲其炁，逆運流珠聚其精，三寶凝積於神室之內，皆化為神，故曰是名三寶君。

還將上天炁，以制九天魂。

人頭有九天亦曰天谷，魂神居之黃庭，所謂上有魂靈下關元是也。形好食味，神好食炁，天炁乃陽神之飯

食也。《生神章》云：魂生攝遊炁，飄飄鍊素華。夫信遊炁者乃上天炁也，魂神所攝者蓋好食炁，而故以上天之炁制於九天魂也，神不得一炁以制之則不能靈，谷不得一炁以充之則不能盈，神無以靈而將恐歇，而神去於身矣，谷無以盈將恐竭，而天谷空虛矣，谷神既逝，則人命終矣。昔之未遇元炁，蕩蕩而去，今既明真，去而有所復來，故曰大還也，還將上天之炁以制九天魂神，始得其谷神不死，故謂神得一而靈，谷得一而盈。

救苦諸妙神，善見救苦時。天上混无分，

夫修上道，要在全神，神全之士，光而不耀，蒙以養正，故能復太朴，抱虛恬，混成獨立，一性遊乎寂寞靜極之境，不萌纖芥之知，故其神不離，不起毫釐之念，故其神不散。蒙莊曰：其天守全，其神不却，守其天者神光纏綿，化生萬神，故曰諸妙神也。凡言救苦者，自救之也，苦不自

救，孰能救之，我道將成，則大浸稽天而不溺，大旱山焦而不熱，死生無變於己，而況大數大劫之死乎，超越厄難之外，故曰善見救苦時也。所謂迴風混合帝一之道，一混百神於自己天上而不可分，故曰天上混无分。

天炁歸一身，皆成自然人。

夫天炁者起於太易之先，超乎萬象之外，應清明以出入，佇神機以卷舒，澄清碧於高天，淡輕紅於落日，不干風雨，不犯塵埃，呼吸玄牝之門，澡雪希夷之域，止飢渴，除滓穢，去三尸，消百病，此乃清虛有道之炁也。玉皇神用祕訣曰：知至道者天不殺，服元炁者地不滅。能明吐納之理，即使日霞日精月華月英三素五芽元皇正炁來合我身，此皆天炁也，太和入體則骨肉輕清，項生圓象，隱顯自然，始能為自然人也，故曰天炁歸一身，皆成自然人。如起於不潔之地，因於燥濕之處，雜腥穢之飲饌，混屍塚之蒸鬱，斯乃濁惡沉

滯之死炁，仙道忌焉，所以仙人多樓居者，以其近天炁也。《黃庭經》云：至忌死炁諸穢賤。自然有別體，本在空洞中，空洞迹非迹，徧體皆虛空。

老子曰：天法道，道法自然。天道猶法於自然人也，可不體之哉。夫無身之身，本來赤子，自本自根，自古以固存。老子曰：湛兮似若存，吾不知誰之子，象帝之先。此所謂別體也，且夫腦宮圓虛而適真，是以帝君居之，故泥丸為空洞之府也。《黃庭經》云：問誰家子在我身，此人何去入泥丸。正言此爾。所以守神者攝動心也，守神不失，與神為一，則忘其所守之跡矣，故曰空洞迹非迹。一之精通，超乎萬象之表，神遊太漠真空之境，則廓然徧體皆虛空也。

第一委炁立，第二順炁生，第三成萬法，第四主光明。

列子曰：生非我有，是天地之委和也。察其始也，本無我體，因委天地

父母二炁而立，故曰第一委炁立。知夫此身乃炁之所生，不當暴逆其炁，使之夭闕，急宜運天炁以歸身，使綿綿而不絕，胎息歸根，順受其炁，自然久視，故曰第二順炁生。夫至人者提挈天地，把握陰陽，宇宙在乎手，萬化生乎身，能使形化於炁，所以無窮，炁化成神，神之所以無盡，神化合道，道合自然，以法入道，法固易達，以道入法，法固易成，一法苟得，則萬法俱成，故曰第三成萬法。道成則頂負圓象，身有光明，故曰第四主光明。又《五經提綱》云：救苦妙經本於青霄隱書，蓋鍊度之祕文也，經中綱領有四，其要在於主光明而已。一曰委炁立，蓋元始以一炁分判天地，運化陰陽，為萬物之本，周子所謂太極動而生陽，靜而生陰，陽變陰合，而生木火金水土者，此也。二曰順炁生，蓋天地既判，陰陽既立，則人受其冲和之氣以生，周子所謂二五之精妙合而凝，乾道成男，坤道成女，萬物化生者，此也。

三曰成萬法，人道既立，必有聖賢出於其間，陳綱紀，立制度，謂之正德，利用厚生，而後人道不窮焉，子思子所謂修道之謂教，亦此意也。四曰主光明，光明者性體也，主云者奉之如君也，人能奉此光明，常為一身之主，動靜語默，皆聽命焉，自然靈臺之間，軒豁洞達，物莫能蔽，而道體全矣，《中庸》所謂尊德性，《大學》所謂在明德，莊子所謂真君，皆指此也。夫此光明，人人具有，不為堯存，不為桀亡，不為顏增，不為跖減，操之則賢，捨之則愚，得之則昇天堂，失之則沉地獄，凡地獄中燒煮屠割苦毒萬狀，皆失此光明也。天上三十六，地下三十六，太玄無邊際，妙哉大洞經。

斯言三洞三乘三十六部尊經也，元始天尊於龍漢元年出洞真十二部經，演九聖之道，太上道君於赤明元年出洞玄十二部經，演九真之道，太上老君於上皇元年出洞神十二部經，演九仙之道，計八千餘篇，結飛

玄之炁，五方紫篆，煥於太霄，八角垂芒，耀於碧落，天真皇人按筆書之。三十六部祕於上天紫微金闕，无極高真與十神五老共相翊衛，元始天尊與諸天上聖皆月三朝其靈文，未傳下世，故曰天上三十六。元始復以三十六部祕於龍宮，以鎮海嶽洞天，故曰地下三十六，乃太玄无邊際，妙哉大洞經也。愚暗臆揣，或云陽數四九，陰數六六，或云七十二候之說，殊乖玄旨，何昧如斯，蓋上乘經典，未嘗言於術數。

歸命太上尊，能消一切罪。

歸神歸命於太上，蓋言不可須臾離道也，須臾不離於道，則神明護之，大福隨之，動與吉會，何罪之有。

東方王寶皇上天尊，  
南方玄真萬福天尊，  
西方太妙至極天尊，  
北方玄上玉晨天尊，  
東北方度仙上聖天尊，  
東南方好生度命天尊，  
西南方太靈虛皇天尊，

西北方无量太華天尊，  
上方玉虛明皇天尊，  
下方真皇洞神天尊。

道言：十方諸天尊，其數如沙塵。化形十方界，普濟度天人。

十方天尊即十方靈寶天尊。凡有道言二字，即道君所言。此經乃靈寶天尊所說，即是萬天之宗師，三界之醫王，太上大道玉宸君，居上清真境，治藥珠日闕之內，化形為祥光瑞炁，流布十方之界，普度於天人。夫天人者，謙恭博施，仁德寬容，虛恬柔靜，相貌為和，愛敬師友，聞道篤信，此為有天人資質，天尊則化身下降，授以上道，濟度成真，故曰普濟度天人。若夫根器濁惡，不持戒行，性耽謠殺，聞道大笑者，此為同於失者也，非道負人，人自負道。

委炁聚功德，

列子曰：凡炁聚則生，炁散則死。知炁聚則生，人不能禁也，知炁散則死，人不能止也，元炁既無禁止，則是命屬造物而不屬於我也。至人得

其樞要，能掌握呼吸之息，息之出入，由吾掌握，則是我命在我，不屬於天。俗嘖所謂將息者，實仙真流傳，點化凡愚之聖語也，孰能悟之。悟之者自能將其息而使不散，則自然委和之炁鍾聚於一息，久而積功累德，自然成真，故曰委炁聚功德。

同聲救罪人。

老子曰：同於道者，道亦得之。若乃勤求師門，耽味至理，研窮典誥，一心念道，用志不分者，是之謂同聲相應，同氣相求，始可與言至道，而救度之，故曰同聲救罪人。

罪人實可哀，我今說妙經。

夫人受生胞胎之中，綿綿十月，母呼亦呼，母吸亦吸，炁足神備，解胎而生，驚天駭地，而得為人，謂之嬰兒，嬰兒之心，但貴食母之乳，餘無所知，此乃含真抱朴之時也。既生百日，為物所誘，情見於外，俄而能笑，則變嬰以為孩，自此乃為喪道失朴之始也。然後十五為童，二十弱冠，目眩五色，耳惑五音，七情奪其性，

六慾汨其真，純樸蕩而盡矣。一日一夜，萬死萬生，驅役魂神，不閉一息，此乃處世之人，生身受罪於無間地獄，湮淪汨沒，無有出期，苟非得道，孰能免離，若此罪人，實可哀也，是以天尊大開救苦之門，廣闡微妙之典，三清聖域，坦然可歸。

### 念誦無休息，歸身不暫停。

一念在道而不休誦，究仙經而不息念，誦既無休息，則淵明奧蹟，契合自然。《內觀經》曰：炁來入身謂之生，神去離形謂之死。是以聖人盜採天炁，歸乎一身，聖功冲用，三返晝夜，不欲暫停，故曰歸身不暫停。

### 天堂享大福，地獄無苦聲。

天仙不離於天，神仙不離於神，地仙不離於地，藥石仙不離於服餌藥石，鬼仙不離陰靈之鬼，此皆所行之道類使之然，亦猶水之就濕，火就燥，雲從龍，風從虎也。上學之士凝神鍊炁，復命歸根，體變純陽，身超塵劫，至於咀嚼朝霧，嚙嗽沆瀣，二景纏絡，六炁臻身，呼吸大梵之雲英，

妙用悉享於天厨，自然長生，歸於天堂矣，故曰天堂享大福。不食百穀之實，土地之精，故身不死，歸於地而無淪墜之苦，故曰無苦聲。

### 火翳成清署，

火翳者南方地獄之名也，衆生常為慾火焚心而色翳目，故曰火翳。觸目動心，地獄即現，既悟真詮，性天朗徹，一念湛然，所謂火翳者皆化為清淨之域也。

### 劍樹化爲騫。

劍樹乃地獄名也，衆生競名利，爭人我，與物相刃相摩，交談如矛戟，對面如寇讎，見受劍樹之獄也。至人體道，含洪光大，為而不爭，胸中之荆棘悉化玉樹騫林也。

### 上登朱陵府，下入開光門。

此言行火也，心為朱陵府，謂之上昧君火，閉息宴坐，以心引之，則無乎不焚。腎為玄冥府，謂之中昧臣火，昇腰脅腹，閉息行之，則無乎不達。膀胱謂之三昧民火，提動機關，金龜吐燄，則無乎不昇。鍊上屍則火炁

騰陟於絳宮，故曰上登朱陵府，焚下屍則火炁透徹尾間，故曰下入開光門。

### 超度三界難，

世之人頭頂欲天，足履欲地，身處欲界，輪轉於六欲業輪之中，無有休息者，不忘於欲也，能常無欲，則三界輪迴之難頓超之矣。

### 徑上元始天。

元始天即玉清聖境也，上道既成，神昇玉清，位為真人，出則諸天侍軒，萬神備衛，高出乎太清上清之真也。於是飛天真人無鞅數衆，瞻仰尊顏，而作頌曰：

人之頂骨八片，謂之八天，亦曰八門，中有金樓寶殿玉闕紫房，自己無相，真人總領，萬神居之，道成則神光內燭，天門自開，嬰兒蛻質，於是真人飛從天門而出，故曰飛天真人。身中之千真萬靈，即無鞅數衆也。《度人經》曰：上開八門，飛天法輪。《生神章》云：慶此嬰兒蛻，正此謂也。神昇玄都，上朝虛皇，故曰瞻仰

尊顏，而作謠歌，頌詠大聖之德也。  
天尊說經教，引接於浮生。

天職覆，地職載，聖職教化，天尊所以廣敷經教，接引浮世衆生者，乃聖人之職也。

勤修學無爲，

無為為之之謂道，無為言之之為德，天無為以清，地無為以寧，二無為相合而萬物生，人安得無為哉。故曰恬淡寂寞，虛無無為，此天地之平而道德之質也，勤修上士，絕學高人，能依無為，是配合天地之平準，符契道德之質實，不亦大哉。

悟真道自成。

悟其真者，始覺萬緣俱假，惟道是真，抱守其真，自然成道。

不迷亦不荒，

世人迷於名利情欲，荒於聲色滋味，迷之又迷，以至於荒，荒者言其神不明，而心靈逐物，蕩蕩逝去而不返也。老子曰荒兮其未央哉，決以言其未嘗守中也。夫至人履乎平易，踐乎恬愉，澹然獨與，神明俱視，天

下皆為塵勞妄幻，風燈聚沫，露電泡影，既不堅久，無足傾戀，入乎泰定真常之域，一念不生，萬緣俱息，至此境界，何荒迷之有哉。

無我亦無名。

不尚賢能外其身而虛己以逝世，故曰無我。道常無名，是以聖人韜其光而隱其身者，恐其道未成而名勝於實也，名者實之賓，虛名出而道德備矣，故曰繩繩兮不可名。莊子云：神人無功，至人無己，聖人無名也。

朗詠罪福句，

揚教化也。

萬徧心垢清。

精研聖典，靈府虛明。

於是飛天神王及諸仙衆，說是頌畢，稽首天尊，奉辭而退。

飛天神王乃我本來之帝真也。夫神通變化，衆而為一，不為不足化而為萬，不為有餘，及諸仙衆，則自己之萬神也。稽首天尊，永遵依大道也。奉辭而退，復歸於無極也。

太上洞玄靈寶天尊說救苦妙經註解

（汪桂平點校）

## 052 太一救苦護身妙經

經名：太一救苦護身妙經。撰人不詳，約出於唐宋間。言念誦救苦天尊祈求護衛。一卷。底本出處：《正統道藏》洞玄部本文類。

爾時元始天尊在玄景之上清微天中九色玉堂，昇七寶座，放大光明，普集萬靈，與天教化。十方天尊、道君、老君、帝君、元君、丈人、聖人，萬萬仙衆，俱來詣座，聽宣妙法。於是梵王稱善，帝釋欣歌，仙樂自響，隨光而至。是時太上老君身離玉座，步躡蓮花，真人侍於左右，玉女扶於曳裾，至天尊前，奏曰：臣等蒙師開化，受福天堂，施功無極，恩不可量。臣觀三界之中、苦海之內，無量衆生，橫遭厄難，罪網牽纏，異類羣情，難逃生化。臣不可住

於太清，欲仗威光，分身三界，救度羣情。惟望至尊，觀心慈愍。

於是元始天尊微起法身，告老君曰：善哉善哉。汝離玉座，驚怖萬天，救苦救生，不須汝言。可還座中，吾爲宣說。

天尊曰：萬物吾生，萬靈吾化。遭苦遭厄，當須救之。不須汝威力化身救度。此東方長樂世界有大慈仁者，太一救苦天尊，化身如恒沙數，物隨聲應，或住天宮，或降人間，或居地獄，或攝羣邪，或爲仙童玉女，或爲帝君聖人，或爲天尊真人，或爲金剛神王，或爲魔王力士，或爲天師道士，或爲皇人老君，或爲天醫功曹，或爲男子女子，或爲文武官宰，或爲都大元帥，或爲教師禪師，或爲風師雨師，神通無量，功行無窮，尋聲救苦，應物隨機，今告汝知。

老君重奏曰：此之威神，有無量變化，如何得至我師御前。

天尊告老君曰：汝可舉聲唱太一之名，使仙官齊詠，自然應化現身。

於是老君衆仙等，遵其教旨，齊聲稱詠太一救苦天尊之名。忽見帝君班中有童子一人，步步躡於蓮花，稽首至天尊前奏曰：臣乃太一，爲我師開化說法。臣集相聚形，聽宣妙音，天中快樂一時，地下動經萬劫，三界之中，羣生受苦，高聲叫喚，苦哉苦哉。旋遶天尊，禮拜俯伏，乞下天關。於是衆仙見童子奏對泣淚滴衣，哽噎嘆言。天上快樂，地下受災，輪迴報對，何時清閑。

天尊告太一曰：汝行願慈悲，衆生受苦。依汝行願，分身救之。童子喜笑，再拜而退。衆仙觀見童子化一天尊，足躡蓮花，圓光照耀，手執柳枝淨水，九頭獅子左右從隨，乘空而去。又見天尊化一帝君，足躡蓮花，手執如意，圓光照耀，九頭獅子左右從隨，乘空而去。又見帝君化一真人，足躡蓮花，手放神光，上通九天，下通九地，九頭獅子左右從隨，乘空而去。又見真人化一女子，身著火錦襯衣，披髮跣足，躡於蓮花，手執金劍，圓光照耀，九頭獅子，口吐火焰，遶於身形，乘空而

去。

老君奏天尊曰：此聖威德，變化救生，從何而有，甚劫修行，惟願應機，為衆宣說。

天尊曰：此聖在天呼為太一福神，在世呼為大慈仁者，在地獄呼為日耀帝君，在外道攝邪，呼為獅子明王，在水府呼為洞淵帝君。汝是吾之氣，吾是汝之根，汝知吾知，此是九陽之精，甚靈甚靈。汝可祕之，不可盡述。是時老君聞天尊言，閉目定神，彈指叩頭，呪曰：

元元之祖氣，妙化九陽精。威德布十方，恍恍現其真。三九揚風出，徘徊離始青。恭敬生瓊液，奉之免渴饑。萬靈當信禮，八苦不能隨。積行持科戒，提携證玉京。

爾時天尊重告老君及諸仙曰：若有衆生，時遭疾疫，病痛纏綿，可以焚香念誦聖號，看轉此經，疾患退散，克獲安寧。若有衆生求官覓職，姦佞妄生，但當念誦聖號，看轉此經，自然嫉妬不生，高遷祿秩。若有衆生泛涉江

海，波浪所驚，魚龍欲傷，可以存思念誦聖號，使得達岸，無有害傷。若有衆生值雷霹靂，風雨驚怖，但當存思念誦聖號，神氣爽清，魂魄不動。若有衆生父母師資，六親不和，兄弟乖疏，但當存思念誦聖號，看轉此經，自感六親和睦，父慈子孝，兄友弟恭。若有帝王國

主，朝生叛臣，兵火作亂，風雨不調，萬民塗炭，怨地尤天，但當持齋念，看轉此經，風雨便得順時，叛臣敗露，國泰民安。若有衆生為邪精鬼賊，妄來所傷，但當存思念誦聖號，妖魅自止，鬼賊滅亡。若有衆生山林往來，被蟲蛇禽獸奔奪所傷，但當存思念誦聖號，禽蟲自退，不敢來害。若有女人懷受胎

孕，臨產艱難，但當存思念誦聖號，自感真氣佑護，無痛無傷，便生智慧之男，有相之女，六根具足，母子團圓。若有男子女子慕道求仙，在家出家，養性養命，但當存思念誦聖號，看轉此經，便得功行圓滿，白日昇天。若有衆生頻遭枷鎖牢獄之中，呻吟難訴，但當存思念誦聖號，便得解脫，出離囹圄。

若有衆生為七祖九先、門人同學、夫妻男女身歿之後，流滯寒庭，未得託生，但當存思念誦聖號，自然出離陰境，便得生天。若有衆生為冤家牽引，復連相纏，但當存思念誦聖號，冤家解釋，後連斷除。

於是天尊告老君曰：此聖最尊最貴，最聖最靈。每月三九日，多降人間。常於淨室中，焚香禮拜，柳枝淨水，時花藥苗，如法供養，自然壽滿一百二十，五福常臻，八難遠離。切忌竈下灰燼，石榴穢物，此為不潔，勿令觸之。

爾時天尊說經畢竟，大會之中羣仙唱善。獅子能語，鳳凰能言，魚龍成人，枯朽還生，蠢動含情，福資皆徧。巍巍堂堂，皆得昇仙。於是道君、老君、無量衆真，同聲讚嘆：今聞妙音，大獲利益。奉辭而退。

太一救苦護身妙經

（郭清點校）

# 053 太上救苦天尊說消愆滅罪經

經名：太上救苦天尊說消愆滅罪經。撰人不詳，約出於唐宋間。言修齋行道消災滅罪。一卷。底本出處：《正統道藏》洞玄部本文類。

爾時救苦天尊設大慈悲，為諸衆生滅除一切罪業，救拔沈淪，即令修齋布施，廣建功德，大起福田，召請天龍地祇，四梵天王，阿修羅王，諸天帝主，閻羅天子，泰山府君，司命司錄，五道大神，獄中典者，各恭敬禮拜，稽首叩額，上白天尊曰：緣以世間衆生，受諸果報，並是大魔王管攝罪簿。若有閻浮國土十惡五逆，不敬父母，破齋犯戒，烹宰猪羊牛馬六畜，飛禽走獸之屬，種種之罪，一切罪人，身歿之後，皆

入九幽地獄，日夜受苦，無由解脫。若以廣修功德，設齋布施，積劫拷掠，繫閉牢獄，無獲生天。

爾時天尊曰：汝等衆生，諦聽吾言。或有世間男子女人，父母眷屬歿亡之後，宜建道場，修齋行道，散施資財，修功幽府。

- 一七秦廣大王太素妙廣真君，
- 二七初江大王陰德定休真君，
- 三七宋帝大王洞明普靜真君，
- 四七五官大王玄德五靈真君，
- 五七閻羅大王最勝耀靈真君，
- 六七變成大王寶蘭昭成真君，
- 七七泰山府君玄德妙生真君，
- 百日平等大王無上正度真君，
- 小祥都市大王飛魔演慶真君，
- 大祥轉輪大王五化威靈真君。

爾時天尊曰：汝等衆生人民死亡之後，沈淪地獄，因斯善會，皆得超生自然，地獄虛閑，滅除罪業，苦惱辛酸。天尊乃詔命左司陽官、右司陰官，較量功德，勒酆都二十四獄考官典吏，放出受苦一切孤魂滯魄，咸令登火鍊之池，

各執化形丹界靈符，盡獲更生之因，俱歸道岸。

天尊言：汝等衆生受苦罪人，得斯拔度，皆獲超生。汝等衆生，各各諦聽，吾當為汝說偈誦曰：

酆都夜壑，忽以光輝。照出幽魂，來飴香糜。靈符火鍊，百骸自飛。得見法會，仙岐知歸。

又誦曰：

萬劫難遇，功緣可崇。開闢幽趣，全假真風。梯航彼岸，濟惠無窮。念生因，駕景飛空。

是時衆等聞說偈言，咸皆解脫，各各稽首，奉辭而退。

太上救苦天尊說消愆滅罪經

(郭清點校)



# 054 太上三生解冤妙經

經名：太上三生解冤妙經。撰人不詳，約出於唐宋。勸人誦經解冤。一卷。底本出處：《正統道藏》洞玄部本文類。

爾時尋聲救苦天尊，與諸侍從巡遊十方世界，化度衆生，出離苦海，令歸正道，不入邪宗。觀見西方於內一國王，號淨梵。此國人民多生淫殺，不造善功，多沈地獄，多失人身。念彼衆生，遂即化身下降。其國王夜夢神報，來日天真自東而至，何不迎之。王心不寐，坐而待旦，詔衆大臣、后妃天親，及諸市民，遠離本所，迎接天尊。至於城西，有一大園，樓閣嚴整，花太繁盛。是時天尊在七寶殿內金龍座上，天童侍衛。國王大臣、后妃天親，及諸市民，座下圍繞，觀聽演說正一妙法。

俄然瑞氣盈園，天花交散，大衆驚異，喜悅難言。時有皇后及諸貴妃，燒香拜禮，跪而告曰：弊居小國，愚魯之邦，未嘗得聞如斯高玄妙道。今日遇值，深爲幸矣。有少短意，欲訴道前，伏願洪慈，特賜允許。

天尊曰：汝有何言，盡心而說。皇后告曰：今王年老，子嗣未立。先有所懷，數月之中，遂致損落。其或月滿，所得男女，或一歲二歲，或三歲，或五歲之間，即便死亡。未知前生今世何罪，致得如是。若蒙哀愍，則仰受訣言。

天尊曰：是汝前生之中，懷孕不慎，殺落其胎。兒女心內憎嫌，故得今身如此之報。恐汝不信，吾今攝此冤魂，汝當親問。天尊指處，皇后視之，見一夜叉，面如葉藍，眼如怪星。指皇后而言：前生之時，我受陰注，投你爲母。你身年幼，全無惜護，隨性作爲，因此不慎，殺落我身。今欲還報，緣汝前世生居中國，敬奉天地日月星辰，勤侍翁婆，孝順父母，欽崇三寶，至重善人，塑像造經，略無慳惜，蓋殿修壇，竭

力施爲，憫憐困苦，濟惠貧寒，積此善功，今生證爲小國之后，若非此福，我即殺你，料應多日。皇后聞言，心神懼怕，戰戰兢兢，拜跪道前：我有先身，曾作如是，今日雖知，悔之何及。伏望天尊略示方便，捨自己之財，盡爲布施，願求解釋。

天尊曰：善哉善哉。汝雖前生建大功德，廣作福田，即知不曾懺悔身中之冤結。吾昔於正一天尊，受《三生解冤妙經》，汝當隨吾精心誦之，冤業自消。夫人稟天地而生，構陰陽而成，三月之外，始分男女，可保而不可傷，可養而不可害，命與大人一體無異。誤損有落，便成冤債。一日造冤，三世報還，豈不怖哉。迷昧衆生，倚恃年壯，懷孕之時，全無將護，恣意而行，登高跳下，負重急走，或跨騎勞形，或陰陽不慎，或撞或隱，或搦或按，或撲或揉，或服藥而損，或針刺而傷，或餐毒魚惡肉，或喫硬物冷漿。如斯等事，妊孕多傷。或是自作，或教他殺害之因，焉能盡說。前生所作，今身還報。致使懷

孕多病，疼痛纏綿，飲食減少，行立艱難，皮膚腫破，腰似錐鑽，巴明盼夜，一日如年。受此痛苦，嗟至月足，臨產多般，或連日不分，或橫逆不順，親姻恐懼，眷屬憂惶。當此之時，冤家來害，苦痛非常。或母活子死，或子活母死，或子母俱亡，皆為橫夭之魂。若得託生，依前再受，若未託生，纏害親姻。若遇此經，志心持念，一切冤業，盡總消除。即說呪曰：

晨昏運度，耀明古今。萬類受稟，結化成形。冤業悞染，三世相侵。正一之氣，解免冤魂。聞之即散，聽之離分。天丁甲卒，扶護無傾。速生速免，各得安寧。元皇符命，時刻不停。急急如律令。

是時念經七徧，夜叉座前拜謝天尊：我今承斯功德，徑往中土，託生富貴之家。拜謝而去。衆人聞之，皆大歡喜。

天尊曰：此經非獨解一人之冤結。汝等各發誠心，誦經百徧，一國之人，應有冤結，悉皆解脫。于會下言，

同聲誦之。至於百徧，驀見陰雲四布，黑霧之中，瑞氣垂空，諸多類拜而言：我等特蒙天慈，降賜經法，一國冤結，已生未生，罪無輕重，咸皆解脫。倏忽之間，雲收霧斂，天氣朗清，人民歡慶，讚謝天恩。衆等告曰：然賴道力，普得濟度，雖無即日之冤，慮有他時所犯。作何預修功德，永離此苦。


天尊曰：吾今說此《三生解冤妙經》，若有善男子善女人，每日燒香誦經三徧，己身冤結，盡皆消滅。如精心抄一本與人，合家眷屬，同霑福惠。若復有人胎氣怯弱，或數落不安，轉禮此經，即得安穩，必得智慧男女。如睡夢中間，常見亡過兒女，此是冤業，又待重來。精心每日旦暮燒香，拜禮此經，冤魂自退，普無驚怖。若復有人臨產多難，即於難月之前，請正一道士法師，對三清聖像，焚香誦經，遂感善神護佑，誕育順理，則無冤橫之灾，子母全安，各保天年之壽。如行住坐卧，精誠持念，後世為人，富貴聰明，形容端正，子孫榮旺，獲福無量。歎斯因緣，

而作偈曰：


衆生多結冤，冤深難解結。一日結成冤，三世報不歇。我今傳妙經，解除諸冤業。聞誦志心聽，冤家自消滅。

是時天尊說經既畢，諸仙大聖來迎天尊，巡遊他方，濟拔羣品，再為國王、后妃曰：自後依奉正道，即生孝慧之男。吾今付汝靈符三道，朱書吞之。一符保身，一符辟冤魂，一符催速生。汝等可以教世人尊敬奉行。

保身符



辟冤符



催產符



太上三生解冤妙經 (郭清點校)

# 055 太上洞玄靈寶五顯靈觀華光本行妙經

經名：太上洞玄靈寶五顯靈觀華光本行妙經。撰人不詳，約出於宋代。念誦召請華光天師懺罪消災。一卷。底本出處：《續道藏》。

爾時元始天尊於赤明劫初，在大羅天上玉清聖境清微天中，九光元陽之殿，與太上玉晨道君、太上玄元老君、諸天上帝，坐九色龍鳳寶座，垂十絕靈旛羽蓋，玉童玉女散諸天香寶花，遍滿十方。是時九鳳齊唱，八鸞同鳴，天樂自響，靈鳳聚煙，獅子白鶴，嘯歌離離，天無氛穢，山嶽藏雲。元始天尊現神通妙力，垂九色祥光，天宮玄都莫不煥然，下燭十方無極世界，俱同一相，琉璃清瑩，洞徹無礙，表裏分明。

十方無極飛天神王、至尊大神，一時同會。于時東方九炁青帝天君、侍真靈官無鞅數衆，浮空而至；南方三炁赤帝天君、侍真靈官無鞅數衆，浮空而至；西方七炁白帝天君、侍真靈官無鞅數衆，浮空而至；北方五炁黑帝天君、侍真靈官無鞅數衆，浮空而至；中央一炁黃帝天君、侍真靈官無鞅數衆，浮空而至。雲集法會，稽首恭敬，咸聽元始天尊說無上玄元真一妙法。諸天神仙，步虛旋繞，三界侍軒，同聲讚詠。當此之時，喜慶難言，幽關重開，並受光明，苦爽幽魂，一時解脫。

時會中有長生度世真人，萬福好生真人，慈悲普濟真人，越班整佩，執簡而出，稽首上白天尊言：天尊大慈，天尊大聖，肇開天地，運度陰陽，爲萬靈師，爲群生父。臣等宿緣流慶，得侍至真，忝居真列，今者得預大會，拱聽法音，宣演重玄，俱蒙開化，恩不可量。臣等伏覩下方世界，魔鬼流行，侵害生民，三灾競起，五毒興行，水火刀兵，凶年饑饉，死亡至衆，甚可哀傷。未審以

何因緣，遭罹此苦。恭惟天尊至仁善貸，開度群迷，大宏濟度之門，廣布慈悲之化。

天尊曰：汝當攝念存誠，吾當爲汝演說善惡因緣。良久曰：原夫上元之時，人多淳朴，與天地同體，惟道是修，教化衆生，使歸正道，不爲物觸，心廣體胖，無有損傷，克終壽命。中元之人，稟謙和美厚之人，施慈惠溫良之德，存恤孤寡，拯濟飢貧，後已先人，務行方便。下元之人，生處世間，造惡不悛，不修善行，道德久廢，仁義不行，不敬天地，不禮三光，不畏神明，不孝父母，不忠君主，不念師尊，信從邪見，不省本源，損物害人，欺心罔道，貪婪無厭，積惡招愆，恣縱六情，莫知已極。善惡童子、四直功曹、糾察使者，錄其罪目，日夜上奏天庭。由是三官鼓筆，五帝考書，削字青編，注名黑簿，遂使司命司錄、司功司殺，減筭除年。或在世非橫連綿，運意乖錯，所謀不遂，軼軻競生，疫癘流行，致多夭喪。或命過之後，淪沒九幽地獄之中，無有善念，

得脫幽關。凡此罪因，皆由心造。

諸真人聞是語已，不勝哀憫，再拜上白天尊言：臣等欲仗慈悲威光之力，分身下降人間，救度衆生，俾令男女處世安穩，去離邪橫，富貴長壽，灾害不生，魔鬼潛消，道化日顯，君明臣良，國祚延永，干戈屏息，天下太平，時和歲豐，萬民樂業。伏望至尊俯從志願。

天尊曰：汝今欲令利益末世衆生，方便啓問，發如是願，善哉善哉。且萬物吾生，萬靈無化，救度衆生，固當如是，然不勞汝真烈，汝當靜念在心，吾即爲汝演說利益衆生救度之門。

天尊曰：三天境內有靈官大聖，華光五大天帥，發弘誓願，救度衆生，攝伏群魔，闡揚道化，威靈烜赫，功德巍巍，與道合真，度人無量，隨聲赴感，捍厄扶衰，無願不從，延生賜福。或現一身，或顯五相，或化爲諸天天帝，或化爲梵王帝身，或化爲吉祥如來，或化爲日露天主，或化爲華光菩薩，或化爲天丁力士，或化爲妙行真人。以此種

種神通，隨機攝化，救度衆生。

真人復問：此靈觀大聖，以何因緣位居天帥，現十方種種神通妙相。

天尊曰：此靈觀五大天帥，稟五星五炁之精，毓五方五靈之秀，化身三界，應現十方，掌三界禍福之權，持萬物生殺之柄。吉兇悔吝，悉屬陶鎔。若或有人一稱其名號，曰靈觀大聖華光廣化天君，當知神通立現，克副願心，如影隨形，似聲應響，昭然感格，莫可稱量。

真人復問曰：仰惟天尊好生之德，澤被三途，恩霑萬彙，廣福天人，作度人之津梁，啓歸真之徑路。伏願特垂勅旨，遣降人間，福國安民，宣揚玄化。

天尊於是以前金簡玉符，遣金童玉女，勅召靈觀五大天帥。倏忽之間，靈觀五大天帥恭臨法會，長跪道前。上言：臣等仰沐生成，忝居真列，今日大慶，特蒙勅召，得詣瓊軒，仰覩天顏，聽宣妙法。

天尊曰：世間男女，不崇正化，造

惡不悛，以矯詐爲本心，以貪婪爲己行，放縱情慾，背正向邪，積種種罪源，莫知懺悔。致使地祇效奏，天律譴誅，召惡招殃，冤讎纏結，報對昭然，毫分不失。又復有陣亡鬼兵，下道妖邪，伺人間隙，把人年命，追人魂魄，攝人精氣，與其邪黨，侵害良民。或命未盡而遽亡，或有全家而疾疫。俯觀此輩，良可憫憐。汝宜下降人間，分身化炁，應現十方，收攝群魔，使歸正道，俾下元之人，離諸患難，見存眷屬，悉獲安寧，已往先親，咸皆超度。爾時天尊即說靈觀咒曰：

玄元始祖，三炁氤氳。開明三景，頂立乾坤。保制劫運，使天長存。三天主帝，上帝高真。修真闡教，利物濟人。燮調元化，福國安民，靈官大聖，華光之君。神通無極，上佐帝宸。分身化氣，三界遊巡。濟生度死，福善禍淫。禳灾度厄，辟毒驅瘟。廣宣號令，役使雷神。手持金鎗，足踏火輪。火瓢火鴉，飛焰星奔。金磚萬疊，雷火燐燐。天目一視，三界齊欽。順風千里，

善惡皆聞。六丁六甲，三五將軍。雷公電母，擲火流金。風伯雨師，播雨興雲。天丁力士，隊仗紛紜。封山破洞，滅鬼群。魔精最伏，潛跡海濱。敢有拒送，攝魄收魂。金鎚裂腦，鐵戟穿心。鑿天大斧，斬截其身。烏風一掃，化作微塵。九州社令，血食之賓，城隍主者，聽吾指陳。佐助玄教，積累殊勳。元始玉字，八威龍文。普告三界，萬靈咸遵。急急如律令。

天尊復謂真人曰：世間男女，或有妖邪魍魎、山魃木客、古器伏屍、土怪石精、水脉旺魅、不正等神，變易形質，拋磚放火，攝人魂魄，占人宅舍，百種形狀，惱亂衆生。凡有是諸患難，善信男女，速宜齋戒沐浴。或於古觀靈壇，或於本居淨室，建立三清寶座，五帝靈壇，然香點燈，獻花酌水，投詞露懇，拜表上章，皈命三界高真靈官大聖，持念真經，誦詠神咒，首愆謝過，請福延生。靈觀大聖應時感格，部領五百靈觀大聖，金磚金鎗、火瓢火車、火鴟大將，無面目大將軍，白蛇大將軍，

順風千里使者，五方雷神天將，銅頭鐵面六天吏兵，火部率衆，流金擲火，掣電轟雷，一合下降，掃蕩妖氛，驅逐不祥，肅清境界，人鬼分離，生民安泰。靈觀元帥、威神之吏，莫可稱量，凡有見聞，各宜恭敬。若復世間亢陽爲沴，積陰爲癘，祝融扇禍，江海失經，或干戈互起，人民流亡，蟲蝗爲妖，蠹食禾穢。如是災難，皆當依儀醮謝天地，轉念真經，皈命上玄，祈恩請福，即得國

土清平，風調雨順，百物清潤，河清海晏。又若世人星辰衝戰，祿馬休囚，疾病纏綿，求安無路。或修墳立宅，干犯土皇。或官司牢獄，冤枉不伸。或疫癘流行，人民困弊。或江河轉運，波浪驚危。或曠野山林，惡獸奔突。或夫妻刑隔，嗣續未蕃。或水陸經營，惡人值遇。或咒詛相仍，侵凌眷屬。或身懷六甲，母子未分。或在世孤貧，謀爲阻晦。或門戶閉塞，畜養不生。或買遷經術，財物散耗。或塚訟微呼，先亡復連。如是等種種災難，皆緣世人積惡深厚，以致禍患來鐘，福瑞希降。若

能依儀行道，罄志投誠，剖露腹心，皈依懺悔，即獲平安，神明護門，道氣滋扶，一切災難，應時消散。又若世間男女，爲先祖宗親父母亡沒，起心薦拔，冀徹孝思，即得魂出幽關，逍遙快樂，永辭沉結，上生天堂。是經功德，不可思議，存亡獲福，善利無邊。

於是真人得聞語已，誓願流傳，讚嘆靈觀大聖，而獻頌曰：

高上太微，中有玄虛。五形全妙，萬法希民。化身三界，變現十方。道合自然，國泰民康。

說是頌已，法會衆真，無鞅仙聖，咸皆稱善。天尊再告真人曰：世間男女，能依吾所授，奉教而行者，皆道心深重，宿有善緣，尊崇供養，萬災不干，吉祥如意，衆善齊降，諸惡不生。更能於四時八節、三元三會、五臘十直、甲子庚申、月旦本命，是諸良辰吉日，如法自持，自然千真萬合，福壽延長，七祖九玄，均獲超度，更能傳授世人，敬信讀誦，福利無邊。是經功德，果報昭然，不可思議。

天尊說是經已，靈觀大聖敬奉教旨，下降人間，廣宣玄化。十方天真大聖，無鞅仙衆，稱揚讚嘆，歡喜踴躍，稽首禮謝無上虛皇正真三寶，作禮而退，謹奉道旨，敬爲流傳。

太上洞玄靈寶五顯靈觀華光本行  
妙經

（郭清點校）

# 056 太上靈寶天尊說禳灾度厄經

經名：太上靈寶天尊說禳灾度厄經。撰人不詳，約出於宋代。念誦召請玉皇天尊懺罪禳灾一卷。底本出處：《正統道藏》洞玄部本文類。

爾時天尊在禪黎國土，與大道真仙萬萬億千人，諸天尊及諸天龍鬼神，盡來集會，受吾約束。世間若有善男子善女人，忽有年灾月厄，遊城赤鼠之厄，天羅地網之厄，命窮筭盡之厄，疾病纏綿之厄，落水波濤之厄，虎狼虺蛇之厄，水火盜賊刀兵生產之厄，山林樹木社稷之厄，土石橋梁之厄，毒藥呪詛之厄，唯願今對玉皇天尊，大道真聖，懺悔解禳，度脱身中灾厄，一一解散，勿爲留難，勅諸天神王，並降聖力道

力，承此經力恩力，衛護弟子。受持念誦此經已後，解陽九百六之灾，三衰九橫，八難五苦之厄，所求如願，所履平安，出入行藏，常蒙吉慶，所爲利益，所欲隨心。於是衆等聞說此經，皆大歡喜，信受奉行。

太上靈寶天尊說禳灾度厄經

（汪桂平點校）

## 057 太上靈寶天尊說延壽妙經

經名：太上靈寶天尊說延壽妙經。撰人不詳，約出於唐宋間。召請天尊護衛延壽保命。底本出處：《正統道藏》洞玄部本文類。

爾時靈寶延壽天尊在南極天中金光山內寶林樹下，凝神念道，共十千徒衆，解說《延壽妙經》，論虛無大道。徧體光明，洞照天地三界十方，一時震響，復有諸天上聖、一切鬼王、天龍十部，尋光而至，上詣天尊。乞無生死，五體投地作禮神尊，依位而立。時有延命真人、廣福真人、金華真人、妙喜真人、紫蓋真人、黃籙童子、碧霄童子、青華童子、白惠童子，及以一切聖衆，皆獻寶花，百味香藥，手執日月靈幢、

紫光神節、十絕靈幡、延命寶蓋，次第行道，燒香散花，齊唱延壽天尊，咸得度世。爾時神尊含笑巍巍，從大頂門放十道神光，普照法衆身心無有悟者。於是道場中有一童子名曰善達，前進作禮，上白天尊：見在座中皆是變化神仙，何得未悟。伏願尊顏，爲臣解說。

天尊言曰：此之仙衆雖有神通，實無真道。童子曰：不審何名真道。

天尊言曰：不生不滅，名爲真道。

無去無來，亦名真道。於不生不滅、無去無來，亦昧真道。一切法相，皆爲虛妄。世間男女，若欲延命長年，消災集福，但自精心燒香行道，布施放生，建造功德，念經供養，兼請道士法師，講讀尊經、本命齋醮，即有注筭神王、記名神王、落死神王、上生神王，保護念經之人，錄其功德，奏上諸天，金帛豐足，永保安寧。於是諸天大聖、一切鬼王，稽首歸依，皆大歡喜。累劫學道，未聞此經，並是金口之言，於是鬼神發弘誓，願生生世世眼見真仙，耳聞正

法，禮拜十齋，常行至道。天尊再留偈曰：

生前不慈孝，死後報何恩。悲啼在地獄，誰明勸善言。修善自歸善，作惡歸惡源。至心常供養，延壽遇神仙。寫經及造像，福祿自延年。

是時座中一切真仙聞經，皆稱不可思議，再拜而退。

太上靈寶天尊說延壽妙經

（郭清點校）



# 058 太上洞玄靈寶消禳 火災經

經名：太上洞玄靈寶消禳火災經。撰人及時代不詳。誦經召神禳除火災。一卷。底本出處：《正統道藏》洞玄部本文類。

爾時靈寶天尊駕幸金仙壇上高德園中，齋會群仙，講說太上玄元無極至道，忽見下方世界，火災熾然，比屋連薨，化爲炎燼。齋會既畢，萬神森衛，諸侍催班，風伯清塵，兩師灑道，隨從天尊，度至赤明天境。赤靈神君與諸火部神仙官屬，羅列威儀，獻百種異香，丹英紫芝，朱旛絳節，左右布肅，迎拜道前。

天尊曰：汝等靈分三炁，位屬丹天，善惡攸專，行何賞罰？赤靈神君稽首奏曰：臣奉天命，職涖火官，鑄育群

生，長養萬物，歲或炎燎，災變所臨，氣運當然，無僭無忒，惟是隨其善惡，別以重輕，欲警愚民，亦行速報。凡有不敬天地三光者，有不孝不忠者，有欺曲升斗秤尺者，有惡倖情僞者，有加意無厭於小民者，有暴積橫取者，應一切爲非不信報緣者，部有司察之神，遊行人間，並皆記錄，考驗得實，即奏行天罰，遣火部臨之，使之自新。知有省畏，爲善種德者，飭諸神屬，不令侵犯。今日有幸，得覩天顏，願爲此方，揄揚正教。

天尊曰：汝等威靈赫奕，號令嚴明，赤炁紅光，炎燦三界，吾於金仙壇上高德園中，見諸惡緣，故度此境，吾今爲汝宣演神呪，將以流傳，於是若能改過遷善，信奉經教，有災之日，誦此呪者，汝等當爲蠲除罪咎，令保安全。如遇分野之內，陽九應運，熒惑臨躔，能誦此呪者，汝等亦當救護，我必應時開宥，自然止息。如遇火精火怪，妄入人家，興諸禍殃，能誦此呪者，汝等亦當禁制，毋使害虐良民。即說呪曰：

南方丹天，赤靈所專。威光烈焰，

施化不偏。火龍一飛，照耀無邊。火馬一躍，萬里盤旋。火鷹一迅，鼓翼無前。火鈴一撼，洪音遠宣。火瓢一發，到處生煙。火劍一下，諸魔伏虔。火索一舉，百邪自纏。火旗一動，號令肅然。火節遙指，孰敢當權。盛德及物，長養生全。逆令反正，炎災灼天。鑿善不遺，削罪除愆。

赤靈神君俯伏感謝，而作偈曰：

昔奉天尊教，稟令守炎方。今奉天尊勅，聞善降吉祥。家有天尊呪，火部不爲殃。家有天尊呪，火勢息威光。家有天尊呪，火怪自潛藏。家有天尊呪，諸魔自滅亡。家有天尊呪，災厄自消禳。家有天尊呪，財物得阜昌。家有天尊呪，家宅保安康。

作是偈已，惟見法駕縹緲，歸於玉京，赤靈神君與諸部屬，瞻仰天光，稽首奉送。

太上洞玄靈寶消禳火災經

（汪桂平點校）

# 059 太上洞玄靈寶天尊

## 說養蠶營種經

經名：太上洞玄靈寶天尊說養蠶營種經。撰人及時代不詳。一卷。底本出處：《正統道藏》洞玄部本文類。

爾時天尊同太上老君正冠而坐，說一切凡夫，養蠶營種五穀，此乃是衆生之命。蠶子是紫微宮出，十方玉女所愛養之。五穀蠶子，是衆生之本，人間種養，最爲重事。

老君乃白天尊曰：善哉天尊，切見世間凡夫之人，慙寄閻浮而生，唯憑衣食以活身命，營田是上上業，養蠶是仙聖所教，修造功德，莫不由於此始，聖凡體服，乃以田蠶以繼身命。慈孝父母，造立尊像，田蠶五穀善豐。若人以道，長者及王侯安然，四方夷狄，普

從正道，以此經力，人民歡樂，風雨以時。唯願五穀豐登，萬民以道，唯念田蠶，以爲富貴。

天尊曰：凡夫在世，惡心嫉妬，窺謀貧賤，偷竊三寶，及常住物者，一日一夜，萬死萬生，碎身酬還，仍遭橫禍，子孫疾病，恒逢惡害，鬼兵誅汝惡人，千身萬身，酬償不了，負貸師道。一針一縷，償人萬兩金不足，三年不還，令人疾病，即報陽春三月，令魔王放毒，殺害此人。若不造功德，若不布施，令人貧窮，子孫顛頓，永不與人齊等。毀道謗經，說師短長，及不敬父母，仍生白癩之疾，不可治之。若年年造功德，布施師道，田蠶萬倍之報。若偷竊人物，苦苦作種，纔得償人宿債。若欲蠶絲五穀豐者，當念誦此經，獲福無量，惡賊反生慈心，念道憶師。天尊在虛空中，以智慧眼，自能照見世間作惡之人，天必誅之，一心敬道，即得田蠶立報，不用功力，十方天尊，送與汝等善知識耳。天人擁護，日見貴富，所求皆稱心力，人鬼無侵，蠶獲萬倍，志念所

願者，鬼妖滅爽，天神自然擁護。汝養蠶之人，稽首燒香，安蠶子四方及穀田中，即讀十方天神名字曰：

謹請東方青帝護蠶君十萬人，隨心降入某宅中；又請南方赤帝護蠶君十萬人，隨心降入某宅中；又請西方白帝護蠶君十萬人，隨心降入某宅中；又請北方黑帝護蠶君十萬人，隨心降入某宅中；又請中央黃帝護蠶君十萬人，隨心降入某宅中；又請五方五帝神君、護蠶將士各十萬人，隨心降下，擁護神蠶。

天尊曰：汝等在世凡夫，吾今差下五方護蠶神君，拯拔苦厄衆生。況汝在世，少信聖教，爲此貧窮困躓，唱衣無衣，須食無食，恒常乏少，若欲得蠶絲五穀倉盈匱溢者，可每年在道場前燒香，作珍羞雜饌，供獻神仙，就三寶乞蠶，請師到家，百味供養，轉讀此經，百鬼祆邪，自不入宅，善神自下，與汝蠶絲五穀，天人送與汝家，令得千千萬倍，汝念道憶師之恩。

天尊東向勅魔祝曰：

告汝虛耗鬼，并及魍魎神。道上飛尸鬼，五土三將軍。汝但共作善，護保諸天人。田蠶獲萬倍，住宅坐金銀。斷絕惡口舌，勝越五家鄰。魔兵並入土，啓願即從心。穀帛五方入，日日見懽忻。念誦護法經，天爲送七珍。魔邪欲來者，破頭作七分。

天尊曰：汝欲得田蠶者，每結誠心，上啓天神，天仙即隨心下來，爲作福力，不令虛功耳。汝可將蠶示師，師與蠶子祝願，蕃息即蒙道恩。但一切千魔萬魅虛耗之鬼，見師入宅，皆悉破散，去宅千里，汝從養蠶子，時與作功德，其蠶萬不失也。可即燒香與四方，口誦此經文，立獲萬倍之報。汝莫輕師慢經，盜師父三寶物，立見卒死之報。稱師名號，短壽命之報。食佗肉，多病之報。手殺生命，負命之報。惡口兩舌，暗啞之報。好打奴婢破脊，驢身之報。齋日惡罵，顛狂之報。夜偷人物，獺鼠之報。獨食不喚人，猪狗之報。手把經不潔淨身，惡瘡之報。蠶作禾穫，不報道恩，貧凍饑困之報。禮

拜頭不着地，懸蟲之報。釣魚穴口，缺脣之報。許師施物不送，每收空無之報。負信違天，白癩之報。閉執不通，盲目之報。欺罔師恩，終身負病之報。許設齋不修，饑凍裸露之報。讀經不洗手漱口，口氣常臭之報。罵辱父母，地獄因緣代代子孫不孝之報。

天尊告曰：一切凡夫，皆身造罪，身自受報，不得寬饒。今身欲得長生壽考者，慎勿惡心相向，令人貧窮下賤，蠶作少收，尋日病痛，子孫不成，都由罪苦今報，又不善行，不施不惠，恒生窺圖，何由長年，卒天之報。天尊一日一夜在於空中，以道眼照見造善造惡之人，分銖不失。若善男子，若善女人，欲求長命，田蠶遂意，每以香花供養三寶，三師道主，天官下來，爲報汝恩，請福之人，消除毒害，所祈所禱，獲得重恩，諸雜暴耗神鬼，不能前進，聞經歡喜，自悉消散。天人天神，以善善報，以惡惡對。汝等在世，欲求福者，可燒名香，表心陳啓，請諸善神，依汝所願，一心奉請，護蠶神王，隨心降下

某宅中。

東方無極飛天神王長生大聖，皆來擁護。南方無極飛天神王長生大聖，皆來擁護。西方無極飛天神王長生大聖，皆來擁護。北方無極飛天神王長生大聖，皆來擁護。東北方無極飛天神王長生大聖，皆來擁護。東南方無極飛天神王長生大聖，皆來擁護。西南方無極飛天神王長生大聖，皆來擁護。西北方無極飛天神王長生大聖，皆來擁護。上方無極飛天神王長生大聖，皆來擁護。下方無極飛天神王長生大聖，皆來擁護。十方天王，皆乘飛雲丹霄綠輿瓊輪下降，爲汝造善之家日日送福，報汝修福，即令獲重報，但造功立德，終無浪失。

天尊告曰：第一念道，第二念經，第三念師，每時啓道祈恩，福從天來，令汝善信之家無病無難，無災無苦，所求之願，皆得遂心，求男女得男女之報，求官位得官位之報，求金銀得金銀之報，求田蠶得田蠶之報，求安穩得安穩之報，求延命得延命之報，求衣食得

衣食之報，求長生得長生之報。若欲遠行，四道開通，念誦是經，即獲聖慈，百餘旬內，無諸枉橫，皆得福祐。若所求不果，即讀善住東來神、西來神、南來神、北來神、中來神，為汝除去惡害，天行毒氣立自消滅，官橫不生，千殃即斷，天下地上，諸雜百鬼，悉馳他方，始鬼妬神，咸各鼠蟄，大力神王，降下擁護，讀誦之人，福報即果，厄難不加，令汝坐卧安吉，無諸橫難。天尊所說，言無不善也。

天尊告曰：汝等天人，此經勝妙，神通無量，若家中供養，延壽延筭，所求稱心，邪魔自滅，不敢害人，若遭重疾，天童天女自來救治，令疾痊愈，無諸損傷，諸惡不害，十方天尊常來護汝。誦讀之人，家安戶吉，命長壽永，無有惡害，行來出入，諸善神王，恒隨汝後，令却千災，萬惡不干，習誦之者，福報如山，聽受之人，萬世康強，手持此經，百魔畏敬，如法恒持，心願必從。

天尊曰：汝等凡夫，不論貴賤，悉皆禮敬念誦此經，自然安樂，八部天魔

聞經滅跡，善神守護，門神戶尉辟斷千殃，所養神蠶蕃息溢宅，金銀錢財五穀豐盈，男女成行，僮僕異形，趨勇孳息，百鬼奔走，天人保護，蠶絲長益，惡害不生，願願從心，聖功神力，難可測量。

天尊告曰：汝等世間無藉之鬼，不忌大道明威之制，變形易像，或作妖怪，或作家親社竈，或作形像，或作百鳥聲，或作夜夢，或為凡人妄求血食，耗亂田蠶，令不長息，每年為害，如不去者，即請消害破鬼君九千萬人，縛鬼君九千萬人，食鬼君九千萬人，斬鬼君九千萬人，高麾鐵面兵士七千萬人，手持殺鬼之具，兵刃外向，食鬼窮騎吞鬼君九十萬人，捉鬼君殺鬼君各四十萬人，收殍君破殍君各十二萬人，攝除宅中故氣宿骨君二十八萬人，斷鬼君九十萬人，一合降下，主為某家消除此土之鬼，立令散滅。如有一鬼留停，不理去者，即請十方護蠶君百千萬人，依方來下斬殺。及妄前之鬼，五土之精，如有木精欲來，金神斬之；火精欲來，水神滅之；金精欲來，火神消之；水

精欲來，土神斷之；土精欲來，木神尅之。此之五鬼，主人某家先奉天尊旨教，以令天師收攝金木水火土五神之精，悉使迸散，萬事吉祥，虛耗之鬼，百雜之魔，千妖萬魅，女姑土長，悉令四散。中鬼入土千丈萬尺，保護神王衛護主人，蠶作千倍，出入吉祥，護宅力士消害去禍，年時蠶成，歲中作熟，願願從心，起念佛至。讀誦之人，延年加筭，宅生黃金，地踊寶藏，惡害毒蠱，遠祛千里。天仙聖神，龍眾梵眾，皆來聽經，十方靈童，降下瞻仰，護宅神王，皆悉擁護。此經微妙，不可思議，大眾聞經，各各頂禮，圍繞天尊，稱善作禮，歸命奉行。

太上洞玄靈寶天尊說養蠶營種經

（汪桂平點校）

# 060 太上說利益蠶王妙經

經名：太上說利益蠶王妙經。  
撰人及時代不詳。一卷。底本  
出處：《正統道藏》洞玄部本文  
類。


爾時靈寶天尊在淨明國土馬跡山中，與諸仙衆，及諸真人，百千萬衆，隨從到赤明宮中，大會說法。是時衆中有一真人，名日月淨，從座而起，端簡前進，上白天尊曰：今見世間人民，苦樂不均，衣無所得，將何救濟？

天尊憫其所請，乃遣玄名真人化身爲蠶蛾，口吐其絲，與人收什，教其經絡機織，裁製爲衣，復以神符鎮貼，以斷邪魔。

真人重告天尊曰：世人所養蠶蛾，爲復有何報對？

天尊答曰：此身變化之後，經餘

年歲，復歸本身，飛行自在，來往虛空。於是玄名真人告諸世人，其蠶蛾是我之身變化，憫見衆生饑寒困苦，故來救濟，汝可精心虔敬，不得輕慢，將我拋棄。若生輕慢，當復困苦，若加敬重，得獲大富貴，多養多得，少養廣收，精心信敬，咸皆歡喜。說是經畢，真仙等衆稽首天尊，奉辭而退。



太上說利益蠶王妙經

(汪桂平點校)

# 061 太上靈寶補謝竈王經

經名：太上靈寶補謝竈王經。  
撰人及時代不詳。一卷。底本  
出處：《正統道藏》洞玄部本文  
類。

道言：昔登崑崙之山，有一老母獨處其中，莫知其由。是時即有妙行真人，上白天尊曰：此之老母，未審復是何人，獨住此山，殊無畏懼。

天尊曰：惟此老母，是名種火之母，能上通天界，下統五行，達於神明，觀乎一炁，在天則為天帝，在人間乃為司命。又為北斗七元使者，主人壽命長短，富貴貧賤，掌人職祿。又為五帝竈君，管人住宅，十二時辰，普知人間之事，每月朔日記人造諸善惡，及其功德，錄其輕重，夜半奏上天曹，定其簿書，悉是此母也。凡人家竈皆有禁忌，

若不忍之，此母能致禍殃，弗可免也。

妙行真人曰：凡人家竈，未審有何忌諱？敢問斯言，幸垂教示。臣見衆生，安知其趣，願將告諸濁世男女，普令忌之，得諧安穩。

天尊曰：子可諦受，凡人家竈，不可以鷄毛犬骨頭髮，刀斧不淨柴薪，穢污等物，觸犯竈神，即致男女不安，經求無利，疾患瘡痍，癩狂瘴疫，眼目昏昧，夢想顛倒，田蠶不收，六畜虛耗，令客鬼無懼，亂入宅中，雞犬作怪，盜賊侵欺，口舌妄起，男女邪迷，官府禁錮，家業流亡，皆為觸犯所致。若有此難，急宜謝之，可請東方青帝竈君，南方赤帝竈君，西方白帝竈君，北方黑帝竈君，中央黃帝竈君，五方五帝竈君夫人，天厨靈竈，地厨神竈，天帝嬌男嬌女，凶中童子，童男童女，曾竈祖竈，竈公竈母，竈夫竈婦，竈子竈孫，家竈外竈，大竈小竈，長竈短竈，新竈舊竈，五方遊奕竈君，左右將軍，炊濤神女，前後直符，竈君小使，進火神母，遊火童子，竈家娘子，姊妹新婦，七十二竈侍

從，神衆弟子，某夫妻眷屬大小，並是凡夫，不知禁忌，觸犯者多，不自省悟，或作東西，或修南北，將刀向竈，驚動尊神，酒後高聲，妄言綺語，以足進火，露體赤身，男女穢污，烹宰腥羶，歌吟厨內，叫喚竈前，致使三灾競起，百怪俱生，財物耗散，疾病連綿，田蠶不利，仕宦不遷，買賣無益，宅舍衰遭，惡人謀害，六畜不孳，夢想顛倒，所求不遂，即當虔誠，願陳懺謝。

天尊曰：能如是念，禍必驅之，吾當為汝末世衆生，召請此母，大降靈通，赦過宥罪，致福受慶，人口康泰，永歲無殃，青龍鬱鬱，白虎鏘鏘，朱雀爍爍，玄武堂堂，冤家伏匿，盜賊潛藏，火光入地，百怪消洋。

於是妙行真人聞天尊說此老母，是名天帝司命，能掌人間罪福之事，普示群生，而為頌曰：

天帝臨位，司命竈君。世人恭敬，福祿咸臻。去除災難，疫癘潛奔。仰依誨示，普得安存。

天尊再告真人曰：末世男女，衝

突竈君，有災有患，皆須清淨，掃灑明燈，燒香請道士轉經，呼召竈君眷屬名字，奏獻錢財，或供飲食，爲人所利，子之所受，深宜諦焉。妙行真人乃稽首聽命，信受奉行。

太上靈寶補謝竈王經

（汪桂平點校）

## 062 太上洞真安竈經

經名：太上洞真安竈經。撰人及時代不詳。一卷。底本出處：《正統道藏》洞真部本文類。

太上元始至尊登麟駕羽軒，降崑崙之山金銀之壇，座衆寶之臺，時感十方三界神仙朝元拱御。有炊母神母，上言丹陛，稱以夙生慶幸，統御人間，受北帝下部之職，爲五帝司命之官，應天曹爲直符之使，變飲血茹毛之化，就鍊生還熟之餐，錄世人功過之因，上逐月晦朔之事，每被凡情俗態觸犯者，多敢以上言，伏候聖旨。

太上曰：夫人宅者覆也，屋者居也，室者止也，舍者吉也，世上人民，祇知峻宇雕墻，妄施綺麗，殊不知司命竈君主鎮中堂，唯好清淨，匡護黎民。凡人若能慎護厨竈，无令銅鐵刀斧之器，

飛禽走獸之毛，不淨柴薪厭穢之水，若犯忌諱，能令家宅不安，人口暴病。其儀每月按祭竈，吉日良夜，可用鍋安淨水，座布香茆，列案焚香，供養酒果，召請五帝司命之主，六癸神女之靈，如對真靈，宣示呪曰：

北帝上靈，六癸神女。臣今祭祀，可以爲主。神水洋洋，香燈齊舉。仰望靈軒，來臨醮所。

呪畢，用柳枝沾水，灑於醮席。又呪曰：

泠泠陳月食，精膳難思議，五香清淨水，芬芬柳灑之。

如是依經轉誦，對聖披陳，能保父慈子孝，夫唱婦隨，兄恭弟順，尊卑稟序，大小相承，人凶歡悅，家道昌隆，骨肉安棲，寢膳和泰，豈慮靈神惡鬼，興禍害人。切忌高聲大語，觸諱冒殃，厭穢腥膻，无令觸犯，即令引鬼招魔，返受殃灾。於是明宣聖旨，重宣偈曰：

道與生相保，生與道相保。安宅是安身，愛身是愛道。司命若歸依，千邪无路到。炊母六癸神，飲食真神奧。

安靜和真和，長生老非老。

是時上帝說經即畢，三界群仙，炊母神母，願承聖旨，永當奉行。

太上洞真安竈經

（汪桂平點校）



# 063 太上說牛癘妙經

經名：太上說牛癘妙經。撰人及時代不詳。一卷。底本出處：《正統道藏》洞玄部本文類。

爾時太上道君與諸仙在七寶林中，大會說法。座中有一真人，名曰普善，端簡上白天尊曰：爲見浮生計謀活業，養育六畜牛馬駒犢，頻遭疫癘，不甘水草。痛哉痛哉。惟願大慈廣垂濟度。

天尊曰：凡世之人不悟禁忌，不看牛癘馬廐方位，故犯神殺，致見時氣，竟生瘟疫相逼。若欲止禳，須投玄奧。但以吉日灑掃家庭，鋪舒寶座，然燈焚香，轉誦靈文，禳謝神殺，能消災禍，滌除時瘟，永不爲害。真人普善仰謝玄恩，而作頌曰：

天尊恩如海，普救世間人。若要

除毒害，莫越大乘經。庶類歸心者，國泰物興榮。其或保牛馬，非但犢猪羊。虔誠歸大道，聖道必昭彰。殷勤朝元始，福壽保延長。欄圈皆安帖，血畜自成行。唯憑真經力，須賴聖威光。龍神常擁護，蹄角永繁昌。

真人說是頌畢，及諸仙衆，各各作禮而退。

太上說牛癘妙經

（郭清點校）

# 064 太上元始天尊說消殄蟲蝗經

經名：太上元始天尊說消殄蟲蝗經。撰人不詳，約出於唐宋間。一卷。底本出處：《正統道藏》洞真部本文類。

爾時元始天尊在大羅天上玉京山中，為諸大眾廣宣妙法。時有太極真人，長跪端簡，上白天尊言曰：伏見天下人民耕桑為本，養育身形，須藉田蠶。近代以來，蟲蝗競起，水旱不調，侵損苗稼，天下萬民悽惶憂懼，男女悲哀，無處祈禱。人民躬詣名山祭拜，全無所應，蟲蝗不滅，雨澤未期。不知凡夫積何罪業，所求無應，惟願天尊特賜開悟。

天尊曰：吾見天下人民每年豐熟之時，全無敬信，不荷三光，將其穀米

賤慢，雞踏狗踐，拋散糞穢，非為使用，並無護惜。皆是乾象觀見天下，人民不生敬信，致令蟲蝗水旱，所見如斯。今得真人所奏，吾甚欣然。謹遣五帝大魔、三元官屬、六甲神將、五嶽四瀆、風伯雨師、雷公電母、二十四炁神君、洞府名山八大龍王、五穀精靈、一切龍神，今於下界收攝蟲蝗，使風調雨順，天下萬民改惡從善。宜於宮觀靈壇、仙靖洞府之中，建立道場，安排真像。或一日二日，乃至七日，齊心精潔，燒諸名香，行道念誦經文。設齋醮祭，上告乾象星宿尊神，作大福利，乃得蟲蝗消殄，雨順風調，五穀秀成，倉庫盈滿，人民歡樂，國土太平，衣食自然。天尊乃說偈曰：

人生不積善，災厄所來侵。耕種不專勤，蟲蝗水旱臨。杳冥難可測，恍惚不知尋。人生若敬重，萬禍不來侵。衆生行慈孝，天然福果因。如斯敬大道，歲歲保豐登。

天尊說是頌畢，及諸大眾太極真人等，一切稽首歡喜，踴躍作禮而退。

信受奉行。

太上元始天尊說消殄蟲蝗經

（郭清點校）

# 065 太上安鎮九壘龍神 妙經

經名：太上安鎮九壘龍神妙經。  
撰人及時代不詳。一卷。底本  
出處：《正統道藏》洞真部本文  
類。

太上元始天尊昔在洞陽天中，召集十方聖衆，俱來集會，講說妙法。時有真人端簡上告天尊曰：爲見閻浮衆生，修造宅舍之後，頻遭厄難，作何方便，以救凡愚。

天尊曰：善哉。汝當諦聽。於是天尊乃作空洞之音。

元始結炁，混洞之中。下成形兮，盤礴冥空。地網直根，內有靈真。號曰土皇君，受位於帝宸。官府三十六，網維統萬神。金石相纏固，機會總崑崙。虛涵溟渤津，風澤常彌綸。妙理

宗靈寶，厚德堅无傾。劫化周大數，蛟龍俱負乘。正道順自然，妖奸何以興。二儀通至用，玄會保黃寧。

天尊告真人曰：若有善男子善女人，起造宅舍，驚動龍神，屋宇鳴喚，地華土裂，南堂北屋，東廊西戶，井竈確磨，庫藏船車，寓止六畜，欄圈莊舍寺觀，但是屋宇房廊窟穴，觸犯天煞、地煞、年煞、月煞、日煞、時煞、四方諸煞、五方地祇，青龍白虎，朱雀玄武，將軍太歲，黃幡豹尾，十二時神，六甲禁忌，土公土母，土府伏龍，一切惡煞。宜轉此經，禳謝所犯神煞，悉皆隱藏，遠還四方，各鎮方隅，不敢爲害。念誦此經，是諸惡鬼皆自消滅，疾病驅除，身強體輕。念誦此經，功德无量。若有善男善女，匡保蠶桑，念誦此經，福德報應。或起造屋宇，掘鑿動土，轉誦此經三遍，至百遍，令土府相生，陰陽和合，向坐宜良，龍神匡贊，百福咸臻，眷屬和平，悉无障碍，所求皆得，所願皆成。

於是真人聖衆，聞說此經，皆大歡

喜，作禮而退，敬奉傳行。

太上安鎮九壘龍神妙經

（郭清點校）

# 066 洞玄靈寶五嶽古本

## 真形圖 并序

東方朔

經名：洞玄靈寶五嶽古本真形圖。原題漢東方朔編。據考應出於漢末魏晉之際，葛洪《抱朴子遐覽篇》已引此書。一卷。底本出處：《正統道藏》洞玄部靈圖類。參見：《雲笈七籤》卷七九。

五嶽真形者，山水之象也。盤曲迴轉陵阜，形勢高下參差，長短卷舒，波流似於奮筆，鋒銳暢乎嶺嶠。雲林玄黃，有如書字之狀。是以天真道君，下觀規矩，擬縱趨向，因如字之韻，而隨形而名山焉。

子有東嶽形，令人神安命延，存身長久，入山履川，百芝自聚。

子有南嶽形，五殞不加，辟除火光。謀惡我者，返還自傷。

子有中嶽形，所向惟利，致財巨億，願願尅合，不勞身力。

子有西嶽形，消辟五兵，入刃不傷，山川名神，尊奉司迎。

子有北嶽形，入水却災，百毒滅伏，役使蛟龍，長享福祿。

子盡有五嶽形，橫天縱地，彌淪四方，見我歡悅，人神攸同。

昔黃帝徵師諸侯，與蚩尤戰於涿鹿之野，遂擒之。諸侯咸宗軒轅為天子，代神農氏，是為黃帝。天下有不順者，從而征之，破山通道，未嘗寧居。東至于海，登泰山及岱宗。西至崆峒，登雞頭。南至于江，登熊湘。北逐蟬粥金符釜山，而邑于涿鹿之阿。遷徙往來，無有常處。察四嶽並有佐命之山，而南嶽獨孤峙無輔，乃章祠三天太上道君，命霍山、潛山為儲君。奏可。帝乃自造山，躬寫形像，連五圖之後。拜青城為丈人，署廬山為使者，形皆以次相續，此適始於黃帝耳。

東嶽泰山君，領羣神五千九百人，主治死生，百鬼之主帥也。血食廟祀，宗伯者也。俗世所奉鬼祠邪精之神，而死者皆歸泰山，受罪考焉。諸得佩五嶽形，入經山林及詣泰山，君及諸山百川神，皆出境拜迎子也。泰山君服青袍，戴蒼碧七稱之冠，佩通陽大明之印，乘青龍，從羣官來迎子。

南嶽衡山君，領仙官七萬七百人。諸入南嶽，所部山川神皆出迎。南嶽君服朱光之袍，九丹日精之冠，佩夜光天真之印，乘赤龍，從群官來迎子。

中嶽嵩高君，領仙官玉女三萬人。入山，諸是中嶽所部名靈，皆來迎子。中嶽君服黃素之袍，戴黃玉太己之冠，佩神宗陽和之印，乘黃龍，從群官而來迎子也。中嶽是五土之主，子善敬之。太上常用三天真人有德望者以居之。

西嶽華山君，領仙人玉女四千一百人。道士入其所部之山，神並來迎。華山君身服白素之袍，太素九旒之冠，佩開天通真之印，乘白龍而來迎子。北嶽恒山君，領仙人玉女七千人。

其入所部之山川，神皆來迎。北嶽君服玄流之袍，太冥真靈之冠，佩長津悟真之印，乘黑龍而來迎於子也。

青城丈人，黃帝所命也，主地仙人，是五嶽之上司，以總羣官也。丈人領仙官萬人，道士入其山者，丈人服朱光之袍，戴蓋天之冠，佩三庭之印，乘科車，從衆靈而來迎於子也。

廬山使者，黃帝所命，秩比御史，主總仙官之位，蓋五嶽之監司。道士入其山者，使者服朱緋之襪，戴平華之冠，佩三天真形之印，而來迎於子也。

霍山南嶽儲君，黃帝所命，衡嶽之副主也。領羣靈三萬人，上調和氣，下拯黎民，關校衆仙，制命水神，是峻驗之府，而爲諸靈之所順也。道士入其境，儲君服青錦之袍，戴啓明之冠，佩道君之玉策，而來迎子。或乘科車，或駕龍虎。

潛山儲君，黃帝所命，爲衡嶽儲貳，時參政事，令職以輔佐者也。入其山，潛君服紫光綉衣，戴參靈之冠，佩朱官之印，乘赤虬之車，而來迎子。

諸佐命山君，並輔弼嶽君，預於位政。道士入其山，佐命服朱袍，戴仙華之冠，佩太上真形之章，而來迎子，所來無常。

東方朔言：古書五嶽真形首目者，乃是神農前世，太上八會羣方飛天之書法，殆鳥跡之先代也。自不得仙人譯注顯出，終不可知也。凡道士欲佩圖進取山象，及書古文卷畢，以此題外面，然後盛之，帶符。當得正月建寅，齋七日。齋中寫白訖，醮如傳受法。但易章中自說辭旨，隨人也。凡寫書，皆燒香於左右。

#### 授圖祭文

某以胎生肉人，百官子孫，沈湎囂惡，流濁世務，運遇有幸，得奉大化，滌蕩穢俗，許以更始，修心慎違，希企靈真，夙夜馳競，不敢寧捨。昔以某年月日，歲在某處，受先師甲乙真形，按九都千明之科，許得傳授。謹按道法，當付良密。今有同志道士，某郡縣鄉里男生某甲，年若干歲，小心勤翼，必能宣啓靈化，敷正神氣。即以今年月，歆

血誓書，授其真圖，委繒告盟，禁以不傳。天親同心，常相愛護，不得弃元崇末，要銜榮利。其五八大約，禍福所期，量已審人，任之處焉。謹清齋祭付一列，上達三天。

右鄭君所出。

某胎生肉人，枯骨子孫，生長濁世，染亂罪考，宿行積咎，禍高丘陵。天啓其衷，得聞聖化，心開改迹，好生樂道。仰慕靈感，斯求真應，庶蒙清蕩，以延性命，恒捨穢率善，願爲種民，攢求遐年，當須天啓，登山履川，亦賴靈助，注心道門，不敢携貳，並仰貢方物，自輔信。以今即日，受五嶽真形，藏戢一己，與之終始，五八有期，永無中泄。傳授相親，愛護同氣，蠲齊榮辱，天科所祐，不敢慢惰，抵犯禁罔，遵受法訣，封之于心。謹清齋告祭，以爲其始。唯即一列，上達三天，章奏太上，除某三尸，登書生錄，刻題玉札，緘之絳府。五方靈嶽，各道五神，千山百川，時差侍官，營守圖文，防護某身，使長生文存，壽延億千。

靈寶五嶽古本真形圖

五嶽山真形文

靈寶五嶽古本真形圖

家有婦及兒樂道者，未中以大書傳授，且令帶以此文，盛以絳囊，著頭上。辟衆鬼百魅，凶邪不敢犯。子帶此首題猶爾，况其真形大文邪。〔葛洪謂：亦宜齋而佩之。〕

三天太上大道君

三天太上大道君

有命

三天太上大道君

天地山川丘陵

天地山川丘陵

神護我子慎

神護我子慎

害患令久安

害患令久安

長生

長生

三天太上長生符，道士佩之頭上，入山林江海，橫行天下，衆神奉衛，莫敢當此。子齋祭帶，寫如五嶽同。一

名太上道君勅文。天書不可了知，東方朔顯出之。此乃鳥跡以前有法，非三皇之世書也。諸佩之者，與五嶽形共盛。唯仙人題山中名物之處，作漢字，一不得上之耳。

東春

東春

東嶽泰山真形圖


東嶽泰山真形圖

右東嶽泰山形源，周回二千里，在瑯琊界。

南夏

南嶽衡山真形圖

南嶽衡山真形圖




右南嶽衡山形源，周回二千里，在長沙界。

中央戊己土

中嶽嵩山真形圖

中嶽嵩山真形圖




右中嶽嵩山形源，周回一千里，在黎陽界。

西秋

西嶽華山真形圖

西嶽華山真形圖




右西嶽華山形源，周回四千里，南北長在華陰界。

北冬

北冬

北嶽常山真形圖




右北嶽常山形源，周回三千里，在常山界。

黃帝命霍山南儲君

黃帝命霍山南儲君

霍山一名赤城




右霍山形源，周回一千里，在會稽界。

潛山南儲君

潛山南儲君

潛山




右潛山形源，在廬江北界，周回三百里。



青城丈人



青城山一名天國山




右青城山形源，在蜀郡界，周回二千七百里。

廬山使者



廬山




右廬山形，在廬江南界，周回一千一百里。

黑者，山形，赤者，水源，白者，是室穴口也。畫小則丘陵微，畫大則隴岫壯。葛洪謂：高下隨形，長短取象，其源畫神草及石室之處，自是後來仙人輩，於其圖處，畫識之耳。


靈寶五嶽古本真形圖

洞元靈寶五嶽真形圖


五嶽山真形文



三天太上大道君



有命



天地山川丘陵



神護我子慎




害患令久安



長生




東春




東嶽泰山君所領羣神，五千九百九人，在兗州界，周回二千里。

嶽東南




南夏




南嶽衡山君所領仙官七千七百人，在長沙界，周回二千里。

嶽南




中央戊己土




中嶽嵩山所領神童仙女三萬人，在洛陽界，周回一千里。


西嶽華山君所領仙人玉女七千人，在長安東界，周回四千里，南北長。




西秋




北嶽常山君所領仙童玉女二萬人，在常山界，周回三千里。



北冬




霍山真形，在平陽界，周回一千七百里。




黃帝命霍山南儲君

北東嶽



潛山南儲君


每歲山在會稽山界



潛山真形，在廬江北界，周回三千三百里。

潛山南



青城丈人



青城山真形，在蜀郡界，一名天國山，周回二千七百里。

青城山南

廬山使者



廬山真形，在廬江南界，周回一千二百里。



黑者山形，赤者水源，黃點者，洞穴口也。畫小則丘陵微，畫大則隴岫壯。葛洪謂：高下隨形，長短取象。家有蓄圖者，善神守護，其家衆邪惡鬼，災患疾病，皆自消滅也。若上士佩之，則萬神皆爲朝禮矣。山蹠泉脉，源流上下。昔王母授漢武帝本經萬餘言，在圖上。今分爲五局，傳授禁限，其科嚴不可得傳也。

右前七道，三天太上道君長生符，上士佩之頭上，入山林江海，橫行天下，衆神奉衛焉。一名太上道君勅文天書。天文不可了知，東方朔顯出之。

此爲鳥跡已前繇文，非三皇之世書也。諸佩之者，與五嶽真形共盛之。後仙人題山中名芝物處，細字，不得佩之。

太歲年 月 日告行

保舉師

監度師

度師具位

洞玄靈寶五嶽古本真形圖

①「赤」字原缺，據《五嶽真形圖序論》補。

②「咎」：原誤作「然」，據《五嶽真形圖序論》改。

③「相」字原缺，據《五嶽真形圖序論》補。

(王卡點校)

## 067 五嶽真形圖序論

經名：五嶽真形圖序論。編撰者不詳。內引葛洪之說，當出於魏晉。一卷。底本出處：《正統道藏》正一部。參見：《雲笈七籤》卷七九。

昔漢孝武帝好長生之道，常祭祀名山大澤，祈祀靈嶽，以求神仙之應。以元封元年正月甲子，祭嵩高山，起道宮。帝齋七日，祠訖乃還。到四月戊辰，夜閑居，東方朔、董仲舒在側焉。忽見一女人，著青衣，非常麗也。帝愕然問：何人。女曰：我墉宮玉女也。爲王母所使，從崑崙山來語帝。聞子欲輕四海之祿，尋道求生，降帝尊之位，而屢禱山嶽。勤哉有心，似可教者也。從今百日清齋，不交人事。到來年七月七日，西王母當暫來也。武帝

下席跪諾。言訖，玉女隱忽然失所。帝於是登尋真之臺，齋戒存道，其四方之事，權委於冢宰焉。到七月七日，掃除宮掖之內，設座於大殿之上。以紫羅薦地，燔百和之香，張雲錦之帷，然九光微燈，設玉女之裘，葡萄之酒，躬監殺款，以爲天宮之饌。帝乃盛服，立於階下，勅端門之內豎，不得有妄闕者。內外謐寂，以俟仙官。到夜二唱之後，忽見天西南如白雲，鬱鬱直來，遙赴宮庭，須臾轉近。聞雲中有簫鼓之聲，人馬之響，復半食頃間，王母至也。懸投殿前，有似鳥集。或駕龍虎，或乘白鹿，或乘白麟，或乘白鵠，或乘科車，或乘天馬，羣仙數千，光耀庭宇。既至，從官不知所在，唯見王母乘紫雲之輦，又駕九色斑龍。別有五十天仙，側近雲駕，皆身長一丈，同執彩旄之節，佩金剛靈璽帶，天真之策，咸住殿下。王母唯扶二侍女上殿。侍女年可十六七，服青綾之袿，容眸流盼，神爽清發，妙姿絕世也。王母上殿，東向坐，著黃錦袷，文彩明鮮，金光奕奕。

交帶靈飛大綬，腰帶分景劍，頭上大華結，戴泰真晨嬰之冠，履玄瓊鳳文之舄，映玄雲棟，神光曄曄。視之，年三十許，脩短得中，天姿旖靄，靈顏絕世，真靈人者也。下車登牀，武帝拜跪，問寒溫畢，立如也。因呼武帝共坐。帝南向，王母自設厨。厨精麗非常，豐珍之馔，芳華百果，紫芝葳蕤，紛若填櫟。清香之酒，非地上所有，甘氣絕世，殊於俗味，武帝不能名也。又命侍女更索桃果，須臾以玉盤盛桃七枚，大如鴨子，形圓色青，以呈王母。王母以四枚與帝，王母自食三枚。桃之甘美，口有盈味。帝食，輒錄核。王母問：錄核何爲。帝曰：欲種之耳。王母曰：此桃三千年一生實耳，中夏地薄，種之不生，如何。帝乃止。徐乃下地，叩頭自陳曰：微受質不中，耽淪流俗，承禪先業，遂羈世累。政事多闕，兆民無和，風雨失節，五穀不實，德澤不建，寇盜四起，當由其主積罪丘山。然少好生道，仰慕靈仙，未能棄祿委榮，棲跡山林，思絕塵餌，罔知攸向。且棄世尋

真，攢啓無師，歲月見及，恒慮奄忽。不圖天真頓集，今日下臣有幸，得瞻上聖，是臣宿命當得度世，願垂哀矜，賜諸不悟，得以奉承切己之教。王母曰：汝能賤榮樂卑，耽靈味道，自復佳耳。然汝情恣體慾，淫亂過甚，殺伐非法，奢侈其性。恣則裂體之車，淫爲破年之斧，殺則響對，奢則心爛，慾積神損，聚穢命斷，以此蕞爾之身，而宅滅形之賊，盈尺之才，乃攻之百刃，欲以解脫三尸，令身永久，難可得也。有似無翅之鷄，願鼓翼天池，朝生之蟲，而樂春秋者哉。若能蕩此衆亂，撥穢易韻，保神絜於絳府，閉淫宮而不開，靜奢侈於寂室，愛衆生而不危，守茲道戒，思乎靈味，務施惠和，鍊精惜氣，早却浮麗，令百競速逝，汝行有若斯之事，將豈無彷彿耶。如其不爾，無爲抱石而濟長津矣。帝跪受聖誡，請事斯語。帝見王母巾器中有一卷小書，盛以紫錦之囊。帝請問：此書是仙靈方耶。不審其目，可得瞻盼不。王母出示之，此《五嶽真形圖》也，昨青城諸

仙就我請求，今當過以付之。此乃三天太上所出，文祕禁重，豈汝穢質所宜佩乎。今且與汝《靈光生經》，可以通神勸志也。帝固請不已，王母曰：昔上皇清虛元年，三天太上道君下觀六合，瞻河海之短長，察丘山之高卑，名天柱安於地理，頓五嶽而擬諸鎮輔，貴昆陵以舍靈仙，尊蓬丘以館真人，安水神乎極陰之源，栖太帝乎扶桑之墟。於是方丈之阜，爲理命之室，滄浪海島，養九老之堂，祖瀛玄炎，長元流生，鳳麟聚窟，各爲洲名，並在滄流大海玄津之中。水則碧黑俱流，波則震蕩羣精。諸仙玉女，聚居滄英，其名難尋，其實分明。爾乃因山源之規，覩河嶽之盤曲，陵回阜轉，山高隴長，周旋委蛇，形似書字。是故因象制名，定名實之號，盡形祕於玄臺，而出爲靈真之信，諸仙佩之，皆如傳章。道士執之，經行山川，百神羣靈，尊奉親迎。汝雖不正，然數詣山澤，叩求之志，不忘干道。欣子有心，今以相與。當奉深慎，如事君父。泄示凡人，必致禍考。按

九老仙都千明之科，九炁丈人昭生之符，太靈羣文，皆是三天太上大道君所撰，或是三皇天真所造，或是九天父母真人赤童所出。此輩聽四十年，得傳一人。四十年無其人，聽八十年，頓傳二人耳。授非其人，是爲泄天道。可授而不傳，是爲閉天寶。不計限而妄授，是爲輕天老。受而不敬，是爲慢天藻。泄閉輕慢，四者延禍之車也。泄則身死道路，受生形而骸裂。閉則盲聾於來生，命凋枉而卒歿。輕則禍鍾於父母，詣玄都而考罰。慢則暴終而墮惡疾於後世。復有愈此罪者，宗斷而族沒。同道謂之天親，同心謂之地愛。傳授當相親愛，共均榮辱，營心真一，珍惜精液，共養和氣，氣合神歸，必齊靈會。如其不爾，天降汝癘。此皆道之科禁，今故相戒，不可不慎。若汝欲有所授，董仲舒者，似其人也。即命侍女，使更取一圖，以與武帝。侍女探懷中得一卷，形書精明，俱如向者。王母以手付帝，再拜跪受。王母曰：若汝遂尅明正身，反惡修善。復三年七

月，更來告汝道也。須臾，殿南窗朱鳥窗中，有一人來看闕王母，帝驚問何人。王母曰：汝不識此人耶，是汝侍郎東方朔也。是我鄰小兒，而性多滑稽，曾三來偷此桃子。昔爲太上仙官，太上令到方丈，使助三天司命收諸家。朔到方丈，但務山水遊戲，了不共營和氣，擅弄雷電，激波揚風，風雨失時，陰陽錯逆。致令蛟鯨陸行，山崩壤境，海水暴竭，黃馬宿淵，妨農芝田，沈湎玉酒，失部御之和，虧奉命之科。於是九源丈人乃言之於太上，太上遂謫斥，使在人間，去泰清之朝，令處臭濁之倫。近蒙金華山二仙人，及九疑君，比爲陳乞，以行原之。於是帝始知朔非世人也。言語飲酒，因告武帝仙官從者姓字，及冠帶執佩物名，所以得知而記焉。至向曉，王母別去。臨發，人馬龍虎，鼓吹導引，如初來時，雲烝勃鬱，盡爲香氣。極望西南，良久乃絕。

於是帝既見王母，乃信天下有神仙之事，欲有去世計數矣，而淫色自性，殺伐不休，百姓嘆於勞役，死者怨

於無辜，不從聖母之言，遂不復來也。先王母見武帝，多所稱說，或延年之訣，致神之術，帝乃自撰集爲一卷。及所與經圖之屬，帝皆請以黃金之几，封以白玉之函，安著柏梁臺上。後到太初元年，天火焚臺，於是《真形》及《靈光生經》、自撰受集要，遂爾燒失。王母常以武帝不從訓誨，而災之耳。但帝先承王母言，以圖授董仲舒。仲舒登寫，賴此得存也。其後東方朔一旦乘雲龍飛去，同時衆人見後西北上冉冉，仰望大霧覆之，不知所在。帝甚懊恨，自知失道。其年十二月，壇蒿里祠后土，東臨渤海，望祠蓬萊山。春還，受計于甘泉。二月起建章宮。夏五月正曆，以正月爲歲首，色上黃，數用五，定官名，協音律。遣將軍公孫敖築塞外受降城。秋八月，幸安定，遣貳師將軍李廣利發天下勇兵，西征大宛，改曆以正月爲歲首，是王母之意也。鮑靚曰：予察王母衆仙之宗，猶珍貴此文，何凡近小人而欲盼之乎。

漢武帝以王母言問東方朔，朔對如別：祖洲、瀛洲、玄洲、炎洲、長洲、元洲、流洲、生洲、鳳麟洲、聚窟洲，此言皆十洲之名，處巨海之中，是人跡所不逮處。

祖洲在東海中，地方五百里，去西岸七萬里。上有不死之草，草形似菰苗，長三四尺許。人已死者，以草覆之，皆登時活也。未服之，令人長生。昔秦始皇時，大宛中多枉死人橫道。時有鳥如烏狀，數銜此草，以覆死人脸，皆登時起坐。有司奏聞始皇，遣使者齋草以問北郭鬼谷先生。先生云：此是東海中祖洲上不死草也。其草生瓊白中，或名爲養神芝。其葉似菰，生不叢，採止活一人。始皇於是乃遣童男童女五百人，入海尋祖洲，遂不返也。

瀛洲在東海中，地方四千里，對會稽，去岸十七萬里。上生神仙芝草，有玉石，高且千丈，出泉如酒味，名爲玉酒，或爲玉膏。飲數升輒醉，令人長生。洲上多仙家，風俗似吳人。



玄洲在北海之戌亥地，地方七千二百里，去岸三十六萬里。上有太玄都仙伯，治玄丘山。又有風山，聲氣響電，對向天西北門上，多太玄仙宮。

炎洲在南海中，地方二千里，去岸九萬里。上有風生獸，似貂，青色，大如狸。張網取之，積薪數車以燒之，薪盡而此獸在灰中不燃，其毛不焦。斫刺不入，打之如皮囊。以鐵鎚鍛其頭，數千下乃死，而張其口以向風，須臾便活而起。以石上菖蒲塞其鼻，即死。取腦和菊華服之，盡十斤，得五百年。又有炎林山，山中有夜光獸，大如鼠，毛長三四寸，或赤或白。山可二百里許。晦夜望見山林及此獸，光照如燃火狀。取其獸毛，績<sup>①</sup>以爲布，名曰火澣布。衣服此布，垢污以灰水洗之，終不除，唯以火燒之兩食許，出振其垢，更白潔如雪。亦多仙人。

長洲一名青丘，在南海辰巳地。地方五千里，去岸二十萬里。上饒山川，又多大樹。樹乃有二千圍者。一洲之上，專是林木，故或名爲青丘。仙

草靈藥，甘液玉英，靡所不有。又有風山。山弘震聲，上有紫府宮，天真仙女多遊於此。

元洲在北海中，地方三千里，去岸十萬里，上有五芝玄澗。澗水如蜜，服之長生。服其芝不死。亦饒仙家。

流洲在西海中，地方三千里，去岸十萬里。上多山川積石，名爲昆吾石。治其石成鐵，作劍，光明照洞，如水精狀，割玉如割泥焉。亦饒仙家。

生洲在東海寅丑之間，接蓬萊十七萬里，地方二千三百里，去岸二十三萬里。上有仙家數萬，天炁安和，草木常生，長養萬物，地無寒暑，亦多山川仙草。又一洲水味，皆甘如飴酪，至良者也。

鳳麟洲在西海之中，地方千五百里，洲四面有弱水遶之，鴻毛不浮，不可越也。洲上專多鳳麟，數萬爲羣，並有山川池澤，及神草百種，亦饒仙家。煮鳳喙及鱗角，合煎作膠，名之爲集弦膠，或名之爲連金泥。此膠能續弓弩斷弦，連已折之金，並連集，更打折，他

處乃斷，此所集際，終不脫也。

聚窟洲在西海中，居申未之地。地方三千里，接崑崙十萬六千里，去岸二十四萬里。上有真仙靈官宮第，比門不可勝數。及有獅子辟邪，鑿齒天鹿，長牙銅頭鐵額之獸。洲上有大山，形似人鳥，因名之爲人鳥山。山多大樹，與楓木相似，而枝葉氣香聞數百里，名之爲反魂樹。叩其樹，樹亦能自作聲，聲如羣牛响。聞之者，皆心震神駭。伐其木根心，於玉釜中煮取汁，更微火熟煎之，如黑飴狀，令可丸，名之爲驚精香，或名之爲震靈丸，或名之爲反生香，或名之爲震壇香，或名之爲人鳥精，或名之爲却死香，一種六名。斯靈物也，香氣聞數百里，死尸在地，聞氣乃活，不復須以熏死人而生也。

滄海島在北海中，地方二千里，去岸二十萬里。海四面遶島，各五千里，水皆滄色，謂之滄海也。島上專是大山，積石至多。八石芝、石腦、石桂英、流丹黃子之輩百許種，皆生於島。石服之長生。島中有紫石宮室，九老仙

都治處，仙官萬許人。

方丈在東海中央，東西岸相去正等，地方二千里。上專是羣龍所聚，有金玉之宮，三天司命所治處，羣仙不欲昇天者，皆在此洲受太玄生籙。仙家數萬，耕田種芝草，課計頃畝，如種稻狀。亦有玉石泉，上有九源丈人宮，主領天下水神，及龍蛟陰獸之物。

扶桑在東海之東岸，直上岸萬里，復得碧海，廣狹浩汗，與今萬海等。大水既不鹹苦，正作碧色，甘香味美。扶桑地方萬里，上有太帝太真東王所治處，多生林木，葉皆如桑。又有椹樹，長者數千丈，大二千餘圍，樹兩兩同根偶生，更相依倚，是以名為扶桑芝。仙人食其椹，體皆作金色。其樹雖大，其葉椹故如中夏無異，但味絕甘香耳。地生黃金、白玉、瓦石，狀仙人身，亦有長十丈者，亦有長五六尺者。

蓬丘，蓬萊山也。對大海東北岸，山周迴三千里，其外別有圓海遶山。圓海水正黑色，謂之溟海也。無風而洪波百丈，不可得往來。上有九炁丈

人，九天真王宮，唯飛仙能有到其處耳。

崑陵，崑崙山也。在西海之崖申未地也。去咸陽四十二萬里。山高平地萬里，上方千里。形如仰甕，下狹上廣，故名之為崑崙。周匝弱水遶山，上有金城五所，玉樓十二所，流精之闕，光碧之堂，瓊華之室，紫翠密房，西王母之所治，衆仙所宗。上通璇璣九炁，流布帝王，玉衡品物，羣生希奇，出皆在於此，不可具記。

太上名山鼎於五方，鎮地理也；號天柱於岷城，象罔輔也。諸百川極深，水靈居之，其陰難到，故治無常處，非如丘陵而可得論。是以天地設位，因物象之宜，上聖觀方，緣形而著。爾乃處玄風於西北，坐王母於坤鄉。昆吾鎮於流澤，大桑植於碧津。離合天精，而光獸生於炎野；坎總衆陰，是以仙都宅于海島。艮位山方，蓬山填於寅丑，巽體元女，養巨木於長洲。高風鼓乎羣龍之位，暢靈人於遐丘。至妙玄深，幽神難盡，真仙隱宅，靈陵所在，

六合之內，豈唯數處而已矣。此皆舉其標末耳。朔所見不博，未能宣通聖詞。昔曾聞之於得道者，說此十洲大丘靈阜，皆是真仙奧墟，神官所治。其餘山川萬端，並無復及此者也。堯時遣禹治洪水，經諸五嶽，使刻石識其里數高下。其字科斗書，非漢人所了也。今丈尺里數，皆是禹時書也。不但刻度五嶽，諸名山亦然。刻山之獨高處耳。今書處，是朔所具見，其王母所道諸靈藪，禹所不履，唯書於中夏之山石也。

魯女生，長樂人也。少好道，初服餌胡麻，及求絕穀八十餘年。日更少壯，色如桃花。一日能行三百里，走及麀鹿。傳世見之，二百餘年。後採藥於嵩高山，忽見一人坐礪上。女生叩頭，再拜稽首，乞長生之要。其人曰：我三天太上侍官者也。汝當得仙，故得見我。我將授汝寶文祕要，可以威制五嶽，役使衆靈。良久，乃以《五嶽真形圖》以與之，並告其施用節度。女生道成，一旦乘龍，與知交故人

別，云入華山中。女去<sup>③</sup>。後復五十年，先相識者逢女生於華山廟前，乘白鹿，從玉女三十人，并令謝其鄉里親戚故人，甚分明也。說女生顏色更少。五嶽圖與王母訣，正同今得見於世間者，起由董仲舒，及女生二人得之。仲舒臨去，以傳欒巴。女生後以傳封君達。晉魏際，君達入玄丘山，臨去傳鄭氏。

弟子葛洪曰：夫至道無形，機妙難論。神仙之事，誠非小醜所宜緣尋。然世人不覩其門，皆謂之無。既見真驗，復不肯以語人。是以清濁乖律，香臭絕倫。若道士得祕聖之書，皆當杜於一人口者，則靈真之文，將墜於獨見，何緣得存流於百代乎。洪謂傳授但當必得其人耳。豈可都閉耶。自江東都無有此書，若鄭君復祕而不出，則斯文永翳也。昔曾以此白鄭君。鄭君曰：道書人皆有之。如三皇天文大字，及靈書至妙，修勤求慕，時或聞見。《五嶽真形圖》，自錄之首，吳越之人，無有得傳。將斯文之不出，文貴而不授乎。不審先生有此書與不。儻令魚

目之珠，映於九陽之光；滄丘瓦石，斲盼南和之肆。若遂仰瞻天真，則洪心堅愈深。鄭君曰：此書吾似有之。傳授禁重，不可妄泄，傳非其人，罪咎必至。凡道士輩，雖心希清正，而行多不備。不備則有慮，有慮則禍詣。亦何急令致禍之書，而爲刀鋸乎。是以先

流得之者，又不敢輕以授人，便自都絕，正如此耳。卿極有心，必能通玄暢昧，是故相告，且勿宣之。吾先受此書於青牛先生，自吾受圖以來，未傳一人。依仙科當付一人，乃得絕身棄跡耳。世上波波，不可復停，行當以此文與卿。復是一年許，七月閑夜，見呼告曰：吾方當去，可具素寫圖。洪乃齋盛祭受。今施用節度，皆出於鄭君也。鄭君說青牛先生，仙人封君達，本隴西人也。初服黃連五十餘年，入鳥鼠山，又於山中服練水銀百餘年。還鄉里，年如三十者。常乘青牛，故號青牛道士。行聞有疾殆死者，識與不識，便以腰間竹管中藥與服之，或爲下鍼，應手皆愈。世多得其驗效，都不以姓字語

人，人通識乘青牛爲名耳。人間復二百餘年，入玄丘山中，不知所在。

青牛先生言：家有五嶽真形，一嶽各遣五神，來衛護圖書。所居山川近心者，山澤神又恒遣侍官防身營家，凶逆欲見傷害，皆反受其殃。辟除五兵五溫，可帶履鋒刃。又司人之姦穢，言人之不正。不正者禍身，姦穢者禍門。是以宜深忌慎。人有帶此文，及執持以履山林者，百山地源靈主，皆出境拜迎。尊貴圖信，鬼神猶執卑降之禮，何況凡人，而可慢惰哉。

鄭君言：在家一歲，輒一祭圖。令人居家富昌，宦身陽升，行來諧合，凶禍遠避，求欲得願，長生延年。若山林獨處，可虧祭也。所以然者，山林幽寂，栖心無邪，又非酒殺所出，唯當恭而已矣。家居混雜，有婦女雞犬塵穢生於部界，惰慢出自言語，先或污濁神炁，或產乳堂宇。是故齋祭靈圖，以謝灾癘。以月建齋三日，又須夜半之時，出庭中，或密室中，西向，勿令人知<sup>④</sup>。昔黃帝遊觀六合，後造神靈，見東

中西北四嶽，並有佐命之山，唯衡山峙立無輔，乃與昌宇、力牧、方明等，章祠三天太上，使命霍山、潛山爲南嶽儲君，拜青城山爲丈人，署廬山爲使者，令總衡嶽以鼎鎮，舉德真而爲主。儲君者，衡嶽之副君也。吳越人或霍山爲嶽，其實非正也。

授圖祭文 鄭氏所出

某以胎生肉人，百官子孫，沉湎囂惡，流濁世務，運遇有幸，得奉大化，滌蕩穢俗，許以更始，修心慎違，希企靈真，夙夜馳競，不敢寧捨。昔以某年月日，歲在某處，受先師甲乙真形，按九都千明之科，許得傳授。謹按道法，當付良密。今有同志道士，某郡縣鄉里男生某甲，年如干歲，小心勤翼，必能宣啓靈化，敷正神炁。即以今年月，歃血誓書，授其真圖，委繒告盟，禁以不傳。天親同心，常相愛護，不得棄元崇末，要術榮利。其五八大約，禍福所期，量己審人，任之處焉。謹清齋祭付，唯即一列，上達三天。

受圖祭文 鄭君所出

某本胎生肉人，枯骨子孫，生長濁世，染亂罪考，宿行積咎，禍高丘陵。天啓其衷，得聞聖化，心開改蹟，好生樂道，仰慕靈感，思求真應，庶蒙清蕩，以延性命，恒捨穢率善，願爲種民，攢求遐年，當須天啓。登山履川，亦賴靈助，注心道門，不敢携貳，並仰貢方物，自輔信，及今即日，受五嶽真形，藏戢一己，與之終始。五八有期，永無中泄，傳授相親，愛護同氣，蠲齊榮辱，天科所祐，不敢慢惰，抵犯禁網。遵受法訣，封之于心。謹清齋告祭，以爲其始。唯即一列，上達三天，章奏太上，除某三尸，登書生錄，刻題玉札，緘之絳府。五方靈嶽，各遣五神，千山百川，時差侍官，營守圖文，防護某身，使長生永存，壽延億千。

鮑氏佩施用

靚按黃帝橐籥五匱內真文云：此書是三天太上撰次所出。曾聞之於先達者，言西王母紫蘭宮屋，通畫此象。諸壙宮玉女仙人服衣，皆以此形畫之。

昔遣中黃太一，以此圖下授名山隱逸有仙錄者，結約五八之年而傳也。自無運命之遇，莫見其篇目矣。如魯女生，山中受之，皆此類也。仙人云：道士佩此文，入山林川澤，所經諸靈神，皆出郊境奉迎焉。然五嶽各有所部，東方之山，則屬東嶽，其西嶽、南嶽、北嶽亦同。唯平地江河淮水，及中央之山陵，皆統中嶽之部也。諸入山採八石，石衆石腦，流丹流珠，飛節黃子，石髓桂英，及芝草諸神藥，自無五嶽佩之，此仙物終不可得也。欲佩之法，以青爲繒，或用白爲繒，盛以紫囊，或帶之頭上，或帶之心前，或肘後。山無大小，皆有靈神。神來形見，自稱某山某中來迎拜也。是太上真人以爲所使，策文五嶽衛此圖書。如今世人，敬監司之章節狀，所以丘山之神而來拜謁也。受付之法，限之四十年一傳，歃血委暫而約。人有此文在家者，五嶽君各遣五神來奉衛圖文。所居山川源澤諸靈，各遣侍人營護子耳。他人憎嫉謀議，口舌凶逆賊害，及縣官繫子者，

五嶽所衛二十五神，及山川侍官，即白所居之部嶽君。嶽君即使鬼物反害，彼人自中也。奉之者，不可不正身清神。若行邪亂慢，不尊所受，忽賤靈信，輕侮宗末者，禍至滅家，不可不慎。入山無真形，則衆精壞人。採藥不得真形，則羣靈蔽之。爲道士不得真形，則魂氣不定，三尸亂干。術士不得此文，皆不成就。但有此文以佩身，仍足彌綸衆神，橫行天地。在家則神人奉衛，入山則群靈奉迎。採藥服芝草，則真仙營護。經疫遇害，則灾自滅。爾乃虛往實來，真驗禍福。將有道者，其祕而尊焉。

漢元封元年西王母授孝武皇帝。

太上真仙授仙人長樂魯女生。

五嶽圖序東方朔所出

五嶽真形者，山水之象也。盤曲迴轉陵阜，形勢高下參差，長短捲舒，波流似於奮筆，鋒芒暢乎嶺嶠。雲林玄黃，有如書字之狀。是以天真道君，下觀規矩，擬縱趣向，因如字韻，隨形而名山。子有東嶽形，令人神安命延，

存身長久，入山履川，百芝自聚。子有南嶽形，五溫不加，辟除火光，謀惡我者，反還自傷。子有中嶽形，所向唯利，致財巨億，願願尅合，不勞身力。子有西嶽形，消辟五兵，入刃不傷，山川名神，尊奉司迎。子有北嶽形，入水却灾，百毒滅伏，役使蛟龍，長享福祿。子盡有五嶽形，橫天縱地，彌綸四方，見我懽悅，人神攸同。昔黃帝徵師諸侯，與蚩尤戰於涿鹿之野，遂擒之。諸侯咸宗爲天子，代神農氏，是爲黃帝。天下有不順者，從而征之，破山通道，未嘗寧居。東至于海，登太山及岱宗；西至崆峒，登雞頭；南至于江，登熊湘；北逐蟬粥，金符釜山，而邑于涿鹿之阿。遷徙往來，無有常處。察四嶽並有佐命之山，而南嶽獨孤峙而無輔。乃章祠三天太上道君，命霍山、潛山爲儲君。奏可。帝乃自造山，躬寫形像，連五圖之後。又命拜青城爲丈人，署廬山爲使者。形皆以次相續，此適始於黃帝耳。

東嶽泰山君，領群神五千九百人，

主治死生，百鬼之主帥也。血食廟祠，宗伯者也。俗世所奉鬼祠邪精之神，而死者皆歸泰山，受罪考焉。諸得佩五嶽形，入經山林，及詣泰山，君及諸山川百神，皆出境迎拜子也。泰山君服青袍，戴蒼碧七稱之冠，佩通陽太朔之印，乘青龍，從群官來迎子。

南嶽衡山君，領仙官七萬七百人。入諸南嶽，所部山川神皆出迎。南嶽君服朱光之袍，九丹日精之冠，佩夜光天真之印，乘赤龍，從群官來迎子。

中嶽嵩山君，領仙官玉女三萬人。入諸山，是中嶽所部名靈，皆來迎。中嶽君服黃素之袍，戴黃玉太乙之冠，佩神宗陽和之印，乘黃龍，從群官而迎也。中嶽是五土之主，善敬之。太上常用三天真人有德望者以居之。

西嶽華山君，領仙人玉女四千一百人。道士入其所部之山川，神並來迎。華山君身服白素之袍，冠太初九流之冠，佩開天通真之印，乘白龍而來迎子。

北嶽恒山君，領仙人玉女七千人。

其入所部之山川，神皆來迎。北嶽君服玄流之袍，冠太真冥靈之冠，佩長津悟真之印，乘黑龍而來迎子。

青城丈人，黃帝所命也，主地仙人，是五嶽之上司，以總群官也。丈人領仙官萬人，道士入其山者，丈人服朱光之袍，戴蓋天之冠，佩三庭之印，乘科車，從衆靈而來迎子。

廬山使者，黃帝所命，秩比御史，主總仙官之位，蓋五嶽之監司。道士入其山者，使者服朱緋之襪，戴平華之冠，佩三天真形之印，而來迎子。亦乘科車，從以衆靈。

霍山南嶽儲君，黃帝所命，衡嶽之副主也。領群靈三萬人，上調和氣，下拯黎民，關校衆仙，制命水神，是峻驗之府，而爲諸靈之所順也。道士入其境，儲君服青錦之袍，戴啓明之冠，佩道君之玉策，而來迎子。或乘科車，或駕龍虎。

潛山儲君，黃帝所命，爲衡嶽儲貳，時參政事，令職似輔佐者也。入其山，潛君服紫光繡衣，戴參靈之冠，佩

朱官之印，乘赤虬之車，而來迎子。諸佐命山君，並輔弼嶽君，預於位政。道士入其山，佐命服朱袍，戴仙華之冠，佩太上真形之章，而來迎子，所乘無常。

東方朔言：古畫五嶽真形首目者，乃是神農前世，太上八會群方飛天之書法，殆鳥跡之先代也。自不得仙人譯注顯出，終不可知也。凡道士欲佩圖進取山象，及書古文卷畢，以此題外面，然後盛之帶符。當得正月建寅，齋七日。齋中寫白訖，醮如傳授法，但易章中自說辭旨，隨人也。凡寫書，皆燒香於左右。

### 五嶽真形圖序論

①續：原作「續」，據前后文義改。

②日：原作「田」，據前后文義改。

③「去」字據文義補。

④「知」字據文義補。

⑤天下：原作「天子」，據《洞玄靈寶五嶽古本真形圖》改。

⑥「之」字據《洞玄靈寶五嶽古本真形圖》補。

（王卡點校）

## 068 玄覽人鳥山經圖

經名：玄覽人鳥山經圖。又名《靈寶五符人鳥經》。原不題撰人。陶弘景《真誥》卷二十稱為南朝陸修靜敷述。一卷。底本出處：《正統道藏》洞玄部靈圖類。參見《雲笈七籤》卷八十。

太上曰：無數諸天，各有人鳥之山，有人之象，有鳥之形，峰巖峻極，不可勝言。玄臺寶殿，尊神所居，林澗鳥獸，木石香花，芝草衆藥，不死之津，長生之液，又難具陳，陳之無益於學。學者自應精尋，得一知萬，了然究知。教須題示，故略標文，妙氣結字，聖匠寫之，以傳上學，不泄中人。妙氣之字，即是山容，其表異相，其跡殊姿，皆是妙氣化而成焉。玄達之思，閉目見之，周覽既畢，行之有徵。妙氣既降，肉身

能飛，久鍊得妙，肉去妙充。其翔似鳥，山遊三界之外，其神真人，入宴三清之中。總號人鳥。學者由山，緣山至道，永保長存，自非至精，勿妄叩也。

太上曰：人鳥山之形質，是天地人之生根，元氣之所因，妙化之所用。聖真求其域，仙靈仰其神，敬而事之，存而念之，受而醮之，繕而帶之，精而行之，和而密之，久無怠懈，三氣調均，生身生子，爲道種人，在世行化，入山研方，出處自在，魔不敢當。於是朝致五嶽，使役八溟，從三天之君，佩日月之精，知之不死，習之永生，諦之合智，究之同神。其山之上，元始天王所居，其山之下，衆聖真仙所處。其山之氣生五色之水，名反魂，流液成脂，名曰震檀之香。西王母初學道，詣元始天王，二千年道成德就，應還崑崙之山。臨去辭元始天王，共刻銘人鳥山上虛空之中，製作文字。字方一丈，懸在空中，以接後學，于今存焉。九老仙都君、九氣丈人，圖畫山形，佩之於肘。天帝寫空中之書，以附人鳥之體，百年

一出，以傳真人。道士有此山形，及書文備者，便得仙度，遊宴崑崙。能讀此書萬徧，修行不負文言，天帝君即遣使，雲車羽蓋，來迎之也。不須服御丹液，無勞導引屈伸，精之不休，自獲升天矣。


太上曰：凡能清齋三月，別於靜室修行，仙人當降，自以此文字語人，受之密遵，速成真聖。道士佩之，役使萬神。正月有甲子，二月有壬申，三月有戊子，一年之中，唯取一日，祭醮山形於金鏡之上，相傳口訣之事，慎勿妄泄書文。若年中無此三日，或有而邂逅，趣得甲子，一年三醮也。醮時皆齋，清嚴禁斷。明月之夜，露出中庭，不須壇纂，不可他知。密自灑掃淨席，向南北敷別席，向北施禮。先以明鏡九寸面者，置座中央，紫文複傘，以罩座上，紫錦巾囊覆籍山圖，正安鏡中。清酒三椀，置圖之前，香脯棗果，圓施鏡外。酌酒半椀嗽口，捻香即位。閉目叩齒三通，存思依常，鳴鼓發鑪，亦如常法。又三捻香，臨目見太上大道、

十方天尊、元始真王、人鳥山元氣生神、太帝君、雲駕羅列，布滿空中，同來向座，良久分明。仍密稱名位，臣妾姓名，奉請太上大道、十方天尊、元始真王、人鳥山元氣生神、太帝君、一切諸靈官，今日吉時良辰，敢薦芬芳，表獻至誠，仰希垂降。臣妾某等稽首禮拜，仍禮三拜，伏地閉目，存神降座，良久乃起。又三拈酒，長跪稱位臣妾姓名，上啓太上大道、十方天尊、元始真王、人鳥山元氣生神、太帝君，一切神明：臣妾叨恩得見，今日奉對尊神，喜懼交集，惟願大慈，已生當成，使臣妾學道得道，求仙得仙，神通自在，永保長存。小醜賤臣妾，不敢多陳，不勝踴躍屏營。謹稽首禮拜。三拜，拜畢，三拈酒，拈畢，又啓如此。三拈三啓。畢，三捻香，起倚送神，稱位臣妾姓名，上啓太上大道、十方天尊、元始真王、人鳥山元氣生神、太帝君，一切靈官，緣恩上請，紆迴雲儀，神駕已整，還升三清。臣妾戀慕，俯仰屏營，惟願大慈，流布洪恩。臣妾得道，謁見王宮，後宜有請，仰希重降。臣妾某等稽首禮拜。三拜

畢，起，復爐。復爐畢，秉一椀酒，瀉浸四周。畢，依次斂之也。同志者還房進胙，不得妄與非法之人。夫妻接待，皆同此法。不同不得交會。此禁至重，明各慎之。

清齋千日，丹書山形於薄紙上，方三寸至五寸，玉池之泉，向王吞服。一服長生不死，二服神仙飛行，三服升登尊位，與道合同。清齋起圖，佩之二年，晨夕誦文，吉日修事，慎終如始。一千日限足，遊行山澤，威制五嶽，三河四海，八溟九地，一切神靈，奉迎拜謁，功德流布。五年七年，不過九年，超登三清矣。

太上人鳥山真形圖



太上玉晨大道君曰：人鳥山名甚多，或名須彌山，或名玄圃山，或名大地金根山，或名本無妙玄山，或名元氣寶洞山，或名神玄七變七轉觀天山。一山七名，總號玄覽。滌除疵漏，集會廣澄，其高無極，勢與道同。示應有崖，竦入玄空，流衍基布三百六十億萬里。面有二百四十萬門，內外皆自然七寶宮殿，神仙所遊，聖真息處。元始天王治在山上，上面又有天帝宮，太帝室，上清真人更相盼接，不可勝數。山中自然有金液還丹，七名靈香，其香不



焚，常生妙氣，逆風遠聞，七千里外。神仙之香，得者不死。椿林寶木，金玉之樹，光明耀日，精徹虛空，動搖發響，自成八音。金翅鳳凰，鵬鳥朱雀，神龍麒麟，獅子銅頭鐵額，辟邪鑿齒。大神禽獸，遊其寶林之中；巨鯤鱗族，漾其玉池之下。靈物奇瑞，不可具稱。粗標言之，以舉大槩耳。山內自然之字，一十有一，其訣口中，寄文附出，弓龍行神，出除凶殃，辟非祥山，外空虛之。字向左百二十四，向右百二十，合二百四十四字。誦之在心，訣在師口。

玄覽人鳥山經圖


①「辰」字原缺，據前後文義補。

（郭清點校、王卡復校）

# 069 太上洞玄靈寶五嶽神符


## 神符

經名：太上洞玄靈寶五嶽神符。又名《五嶽神仙圖》。撰人不詳，約出於南北朝。唐法琳《辨正論》已引。一卷。底本出處：《正統道藏》洞玄部神符類。




神仙圖曰：東方泰嶽祇曰岱宗，元氣上連歲星，其山青，靈老君治其

中，主春氣，生萬物。列從青腰玉女百二十人，主百二十府。變化玉女九人，主九州。山精玉女萬二千人，主遊護天下，使甲乙之神行天德，使寅卯之神正地氣。名山大澤天下萬神，常以立春之日升岱宗之山，入青石玉闕之宮，謁青靈老君，受玄符。出乘條風，各還四方，召使百鬼，斬殺惡神。有不從玄符者，天滅其精，不得享其祭祠，所以佐天地生人物也。以條風之氣蕩淑人形，人形不正，正之以符。常起甲乙，治寅卯，受符應當拜者，皆回向日晷。




神仙圖曰：南方泰嶽祇曰南衡，元氣上連熒惑之星，其山赤，太陽炎老君治其中，主夏氣，長萬物。列從泰丹

玉女百二十人，主百二十府。變化玉女九人，主九州。山精玉女萬二千人，主遊護天下，使丙丁之神行天德，使巳午之神正地氣。名山大澤天下萬神，常以立夏之日，升南衡之山，入赤石玉闕之宮，謁炎老君受玄符。出乘長風，各還四方，召使百鬼，斬殺惡神。有不從玄符者，天滅其精，不得享其祭祠。所以佐天地、生人物也。故以長風之氣蕩淑人形，人形不正，正之以符。常起丙丁，治巳午，受符應當拜者，皆回向日晷。




神仙圖曰：中央泰嶽祇曰嵩高，元氣上連鎮星，其山黃，黃老君治其中，主四季之氣，統四嶽之神，總理萬


物。列從黃素玉女，四方變化玉女各五萬人，主巡行。山精玉女五萬人，主遊護天下。使戊己之神行天德，使丑辰、未戌之神正地氣。名山大澤天下萬神，常以四季正月晦，升嵩高，入黃石玉闕之宮，謁黃老君，受玄符。出乘八風，各還四方。玄符常在己，不言而道自存，不行而道自明，淡泊無爲，爲道之根，出則病病，故而不病。吾之病，死無從來。是以玄符長守子命，華蓋蓋之，延年以鎮星。星杆子厄，大闔天門，廣地戶，窈窈冥冥，萬神自然。五嶽之玄符，五德之爲信，賞善罰惡，養人物也。故以八風和符，調人正之，受符應當拜者，皆回向日晷。







神仙圖曰：西方泰嶽祇曰西華，元氣上連太白星，其山白，皇老君治其中，主秋氣，成熟萬物。列從白素玉女百二十人，主百二十府。變化玉女九人，主九州。山精玉女萬二千人，主遊護天下，使庚辛之神行天德，使申酉之神正地氣。名山大澤天下萬神，常以立秋之日，升西華之山，入白石玉闕之宮，謁皇老君，受玄符。出乘清風，各還四方，召使百鬼，斬殺惡神。有不從玄符者，天滅其精，不得享其祭祠。所以佐天地、成人物也。故以清風之氣蕩淑人形，人形不正，正之以符。常以庚辛治申酉，受符應當拜者，皆回向日晷。




神仙圖曰：北方泰嶽祇曰北恒，元氣上連辰星，其山黑，太陰玄老君治其中，主冬氣，閉藏萬物。列從太玄玉女百二十人，主百二十府。變化玉女九人，主九州。山精玉女萬二千人，主遊護天下。使壬癸之神行天德，亥子之神正地氣。名山大澤天下萬神，常以立冬之日，升北恒之山，入黑石玉闕之宮，謁玄老君，受玄符。出乘涼風，各還四方，召使百鬼，斬殺惡神。有不從玄符者，天滅其精，不得享其祭祠。所以佐天地、藏人物也。故以涼風蕩淑人形，人形不正，正之以符，符常起壬癸，治亥子。受符應當拜者，皆回向日晷。






神仙圖曰：五嶽真人鎮天子宮殿堂，法用雄黃五斤，每嶽用一斤，以蠟密作人，長尺二寸，置五斗大瓶中，隨方色懸置殿中大梁，利宮室，除凶惡，厭服四方。國中興盛，來福萬年。

白虎符




老子曰：堯以祭法授舜，舜以正月甲午，於歷山下祭圖玄符。到四月，神使騎白鹿，言西王母，以白環獻舜。元年二月，舜以授禹。其年六月，景雲三見。祭法鼓吹大鼓，召直符。一直符，二鼓音，二直符，二鼓音，千二百直符到，然後請變化玉女，次請五行山精玉女，然後請上皇神耳。三日奉戒立壇，即香火三，果實追四時，中壇按上下五色為藉。勿妄傳泄。

五鎮符




右符厭鎮東方惡氣木精。毒害流行，寇賊數起，五穀不豐，民多妖災，暴


水出，蝗蟲起，此勾芒神所為。厭鎮之法，用三牲物極東界上，先祭天地。壇面十二丈，以帛布為藉面六十杯，用米一斛二斗，五彩校以白土，作人龍符，西方丹書素丈二尺，白甕十二枚，以雄黃六兩，丹砂十二斤，以著甕中。符在上，蠟密塞口，蓐收印封，投國東界上深淵之中，勿令兆見。



右符厭鎮南方惡氣火精。毒害流行，寇賊數起，五穀不豐，民多流移，澱河海江，此是祝融之神所為。厭鎮之法，用三牲物於極南水上，先祭天地。其壇面十二丈，以帛布為藉面六十杯，一斛二斗白米，五色校以黑土，作人龍符，北方丹書帛丈二尺，黑甕十二枚，雄黃六兩，丹砂十二斤，以著甕中。符在上，蠟密塞口，玄冥印封，投南界深淵之中，勿令兆見。



右符厭鎮中央四氣土精。毒害流行，山崩地動，四夷不安，此是后土神所爲。厭鎮之法，用三牲物於國中央，平地立壇面二十八丈，面百二十杯，以帛布爲藉。用一斛二斗米，五彩校青土，作人龍符，東方丹書青丈二尺，白甕十二枚，雄黃六兩，丹砂十二斤，以著甕中，蠟密塞口，勾芒印封，投國中。




右符厭鎮西方惡氣金精。毒害流行，寇賊數起，五穀不豐，軍士擾動，暴水橫出，蝗蟲害穀，此蓐收神所爲。厭

鎮之法，用三牲物於極西界上，先祭天地。壇面十二丈，絳布爲藉面六十杯，米一斛二斗，五色校以赤土，作人龍符，南方丹書絳丈二尺，赤甕十二枚，雄黃六兩，丹砂十二斤，以著甕中。符在上，蠟密塞口，祝融印封，投西界上深淵之中，勿令兆見。






右符厭鎮北方惡氣水精。毒害流行，運陰大雨洪注，水出山崩，賊虜暴起，是玄冥之神所爲。厭鎮之法，用三牲物於極北界上，先祭天地。壇面十二丈，以黃布爲藉面六十杯，米一斛二斗，五色校以黃土，作人龍符。中央丹書黃丈二尺，黃甕十二枚，雄黃六兩，丹砂十二斤，以著甕中。符在上，蠟密塞口，后土印封，投北界上深淵之中，勿令兆見。

太平符




堯鳳凰元年正月甲子，師巫咸，受堯天子，王有天下，五嶽四瀆山川，常禁司神，天有厭鎮，以威四海，服八夷，兵寇不起，疾疫自除，與響相應，神常助之。祭法用三牲物，牛角五寸，羊角七寸，脂百二十斤，清酒五斛，黃粢米飯，果實十二，香火每面三枚，壇面二十八丈，白茅爲蓆，長二尺二寸，亦用粢米五斗，千二百杯，面四百杯，二丈八尺長竿立之中庭，十二丈旛，四方等，五大案，二十四杯，合百二十杯，五色相校，書繒四丈一尺。清人公子內臣，臨祭三日受戒。元年三月，祭受福氣見，三月令平氣見，三年天下太平。

威德符



上皇威德符。符主貴人三公以下，至令長，諸印綬長吏，常以正月上王之日，受此符以投綬囊，臣事帝王，人君吉慶，伏鬼神，安人民，息盜賊，官保遷利，百事吉祥。

五將軍符



范蠡五將軍，主軍事，以符破敵厭衆，萬人不敢當向此符者。范蠡後來敗吳，以季庚之日，醮此符於南山之上，越王遂霸瑯琊。勾踐智褊，猜忌在心，不能克成帝業，遂乃憂樂易情，殘

忍易恣，朽木難雕。范公知機，肥遁齊境，潛修祀醮，密禱天人，後為齊相，號鷓夷子皮。自歎居家則致千金，仕宦則致卿相，此布衣之極，久受尊名不祥，乃歸相印。又居陶，富高前世，恩被後生，號陶朱公。本字少伯，徐人，師太公呂尚，常以妙法獎導善人，受周、蘇二君，及秦之四皓。漢祖密事，悉委張良，良親四皓，恒共修功。朱公弟子又有珠仲，販珠會稽，獻術高后，后不能用，與圖俱藏也。

太上洞玄靈寶五嶽神符

(郭清點校、王卡復校)

# 070 上清金母求仙上法

廬山李玄真演


經名：上清金母求仙上法。唐廬山道士李玄真撰。纂集譯解靈寶經中符文。一卷。底本出處：《正統道藏》洞玄部神符類。

王母請問太上道君曰：不審靈寶經中符圖，則有文字，其文祕隱，未蒙訓授，夙夜祇仰，難觸靈顏。妾誠猥陋，任居總真，未審符訣，可得便授，開悟未聞，如蒙曉究，則遭啓拔，運遇自然。

道君曰：夫靈寶之文，生乎龍漢，至于今日，累經劫運，有若塵沙之數。符圖寶祕，文字幽昧，昔元始火鍊真文，瑩發光芒，文字既顯，吾得曉焉。元始天尊登命五老，輔衛五篇真文符訣，幽藏金闕之內，自非得道成真，莫

得知究。昔元始天王於金格玉臺之上，賜授衆符音訣，聽傳有道之人，云一劫之周，當有邈世高賢，白帝西靈之質，請求此文。子今有問，其驗已明，輒不隱藏，演而宣之。子宜寶錄，慎勿輕宣，若有得者，仙道便成。今繕爲一卷，先畫真符，訣解其音，唯有太素陽生一十九符，緘祕其文，在大小劫中，來運冀有可期。今傳子靈寶見出真符，解音如左。卷內符並朱書。

## 第一解五方真文十符音




音曰：九氣青天，以明正道，玉符攝氣，衆真所寶。宛。十七字。




音曰：日月以定，山水以開，三天


大慶，羣真徘徊。十六字。  
右東方二符音。




音曰：元始上帝，以開天地。八字。



音曰：玉音吐氣，三素以法，保命定仙，玉曆定封。十六字。  
右南方二符音。




音曰：總攝羣仙，制召河源。八字。



音曰：總召天地，九元以判，同係王氣，上帝遙觀。黃帝。十八字。  
右中央二符音。




音曰：行真攝氣，正萬神。七字。



音曰：策駕五老，西盼九都，億劫同會，明定九河。羅天。十八字。  
右西方二符音。



音曰：玄高玉清，攝召北酆。八字。





音曰：北斗定會，九期景散，八極明石，玄滋。十四字。  
右北方二符。

第二解策板上下二符音




音曰：天靈步兵，太一升天，在地開曰生天命威命主尸星王地命出月天地度。二十八字。  
右策板上符音。  
中板別文




音曰：慧昌斬開山庭人。七字。


第三解絳杖中五符音




無上大真  
絳繒  
青畫



上道統御  
黃繒  
朱畫



三天靈文  
白繒  
黃畫



洪灾度人  
黑繒  
白畫

方西


央中

方南

方東




方北




開道赦魔  
青繒  
黑畫

右絳杖中五符音。本命符亦依方用文。


第四解二十四生三部符音




青天總氣




元始上精




直符守吏




制御艷山




召龍負水



羣魔送迎




運交五宿




與我俱仙


右解上部八符音。每四字為一首，合三十二音。



中始太真




五靈高尊




八朗興雲



所誅無蠲



五色鬱勃



出幽入冥

諸天恭奉

諸天恭奉

神叶上清

神叶上清

右中部八符音。每四字為一首，合三十二音。

羅佩四門

羅佩四門

所呼立前

所呼立前

日月五星

日月五星

七元諸天

七元諸天

傾河負水

傾河負水

豁若火鈴

豁若火鈴

召制羣魔

召制羣魔

風馳速行

風馳速行

右下部八符音。每四字為一首，合三十二音。

第五解八景錄五方魔王姓諱符音

九氣天中空 姓 彤 武諱 素 齒成 一姓岱 諱崇媚

三氣天中空 姓 泓 仙諱 翫 由肅 一姓鼎 諱聞句

中央高皇天中 姓 志 天門諱 慤 狂 一姓碑 諱破洞

七氣天中空 姓 熒 黃赫諱 張 市 一姓晃 諱張虎

五氣天中空 姓 康 徐諱 慤 值事 一姓由與 諱玄風

洞黑靈魔王 姓 康 徐諱 慤 值事 一姓由與 諱玄風

第六解三部八景三篇玉文符

玉文符

玉文符

玉文符

阿房，統靈威戶，玉衡攝氣，腦華玄觀，  
 統御上部，通神達古。三十二字，青筆書文。

音曰：上天虛無，玄洞九五，太上  
 阿房，統靈威戶，玉衡攝氣，腦華玄觀，  
 統御上部，通神達古。三十二字，青筆書文。

音曰：赤明開真，三天氣和，洞丹  
 陽光，五藏不枯，丹天所保，朱宮扶蘇，  
 納鍊流泉，生元無徂。三十二字，紫筆書文。  
 一云三氣所保。

音曰：赤明開真，三天氣和，洞丹  
 陽光，五藏不枯，丹天所保，朱宮扶蘇，  
 納鍊流泉，生元無徂。三十二字，紫筆書文。  
 一云三氣所保。

音曰：黃中理氣，元生自在，胃管  
 幽通，六腑俱存，白元公子，桃康德淳，  
 養育朱丹，洞神往還。三十二字，黃筆書文。  
 一云元生自尊。

音曰：黃中理氣，元生自在，胃管  
 幽通，六腑俱存，白元公子，桃康德淳，  
 養育朱丹，洞神往還。三十二字，黃筆書文。  
 一云元生自尊。

第七解八景錄後符




音曰：日月七星，上三天元，合九祖父母，太真科盟，仙人玉女，洞八十一靈寶鎮真師王君，度某甲魂真，生死同盟。

右八景錄後符音。

第八解五方五牙玉文符音




音曰：東方青牙，服食青牙，飲以朝霞。十二字。



音曰：南方朱丹，服食朱丹，飲以丹池。十二字。



音曰：中央戊己，昂昂太山，服食精氣，飲以醴泉。十六字。




音曰：西方明石，服食明石，飲以靈液。十二字。



音曰：北方玄滋，服食玄滋，飲以玉飴。十二字。

右解五方五牙玉文符音。六十四字。

第九解五方五稱符音




音曰：東明都官，召錄青天，徘徊


星宿，二氣朗分。




音曰：南生百遼，三氣乘玄，召真躬伏，莫不輔靈。



音曰：西乘佩真，玉道釐素，禁制虎豹，綱維定布。



音曰：北玄大神，統乘元綱，七斗迴轉，百魔自藏。



音曰：中御八方，豁若龍飛，左佩火鈴，天羅抗輝。

右解五方五稱符音。

第十解定志兩半初分音

無死之元，無死之玄，無死始，無死空，無死分，無生上，無生下，無生左，無生右，無生中。氣轉空，生空入空以爲盟。生氣左，死氣右，兩半成一受氣。

券約信誓。

右解定志兩半初分音。六十字。

牒符已出，音訣未出如左：

- 九天太素陽生符；
- 三天太玄陰生符；
- 九天玉真長安神飛符；
- 三天真生飛神符；
- 東方青帝陽九百六三符；
- 南方赤帝陽九百六三符；
- 中央黃帝陽九百六三符；

西方白帝陽九百六三符；  
北方黑帝陽九百六三符。  
右一十九符，音未出。

廬山崇玄館北嶽遊玄先生，遼東李玄真敬白同法先生道士：相與天義，共崇至業，接濟三惡，開津五道，導世隆福，陶鈞萬物。夫三洞御運，起乎龍漢，大國幽藏，不備顯行，靈寶一乘符圖旨訣，未悉出世，末代資稟，闕少彌衆，文義舛謬，乖違舊體，既寡明匠，取據莫因。歷觀同法所奉經圖文字，僻誤往往非一，雖復凝真猶固，其文多僞，流俗浮競，柔叨經法，皆謂關盟五帝，與道元始結緣，秉持靈策，佩服仙官，自恃任高，升仙可尅。或遁形幽岫，餌術彌年，志契牧羊，操極道源。但見世上同法之徒，埋身孤鄉，進無明師可範，退無葛氏三真之訓，擅稱超俗，其實頓空。篤尋其理，容非難化，皆由師友知淺，承業不備，欲究明機，限隔闊阻，希濟滄波，事闕舟航，緘慘畢生，涉求路斷，徒銷歲紀，終無感悟。

予以猥側，運逢幸際，昔蒙師真，陶漸至化，忝荷推延，七十餘載，未能挹鍊還丹，服御自持，仰尋至文，實忘霜夏，研覽祕籍，粗欲徧周，趣求未見，取畢寸衿。到今庚午年三月八日，於講座令弟子王延真，開先師寶臺，忽於織成蘊中，得此一卷，駭衆互闕，喜慶交深，生來及長，未聞傳見。於是便投黃金三兩，於清泠之淵，仰稟玄師，奉受此文。到丙子歲，踰涉七年，輒以文傳弟子五十八人。夫道由人弘，至化宜均，今遣弟子王延真，宣布未聞，若未盟壇，可於壇授訣。若已受盟，可緇素起此一卷，清齋七日，亦可五日三日，於齋館啓虔。若授新盟，止於舊信，單受此卷，可以三分一信。天真寶貴，不可空招，人有本行，事出心志，勿逼勸誘適人願也。慎之祕之。

上清金母求仙上法

（汪桂平點校）

# 071 太上洞玄靈寶衆簡文

簡寂先生陸脩靜撰

經名：太上洞玄靈寶衆簡文。  
南朝宋道士陸脩靜編撰。言靈寶派投簡除罪法術。一卷。底本出處：《正統道藏》洞玄部玉訣類。

夫受靈寶券盟，既有梯首，授簡修刺，必由次第，中盟大盟，皆投龍簡，其後八節甲子，別投三元玉簡，如此方得四時登山，修真文之事。明真玉訣並有其詳，而晚學闇惰，志性淺略，遇見一科，不加精尋，率意施用，遂致矯錯，亡首失尾，永不悟非。若斯之徒，常爲痛心，視其淪溺，懼傷慈教，謹依舊典，撰投簡文次第，復爲甲乙，註解法度，以啓昧者之懷，自爲門人成軌，豈苟施悠悠者哉。

真一自然經訣曰：弟子受書後，投金鑲十口，告於十方，爲不泄之誓，並十口奉師，放金龍，並於清泠之淵，求登仙之信矣。

此科是初受靈寶度自然券官經，竟校當五過定重拜，黃繒章付經，名曰中盟，應投此一龍，以十口鑲合龍，青絲纏簡，投之清淵，簡文依玉訣，告水官，法文如左。

明真科：三天受靈寶真文十部妙經，以金龍三枚，投水府靈山所住宅合三處，爲學仙之信，不投此，三官拘人命籍，求乞不達。

此科是登壇大盟，佩真文赤書，二鑲策杖之日，當以金龍三枚，金鑲二十七隻，投山水宅三處，告盟三官，簡文依玉訣如左。

玉訣曰：當以八節甲子之日，投三元玉簡，除宿罪簿，言名上天，事事三過，諸天三官，更相囑記，上天右別，萬神敬護，千魔不干。

此科是大盟後，投山水所住宅三處，處三過止，初一過處用一龍九隻鈕，

後二過但用龍不須鈕，合九簡九龍二十七隻鈕。經云：以八節甲子者，總舉大意耳，投此簡要當以吉辰，不得用他日，若不值八節，別用甲子。

## 三元玉簡文如左

中盟投龍則用此水簡文，大盟投三龍盟三官，則盡用此三簡文。

## 元始靈寶告水帝消除罪簡上法

靈寶某帝先生女人，云道士某甲，年如千歲，某月生，願神願仙，長生不死，三元同存，九府水帝，十二河源，江海淮濟，冥靈大神，乞削罪名，上聞九天，請詣水府，金龍驛傳。

## 某歲日月於某處告文。

右朱書銀木簡上，以青紙裹簡，青絲纏之，金龍負簡，以投三河之淵，初用金鈕九隻連簡，沉之後投，不須三過都止。

投簡當於清泠之淵，先東向叩齒三通，捻香發鑪。

無上三天玄元始氣太上老君，召出臣身中三五功曹，左右官使者，左右捧

香，驛龍騎吏，侍香玉童，傳言玉女，五帝直符，各三十六人出，關啓此間土地四面真官，臣今正爾燒香關啓，願得十方正真之氣降入臣身中，令臣所啓上聞，逕御無上至真大聖尊神玉帝几前。

次迴北向，又叩齒三通，讀水簡文竟，呪曰：

元始五老，上帝高尊。十方至真，太華靈仙。赤文告命，無幽不關。上御九天，請下玉文。日月五星，北斗七元。中告五嶽，四方靈山。下告河海，十二水源。九府水帝，冥靈大神。今日上告，萬願開陳。請投玉簡，乞削罪名。千曾萬祖，九族種親。罪相連染，及得臣身。普蒙削除，絕滅種根。記名水府，言上帝前。七祖父母，去離八難。上登九天，衣食自然。罪皆釋散，萬神咸聞。請以金鈕，關盟水官。請如所陳，金龍驛傳。

次三捻香，復鑪。

香官使者，左右龍虎君，捧香使者，當今齋堂自然生金液丹精芝英百靈，交會在此香火鑪前，使臣得道，尅獲神

仙，舉家蒙福，天下受恩，十方玉童玉女侍衛香煙，傳臣所言，逕御太上金闕玉皇几前。

元始靈寶告五嶽靈山除罪求仙法  
靈寶某帝先生，臣某年如干歲某月生，假令屬赤帝名除霍山，願神願仙，長生度世，飛行上清，五嶽真人，至神至靈，乞削罪籍，上名九天，請詣靈山，金龍驛傳。

太歲某甲子日月某時，於某嶽告文。非嶽則云某郡縣某山。

右朱書銀木簡，青紙裹之，青絲纏之，金鈕九隻，金龍一枚，埋本命之嶽，悉如上法。

次於本命之嶽，東向叩齒，發鑪如法。

次叩齒九通，讀簡竟，呪曰：

玄上開明，元始監真。上帝五老，赤書丹文。天地本始，總領三元。攝氣召會，催促舉仙。高上符命，普告十天。日月星宿，五嶽靈山。天下地上，冥靈大神。監生主錄，南上三門。關領玉簡，勒名丹編。削落罪書，上補帝

臣。千曾萬祖，九族種親。皆蒙解脫，五道八難。去離三惡，魂升九天。生死開度，萬劫長存。今日上告，萬神咸聞。請以金鈕，關盟真官。請如所告，金龍驛傳。

次三捻香，復鑪如上法。

元始靈寶告九地土皇滅罪求仙法  
靈寶赤帝先生，臣某年若干歲某月日生，今係九天，南斗領籍。

此文云赤帝者，是本命巳午，命係九者，是正二月生，南斗領籍者，猶取本命之方，餘生則效此。

願神願仙，長生度世，飛行上清，中皇九地，戊己黃神，土府五帝，乞削罪錄，勒上太玄，請詣中宮，投簡記名，金鈕自信，金龍驛傳。

太歲某月日於某郡縣鄉里告文

右朱書銀木簡，青紙裹之，青絲纏之，金鈕九隻，金龍一枚，埋所住中宮，悉如上法。

次於中庭叩齒發鑪，如上法

次向王叩齒十二通，讀簡竟，呪曰：



天開地張，九氣分靈。三元同符，十方玄清。五老上帝，開真領生。丹書赤文，元始上精。普告無下，九土皇靈。今日上告，萬仙定生。願我得仙，請投玉名。土府大皇，勒除罪刑。奏簡上宮，列簿華青。早得飛騰，天地同靈。九祖種親，腐骸更榮。魂升南宮，受化仙庭。今日告命，萬神咸聽。請以金鈕，表盟至情。請如所告，金龍驛傳。

次捻香，復鑪如上法。

凡受靈寶度二盟，及後修玉簡，都合用金環七十四隻，金龍十三枚，如此事畢，方得依八節修真文赤書之簡也。

五方真文赤書大字

煉 凶 辰 亦 祛 鍊  
翹 舌 智 愚 蘇 調  
原 恐 芝 多 恢 從  
幽 醜 燕 正 蘭 全

東方九炁，始皇青天，碧霞鬱壘，中有老人，總校圖錄，攝炁舉仙。

東方真文二十四字，常以本命甲子立春之日，青書於白刺上。

太上洞玄弟子某嶽先生甲乙，以某歲某月某日立春，於某郡某縣某鄉某里投刺。

本命甲子八節同用此。

煉 凶 辰 亦 祛 鍊  
浮 言 反 昏 兩 威  
勉 聖 炎 昧 信 復  
沛 聖 炎 聖 嬰 兒  
敷 坐 覆 局 連 鍊  
為 為

南方丹天，赤帝玉堂，中有大神，號曰赤皇，上炎流煙，三炁勃光，神仙受命，

應運太陽。

南方真文三十二字，常以本命甲子立夏之日，朱書於白刺上。

聖 支 樞 靈 繫 苾  
舌 君 姓 產 正 墊  
亦 醜 腐 素 澗 亦  
弱 直 橋 漢 薛 全  
聖 齋 聖 慈 煉 黃  
左 后 產 乘 苾 亦  
眷 后 亦 威

中央總靈，黃上天元，始生五老，中皇高尊，攝氣監真，總領群仙，典錄玄圖宿簡玉文，催運上氣，普告萬神。

中央真文四十字，以本命甲子春分夏至秋分冬至之日，黃書白刺上。

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

西方素天，白帝七門，金靈皓映，太華流氛，白石峨峨，七炁烟煴，上有始生，皇老大神，總領肺炁，主校九天，檢定圖錄，制召上仙。

西方真文四十八字，常以本命甲子

立秋日，白書於白刺上。

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

北方玄天，五炁徘徊，中有黑帝，雙皇太微，總領符命，仙鍊八威，青裙羽襪，龍文鳳衣，上帝所舉，制至玉階。

北方真文四十字，常以本命甲子立冬之日，黑書於白刺上。

投五方真文簡法

各以其日，五色書簡，如上法。

次登山，先東向叩齒，呪香發爐，悉如上法。

次叩齒十二通，呪曰：

玄上高靈，元始尊神。大聖徘徊，萬真臨軒。三景敷暉，慶雲四陳。上告校園，推筭九天。今日啓願，投刺靈山。丹書赤字，自然真文。上告五帝，記名玉篇。萬神監映，日月明言。願度願生，願神願仙。天地星宿，玄照我身。三官九府，五嶽大神。普告無窮，削除罪根。元始大開，莫不納言。七祖幽魂，受福自然。三塗五苦，永離八難。得與三景，同暉紫晨，轉輪不滅，身得飛仙。

畢，讀刺竟，投於絕巖之中，便散香靈山之上。

次叩齒三通，向本命呪曰：

元始監映，仙名已書。三官九府，罪莫不除。散香五帝，告明太虛。請如所陳，萬劫長存。

仰咽九氣。

次呪香復爐如上法。  
八節、甲子、本命，五方用事，同此一  
法。

太上洞玄靈寶衆簡文

(汪桂平點校、王卡復校)

# 072 太上洞玄靈寶投簡

## 符文要訣

經名：太上洞玄靈寶投簡符文要訣。撰人不詳，約出於南北朝或隋唐。摘錄古《靈寶經》改編而成，言書符投簡除罪之法。一卷。底本出處：《正統道藏》洞玄部神符類。

龍	龍	龍	龍	龍
上四字八節服之	上四字八節服之	上四字八節服之	上四字八節服之	上四字八節服之
龍	龍	龍	龍	龍
上四字八節服之	上四字八節服之	上四字八節服之	上四字八節服之	上四字八節服之
龍	龍	龍	龍	龍
上四字八節服之	上四字八節服之	上四字八節服之	上四字八節服之	上四字八節服之

祭	祭	祭	祭	祭	祭	祭	祭	祭	祭
上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之
祭	祭	祭	祭	祭	祭	祭	祭	祭	祭
上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之
祭	祭	祭	祭	祭	祭	祭	祭	祭	祭
上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之

虎	虎	虎	虎	虎	虎	虎	虎	虎	虎
上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之
虎	虎	虎	虎	虎	虎	虎	虎	虎	虎
上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之
虎	虎	虎	虎	虎	虎	虎	虎	虎	虎
上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之	上四字八節服之

龍	龍	淵	禹	龍	龍	龍	龍	龍	龍	龍
五月五日 七日吞之	五月五日 七日服之	七月七 日吞之	四字冬 至後甲 子日吞	合前六 節日甲 子六亥吞	十八字 本命日 吞之	七月七日 五月五日 二符同服	四符亦 五月五 日同服			
龍	龍	淵	禹	龍	龍	龍	龍	龍	龍	龍
龍	龍	淵	禹	龍	龍	龍	龍	龍	龍	龍

龍	龍	龍	龍	龍	龍	龍	龍	龍	龍	龍
二符五 月五日 朱書吞	三十二字 七月七日 服之	二符向 本命服	五月五日 中時吞之	五月五 日吞之	十二符 太歲日 吞之	夏至吞 七月七 日吞之	九日九 日吞之			
龍	龍	龍	龍	龍	龍	龍	龍	龍	龍	龍
龍	龍	龍	龍	龍	龍	龍	龍	龍	龍	龍

龍	龍	龍	龍	龍	龍	龍	龍	龍	龍	龍
正日 服之	月生三 日服之	春分 服之	立春 服之	惡夢 服之	立冬 服之	冬令 服之	行年日書 二符向地 戶服之	人山諸 乞諸經 吞之		月生五 日吞之
龍	龍	龍	龍	龍	龍	龍	龍	龍	龍	龍
龍	龍	龍	龍	龍	龍	龍	龍	龍	龍	龍

靈

立冬

靈

正日

靈

靈

齊日

陽

陽

虛

靈

冬至後分  
服之向甲  
子日之  
吞之亦可

靈

靈

齊日

常以雞鳴陽光始分，東向叩齒九

通，摩兩掌令熱，以手掌拭面目九過，仰祝服青牙。南方南向，亦如上法，叩齒三通。西方西向七通，如上法。中央十二通叩齒，拭面目。北方五通，一如上法。常以雞鳴，安身定神，以次行事，先服東方青牙氣，次南方，次中央，次西方，次北方，如上法。五帝畢，便叩齒三十六通，咽氣二十五過止。又都呪曰：

白石巖巖以次行，源泉涌洞以玉漿，飲之長生，壽命益長。畢，以舌料口上下中央，令玉泉滿口而三咽，又引氣二十五過，極氣而咽之，其道都畢。服五雲牙之法，別卷寫之。

天真皇人曰：凡修飛仙之道，及滅度之法，尸解隱化，輪轉生死，隨運

逍遙，無拘太陰，當朱書諸天玉字無量內音，白素佩身，隨文服御，心不受穢，五內清和，六府恬寂，空碧無為，八年洞達諸天，坐見十方，萬神交降，體生玉光，馳騁龍駕，白日登晨。玉章上道，四萬劫一傳，修行之法，當依上朱書，隨四時之節。

春正月、二月、三月，朱書文，向王叩齒九通，祝曰：

飛天大梵，維羅八方。九氣青天，總為神王。五合八會，流煥太空。上開龍漢，神仙之宗。下披長夜，九幽之房。拔度苦魂，朽骸生光。身變毛羽，五色衣裳。蒼龍碧輦，飛步空行。今日上告，青天始陽。萬願皆合，與氣齊同。升入無形，永保無窮。畢，服文，仰咽八氣止。

夏四月、五月、六月，朱書文，向王叩齒八通，祝曰：

天書敷羅，梵行赤明。上開八道，五合通靈。大運啓期，洞陽鍊精。玉文煥朗，三景自明。下度生死，一切受形。今日良吉，大聖臨庭。九夜開牖，

幽房朗清。三惡休息，我道自成。五帝保度，上登華京。七寶林中，長享劫齡。畢，服文，仰咽八氣止。

秋七月、八月、九月，朱書文，向王叩齒七通，祝曰：

飛玄八會，結氣成真。六十四字，總靈天根。開度生死，朽骨還人。幽魂披散，受氣上玄。今日時慶，萬願開陳。衆靈交會，我願我仙。景與道合，我願我神。得乘素雲，上升帝晨。七寶歡樂，交友真人。畢，服文，仰咽八氣止。

冬十月、十一月、十二月，朱書文，向王叩齒五通，祝曰：

玉字開冥，流煥上門。八氣結真，梵行景雲。神王啓光，三象洞分。五色徘徊，照我靈魂。今日值合，仰希帝君。開宥出書，授我真文。玉澤交灌，五府生薰，毛羽變化，駕景乘晨。出幽入無，仙度自然。七祖同歸，歡樂上元。畢，服文，仰咽八氣止。

天真皇人曰：此祝說之辭，皆四會之氣，八和之音，自然之章，行之者

上天遙唱，三界設禮，萬神束帶，侍衛靈文也。隨節服御，祝說咽氣，百日諸天記錄，地官削簡，八年神真自降，體生玉光，洞達幽虛，坐觀自然，死尸更生，反胎還人，轉輪不滅，生死得仙。道尊法妙，萬劫一行，輕泄漏慢，身負河源，風刀萬劫，終不得仙，明真舊格，宜祕之焉。

東方青天出入遊行，常當叩齒九通，思九色之龍導從前後，青雲九重覆匝身形，密祝曰：

赤明開圖，八氣迴真，總統玄簡，青帝大神，流化九外，纏綿我身，靈音八書，六十四篇，洞明天地，與我合仙，運致龍駕，上升帝軒。畢，引氣九咽止。

南方赤天出入遊行，常當叩齒三通，思朱鳥鳳凰翻翔其前，絳雲三重覆匝身形，密祝曰：

三氣徘徊，雲鳳來飛，玉音八字，煥爛紫微，日吉大慶，我道洞開，朱丹哺飴，仰喻靈暉，身生水火，絳帔羽衣，登空玄步，足踐鳳梯，周旋八天，七世

相隨。畢，引氣三咽止。

西方素天出入遊行，常當叩齒七通，思白虎獅子導引左右，素雲七重覆匝身形，密祝曰：

七氣會靈，八天尊神，白虎策輦，獅子捧轅，七氣纏綿，鍊我成仙，身發金光，肺映素雲，內外變化，升入洞門，七祖出夜，九幽放魂，三徒五苦，長斬惡根，同歡福舍，受慶自然，億劫開度，隨運長存。畢，引氣七咽止。

北方玄天出入遊行，常當叩齒五通，思飛龜羽蓋翳鬱左右，玄雲五重覆匝身形，神童玉女羽衣飛裳，侍衛前後，密祝曰：

玄天徘徊，流景上清，大有啓運，八字高明，飛玄澄虛，洞音自生，五氣纏綿，灌我身形，冠帶北軍，受鍊洞靈，腎府化仙，內外光精，飛行三界，遨宴紫庭，七祖同慶，歡樂劫齡，七寶林中，反胎更形，長夜滅死，南宮記名，黃籙白簡，世世長生。畢，引氣五咽止。

子審欲爲道，神仙不死，當先去三蟲，心下伏尸，日三百六十息食氣，三

十通一咽，九十通一休息，日四爲之。常以夜半雞鳴祝曰：東方青牙，服食青牙，飲以朝華。三咽止。南方朱丹，服食朱丹，飲以丹池。三咽止。中央之野，昂昂太山，服食元氣，飲以醴泉。三咽止。西方明石，服食明石，飲以靈澗。三咽止。北方玄滋，服食玄滋，飲以玉飴。三咽止。如此三十日，三蟲皆死，伏尸走去，正神正氣自安，伏尸不復還心中，兆自仙矣。

煉 皇 青 天 碧 霞 始

皇 青 天 碧 霞 始

皇 青 天 碧 霞 始

皇 青 天 碧 霞 始

皇 青 天 碧 霞 始

右二十四字，主召九天上帝，神仙圖錄。學仙道者，常以本命甲子立春之日，青書白銀木刺，記年月姓名，投

於絕巖之下，九年仙官到，便得真仙。

法 南 山 丹 赤

燒 帝 玉 堂 中 有

飛 大 神 號 飛 日 赤

號 皇 上 炎 流 烟

進 三 氣 勃 光 神

血 仙 受 命 應 運

慈 太陽

右三十二字，常以本命甲子立夏之日，朱書三十二字於白刺，上記姓名年月，投靈山之嶽，九年仙官到，便得飛仙。

疔 上 天 元 始 生  
疔 中 央 總 靈 黃

聖 五 老 中 皇 高

紫 尊 攝 氣 監 真

攝 總 領 群 血 仙 典

麟 錄 玄 圖 宿 簡

坐 玉 文 推 運 上

通 氣 普 告 萬 神

右四十字，主神仙玉簡。常以本命甲子春分夏至秋分冬至之日，黃書白刺，上記姓名年月日，投刺靈山之岡，九年仙官到玉女至，便仙矣。

卯 西 方 素 天 太

婆 帝 七 門 金 靈

涌 浩 映 泰 華 流

局 氣 白 石 峨 峨

哇 七 黑 烟 熾 上

咸 有 始 生 皇 老

隨 大 神 總 領 肺

通 炁 主 校 九 天

徑 檢 定 圖 錄 制

召 上 仙

右四十八字，常以本命甲子立秋之日，白書於刺上，投名嶽之上，如上法。

光 北 方 玄 天 五

通 炁 律 徊 中 有

駐 黑 帝 雙 皇 太

郭 微 總 領 符 命



血仙 毓鍊 戶八 熬威 翹青

志裙 非羽 虞襦 攬龍 尾文

鸞鳳 秀衣 茂上 縵帝 沔所

鬱舉 氣制 飛到 坐玉 階階

右四十字，主諸真人神仙之圖錄。學仙道士，常以本命甲子立冬之日，黑書白刺上，記姓名年月於刺下，投靈山之嶽，五年仙官到，使太玄玉女五人，名上仙籍。

修養青牙，導引東方九氣青天之法，常以立春日雞鳴，入室東向九禮畢，平坐叩齒九通，思東方安寶華林青靈始老君，姓爛，諱開明，字靈威仰，形長九寸，頭戴青精玉冠，衣九氣青羽飛衣，駕乘蒼龍之輿，建鵝布老切旗，從神甲乙胡老之官九十萬人，從九氣青天下，來降室內，須臾化生青氣，鬱鬱如雲之沓煙，貫覆己形，從口中而入，直下肝府。又思木星煥明東方，光照

我身，皆令分明。竟便開目，仰祝曰：

九氣青天，元始上精。皇老尊神，衣服羽青。役御天官，煥明歲星。散暉流芳，陶溉我形。上餐朝霞，服引木精。固養青牙，保鎮朽齡。肝府充溢，玉芝自生。迴年住劫，色返童嬰。五氣混合，天地長並。畢，引青氣九咽止，便服東方赤書玉文十二字。

蕭 坐 世 羽 飛 翹 氣 飛 翹 氣 飛 翹

右十二字，則九氣青天之名。導引青帝九氣，服食青牙，皆赤書白紙上，存思訖而頓服之。常以雞鳴，陽光始分，東向叩齒九通，摩兩掌令熱，以手掌拭面目九過，仰祝曰：

東方青牙，服食青牙，飲以朝華。畢，便以舌料上齒之表，舐唇三過，令玉泉滿口，而咽之三過，又引青氣九咽，令鎮肝之中，其道畢也。

修養丹牙，導引南方三氣丹天之

法，常以立夏之日雞鳴，入室南向三禮畢，平坐叩齒三通，思南方梵寶昌陽丹靈真老君，姓洞浮，諱極炎，字赤飄弩，形長三寸，頭戴赤幘玉冠，衣三氣丹羽飛衣，駕乘丹龍玉輿，建朱旗，從神丙丁越老之官三十萬人，從三氣丹天下，來降室內，須臾化生赤氣，煥煥如火之明，貫覆己形，從口中而入，直下心宮。又思火星煥明南方，光照我身，皆令分明。竟便開目，仰祝曰：

三氣丹天，朱宮靈童。元始上老，驂駕赤龍。丹羽飛衣，錦帔明光。驅策天官，運導陰陽。三氣吐暉，灌我絳宮。赤子保鎮，鍊牙飾容。朝餐朱景，玉芝滿充。回停劫年，朽骸返童。長齡天地，永享無窮。身生水火，變化百方。畢，引赤氣三咽止，便服南方赤書玉文十二字。

麗 苾 苾 及 爪 彪 赤 飛 翹 氣 飛 翹

九

右十二字，則三氣丹天之名。導引赤帝三氣，服食丹牙，皆赤書白紙上，存思訖而頓服之。常以雞鳴，陽光始分，南向叩齒三通，摩兩掌令熱，以摩拭目三過，仰祝曰：

南方朱丹，服食朱丹，飲以丹池。畢，以舌料下齒之表，舐唇漱口，令玉泉滿口，而三咽之，又引赤氣三咽，令鎮心宮之中，其道畢也。

修養黃牙，導引戊己十二氣中黃之天，常以春分夏至秋分冬至四日雞鳴，入室向王十二禮畢，平坐叩齒十二通，思中央玉寶元靈元老君，姓通班，諱元氏，字含樞紐，形長一尺二寸，頭戴黃精玉冠，衣五色羽衣，駕乘黃龍玉輿，建黃旗，從神戊己儉老之官十二萬人，從十二氣黃天中下，來降室內，須臾化生黃氣，勃勃如景雲之吐暉，貫覆己形，從口中而入，直下脾府。又思土星煥明中天，光照我身，皆使分明。便開目，仰祝曰：

中黃太山，元氣徘徊。上有元老，總統四垂。驂駕黃龍，五色羽衣。運導九天，轉輪璇璣。煥明土星，流光散暉。玉英芳芝，充溢四飛。陶灌我身，脾府鮮開。養牙餐精，萬神總歸。檢魂制魄，仙鍊八威。表裏同明，常生不衰。通真達靈，升入太微。畢，引黃氣十二咽止，便服中央赤書玉文十六字。

辛 亥 三 龍  
龍 尚 以 強 厥  
龍 龍 龍 龍  
龍 龍 龍 龍  
龍 龍 龍 龍

右十六字，則中央黃天之名。導引黃帝十二氣，服食黃牙，皆赤書白紙，存思訖，頓而服之。常以雞鳴，陽光始分，向王叩齒十二通，摩兩掌令熱，以摩拭目十二過，仰祝曰：

中央戊己，昂昂太山，服食精氣，

飲以醴泉。畢，以舌料舌下玄膺，取玉泉以舐唇，三過咽之，又引黃氣十二咽，令鎮脾府之中，其道畢也。

修養素牙，導引七氣素天之法，常以立秋之日雞鳴，入室西向七禮畢，平坐叩齒七通，思西方七寶金門皓靈皇老君，姓上金，諱昌開，字曜魄寶，形長七寸，頭戴白精玉冠，衣白羽飛衣，駕乘白龍，建素旗，從神庚辛氏老之官七十萬人，從七氣素天中下，來降室內，須臾化生白氣，皓皓如和雲之羅天，貫覆己形，從口中而入，直下肺府。又思金星煥明西方，光照我身，皆使分明。便開目，仰祝曰：

金靈七門，皓映西華。中有素皇，元始之家。驂駕白龍，七氣峨峨。徘徊玉門，散精朱霞。金星吐暉，芳芝滂沲。玄澳我身，養我素牙。明石鮮光，萬劫不殂。服以流泉，餐以太和。九天上帝，給以玉華。保年駐顏，白景敷羅。長存天地，三光同遐。畢，引白氣七咽止，便服西方赤書玉文十二字。

引炁炁炁炁  
 引炁炁炁炁  
 引炁炁炁炁

右十二字，則西方七氣素天之名。導引白帝七氣，服食素牙，皆赤書白紙，存思訖，頓而服之。常以雞鳴陽光始分，西向叩齒七通，摩兩掌令熱，以摩拭面目七過，仰祝曰：

西方明石，服食明石，飲以靈液。畢，以舌料齒上，舐唇漱口，令玉泉滿口，便三咽之，又引白氣七咽，令鎮肺府之中，其道畢也。

修養玄牙，導引五氣玄天之法，常以立冬之日雞鳴，入室北向五禮畢，平坐叩齒五通，思北方洞陰朔單鬱絕五靈玄老君，姓黑節，諱靈會，字隱侯局，形長五寸，頭戴玄精玉冠，衣玄羽飛衣，乘黑龍玉輿，建皂旗，從神壬癸羌老之官五十萬人，從五氣玄天中下，來

降室內，須臾化生黑氣，暉暉相沓，光若流星之煥曜，貫覆己形，從口中而入，直下腎府。又思水星煥明北方，光照我身，皆使分明。便開目，仰祝曰：北方玄天，五氣散靈。上有大神，始老元精。駕龍建旗，遊宴上京。是日元吉，慶靈敷榮。飛芝流灑，滂沱四盈。玉女玄澳，灌我身形。腎宮充鎮，朽牙堅生。五府納真，上通神明。五老降接，仙道早成。變化水火，衣服羽青。飛行太空，遊造紫庭。壽同三景，萬劫長齡。畢，引黑氣五咽止，便服北方赤書玉文十二字。

炁炁炁炁炁  
 炁炁炁炁炁  
 炁炁炁炁炁

右十二字，則北方五氣玄天之名。導引黑帝五氣，服食玄牙，皆赤書白紙，存思訖，頓而服之。常以雞鳴陽光

始分，北向叩齒五通，摩兩掌令熱，以拭面目五過，仰祝曰：

北方玄滋，服食玄滋，飲以玉飴。畢，以舌料下齒之表，以舌舐唇漱口，令玉泉滿口，三咽，又引黑氣五咽，令鎮腎府之中，其道畢也。

凡修靈寶五篇真文，思神念仙，諸所求欲使時聞，九天真人詣房，身得神仙，當以立春後甲寅、乙卯日，沐浴清齋，平旦入室，東向九禮，平坐叩齒九通，關啓身神。畢閉眼，思東嶽太山青帝君姓諱字，形長九寸九分，頭戴青玉通天寶冠，衣青羽飛衣，駕乘青龍，從神青腰玉女十二人，從東方來降兆室，良久，青帝君化為嬰兒始生之狀，在青氣之中，隨氣從兆口入，徑至肝中，思心生赤氣，以貫繞肝府，青赤二氣混沌相著，如慶雲之沓煙，覺肝中薰熱，便九咽。仰祝曰：

青天九門，中有始皇。出入三清，邀宴華房。安鎮靈嶽，役運勾芒。上統青霞，九千萬重。驂駕羽輦，十二飛龍。左侍青腰，右衛神童。把執簡籍，

青札玉文。校定仙名，列言上宮。今日王吉，請陳所言。身佩赤書，名參帝堂。願神願仙，請錄簿中。上迴雲駕，來降我房。三氣混合，化形嬰蒙。安治肝府，招致華光。靈暉流灌，面生金容。坐致自然，神明交通。身得長生，天地無窮。

畢，引青氣九咽止。行此道九年，則致青腰玉女九人，東嶽泰山靈官來降，爲兆通致求願，上聞九天，生死父母罪書責役配屬東嶽，則神明更相係屬，滅除罪名，自得解脫，升上福堂。此法妙重，生死津梁也。

常以立夏後丙午、丁巳之日，沐浴清齋，正中入室，南向三禮，平坐叩齒三通，關啓身神。畢，閉眼，思南嶽衡山赤帝君姓諱字形，長三寸三分，頭戴赤玉通天寶冠，衣丹羽飛衣，駕乘赤龍，從神赤圭玉女十二人，從南方來降兆室，良久，赤帝君化爲嬰兒始生之狀，在赤氣之中，隨氣從兆口入，徑至心中，思脾生黃氣，以貫繞心宮，黃赤二氣混沌相著，如炎火之爛光，覺心中

薰熱，便三咽。仰祝曰：

丹天三氣，南上玉門。中有大神，赤帝靈君。衣丹帶符，飛文羽裙。駕乘朱龍，玉輦降雲。南衡靈山，萬神高尊。出入三清，上宴九玄。赤圭侍役，玉童衛真。把執簡錄，絳簿玉文。校定仙品，輕重上聞。今日大王，靈嶽開仙。上迴高神，降我三門。變化嬰兒，鎮心安魂。混合二氣，纏我命根。長與祝融，駕乘景雲。逍遙南阿，天地長存。

畢，引赤氣三咽止。行此道，南嶽衡山靈官來降，致赤圭玉女三人爲兆驅使，通致啓願，萬求皆從，生死父母罪書刑責配屬南嶽，皆得解除，刑名釋散，升上天官。其法妙重，生死開通也。

常以春分、夏節、秋分、冬節後，戊辰、戊戌、己丑、己未之日，沐浴清齋，日跌入室，向王十二禮，平坐叩齒十二通，關啓身神。畢閉目，思中嶽嵩高山黃帝君姓諱字，形長一尺二寸，頭戴黃玉通天寶冠，衣黃羽飛衣，駕乘黃龍，

從神黃素玉女十二人，從中嶽來降兆室，良久，黃帝君化爲嬰兒始生之狀，在黃氣之中，隨氣從兆口入，徑至脾府，思脾生白氣，以貫繞脾宮，黃白二氣混沌相著，似黃雲之迴天，覺脾中薰熱，便十二咽。仰祝曰：

中天黃元，總統四靈。戊己中山，元始上精。黃帝大神，驂駕飛軒。十二黃龍，上宴三清。玉女侍衛，神童使令。開山校圖，錄仙定名。徘徊中嶽，白玉敷靈。迴真曲降，流灌我形。混合變化，老帝成嬰。安鎮黃宮，府藏華榮，身生奇毛，內外光明。真人交接，通達九清。得驂黃駟，飛升玉庭。

畢，引黃氣十二咽止。行此道，中嶽靈官五帝降房，致黃素玉女十二人爲兆通靈，關啓上聞九天，生死父母罪書刑名係於中嶽，皆得解散，滅絕罪書，上名仙錄，去離地官，升入福堂，生死開泰，度人無量。

常以立秋后庚申、辛酉之日晡時，沐浴清齋，入室向西七禮，平坐叩齒七通，關啓身神。畢閉目，思西嶽華陰山

白帝君姓諱字，形長七寸七分，頭戴素玉通天寶冠，衣素羽飛衣，駕乘白龍，從神白素玉女十二人，從西嶽來降兆室內，良久，白帝君化爲嬰兒始生之狀，在白氣之中，隨氣入兆口中，徑至肺府，思腎生黑氣，以貫繞肺宮，白黑二氣混沌相著，似慶雲之沓霄，覺肺中薰熱，便七咽。仰祝曰：

七氣之天，素皇金堂。白帝大神，安鎮西方。華陰靈山，號曰神王。白羽飛裙，建旗御龍。上遊玄青，出入華宮。總領仙籍，列簡諸方。日吉嘉辰，萬聖宴峰。徘徊九霞，流散暉光。金精煥煥，白石洋洋。開山觀靈，神敷四鄉。願道願仙，願生願長。上願既會，靡不吉昌。蓐收通真，改我形容，變化自成，與氣同翔。身飛骨輕，上升紫房。

畢，引白氣七咽止。行此道，則西嶽靈官白帝降真，致白素玉女七人，爲兆通靈關啓，所求皆聞九天，生死父母罪書刑名係於西嶽，咸得解脫，罪書自除，名上仙籍，去離五道，永升福堂，生

死開度，福至自然。

常以立冬後壬子、癸亥之日子時，沐浴清齋，入室北向五禮，平坐叩齒五通，關啓身神。畢閉目，思北嶽恒山黑帝君姓諱字，形長五寸五分，頭戴玄玉通天寶冠，衣玄羽飛衣，駕乘黑龍，從神太玄玉女十一人，從北嶽來降兆室，良久，黑帝君化爲嬰兒始生之狀，在黑氣之中，隨氣入兆口中，徑至腎府，思肝生青氣，以貫繞腎府，青黑二氣混沌相著，如碧雲之沓煙，覺腎中薰熱，便五咽。仰祝曰：

五氣玄天，上始精流。結氣凝靈，號曰仙廬。安鎮北恒，黑帝所遊。遨宴北單，驂龍駕遊。今日王吉，萬靈開圖。五氣徘徊，慶雲四敷。仙童執簡，太玄度符。記我仙籍，金錄上書。迴真曲降，混合嬰孩。二氣交絡，洞灌我軀。玄冥提携，神仙爲儔。永享天地，萬劫無休。

畢，引黑氣五咽止。行此道，北嶽靈官黑帝降真，致太玄玉女五人給以使令，通致啓乞，上聞九天，生死父母

罪名刑書係屬北嶽，並蒙解除，得度三惡之道，上升天堂，太妙上法，普度無窮。

行此道，常當夷心靜思，意注分明，靈真易感，得其法式，不移年而睹神行來出入之向方面，天官司迎，魔靈消伏，不敢干前，心聰慧，自審吉凶，五嶽五帝，常爲友賓，神明交通，坐致神仙。

太上洞玄靈寶投簡符文要訣

(汪桂平點校)

# 073 太上洞玄靈寶五帝醮祭招真玉訣

經名：太上洞玄靈寶五帝醮祭招真玉訣。北宋道士張承先編撰。言道士受《靈寶赤書真文》後醮祭招真之法。一卷。底本出處：《正統道藏》洞玄部玉訣類。

道言：靈寶赤書五篇真文，篇鎮一方，皆元始自然之書。五老與五帝侍衛，五方靈官紀錄，禁限一年三開，衆仙度真。玄科舊典，上宮諸真人，及五嶽神仙，三年一奉靈寶五帝靈官，散花燃燈，香湯甘果，上獻天真，以存靈氣。後學常能爾者，則靈寶五帝，感乎精誠，五方靈官當之喜欣。凡禮無濃薄，意從中來，苟有至情，人神感焉。故書其品戒，祕而修行。

舊典降致靈寶五帝靈官法。以春用甲寅、乙卯；夏用丁巳、丙午；四季用戊辰、戊戌、己未、己丑；秋用庚申、辛酉；冬用癸亥、壬子。建王之日，於靈嶽作高壇，四方欄纂，東西南北王上，用五門，安五榜也。榜依別文，在大盟儀中。

安五門畢，當四面安障，勿令當風，使火光氣亂。每令火氣密，勿令廣照，使靈氣散也。敷一五尺淨席，隨節安之。春則向東方也。

每以名香淨茶，棗湯鮮果，潔淨法座，隨豐珍之。宜用淨杯十一枚，杓令新好。杓三枚，皆令精潔。二杓各盛五杯，其一杓盛一杯。一杓在五杯杓者下流。比五香火，相次於拌前。果亦三拌如之。餘湯即別器，請著前。列南和丹繒五尺繒紋繒也。於案，上清靈寶五篇真文五符。割碧林之帛五尺，青紋繒也。覆真文符上，安著座後。令符處丹青中，以爲落髮喻血之盟也。青以代髮，丹代喻血之盟誓。真人不傷神損德，故以代之也。

香用五種，雜和之。香爐每令新

好，相連安之。束帶跪請，每令徐聲下氣，天真密感而降。當朱書白銀刺上六枚。

次請五帝衆仙靈官，安五香火之下。

東方九氣青天安寶華林青靈始老君、蒼帝君、九氣天君、太上真王、青腰玉女、東鄉諸靈官。某帝真人某甲，再拜五香，稽首奉請。降青華元陽門。

南方三氣丹天梵寶昌陽丹靈真老君、赤帝君、朱丹三氣天君、元氣丈人、朱宮太丹玉女、南鄉諸靈官。某帝真人某甲，再拜五香，稽首奉請。降洞陽太光門。

中央元洞太帝之天玉寶元靈元老君、黃帝君、太帝真人、子丹黃庭戊己、天倉玉女、中黃太帝官君。某帝真人某甲再拜五香，稽首奉請。降元黃高晨門。

西方七氣之天七寶金門皓靈皇老君、白帝君、明石七氣天君、太上白素玉女、西鄉諸靈官。某帝真人某甲，再拜五香，稽首奉請。降通陰全關門。

北方五氣玄天洞陰朔單鬱絕五靈玄老君、黑帝君、玄滋五氣天君、太上

靈君、夜光玉女、北鄉諸靈官。某帝真人某甲，再拜五香，稽首奉請。降陰生廣靈門。

九天衆靈、五嶽靈山真人、江河四瀆三官九府諸靈官、地仙玉女、五嶽飛仙神仙諸仙官君。某帝真人某甲，再拜五香，稽首奉請。降元黃高晨門。

朱書五簡，安五香火下。讀簡畢，便請一帝，再拜。下簡以次如法。後一簡，令在中央之右。送天官都畢，埋著中方。此玄都舊典，不得儀式，則天真不降，誤兆被殃也。

安簡畢，調聲自陳：某月某朔某日甲子，某州郡縣鄉里，某帝先生某甲，年如干歲。以某年月某日，從某嶽先生真人受太上靈寶五老真文自然赤書五篇符命，謹依大道玄都舊典科法，清齋沐浴，香薰神室。奉請五帝君、五帝靈官真人、神仙玉女，謹以名香、棗湯、甘果，表於丹心，潔整身神，伺迎上皇天尊。請遣五體真官、三魂七魄、三宮真人，上到九天之宮、三天之宮、五外之鄉、青芽之天、朱丹之天、太帝之

天、中黃之天、明石之天、玄滋之天、八方五帝真人之庭。通宣所啓，執齋奉禮，虚心注仰，願迴靈駕，暫降某郡縣鄉里中。臨映丹誠，降五符之真，歆饗微禮薄饌。

畢，再拜伏地，良久乃起。長跪，取東方簡，讀文畢。下簡故處，重請上神，奉降東方靈威仰蒼帝君、青芽九氣天君、太上真王、青腰玉女、東鄉諸靈官。

次讀南方簡如上法。奉降南方赤標弩赤帝君、朱丹三氣天君、元氣丈人、朱宮太丹玉女、南鄉諸靈官。

次讀中央簡如上法。奉降中央含樞紐黃帝君、太帝真人、子丹黃庭戊己、天倉玉女、中黃太帝官君。

次讀西方簡如上法。奉降西方曜魄寶白帝君、明石七氣天君、太上白素玉女、西鄉諸靈官。

次讀北方簡如上法。奉降北方隱侯局黑帝君、玄滋五氣天君、太上靈君、夜光玉女、北鄉諸靈官。

次讀衆靈簡如上法。奉降九天衆

靈、五嶽靈山真人、江河四瀆三宮九府諸靈官、地仙玉女、五嶽飛仙神仙諸仙官君。

右請五帝衆真六位，合十二拜。

奉請天真畢，五過上湯炷香，而自陳啓：某以有幸，宿世因緣，九天之劫，轉及某身，遭遇明運，道法流行，得以穢身，參染靈文五篇赤書五符寶經。自叨竊以來，尊仰上真，心希神仙，而精誠淺薄，未能感靈。常恐罪身沉頓，囂穢，淪沒九泉。天慈廣大，展其效心，守誠信向，長齋思神，念善脩生，志度無窮，而精誠淺狹，未能自宣。靈文深奧，天尊遐邈，未敢自聞。今上吉良日，整身清齋，告祭五靈五老五帝、諸君丈人，上勞神光至真天尊，曲降卑賤，誠慚誠懼，不敢自寧，不勝天光，遐照無細，緣茲上陳。其承先師舊典，以丹青告誓盟約，閉口奉修，不敢洩漏，五八乃宣，以定神契。五帝關聞，乞真符經圖，神靈侍衛，營護某身，登山涉嶺，出入林磧，所求所向，皆得如心。金石開通，神明契接，萬願咸從。採芝

採藥，不得隱藏，山精伏匿，邪試不干，虎狼毒螫，令不加身。玉女神童，給使東西，五帝靈氣，降入其形，安鎮五腑，內外聰明，心開意通，逆知吉凶。三尸消滅，九蟲不生。身有奇毛，早得神仙。惟蒙至尊大帝，直垂慈恩，下流衆庶，賜如所陳，不勝洪澤，輒自效勤。臣某誠惶誠恐，稽首再拜。

又三過上湯上酒，伏地。若私有所陳，自適意啓乙。啓願畢，上勞東方靈威仰蒼帝君、青芽九氣天君、太上真王、青腰玉女、東鄉諸靈官，各還神房，便散香再拜。

次上勞南方赤熛弩赤帝君、朱丹三氣天君、元氣丈人、朱宮太丹玉女、南鄉諸靈官，各還神房，便散香再拜。

次上勞中央含樞紐黃帝君、太帝真人、子丹黃庭戊己、天倉玉女、中黃太帝官君，各還神房，便散香再拜。

次上勞西方曜魄寶白帝君、明石七氣天君、太上白素玉女、西鄉諸靈官，各還神房，便散香再拜。

次上勞北方隱侯局黑帝君、玄滋

五氣天君、太上靈君、夜光玉女、北鄉諸靈官，各還神房，便散香再拜。

次上勞九天衆靈、五嶽靈山真人、江河四瀆三官九府諸靈官、地仙玉女、五嶽飛仙神仙諸仙官君，各還神房，便散香再拜。

奉禮醮祭法事都畢，取簡隨方埋著五門下，衆真簡埋中央門下。

右三年一醮，九年三醮，都止。

道士張承先曰：受靈寶五老赤書二籙，杖策之日，宜即依法祭醮，以招天真。幽映感降，在乎精誠。後則三年一請，祈于必通。今撰出立成，以爲常儀，至學之士，勿虧之矣。

太上洞玄靈寶五帝醮祭招真玉訣

（郭清點校、王卡復校）



# 074 洞玄靈寶真人修行延年益算法

經名：洞玄靈寶真人修行延年益算法。撰人不詳，約出於唐宋。抄襲《上清修身要事經》，言養生法術。一卷。底本出處：《正統道藏》正一部。

## 六甲神姓名

甲子神名王文卿，甲戌神名展子江，甲申神名扈文長，甲午神名衛上卿，甲辰神名孟非卿，甲寅神名明文章。

凡修行之士，常存六甲神姓名，則七竅開通，無諸疾病，不逢殃禍。遇賊，呼其日神助之。

## 四海神名

東海神名阿明，西海神名巨乘，南海神名祝融，北海神名玄冥。

凡修行之士，每朝雞鳴時，常依此法

誦持三遍，已上四海大神，辟邪魔群，除蕩凶殃，急急如律令。

每日雞鳴時，先呼：上一赤子，守上丹田。中一真人子，守中丹田。下一嬰兒元陽谷，守下丹田。

修行之士，每日雞鳴時，及夜初卧時，常依此法存呼之，能辟邪魔，消灾去病。正當口念三一名字之時，心即存其形狀，如嬰孩。每一嬰孩，存長三寸，始生之形，並著赤衣。甲子日勿存念三一之神，此為重禁。

## 老子理身守一法

常以雞鳴時，摩拭兩目，先誦呪曰：西王母女，名曰益愈，賜我目藥，受之於口，即精摩形。常在雞鳴，二七靈液，除目昏蒙，瞻視萬里，徧見四方。

誦呪畢，即拱手三嘘之，兼微出津掌中，即以手摩令熱，摩目二七，令人目明通仙。

每日雞鳴時，常閉目竊呪曰：

黃裳子，黃裳子，黃庭真人常在己，爲我取醴酒肥脯，粳粮黍臠，神丹玉芝，諸可食者皆至，入吾口中，充滿五臟，

補養百神，令我不飢不渴，與天地齊畢，與日月同光，保守千萬年。

凡修行之士每日雞鳴時，先密誦三遍，訖，次即咽氣五過止。每咽先漱靈液，即微鼓頰，存黃氣，滿口即咽之，自然飽矣。兼內除百病，益壽延年。

每日清旦，叩齒三通，呼三魂名，呪曰：胎光延生，爽靈益祿，幽精除死，急急如律令。

凡修行之士，每日如此，三魂不離人左右，非灾橫禍，惡鬼凶神，不能爲害，遊夢變怪，杜絕房寢。

仙經曰：夫學道之士，朝來常言善事，天與之福。朝來不得言柰何字，又不得歌管，此名爲請禍，切誠之。

凡牀上卧，莫歌莫詠，勿覆卧，此三忌並大凶，皆損壽。夫學道者，第一欲得廣行陰德，慈向萬物，救拔難危，度人苦厄，輕財重道，施惠布德。

守一之道，有厄難，念一畢，向師所在再拜求救，立使得解大急，但念心拜耳。

守一之道，忍辱爲本，欲殺人念飛仙，欲妬忌念大神，欲貪財念真人。

守一之道，或不能至，常一心念，若卒爲惡，思所驚恐厭魅，當起視北斗輔星。輔星者，七星第六是也。并念一，則百邪却去，身無殃也。若遇天陰雨，不見星，但精心念一矣。

老子曰：凡欲修道，心無二端。天能守一，覆如不舉。地能守一，靜如能安。嶽能守一，不避暑寒。海能守一，流如不還。人能守一，必得神仙。

西王母曰：理髮常向本命，既櫛髮之始，而微呪曰：大帝散靈，五老反神，泥丸玄華，保精長存，左拘隱月，右引日根，六合清鍊，百神受恩。祝畢，咽液三過。常行之，使頭腦不痛。

坐卧常欲鼻孔向本命，食飲及服藥亦然。若不得向本命者，得常向東北及西北亦佳。此二處是天地魂魄之關津也。又卧起常自左右搖動身體數十過。畢，又兩手，據後而仰頭喘向天，左右自搖動項二十過。畢，平坐，舉兩手良久。畢，又摩拭目旁至兩耳，

又良久。陰呪曰：前搏後拍，天地上客，左盼右顧，長生大度，仰頭喘息，太一相極，却月龍偃，司命同軫，飲食胎元，交關崑崙，徊倒雙跪，真人同志。祝畢，輒引氣閉之，存臍中赤氣，大如線，出臍外，入鼻中，如此三過。按摩之道都畢，使人百關通利，長生壽命無窮而不病。

登真曰：欲得延年，當洗面精心。日出二丈，正面向，口吐死氣，鼻噏日精，須鼻得嚏，便止。是爲氣通，亦以補精，復胎生之方也。

登真曰：欲使心正常，當以日出三丈，錯手著兩肩上，當出心對日，以日正當心，心中聞暖，存日精暉來入心，故覺其微暖，則心正矣。常能行之佳。

### 老子理身守一法

夫欲食之時，先竊呪曰：某甲建身爲道，身爲天府，道父道母，真人仙人，道人聖人，合而爲道，俱共飲食，長生無極。

凡欲飲水，先三噓畢，呪曰：乾元

享利貞，身爲日，國王神水入腹，五藏清涼。每欲飲水，皆先呪而後飲。

王君曰：勿臨食時，及合和一切藥物燒鍊藥，不得說死亡及不祥事，切忌。

夫服藥常向本命上，服畢，勿言死亡事，犯傷胎神，徒勞服藥物，終無益也。

### 老子理身守一法

每喫一切飯食，及服一切藥，皆先誦此呪曰：黃裳子，三呼之，爲我取肥脯美酒、粳糧黍臠、神丹玉芝，置此食器中，及藥器中，上一、中一、下一，三之一神，各就食器中及藥器中而食。更相哺飼，及飼我身。兼存三嬰孩，每一嬰孩各存長三寸，各著赤衣，在食器中而食。如對雜人同餐，即不用誦呪，但存三嬰孩，次第同向飯食中徧喫了，已然後喫。晝夜常能如此存念三一，令人增福益壽，兼辟邪去病。

又呪曰：百藥入胃，與神合氣，填補血液，屍邪亡墜，長生神仙，飛登金闕，役使六丁，靈童奉衛。

《真誥》曰：養生之道，先欲識己之形，存之極令准的，在目前矣。使面上恒有日月之光，周照一形，存日在左，月在右，去面前九寸許，乃叩齒三通，微祝曰：元胎上真，雙景一玄，左抱七魄，右拘三魂，令我神明，與形長存。

呪畢，又叩齒三通，咽液三過止。此名爲太帝君錄形拘魂制魄之道。如此行之不倦，使人魂魄不敢離形，神仙長生之道要。

《太素丹景經》曰：一面之上，常欲兩手摩拭之，高下隨形。摩拭唯令數無時節也。如此常行則通利耳目。恒以手按兩眉後小空中三九過，又以手心及指摩兩目下顴上，摩唯多爲佳。以手旋耳行三十過畢，輒以手逆乘額三九過，從眉中始，及上行入髮際中，傍咽液多少無數也。如此常行，目自清明，一年可夜書。

《真誥》曰：凡體有痛處，常以生氣時咽液二七過，按所痛處。向王方而呪曰：左玄右玄，三神合真，左黃右

黃，六華相當，風氣惡疾，伏匿四方，玉液流澤，上下宣通，內遣水火，外辟不祥，長生飛仙，身常体強。

又當急按所痛處三十一過，常能如此，則無病。

彭君口訣：每日平旦卧未起時，及夜初卧時，存之真人子丹，在兩眉間，戴青幘冠。子常能思之，壽八百歲。

王君曰：夜行及冥卧，若心中恐怖者，存日月還入明堂中，須臾百邪自滅。山居恒爾爲佳。

師曰：夜行念太陰君，太陰君，就我來，就我來。此呪無所不辟。夜行，先祝曰：一君在吾前，二君在吾後，衆邪惡物，皆不得近吾。

欲求長生之法，當以月晦日人定時，北首卧，以手固心上，祝曰：五藏之君，道德七神，天父地母，日君月臣，諸天皆下，守衛真人，千神百靈，保護我身，唯乞長生，改故易新。公兆七，庶兆二。男曰公兆，女曰庶兆。

青牛道士口訣：每暮卧，存日在

額上，月在臍下，辟千鬼萬邪。致天府玉女。祕驗祕驗。暮卧祝曰：廓廓恢恢，禍去福來，恢恢廓廓，除凶除惡，太上賜壽，司命政之，名上玉曆，編以青絲，諸神備具，百灾皆除。

夜初欲卧，上床訖，便轉履向外。呪曰：迴履背床，除邪辟兵，天帝獄吏，禁鬼夜行，重者斬腰，輕者棄市，不輕不重，截鬼兩耳，急急如太上老君律令。便叩齒三通。

每夜卧，叩齒三七，左手撫心，呼三尸名：上尸彭居出，中尸彭質出，下尸彭矯出。輒不得爲害。

夜初卧時，正偃卧，即以兩手撫心，呪曰：神人神人，五藏光生，存我骨髓，養育華精，神光已固，却老延年。天符天符，保護我軀，精神所在，神光所行，所欲者得，所惡者伏，急急如太上老君律令。

次即誦：天靈節榮，願得長生，太一真玄，守臣身形，五臟君侯，各自安寧。男祝一七遍，女祝二七遍。

真人常以夜半時，去枕平卧，握固

放體，氣調而微者，身神具矣。如有不具，便速起燒香，坐閉目，握固兩膝上，心存體神，使兩目中有白氣如雞子大，在目前，則復故也。五日一行之，此即二十四神中事也。

凡著新衣，舉頭向日，呪曰：赫赫洋洋，身有神光，著此衣裳，富貴吉昌，壽命延長。

夜卧覺，更急閉兩目，即叩齒九通，咽液九過，以手按鼻邊，左右上下數十過，微祝曰：太上四明，九門發精，耳目玄徹，通真達靈，天中之臺，流氣調平，嬌女雲儀，眼童英明，華聰昴朗，百度眇清，保和上元，徘徊九城，五藏植根，耳目自生，天臺鬱素，梁柱不傾，七魄澡練，三魂安寧，赤子携景，輒與我并，有敢掩我耳目，太上當摧以流鈴。萬凶消滅，所願必成，日月守門，心藏五星，真皇所祝，群響敬聽。

畢，又咽液九過。然後摩拭面目，令小熱，以爲常。但卧覺即按祝，勿令失一卧也。常爲之，令人耳目聰明，強識豁朗，鼻中調平，不唾津涕，面有童

顏，制魂錄魄，劫辟萬魔。

太素真人教始學者辟諸惡夢，若數遇惡夢者，一日魄祆，二日心試，三日尸賊。厭消之法，若夢覺便即起坐北向，以左手捻人中二七過，第二第三指捻山源，近鼻下本際穴中，陰數二七過，勿舉手，啄齒二七。微祝曰：太洞真玄，張鍊三魂，第一魂速守魄，第二魂速守泥丸，第三魂受心節度。速啓太上三元君，向遇不祥之夢，是七魄遊尸，來挾萬邪之源，急召桃康護命，上告帝君五老九真，皆守生門，黃闕神帥、紫戶將軍，把鉞握鈴，消滅惡津，反凶成吉，生死無因。

若夜遇善夢吉應，而心中自以爲佳，則吉感也。卧覺當摩目二七，叩齒二七，而微呪曰：太上高精，三帝丹靈，絳宮明徹，吉感告情，三元守魄，天皇受經，所向諧合，飛仙上清，常與玉真，俱會紫庭。此大洞祕訣，以傳於始涉津流者矣。

夜遇惡夢覺，即反枕，或更枕而祝曰：太冥玉女，侍真衛魂，六宮金童，

來守生門，化惡爲善，上書三元，使我長生，乘景駕雲。祝畢，咽液七過，叩齒七通，而更卧。如此四五，亦自都絕消息也。此祝亦反惡夢，更爲吉祥矣。

真人曰：詣廁法，初登廁，先呪曰：左德君，右德君，上司命，清夫人，除去某乙死籍，入生門。

#### 上廁用草法

先置一枚著左，爲左德君，次置一枚著右，爲右德君。又置一枚著中央，除去某死籍，入生門。廁草長短不得過九寸，如過此數，即減人壽命，切須忌之。

若在草野中大便，即呪曰：林野夫人，林野夫人，除去某死籍，入生門。如用廁草呪，與前廁上法同。

洞玄靈寶真人修行延年益算法

（郭清點校、王卡復校）

## 075 洞玄靈寶道士明鏡法

經名：洞玄靈寶道士明鏡法。撰人不詳。約出於南北朝或隋唐。言修持明鏡法術，與《上清明鑒要經》、《上清明鑒真經》略同。一卷。底本出處：《正統道藏》正一部。

照鏡欲見形法。當小開戶居，指向明，漸閉目，思想見面形。初時，漠漠殊無所見。中宿之後，漸漸洞遠，自見面目。思憶心中，朗朗開明。平日、夕日未入，此時最好。若日中盛明之時，小閉戶，在灼灼中，闕鏡無所見也。莫在火下照鏡，當以火自遠，勿得過近火光。若宜欲開日照鏡，自視形體，當在灼灼明中，無所苦。若欲閉目，思見面形，居暗向明，然後見形耳。照鏡大要，當安卧牀，思想精誠，欲坐欲卧之

間，體脩脩。當須臾之頃，當有赤黃從額上出，照耀一室中。於是髣佛恍惚，如覺如卧，便自面形在光中，對共相視，如須即便消滅。卧覺之後，輒復照鏡，欲卧思之，如前法。夕夕自見也。或卧覺兩面相對，或見己形，兩人共伴坐。或卧寢間，見好神童玉女，年五六歲許，好衣服，頭額端正，見輒再拜。或耳邊聞語聲，天下吉凶萬事，皆預知之。或在壁東見壁西，或卧夢照鏡，或還光內視五藏。照鏡當以申始。

立視之法。明鏡九寸，無令面有疵瑕。正令清明，左右各人一尺，壽與天地同。自齋，謹澡盆盛井華水，著下也。夜照鏡，宜用麻油火也。自見其形分明。下再拜長跪，言吾與子同體，今與子分形，萬年乞改，常與子相隨，身形不衰，萬年相隨。受視中明鏡，先視形，見衆物，聽聞人語聲。修照鏡，有三童九女侍之。三童長六尺，九女長五尺。青腰衣青裳彩衣內，紫女衣黑，素女衣白，皇女衣赤，玉女衣紅，帳上衣緇二十通。

明鏡君官屬將百二十人，治開陽宮，主人兩目童子，精光相視，見景知吉凶。

昔有摩鏡道士，賃爲百姓摩鏡，財責六七鏡，無他法，唯以藥塗拭之，而鏡明。有袁仲陽問之，道士告明鏡之道，可分形變化，又能令人總明，達知方來，有能令與天地諸神相見，行其道得法，則諸神仙皆來。道士得道矣。道士在石室中，常當懸明鏡九寸於背後，以辟衆惡。又百鬼老物，雖能變形，而不使鏡中影變也。其形在鏡中銷亡，無爲害也。道士摩鏡藥方，出《白子高經》中。

向得摩鏡人云：藥用縮鋌，邊有鐵鏗赤者好。打鐵人燒縮鋌，打之即出，鍛鐵亦有之。名赤粗，是取之於鐵臼中。熟擣細篩，用帛子籬過。又用蛇黃，亦擣細篩，用生油和此二物，即是藥也。

洞玄靈寶道士明鏡法

（郭清點校）

## 076 靈寶施食法

經名：靈寶施食法。撰人不詳，約出於宋元。言施食亡魂儀法一卷。底本出處：《續道藏》。

此法能日日行之，惟好。恐未能長齋，但不食五辛及厭物醉酒，皆可。若只遇齋日行之，亦在人也。每當早飯之時，先存淨飯些子，以小盒盛貯，至夜靜望空，默念淨三業咒。同前朝真懺。內持咒時，必須身心如一，塵累頓忘，幻境皆空，金光洞煥。次念土地咒，存土地正神拱立聽令。此間土地，神之最靈，升天入地，出幽入冥，爲吾關奏，不得留停，有功之日，名書上清。

次念救苦經一徧。先誦此經者，所以致其誠，敬望其感孚也。當誦經之時，須一念不生，萬緣俱寂，日光

上燭，泥丸圓光，充滿慈尊，衆真森羅于內。次祝云：

具位臣某，稽首皈依，志心上告虛無自然元始天尊、玉宸道君靈寶天尊、太上老君道德天尊、青華慈父太乙救苦天尊、十方應號救苦天尊、十方救苦真人、十方救苦童子、上清玄一三真君、三天大法師正一真君，太極左宮仙公真君、九州都仙太史真君、金闕昭凝妙道保仙元君、一元無上救苦薩君真人、九天度魂諸司真宰、十方得道一切神仙、法籙宗師仙靈、雷霆岳艷帥將、神虎追攝官屬、三元五道大神。恭望洪慈，俯垂洞鑒，以今某處奉道某人，輟餐施食，普濟幽靈，願降祥光，照開冥道，攝引魂爽，疾速來臨。仰憑三寶，慈尊慧力，散洒甘露，變化法食，周徧十方法界，鬼神咸資解脫。

次念普照鬼神咒曰：  
喃唵胃孚定吉利。一炁七遍。急速至攝。

存黑炁一團，廣大無邊，從左肩後來，內有萬點星光，即一吸吹，布于

前，如有神將部領。次祝曰：

謹召十方無極世界一切魔靈道，人倫道，地獄道，餓鬼道，畜生道，諸類男女孤魂，劫亡苦爽，我等宿生，負命負財，負恩負義，冤債囚徒，古往今來，他方此界，戰場陣歿，客死枉亡，一切沉魂滯魄，鬼神精靈等衆，悉承道力，來赴靈場，受食和冤，乘功超化。

次念甘露開咽喉咒曰：

唵里元希平吒希攝華耶。一炁九遍。存慈尊應感浮空，散洒甘露，自己舌拄上腭，唇齒相合，目光上視頂門。俟其滿口甘潤，漸漸嚥液，熱惱清涼，無復飢渴，幽靈皆濟矣。

次念化食咒曰：

唵部盧里嚴聿多攝。一炁七遍。以神咒力，變化法食，廣大無邊，却持五厨咒一遍。須從容緩念。

一炁和太和得一道皆泰和乃無一和玄理通玄際不以意思亦不求無思意而無有思是法如是持莫將心緣心還莫住絕緣心在莫存心真則守真元修理志離志積修不符離志而不修志已業無已知

諸食炁結炁非諸久定結炁歸諸本炁隨取當隨洩。

次念解冤咒：

化悶唵利吽，解釋五鬼債。一炁七遍。

自己身心澄徹，不起怨憎，衆魂省悟，恩怨兩忘，自然解脫。次說散云：

諸仙子等，飢虛飽滿，熱惱清涼，執對消除，冤仇和釋。更能皈依道，免墮地獄。皈依經，免墮餓鬼。皈依師，免墮畜生道。能持受九真妙戒，當消九幽大罪。能結四大誓願，當道果。今以逐一宣傳，各心聽受。三皈依者，皈依大羅玉京妙道，皈依華堂內景玉經，皈依人天得道宗師。九真戒曰：一者敬讓，孝養父母。二者克勤，忠於君主。三者不殺，慈救衆生。四者不淫，正身處物。五者不道，推義損己。六者不嗔，兇怒凌人。七者不詐，諂賊害善。八者不驕，傲忽至真。九者不二，奉戒專一。四大誓願者，願誓了明本性，不墮迷津；誓願啓大慈悲，離諸情欲；誓願廣修福德，普濟衆生；誓願皈依奉

真宗，贊揚道化。如上皈依戒，檢束身心，願力扶持，終劫不昧。盡未來際一切衆生，同此熏修，各諧超度。

次散食咒曰：

我設清淨供，普施幽魂衆。一粒遍十方，河沙鬼神共。

次稽首瞻送，回向。

神光上朝，透出頂門，閉炁猛着，呵左，手，剔出午文。冲前黑炁中，萬點显光，升入無形，了無罣礙，切戒疑滯。咒曰：

願以此功德，回向大慈尊。嘉被我宗親，師資并眷屬。普及諸衆生，皆成無上道。

前咒有口字邊字，只念一邊。正字如有字音者，如常音念，不必疑惑。

靈寶施食法

(王卡點校)

# 077 洞玄靈寶齋說光燭戒罰燈祝願儀

經名：洞玄靈寶齋說光燭戒罰燈祝願儀。南朝宋道士陸脩靜撰。言靈寶齋戒科儀要旨。一卷。底本出處：《正統道藏》洞玄部威儀類。

## 燭光齋外說

陸脩靜撰。齋集先於私房，燒香束帶說之。

燭光者，猶莊子所謂燭火也，為光之微者。原夫齋法至精，而行者常羸，實五濁垢障，深蒙難啓。如處曲穴，非太陽所照，延引幽闇者，宜以燈燭之明。今以燭光，斯之謂也。皆標齋經大旨，舉法體近要，意以約束羸猥，示導玄微。又若匠之選木，斜曲甚者，未近繩墨，要先裁其外，然後加以成規。愧乎余之鄙拙，乃至此之繁蕪。或由

木理又挈，難為師工邪。此法造齋醮，先於私房說之，束帶香火如法。

夫齋，當拱默幽室，制伏性情，閉固神關，使外累不入。守持十戒，令俗想不起。建勇猛心，修十道行。堅植志意，不可移拔。注玄味真，念念皆淨，如此可謂之齋。

一香湯沐浴，以精神氣使五體清潔，九孔鮮明。衣服悉淨，內外芳馨。延降高真，視接虛靈故也。

二廢棄世務，斷俗因緣，屏隔內外，蕭然無為，形心閑靜，注念專精。

三中食絕味，挫割嗜慾，使盈虛得節，臟腑調和，神氣清爽，含養元泉。

四謹身正服，齋整嚴肅。捨離驕慢，無有怠替。禮拜叩搏，每事盡節。

五閉口息語，不得妄言。調聲正氣，誦詠經文。開悟人鬼，會感仙聖。

六滌除心意，不得邪想。調伏六根，盪滅三毒。存神思真，通洞幽微。

七燒香奏煙，鳴鼓召神。上聞三清，普宣十方。

八懺謝罪咎，請乞求願。心丹至

誠，謙苦懇惻。

九發大慈悲，愍念一切灾厄惱難，咸願度脫。生死休泰，無復憂苦。

十進止俯仰，每盡閑雅，更相開導，言止於道，不得離法。覺有跌誤，便即踰失，稽顙懺悔。

所謂靈寶自然無上齋者。靈者，神也。微妙之功，出於思議之表，變化無窮，故謂之靈也。寶者，一也。是三才所得，而清寧貞也。既不可失，故謂之寶。若抱之不離，則萬福自臻，違之俄頃，則灾禍亂集。吉凶利害，得失所由，無有能使之然，亦無能使之不然，是以謂之自然。周濟五道，度脫一切，絕滅生死，超逸三界，故謂之無上。夫人體非聖真，而處身五濁，三尸強盛，内生攻賊，九竅四關，各有所趣，施為之向，動入死地，致傷天年，命不終天壽，犯惡為非，結罪幽司。故居世軼軻，人道不休，飢寒窮賤，疾病刑罰，灾害所纏，凶禍所集，命過之後，方履苦難。是故太上天尊，開玄都上宮紫微玉笈，出靈寶妙齋。以人三關躁擾，不



能閑停，身爲殺盜淫動，故役之以禮拜；口有惡言，綺妄兩舌，故課之以誦經；心有貪欲嗔恚之念，故使之以思神。用此三法，洗心淨行。心行精至，齋之義也。廣願善念，以弘福業。持戒之心，當如墜井把縵，不可乍失。務法之意，如壅崩堤，不可閒惰。習念之情，如種良田，無有厭足。一日一夜，奉戒尊法，孜孜不倦，則感通太玄，真靈降集，三尸竄滅，衆魔摧伏，如此之願，願無不獲，志無不尅也。

夫聖世難遭，經法難聞，良時難值，明師難遇。諸賢前生，並有大福，致慶會今身，得值三寶，聞見法音，好尚清虛，餐納靈味，皆已玄名帝圖，金書玉籙，爲天堂之福寶，太上之仙客。今又擢身法座，服膺法軌，已有善始，何不克終。當共堅持心志，與懈怠競，稟承法訓，念爲妙行，努力勵誠，勿計疲勞，一日精進，歷世受福。人命危險，四大難保，百年倏忽，何足爲多。如使衰老奄至，眼暗耳聾，加以衆疾，痛惱相纏，眠坐呼吸舉動，須人氣力。

如是當復能道業精進，預此法座以不一失善緣，後會何期，沉溺窮道，悔恨何益。想思此言，各爲身計，相與勉勵，共濟厄難。

夫人先身有重罪惡對，則爲廕蓋所裹，六蔽不開，心意曲狹，氣性逆戾，迷著五欲，莫窺其外。甘肥聲色，取快目前。憎善嫉賢，甚若怨讎。如此之人，在所墮向，與惡爲緣，終不與經教相遇，遇亦不信。見人敬順道法，乃謂妖妄，咸共誹笑。夫聾者不聞韶武，瞽者不覩白黑，豈言已病哉。縱有善識，強相牽挽，既非本性，迴生悔心，背真向僞，追逐精邪。夫歡樂暫過，憂苦延長。斯輩皆以三塗爲歸道，地獄爲居家，永淪幽夜，不覩三光，抱銅柱，履刀山，循劍樹，入鑊湯，吞火食炭，終劫無脫。縱更受生，墮六畜形，身被屠割之酷，魂困三惡之中，往反流曳，可不哀哉。

### 法燭叙

陸脩靜撰。建齋暮始，就燒香宿啓，未思神前，東向說之。

法燭。法者，規矩之謂，總稱曰法。規圓矩方，萬物從之，得正者也。燭者，有光之物，佐月輔日，開昏朗闇，用其明，得有所見也。邪曲無法，則無以自正，用法無明，則莫見得失。欲正不可無法，用法不可無明。自定不可不齋，齋不可無此書。此書爲之法燭，乘之以游道藏，故尅獲於真寶也。

夫萬物以人爲貴，人以生爲寶。生之所賴，唯神與氣。神氣之在人身，爲四體之命。人不可須臾無氣，不可俯仰失神，失神則五臟潰壞，失氣則顛蹙而亡。氣之與神，常相隨而行。神之與氣，常相宗爲強。神去則氣亡，氣絕則身喪。一切皆知畏死而樂生，不知生活之功在於神氣，而數凶其心，而犯其氣，屢淫其神，而凋其命，不愛其靜，存守其真，故致於枉殘也。人何可不惜精守氣，以要久延之視，和愛育物，爲枝葉之福。聖人以百姓奔競五欲，不能自定，故立齋法。因事息事，禁戒以閑內寇，威儀以防外賊。禮誦役身口，乘動以反靜也。思神役心念，

御有以歸虛也。能靜能虛，則與道合，譬迴逸驥之足，以整歸真之駕。嚴遵云：虛心以原道德，靜氣以期神靈。此之謂也。而末世學者，貴華賤實，福在於靜而動以求之，命在於我而捨己就物。若斯之徒，雖欣修齋，不解齋法，或解齋法，不識齋體，或識齋體，不達齋義，或達齋義，不得齋意。紛紜錯亂，靡所不為，流宕失宗，永不自覺，譬背驚風而順迅流，不知泝洄反源，遂長淪於苦海，可不悲哉。余謹博採衆經，集爲十章，以施齋時，名曰法燭。宿啓說一章，六時行道說六章，三時思神說三章。若法師必炳之以行齋法，衆官主人皆能虛心奉受者，則視聽明朗，庶覩大道之門也。

夫道者，至理之目。德者，順理而行。經者，由通之徑也。道猶道路也，德謂善德也，經猶徑度也，行猶行步也，法猶法式也。夫人學道，要當依法尋經，行善成德，以至於道。若不作功德，但守一不移，終不成道。譬如人坐於家中，而不行步，豈得見道里邪。夫

道三合成德，自不滿三，諸事不成。三者，謂道、德、仁也。仁，一也。行功德，二也。德足成道，三也。三事合，乃得道也。若人但作功德而不曉道，亦不得道。若但曉道而無功德，亦不得道。若但有道德而無仁，則至理翳沒，歸於無有。譬如種穀，投種土中，而無水潤，何能生乎。有君有臣而無民，何宰牧乎。有天有地而無人物，何成養乎。故五千文曰：三生萬物。

### 授上品十戒選署禁罰

悉准按採用陸法師所撰立文。先宿啓畢，次授上品十戒，一時東向平立。

誦智慧頌曰：

智慧起本無，玄玄超十方。結空峙玄霄，諸天挹流芳。其妙難思議，靈感真實通。有有竟不有，無無無不容。

智慧恒觀身，學道之所先。眇眇入玄思，自然錄我神。天尊常擁護，魔王爲保言。晃晃金剛軀，迢迢太上前。智慧生戒根，真道戒爲主。三寶由是興，高聖所崇受。汎此不死舟，倏欵濟大有。當此說戒時，諸天來稽首。

次誦畢，一時北向，首體投地，迴心禮十方、還向東而伏。

法師還東面向西，說戒威儀。

天尊告太上道君曰：今當普宣法音，開悟羣生。爲諸男女解災却患，請福度命，拔諸苦根。使生者見道，身脫八難，死者歡樂，飲食天堂，早生人中，轉輪聖王。修齋求道，皆當一心請奉十戒，諦受勿忘。專情默念，洞思自然。勿得雜想，撓亂形神。能如是者，便當靜聽。

第一戒者，心不惡妬，無生陰賊。檢口慎過，想念在法。

第二戒者，守仁不殺，愍濟羣生。慈受廣救，潤及一切。

第三戒者，守貞讓義，不淫不盜。常行善念，損己濟物。

第四戒者，不色不欲，心無放蕩。貞潔守慎，行無點污。

第五戒者，口無惡言，言不華綺。內外中直，不犯口過。

第六戒者，斷酒節行，調和氣性。神不損傷，不犯衆惡。

第七戒者，不嫉人勝己，爭競功名。每事遜讓，退身度人。

第八戒者，不得評論經教，訾毀聖文，躬心承法，恒如對神。

第九戒者，不得鬥亂口舌，評詳四輩，天人咎恨，傷損神氣。

第十戒者，舉動施爲，平等一心。人和神穆，行常使然。

天尊言：修奉清戒，每合天心。常行大慈，願爲一切普度厄世。謙謙尊教，不得中怠。寧守善而死，不爲惡而生。於是不退，可得拔度五道，不履三惡，諸天所護，萬神所敬，長齋奉戒，自得度世。

天尊言：道尊法妙，人身亦貴。故道開法，遺戒經文，以度人身。人身既度，上與道同。宜爲精行，持齋奉戒，夷心靜默，志念分明，一意歸向，專想不貳，滌蕩六腑，過中不味，內外清虛，每合自然。是其齋日，捻香啓願，應心上徹，四天司邏十部威神，即下履行，觀聽法音，監映爾心。如戒行道，皆列功諸天，禍福立彰，道不負人，勤

行諦受，勿使魔言。

天尊言：建齋行道，四天帝王皆駕飛雲綠輶八景玉輿，從真人玉女，手把花幡，前導鳳歌，後從天鈞，白鶴獅子，嘯歌邕邕，燒香散花，浮空而來。瞻履行道，觀聽法音，天王下降，萬靈朝焉。是豈可不盡其法耶。當先授十戒，然後行道，庠序雅步，靜心閑意，坐起卧息，不離儀格，天王懽悅，列名上清，可謂得道方寸之間。

經言：夫感天地，致羣神，通仙道，洞至真，解積世罪，滅凶咎，却怨家，修盛德，治疾病，濟一切，莫過乎齋轉經者也。夫齋直是求道之本，莫不由斯成矣。此功德巍巍，無能比者。上可昇仙得道，中可安國寧家，延年益壽，保於福祿，得無爲之道；下除宿愆，赦見世過，救厄拔難，消滅灾病，解脫死人憂苦，度一切物，莫有不宜矣。

經言：夫齋法之大者，莫先太上靈寶齋。靈寶之文，是天地之元根，神明之戶牖，衆經之祖宗，無量大法橋也。若誦經一句，則響徹九霄，諸天設

禮，鬼神振肅也。幽深遠妙，難以宣言。夫非天下之至善，莫能致焉。非天下之至信，莫能請焉。非天下之至精，莫能奉焉。非天下之至才，莫能行焉。太上所重，衆真所尊，皆鑄金爲字，刻書玉篇，封之於無上大羅天玄都玉京山紫微上宮七寶玄臺。此臺則是太上所治也。五老侍衛，萬帝朝真，玉女執巾，金童揚煙，焚百和合香，流熏紫庭，吐日精以却穢，散月華以拂塵，神燈朗照，炳燭合明，金風八散，慶雲四陳。飛龍毒獸，備衛玉闕。十方至真，三千大千已得道大聖衆，及自然妙行真人，皆一日三時旋繞上宮，稽首行禮，飛虛浮空，散花燒香，手把十絕，嘯詠洞章，讚九天之靈奧，尊玄文之妙重也。今道士齋時，所以巡繞高座，吟詠步虛者，正是上法玄根衆聖真人，朝宴玉京時也。行道禮拜，皆當安徐雅步，審整庠序，俯仰齊同，不得參差。巡行步虛，皆執板當心。冬月不得拱心，夏月不得把扇，唯正身前向，臨目內視，存見太上在高座上，注念玄真，使心形

同丹，合於天典，則爲飛仙之所嗟歎，三界之所軌範，鬼神之所具瞻也。不得左顧右盼，更相前却，及言語笑謔，有所呵喚，則觸忤威靈，四司糾過，五帝結刑，明科所禁，可不慎哉。

經言：齋時日夕各三時，燒香悔過，唯一心聽受經法妙蹟之義。故轉經說法，像古真人教化時也。聖人傳授經教，教於世人，使未聞者聞，未知者知。欲以此法橋，普度一切人也。行道之時，故不可得亂語，論及世務，唯當請問法師經義禁戒，法師當爲解說真要。能使内外夷然，敬受經一句，則司命延加十算，後皆聰明智慧。若内外躁競，毀忤經文一句，則司命奪十算，後隨癡愚盲道。故真人不言，言必有中，言皆合於法言。人能弘道，非道弘人，此之謂也。

說戒畢，法師依舊選署衆官。衆官長跪受簡札。明日行道，各典所署。

法師

經云：當舉高德，玄解經義。斯人

也，道德內充，威儀外備，俯仰動止，莫非法式，三界所範，鬼神所瞻，關啓祝願，通真召靈，釋疑解滯，導達羣賢。

都講

經云：才智精明，閑鍊法度。其任也，行道時節，上下食息，先自法師，次引衆官，禮拜揖讓，皆當讚唱。

監齋

其職也，司察衆過，彈糾愆失，秉執科憲，隨事舉白，必使允當，不得隱濫。

侍經

其職也，營侍尊經，整理巾蘊，高座几案，四座席地，拂拭齊整，不得怠懈。

侍香

其職也，當料理爐器，恒令火然灰淨。六時行道，三時講誦，皆預備辦，不得臨時有闕。

侍燈

其職也，景臨西方，備辦燈具，依法安置，光焰火然，恒使明朗。若遇風

雨，火勢不立，諮白法師，宜停乃停，不得怠替，輒令闕廢。

選署畢，左迴上香，東向祝，復香。衆官引行出治，按次列坐，勿解帶。法師更爲宣科說禁，告示威儀，衆官靜聽。

道士登齋，皆當各齋巾褐，手板履具，不得臨時交換彼我，於事有闕，勿得牽引非己之服。齋日燒香，上講都講，當率衆官，先下牀，西向倚。法師然後下座，引行尊卑，以次安行雅步，到於道戶。不得更相越錯，遲疾不均，皆依事糾罰。燒香竟，及下講，率衆官先出治戶，還悉西向倚。法師後至上牀，衆官一時禮一拜，然後就坐。

道士登齋起居，皆當關白監齋，禮法師一拜，次禮香三拜而去。還亦如之，有違罰如後條：

到齋堂屐履不整，罰油二升。坐起不庠序，罰硃半兩。

不正坐，罰香二斤。

翻覆香火，罰香半斤。

臨行事與外人言，罰香一斤。  
侍經不整飾，高座觸物，罰香半斤。  
語及世務，罰油二升。  
語言戲笑，罰硃一兩。  
倚語低睡，罰硃半兩。  
翻覆燈油，罰油五升。  
巾褐不整，罰香半斤。  
內外不豫相檢飭，音聲高厲，罰油五升。  
聽經倚據不執簡，罰油一升。  
不注念清虛，心想意倦，為衆所覺，罰油二升。  
起出齋堂，不相關白，罰油二升。  
垂髮馳步，罰香一斤。  
讀經忽亂，請問敗句，罰油五升。  
唱聲不齊，罰油二升。  
行香不洗手漱口，罰油二升。  
坐起揖讓失儀，罰香半斤。  
巡行不依次第，罰香半斤。  
侍香香煙中絕，罰油四升。  
都講不謹唱讚，罰香一斤。  
起行來及還坐，不禮經三拜徑去，罰香一斤。

侍燈燈火中滅，罰香一斤。  
臨燒香突行，罰油一升。  
齋主供具不辦，觸物有闕，罰香一斤。  
執糾見過，不彈私隱，罰油六升。  
受關不啓上，罰油三升。  
齋次而因起居，逃遁不返，為衆所糾，罰油一斗，香一斤。  
妄言綺語，論及私鄙，罰香一斤，油五升，硃三兩。  
金籙曰：登齋下座，於法事有虧。從一至三，監齋依事。彈罰從三以上，當斷功削除，宣示同學，不得容在法座。監齋容縱不糾，亦同生者之罰。  
又上座法師，於事有虧，當錄愆失，送簡監齋，從一至三，斷功三百日，不得更在法座。  
威儀曰：罰物送齋主，宣示百姓，然後供公家用。

凡此禁制，並出玄都上宮明科舊典，戒於惰慢，檢肅愆違。天尊慈仁，曲愍行尸齋而獲罪，故開黜罰之科，聽以香油輸贖，可得灾蒙釋散，不欲令結罪冥中。兼使犯憲之子，知懷愧惻之心，改塗革弊，自新有階。又香油乃不為多，然卒難交辦。且道士一日齋會，多非舊衆。法座既畢，各各離散，不得輸送，更違經旨，增其咎考。夫逆惡之身，犯莫大之罪，猶使齋戒請贖，消散釁負。且齋之所修，尊乎禮拜，而況戒尚之士。但儀式之失，若以禮拜罰之，亦在可通，其拜數多少，當隨日輕重，執事之官，臨時詳判，敬白齋主。  
夫齋法至精，威禁甚嚴。所以爾者，天真大神，十方衆聖，及三界羣靈，皆親降齋所，觀聽行道。魔王叉手作禮，所在神祇，皆來侍衛門戶。齋主當灑掃宅舍，必令淨潔。丁勅大小，使內外靜寂，標門斷客，不得使異人常俗之徒，往來干冒。  
若善男善女，信樂道法，束帶清靜，聽來觀化，然當別席坐起，不得參雜。齋主大小，皆束帶躡履，不得散誕踉履。若宜處分，每和聲下氣，不得更相呼喚。音聲高厲，則觸忤天真，犯干靈禁。客及齋主，若有哀慘，雖未相

見，皆當夷常，不得慰弔，哀聲相對。若竇賤主貴，有瓦玉之殊，世情拘繫，多未通達。雖復憑向道法，不能恭敬道士。夫道尊德貴，天下莫二。雖道士卑微，其標心高大。齋主既希懷幽微，期誠恩祐，法應遜意，屈節指情，虛己則善德歸流，福喜交集。不得凝抗倨傲。輕忽道士，則幽津挹絕，玄澤不至。夫上天降雨而均注無偏，川流常盈而峰嶺無潤，爲其形高嶮峭，無有容納之處。東海所以獨爲百川王者，非能恃威任勢，強制苟抑，但由其體。夫極曠而處卑居下，含垢莫逆，致爲衆流所湊，若有小兒未堪執齋，不得令觸近治堂，干預齋次。

夫齋者，正以清虛爲體，恬靜爲業，廉卑爲本，恭敬爲事。戰戰兢兢，如履冰谷，肅肅慄慄，如對嚴君。至經句輒起禮拜，當一心稱善，隨意願念，唯令丹苦，必有感應。太上道眼，恒洞觀諸天下之善惡，無有毫遺也。

洞玄靈寶齋說光燭戒罰燈祝願儀

（郭清點校、王卡復校）

# 078 太上洞玄靈寶法燭經

經名：太上洞玄靈寶法燭經。  
撰人不詳，似出於隋唐。言靈寶齋戒要旨，與陸修靜《靈寶齋說光燭戒罰燈祝願儀》近似。一卷。底本出處：《正統道藏》洞玄部本文類。

## 法燭

法者，規矩之謂，總稱曰法。規圓矩方，萬物從之得正。燭者，有光之物，佐月嗣日，開昏朗闇，用其明，得有所見也。邪曲無法，則無以自正，用法無明，則莫見得失。欲正不可無法，用法不可無明，自定不可不齋，齋不可不見此經。此經故為法之燭，秉之遊道藏，故尅獲於真實也。

道言：萬物人爲貴，人以生爲寶。

生之所賴，唯神與氣。神氣之在人身，爲四體之命，人不可須臾無氣，不可俯仰失神。失神則五臟潰壞，失氣則顛蹙而亡。氣之與神，常相隨而行，神之與氣，常相宗爲強。神去則氣亡，氣絕則身喪。一切皆知畏死而樂生，不知生活之功，在於神氣，而數凶其心，而犯其氣，屢淫其神，而彫其命，不愛其靜，存守其真，故致於枉殘也。人何可不惜精守氣，以要久延之視，和愛育物爲枝葉之福。聖人以百姓奔競五慾，不能自定，故立齋法，因事息事，禁戒以關內寇，威儀以防外賊。禮誦役身口，乘動以反靜也。思神役心念，御有以歸虛也。能靜能虛，則與道合，譬迴逸驥之足，以整歸真之駕。嚴遵云：虛心以原道德，靜氣以期神明。此之謂也。而末世學者貴華賤實，福在於靜而動以求之，命在於我而捨己就物。若斯之徒，雖欣修齋，不解齋法，或解齋法，不識齋體，或識齋體，不達齋義，或達齋義，不得齋意，紛紜錯亂，靡所不爲，流宕失宗，永不自覺。譬背驚風

而順迅流，不知泝洄反源，遂長淪於苦海，可不悲哉。可不痛哉。於是說經十章，以施齋時，名曰法燭。宿啓說一章，六時行道說六章，三時思神說三章。若法師必炳之以行齋臨壇法，衆皆虛心盟受者，則視聽明朗，庶覩大道之門矣。

道言：道者，至理之目。德者，順理而行。經者，由通之徑也。道猶道路也，德謂善德也，經猶徑度也，行猶行步也，法猶法式也。夫人學道，要當依法尋經，行善成德，以至於道。若不作功德，但守一不移，終不成道。譬如人坐於家中而不行步，豈得道里耶。夫道三合而成德，德不滿三，諸事不成。三者，謂道、德、人也。人，一也。行功德，二也。德足成道，三也。三事合，乃得道也。若人但作功德，而不曉道，亦不得道。若但曉道而無功德，亦不得道。若有道法而無人，則至理翳沒，歸於無有。譬如種穀，投種土中，而無水潤，何能生乎。有君有臣而無民，何宰牧乎。有天有地而無人物，何

成養乎。故曰：三生萬物。

道言：欲治人者，當先治身。欲正人者，當先自正。治身正心，莫先於齋直。齋者，齊也，齊人參差之行。直者，正也，正人入道之心。念淨神靜，齋之義也。所以齋者，凡人之生有四天之累。饑則憂食，寒則憂衣，衣食既足，憂當積蓄。貧者願富，賤者願貴。於是榮味聲色，衆慾互生。未得憂不得，既得又憂失，志無須臾之定，乃終身憂勤矣。動作求競，事務擾積，是非得失，哀樂喜怒，思慮煩冤，形勞神苦，致道氣遠已，魂魄離人，身如空城，凶邪日臻，嬰痾遇疾，天命喪身，罹謫三塗，殃流後世。是以聖人立齋清淨，屏遣塵勞，具錄魂魄，休息精神，當至誠恭肅，絕語止誼，不得戲笑，有所呵譴，及雜想亂念，目不視色，不見是非耳。不聽音，不聞凶祥，以淡泊爲心，虛無爲意，中和爲主，少食爲本，念道存神，則天人相感，灾除福降，性命得矣。故曰：清淨爲天下正。

道言：齋但修正，天地寂然，絕思

無所，一念即合。道氣流行，入人道中，所受將軍、吏兵則衛護，聽人驅使，萬向如願。若不能清淨，而躁擾多慮，違和犯順，忤逆冥科，身無善行，心惡不改，則吏兵委離，不爲人使，所求不合，凶害叢至。故曰：取天下常以無事。

道言：齋者，可謂整百行，建萬善者也。要當能忍辱，能柔弱，能慈愛，能仁施，能陰德，能忠孝，能至誠，能謹信，能戒慎，能肅敬。備此十能，然後乃可修齋靜思，反聽內視，還念形中，口不妄言，身不妄動。故無色之色爲之見，無聲之聲爲之聞，無味之味爲之甘，不言之言爲之應。神明爲之降，福氣爲之臻，則得心化意聖，好夢善景，能覩未然之徵，無願不獲，以此爲效。若外不奉威儀，內不守戒律，行無可記，功無可著，精誠不至，懷疑猶豫，內外不相應，口心不相副，情急性戾，多態兩舌，陰詛嫉妬，志思不正於身，精神消於淫慾，貪財好色，不能自制身心。如此雖修齋直，終身無福。夫何

故然？以意思不存於內，魂魄勞役於外，和氣去，故不能有所感動也。故曰：無欲以靜，天下自正。

道言：爲道修齋，當奉行戒法，廣度無極。法禁微妙，檢攝意態，伏心就淨，殃垢消滅，行智慧之便，拔生死之難，絕一切之想，就無爲之地，深觀所起，細察所滅，觀其所病，療以惠藥。若見色利，以誠掩目。或聞怨惡之言，以誠塞耳。若食甘香之美，以誠度口。若願想財寶，放情愛慾，以誠挫心。若欲姦非，趣向惡事，以誠折足。既總其要，身不犯誠，超出塵羅，不入塵俗。處衆愛之中，心在道誠之藏，處憂患之舍，心在善救之堂。住閻冥之室，心在斷滅之戶。倚不固之屋，心在方便之門。坐蛇虺之地，心在捨遠之逕。居虎豹之藪，心在福德之館。乘浮船之險，心固自濟之路。近盛火之林，心惟灌滅之要。立荆棘之園，心在鎧捍之障。是我持誠行智慧之便也。故曰：挫其銳，解其紛。

道言：立人之道，有三因五主。



何謂三因？一曰神，二曰氣，三曰形也。神因氣而立，氣因神而行，形因神而存，神因形而藏。神逝則氣散，氣散則形亡。故聖人先於養神，次於養氣，次於養形，三者和而相得，乃能長生。何謂五主？一曰精，主見五色；二曰神，主聞五音；三曰魂，主別善惡；四曰魄，主察清濁；五曰氣，主識痛癢。故形體者，是神魂之屋宅。五臟者，精魂之房室。九竅者，是神氣之門牖。欲人生目視耳聽、鼻息口言、形知痛癢者，皆是精神魂魄氣所爲也。若其一不存，則愚癡；二不存，則昏惑；三不存，則衰耗；四不存，則百疾生；五不存，則死亡。夫亡者，目不能有所見，耳不能有所聞，鼻不能復息，口不能復言，形不知痛癢，此豈復無耳目鼻口形耶，特是精神魂魄之亡耳。故喜怒則精散而不藏，愁憂則神閉塞而不行，驚恐則魂魄飛揚，食飲過差則形滯氣不通。故聖人見失神者夭，失精者狂，失魂者悲哭，失魄者脫色，失志者亂，失意者無氣。是以虚心去慾，挫銳解紛，

不以好美盈溢傷精，不以思慮愛憎傷神，不以喜樂恣態傷魂，不以忿怒激切傷魄，不以飲食過差傷形，不以悲哀極言傷氣。乃安居屏處，合天地之氣，存在於身，順四時，適寒暑，節陰陽，和喜怒，裁食飲，調憂苦，避霧露，逃風雨，寶氣補精，谷神養魂，內視若盲，反聽若聾，虛無淡泊，不在東西，內存五臟，分別色狀。存心即益精，存肝即益明，存肺即身光，存脾即體輕，存腎即氣長，神氣內守，病安所從。故曰：谷神不死。

道言：人稟五臟，資於五行，外爲形體，內爲性情。骨屬木，血屬水，肉屬土，牙齒屬金，氣煖屬火。肝仁，肺義，心禮，腎信，脾智。木性强直，火性猛烈，土性仁和，金性嚴毳，水性謙退。又稟氣之始，各有清濁剛柔。稟氣清者，聰明聖達。氣之柔者，則優和慈仁，質樸淳篤。氣之剛者，則高嚴壯烈。氣之濁者，則愚癡凶虐。各隨其所屬所稟，以定情性。性者，命也。愚者恣之以夭其命，知者深見迨伏其性，

正心正行，恭念至道，察見本心，施爲百行爲合道。以不有不合者，則以天科法律抑割本情，改易其性，迨伏其心，奉行師法，歸命師老，不敢懈替。如是則天神敬之，地祇護之，凶逆畏之，師老祐之，司命度之，著左契，南斗紀名生錄，北斗削除死籍，得爲真人。伏性載命，此之謂也。故曰：復命曰常，不知常，妄作凶。

道言：守道靜思，先當正坐，閉門耳目，還神光明於絳宮，絕去諸念，不得強有所視，思想髣佛，久久喘息稍微，從是以往，自然不復自覺喘息。不覺喘息，便不復自知有身也。至能忘身，則是得定，向道門者也。當爾之時，神在天上虛空之中，左顧右視，無所一見，以此爲證。故曰：塞其兌，閉其門，用其光，復歸其明。

道言：人身中有三一者，神、魂、魄也。中央之一，神也，中和之精也，其氣正。左方之一，魂也，純陽之精，其氣清。右方之一，魄也，純陰之精，其氣濁。中央之一，即我神也，道之子

也。左右各一，輔相我神，其氣清濁，則其行有善惡。左方之一，日日聞告我爲善，其功德日盛，我得成正道。右方之一，日日教告我惡事，牽我入惡中，我惡日深，淪沒邪城。爲道者若欲明此三一，覺悟善惡，分別邪正，唯當閉身靜意，熟讀諸經，還自思惟，則智慧自生，挫遣五慾，蕩滌六情，行修善積，則功德成就。則右方之一，邪魔羣鬼，悉皆懾伏，不能干我也。思念專正，立致感通。若不曉邪正，又無善功，強閉耳目，思神行道，此則衆邪便共干人，造作邪念。前念適滅，後念復起，更相因襲，無有解也。已如此亂惑，萬劫不定，故曰：載營抱一，滌除玄覽。

道言：人有精神魂魄，體與凡類殊異，尊與天地同道，貴與神明合德，明與日月通察，必能靜形定意，精誠齋戒，勤敬三寶，深識天官吏兵之位，復還光內觀形內之宮室，存念神景之所處，常以虛中求真，無中求有，則九天之上可得照，九地之下可得覩，玄精可

降，元始可稟。太上至尊而爲至誠顯，生道至重而爲至誠感。故求生者，腹中而起，一形之中，則知天地之體也，而包八十一域，含四海五嶽，雲興雨施，在於吹噓，湊澤潤液，在於呼吸，形在神往，忽若指掌。坐修於胸心之裏，然臻福八極之表，神和霧集，在於不移清淨，一時之間，消災致壽，長生在己也。故曰：不窺牖，見天道。不出戶，知天下。

太上洞玄靈寶法燭經

（王卡點校）

# 079 太上洞玄靈寶授度儀

經名：太上洞玄靈寶授度儀。  
南朝宋道士陸修靜編撰。言傳授古《靈寶經》之科儀。一卷。底本出處：《正統道藏》洞玄部威儀類。

## 太上洞玄靈寶授度儀表

臣修靜依棲至道，翹竚靈文，造次弗忘，幸會有數，顧使草茅之品，獲披龍鳳之章。妙重尊嚴，非所堪勝，誠欣誠懼，冰炭于心。自從叨竊以來一十七年，竭誠盡思，遵奉修研，翫習神文，耽味玄趣，心存目想，期以必通，秉操勵情，夙夜匪懈。考覽所受，粗得周遍，自覺神開意解，漸悟理歸，宛義妙致，本自仰絕，其羸跡近旨，謂可彷彿。伏尋靈寶大法，下世度人，玄科舊目，

三十六卷。符圖則自然空生，讚說皆上真注筆，仙聖之所由，歷劫之筌範。文則奇麗尊貴，事則真要密妙，辭則清虛玄雅，理則幽微濬遠。標明罪福，權便應適，戒律軌儀，導達羣方。靈音八振，聾盲開豁，法門四達，巨細獲所，洋洋大化，無量法橋。但正教始興，天書寶重，大有之蘊，不盡顯行。然即今見出元始舊經，並仙公所稟，臣據信者，合三十五卷，根末表裏，足相輔成；大乘之體，備用不少。但授度威儀，唯有二表；關奏啓請，無其典式。若聖人傳法，則天真列具，不假名引之煩。今下俗滓穢，必須神官感通達御。既闕成科，於愚夫罔厝。自靈寶導世以來，相傳授者，或總度三洞，同壇共盟，精粗糅雜，小大混行。時有單受洞玄，而施用上法，告召錯濫，不相主伍。或採搏下道黃赤之官，降就卑猥，引屈非所，顛倒亂妄，不得體式，乖違冥典，迷誤後徒。臣每晨宵歎惋，內疚泣血。既真師渺邈，不可希期鑽求，世學永無其文，事要急用，實宜充備。臣敢以囂

暝，竊按金黃二錄、明真玉訣、真一自然經訣，准則衆聖真人授度之軌，敷三部八景神官撰集登壇盟誓，爲立成儀注。既幽玄遠絕，非肉眼可測；神明事微，豈尸愚所體？執筆戰悚，形魂交喪，懼以謬越致罪，又慮造作招考，進退屏營，如蹈刃毒。繕治雖竟，不敢擅用，謹潔身清齋於三寶御前，誦讀一過。恩惟太上衆尊、玄中大法師，垂神照鑒，矜察所啓。若萬有一毫之補，合請施行，如其不允，輒當毀除。可否之宜，要以靈瑞爲證，願特賜告效，伏須感應。謹啓。臣修靜誠惶誠恐、稽首再禮以聞。

臣陸修靜謹進。

### 太上洞玄靈寶授度儀

《黃籙簡文靈仙品》云：奉受經法，當爲三師開度弟子一十九人，建功立德，諸天有名，乃得登壇告盟，佩受五老赤書真文玉篇，三部八景二十四真，天仙乘騎上真之官。功名不立，輕受大法，三官所執，生死苦對，考由明法曹。

明真科云：盟用金錢二萬四千，以質二十四炁生官。重真之信闕，則三部八景之神不度人命籍。無金錢，銅亦可准。都闕，考屬都神曹。

明真科云：用上金五兩，以盟五嶽，爲寶經之信。

《玉訣》云：上金九兩，上誓九天，闕則犯慢經之科。五嶽靈山不領人學籍，考屬陰官曹。

明真科云：用五方紋繒各四尺，以關五帝爲告誓之信；闕則五帝不受人名，爲五帝魔王所壞，使人志念不專，考屬水官泉曲曹。

明真科云：用金龍、金鈕各三枚，投山水土，爲學仙之信。不投此，三官拘人命籍，求乞不達。有違考屬九都曹。

《玉訣》云：裂南和丹繒五尺，絳紋繒也。爲巾於案上，請《靈寶五篇真文》及五符。

《玉訣》云：割碧林之帛五尺，青紋繒也。爲巾以覆真文符上。

《玉訣》云：令真文五符處丹青中間，以爲落髮歃血之盟也。青以代髮，丹代歃血之盟誓，真人不傷神損德，故以代之爾。

《玉訣》云：五種雜和之香，經乃不記多少，嘗用二斗五升可足。又應須五綵雜華一斗，准真人授度時以散十方用之。大席五領，七章案，五香爐奩，又本命繒隨年尺數。

右八件物，登壇事信誓用之。

《玉訣》云：春用甲寅、乙卯，夏用丁巳、丙午，四季用戊辰、戊戌、己未、己丑，秋用庚申、辛酉，冬用癸亥、壬子。建王之日登壇也。

《玉訣》云：當於靈嶽作高壇，四方欄纂，東西南北王上開五門，安五榜，榜文如左：

九炁青天安寶華林青靈始老君，蒼帝君，九炁青牙天君，太上真玉青腰玉女，東鄉諸靈官。青華元陽門。青書赤地，安東門上。

三炁丹天梵寶昌陽丹靈真老君，赤帝君，朱丹三炁天君，元炁丈人，朱宮太丹玉女，南鄉諸靈官。洞陽太光門。赤書黃地，安南方門上。

元洞太帝天玉寶元靈元老君，太帝真人，子丹黃庭戊己天蒼玉女，中黃大帝官君。元黃高晨門。黃書白地，安正門上。

七炁白天七寶金門皓靈皇老君，白帝君，明石七炁大夫，太上白素玉女，西鄉諸靈官。通陰金闕門。白書黑地，安西方門上。

五炁玄天洞陰朔單鬱絕五靈玄老君，黑帝君，玄滋五炁天君，太上靈君，夜光玉女，北鄉諸靈官。陰生廣靈門。黑書青地，安北方門上。

九天衆靈，五嶽名山真人，江河四

瀆三官九府諸靈官、地仙、玉女、五嶽飛仙神仙，諸仙官君。元黃高晨門。紫書黃地，安正門左。

右六榜安著五門上，東西南北四門，依位各一榜。正門上施戊己，九天二榜，著門之左右也。用香爐五枚，施置壇之內。五方以五色繒綵著五案下，又別用一案於壇中，請真文五符經文。又用一案，以奏表度事，合七案。金錢之物，列度事案前。

《黃籙簡文》云：受法當依明科，齋信詣師，對齋七日，黃繒章表，奏言諸天所受書文。露壇一宿，無有風炁，文不吹搖，骨名合法，告盟而傳；爲風所吹，使退齋三日，便如先法。三過被風，其人先無玄名善功，三界不舉，五帝不保，骨炁不合，不得輕傳。考由司正曹。

靈寶大盟宿露真文，拜表出官，啓奏次第如左：

於名山壇地置竟，師與弟子俱從地戶入，左迴，師入內壇王門，北向三捻香。先以弟子所受真文二籙著案上。

弟子往外壇，南面北向三拜，伏地稽首對章，師鳴天鼓三十六通。

次發爐如法，

次出官。

謹出臣身中五體真官功曹吏，出臣身中三洞飛仙，上三天執法開化陰陽功曹、度道消灾散禍解厄君吏，各十人出。上高真臣身治職君吏，某治建節監功大將軍，前部效功後部效殺驛庭令、驛庭丞，四部監功謁者，臣身中仙靈直使正一功曹、治病功曹、左右官使者，陰陽神決吏、科車赤符吏、剛風騎置驛馬上章吏等，各二人出。出者嚴裝顯服，冠帶垂纓，整其威儀。直使功曹戴通天之冠，衣皂紈單衣；正一功曹冠朱陽之幘，絳章單衣；使者冠九德之冠，五色壽命單衣，腰帶虎符，左佩流金火鈴，右佩豁落七元，齊執玉簡。直使功曹住立中央，治病功曹營衛臣身，左官使者持幢在前，右官使者建節在後，陽神決吏立左，陰神決吏立右，上部功曹遠望上天，中部功曹遠瞻八方，促炁功曹催促十方，都官使

者匝遶臣身。郎吏虎賁，察奸鈎騎都官僕射，天騶甲卒，天丁力士，收炁炁食精吏，收神食神吏，收鬼食鬼吏，收精符破廟吏，科車赤符吏，剛風騎置驛馬上章吏，飛龍騎吏，屯住臣等前後。左右功曹使者，嚴裝事竟，羅列鹵簿，關啓靈寶官屬，監齋仙王，典經侍郎，衛靈司馬，三洞諸君官將吏，天師所布下二十四治、三十六靖廬、七十二福地、三百六十名山崑崙等上官三萬六千餘神，日月星宿、璇璣玉衡、天地五帝、三界官君將吏，及道上二玄三元四始，四面方位風炁炁注炁甲子諸官君將吏，考召東九夷胡老君、南八蠻越老君、西六戎氏老君、北五狄羌老君、中央三秦僉老君、五嶽四瀆丘沼君，諸廟神所在高山卑谷山林孟長、十二溪女、根源本始土地之主，社稷將吏，一時嚴裝，與臣身中功曹使者、飛龍騎吏，上啓太上玄元太上大道君、太上老君、太上丈人、無上玄老、十方無極大道道德衆聖天尊、至真大帝、天帝、天師、女師、三師

君、夫人門下，行文書事十一書佐，按章從事，操臣謹授上學道士某甲等靈寶大法靈真文、八景內音二錄黃素表一通，在玉案上，請省。出官訖。

次讀表文，

次重約勅。

重勅臣身中五體真官、官一小吏、十二書佐，嚴裝顯服，冠帶垂纓，及時操臣拜露真文章表，上詣太上曹，隨事進對。誤字爲易，脫字爲益，若言辭倒錯，尋逐治正，必使上合，無令上官有所譴却，六天羣魔、下官故炁，斷截公文，分別關奏，以時上達，伏須告報。

次起北向，叩齒九通，祝曰：

高上元始，九天靈尊，上真玄遐，道幽瓊軒，三五運推，七宿改晨，虛皇控轡，五帝定仙，青宮總錄，符命靈山，是日元吉，萬真開陳，上學甲乙，宿命因緣，得遇神經，上皇寶篇，謹於玄嶽，上盟九天，下告五帝，十二河源，乞丐記領，奏上高晨，普告萬靈，列位皇壇，營衛威式，按如太真，須到明日，御合啓傳。

次復官。

臣身中功曹使者、錄上將軍吏兵、上章之官，效力事訖，還入臣身中，在左還左，在右還右，安隱九宮六府、金堂玉室、十二關機之中，纏身繞骨，經衛百脉。若有典主保護臣身，直使功曹差次檢押，無令錯互，須臣後召復出，奉行一如故事。鳴法鼓三通，咽炁三過。

次起再拜，復爐如法。

畢，師與弟子從地戶出。

明日登壇告大盟次第法

平旦言功竟，弟子若多，改壇如前。用六牒安著五門上，東西南北四門依位各一牒，王門上施戊己、九天二牒，著門之左右也。訣云：中央門在正門下

季上，如春在丑，衆真門在正門上孟上，如春在巳，他效之。如弟子少，即用齋壇，依常黃錄齋法也。更鋪設修飾，嚴淨布置。陞壇所須等物悉具備，鳴鐘，法師與弟子臨壇。三師五保，嚴裝法服，弟子皆玄冠黃褐，執簡齊肅，香花讚引，悉皆如法。先引弟子遶壇三匝，至東南角，向西倚，讚唱勿停。次引師復遶壇三匝，

至西北角倚。師去壇三十步，或七步，便叩齒三十二通，思紫雲覆冠。一壇或一山五帝神兵各十萬人，來迎兆身，了了分明，乃祝曰：

神真出遊，萬帝駭驚，玉虛玄衛，

天宿倒傾，五嶽司官，莫不輔靈，命召十方，驅策天兵，率天以下，咸到皇庭，令我登仙，洞得道精，審知不祥，通幽究冥，所向所陳，悉合玉清。

畢，乃徐行登壇，從西北天門入

戶，祝如法。昇都壇左迴，向西北九拜，朝九天主訖，叩齒九通，祝曰：

臣甲今傳弟子某甲九天寶經，至上玉諱，清齋宿奏，氣命合真，乞告下監真玉仙、典錄侍郎、衛靈司馬，下監盟文，及所啓所付，畢得上聞。〔遶〕壇左行，還向東南，再拜。又啓曰：

高上元始天王，今日上願八會，日

吉時清，謹於玄壇，或云嶽。盟度玄經，乞丐告下五帝靈山，監臣盟誓，早賜神仙，得乘飛輶，上昇帝晨。畢，法師倚，次命弟子從東南地戶入都壇上，向西北九拜。竟，師左迴立地戶上，弟子左

迴立天門上，迴向東南，再拜，還北面南向伏。師迴北向立，叩齒三十六通，誦《金真太空章》一篇，以制萬魔。其辭曰：

天魔乘空發，萬精駭神庭。託化謠歌章，隨變入無名。囂氣何紛紛，穢道當塗生。雲中舍朱宮，北帝踴神兵。鼓洋自知道，玄運來相征。上景御飛轡，迅駕檢雲營。促校北帝錄，收執羣魔名。豁落張天羅，放威擲流鈴。金真輔空洞，玉光煥八冥。金玄守上宮，神虎戮天精。剪滅萬妖炁，億億悉齊平。上承九天信，嘯命靡不傾。招真究三洞，慧誦朗自清。八道望玄文，七轉緯天經。混合帝一真，拔度七祖程。消滅五苦根，反魂更受榮。金光曜寂室，神燭自然生。香華散玉宇，煙氣徹玉京。帝遣徘徊輦，三元降綠駟。迅駕騰九玄，朝我玉皇庭。

畢，便左行，弟子隨師從天門入內壇，一云天門入。左迴。三上五方香，從東始，周竟還西，面向東。法師閉目，內思存見五臟、五嶽、五星、五帝，備衛

身中，映蓋一體，體作金色，從肺後出，項有圓光如日像，使照明十方，身中了然，盡見內外。畢。

次誦衛靈神祝曰：

九炁青天，明星大神，煥照東鄉，洞映九門，轉燭陽光，掃穢除氛，開明童子，備衛我軒，收魔束祿，上對帝君，奉承正道，赤書玉文，九天符命，攝龍驛傳，普天安鎮，我得飛仙。

南方丹天，三炁流光，熒星轉燭，洞照太陽，上有赤精，開明靈童，總禦火兵，備守三宮，斬邪束祿，剪截魔王，北帝所承，風火八衝，流鈴交換，敢有不從，正道流行，我享上功，保天長存，億劫無終。

七炁之天，太白流精，光曜金門，洞朗太冥，中有素皇，號曰帝靈，保神安鎮，衛我身形，斷截邪源，王道正明，宮宅整肅，三景齊并，道合自然，飛昇紫庭，靈寶符命，普惠萬生，功加一切，天地咸寧。

北方玄天，五炁徘徊，辰星煥爛，光曜太微，黑靈尊神，飛玄羽衣，備衛

五門，檢精捕非，敢有干試，豁落斬摧，玉符所告，神真八威，邪門閉塞，正道明開，映照我身，三光同輝，策空駕浮，舉形仙飛。

黃中理炁，總統玄真，鎮星吐輝，流煥九天，開明童子，一十二人，元氣陽精，焰上朱煙，同照一室，及得我身，百邪摧落，殺鬼萬千，中山神呪，普天使然，五靈安鎮，身飛上仙。

次叩齒二十四通。

次發爐祝曰：

無上三天玄元始三炁太上老君，召出臣甲身中三五功曹、左右官使者、左右捧香驛龍騎吏、侍香玉童、散花玉女、五帝直符直日香官，各三十六人，出關啓此間土地里域真官正神。臣今正爾燒香傳授，願得太上十方正真生炁降注臣身中，令臣所啓速達，徑御至真無極道前。

次師引弟子左行，執謁版，西面向東，唱東方天尊，方各三拜。亦可一拜，亦可不須版，直依方唱。次南、次西、次北、次東北、交東南、

次西南、次西北、次上方、次下方，具如一文。

臣等至心歸命東方無極太上靈寶天尊、蒼帝九炁天君、東鄉諸靈官。某帝先生姓氏名再禮謁。十方並同。

至心歸命南方無極太上靈寶天尊、炎帝三炁天君、南鄉諸靈官。

至心歸命西方無極太上靈寶天尊、白帝七炁天君、西鄉諸靈官。

至心歸命北方無極太上靈寶天尊、黑帝五炁天君、北鄉諸靈官。

至心歸命東北無極太上靈寶天尊、梵炁始青天君、東北鄉諸靈官。

至心歸命東南無極太上靈寶天尊、梵炁始丹天君、東南鄉諸靈官。

至心歸命西南無極太上靈寶天尊、梵炁始素天君、西南鄉諸靈官。

至心歸命西北無極太上靈寶天尊、梵炁始玄天君、西北鄉諸靈官。

至心歸命天門上方無極太上靈寶天尊、玄都玉京金闕七寶玄臺紫微上宮三十二天上帝、飛梵大羅天君、真人玉女、上方諸靈官。

至心歸命地户下方無極太上靈寶天尊、九土高皇、四司五帝、陰陽水府十二仙官、洞淵洞虛洞元三十六地元皇天君、五嶽四瀆地上諸靈官。

臣謹按太真盟訣齋訣，登壇辦具，以昨某時表靈尊文，期誠瓊軒，衆靈輔位，致使雨寢嘉辰，風息清暑，延茲十天，三炁流光，威式雲布，無上開陳。某甲洪幸，謬興難剋之因，叨冀難成之果，謹依法啓傳符，自始迄終，得離風雨，使佩受後，願無躓礙。各叩頭搏頰。

次法師就位，東向，弟子還東面，西向伏地。法師長跪，又叩齒二十四通。出官。

謹出臣身中五體真官功曹吏，出臣身中靈寶洞玄三部八景洞天八府飛天上仙官，各二十四人出。

三部八景洞天飛行三五直靈神仙正一昇玄功曹，各二十四人出。

三部八景洞天飛行三五直靈神仙直使生炁功曹，各二十四人出。

三部八景洞天飛行三五直靈神仙靈寶青帝功曹，各二十四人出。

三部八景洞天飛行三五直靈神仙靈寶赤帝功曹，各二十四人出。

三部八景洞天飛行三五直靈神仙靈寶黃帝功曹，各二十四人出。

三部八景洞天飛行三五直靈神仙靈寶白帝功曹，各二十四人出。

三部八景洞天飛行三五直靈神仙靈寶黑帝功曹，各二十四人出。

三部八景洞天飛行自然靈寶神仙通真度命使者，各二十四人出。

三部八景洞天飛行自然靈寶神仙傳事飛天使者，各二十四人出。

三部八景洞天飛行自然靈寶神仙香官生炁使者，各二十四人出。

三部八景洞天飛行自然靈寶神仙洞明青帝使者，各二十四人出。

三部八景洞天飛行自然靈寶神仙洞明赤帝使者，各二十四人出。

三部八景洞天飛行自然靈寶神仙洞明黃帝使者，各二十四人出。

三部八景洞天飛行自然靈寶神仙洞明白帝使者，各二十四人出。

三部八景洞天飛行自然靈寶神仙



洞明黑帝使者，各二十四人出。

三部八景洞天飛行自然靈寶神仙  
監功謁者，各二十四人出。

三部八景洞天飛行自然靈寶神仙  
校事謁者，各二十四人出。

三部八景洞天飛行自然靈寶神仙  
侍香玉童，各二十四人出。

三部八景洞天飛行自然靈寶神仙  
散花玉女，各二十四人出。

三部八景三十二天洞天八景飛行  
靈寶五帝直符，各二十四出。

出者各依儀嚴裝、天衣仙服，冠帶  
垂纓，齊光顯曜，整其威儀。建九色之  
節，執簡持幢，把召神之信，命魔靈幡，  
各按位署列住十方，散花燒香，營侍臣  
身。

太玄三部洞天八景自然靈寶飛仙  
度命天仙兵馬各九億萬騎出。

太玄三部洞天八景自然靈寶神仙  
度命地仙兵馬各九億萬騎出。

太玄三部洞天八景自然靈寶神  
仙度命飛仙兵馬各九億萬騎出。

太玄三部洞天八景自然靈寶神仙

度命真人兵馬各九億萬騎出。

太玄三部洞天八景自然靈寶神仙  
度命神人兵馬各九億萬騎出。

太玄三部洞天八景自然靈寶神仙  
度命日月兵馬各九億萬騎出。

太玄三部洞天八景自然靈寶神仙  
度命星宿兵馬各九億萬騎出。

太玄三部洞天八景自然靈寶神仙  
度命九宮兵馬各九億萬騎出。

太玄三部洞天八景自然靈寶神仙  
度命五帝兵馬各九億萬騎出。

太上三部洞天八景自然靈寶神仙  
度命五嶽兵馬各九億萬騎出。

太玄三部洞天八景自然靈寶神仙  
度命三河四海兵馬各九億萬騎出。

太玄三部洞天八景自然靈寶神仙  
度命諸天督仙兵馬各九億萬騎出。

太玄三部洞天八景自然靈寶神仙  
滅度生尸兵馬各九億萬騎出。

太玄三部洞天八景自然靈寶神仙  
開度更生兵馬各九億萬騎出。

太玄三部洞天八景自然靈寶神仙  
金龍騎各九億萬衆出。

太玄三部洞天八景自然靈寶神仙

飛龍騎各九億萬衆出。  
太玄三部洞天八景自然靈寶神仙

遊龍騎各九億萬衆出。  
太玄三部洞天八景自然靈寶神仙

神龍騎各九億萬衆出。  
太玄三部洞天八景自然靈寶神仙

驛龍騎各九億萬衆出。  
太玄三部洞天八景自然靈寶神仙

雲龍騎各九億萬衆出。  
太玄三部洞天八景自然靈寶神仙

龍虎騎各九億萬衆出。  
太玄三部洞天八景自然靈寶神仙

龍騰騎各九億萬衆出。  
太玄三部洞天八景自然靈寶神仙

度命九炁天官青牙玉女各二十四人  
出。

太玄三部洞天八景自然靈寶神仙  
度命三炁天官朱丹玉女各二十四人  
出。

太玄三部洞天八景自然靈寶神仙  
度命七炁天官明石玉女各二十四人  
出。

出。

太玄三部洞天八景自然靈寶神仙  
度命五炁天官玄滋玉女各二十四人  
出。

太玄三部洞天八景自然靈寶神仙  
度命中央黃上天官靈劍玉女各二十四  
人出。

太玄三部洞天八景自然靈寶神仙  
東嶽青帝主圖飛天吏各二十四人出。

太玄三部洞天八景自然靈寶神仙  
南嶽赤帝主圖飛天吏各二十四人出。

太玄三部洞天八景自然靈寶神仙  
中嶽黃帝主圖飛天吏各二十四人出。

太玄三部洞天八景自然靈寶神仙  
西嶽白帝主圖飛天吏各二十四人出。

太玄三部洞天八景自然靈寶神仙  
北嶽黑帝主圖飛天吏各二十四人出。

真仙神官，兵馬乘騎，一合屯住臣  
前後左右，羅列行伍。自然五色素雲  
映蓋身形，流精散炁，布滿十方，周天  
覆地，營衛臣身。一切嚴裝事訖，正一  
昇玄功曹、通真度命傳事飛天使者、五  
帝直符直事，擎玄空之案，對在臣前，  
銜臣口中辭語，分別關啓上下中央、四

面八方天官地神、五嶽四瀆九江八極  
名山大澤五帝真官、四司監察、九部考  
召、玄元始炁甲子諸官君、無窮無極無  
高無下無深無淺無幽無顯無軼數衆真  
官注炁乾皇、九宮八卦六甲真人、根元  
本始土地之主、社稷將吏，一時嚴裝，  
與臣身功曹使者、飛龍驛龍騎、直符直  
事，上啓無上元始太上大道、五老上帝  
至真大聖尊神玉陛下，十方無極大道  
道德衆聖天尊、太帝、天帝、玄中大法  
師諸官君。臣以有幸，宿世因緣，九天  
之劫，延及今身，遭遇明運，大法流行，  
得以穢質，叅染靈文上清金書三洞寶  
經。自叨竊以來，尊仰上法，心希神  
仙，而精誠淺薄，未能感靈，常恐罪至，  
淪沒九泉。天慈廣大，首領得全，誠宜  
守短，不敢有言。今三洞御運，靈寶下  
教，先度並昇，仙官空缺，應須中賢，以  
充諸天。臣受法之日，應更度人，先有  
宿名金格玉錄，合真之人，周歷八極，  
從虛無中來。今有宿命某嶽真人某  
甲，年若干歲，體行真素，骨命合真，已  
受上法九天靈文。所參淺狹，未見道

源，信向苦至，祈請積年。今齋金縉法  
信，求受臣所佩元始五老赤書玉篇真  
文、金書紫字玉文丹章、二十四真三部  
八景圖神仙乘騎、諸天内音自然玉威  
策錄八字等文，神杖衆事，盟命寶經，  
投誠啓訴，九祖爲證，誓爲身寶，約無  
愆違。臣受法禁重，不敢輕宣，備加核  
實，辭誠愈堅，察其丹心，謂可成就。  
既法有開度，不敢閉絕。輒按《黃籙簡  
文靈仙科品》，與某甲對齋三日，宿露  
真文，天清地靜，四氣恬然，不風不揚，  
應法合真。今謹依先師舊典，明真大  
法、玉訣之要，付授某甲身，共登皇壇。  
金縉鎮靈，謹先拜黃縉赤表一通，上詣  
九天，表露在玉案上，分別請省。

次讀表文，

又叩齒三通，送表。

謹遣臣身中五體仙官乘騎、重勅  
功曹使者、奏事直符傳言書佐，嚴裝顯  
服，冠帶垂纓。及時操臣度道黃縉赤  
表一通，上詣元始五老上帝、至真大聖  
尊神御前。若所言倒錯，文字謬誤，不  
依舊法者，願爲隨事正定，必使上合，

無令上官典者有所譴却。若有邪魔鬼賊干截公文者，收付所在禁獄，依事治罪。令臣所上御達，所願必至，恩惟原理，伏須告報。

次弟子左轉，南向、師左迴，北向、長跪。鳴鼓三十六通。

太上靈寶無上洞玄法師某甲先生，臣嶽甲稽首再禮，謹上請太極典經仙郎、侍經玉郎、監度司馬、四司五帝、玉童玉女，手執紫毛之節、十絕靈幡，從萬神千真，前吹鳳鳴，後奏天鈞，燒香散花，一時浮空而降。天儀羅列，監度盟言。臣謹因衆真仙官、飛龍驛吏，上啓太上無極大道、太上大道君、元始五老上帝、靈寶元尊、十方自然至真、四方大聖、金闕上帝、太極真人、太上玄一三真人、清玄衆尊瓊闕下，臣以下愚，行尸臭肉，宿福願會，遭遇真經，得奉受大法三洞寶文。道高理妙，非所任當，夙夜懼惕，形魂無寧。臣某誠惶誠恐，頓首頓首，死罪死罪。臣謬忝非分，冒敢獻言，伏尋尊經祕重，淵蹟洞源，誠非小臣所可揄揚。且明科典制，

五八聽傳，臣佩法始淺，未宜宣露。但大會垂周，世運短促，禍福交謝，道須忠賢廣加開度，令入法門。雖今人情浮僞，虛實難明，然至心翹翹，微在可識，勤求款到，不得閉絕。臣向拜表上聞，謹有某帝真人某甲，體性慈仁，質素竟白，抗心高上，不務榮華，耽虛味真，願慕神仙，參履上法大乘之教，勸化開度，立德建功，恭勤丹苦，孜孜不倦，鑽勵積載，志極道源。今齎金繒寶信，受真之具，誓訴諸臣，九祖爲證，求佩靈寶元始五老赤書真文寶符、三部八景二十四真神官吏兵、諸天内音玉字、八威策文神杖衆事，如臣所見。某甲骨性志行，宜合成就，謹依明真舊典，建壇立盟，告誓九天，按科付授。約爲身寶，不得負違，輕泄漏慢，毀本伐宗，生死父母，及得某身，受考風刀，萬劫無原。恩惟太上衆尊、十方聖真、四司五帝，照鑒盟言，謹以啓聞，須御奉行。臣某誠惶誠恐、稽首再拜。

次法師啓奉畢，於是起，弟子從師後，三上五方香，從東始，每至一

方，輒長跪上香。周竟，便巡行三匝，散花十方。于時當誦詠五真人頌誦一篇。弟子再禮唱善。

太極真人頌曰：

太上大道君，出是靈寶經。高妙難爲喻，猶彼玄中玄。自然無爲道，學之得高仙。大乎洞虛經，安坐朝諸天。上寶紫微臺，下藏諸名山。煥爛龍鳳文，戢耀在無間。妙哉太上道，無爲常自然。王侯及凡庶，所貴唯忠賢。宿命有福慶，卓拔在昔緣。法師轉相授，寶信劫數年。廣念度一切，大福報爾身。供養必得道，奉行成至真。大道無彼我，傳當得其人。

太上玄一第一真人頌曰：

衆妙出洞真，煥爛耀太清。奉者號仙人，體無永長生。逍遙戲玄虛，宮殿羅無形。稽粲七寶林，晃朗日月精。龍麟交橫馳，鳳凰翔悲鳴。太上治紫臺，衆真誦洞經。撲香稽首禮，旋行遶宮城。三周歸高座，道王爲應聲。人主宏至道，天下普安寧。

太上玄一第二真人頌曰：

虛無常自然，強名字大道。緬邈無邊際，衆妙歸靈寶。閉眼存至真，精思降十老。昇仙永無爲，靈顏常妙好。渴飲玉池醴，飢食金光草。靜慧度八難，濟世諸苦惱。

太上玄一第三真人頌曰：

妙哉靈寶經，太上自然文。奉者致得仙，號曰真天尊。受命宣道教，真爲超俗才。事畢昇神仙，宮殿治玄臺。時降崑崙山，逍遙憩蓬萊。

太上正一真人三天大法天師頌曰：

靈寶及大洞，至真道經王。如有五千文，高妙無等雙。奉行立飛仙，玄居治虛空。侍衛太上臺，逍遙紫微宮。萬劫猶電頃，長存永無窮。道眼已備足，豁落自冥通。幽昧無不知，安坐觀十方。

誦畢，法師弟子各還復位，南北相對，披真文於案上。師誦真文序畢，弟子再禮，次依玉訣正音，字字解說，口授讀度。弟子承受訣言，東方

安寶華林青靈始老九炁青天赤書真文。

#### 東方赤書玉篇

東方九炁，始皇青天，碧霞鬱壘，中有老人，總校圖錄，攝炁舉仙，歲星輔肝，角亢鎮真，氏房心尾，四景迴旋，箕主七辰，玉斗明輪，承炁捕非，掃除災羣，東山神呪，攝召九天，赤書符命，制會艷山，束魔送鬼，所誅無蠲，悉詣木宮，敢有稽延，下制東河，溟海水神，大劫洪災，蛟龍負身，水府開道，通徑百千，青帝赤文，風火無間。

#### 南方赤書玉篇

南方丹天，赤帝玉堂，中有大神，號曰赤皇，上炎流烟，三炁勃光，神仙受命，應運太陽，熒惑輔心，井鬼守房，柳星張翼，抗御四鄉，軫總七宿，迴轉天常，召運促會，正道驛行，赤文命靈，北攝艷山，束送魔宗，斬滅邪原，符教所誅，明列罪源，南山神呪，威伏萬方，羣祆滅爽，萬試摧亡，南河水帝，太伯龍王，神呪流行，普掃不祥，洪水飛災，止蛟召龍，開除水徑，千道萬通，敢有

干試，攝送火宮，赤書所告，莫有不從。

#### 中央赤書玉篇

#### 中央總靈，黃上天元，始生五老，

中黃高尊，攝炁監真，總領群仙，典錄玄圖，宿簡玉文，催運上炁，普告萬神，鎮星輔脾，迴度北元，魁魁主非，截邪斬奸，魑魍魍魎，掃穢除氛，魍正玄斗，明度天關，九天符命，金馬驛傳，勅攝北帝，遏塞鬼門，剪除不祥，莫有當前，中山神呪，召龍上雲，制會黃河，九水河源，不得殆縱，善惡悉分，千祆萬奸，上對帝君，莫有干試，太陽激憤，赤書玉字，宣告普聞。

#### 西方赤書玉篇

#### 西方素天，白帝七門，金靈皓映，

太華流氛，白石峨峨，七炁烟熅，上有始生，皇老大神，總領肺炁，主校九天，檢定圖錄，制召上仙，太白檢肺，奎婁守魂，胃昂畢觜，主制七關，參總斗魁，受符北元，赤書玉字，九天正文，攝召萬炁，普歸帝君，西山神呪，八威七傳，符水上龍，召山送雲，在所校錄，同到帝門，輔衛上真，斬滅邪源，若有不祥，

截以金關，赤書符命，風火驛傳。

### 北方黑帝赤書玉篇

北方玄天，五炁徘徊，中有黑帝，雙皇太微，總領符命，仙鍊八威，青裙羽襪，龍文鳳衣，上帝所舉，制到玉階，北辰輔腎，斗牛衛扉，女虛危室，豁落四開，辟總七星，執凶糾非，却灾掃穢，明道洞輝，北山神呪，激陽起雷，流鈴煥落，獲天振威，北酆所部，萬祿滅摧，九河傾訖，鳥母群飛，蛟龍通道，水陌洞開，赤文玉書，驛龍風馳。

### 五魔王諱

九炁天中空洞青靈魔王，姓巴元，諱醜伯。三炁天中空洞赤靈魔王，姓負天，諱擔石。中黃高皇天中空洞黃靈魔王，姓橫天，諱擔力。七炁天中空洞白靈魔王，姓反山，諱六目。五炁天中空洞黑靈魔王，姓監醜，諱朗馥。

### 度上部八景

清微天主上部赤字玉訣

青書玉字，三十二字。

上天虛無，玄洞九五，太上阿房，統靈威戶，玉衡攝氣，腦華玄覩，統御上部，

通神達古。

### 度中部八景

大赤天主中部赤字玉訣

朱書玉字，三十二字。

赤明開真，三天氣和，洞丹陽光，五藏不枯，丹天所寶，朱宮扶蘇，納鍊流泉，朱元無徂。

### 度下部八景

禹餘天主下部赤字玉訣

黃書玉字，三十二字。

黃中理氣，元生自尊，胃管幽通，六府俱存，白元公子，桃康德淳，養育朱丹，洞神往還。

東方青帝八會內音自然玉字九炁

### 總諸天文

竄婁阿會，無想觀音，須延明首，法攬菩曇，稼那阿奔，忽訶流吟，華都曲麗，鮮菩育臻，答落大梵，散煙慶雲，飛灑玉都，明魔上門，無行上首，迴蹠流玄，阿陀龍羅，四象吁員。

訣：東方內音畢，弟子迴心，東向

伏，冥目。師叩齒九通，祝曰：

赤明開圖，八炁迴真，總統玄門，青帝

大神，流化九外，纏綿我身，靈音八書，六十四篇，洞明天地，與我合仙，運致龍駕，上昇帝軒。

畢，弟子仰頭，九咽炁，次讀細字，唱度之，橫讀之也。

南方赤帝八會內音自然玉字三炁

### 總諸天文

南爛洞浮，玉眸誦誦，梵形落空，九靈推前，澤洛菩臺，綠羅大千，眇莽九醜，韶謠緣邇，雲上九都，飛生自騫，那育郁馥，摩羅法輪，靈持無鏡，攬資運容，馥朗廓奔，神纓自宮。

訣：南方內音畢，弟子迴心，南向

伏，冥目。師叩齒三通，祝曰：

三炁徘徊，靈鳳來飛，玉音八字，煥爛紫微，日吉大慶，我道洞開，朱丹哺飼，仰吸靈輝，生生水火，絳帔羽衣，登空玄步，足踐鳳梯，周旋八天，七祖相隨。畢，弟子仰頭三咽炁，次度細字。

西方白帝八會內音自然玉字七炁

### 總諸天文

刀利禪猷，婆泥咎通，宛敷滌色，大眇之堂，流羅梵萌，景蔚肅嶠，易邈無寂，

宛首少都，阿濫郁竺，華莫筵由，九開自辯，阿那品首，無量扶蓋，浮羅合神，玉誕長桑，栢空度仙。

訣：西方內音畢，弟子迴心，西向伏，冥目。師叩齒七通，祝曰：

七炁金靈，八天尊神，白虎策輦，師子捧轅，七炁纏綿，鍊我成仙，身發金光，肺照素雲，內外變化，昇入洞門，七祖出夜，九幽放魂，三徒五苦，長斬惡根，同懽福舍，受慶自然，億劫開度，隨運長存。

畢，弟子仰頭，七咽炁，次度細字。

北方黑帝八會內音自然玉字五炁

### 總諸天文

獲無自育，九日道乾，坤母東覆，形攝上玄，陁羅育邈，眇炁合雲，飛天大醜，總監上天，沙陁劫量，龍漢瑛鮮，碧落浮黎，空歌保珍，惡弈無品，洞妙自真，元梵恢漠，幽寂度人。

訣：北方內音畢，弟子迴心，北向伏，冥目。師叩齒五通，祝曰：

玄天徘徊，流景上清，大有啓運，八字高明，飛玄澄虛，洞音自生，五炁纏綿，

灌我身形，冠帶北單，受鍊洞靈，腎府化出，內外光精，飛行三界，邀宴紫庭，七祖同慶，懽樂劫齡，七寶林中，反胎更形，長夜滅死，南宮記名，黃籙白簡，削死上生。

畢，弟子仰頭，五咽炁，次度細字，次讀太歲以下盟文。

### 次度策文

封八威策法，先讀弟子名，次讀師名。

上版符訣曰：

天靈步兵，太一昇天，在地關白，生天命威，命主尸骨，星地命出，月天地度。

又訣曰：

焰明靈威仰，洞浮極炎赤標弩，通班元成含樞紐，上金昌開曜魄寶，黑節靈會隱侯局。

下版符訣曰：

太上太一版，真經黃帝書。

又訣曰：

慧靈開洪灾度人。

次思前從飛龍，後導天鈞，鳳嘯鸞鳴，十二華光，建三七色節命靈之旛，給五帝玉童玉女各十二人。五

帝侍衛，三界司迎，弟子受策，長跪師前。勅衆符曰：

東流之水，徘徊五城，魄入魂出，澡鍊身形，某甲奉受，靈寶衆符，永得長生，急急如太上律令。

次封策兩頭祝曰：

元始太真，五靈高尊，太華皓映，洞朗八門，五老告命，無幽不聞，上御九天，中制艷山，下鎮河海，十二水源，八威神呪，靈策玉文，召龍負水，收炁聚雲，束魔送鬼，掃蕩祿群，萬精摧落，所誅無蠲，日月五星，北斗七元，諸天諸地，諸水諸山，玉真所部，溟泠大神，仙王遊宴，五帝杖旛，天丁前驅，金虎後奔，獲天猛獸，羅備四門，所呼立到，所召立前，赤書煥落，風火無間，有所攝驗，金龍驛傳。

祝畢，叩齒九通，仰天三嘯，引炁三咽止。用元始五老印封策畢。次封杖法，叩齒三十六通，冥目思五帝吏，各一人，衣隨方色，有五色之光，流煥杖上。五帝玉女各一人，合共衛杖左右。畢，先以杖橫捧於師前，

頭向左，此師行之。

次師執青帝符，命弟子看。訣曰：青帝姓區，名更生。竟授與弟子，弟子得符，東向叩齒九通，思青炁從口中入注肝中，生九重青華，寶光徹映項後。畢，還授符與師，師納上第一孔中。竟，師祝曰：

無上青精，九炁太靈，神光遐散，流映東青，華景鬱勃，灌子身形，官府安鎮，寶魂自生，洞達八朗，飛昇玉庭。

畢，弟子引炁九咽止。次師執赤帝符，命弟子看，訣曰：赤帝姓祝，名昌中。竟，授與弟子。弟子得符，南向叩齒三通，思赤炁從口中入注心中，生三重丹華，寶光徹映胸中。畢，還授符與師，師納上第二孔前。竟，師祝曰：

丹華流瑛，寶芝生光，神精徹幽，散靈八方，直符攝炁，嘯命朱童，三精煥敷，注子絳宮，赤神安鎮，五香溢充，洞映形外，表裏發光，身生水火，獨步飛行。

畢，弟子引炁三咽止。次師執黃帝符，命弟子看，訣曰：黃帝姓司，名

精。竟，授與弟子，弟子得符，向王上叩齒十二通，思黃炁從口中入注脾中，生十二重黃華，寶光洞映一身。畢，還授符與師。師納上第三孔中。竟，師祝曰：

總元高靈，迴神四鄉，黃上散華，五帝交芳，流精散漫，十二重光，混合子形，萬神相迎，安備黃脾，養炁中房，保齡度劫，永鎮無窮。

畢，弟子引炁十二咽止。次師執白帝符，命弟子看訣曰：白帝姓辱，名曲正。竟，授與弟子。弟子得符，西向叩齒七通，思白炁從口中入注肺中，生七重素華，寶光洞映丹田。畢，還授符與師，師納上第四孔中。竟，師祝曰：

金靈七炁，素華流紛，金精童子，道建元巾，帶符攝炁，萬神會門，寶光弈弈，照子會根，安鎮肺華，萬劫長存。

畢，弟子引炁七咽止。次師執黑帝符，命弟子看，訣曰：黑帝姓玄，名尹豐。竟，授與弟子。弟子得符，北向叩齒五通，思黑炁從口中入注腎

中，生五重玄華，寶光洞映背外。畢，還授符與師。師納上第五孔中。竟，師祝曰：

北上大玄，五炁徘徊，寶華五重，流光煥輝，靈景鬱秀，洞映太微，仰注子身，腎府鮮開，安鎮靈宅，萬神總歸，身生羽翼，舉形自飛。

畢，弟子引炁五咽止。次納符竟，以朱蠟封杖兩頭空處，上用元始之章印之，下以五老之章印之。畢，弟子叩齒三十六通，思五帝直符吏各一人，衣隨方有五色之光，流煥杖上；五帝玉女各一人，合共衛杖左右。弟子依前橫捧杖。師祝之曰：

太陽之山，元始上精，開天張地，甘竹通靈，直符守吏，部御神兵，五色流煥，朱火金鈴，輔翼上真，出幽入冥，招天天恭，攝地地迎，指鬼鬼死，祛魔束形，靈符神杖，威制百精，興攝群方，與我俱生，萬劫之後，以代我形，景爲五解，神昇上清，承符告命，靡不敬聽。

畢，引五方炁二十五咽止。

次師告丹水文

某嶽先生大洞法師臣某甲，告弟子某甲等：元始天尊於眇莽之中，敷演真文，結成妙經。劫劫濟度，無有窮已，如塵沙巨億無絕。靈文隱奧，祕于金閣，衆真宗奉，諸天所仰。逮于赤烏，降授仙公，靈寶妙經，於是出世度人。吾謬稟微緣，運值靈文，先師顯飾，奉傳至法，誓爲身寶，豈敢宣泄。劫運推移，其法應行，有合真之人，依科聽付。今誓九天，啓付某甲，受經之後，當依明科，肅己勵軀，精誠勤苦，斷絕世緣，唯志大乘，供養朝禮，講習妙蹟，參問有道，導引精研，修齋服御，希求飛騰，尊道敬師，推崇根本，不得嘖嘖，有面無心，攻伐本根，自造無端。輕慢經寶，皮好胎誕，淫欲貪著，嫉妒恚恨，胸心諂楚，懷毒在內，一旦犯違，身充三泉。當以某甲三曾五祖，同淪地獄，萬劫無原。今建立黃壇，關盟五帝，付授寶文十部妙經，諸天五嶽，咸對盟文，檢行慎法，抱於中心，飛仙可期，終成道真，善自肅勵，如四極明科律文。

次弟子自盟文

某府縣鄉里某嶽先生洞玄弟子某甲，稽首再拜，上啓元始天尊、太上道君、十方尊神、四方已得道至真。太上靈寶三十六部尊經寶符，高玄大法師某，因緣宿福，九天之劫，輪轉不滅，慶祚所逮，輪化所籍，得生法門。先緣發願，仰羨至闕，法闕大乘，心神欣踊，自恐腐骸。今遭天運推移，皇道數行，蒙法師某甲所見拔擢，開導愚蒙，賜臣靈文，奉對聖君。肉尸惶懼，洗除濁穢，得侍靈壇，俯荷拔擢，榮過分表。某當勵己肅體，供養尊禮，棄情退累，志托幽阜，長乖世塗，唯志丘巖，晝夜朝拜，思竭愚管，庶憑聖文，拔度朽骸，至心慙慙，無有二念，不敢違盟負誓，欺師慢道，有面無心，不保劫數。某自收罪考，吞聲敢言，引某七世父母、九玄祖考，以爲證誓，見世生人、九族種親以爲盟約。某自樂仙道，時不敢拘迫，一日有違，生死同淪地獄五道，不敢蒙原。上告元始，下誓五帝，身對師寶，自立盟誓。丹情至心，唯蒙矜納。臣某誠惶誠恐，稽首再拜。

次師起立北向，左手執真文二錄。弟子長跪，以右手持信物，師叩齒三十六通，存五藏之色，令備具合成寶蓋之雲羅，覆經及師。從而祝曰：天書簡不煩，道德自備足，修之必神仙，當復何所欲，文耀太無間，煥然而朗郁，傳授悉依法，泄慢墮地獄。次弟子跪，九拜，三起三伏，奉受真文，帶策執杖，禮十方一拜。從北方始，東迴而周訖。想見太上真形如天尊象矣。畢，次師起巡行，詠步虛。其辭曰：稽首禮太上，燒香歸虛無。流明隨我迴，法輪亦三周。玄願四大興，靈慶及王侯。七祖生天堂，煌煌曜景敷。嘯歌觀大漠，天樂適我娛。齊馨無上德，下仙不與儔。妙想明玄覺，誦誦乘虛遊。旋行躡雲綱，乘虛步玄紀。吟咏帝一尊，百關自調理。俯命八海童，仰携高仙子。諸天散香華，翛然靈風起。宿願定命根，故致高標擬。觀樂太上前，萬劫猶未始。



嵯峨玄都山，十方宗皇一。岌岌天寶臺，光明焰流日。焯焯玉林華，朶朶曜珠寶。常念餐元精，鍊液固形質。金光散紫微，窈窕大乘逸。

俯仰存太上，華景秀丹田。左顧提鬱儀，右盼携結璘。六度冠梵行，道德隨日新。宿命積福應，聞經若至親。天挺超世才，樂誦希微篇。冲虛太和炁，吐納流霞津。

胎息靜百關，寥寥究三便。泥丸洞明景，遂成金華仙。魔王敬受事，故能朝諸天。皆從齋戒起，累功結宿緣。飛行凌太虛，提携高上人。

控轡適十方，旋憩玄景阿。仰觀劫刃臺，俯盼紫雲羅。逍遙太上京，相與坐蓮華。積學爲真人，恬然榮衛和。永享無期壽，萬椿奚足多。

大道師玄寂，昇仙友無英。公子度靈符，太一奉洞章。舍利曜金姿，龍駕欵來迎。天尊盼雲輿，飄飄乘虛翔。香花若飛雪，紛靄茂玄梁。

頭腦禮金闕，携手邀玉京。騫樹圓景園，煥爛七寶林。天獸三百名，師

子巨萬尋。飛龍躑躅吟，神鳳應節鳴。靈風扇奇華，清香散人衿。自無高仙才，焉能耽此心。

嚴我九龍駕，乘虛以逍遙。八天如指堂，六合何足遼。衆仙誦洞玄，太上唱清謠。香花隨風散，玉音成紫霄。五苦一時迸，八難順經寥。妙哉靈寶囿，興此大法橋。天真帝一宮，藹藹冠耀靈。流煥法輪綱，旋空入無形。虛皇拊雲璈，衆真誦洞經。高仙凜手讚，彌劫保利貞。

至真無所待，時或轡飛龍。長齋會玄都，鳴玉叩瓊鐘。十華諸仙集，紫煙結成宮。寶蓋羅太上，真人把芙蓉。散花陳我願，握節徵魔王。法鼓會群仙，靈唱靡不同。無可無不可，思與希微通。

次北向，誦禮經頌三首。其辭曰：樂法以爲妻，愛經如珠玉。持戒制六情，念道遣所欲。淡泊正炁停，蕭然神靜默。天魔並敬護，世世受大福。

鬱鬱家國盛，濟濟經道興。天人同其願，縹緲入大乘。因心立福田，靡

摩法輪昇。七祖生天堂，我身白日騰。大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

每誦步虛一首訖，弟子唱善散花，禮一拜畢，唱三禮曰：至心稽首禮太上無極大道。至心稽首禮三十六部尊經。至心稽首禮玄中大法師。

次平坐，弟子向師伏，師說元始禁戒，弟子句句唱諾，弟子某甲自稱名，師告：弟子唱諾三言之。

《元始赤書五篇真文》，上清自然之書，九天始生之靈空洞之章，成天立地，開張萬真，安神鎮靈，生成兆民，匡御運度，保天長存。上制天機，中檢五靈，下策地祇，嘯命河源，運役陰陽，召神使仙。此至真之文，妙應自然，致天高澄，使地固安，五嶽保鎮，萬品存焉。元始刻題上帝靈都之館，累經劫運，而其文保固天根，無有毀淪，與運推遷，混之不濁，穢之愈清，毀之不滅，滅之極明。大有之文，天真所尊，自非勒名

帝圖，刻簡來生者，斯文隱祕，莫得窺聞。有得之子，與三炁長存，勤行其法，尅致神仙。但精心躬奉，家國安寧，保命度災，掃諸不祥。天子侯王奉之，致國太平，凶寇自夷，邊域不爭，兆民歌唱，普天興隆。運推數周，正道當行，有得之者，庶招自然，天真妙重，九天所祕，不得輕泄，考罰爾身。若弟子應傳經者，年限雖未盈五八，皆令法信充備，依黃籙爲三師，開度弟子一十九人，功德滿足，然後得傳寶訣，不得非師，私相教授。若違科妄泄，無盟而傳，師受四極之考，七祖同淪地獄，萬劫不原。可不慎之，可不慎之，爾其信焉。

畢，弟子起禮三拜，還伏。次授六誓文曰：  
一誓不輕泄，二誓不猥慢，三誓不妄傳，四誓不口說，五誓不觸經禁，六誓不受財賣道。

天尊六誓以質人心，人心既固，道心亦真，不得違誓越盟，永受風刀。說誓之時，先捻香，弟子一手指天，男

左女右。畢，弟子禮六拜，師立，誦曰：  
真道高妙，應感則宣，丹心懇至，有惻上玄，紫文鍊質，神金制魔，豁落威靈，佩之神仙，今啓傳付，誓勿妄言，寶祕真降，泄必禍臻，天科嚴峻，爾其奉焉。  
畢，弟子又禮六拜。

次師簡授弟子法位曰：太上靈寶無上洞玄弟子某嶽先生某甲。弟子長跪受畢，退合簡端身，稱之禮本師，九拜，三起三伏，肘行膝步。訖，左行東面，向西禮，再禮；次北，次東，次南，各再禮，曰朝四極。還復位，禮監度三師，各三拜。

次還讀前謁十方版及五師版，依前面方所，唯五師向西。畢，長跪大謝，弟子叩頭，搏頰無數。其辭曰：

太上靈寶無上洞玄弟子，某嶽先生臣某等，今故燒香叩頭，歸身歸神歸命十方無極太上靈寶天尊，十鄉諸靈官已得道至真諸君，丈人，三十六部尊經玄中大法師，太上玄一三真人，太極高玄法師，三天大法師正一真人，及三界表

裏一切神靈。臣等以今傳授弟子某甲，登壇告盟，希仰太上衆尊濟度之恩，原赦臣某師從弟子等，自從緣起有身父母，依因一切眷屬，及得某等千罪萬過，並令傳授。置齋以來，逮乎茲日，違科犯法，進止失儀，呼名乖忤，尊卑越次，付度差違，特乞大慈開宥，不見罪罰。伏願恩流即時，威播今日，且今日寶珠之口，有無鞅衆登寶珠之上，獲參勝侶，乃超虎澗而同至，越龍山而俱到，證因四果。果於向者尅成五願，願偶今時。所謂珠口不知盈滿，水火無以燒沉，故今辰男女仰慕鳳輪，遠期龍駕。凡此智友，既各父元父之父，同一玄一之一，願五眼報勤，三明賞德，功聘喜泰，勤暢休歡，恩寢死符，福播生錄。永始元始之歌謠，長卒不卒之慶抃。各使餐能命算，食辨形體，祐蓋尊卑，衛活長少，天保信向之男，法護至到之女。女果紫簡，男諧玉牒，不朽與赤甫爭能，得道共山圖而競解，禍路承此同滅，福階因慈各興。帝主延昌，愛民治國，三歸共往，四教俱來。獄厄

長免，因緣永絕，灾惱不起，衰患勿生。其諸此外，隨願各刻，求官得官，求貴得貴，求道得道，求真得真。所願悉諧，所欲咸遂，道成天地，功濟生靈，遍爲諸天日月星宿、山川嶽瀆、龍王鳥王、獸王蟲王、萬物神王、一切天王，在處處天神地神、山水靈祇、里域官長、凡諸營衛一切吏兵，並願即時旋轉，俱登妙勝。即願七元安度，四象無愆，天見吉祥，地表靈瑞，山開寶牒，河出龍圖，五芝綠草，遍布郊野，四方清淨，天下太平。無邊功德，逮及監臨官對，執勞隨喜，并觀聽男女，一蒙有緣，同享上福，冥資六道，慶被四生，五苦三惡，含靈有識，咸蒙蕩沐，冠帶天衣，適樂自在，長結善緣，永爲法侶，從此不退，得道爲期。至於壇主盟身某，五文入體，玉符養質，神真衛命，天書感瑞，八會應圖，六度常持，四行無缺，五通仙舉，十轉飛騰，金剛淨體，尅隆聖果，稽首十方，常住三寶。

次師誦三徒五苦辭曰：

三才及萬物，倚伏各有齡。終始

待劫數，福盡天地傾。往反於五道，苦哉更死生。輾轉三徒中，去來與禍并。

大賢慎茲誠，忍性念割情。愚夫不信法，罪痛常自嬰。吾念世無已，今故重告明。若欲度斯患，歸命太上經。

罪福不由他，諒自發爾聲。大賢故閉口，欲絕諸惡緣。滅念歸兼至，倚伏待長泯。弘道以安世，終當見正真。

淫嫉爲禍首，滅身之至患。含養如此害，豈是道所安。知惡而不革，恐必致天殘。懷毒日齋直，令我發長歎。

宿命有信然，弱喪謂之无。皆欲眼前見，過目即言悠。大賢明道教，慘感愍頑夫。依依念子苦，勤勤令我憂。

人命以消盡，亦猶膏中火。四大暫相寓，五物權時假。盛年當勤學，趣求存吾我。福盡身神散，冥冥地獄下。

上聖畏是故，尋道度斯禍。學仙行爲急，奉戒制情心。虛夷正氣居，仙聖自相尋。若不信法言，胡爲棲山林。

大賢樂經戒，受之爲身寶。就學常苦晚，治身恨不早。比當披幽蹟，倏

歎年已老。執卷吸爾極，將更死痛惱。吾故及弱齡，棄世以學道。

次法師還向東，口啓言功，復官。

泰玄都正一平炁係天師陽平治左平炁臣某，稽首再禮，上言：謹按文書，臣素胎生肉人，稟命有幸得，生法門，被蒙大聖曲逮隆重，得叨妙法內外真要，長生度世不死之道，仰參上清三洞寶經昇霞之術，恩潤重沓，莫之與比。道重人輕，非臣臭骨所可當荷，辜負天官，若無首領。臣以今即日，登此山岭，授度寶經與弟子某甲，出身中三部八景神仙騎乘，飛天神仙功曹，傳言奏事小吏，闡啓五帝、五嶽土地靈山里域真官注炁，監察授度，並見營衛。皆是衆官祐護之功，不勝受恩，謹爲一切衆官拜言功口章上聞。願上官典者，乞垂矜省，原赦臣前後所犯萬沒之罪，賜臣身得度千灾萬厄之中，請爲侍經玉童玉女，內外監察考召君吏、四野九野四面真官、土地靈山五帝、五嶽上真，臣身三部八景飛天神仙功曹，天官騎乘，十方營衛衆官，并及前後行來諸所

經歷，傳授宣化，心口求願，祐助之功，一切謁還天曹，加官進爵，言功舉遷。

上功三千等，中功二千等，下功一千等。書佐小吏，吏兵士卒各五百等，還入中宮。上官典者，以時給與，悉令均平，無使遺脫恚恨者。受功事訖，各還所職，營護臣身，襪却千灾萬毒，公私口舌，惡人謀議，一切伏匿絕滅太陰之中。受恩無地，以爲效信。恩惟太上分別求哀臣愚，謹因內外衆官真使、正一功曹、左右官使者、陰陽神決吏、科車赤符吏、剛風騎置驛馬上章吏、飛龍騎吏官，各十二人出，奉操臣拜上言功口章一通，上詣三天曹，伏須告報。臣某誠惶誠恐，稽首再禮以聞。

臣姓屬某府某懸某觀。

太清銜位

太歲

臣告盟事訖，所請天靈地神，謁還九天，隨宜進叙，臣身中玉虛真炁功曹使者、神仙乘騎，各按常次，從紫府玉閣妙門金戶而入，周身匝體，纏繞百脉骨節，內填仙炁，外截邪源，鍊魂保精，早

得飛行。神仙羽騎徑昇帝宸。咽二十四炁止。

次法師復爐，祝曰：

香官使者、左右龍虎君、侍香諸靈官，當令此間傳授之所，自然生金液丹碧芝英，百靈衆真，交會在此香火案前，令臣得道，尅獲上仙。弟子某甲等受福，內外家口蒙恩，十方仙童玉女，侍衛香煙，傳奏臣向來言請，徑至玉皇上帝几前。

次誦奉戒頌

道爲無心宗，一切作福田。立功無定準，本願各由人。虛己應衆生，注心莫不均。大聖崇正教，亦由雨降天。高凌靡不周，常卑故成淵。海爲百川王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

還戒頌

天尊大慈悲，說戒度衆生。威德被幽顯，果報感真靈。諸天來稽首，群魔自束形。過去超八難，見在保千齡。齋福行當息，相共送虔誠。流梵逸雲

唱，飛香雜煙馨。瓊鳳乘丹輦，金龍駕綠駟。生死皆快樂，家國悉安寧。

畢，師弟子遠壇梵詠還。事了。亦可復爐前，於皇壇上行騰天藉地竟，師弟乃梵詠，出西北九天門，勿迴顧也。藉地解形符，青書白素上，騰天遁變符，黃書碧繒上。亦有師云，未言功前，行之畢，次引弟子北向朝太上玉宸四拜，次東向謁大帝君再拜，次南向禮高上真人再拜，次西向拜天師張君再拜，次三日弟子言功，設齋謝恩，儀在別卷。次弟子於壇本命之方投簡法，次東向叩齒三通，上香祝曰：

無上三天玄元始三炁太上老君，召出我身中三五功曹、左右官使者、左右捧香驛龍騎吏、侍香玉童、侍香玉女、五帝直符、直日香官，各三十六人出。關啓此間土地、四面真官正神，我今正爾燒香關啓，願得太上十方正真之炁入我身中，令所啓上聞，徑御無上至真大聖尊神玉帝几前。

畢，迴向王叩齒十二通，讀簡竟，祝曰：天開地張，九炁分靈，三元同符，十方玄清，五老上帝，開真領生，丹書赤文，

元始上精，普告無上，九土皇靈，今日上吉，萬仙定生，我願我仙，請投玉名，土府太皇，勒除罪形，奏簡上官，列簿華青，早得飛昇，天地同靈，九祖種親，腐骸更榮，魂昇南宮，受化仙庭，今日告命，萬神咸聽，請以金鈕，表明至情，請如所告，金龍驛程。

畢，上香復爐，如上法。

元始靈寶告九地土皇，滅罪言名求仙上法。靈寶赤帝先生女云道士，某甲年若干歲，某月生，命係九天南斗領籍。解曰：此文云赤帝者，是本命丙午，命係九天者，是正月二日生，南斗領籍，猶取本命之方，餘效此。願神願仙，長生度世，飛行上清，中皇九土，戊己黃神，土府五帝，乞削罪錄，勒上太玄，請詣中宮，投簡記名，金鈕自信，金龍驛傳。

太歲某子某月某子朔某日某子，於某府州縣鄉里中告文。

右朱書銀簡，青紙裹之，青絲纏鈕九隻，金龍一枚，埋所住中宮。次謁版，刺版並埋壇之當方。亦可投山洞淵泉中，勿令人得之。凡簡

長一尺二寸，闊二寸四分，厚三分。

登壇法信如左：

金錢二萬四千，聽以銅錢寶物准當。上金九兩。五色繒紋各一疋。大席五領。合和香五奩二斗五升。五香爐。七章案。絳紋巾一枚。五尺袂複碧紋巾一枚。五尺袂複五綵雜散花一斗。本命繒，隨年尺數。

正月、二月生，則青天領籍，炁係九炁天君。

四月、五月生，則丹天領籍，炁係三炁天君。

七月、八月生，則素天領籍，炁係七炁天君。

十月、十一月生，則玄天領籍，炁係五炁天君。

三月、六月、九月、十二月生，則黃天領籍，炁係一炁天君。

隨度事月

正月、二月，則云今於三炁天中。  
四月、五月，則云今於三炁天中。  
七月、八月，則云今於七炁天中。  
十月、十一月，則云今於五炁天

中。

三月、六月、九月、十二月，則云一炁天中。

太上洞玄靈寶授度儀

(王卡點校)

# 080 太上洞玄靈寶二部 傳授儀

經名：太上洞玄靈寶二部傳授儀。撰人不詳，似出於隋唐。言傳授《靈寶智慧定志通微經》之科儀。一卷。底本出處：《正統道藏》正一部。

## 度思微定志局

第一初入壇，或在堂左行繞經，師北向三上香。第二次師仍北向，禮經三拜，弟子在北向南對師，禮三拜。第三次師還西面，東向立，思神竟。

鳴法鼓二十四通。

无上三天玄元始三炁太上老君，召出臣身中三五功曹、左右官使者、左右捧香驛龍騎吏、侍香金童、傳言玉女、五帝直符，各三十六人出，關啓此間土地里域真官正神。臣今正爾燒香度法，願得太上十方正真生炁，入我身

中，所啓速達，逕御太上无極大道至真玉帝御前。

次長跪出官曰：

謹出臣某身中五體真官功曹吏，

出臣身中上三天執法開化陰陽功曹、度道消灾散禍解厄君吏，各十二人。出臣身中治職君吏、某治建節監功大將軍、前部效功、後部效殺驛庭令、驛庭丞、四部監功謁者。臣身中仙靈直使、正一功曹、治病功曹、左右官使者、陰陽神决吏、科車赤符吏、罡風騎置吏、驛馬上章吏、飛龍騎吏等，各二人出。出者嚴裝顯服，冠帶垂纓，整其威儀。直使功曹戴通天之冠，衣皂紈單衣。正一功曹冠朱陽之幘，絳章單衣。使者冠九德之冠，五色壽命單衣，腰帶虎符，齊執玉板。直使功曹住立四方，正一切曹住立中央，治病功曹營衛臣身。左官使者建節在前，右官使者持幢在後，陽神决吏立左，陰神决吏立右，上部功曹住立上方，中部功曹住臣身中，促炁功曹催促十方，上部使者遠望上天，中部使者遠瞻八方，都官使者

匝繞臣身。狼吏虎賁、察奸鈎騎、都官僕射、天驕甲卒、天丁力士、收炁食炁吏、收神食神吏、收鬼食鬼吏、收邪食邪吏、收精食精吏、收毒食毒吏、誅符破廟吏、科車赤符吏、罡風騎置吏、驛馬上章吏、飛龍騎吏，屯駐臣前後左右。功曹使者嚴裝事竟，羅列鹵簿，關啓靈寶官屬領仙監齋君吏，天師所布下二十四治，三十六靖廬、七十二福地、三百六十名山崑崙等上宮三萬六千神，日月星辰、璇璣玉衡、天地五帝、三界官君將吏，及道上一玄三元四始，四面方位風炁炁注炁甲子諸官君將吏、考召君，東九夷胡老君、南八蠻越老君、西六戎氏老君、北五狄羌老君、中央三秦儉老君、五嶽四瀆丘沼君、諸廟神祇，所在高山山川溪谷山林孟長、十二溪女，根源本始土地之主，社稷將吏，一時嚴裝，與臣身中功曹使者、飛龍騎吏，上啓太上无極大道、太上大道君、太上老君、太上丈人、無上玄老、十方無極大道道德衆聖天尊、至真大帝、天帝、天師君、靈寶監齋大法師、諸官

君。臣受法之日，要當宣通法音，讚揚大化，傳授後學，開度天人。今有某郡縣鄉里男女生某甲，潔己清行，志求神仙，已受三洞大度之法，玄宗難悟，未極真途。今齋信效心，求受天尊所演思微定志兩半圖局十戒要訣，丹情慊苦，不可違逆。臣輒依法與甲對齋，日限事竟，今付度解脫，謹拜黃繒赤表一通，功曹使者飛龍騎吏，以時騰奏，上詣上上太上曹，表露在玉案上，分別請省。

次讀表。

次鳴鼓三通曰：

臣重因衆真上官、功曹使者、飛龍騎吏，分別關奏，操臣拜度定志戒訣黃繒赤表一通，上聞清玄御前，無令下官故烝邀截公文，令不上達。臣閉口烝，昇表到三天曹，伏須告報。操表伏地竟，仍復官如上章法。

次師起，左迴還南面，北向，弟子還北面，南向相對。師長跪曰：具位法師某岳先生，臣某甲稽首再拜，上啓太上无形无名虚无自然至

真大道、无上元尊、太上大道君、十方无極大道道德衆聖天尊、至真玄中大法師、太極真人、玄一三真人、天師君。臣以下愚，行尸臭肉，宿命緣會，謬荷非分，進受大法三寶尊經。未能栖隱幽林，超絕塵迹，又不能敷宣皇教，廣建福田，濟度苦行，立功補過，而混同常人，魔俗不別。大道多恩，賜全首領，得有今日，視息三光，恩深施重，實在罔極。臣某誠惶誠恐，稽首頓首，死罪死罪。蓋聞神經尊貴，非凡陋之徒所可施行，妙義淵蹟，非賤臣小子淺識肉眼所可仰瞻。臣僥倖之運，遭遇際會，三洞御世，搜選種人，得以穢質，叨忝靈文。臣受經始淺，未宜宣露。今壬辰之運，太平已近，禍福交行，自非得道之夫，年劫難保。雖人心難測，賢者勤求，不宜閉絕。謹有某郡縣鄉里男女官道士某甲，潔己清行，志求神仙，已受三洞大度之法，玄宗難悟，未極真途。今齋信效心，求受天尊所演思微定志兩半圖局十戒要訣，丹情慊苦，難可違逆。今謹依玄科，分券受

局，傳說禁戒，告誓三官，約不妄宣。謹以上聞，須報施行，臣某誠惶誠恐，稽首再拜以聞。

次讀局文曰：

清虛自然四烝，本是一，散爲兩半，因氤氳之烝，分半下降，四體合爲一。受思微定志經，不行五逆，上昇反乎一。清虛自然，因在欲時，受思微定志十戒之勳，自然漸昇。十方無極天尊，功德不住，處於長樂。不受思微定志，爲惡不止，自然爲積，下降枉魂，故枉魂自然招上半，下人此，半盡兩半成一盡，從此入十八地獄，不住餓鬼畜生。又復四體合爲一。爲惡下降，爲善上昇無色界、色界、欲界。無色天空不住，色天空不住，欲天空不住無住，一切空空，无住不得住。一百七十七字。

次畫一，師受捉筆上，弟子手捉筆下，共畫一，左就右，弟子隨師言曰：

畫一之後，謹依契令，尊道貴德，崇重師寶，修齋持戒，救度生死。自此之外，違負科法，一如明真之文。

次破局券

男弟子得左，女弟子得右。

次刻環

左言左无上，弟子隨師而言。

次刻環

右言右玄老，後刻環，中言太上。師又言曰：此三師即是天尊、左玄真人、右玄真人。

次師以環貫局券，置案上。

次弟子向南長跪，執丹水當心，師向北，啓盟曰：

太上靈寶无上三洞或洞玄法師，某嶽先生臣某，敢告丹水。某郡縣鄉里甲乙，年如干歲，操辭立誓，投命詣臣，求受思微定志兩半圖局十戒要訣，向已爲拜黃繒章表，列啓太上衆尊。願監盟君吏、靈寶君、靈寶丈人、天官地官水官三官君吏，及某家七世祖考，監見某自來求生，齋戒投心，所受靈妙經旨訣，約承按大法，奉尊俯仰，檢口慎行，棄諸色累，斷絕外想，靜心夷默，專志在法，不得混濁，更相招引，以亂真炁。每行大慈，廣度一切，國安民豐，四海寧一，七祖父母，皆得昇度，身入光明，早生人中。大劫運終，同飛上

清。其未仙度，五八爲期，不得中洩，妄傳非其人，愆盟負誓，輕漏靈文，生死父母長役幽夜，風刀萬劫，不得有怨，違諸禁戒，一如明真之文。

次弟子自誓曰：

弟子某甲，承真告命法師口訣，不敢違負，妄傳非其人，殃延甲身，要負上下中央四面八方正真神明。今共吞盟水，案法齋戒，修行妙旨。乞弟子及師，得度天灾。陽九百六、甲申大厄，從劫到劫，無有虧盈，日月同曜，三寶齊輪，伏受靈寶丈人三洞天文，見生之恩。

次師三噀丹水，度與弟子，三噀令盡。次師度局券與弟子，長跪受，男左手取，女右手取。度者左手並繞腰三過，向師三拜，次誦智慧三首竟，迴心禮十方。次師法居南，弟子向師禮三拜，心存見十方大聖在於上方，乃受九戒。師說戒。

天尊曰：兩半成一，其義有五。卿等知乎？二真答曰：已知，不亦於

彼清虛之炁，因煙焜之交，分半下降，就此四半合爲一邪。不亦或此假一而爲惡者，致招自然之炁，淪於三徒乎。不亦爲善，離此四半，還登太虛，復我清虛之炁，反我兩半，處於自然乎。

天尊曰：卿體之矣。今便以兩半輪轉圖局，相示於空中，下左真之前。

天尊曰：雖得此訣，要當以九戒爲本。

- 一者不殺，當念衆生。
- 二者不淫，妄行邪念。
- 三者不盜，取非義財。
- 四者不欺，善惡反論。
- 五者斷酒，常思淨行。
- 六者宗親和睦，無有非親。
- 七者見人善事，心助歡喜。
- 八者見人有憂，助爲作福。
- 九者一切未得道，我不有望。

弟子某受戒終身修奉。禮師三拜。次弟子行詠智慧五首讚。散華，唱善，禮三拜。

太上玄虛宗，弘道尊其經。俯仰已得仙，歷劫無數齡。巍巍太真德，寂



寂因無生。霄景結空構，乘虛自然征。  
日月爲炳燭，安和樂未央。

學仙絕華念，念念相因積。去來  
亂我神，神躁靡不歷。滅念停虛閑，蕭  
蕭入空寂。請經若飢渴，持志如金石。  
保子飛玄路，五靈度符籍。

濟我六度行，故能解三羅。清齋  
禮太素，吐納養雲芽。逍遙金闕內，玉  
京爲余家。自然生七寶，人人坐運華。  
仰嚼玄都棗，俯含空洞瓜。容顏曜十  
日，奚計年劫多。法鼓會天仙，鳴鍾徵  
大魔。

靈風扇香華，燦爛開繁衿。太真  
撫雲璈，衆仙彈雲琴。雅歌三天景，散  
慧玉華林。七祖昇福堂，由此步玄音。  
前世德未足，斯書邈難尋。信道情不  
盡，圖飛乃反沉。太上無爲道，弘之在  
兆心。

學道由丹信，奉師如至親。挹景  
偶清虛，孳孳隨日新。衆人未得度，終  
不度我身。

太上洞玄靈寶二部傳授儀

(王卡點校)

# 081 太上洞玄靈寶大綱鈔

玄洞先生閻丘方遠述

經名：太上洞玄靈寶大綱鈔。  
唐末道士閻丘方遠撰。言《靈寶經》出世源流及《度人經》要旨。原書卷數不詳，現僅殘存序文一篇。底本出處：《正統道藏》洞玄部神符類。

大道既分，離爲五行，流爲五劫。每至劫終劫初，大聖出世，垂教說經，以度天人。所謂五劫者，龍漢木劫，赤明火劫，延康金劫，開皇水劫，上皇土劫。皆周而復始，衍爲日月星辰，陰陽曆數。下爲嶽瀆川源河海、人民鳥獸，各有主宰，皆遵稟天尊大聖，分氣受生。

天尊於龍漢劫初，從碧落天降大浮黎國，在大地東方說法，演靈寶自然

天書五篇真文。至軒轅黃帝時，天真皇人是前劫成真，於峨嵋山洞中，授黃帝守三一法，及黃帝赤書一篇，靈寶部中皆天書古篆。黃帝道成，封此法於鍾山，在西北，然後於仙都山升天。至堯時，禹父鯀理水，功用不就，堯舉舜執政，殛鯀于羽山，在東沂州，用禹理水。禹傷先人理水，功不成見誅，日夜號泣，感神人繡衣使者，告禹曰：黃帝得道，封靈寶五符於鍾山之阿，授汝而理水功就。禹遂詣鍾山，齋心祈祝，感鍾山真公授靈寶五法，皆備足。理水功成，會羣臣於會稽山，更演五符，及出五帝姓諱，共成三通。一通藏於洞庭包山，今林屋洞是也，在吳縣。吳王令龍威丈人取出後，火化歸天。一通藏東海勞盛山，亦被吳王取出。一通藏於石磧山，萬年方出，將授伯長，依前理水灾，會稽山龍瑞觀前，有石磧山是也。屬會稽。至吳太極左仙公，年十三，於會稽山陽石巖下精思，年十八感通。後於天台山精思，太極三真及太極法師徐來勒，重授靈寶諸法，仙公因合成

七部科戒威儀齋法。仙公以吳赤烏二年八月十五日，於天台山白日升天。吳大帝孫權撰傳。至宋文、明二帝時，簡寂陸先生修靜，更加增修，立成儀軌。於是靈寶之教，大行於世。始於軒轅，終於簡寂，法教圓通，使後世得覩天儀，傳習者悉無疑慮。於此教而成真者，不知幾極。承襲此教，爲帝師者，代有其人。仙人韓衆，傳樂子長靈寶法，是此源流。子長修行，得道者九人。海陵縣樂真觀即是舊宅。吳王使齋五符，問仲尼。仲尼不發函，託童謠：龍威丈人名隱居，獨入包山竊禹書是也。開元中，玄宗皇帝於桃林縣所得石符，是尹真人舊宅，後改爲靈寶縣，城南置靈寶觀，內庭置靈符殿，皆是靈寶法遺跡。

世人多疑《靈寶度人經》。天尊說經，不與世間經書符同，暗致疑惑。都五十八卷，其經旨在此《度人經》中。其五十七卷，皆演說科儀齋法、教戒緣起，宗於自然天書。近代誦詠此經，感應不少，聊因暇日，輒搜經法源流，以

解世人疑惑真正。自漢已前，寫用絹素，漢順已後，方用紙寫成卷軸耳。

太上洞玄靈寶大綱鈔

(郭清點校)

## 082 靈寶九幽長夜起尸 度亡玄章

經名：靈寶九幽長夜起尸度亡玄章。撰人不詳。載靈寶齋儀歌章二十六首。一卷。底本出處：《正統道藏》洞玄部贊頌類。

茫茫三天上，玄光照空暉。仙人排雲出，玉女下靈扉。梵響何悠悠，繽紛五色旂。極月觀三界，中元不平夷。不聞人頌音，但有哭聲悲。奄去不得住，命速復怨誰。先身不修福，福盡禍來追。三魂七魄馳，迢迢何所依。奉經遵三寶，自值宿命歸。建齋大布施，五陰必生尸。報應无近遠，至心有會期。以死早拔之，生天高巍巍。

弟子東向三拜，除去三萬劫生死之罪。

窃窃無上臺，遼遼雲中堂。仰眄

大羅宮，但見仙人房。閻浮多惡人，惡人必先亡。天誅不分別，善惡或同鄉。皆由善不積，魂馳遊八荒。對來奄就死，此亦无豪強。因緣各自去，父母不能當。念之死者苦，悲來五情傷。上有七尺土，丘冢何茫茫。三十六世乖，七祖各分張。願得出五道，隨聖遊十方。

弟子北向六拜，除去三十劫生死之罪。

中元多惡人，惡人必先亡。命過如轉燭，魂魄歸蒼茫。因緣任宿行，苦樂那可常。愚人不作善，死後心摧傷。哀哉生死別，號哭斷人腸。悠悠天地分，此苦誰能當。大聖愍一切，敕語五道王。各持生死簿，來詣長夜堂。召喚監殺君，太山牛頭防。并勒三塗掾，龍驛告十方。死者已自苦，早今度南宮。衣食食天厨，世世值樂鄉。

弟子西向三拜，除去十二劫生死之罪。

落落三天上，峻極何巍巍。天下之大罪，莫過忠孝虧。萬劫入長夜，永

已不復尸。先世有此憊，今身禍來追。坐此年中壽，魂魄共相馳。父母妻子乖，精神復何依。命絕如山崩，若水之東之。故念死者苦，切切令人悲。悠悠松柏下，長歿何時歸。

弟子東南向三拜，除去十八劫生死之罪。

天堂樂無極，閻浮多五慾。先身為何殃，命斷何乃速。魂魄馳何方，精神漂何獄。父母妻子乖，別離如壞屋。悠悠三塗中，精神竟何屬。愚人無所覩，言之慘心目。唯願生南宮，世世食天祿。

弟子北向三拜，除去千劫生死之罪。

宿命生何原，今身值清道。因緣明師化，得受玄妙寶。如何罪根深，猝然不終老。奄忽折盛年，命去何乃早。魂魄入長夜，精神遊五道。四大於此散，六趣經苦惱。生生為悲嗥，宿昔傷懷抱。何不度亡人，錢財等非草。建齋重布施，世世見師保。

弟子北向九拜，除去三十劫生死之罪。

人皆欲求道，求道心不精。始妬憎三意，墜入狐疑城。坐口致云云，九幽方始驚。死魂入惡道，何日望太清。哀哉死者苦，丘林何冥冥。今日度亡人，惟願更來生。

弟子北向十二拜，除去四十九劫生死之罪。

先世不作福，今身恒苦衰。奈何死者痛，輪轉五道機。如水之注海，一去何時歸。妻子於是別，父母知是誰。冥冥長夜裏，丘冢何纍纍。生人日夜哭，願得更生尸。哀哉死者苦，迅速令人悲。

弟子南向三拜，除去三十劫生死之罪。

生者何乃樂，死者何乃苦。冥冥長林下，上有奄忽土。悠悠黃泉底，精神向何所。妻子父母別，終歸墮七祖。呼吸逐風塵，魂魄何所主。死者亦不生，看天天无柱。瓦雞將不鳴，木人亦不語。哀哉傷人情，悲哉切肝膂。建齋度亡人，留情何所處。唯願得生尸，昇仙度七祖。

弟子南向十二拜，除去七十二劫生死之罪。

悠悠濁俗人，倒見安識真。不知有父母，不知有君臣。不解去來事，不別有故新。守愚而天命，魂魄乃沈淪。五道分之往，幽幽長夜扃。但聞哭尸聲，不見歡樂人。不值宿命師，一旦亡精神。今日度亡者，願見起尸魂。結胎在今辰，飛行須臾間。常與太上參，散憂在北門。佩契而背師，世世七祖昏。

弟子西北向十二拜，除去三十劫生死之罪。

先身好殺生，命短怨神明。狂人言背師，萬劫九幽兵。兆身為惡獸，億載易善形。今身中天死，五苦無不經。魂魄歸天地，精神何處生。大聖念之痛，哀哉傷人情。輕口道說人，裸聲傷生民。今日度亡者，願得復人形。七祖還南宮，三天九龍迎。

弟子西向九拜，除去三十劫生死之罪。

迢迢九天臺，峨峨紫鳳城。哀哉

三界苦，憂愁患難并。悼問世愚人，何以不長生。不信大聖教，奄去四大零。終日行惡業，不覺身命傾。鑊湯沿劍樹，求哀亦不矜。今日為過度，唯教復人形。

弟子東向九拜，除三劫生死之罪。

宿運因表裏，巍巍大羅天。中有不死夫，端坐兆億年。奉佩道說師，世長夜間。五道三塗中，九幽相拘牽。如此之罪人，永劫何得仙。今日短命死，皆由先身緣。始妬才智人，令汝命不延。對至大會期，殺鬼終不原。先不積善行，急向亦不恩。建齋度亡人，布施開道門。

弟子西向三拜，亡者即得解脫。

天地由常存，三光洞然明。五行應四時，玄運不頽零。亡者有何罪，一旦罹寒庭。不知有妻子，不識有父兄。四大奄然去，身散而存名。魂魄為何恃，精神何所生。今日過度之，願得復人形。

弟子西向九拜，除去萬劫生死之罪。

四諦貫梵行，六度超世蹤。三毒

不能檢，何用佩三洞。奉師吾我心，不得乘九龍。以此短命死，縱橫五道衝。二心懷猶豫，那得度灾洪。今日度亡者，願得見仙公。

弟子西向九拜，除去三萬劫生死之罪。

人人皆求生，生愚亦無益。佩籙而妬師，世世與聖隔。雖欲圖飛騰，不得上玉曆。以此短命死，死入九幽籍。魂魄精神馳，長夜何時釋。生存爲何計，錢財常貪惜。一去終天地，安知木與石。今日過度之，殃咎願除釋。

弟子西向十二拜，除去三千劫生死之罪。

天人仍下化，愚者不知研。各各利世養，苟得貪目前。相妬競功名，自說爭後先。輕師慢朋友，萬劫不得仙。死以入九幽，世世長夜淵。魂魄馳五道，鑊湯沿刀山。今日度亡者，亡者願生天。釋去一切罪，逍遙太上前。

弟子東向三拜，除去九十劫生死之罪。

四符行之本，六度咸玄光。受道

心不愍，令人命不長。中心有猶豫，那得不早亡。奉師如凡人，調註致禍殃。慳貪不供養，世世值凶荒。輕口說祕要，過世入鑊湯。今日度亡者，願早生天堂。生女爲夫人，生男爲公王。

弟子南向三拜，除去十劫生死之罪。

亡者初死宮，生人爲立功。月月常度之，自離五道衝。六齋十直日，三七去灾洪。庚申并甲子，真人靡不從。今日度亡者，願得乘九龍。生死值太上，世世見仙公。

弟子北向九拜，除去千劫生死之罪。

賢者積萬善，積善能得仙。人死不爲度，魂魄何得遷。先身不作善，徘徊地獄門。借問有何罪，坐口輕語言。永劫入九幽，何日復登仙。悠悠三塗裏，六賊之所牽。今日相爲度，行道歸自然。三五七九法，建齋興福田。

弟子南向九拜，除去四十劫生死之罪。

人身如五穀，輪轉其當生。種之有厚薄，善惡各有形。愚智天地隔，人亦有健儻。若鐵有柔剛，如水有濁清。

人有貪亂者，亦有賢良貞。唯有生者樂，不見死者榮。幽幽長夜中，劫運何時停。上聖愍一切，哀哉傷人情。

弟子東向三拜，除去六劫生死之罪。

閻浮非福地，罪人相塗生。不知命短促，但共爭功名。私心妬賢善，自取目前榮。則求人供養，不知大命傾。苟欲自進速，獲譴於神明。奄然入長幽，黃泉何冥冥。可念世愚人，此身豈久停。行善得仙者，萬世不頽零。

弟子西向三拜，除去三劫生死之罪。

九幽多惡人，善者不來居。丘林龍不棲，井水無神魚。先身无有福，不得食天厨。輕口道說師，死亡在斯須。魂魄遊五道，精神歸虛无。悠悠九幽裏，萬劫歷三塗。今日度亡人，願得隨龍鳧。

弟子北向七拜，除去萬劫生死之罪。

遼遼守棺槨，髣髴見紫庭。奉道求上仙，第一得師明。身佩无極契，當有一切經。百伎多能者，亦能道術成。奈何死者苦，一旦失功名。今日度亡者，令悉登鳳城。

弟子北向三拜，除去萬劫生死之罪。

仙人壽萬劫，愚者亦不知。佩契心不愆，自取亡身危。口舌道說人，速死傷誰爲。猛虎不可絆，神龍不待羈。此乃俟賢聖，不與愚人騎。可念死者苦，精神五道馳。今日欲度之，昇仙常無爲。

弟子西向七拜，除去三萬劫生死之罪。

人生會當死，一切皆無常。賢聖猶尸解，轉身昇天堂。罪重必夭命，善者爲延長。富貴與貧賤，斯是福不強。兇頑不信道，那得見仙王。大慈念一切，令人心摧傷。過度已說竟，心各禮玉皇。

弟子西北向九拜，除去千劫生死之罪。

靈寶九幽長夜起尸度亡玄章

（郭清點校）

# 083 洞玄靈寶六甲玉女 上宮歌章

經名：洞玄靈寶六甲玉女上宮歌章。撰人不詳。載靈寶齋儀歌章六首。一卷。底本出處：《正統道藏》洞玄部贊頌類。

甲子太玄宮左靈飛玉女歌章曰：

太玄洞清虛，玉氣映高靈。員華翳九象，綠梵曜飛青。益落雲迴際，流香燔丹瓊。碧鳳策朱轡，匡駕宴雲營。任我無色內，懽我天地生。迴輪三素朗，乃拯不窮齡。歷運順化會，氣與四常并。空洞中有真，誰測太玄名。虛映有懷子，迴真降爾形。取契同默念，棄累慎外營。積感入太虛，太虛降綠輶。遊宴常陽宮，飛步登玉清。徘徊九崖際，進禮玉皇庭。左喻朱月華，右引豁落星。三景齊大暉，豈覺天地傾。

甲戌黃素宮左靈飛玉女歌章曰：

黃素洞幽虛，神光煥太空。蜚廉太元一，勢契十真雙。靈運自冥紀，玄記故有明。玉虛曜瓊室，金暉發丹容。朱鳳策神轡，徘徊上清宮。玄映無色內，解衿宴常陽。五帝啓靈途，妙訣歸黃房。神暢感寂庭，默思徹九重。靈歌理冥運，百和結成章。高躋通妙趣，以啓不窮方。有得無上道，項負圓寶光。玄玄歸妙門，入一萬真通。體我自然道，乘虛不待龍。三元降飛輶，流雲迴紫黃。騰景空霄上，宴轡朝玉皇。

甲申太素宮左靈飛玉女歌章曰：

太素澄清漢，浩靈分九旒。道生太元一，化爲天地珠。虛映高上報，顧下忽云無。五嶽自可舍，未若九天衢。時宴常陽宮，策雲御鳳驅。飛輪翳空洞，紫烟玄相扶。逍遙重虛上，迴目眇八周。億椿在俄頃，豈覺萬劫遊。階樂隨運遷，保真無終休。聊各有志道，靜寂思相求。積微感自然，剋得御丹符。身入無患津，體懽心自娛。乘空迅飛雲，仰結高仙儔。

甲午絳宮右靈飛玉女歌章曰：

絳宮玄上道，洞陽煥太真。丹靈映瓊室，交風迴紫烟。八氣翳重虛，流香拂飛塵。龍鳳矯雲翮，神騁有無間。遊朗眇十方，乘虛樂九玄。靈運本非我，道由高上人。冥化自有數，我真法自然。妙曲發空洞，宮商結成仙。靈飛演道源，以悟後學身。虛映至清寂，默思自入神。我降自有由，且令停華年。道滿運飛與，騰身昇九天。

甲辰拜精宮右靈飛玉女歌章曰：

拜精隱重虛，靈素降清陽。右部齊真景，錦帔飛羅裳。頽雲映華衿，朱采透玉容。策鳳御玄轡，冥真常陽宮。遊徊慶雲上，流眇六合房。曲降修我者，啓靈悟童蒙。運得應自然，道成非我功。精思虛映真，剋得朝玉皇。

甲寅青腰宮右靈飛玉女歌章曰：

青腰生道根，陽始號惠精。總鑒玄上氣，右部統三靈。離合八景運，遊化無滯停。微微極洞元，翳翳九虛清。中有妙靈女，上錦下飛青。乘虛策朱鳳，迅駕奔五星。迴風流香華，紫霄翼



飛瓊。携契上仙客，解衿九鳳城。妙  
曲空中唱，玉音互自鳴。宮商玄相和，  
玄化無際生。有能究此章，一誦懽萬  
齡。西宮結元錄，東華記仙名。率我  
常陽友，曲真降爾形。積修感玄會，三  
元降綠輶。騰景飛霞上，進禮太帝庭。

洞玄靈寶六甲玉女上宮歌章

(郭清點校)

# 084 太上洞玄靈寶智慧禮讚

經名：太上洞玄靈寶智慧禮讚。  
撰人不詳。載智慧禮贊八首，并  
附科儀。一卷。底本出處：《正  
統道藏》洞玄部讚頌類。

太上玄虛宗，弘道尊其經。俯仰  
以得仙，歷劫無數齡。巍巍太真德，寂  
寂因無生。霄景結空構，乘虛自然征。  
日月為炳灼，安和樂未央。

學仙絕華念，念念相因積。去來  
亂我神。神躁靡不歷。滅念停虛閑，  
脩脩入空寂。請經若飢渴，持志猶金  
石。保子飛玄路，五靈度符籍。

濟我六度行，故能解三羅。清齋  
禮太素，吐納養雲牙。逍遙金闕內，玉  
京為余家。自然生七寶，人人坐蓮華。  
仰嚼玄都禁，俯酣空洞瓜。容顏耀千

日，奚計年劫多。法鼓會天仙，鳴鍾徵  
大魔。

靈風扇香華，燦爛開繁衿。太真  
撫雲璈，衆仙彈靈琴。雅歌三天上，散  
慧玉華林。七祖昇福堂，由此步玄音。  
前世德未足，斯書邈難尋。信道情不  
盡，圖飛乃反沉。太上無為道，弘之在  
兆心。

學道由丹信，奉師如至親。挹景  
偶清虛，孳孳隨日新。衆人未得度，終  
不度我身。大願有重報，玄德必自然。  
陰惡罪至深，對來若輪轉。

學道甚亦苦，晨夜建福田。種德  
猶植樹，積篋而成山。子能耽玄尚，飄  
爾昇青天。修是無為道，當與善結緣。  
太上至隱書，名曰智慧篇。拔苦由大  
才，超俗以得真。靈姿世所奇，燁若淵  
中蓮。

人行各有本，皆由宿世功。立德  
務及時，發願莫不從。善惡俱待對，倚  
伏理難窮。賢士奉法言，道德在兼忘。  
解是大智慧，上為太極公。寶蓋連玉  
輦，命駕御九龍。金華擎洞經，捧香悉

仙童。嘯歌徹玄都，鳴玉叩瑤鐘。

竦身凌太清，超景逸紫宵。保元持  
法綱，遊玄極逍遙。萬劫如昨夜，千椿  
如晨朝。巍峨廕雲華，手攀寶林條。  
香煙自然生，玄階興扶搖。靈旛順風  
散，繁想應時消。滅智弘大混，無為觀  
清謠。

## 土簡頌

煥爛啓幽期，障蔽日月光。玄陰  
不解夜，四衆並恭恭。靈運自應圖，倏  
欵朗太空。靈書八會字，五音合成章。

至真開大宥，落落諸天明。妙哉  
龍漢道，八會結成形。煥爛飛空內，流  
光三界庭。神圖啓靈會，玉書丹簡名。  
祈真登紫嶽，告命詣靈山。玉女  
揚梵響，金童奏紫煙。書名通九府，列  
字上三天。永享無期壽，刻成金華仙。

## 降真

九天命靈章，生神神自超。元君  
遏死路，司馬誦洞謠。一唱萬真知，九  
遍諸天朝。稽首恭劫年，慶紫榮舊苗。

太虛感靈會，命我生神章。一唱  
動九玄，二誦天地通。混合自相和，九

遍成人功。大聖讚元吉，散花禮太空。

祈真真必應，請福福當弘。諸天並懽悅，一切稽首恭。琅琅九天音，玉童生萬神。三遍列正位，炁參八辰門。玄關遏死戶，靈鎮津液源。應會自感靈，數明道潛迴。輪慶嬰兒蛻，稽首讚洞文。

### 謝神

今日祈景福，稽首上靈壇。群仙俱降下，衆聖悉來觀。留恩既介祉，駐鶴且盤桓。齋主永長壽，合家得寧安。

朗耀天地間，徘徊衆神遊。星漢景雲散，門庭風雨稠。今日仙聖降，垂恩應所求。甘露灑貧苦，窮鬼自然收。爵祿應冥籍，富貴永千秋。

衆等无量人天衆，有幸得遇真法王。慈悲降屆道場中，開顏含笑放威光。徹照三千大千界，歸命丹誠禮十方。

一心歸命禮東方多喜國土玉寶皇上天尊，  
一心歸命禮南方大福堂國土玄真萬福

天尊，

一心歸命禮西方大浮黎國土太妙至極天尊，

一心歸命禮北方西那國土玄上玉晨天尊，

一心歸命禮東北方妙樂國土度仙上聖天尊，

一心歸命禮東南方難勝國土好生度命天尊，

一心歸命禮西南方宛黎國土太靈虛皇天尊，

一心歸命禮西北方鬱丹禪善國土無量太華天尊，

一心歸命禮上方均天國土玉虛明皇天尊，

一心歸命禮下方鬱察國土真皇洞神天尊，

一心歸命禮十方盡虛空界微塵數天尊，

一心歸命禮三洞神文靈符寶誥三十六部尊經，

一心歸命禮凝空雲篆八角垂芒甚深法藏，

一心歸命禮玉京天台香林寶殿，

一心歸命禮傳經演教檄拯群迷玄中大法師，

一心歸命禮十方已得道真人玄師仙衆。

臣今普爲上界下方、人天六道、帝主人王、歷劫師宗、所生父母、十方施主、六道四生，皆沐道恩，歸令懺悔。

至心懺悔。臣等生逢明代，長遇休期，得入玄門。身霑末悟，師資賜授，稟佩靈文，緣累驅馳，觸途皆舛。三會五臘，少立善功，八節三元，多虧禮念，十直本命，未解修行，甲子庚申，朝真鎮闕。齋法九等，意不專行，功行三千，曾無敬奉，科禁至重，舉措成愆，戒行威嚴，綺言增過。心非意亂，犯百八十條，識智深違，亡三百大戒。自造三業，禍積如山，六慾四纏，愆深巨海，釁罹黑簿，罪結冥司，常恐考至形軀，彫零命府。伏願至真至聖，遠鑒丹誠，除死上生，更加年算，灾殃永滅，福慧臻身，厚祿遐齡。常居法廕，智通玄悟，永息迷昏，習道成真，持經無犯。

懺悔已，歸命禮三寶。

至心發願願我等，歷劫廣修三業善。常持妙法救含靈，不被塵網所包纏。生生超度三塗難，願得寸心如慧日。能除昏暗照虛空，於諸法中無我人。常起慈悲一乘行，願口常餐甘露偈。宣敷淨戒度人天，無談惡語綺言詞。不噉生生含血命，願足不履三惡道。願手不殺一衆生，願身如影輔天尊。坐起周行無捨遠，願與一切諸類等。俱辭餓鬼畜生身，願與三界天人同，一切勤求無上道。

發願已，歸命禮三寶。

衆等聽說：此時清淨偈，欲求歸真道，離俗處巖巒，三時焚寶香。堅心勤持戒，當須棄榮祿，名利勿牽聯。當即值真人，授子无上道。

上中下座，各記六念，念天念地，念道念經，念真念戒。

衆等聽說勤持戒：一莫殺生，二莫偷盜，三莫邪淫，四莫妄語，五莫耽酒食肉，六莫謗毀賢良。天尊遺教，戒勸分明，努力勤修，早求解脫，人身難

得，中國難生，一失人身，萬劫不復。是故勸衆等，同歸屈道場，此世與來生，常逢真經戒。

誠勸已，歸命禮三寶。

太上洞玄靈寶智慧禮讚

（郭清點校）

## 085 三皇內文遺祕

經名：三皇內文遺祕。撰人不詳。系唐宋道士纂集六朝時《三皇內文》、《黃神越章》、《五岳真形圖》等書遺文改編而成。一卷。底本出處《正統道藏》洞神部本文類。

### 三皇內文遺祕後序

金闕神章，三皇默祕之文也。在天與天爲道，而統五行，著萬神，主萬象。在地與地爲德，宰萬物，擒精怪，斬邪神。故爲無上御攝之法，至神不死之道也。內隱陰陽六化之功，使修行之人，不遭外患。居山止洞林境，修真養素，求訪山中巖谷，若非斯文，則精怪以禍人之性命者多矣。故世市闌宅，堂室舍宇之中，或年深絕於無人之

跡，精邪尚有存焉，而況於深山幽谷，窮路林芳之處也。居山守靜，若不懷斯文者，如將身自投於死地。今降斯文，以辨邪正，今後學仙之士，不遭禍患，橫傷命耳。時年丙午菊節，紫微道人序。

### 三皇內文遺祕

#### 天皇內文上

天生雲龍，道本上昇，張烈正氣，麗乎太清，輔弼正道，行於正平，六甲洞元，九天超形，福延子孫，仙行自真，次及人皇，人敬長生，六丁九氣，祕密真誠，敬之終吉，昊帝貴名，久知道妙，身體長寧，聞此真句，常任之清。

已上八十字，每日暗念一徧，求長生之道。及於子孫，亦得總明。

慶延七祖，福及千生，高上太一，真正玉文，斬滅祆邪，和合玉清，仙法本正，名書上清，聖功乃久，法成乃知，昌運大業，仙衆保之，乃命金文，扉命制期。

已上五十六字，每遇四時八節，饗祭家親，暗念七徧，不書黑簿。智者勿令人知之，恐輕泄也。

#### 經傳隱此法禁。

已上六字，說此三皇內文傳受已，師不用功行，及十日，天神不附。若傳度非法，亦不得受。只依科所傳，勿

令人輕慢。

授及三皇，常遊玉清，凶惡伏滅，永居山堂，青雲從我，六癸存真，人若保之，六甲護身，勿輕我盟，必昇太清，永命延壽，玉神扶形，萬劫爲仙，常處丹天，五嶽四瀆，川洞丹穴，社稷泉源，萬靈布設，風伯雨師，星辰擁訣。

已上八十字，六甲六癸日，各念持三徧，五嶽四瀆社稷等神護助也。

凡有玄言，皇神祕傳，寫於繒素，藏於洞天，功歸太真，福度千春，無窮劫過，海嶽成塵，祕之斯文，五雲覆映，兆民敬之，叶和昌運，持受清教，命延壽永。

已上五十六字，言三皇內文佩受之後，仍寫篆送在山野洞穴之中。勿令人知，永保千春。

靈嶽九仙，丹炎洞然，河魁天罡，護道玄言，妄泄伐命，殃及九泉，粉軀碎體，金文莫言。已哉矣慎焉。

已上三十七字，言三皇內文佩受之後，說論與人，輕意妄泄，殃及九祖，粉骨傷形，金文永隔。玄言三百一十五字。

### 地皇內文中

國合律法，四海咸歸，飄飄玉虛，辟邪保神，萬劫無虞，旁生國土，福皆霑之，却滅凶殃，福德堂堂，信欽明約，至誠修學，保神終年，歸道捨俗，精勤仙錄，山川嶽瀆，西南東北。

已上六十四字，行於山谷，寓於江瀆，暗念一徧，能辟惡獸蛟龍、毒蛇精邪、魍魎妖怪之類也。

地皇祕印，和叶天地，三皇真言，福輝九泉，有情蠢動，皆屬上玄，陰陽相生，物皆有靈，含識衆類，皆合道藝，修飾虔誠，可期飛昇，力感玄幽，無妄我求，學法精持，無使狐疑，嶽瀆水上，咸令護之，敬崇三文，是即爲希。

已上八十字，遇有六畜及胎卵濕化等類有難，暗念一徧，死者解脫，生者安樂。勿令人知聞此真句也。

河海洪江，池源列張，人神動用，軌契五方，明星大神，高帝玉文，却絕險厄，護國兆民，名川龍神，攝禍去迤，嶽瀆名丘，太陰剛州，黃龍配列，依願應求，陽明輔弼，道士俗流，知敬斯言，家屬

無憂，祆妄邪氣，終不稽留。

已上八十字，淨寫一本，著姓名，埋祖先塚墓之間，以爲九玄告矣。黑書白紙，外以黑紙封之，却亦着姓名是也。

處世求生，其道必行，歷劫安暢，決定長生，善能保守，必見亨貞，誦之萬徧，玉女下迎，王者祕之，合國咸寧。

已上四十字，說三皇之符文，念之百徧，保達地仙長壽。勿令同壇人覺，恐功不成。玄言二百六十四字。

### 人皇內文下

舉目自天目中明星月少小功曜乾坤而地祇斗授林震地戶巽坎離午人門坤已兌酉天門乾已坎子鬼門艮戊頭甲乙丙丁庚辛壬元丙上辛。

已上五十七字，欲祭醮，先寫一本焚之。八卦二十位，外邪不悞犯，神明護門。不得令人見讀。

乘天罡魁林人生陽哀人壽昌九天九土九人九命九真九道九術九生九渺九玄九要九成凡百一十七與超天張天公良世勿明。

已上五十一字，凡欲入山水攝邪精，黑書白絹上焚之。水伏。勿令人知之。

命龍神九建除滿平定房上明神知要屈命句扶明火三人光九天等神大出六鬼蒼爻遠命上拜必炎三石九王姦出勿勿必明三乾勿九九九天化九牛二人魚罪世白無九同明出命左右。

已上七十四字，用雌黃書於石瓦上，埋於本宅住處四角。勿令人知之，招財神祿神也。

四石山狐出命昌門矣也女安於即言中耶聊六左扉九天九天天成焉三矣此蒼矣。


已上三十四字，依一篆於朱書白紙，每日空心焚之，灰水調服之。如神語言吉即吉，凶即凶。呵氣治病，無不瘥矣。玄言二百一十六字畢矣。已上三皇內文，學道之士須佩帶之，然後方始通神。如未受道錄之人，不得妄行。宜埋藏於名山巖谷之中，免遭天譴。此法本師不度，恐泄天機。同學之士，切令少言，恐毀謗。

靈文，於身有禍，生遭王法，死遭地獄。慎之慎之，祕之祕之。

### 太清黃神越章祕印


用雷震棗木心，於五月五日，或春甲子日，或夏丙午日刻之。凡受持印者，以甲子日人定時，淨室安置印，以煎餅、栢湯、鹽豉，為三楪，供獻，再拜上香。今日小兆臣某，上白 道君皇天太一使者。某今佩持寶印，願內無疾病，外斷諸祆，救護天人，除精却惡，所求自然，與道合同。上香三啓，再拜 奏還。

太清黃神印圖



方四寸八分  
厚一寸二分

小越章印圖



方四寸八分  
厚一寸二分

九老仙都印圖



長闊各方正  
三寸二分厚  
八分篆二行

上清九老仙都印，佩之登山，狼虎精怪自伏，江河風雨順濟。可管洞府仙官吏兵，狼不能害，虎不能傷，水不能溺，臨大危難，必有善生。常人佩之，壽命延年，伏諸邪鬼，百惡不侵。治小兒夜啼驚風，及大人諸般疾患，並燒灰，用乳香湯調下，立效。催生下死胎，佩之安胎。婦人無子，佩之有孕。解呪詛冤枉，令人聰明，用之皆應。得之崇敬，慎勿輕慢。

### 太上黃神越章內法

師派

帥將元伯，福相火冠，金甲仗劍，朱衣朱履。

太玄符使章

召呪：玄英烈宏。

召符

存將吏從斗中降在目前，左卯文，右執符，視將取氣吹符上，或精去處用祕呪。

黃神越章祕印，能制伏萬邪，及諸  
妖怪災害急難，拜見國王大臣，並皆歡  
喜，所求遂心。常帶腰袖間，陰兵護  
助。不可亂傳非人，恐遭天譴，殃及九  
祖，後悔難矣。

越章呪曰：

太上老君黃神越章，斬伐天地鬼  
神吏兵，何敢承當。東歲星、西太白、  
北辰星、南熒惑，大聖化，滅鬼精，誅盜  
賊，伏萬兵。仙童玉女天地靈，張星驅  
攝萬邪氣，井柳星傳角星平，魍魎治命  
會帝庭。三五治邪氣，掇死籍，上生  
名，罡武滅，乙神精。天仙降下弟子越  
章。急急如太上老君律令勅。

印章呪曰：

黃神天章，帝庭黃神之印，攝鬼  
精。東斗建節由歲星，南斗治命辟萬  
兵，西斗魁魁滅鬼精，北斗束精告帝  
庭。黃神斬鬼與氣并，中斗大魁熒惑  
星。角亢治氣都會名，張星火毒除萬  
兵。大聖化神殺氣橫，牛歷箕斗護身  
形。罡武上帝壽五星，天皇使者斬邪  
精。太上賜臣某黃神印章，急急如律

令勅。

殺鬼呪

太上老君，教我殺鬼，與我神方，  
上呼玉女，收攝不祥，登山石裂，佩帶  
印章，頭戴華蓋，足躡魁罡，左扶六甲，  
右衛六丁，前有黃神，後有越章，神帥  
殺伐，不避豪強，先殺惡鬼，後斬夜光，  
何神不伏，何鬼敢當。急急如律令。

勅瘟呪

勅東方青瘟之鬼腐木之精，南方  
赤瘟之鬼炎火之精，西方白瘟之鬼孔  
金之精，北方黑瘟之鬼淵池之精，中央  
黃瘟之鬼糞土之精。四時八節，因旺  
而生，神不內養，外作邪精，五毒之氣，  
入人身形，或寒或熱，五體不寧。九醜  
之鬼，知汝姓名，急須速去，不得久停。  
急急如律令。

謹按祖天師漢安四年，在蜀與六  
天魔王戰，奪二十四治，與會盟青城山  
黃帝壇下。使人處陽明，鬼潛幽暗，令  
六天魔王領歸北都，八部鬼帥領衆竄  
於西域，五行之毒氣從茲而釋之。析  
石爲契，作天地日月之形，置之于絕

崖，仍以神印封鬼營匝，使不得相通。  
今以神符刊行，善信宜於淨室香花供  
養，自然驅瘟辟惡，集福來祥，惟加至  
誠，無不感應。龍虎山正一元壇謹白。

抱朴子曰：古之人皆佩此印，能  
辟虎豹及諸山獸。以此印封泥，置四  
方各一百步，則虎狼不近其內也。若  
行見新虎迹，以此印順則虎去，逆則虎  
來。非但虎狼，若山林廟座血食之神，  
能作禍福者，以印封泥四方塊，其蹤跡  
不能復神矣。昔有石頭，頭有大龜，在  
潭爲精作禍。有道士戴昺者，以封泥  
數百塊，乘船擲于潭中。良久，大龜徑  
長丈餘，浮出不動，小龜羅列水上，其  
受禍者即安，今名爲龜潭也。若服此  
文，存心中赤童衛持，作二十四息。書  
符可高五寸，闊四寸，作二十四，則使  
百禽惡獸奔走，止之則止，使之則使。  
不但虎豹，以此符封鬼廟屋，大驗。


太上曰：欲役鬼神者，先取鬼箭、  
鬼臼等分，各二兩，陰乾搗爲細末，用  
桑膿汁爲丸，如梧桐子大。每服七丸，  
早晨空心服之，淨水吞下，臨卧又服七



丸。至七七之後，一切鬼神八吏、六丁玉女，皆來朝拜，獅虎皆受役。七七之後，不可再服。凡服，取旺方氣一口，念呪曰：

百藥之精，眼見鬼形，役使八吏，并及六丁，驅使鬼神，立即通靈，延年益壽，永得長生，白日昇天，飛騰上清。急急如律令。

旺方謂春東、夏南、秋西、冬北。驅邪治病至誠用之，無不感應。



護身符

東嶽泰山，兗州之鎮，號曰蓬玄洞天。在泰安州。徂徠、長白二山為輔。封天齊大生仁聖帝。

東嶽



東嶽真形符

南嶽衡山，荊州之鎮，號曰朱陵洞天。在衡山縣。潛山、霍山為輔。封司天昭聖帝。主治水之要。


南嶽



南嶽真形符

西嶽華山，鎮之<sup>①</sup>，號曰總仙洞天。在華陰縣。地肺山、女几山，二山為輔。封金天順聖帝。主羽翼之事。

西嶽



西嶽真形符

北嶽恒山，并州之鎮，號曰總玄洞天。在定州曲陽縣。逢山、抱犢二山為輔。封安天元聖帝。主五穀果熟之事。


北嶽



北嶽真形符

中嶽嵩山，號曰司真洞天。在河南府登封縣。少室、武當二山為輔。封中天崇聖帝。主地土山谷之事。

中嶽



中嶽真形符

三皇內文遺祕

①鎮之：當作「雍州之鎮」。

(郭清點校、王卡復校)

# 086 太清金闕玉華仙書八極神章三皇內祕文

經名：太清金闕玉華仙書八極神章三皇內祕文。撰人不詳。內言及陳搏，當出於北宋。言符咒法術。三卷。底本出處：《正統道藏》洞神部方法類。

## 太清金闕玉華仙書八極神章三皇內祕文序

九玄之初，二象未構，空洞凝華，靈風集粹，神章結於混成，玉字標於獨化，挺乎有無之際，煥乎玄黃之先。日月得之以照臨，乾坤資之以覆載。於是無上虛皇命元始大聖編于金闕，次於玉章，內祕上玄，未流下土，降鑒有道，乃賜斯文。故軒轅受符，伏犧受圖，高辛得天經，大禹獲洛書，神道有

攝降，啓於茲矣。又玄元愍俗，歷爲帝師，人倫浮僞則垂道德，以示淳朴，鬼神雜擾則降此文，以蕩妖邪。斯又西臺而隱靈文，東華而祕真訣。其龍章雲篆，非賢不傳，戒之不退，用之保專。雖未得神仙之道，而亦在世遊行，已證地仙之果也。可以玉石作匣，五綵爲囊，祕藏丹房，而勿慢輕矣。

## 太清金闕玉華仙書八極神章三皇內祕文卷上

### 微正章第一

天皇君曰：太虛之先，寂寥無象，何以至精感激，而真一存焉，真一運行而元氣自化。元氣有中之無，無中之有，廣不可量，微不可察，氤氳漸著，混元無移，萬象之端，兆朕於此。以清徹明朗者浮之爲天，濁滯煩昧者積之爲地，平和柔順者結之爲人，至靈剛秀者化之爲神，錯謬陰戾者散而爲異類。皆稟一氣之所生，分萬殊而各位，雖群動糾紛而皆可聖矣。滅而復生，周而復始，道德之體，人神之心，感應不窮，未嘗倍於動用之境矣。故道者乃虛無之象，造化之根，神明之本，天地之源。其大無外，其微無內，浩曠無端，杳冥無際，而至幽靡測，而大明垂光，至靜無心而品物有方。混元無物，寂悄無聲，萬象以之而生，五行以之而成。生者有極，成者有虧，生生成成，今古湛

然不移，此之爲道也。德者，天地所稟，陰陽所資，經以五行，緯以四時，牧之以君，訓之以師，幽冥動植，咸暢其宜，恩流不息，群生不知此之爲德也。是知道德者，乃天地之祖也；天地者，乃萬物之父母也；羅天之尊者，乃虛無之紀綱也；八極之神者，乃天地之柄也；日月清明者，乃天地之度數也；萬星群象者，乃天地之變道也；五行六氣者，乃天地之樞機也；帝王國君者，乃三才之主總也；群品之類者，乃陰陽之移氣也；精邪鬼怪者，乃天地之影響也；靈芝仙藥者，乃精明純粹所化也。是知萬物之源者，皆道德爲根，象帝之先，真一之爲本也。

### 神宗章第二

天皇君曰：天地者，不能自有生也。生天地者，太極也。太極者，不能自運也。運太極者，真精也。真精者，自然運化也。惟神惟明，是曰虛皇，高居九清，乃司玄化。總御萬靈者，曰元始君也。元始君者，一曰盤古真人，二曰九皇都主，三曰八極神王，四曰大羅

仙總持。天形如巨蓋，日月未著明，星辰未著光，玄元虛曠，沉蕩彌冥，寂寂默默，混沌無名。上無所係，下無所根，上無八極，下無五嶽，上無變通，下無樞機，時元始君混成焉。常呼吸元氣，後生變通，感激真精，至於太極一氣，分判而成兩儀，上列三清，下分四大劫。又經四萬劫，地生剛須，剛須生濱牽，濱牽生龍，龍生水，岸石山血，血化爲大元少母。大元少母生能人言，容姿絕妙，常遊地藏之間，呼吸元氣。元始知之，與之通氣，然後日月有明，星辰有光，五運自分，六氣自正。後經四萬劫，元始化爲盤古真人，與之開其左心、小腸，後方能言。又經四萬劫，生天皇王，十三頭。天皇王生地皇王，地皇王生人皇王，是有三皇內祕之法，乃斯文也。然後布列五方，成五嶽之神，爲五行之主也。在天爲五星、五氣，在地爲五行、五嶽。東方有東嶽之神，乃陽木之君。南方有南嶽之神，乃離明之君。西方有西嶽之神，乃大著之君。北方有北嶽之神，乃靈宰之君。

中央有中嶽之神，乃軒轅公孫之帝。樞以萬象之主，掌以交泰之籍也。天中大羅八天三十二帝，八極有七百二十君，虛無三十六洞天，有八方消魔神王之神也。

### 上三霄：

蒼霄四洞天：日精寶籙洞天，內有日光之主爲正，太陽天子爲宗，以次神王，以次神仙，在其內者，並主一切世間照臨之事。月華明應洞天，以太陰星陽神爲主，月華天女爲正，其內神王，其內神仙，並主星辰交變、陰陽否泰、萬物休咎之事。南斗注生洞天，內有南斗長生大帝爲主，長生星君爲正，內有神王，內有神仙，並主水陸趣生錄貴賤之事，掌以群生生死之籍。北斗七符籙羅洞天，內有北極紫微大帝爲主，內有神王，內有神仙，並主齋醮罪福，除斷鬼邪、掃蕩精魅之事也。

風霄四洞天：寶華神光洞天、太素精陽洞天、金華西玉洞天、積英絕粹洞天。此四洞天神，四洞天仙，並主文明之職，掌握陰府之事也。

雲霄四洞天：太虛神應洞天、七明焰魔洞天、虛境刀利洞天、八極靜度洞天。此四洞天神，四洞天仙，並主以十善行絕之事，統以昇仙之職。此三霄之外，自下至上，以中爲度，乃天關之上矣。

中三霄：

煙霄四洞天：紫極靜梵洞天、神霄玉清洞天、陽明朱鳳洞天、東華青童洞天。此四洞天神，四洞天仙，並主水府地祇海嶽福地之事，三島十洲地仙散仙劍仙、積德積行修行上士之職也。

霞霄四洞天：羽風虛白洞天、太易和陽洞天、瓊雲上真洞天、太初集仙洞天。此四洞天神，四洞天仙，皆得陽明六化陰精大變之功也，主以列仙昇天，握以南宮之職。

氣霄四洞天：太始玉清洞天、太和四聖洞天、神霄消魔洞天、天華上相洞天。此四洞天神，四洞天仙，並以主運氣劫度，日月魂魄，星辰交失，人主興廢，天地威氣，風雨之集聚。自中以上爲度，此三霄凝精陽首，接宇宙，結

真氣，作宮庭，屬三境之所也。

下三霄：

景霄四洞天：太清金闕洞天、神真玄化洞天、木公金母洞天、三元極變洞天。此四洞天乃玉皇大帝爲主，內有神王，內有神仙，皆主天上地下陰府，三統七禦，掌握萬事之職也。

碧霄四洞天：碧虛太一洞天、紫英夜光洞天、精華太空洞天、玉陽無極洞天。此四洞天神，四洞天仙，乃玉皇大帝爲主，並職天上一切天仙天官、天人得失之事也。

丹霄四洞天：錦林洞天、雲林洞天、神精洞天、大羅洞天。此四洞天以地皇正主，天皇大帝都主，中有神王，中有天官，並主三清聖教，八極靈文之職，檢校仙書神訣之事。

九霄之上、八極之外，名曰大羅之天，中有玉清聖境，無上聖宗，無上仙君，大道之母，一氣之君，號曰元始也。中有上清真境，元皇大道君所居。中有太清仙境，太上老君所居。玉京之山，珠林紫實，瓊花鳳髓，以生其上。

中有八十一路，以通塵世八十一洞天。天中之祖聖、天中之祖宗、天中之神王、天中之帝君、天中之天官、天中之天仙、天中之天人、天中之大聖、九霄之神、五嶽之君，皆五日一朝赴玉京之山。三境之內，元始之前，雖八天九地萬萬餘里，遠近皆集，頃刻之間也。

五嶽之下，地仙所職者，北方真武真君。生伏塵世，祖積陰功，幼慕真風，少習道業，精達造化之源流，深測神變之妙理。遇玉清君授以斬鬼玉文天書十部，鐵鏡銅符，以蕩陰精妖魅，以散髮執玉清天丁劍，披八卦羽化衣服，踏天地龜蛇者是也。南嶽司命者，隋魏夫人也。東嶽司命者，乃紫微王夫人也。西嶽司命者，乃西王母第十三愛女也。北嶽司命者，乃唐臣崔府君也。中嶽司命者，乃唐臣李靖也。三元罪福官者，乃三茆真君也。太初之婦爲峨嵋山道君，漢張子房爲王屋山道君，主五湖四海三澗九江沈溺死人之事。王喜先生爲蓬萊上島仙主，大景先生涓子爲蓬萊中島仙主，許真

君爲丹臺宮主，管天下神仙功行之事。楊太君爲天台山道君，後爲玉皇佐書仙吏。邵堅爲匡廬山小有洞主，陳搏先生管蓬萊下島仙主，鐘離嘉管瑤臺宮仙主，又權南洲講法太師。是以七十二福地、八十一洞天、十洲三島小仙、九地隱士、陰府鬼官、酆都神主、山水小使、江海民神，修行仙子未昇天者，皆不上於玉籍，名號未列於金簡也。

### 鬼宗章第三

鬼者無形之至靈者也，虛焉神寂而莫識，其妙焉若谷應而不流。

東方八鬼：一曰陰尸之鬼，於東方，狀如幼童，多化作女人身，以從天神者。一曰羅達之鬼，一曰陽明之鬼，一曰赤風之鬼，一曰孤花之鬼，一曰大泉之鬼，一曰汶鳴之鬼，一曰神魔之鬼。此類八鬼，乃天神所役正直之鬼，以無私意害賊人之性命也。並居東方歲德之位也。

南方八鬼：一曰烏羅那鬼，一曰天大婆鬼，一曰地雷吒鬼，一曰精靈

鬼，一曰九尸鬼，一曰木井鬼，一曰孫道天神鬼，一曰牛女鬼。此八鬼各皆雞首人身，身著黃紗服衣，衣朱焰色，隨天神爲風雹之吏，並居南方火德熒惑之位也。

西方八鬼：一曰純生鬼，一曰無那魄尸鬼，一曰注迷鬼，一曰毫駝鬼，一曰蠻變鬼，一曰天星鬼，一曰皇吒鬼，一曰陰魅鬼。此八鬼正無私邪，並隨天神處斷妖邪，斬殺不平之人，並居太白之位也。

北方八鬼：一曰夜叉鬼，一曰伏羅鬼，一曰人帝鬼，一曰祥化鬼，一曰波離鬼，一曰魔吻鬼，一曰執殺鬼，一曰金鳳女子鬼。此八鬼乃北方北帝之用兵，正直無曲，常隨北帝君以蕩掃諸耗魅，其形狀若天神，並居北方危宿辰星之位也。

中央八鬼：一曰僧吒鬼，一曰鳴吒鬼，一曰尾星鬼，一曰海殺鬼，一曰六丁鬼，一曰六甲鬼，一曰玉女鬼，一曰五道鬼。此八鬼亦隨天神，以從五嶽，追取死人、送變禍福者，其鬼狀若

神形，並居中央鎮星之位也。

天皇君曰：此五方四十天鬼乃五嶽之正吏，五方之正兵，天神之用虛無之正氣也。助天地之德以使風雷，從五嶽之佐，以掃奸詐。其五方之鬼，每一鬼下各領吏兵三十萬，助天地之正氣也。凡欲役使五方之鬼者，亦有法焉。如金日者使西方八鬼，木日使東方八鬼，火日使南方八鬼，水日使北方八鬼，土日使中央八鬼。欲使之者，先書天皇真形符於黃羅之上，長五寸，闊五寸，以朱書爲上，燒作灰，面望天門以香湯吞之。其符入腹，精神立變，萬鬼見之自伏，萬神見之自歸，以爲護身而免外害矣。然後於其日方書一鬼名於白紙上，在於面正望天門，念天皇上帝呪三遍，取氣三口，吹於印上，用朱砂塗印，面望其方，大呼鬼名一聲，用印印於紙上。鬼名一印，其鬼自現，或六丁、或六甲玉女。諸鬼細言問之，一切所告之懷，無不遂意。或爲輕風，或爲薄霧，或作雲霞，或變龍虎，或化萬物之形狀，或化山林巖石之體，或爲羊

馬，或作飛走，或乘雲鶴遊戲方外，或促地遊四大神洲，觀一切萬事。欲斷不平之事，取劍一口，長三尺二寸，鋒突刃利者，乃左手執劍於天門，右手執天皇上帝之印，念天皇御呪三徧，取氣三口，吹在印上，朱砂塗印，劍尖一印，擲劍在空中。其鬼以知其人意，雖千萬里重隔江海，頃刻之間，人頭落焉。

天皇君曰：昔有古神人致虛先生，未行內妙，先達變通之理。將入初程，遂意遊四海之外，是以攝御萬靈，同臻衆妙者，俱不出於斯文焉。學夫遭遇，專以虛白，勿得情欲違犯也。將心歸正，志守太和，忘意抱淳，漸入仙宗，如有六塵不息，牛牧不忘，情欲不斷，俗操不絕者，與吾文異矣。

#### 精宗章第四

天皇君曰：五方天鬼之外，一切小靈並屬精魅之宗，雖怪之異，無以助正氣之德，皆屬私神魔精之類，以吾之御印，以吾之御呪，隨即見形，可以役使如家奴僕焉。吾之法者，使其神也，如烈火焚其秋毫，役其鬼也，若海波漂

其枯葉。正神之外，正鬼之外，有七十二精，後以細述焉。此鬼天不收，地不管，五嶽不御，山海不拘，不從大德，不助真風，好殺好亂，姪邪食血肉，不正之鬼，號曰私神名也。

一名魔魂吞尸精，形如二八女子，丹臉朱唇，綠眉紅頰，目澄秋水，體凝脂膏，好着翠藍，服頂以蛾華冠，人見之多認爲仙女。化成樓宇，以妖氣變化宮庭，搆人生成疾患，亂我之玄風，使修行之人不康矣。其鬼精姓任，左眉間有紫毫一莖，長一寸許，本是萬年狐狸，歷世之久，變化爲姝色，惑人者多矣。修仙學道之士，入山忽見之，但呼其小名曰摩魂吞尸鬼，其鬼聞人言其名而身自滅矣，故曰知根不聖也。

一名五統私神之鬼精，其狀如一美男子之貌，獨一足，好遊世間，姪亂生人之室者，有連年累月不去者，本出於一人家家奴，後死有五統之力。今世之婦女，言有夫兼寢，生人怪笑怪哭，忽死忽生，空中自笑，忽與人言，遣發不去，著魅陰人，或偷盜外物以助家

者是也。欲去之者，用黃紙五寸，朱書天皇真形符在上，作灰，用香湯，令婦人女子望天門吞之，執天皇上帝印於天門，念天皇呪三徧，取氣三口呪入印中，用白紙書五統名跡在上，以朱砂塗印上，印於紙上，令婦人女子用緋袋戴之於頭心，即時滅矣。

一名猫毛神，狀如三十餘男子，皂衣赤足，雞爪人形，多着陰人，詐稱通天神之號，善知未來之事，今之師婆是此神所着也，本出強魂枉死之人也。

一名血尸神，神形如鳥毛之猴，朱目白眉，或化蛇，或化蜘蛛、蝦蟇之狀，多着婦人身中，以食人五臟精華，飲人肌血，令人日瘦，作病命亡，其鬼却化本形復入別人體中，今之男女以傳襲癆病是也。其精本出吞毛之國老犬精也。

一名猪角白腹鬼，精形如七八歲童子，紫衣烏足，其形多化爲穀水之狀，人誤食之，令人作病，無言默語而至死者是也，號爲不語病。修仙之士但欲飲水，映面無光，或欲飲食，見食

變色者是此怪在內也，慎勿食之。其鬼本出於產死之強魂也。

一名女叉精，狀如羸惡婦人，着青衣，於夜間多着小兒腹內，以盜小兒之魂魄，令小兒夜啼是也。

一名條了精鬼，總領三四卒小兒，形狀不等，有驢首人身，黃衣面赤，執一囊服，內含邪氣，愛遊八方以散時癘於人。今人言天行病者，乃是此鬼也，乃變瘍氣。其鬼本出於五行不正之氣，是人強魂所化也。

一名咬拆曲石神，狀如少女，天姿姝色，或變爲人屬，愛夜寢，若夢陰陽，相奪人之真氣。其鬼本出人世採陰坐禪不成之輩，又名清靈善爽之鬼，今人言夜夢鬼交是也。天曹不收，地神不管，天地私神，八山之精也。

一名雷聲急，狀若伏虎，花斑綠項，愛夜遊高峰之上，於人無患，乃萬歲銅礦之精是也。

一名春瓊泉，狀若二八女子，三髻，黃衣長裙，赤足，多執火夜行，不過數步自滅矣。乃萬年金苗之精也。

一名束少年，狀若小童，頂帽撒履，衣白貌秀，多日出時執一禽魚，戲遊於人路，乃萬年銀苗之精也。

一名雙石尸精，其形朱髮披散，緋衣碧目，身長丈許，多在山中，與人相應，或叫人姓名，多於石堆嶮峻處崩崖滾石，以打損人者多矣。本出山中石打死無主孤魂之精也。此乃天地不收，江河不拘，多害生靈，損人性命。

一名魚白水耗精，凶惡湫池多有之。其變形狀，若一陰人之覆浮於水邊，人見之救拔而多溺於水，此怪乃水溺死強魂之精也。

一名朱蛇白面精，乃鬼形多遊水邊，口叫要人替聲，人見之行十步許，其鬼以氣噴人，其人不由自己心，乃投身於水也，此者亦水溺死之強魂也。

一名王玉真，形狀如小女，帶峨冠華服，骨秀顏姿麗，青衣朱履，常領侍女兩三人，其鬼多處空宅，石巖、圍壇、深山人寂之處，以魅少年之君，十有九死。凡見之者，右眉間有青毫一莖，長二寸許，好歌曲，善詩詞，以至昏暮好

惑生人之心，今之山谷中甚有焉。其精本出於三千年白蛇之精也。

一名秋草葉精，其狀乃少女之形，貌潤體紺，紅帛裹髻。或見相逐，常有五七人，能化水爲酒漿，善吟詠。此怪以大湫遠路孤靜人稀山谷花木間有之，其怪本出於年深拱鼠之精也。

一名朱眉魂，狀如惡鬼之形，兩首一身，馬足虎手，赤體無衣，長數丈餘，多詐稱神人，又誑爲土地，人不知其根者，以香火供養，積日之久，無不賊人之命矣。其精本出於年深者樹之精也。

一名霍公孫，狀若飛鳥，兩首一身，錦毛赤鬚，大小如雞之形，其怪亦能呼吸人之精神，漸令人死矣。此乃數千年伏翔之精也。

一名海僧尼，狀乃一魚，形如女子，面首甚有姝色，骨冠骨髻，遊於山水，或入河海水中。此怪見人多吐氣，以混水氣向人，人着者無不死矣。故人謂之曰有魚婦人頭，善能言語者是也。此乃年深人魂之精也。

一名鹿身戒尸精，乃人形也，若女子衣白孝服，多啼哭於水邊，人見之欲問，令人死矣。此怪乃千年鯉魚之精也。

一名惡毒鬼，其形如人狀，人多不見，誤入水中，在水執人脚足不能出，令人至死，不能得出矣。

一名黃孝白面精，狀若小蛇，朱鱗，有足五隻，多遊於井邊，人見之以爲投井，使人自然生心不由己，而投井死矣。此乃投井之強魂所化也。

一名星吒婆，其形黑氣，盤結於井口之空，人或見之，無不落井死矣。此乃井泉之鬼冤魂所化也。

一名全全幽魂精，其不見形狀，如在水底，人多聞哭笑之聲者是也。能興雲霧，亦能賊人性命，天地不收，五岳不管，此怪本出千年蟹之精也。

一名夏佳毒精，形若白蛇，當頂有一角，多藏婦人腹中，令婦人面黃髮脫者是也。或臨產難，化白蛇之形而作光去矣。此乃臭死屍陰毒之氣所化也。

一名黃遠天，狀若鬼形，多藏婦人腹中，故隔腹與母言者是也，其婦人之命亦不長久矣。此乃千年草木之精所化也。

一名張彥最，狀若一婦人，緋衣亂髮，好於宅舍中盜物，而人或見現形者，此乃冤靈死鬼之魂，本人家奴婢所化也。

一名劉遠橫，狀若嬰兒，逐物變化，多着淫子之身，故人家男女以供養淫子，後有靈驗，致得妖怪變成凶禍者，此乃本是年深淫人所化也。

一名高陽哥，狀若少女，容姿甚羸，多好姪亂，其或與人交感，世有男女執愛死，而後復有魂來着人成事者是也。本出死人中強魂所化也。

一名月娘精，狀若婦人，好姪亂色慾，多着淫神之體，令人或入廟宇，見廟中女流之神貌端容潔，心生愛慕，忽至昏暮來宿以亂人者，乃淫神所得精化也。

一名馬元師子精，弟兄五人，狀若鬼形，赤體無衣，一鬼將一扇，一鬼將

一小葫蘆，一鬼將一氣袋，此是四神五怪，往往不利，善馭風砂，遊歷世間以着生人，令人作寒熱，欲飲涼水，今虐疾者是也。此乃五方五耗之鬼也。

一名杜昌精，形如黑鼠，好遊人世宮室廳宅中，以異耗矣。今之倉庫房內無故物失壞者是也。此乃是千年老鼠之精也。

一名社鑲孝屍精，形如朱鼠，大小不測，藏於黑處，以氣遠噴人影，人着其氣，無不患惡瘡而死也。此乃歲深故物之精也。

一名黑花精，形如一犬，非有犬毛，赤皮六眼，多藏孤靜處，遠見人以一氣噴人，人着，令人心內忽然煩悶，吐涎吐血而成其疾以死矣。此乃宅中不正之神精也。

一名牛首百都精，肉角當頂，青面朱目，鷹背虎項，馬足人身，多遊山谷以殞人之命，此乃師子國一老馬之精，始得龍珠，後變形不正，次化人身，散入八方，今之山谷多有之矣。

一名桂龍晚天精，其狀龍形無角，



善役雲霧，多遊水塘中，好食生人腦髓，此乃西川龍移山跡水怪精也。

一名鄧巢黃天精，其狀共一大龜鼈，而當頂有角，四目，好遊水中，作壞堤岸，碎河口，亦多從足心、手心飲生人腦髓，此乃水怪之精也。

一名曹洪天眼精，散髮一足，若女子之形，以遊山谷，見人多笑舉足，乘風能飛，吐氣變化，善能喫生人之命，此是天怪，本乃萬年枯柏之精也。

一名桃奴新，其形一黃腫婦人，着淡衣，夜執大出，晝亦現之，多在此巖窟穴，或久靜宅房皆有焉。人見之無不疾病，此乃千年蝦蟇之精也。

一名宋丘孤魂精，狀乃一婦人，多遊山林，常哭於草下，有人問之，多言我是良人家之婦人。因循其端，無不成禍矣。識之者其鬼精無左耳，此乃千年野狸貓之精也。

一名吳愛愛精，狀乃女形，口稱良人家，常抱一小兒，或携一兩侍女，好遊山谷，好魔障修行人之心，欲學道者不遇此書辯邪正，甚有亂而有損也。

其鬼左臉上有赤盤痕一箇，若豆許，但見呼其小名左臉赤盤痕吳愛愛精，其鬼精見知其跡，而非用法印自滅矣。此乃千年頑石精也。

一名左守全邪精，狀若一天神武夫，常持一利刃，携一人頭在山中大叫，若巨虎烈石之聲，人悞逢之無不死矣。此乃山中一死雄魂之精也。天地不收，常爲八極神邪之精。

一名老僧精，形乃一老僧，披褐弱態，手携經文數卷，於山谷、或於小道邊，左目赤色，眉毛若猪鬃，見僧人作一善事言談，生人與語，無不遭其食啖，此乃南雲山一老僧，得妖氣而化此精也。

一名使賣羊頭精，四角人身，色青，多遊四海以姪生人之室女。今世之人忽有婦女晝生夜死者，乃此怪所害，亦乃千年海犬所化也。

一名陳狂尸馳精，虎首禽身，肉翅飛空，以喫生人之肌肉，此乃萬年江猪所化也。

一名吞魔小直精，多戴金花冠，素

色服，狀若神人，能噴妖氣化爲宮宇，以取世間有姝色者婦人在內，好血肉，求醮祀，姪亂生人，假託神人以要瞻敬者多矣。此乃天地厭神，本出老雞之精也。

一名郭華小神精，鬼形人面，布衣深目，常携一小刃突出，多遊山野，人或見之，以尖刃利面吞啖血肉。此乃不正之地小祇之精也。

一名山嶽孫青精，黃衣，狀如老陰之人，多現於山谷幽野中。左手常携一禽，五彩錦毛，見人時以放之，人見其禽錦毛可愛，以觀之，無不卒病。此乃幽谷一老烏鳥之精也。

一名黃女精，狀如一小女，雙雲髻，紫衣，人夜多見問之，其鬼則化爲風以取人，歸食其血肉，此乃年深師子之精也。

一名周德大味精，狀乃壯女之形，頂七星玉珠冠，衣彩色五花服，雲鬢紺潤，眉目似秋波，常携一兒枯腦骨，見人將枯腦骨化爲繡囊，人見之無不觀矣。其女有語曰：我本閨門不出，偶

思野色以戲步至此，人多迷性好色，如飢龜飲血，無不亂其生人，既與其合，乃骨膏而粉碎也。此鬼於印堂中有斑點一箇，如豆許，乃天地記也。此乃江中老龜之精也。此鬼極熱之方多有之，天地不主管，八洞不收握，八世散魂精也。

一名漆漆小耗精，狀乃一女形，素結髮髻，朱衣紅履，瓊貌花容，善歌曲，好吟風月。或至月夜，或至日暮，多言我乃君家之鄰女，而少年之子見而喜交，積久月深則令陽魂日消而死矣。此乃人家未出嫁閨魂之精也。

一名蘇小妖精，狀若小男子之形，或在昏暮，或早，出現無時，見人相離而行，與人爲禍，見之者無康矣。此乃年深傷寒枉死之鬼也。

一名園郎姑味精，形乃一陽人之狀，白衣或黃，於夜間呼人神魂，人應之無不死矣。故今之人世，或早暮、或夜間出遊，或居山、或在房舍、或聽似有人叫之聲者，而不出三聲，一聲大，兩聲小者是也。此年深函板之精也。

一名楊花鬼尸精，形乃一男子之狀，白衣或青，四目無足，常夜遊靜處，以作人叫呼，口稱疼痛之苦，人或聽將爲實病之人，或有問者應聲，人即死矣。此乃年深樞棺之精也。

一名黃河大小精，常有三五人，或七八人相逐，或無頭足，或無口鼻，或無眼耳，或無臂肘，或聚於黃昏火傍，人見之多生大病於身田，此乃年深無主飄殍之魂餓鬼之精也。

一名騰蛇白虎小耗精，狀乃女子形，花衣冠，好容貌，多好夜遊，晝巡於道邊，或言我乃良家之女，路行辛苦力弱，欲要人背而行之，人多以爲好事而不知禍埋身矣。此乃年深一老兔之精也。

一名昏形魍魎精，形乃一鬼之狀，長數十尺，闊三五尺圍，兩目如火光，長至昏暮，或夜間，獨立水邊，或野路上，人見之無不有小疾，而亦不能害人之命。此乃水邊野路一塊石、一塊土或枯朽之木，得水濕之氣，積歲而成此精矣。

一名嘉夫精，人狀，若少女，孝服白衣，多見於廳堂。夜暮或哭笑、或歌吟、或獨行、或三二人，此精現處，人見之無不死矣。此乃故宅中陰人伏屍之鬼也。

一名兩林青面精，身著白衣，髮未皆散，多令人家門戶作聲，宅舍不安，此乃宅中陽人伏屍精也。

一名李童，形如室女，麗色容姝，端身清秀，多遊夜間，朱衣高冠，善能詩曲，舉步吟詠，媚人者多矣。此乃年深燈檠之精也。

一名故奴僧精，形若婦人，孝衣或彩衣，夜出燈下，以物帛覆頭面者是也。亦能言好弄燈，好搭人咽喉至死，此乃掃帚之精也。

一名殺木魂精，其形如三二人，愛更深出，弄行步之聲於宅中，亦多注病，能害小兒，此乃年深器物之精也。

一名土玉精，狀若白鼠，或鬼形，常夜深愛拋擲瓦磚，此鬼令人宅舍昌盛，此乃銅鐵之精也。欲取之時，用白紙一張，上書天皇呪印，作紙撚注油，

遇夜點然于所疑之處，別用燈照之，有物處其燈焰垂下，天明發之，必獲其物也。

一名大羅殺鬼精，形無定，多知吉凶，於夜駕禽入宅，或房室作聲，向人或下淚，此乃家親未託生者，天神不收，地神不管，世之所謂邪靈化精者。

一名鐵雲羅耶精，善施雲霧，形若小兒，腦後有目若電光，手足如禽爪，夜現火光，值早多藏婦人腹中，其家不昌，乃乖龍未登位之精。

一名趙氏宗精，狀若男子，衣物不測，令人夜寢若夢非夢，忽見人來壓身者是也。人見之無不成病。天曹不收，地神不管，無籍而化精者。

一名賀度口精，狀若男子形，多現於穴窟，見人吐氣，着人令人作病，走注疼痛，手足如折不止，世以爲虎咬者是。此乃年深深山虎精也。

一名灰虎神精，虎首灰驢形，四足有爪，目如電光，善變化，通風處無不到，好傷人命，啖小兒，此乃年老陰人之精，得灰力能變化。

一名唐永鳴精，駝首人形，紅衣赤足，手執小刀，常遊厨竈盜飲食，無故冷殘，動者人再食，無不作疾者。

一名佞女子精，人形五髻，四眉四目四手，衣黃、禽足，多遊人世，能吸人血，令人睡覺，見身青黑點，二三日不消者是也。遇此令人有小灾小禍。此精乃深山年深毒蛇之精。

一名鄭達伏，其精無形狀，多於宅中忽現，火塊相逐者，乃年深門側之精也。

一名氣祿血著精，其狀如火焰，相照如燈，或三或五，相附而行，多暮夜現於古壇塚，道路曠野而皆甚有之。其變化或大或小不定，人若遂之，或有或無，今人所謂鬼火者是也。此乃本出閑室街市山崖之處，或生人、或死人血、或禽獸之血，在地三日不化，得陰陽盜一靈氣在內，而後變化作此。如陽人之火焰紅，陰人之火焰碧有煙。欲要看者，執天皇神印於天門，念天皇呪三遍，取三口氣吹在印上，望有火處以印照之，其鬼火自來。再印印之，其

鬼火自滅。而看其形狀乃破，器內盛赤血水，或皮或毛、或故帛上有鮮□□□之也。

#### 天條章第五

天皇君曰：天條者，八極上法、九霄玉文之條也。以擒天丁、斬大神、斷祿精、除邪耗、殺鬼魅，掃不祥，而莫非天條之正氣大焉。夫天條者，斬掃其祿神也，如烈火焚一秋毫，除蕩鬼魅也，若大海漂一朽葉，無不蕩除。法曰：凡斬斷邪精鬼魅者，但見其形而言其所變化之根，道其姓名而自不敢去矣。然後依印法，令五方正鬼數名，以驅其精邪，以就斬鬼壇上。或令其精邪受四大地獄者，各隨其意。如斬之者，取斬鬼劍，以左手執之于天門，念天皇呪三遍，取氣一口，吹於印上，用朱砂塗印，印劍尖一印，擲劍空中，其所使之鬼以知人意，良久斬訖，而見其精怪真形矣。

天皇君曰：其壇須用朱砂爲界，三層，或石上、土上，須長五尺，闊五尺，凡見一切精魅之形，須天條以絕其


根，而免後魅之惑矣。如見精不斬，見怪不除，見病人痛苦不救者，亦為心不慈悲之罪也。故除精怪於他方，斬鬼魅於泉臺，驅邪耗於法壇，以助真風之正，而不令魔鬼害我之民也。

天皇君曰：每遇一精鬼，急燒白錢半束，與其所斬之精鬼也。

天條四地獄斬斷精

邪正一天皇壇圖

如欲斬之，取其印，呼鬼姓名，驅邪精而斬之也。如未斬時，寄封地獄，毋令走也。



天皇鎮壇符式


此符安於西北乾上

(原缺符)


此符安於東北艮上

(原缺符)


此符安於東南巽上



此符安於西南坤上



天皇神印章第六



天皇君曰：凡受《三皇內文》者，

乃受三皇內印是也。天皇上印長四寸，闊三寸；地皇中印長三寸五分，闊三寸五分；人皇下印長三寸，闊三寸。取一段雷震棗木心，不然車軸木亦可，料印材之許。以受醮之時，安於天醫之方，以隨壇供侍壇四方。先擇一淨

室，外絕雞犬女子婦人，內正其神，須清淨沐浴以面拜八方，然後開印。雕印之日，有風吹砂走石，聚雲霧靄，四方雷霆鳴吼，雨聲聒者，乃開印之威兆也。其印既以開成，須用緋絹錦帛作囊，石水作匣，祕於巖宇，藏於石室，以順天理也。如欲施法用印，先以焚香，暗拜三皇高真五嶽以請印，使役天下鬼兵，斷斬世內精魅妖神，以天皇君曰其印方之威，統攝萬靈而無不臻焉。以念神呪，吹之於印上，以天皇印上，印星則星落，印月則月缺，印日則日蝕，印雲霧則雲霧收藏，印風雨則風雨停息，用印召五方之鬼，而求風無不風，求雨則無不雨，此天皇上印之威力也。以地皇中印，印地則地裂，印草木則化為灰塵，印飛鳥則墜地，印虎蟲則死伏，此地皇中印之威力也。以人皇下印，印一切病患，無不康矣。若復有人有一切凶禍，以香湯吞印，無不吉慶，人壯祿旺。以印印之後心，則其人立便死，再印前心，則其人立甦，此人皇下印之威力也。故三皇神印，三元


治攝道中，尤有其大。人欲驗其徵者，取一七歲童子，用朱砂塗印，念呪印前心，印之，其後心痕出矣。然故三皇內祕文法驗，若無此神印，邪無以畏之，有此神印，則百邪竄形矣。

天皇神呪章第七

呪曰：紫微大帝，北極天神，魁魁魍魎，魍魎星，八洞天丁，五嶽獠兵，大統大將，水火九靈，七曜七宿，黑殺天蓬，三霄上相，十極高尊，天英天直，四殺黃君，天心天內，天輔天衡，南靈神將，寶印奉行，九土童子，鬼王天真，天柱天時，天壬天丁，二十八宿，十二時將軍，月直使者，日直神童，隨法隨勅，入吾印中。急急如律令。吾奉大羅上仙天皇大帝君勅攝。

天皇真形符章第八

天皇真形符式



此符長五寸，闊五寸

天皇君曰：真形之跡者，乃吾之真形玉籙篆也。用丹砂新筆書符于


帛，以戴貼之，精神立變，萬鬼自滅，百魔束形，群妖潛跡，而神聖臻焉。攝法人吞之於腹內，其鬼神乃現真貌，真為天皇之形也。以此者故得天神歸之矣。

天皇君曰：世海之內，凡有一切

病患不痊、災禍干己、久疾篤困、危厄頻年、卒得一切病患不能伸者，以朱書此符，燒作灰，用香湯吞下，無不速痊疾矣。

三皇授法壇儀式章第九

壇方八尺，石坵為上，土坵為次。



請三皇五嶽表式：

具州縣鄉村，法位，臣姓某上言：

臣某少思仙道，攀緣神風，若慕真玄，欲求大慶。今於某年月日，宿遭真契，得遇金書，妙化以懷，輒敢私用。謹具表文，上請三皇大帝、五方五帝仙君，右臣某仰願大度慈師高真憐憫，慧光二布，豈有不燭之方，慈風既散，奚有獨偏之地。伏念臣某螻蟻之情，苦海之命，含靈之性，惟焰之身，今者靈坵已備，瓊花皆鮮，上祝天君丹光早降，靈坵列位，與弟子臣某，乞賜證盟，敢受玄文之道。

年月日，具位姓名，謹具表狀。

若以靈坵就祭，自亥時啓，行至子時，面望天門，肅整衣冠，拜訖，燒請醮表文，少時覺異香入鼻，光彩爍目，虛空流光，倏忽鸞鶴飛空，身寒巨顫，神明怖懼，此是仙君眾聖降坵之兆也。仙君降坵，其中茶酒變色，當此之際，整肅衣冠，八方拜坵，不得怖懼，須內正其神，安心定意，以祝上聖，言臣某今受天文祕書，願賜證盟。自子至卯

時，方得收坵。面望天門，燒錢五分，一切錢馬於鬼門，用一小狀燒白錢三束，令五方四十大鬼，以衆收之。然後用印施法，攝鬼驅邪，封山居洞，一切有無，皆自然而感應也。

### 三皇劍法章第十

天皇君曰：於甲子日，用明鋼三斤六兩，打作一劍，長二尺四寸，用金鏤滲天皇、地皇、人皇真形符在上，用素帛纏之，以索墜入年深人不取水者井中。四十九日方取其劍符，以攝地祇神靈在內，其鐵自白，刀血紅，人鬼見之無不攝滅，名曰紅泉鐵，神祇所化之劍也。以封於寶匣，欲使之，如說法之語，響應而神威無不應矣。

太清金闕玉華仙書八極神章三皇內  
祕文卷上

## 太清金闕玉華仙書八極神章三皇內祕文卷中

斯文玄闕無極洞章，乃丹臺瑤林之先，雲華霞秀之始，天中大羅自然寶書也。其紫書瓊札皆上帝高真吐紅氣以成文，噴丹輝而結篆，祕於紫微，標於璧玉金華秀簡者爾。中有居山之法，有大洞八素神童，使自然狼虎不傷，毒蟲不害，觀靈芝，明仙藥，辯邪正，識仙賓，知如化伏神策，而俱不出此焉。有獲遇之者，以為深祕。

### 地皇神印章第一

地皇神印者，以樞權塵世大地之中，一切萬事無不統御焉。故印之大旨，於法之先矣。其有不可外呼吸，且如太初仙藥化形，假物為形，託名成象者，多有或作禽獸形，或作男女之形，以印照之，而盡敗壞也。靈芝瑞草，變形作化，以印照之，而皆可至矣。

### 地皇神印靈極讚：

魁風八殺天神伏，九玄四目老翁歸。太初羽化大首柄，陸地邪精見攝威。湛湛天書為神祖，玄玄外更無餘。可期玉華靈光篆，絕跡神風掃耗除。寶印瓊龍上相樞，機神統御最當驅。天祕魔魅多方外，印刀仙靈洞碧虛。龍華秀寶金文篆，群祇一見自束形。太極紫星伏三萬，蕩蕩除邪辟列精。玄靈假吾神印力，一助真霄掃怪無。淨地凌空神鬼怖，對山馭氣最為樞。靈芝化形千百體，仙藥成禽作獸形。以印照空無不攝，自然大化豈容情。

### 地皇呪曰：


南方七星，地戶六丁，六甲玉女，奉吾印行，急急如律勅攝。



地皇印圖  
長三寸五分  
闊三寸五分

地皇真形符篆章第二

地皇真形玉篆符圖



長四寸  
闊四寸  
用黃紙  
朱書篆

地皇君曰：凡居止山洞住庵，或幽棲林谷，每日卯旦，書此真跡神符，作灰，用香湯，望天門吞之，則令人益壽延生，而邪氣不干矣。并居山之人，收一切仙芝靈藥，而以符吞之入腹，用印照之，其藥自來也。

修士居山所宜章第三

地皇君曰：群類之中，惟人最貴，故生物必有其本，為事必有所宜。以末學之夫，忽生善念，未達真理，不明玄奧，便入名山，乃遭五陷八殺之凶，或入山不測之禍，蟲殘虎傷之害，以至死者多矣，而不知居山自有法也。

訣曰：寅辰生人，居乾坎二山為福地。卯巳午生人，居坤山為福地。申未生人，居艮山為福地。酉生人，居震山為福地。戌生人，居巽山為福地。

亥子丑生人，居離兌二山為福地。凡居正東、正南、東南，雖有福地合居，或有山谷當面，於春夏之間，見樹本不榮茂，草苗似乾焦之色，而石木不潤者，此名炎殺之山。入山之人居之，多遭山火之難矣，以別居所宜之山也。

入山醮儀山主章第四

式山  
樣門  
飯茶酒白錢

地皇君曰：大山有大山神主，小山有小山神主也。入山修道之流，而不醮請其主，如人無故入人家也，其神與人之情則有所遠矣。凡入山擇洞居庵，至山門下地上、或石上，鋪淨布巾一條，素食一盤，茶酒各一分，供養少時，燒白錢一束，以小狀一紙投火，司燒之。其狀內言：某年月日，令入山求長生之道，不敢私住，故醮請山主神靈，願垂護祐。如此方可入山居住，若有所倚託也。

高玄生氣擇洞章第五


地皇君曰：凡人入山所居，雖然福地，而亦擇其洞府也。福地所宜，山

中正東有洞室，門高五十尺已上，三丈已下者，乃神仙洞府也。如門高五尺已下者，乃陽煙之庵也，而不可居。洞高三丈已上者，乃雲胎之島也，雖居之，亦有強陰厲陽傷人之魂神也。正南有石室，門高五十尺已上，三丈已下者，乃曰洞府也。石室東南者，霍明洞府也；正西者，名曰魄窟；正北有石室者，名曰魄窟；東北有門，名曰石毒也。石城洞府居之，自有祥瑞感應，靈芝丹草出現也。若穴窟中居者，非獨精邪之患，皆天地之生氣，離神仙之血脉也。若無神書，其禍大矣。凡入所宜之山，山無洞府，見東南木榮石潤草滋，同商一字，水三折者，亦可翦茅作庵，而修命蒂，亦乃神仙之福地，必出天官也。

封山元天淨地章第六

地皇君曰：既居仙府，須封山淨地，不令邪精犯我之境也。取山桃板六片，長七寸，闊三寸，厚一寸，面上存皮，一面光，以新筆香墨，各書六丁神符一道在桃板上。用朱砂塗印，左手

執印，向天門念地皇呪三徧，取氣三口吹於印上，用朱砂再塗印，印於六丁符上，各印一印，將桃板鎮安於六絕之地，自然精邪滅跡，虎豹潛形，飛鳥不鳴，萬類不現，久而居之，神昇上界之道。



辯識仙寶邪神章第七

地皇君曰：久居名洞仙府之中，日深歲故，志道精純者，自有仙寶神官降矣。以辯之者，如早暮忽有彩霞流虛，真香入谷，瑞色祥氣徘徊者，乃高真遊矣。以志祝恭心上告天皇，而求解脫之道，其高真慈愍，而自有降教也。如或遊巖谷溪際林峰，忽見雲光

圍覆，而異獸祥禽徑集，皆在左右，忽有紅服朱龍者，忽有黃服玉佩者，或有紫衣六妹者，或有執節持旛張蓋者，此乃神仙降焉。如林谷山峰虛空之中，忽見黑氣皂雲，中間徘徊冠巾服飾，或寡或衆，多相恍惚者，乃邪神會集也。故神仙欲降遇之地，先有香風透谷，入鼻腦也。如非神仙者，無香風之驗也。宜慎之，勿自觀之也。

辯識三十六種芝草變形章第八

一曰仙足芝，紫星。一曰丹芝，朱星。一曰紫芝，黃星。一曰景芝，青星。一曰雲芝，元星。一曰天芝，黑星。一曰地芝，綠星。一曰煙芝，褐星。一曰神芝，有紅文，如纏緋線。此九芝者，皆一性之物也。其物本出名山，萬萬年精神靈石之氣所結，大小不等，皆色白如寒玉，夜於巖谷，光射太空，往觀之如石，其色潤鮮，上有星點辯之也。

綠花。此九芝，皆一性之物，其根生於江海山水、大小河邊，本出山水秀氣積而所生，狀若細麻葉之形，高三五尺，冬夏不凋，其上常似有雲淡氣相覆，以其色花辯之。

一曰瓊芝，花形。一曰柱芝，木形。一曰花芝，禽形。一曰金芝，人形。一曰玄芝，雲朵形。一曰錦芝，獸形。一曰青芝，無形狀。一曰濕芝，水形。一曰風芝，樓塔之形。此九芝者，乃一根之性也。多生石山洞府石室中，其本出雲根煙梢凝結而所化也。其大小不測，狀若石乳，生成龍虎飛禽人物之象，貼於石壁也。色如朱火，晝夜有光，香風氤氳而有形象。辯之此二十七品，乃瓊花金蒂羽化仙芝也。若得遇而採之者，以服訖，上昇雲漢，點凡骨作仙骨，化仙人作真人，超凡入聖，身騰九霄，故古仙有言靈芝入腹，白日昇於天上者是也。

一曰雲精芝，如雲朵。一曰黃芝，如犬形。一曰英芝，狀如樓閣之形。一曰瑞芝，鴛鴦之形。一曰秀芝，鶴形。一曰華



芝，花果之形。一曰木芝，如木蛾形。一曰草芝，如虎之形。一曰上芝，人形。此九芝，乃一根所化成之物也。形狀不測，多生於枯木朽株，宮殿庭室水棟之上，而有之也。若採服之，可以延年益壽，有小補矣。

### 辯識三十六種仙藥形像章第九

一名朱砂精，形赤。一名曾青精，形青。一名石膏精，形白。一名雄黃精，形赤。一名硫黃精，形黃。一名空青精，形淡赤。一名白礬精，形綠。一名雲母石精，形黑。一名石砂精，形紫。此九種仙藥之精，皆金石所化也，形狀如一大鬼，朱髮紅眉而多現矣。然各有體色，辯焉。

一名烏石精，十六足。一名禹餘糧，二十四足。一名井泉石精，十二足。一名鹽土精，十足。一名雌黃精，無足，肉翅，善飛。一名滑石精，八足。一名陽起石精，六足。一名石脂精，四足。一名水銀精，二足。此九種石精，皆金石所化也。形如一蝎，大小莫測，色如白練，其有無足以辯之也。

一名人參精，如小兒，素衣，手執花。一名茯苓精，如小兒手執松栢。一名枸杞精，如小犬，夜鳴山谷。一名大黃精，如女子，執衣裸形。一名琥珀精，如一虎，能飛空。一名萬年老葛精，如龍無鱗甲，多藏石穴。一名老藤精，如肉塊，破之如膏。一名黃精精，如小兒手執黃精苗。一名蒼朮精，如小兒手執蒼朮苗，多遊高峰嶺上，夜出現。此九種仙藥之精，皆草木所化也。其名山多有之，以形色體象辯焉。

一名天麻精，色赤如血。一名遠志精，色白。一名地黃精，色黃。一名牛膝精，土色。一名烏頭精，色黑。一名白朮精，色紫。一名菝葐精，色綠。一名松蘿精，色青。一名甘草精，色褐。此九種仙藥之精，乃芝草所化也，今名山多有之，形如大蝦蟆，朱目無口，四足，而所化芝草，以顏色中辯之。

此三十六種仙藥名，辯認化形，取白紙一張，上書某物精草之名，用地皇印望天門，執印念地皇呪三徧，取氣三口，吹於印上，以朱砂塗印，印於紙上所寫之名，其所化芝草，遠近自來現

矣。再用印印之，乃現本形之藥，以服訖，身換凡胎，足下生風雲，令人不死，長生久視矣。

### 地皇君服餌仙朮昇仙得道章第十

取向南麵朮一十六斤，以水洗淨，白茯苓去皮三斤，天門冬去心三斤，三味入臼內。杵三千五百下，令若爛泥相似，同入一瓦釜中，用水一石，慢火煎熬至三斗，取滓不用，再熬其汁成膏狀，若蜜汁許，封入瓷罐中。每日用好酒，空心化下半兩。忌食葷肉、菜、酸鹹、房室之事。服之百日，宿疾頓消，萬病除矣。服之一年，五臟纏綿，肉身光瑩，自然不食五穀，心清神爽，寒暑不侵，容貌澤潤。服至三年，身生玉瑛，項有圓光，久久服之，以出生死，雲行方外，名曰精行仙人，乃志芝草得道者也。

太清金闕玉華仙書八極神章三皇內  
祕文卷中

## 太清金闕玉華仙書八極神章三皇內祕文卷下

道至無而生天地。天至動也，而北辰不移，含虛不虧；地至靜也，而東流不輟，興雲不竭，故天長地久，人何獨而有死焉。蓋人不知天地之趣，荒迷紀綱之神，以將恩情為愛，塵欲為親，未及中年，多先禍命。今者故開太虛之首，明辯天地之元，訣神明之法，以度群生，免失人身之道。得遇者以功志神，能白日昇天，以道鍊氣，能在世而不死。斯文乃高玄內祕，深泄天機，祕之玉匣，亂傳漏慢此書，九祖沉殃，爾祕之祕之。

### 制惡興善章第一

陽之精曰魂與神，陰之精曰魄與尸。神勝則為善，魄強則為惡，制惡興善則理，忘善從惡則亂，理久而尸滅魄亡，亂久而神逝魂散。故尸滅魄亡者，神與形合，與太陽而為仙；神逝魂消

者，尸與魄淪，與太陰而為鬼。皆自然之理也。

### 立正忘邪章第二

人之修道，當立其正而忘其邪。正之不立，則生諸亂而損傷於神，邪之不忘，則感眾惡而反害於身。故立其正，則仙道日鄰，從其邪，則鬼道日親。不忘情絕念，不止欲澄心，專為貪饕嗜欲，不捨愛情，從心所欲者，為其邪也。

### 明昏亂章第三

不識賢，不擇友，不辯法，能無迷乎？不識二真反覆，不察陰陽混成，行功無節，屈性伐神，能無損乎？不達玄妙，獨執小術，能無病乎？虛功受死，能無誤乎？

### 固形體章第四

固形者，以養生之初務，為大道之根元。幽棲忘其聲色，純素安於天和。然要辯其損益，識其禁忌，明其內外，知其生克，息華液於玉池，保流酥於紫府。精積成而元氣自生，氣旺靈而元神自集，神旺集而五氣自運，五氣既運，為通玄至真之漸也。

### 鍊神氣章第五

神水河車瑩兮瑩，返復刀圭新更新。卦鋪離象垂瓊滴，灑翠潜烟深更深。運用坎離交龍虎，子後午前一度舉，一上一下往來騰。更尋元首節節推，節節推時卯與酉。崑崙透過玉酥膏，運入華池分三口。沂流交換接純陽，遍滿寰瀛諸藏走。八正三爻火數成，神氣相合體不朽。

訣曰：點滴瓊漿瑩若水，烹鍊還元補虛髓。八爻正氣一齊興，衝透雙關換顏體。

### 出聖胎章第六

青兮清，翠兮濃，一顆明珠絕埃塵。絕埃塵兮塵盡去，盡去塵兮現本真。本真現兮無大小，變化通靈作姤嬰。精抱血，血抱精，精血相投肌骨生。肌骨生兮分天地，天地分兮脾在志，志在脾兮魂入肝，心腎相和魄入肺，五藏安神盡總全。然後三才分六位，其中精府受盛門。六律分爻定五音，五音全兮陽數足。一半周天燒彎曲，神分形定志精細，煅煉連綿烹正

氣。正氣興兮神自通，彼物著靈十月功。十月功成聖胎就，出入無阻能遊走，遍遊四大上蓬宮，百萬年光無衰朽。

訣曰：陽數足時養聖胎，精裏初靈手足開。從九至九煉見九，一身分出數身來。

### 超仙章第七

道元一也，而用之有三，上有天地陰陽昇降，二氣綿綿，周而復始，往來不失其序之道也。達之則逸於霄漢雲中，有日月往來，二八九六，精華相吞，魂魄交媾，而不失其度之道也。昇之則遷於南宮，下有五行傳送，受氣配合，生爻產象，而不失其理之道也。達之則升三島，不始不終矣。


人皇君曰：修士志神煉骨壯命，而俱不出此神章也。以用道之流，或居山洞、或居庵林、或擇一靜室，香花焚之，清氣生華，然後擇一奇日，面拜八方，東西南北四維。拜訖，安爐煉氣，因氣安精，因精安神，因神致生也。久久致煉，妙化成真。夫九轉五還、三

返八變，齊天容，少返純，衰者得強，老者得壯，壯者得童，童者得嬰。故自凡而得聖，乃煉聖至於仙，煉仙至於真，煉真至於妙，煉妙合於神，煉神合虛，虛氣乃元道之始也。則知道在我，飛遊四海之外，或入帝鄉之中，上朝金闕，面拜高真，名列九元，位配星辰。或安九天之上，或宿八極之堂，或與羣仙共詣玄都之府，或伴高真翫于大羅之天，或遊名山海嶽，或赴南宮之會，或上天揀擇人鬼姓名，或下界檢錄齋醮罪福，或掌括名山大川，或總持生書死籍。或與諸仙同鸞駕，而北遊紫圃。或南過金泉，集賢賓而採草木花實。或西遊龜山，朝王母於金殿。或邁扶桑，飲紅酒于瓊園。無上無為，自在仙真，空真化真仙子。仙子者，從何而得焉。始絕六根、斷六塵，視之不見其物，聽之不聞其聲，平和恬淡，澄淨精微，虛明含元，天真六化，至神煉氣而成。且非塵情貪欲，恩愛而得者也。

### 人皇符印章第八

符者，真形之龍篆也。印者，太虛


之正氣也。天元深旨，天機之媾，妙運至真之幹大端，驅神鬼之祖法，攝邪祆之樞機，皆繫於此印之力，功能隱形散影，藏氣收神，使陰陽六變其體，令人鬼不見其形也。



長三寸

闊三寸

### 人皇真形符篆



長三寸

闊三寸

### 人皇神呪章第九

九氣氤氳，玉呪以從，高華妙獄，十極上尊，太虛神主，八天大君，木翁金母，無上玄真，各降真氣，驅滅邪蹤。南方赤帝，雲乘火龍，西方白帝，利斬妖氛，北方黑帝，霞映神晶，東方青帝，鳥吒囉英。九天九神，鬼門天丁，玉女直符，太歲縱橫，五嶽吏兵，天士都司，

八日神童，北斗魁罡，四日老翁，吞魔大殺，四十壯充，六丁六甲，入吾印中。急急如律令，奉勅攝。

### 知生死五假素奏上法章第十

知死法：合掌但開第四指，開時必定閻羅知。

訣曰：每月初七、十七、二十七、一月三次，每次知十日生死之兆也。焚香面東，日初出，望東方念人皇呪一遍，取日晶氣三口，咽歸腹中，然後面東正坐，將天元地要相合，開手第四指。如不開時，乃萬神全而未死之兆也。如忽開放者，乃人天不相救，神氣不在殼，是死之兆也。然看何日死者，於五行之日定之。如其日金者，於知死之日外第三日死也。木日第四日，水日第五日，土日第七日，火日第九日。其鬼使來追，既知其死日，后用假命五術以假之。

五假法者，上避天劫之灾，下避大運之窮。如有天水之劫，上傾下溢，河海漲空，江水泛突，橫流漂蕩，山嶽無有，水輪四旋，陰精故出，世無所存，天

無所空，浩浩曠冥，盡無民輩，以法假之，入水不見其水。知天地風火之劫，焰着凝空，烈馳洞闊，交虛晦海，焚地吹山，上無玄天，下無玄地，一切萬有，化作灰塵，以法假之，如入靜梵。如一切干戈，征伐四起，國土併吞，橫尸如山，血流若海，以法假之，凡人不見其形，自在雲遊無阻。如三限之危，空亡之厄，大小運併，胎祿相食，亡命合死，以法假之，造化不能移，陰陽不能遷，鬼神不能知，而壽一百二十歲，長生之人也。

南嶽魏夫人續云：塵世俗輩，末學之人，敬有道心，便入名山，遇靈芝則不識，逢虎豹則無術，何異將身去投死地者哉。始欲長生，而反遭橫夭者多矣，吾哀見此輩，昔告上帝，得賜此經，以五符真籙誅邪斬怪，收束虎狼，使萬魔潛跡，百鬼竄形，令一切修真之士，皆得無為之道也。自然山林清靜，靈芝露英，金玉發洩，秀氣薰蒸，或茹芝被褐，棲真味道，精灌人神，豈不寧哉。

五符真文，擇境居山，山有貴賤，氣有死生，凡欲居之，必當擇境。大山成處，以小山為貴；小山成處，以大山為貴；石山成處，以土山為貴；土山成處，以石山為貴；如此大小土石等山，以衆山朝者為貴。擇此貴山，生氣五福之隅，則可幽居洞府，棲隱巖巒，或誅茅結廬，與鶴鹿為友，住此久者，能行順養之術，可致長生矣。何哉？為其陽精實壯，秀氣薰蒸故也。


識辯洞府，有曰洞、曰府、曰穴、曰窟者，何也？凡山面東者謂之洞，山面南者謂之府，山面東南者謂之巖，山面西南者謂之穴，山面北者謂之窟，山面東北者謂之坎也。洞府巖穴中居之者，自然高真上仙、達人逸士，時來降祐，當獲玄妙矣。若窟坎中居之者，則有毒蟲猛獸、老魅山精，迫促凌犯矣。蓋為皆靈文逆天地之正氣故也。

驗認靈芝，有曰丹芝、碧芝、肉芝、紫芝、金芝、仙芝、草芝、蘭芝、瓊芝、果芝、絳芝、無風自搖芝、夜神光燭芝、太素含香芝、有洞天鶴鳴芝、靈芝、玉顆

芝、雲露清芝、碧琅白玕芝、五明九光芝、陽精素蘂芝、太一八風芝、錦紋紫莖芝、含光包翠芝、青丹素華芝。

右芝草，略有二十四品，每獲一品，食之者壽可千歲。


五符真形




東方木德  
歲星君所  
主青帝符




西方金德  
太白星君  
所主白帝符



南方火德  
熒惑星君  
所主赤帝符



北方水德  
辰星君所  
主黑帝符




中央土德  
鎮星真君  
所主黃帝符

五符神呪


青帝呪曰：火令童子天皇攝急急如律令。  
赤帝呪曰：吻皇星斗太初攝急急如律令。  
白帝呪曰：白衣四神太虛攝急急如律令。  
黑帝呪曰：五星守斗五帝攝急急如律令。  
黃帝呪曰：龍耀天蓬黑殺攝急急如律令。

察辯邪正，凡居庵，或居山、或居洞，須要辯察邪正也。其法於庵中備矣，或使得昇舉者。凡欲採芝，當以三


月之際，山開之月，靈芝出現之時，以五符法披之，自然可獲。每直日鳳章龍篆，而尋求之，乃可得矣。凡芝在處，定有異兆，但見白晝五雲覆鬱，夜有霞光彌遠，或有氣象高下千百尺，狀若蛇者是也。




此符搏戲必勝以紙  
隨廣狹依前法書定  
足下男左女右大驗也



此符太上老君  
入山朱書素紙  
上橫行天下無咎




此符真人帶之一  
年入山精不敢傍  
百鬼莫能攝也




木解符以甲乙日朱書此符  
紙上燒服之正東手被如死  
一日起去乘其巾幘於外處  
即以竹代身已遠去他鄉勿  
得回慮也


五假化形圖



人皇君曰：金命人依此圖，吞隱形符在腹，著衣歸，戴隱形帽，依罡步所為三次，而不死也。




人皇君曰：木命人吞符，達地祇神藏造化中，鬼神自不見其形也。




人皇君曰：水命人吞此符，依罡步入方位神藏造化中，鬼神自不見其

形也。



人皇君曰：火命人吞此符，依罡步入方位神藏造化中，鬼神自不見其形也。

符形亡法假土



人皇君曰：土命人依罡步，吞此符，入方位神藏造化中，鬼神自不見其形也。

太清金闕玉華仙書八極神章三皇內  
祕文卷下

(郭清點校、王卡復校)

# 087 洞神八帝妙精經

經名：洞神八帝妙精經。撰人不詳，約出於東晉。係洞神部古經之一。言符咒及養生法術，末附《抱朴密言》。一卷。底本出處：《正統道藏》洞神部本文類。

## 齋持八戒法

帝君曰：一切動靜去來，云爲善惡之數，要申三五，名同事異，前後互行，更相統攝，終歸一源。一源窈冥，深邃眇邈，難可卒至，緣歷遂多。多法以治多欲，欲多不可須祛，防遏斷除，使之日損。損之又損之，以至於無爲，無爲而無不爲，無不爲則有欲非其欲矣。欲以益物，已無復須，已無復須，所須足矣。足矣在己，無損於他，他無所損，已又益焉。益物非以求增，增損都自無矣。我無增損，增損在物。物

順物自益，非我益之也。物逆物自損，非我損之也。損益非我，我爲損益之主。主非我求，求我是物。使感生化，化物物順。順以守靜爲先，靜能安動，動以緣靜安定。安定之階，以齋爲本，齋以齊整爲急。急以齊整身心，身心齊整，保無亂敗。敗起多端，大略有八：一者殺生自活，二者盜他自供，三者淫欲放意，四者妄語爲能，五者醉酒恣適，六者雜卧高廣大牀，七者競翫香愛華飾，八者耽著歌舞作倡。勵心之

子、學聖真仙，不爲此八事，則八敗無從起，八敗無從起，則八成自然立。立久不失，延年保命，神通洞達，智慧淵注，能隱能顯，與世和光。是故齋者，受持八戒：不殺則怨報之敗不起，慈仁長壽之成自立；不盜則窮苦卑退之敗不起，富饒廉讓之成自立；不淫則孤獨憂傷之敗不起，貞素蕭邈之成自立；不妄語則欺誣枉濫之敗不起，悟愉貞確之成自立；不醉則昏迷荒狂之敗不起，智慧聰達之成自立；不卧高廣大牀，則癡渾死懼之敗不起，清淨無

畏之成自立；不香愛華飾，則纏縛毀廢之敗不起，光鮮解脫之成自立；不歌舞作倡，則悲怨搖蕩之敗不起，和音柔暢之成自立。此敗不起，此成自立，如影隨形，未嘗謬矣。能使八敗不起，八成自立，修齋持戒，佩服神符，思真行道，通而無窮，顯驗必速，皆如所期也。

## 三皇三一經

三皇所受，要在三一：太一、真一、玄一，是謂三一者也。號爲三元，元炁生神，神炁降人，人成神矣。

頭上上元神，字元先。太一君也，非心也，天神也。心守之，合天也，與天合，號神人。此神之號南極老人，下在太一宮中。人頂上直下三寸，名太極宮，一號太一宮。常以平旦、日出、日中，甲午之日，呼之曰：南極元先太一君，某欲得神丹長生之道。因瞑目念心中太一童子，衣絳衣，其炁色正赤黃如日，九十息頃止。

心中中元神，字玄堅，太一中極君也，在脾中，脾爲玉堂，一曰玉房太一偃息宮。

養兆身。常以雞鳴食時、日跌黃昏、戊辰、戊戌、己未、己丑之日，呼之曰：中極玄堅太一君，某欲得真人黃庭神仙之道。因瞑目念黃炁滿胸中，脾上有一人，五十息頃止。

臍下下元神，字玄妙，北極谷玄道母也。腎爲雙合宮，對上南極，故號北極。常以夜半時，甲子、戊子、丙子、庚子、壬子之日，呼之曰：北極谷玄道母，某欲得金液醴泉可飲食者。因瞑目念腎間有白炁，中有神龜，龜上有玄女，右有司命，左有司錄，見之呼曰：司錄六丁玉女，削某死籍，更著長生玉曆。呼神法，皆重言之，然後道某欲得長生也。

能知三神字，依日時修之，可延年、可不死、可變化、可神仙。此三者，天神道君，三元貴神，人之先也。常念勿忘，獨靜心存，見神赤貌。若在衆中，見神衣冠，各有服色，了了然焉。

太一者，胞胎之精，變化之主，魂魄生於胎神，命炁生於胞府，變合帝君，混化爲人。故太一之神，生之母也。帝君之尊，生之父也。父母本合，

號曰元炁，應化分形，號曰父母。母稱太一，名務猶收，字歸會昌，又名解明，一名寄煩。知此名字，慎勿告人，存之在身，長生不死。帝君名逢凌梵，字履昌靈神。夫人知者，形不入地，玉童玉女，侍入九天。天神是此帝君之子。帝君治太極宮紫房，與太一混合，亦號太一元君，非男非女，光明妙絕，或爲老君，或爲嬰兒，應感無窮，變化無極也。

### 陽歌九章

齋直持戒，守一和神。精感遐徹，九天帝皇遣神童來下，侍衛錄圖。並命玄女詠陽歌九章，以宣通妙炁，布吉消凶。學者行道巡迴之時，宜習誦之，以會神契也。

清韻陽歌梵，飄飄徹十方。青青萬卉耀，携我造九重。西絃抗音調，感悟東王公。

元洞啓運首，始陽萌萬芽。和風振瓊條，高林耀雲羅。句芒勸植善，日羽煥東遐。仙賢遊玄圃，飛梵起瑤笳。

控景太霞室，齊輪九天庭。衆仙

抗飛梵，陽歌時流聲。自非靈人德，焉能禮仙真。

惠和陰陽歌，二儀稟于天。棲憩志仙飛，不樂時所牽。未覺凌虛遠，超超已高玄。悟歎馳競子，不知養命根。

鬱已盛陽茂，吟詠南金梁。融風拂林表，朱鳳互來翔。鳴梵乘虛起，逍遙奏九章。

結駕素林秀，命節扣金鐘。鳳吟八音和，真華耀玉容。陽歌仙房上，飛簫兼來從。吾我自相韻，誰能明契中。

遊浪崑蓬杪，迢迢戲玄都。泠泠高仙客，窈窕詠陽歌。齊聲九絃唱，德合妙音和。

明燈續長夜，玄炁照幽堂。飛梵鳳林表，清風拂玉璫。陽歌交來唱，四軒耀朱光。

烈烈廣寒庭，遼遼譙仙室。玄冥唱陽歌，八景披雲出。鍊沐含陽精，長梵詠太一。自非篤志賢，安能好遙逸。



九皇圖

初天皇



天皇君長九寸，披青錦帔，著青錦裙，戴九天寶冠，執飛仙玉策。

初地皇



地皇君長九寸，披白錦帔，著素錦裙，戴三晨玉冠，執元皇定錄之策。

初人皇



人皇君長九寸，披黃錦帔，著黃錦裙，戴七色寶冠，執上皇保命玉策。


右初三皇，是虛無空之變化，應感同人，同而又異。學士存之，男女不得和混，勿履穢穢，有犯考由左官。三年不犯，神降對言，授長生之訣，登三清之官也。

中天皇



天皇君人面蛇身，十三頭。平初元年十一月八日出治。姓望，名獲，字閏。將從青雲中陣兵萬萬九千人，主治雲中百二十魅鬼，千二百遊行鬼賊，萬二千陰邪之魁。

中地皇



地皇君人面蛇身，十一頭。太始元年七月五日出治。姓嶽，名鏗，字紫元。將五嶽嶽兵萬萬九千人，主治八荒四極三河四海山川溪谷龍蛇龜鼈龜鼉老魁為人作精崇者。

中人皇



人皇君人面龍身，九頭。太平元年正月三日出治。姓愷，名胡桃，字文生，將天地水三官兵萬萬九千人，主治一切七世父母、三曾五祖三鬼五神、內外男女傷死客亡、墮水產乳、惡禽猛獸木石所殺、刑獄刀兵之鬼，為人作精崇者。

右中三皇，是玄元始之應變。學士齋戒，傳道行法，救患消災，存思啓告，請此皇君，將從兵士，與中天大將軍一人、三五大將軍三人，兵士各百萬衆，一合同集，齊心并力，率某身中吏兵，各典所主，宣行神炁，布散威風。助某收

治逆鬼，惡吏凶人，悉皆誅戮，奉承禁忌，蕩除六天故炁，精魔咸即降伏，使神役鬼，應心即驗，所治者愈，所召者到，所求者得，所申者通，功成事立，以為效信。

後天皇



天皇君人面蛇身，姓風，名庖犧，號太昊。

後地皇



地皇君人面蛇身，姓雲，名女媧，號女皇。

後人皇



人皇君牛面人身，姓姜，名神農，號炎帝。


右後三皇，玄元始三炁化為三元，變為三台，應形以異，率異歸同。學士建功，象效三台。仁禮信義智為五通，通此五德，三五炁和，八達六通，成真聖也。

右九皇君，其神本一，其應則殊，

引初及中，階級亦異，至於極詣，故復還同也。初皇不言為化，中皇微言以教，後皇結繩而治。學士諦識九皇，先學後三，須能結繩，次至微言，乃極無言，與道同矣。

招真降靈符


天皇招真符



地皇招真符




人皇招真符



右三符，薄紙廣一寸，長三寸，向皇屬方朱筆書之。用滿日王相時，臨登壇，水服之。真神靈官，即來降已，曖曖見形，久則分明也。受事竟，未拜謁，便服此符，後欲服食，復向屬以次吞之。亦可向東，以水服之。一皇一符，二皇二符，三皇三符，合六符也。未能服食，可以白素方五寸，朱界綠書之。清齋，王相日啓皇君，卷內絳囊中，綴之心前。失食不饑，飽亦不病，久久存皇君，神炁降符中，真靈附兆身，必成神仙矣。

昇天符



右一符，以竹中白衣方三寸，青筆向王書之。受道畢，行功竟，欲昇天，先服此符，乃飛去也。昔衛叔卿授李少君，登天之日傳。

凡學道修真，功行未備，不能通

神，洞見禍福，皆當沐浴浣濯，閑居燒香，讀經覽圖，鍊戒思省身心，首過改惡。其同志人，獨建立善，有同好者，共相勸勵，損己濟物，守本崇源。憑怙三尊，乞功德成就。欲驗法自試，施用皇文，或傳授啓告、招真降靈，皆先靜寂定心，清齋服符，安臥求夢，訣判吉凶，登壇入室，有疑勿行。當如精潔，久久有徵。慎勿褻促，冒疑強行，人神相誤，殃考無原，詳審諦憶，無負今言。

西城要訣三皇天文内大字

西城仙人施用立成，隱之玄丘之陰。帛公記錄天漢元年正月三日受。

西城仙人王君曰：天地合德，乃共長存。然其中含妙資陰陽之真。陽布於外，則品物咸章，陰湊乎內，則鬼神致妙。斯乎咸章，乃群品鼓動，致乎存妙，然後衆物可殫。苟得其法，則祆精可使，若獲玄數，神祇立至。不精不慎，更爲損害。

帛公曰：前漢太初二年，王君明授余大道之訣，使燒香清齋，三日三夜乃見告。

仙人曰：無名之名，蓋我之宅。有名之名，樂我之橐。無作之作，令我之德。有貨之貨，亡我之賊。罪莫大於淫，禍莫大於貪，咎莫大於讒。此三者，禍之車也。小則危身，大則殘家。

仙人曰：少不學道真，年衰更心營。已病方事醫，臨死乃求生。譬渴乃穿井，飢乃趨起耕，俱無及矣，必反窈冥。

仙人曰：夫欲學道修真，延壽長生，當避諸禁忌如左：

禁無施洩命夭沒，禁無大食炁脉閉，  
禁無大飲膀胱急，禁無大温消髓骨，  
禁無大寒傷肌肉，禁無寒食生病結，  
禁無涕唾失肌汁，禁無久視令目曠，  
禁無久聽總明閉，禁無久泣神悲感，  
禁無卒呼驚魂魄，禁無內念志恍惚，  
禁無恚怒神不樂。

仙人曰：人但知食可以療飢，不知學道可以療死。人但知飲可以止渴，不知修道可以止命。人但知容媚爲好，不知存神以益壽。人但知良藥可去病，不知服食已助己。人但知夜

可以逃身，而不知爲藏形之數。人但知僻側之避難，不肯爲變化之法。人但知請求天命，不知留己則生身。道深則知方，養至則命通。

仙人曰：太陰之草，名曰鈎吻，得如食之，入口便死。太陽之草，名曰黃精，得如食之，可以長生。而世俗之徒，信鈎吻之殺人，不信黃精之益壽，但畏鈎吻之毒，不知黃精延命。但知畏死，不知尋生。此六溺之夫，五濁之徒。爾若能棲心事外，始可與言求生。

於是告小丹法，用雄黃，栢子，拘魂制魄之方，用籛之如左：治栢子千下，細篋去滓，松脂十斤，以和栢子。雄黃一斤，色如赤李者，合藥中，復擣如法。蒸藥一日，引之如飴。正坐北向，平旦頓服五丸，百日之后，與神交。

#### 又小丹法

用水銀、丹砂、雄黃，凡三物，各使分等治，和以白蜜，丸如大豆。清旦早起，無雲霧日，東向服七丸，漱以華水。一日再服，服之三年，身有光，長服可不死。

#### 拘魂法

夫拘魂制魄，三一當分泥丸、絳宮、丹田。三者一體之靈府。暮卧思存，日如徑一尺鏡大，使去面五寸，遊於泥丸三府之間。朝存月，大小法度如存日。此道使人心堅神正，魂魄不邪，乃令妖精畏之，百鬼可得而制者也。

余復受此法，乃頓伏不起。師曰：法淺未足總邪。余乃稽首，有言於仙人曰：少以不才，羈累世業，三隅未返，遠尋生途，妄存道旨，于今十年。然後知聖妙之法，不死之驗，已微灼矣。夫鳥獸覩幽房而感高宇，是人之所安。積川重淵，魚鼉之所便，人民之所惡。方之於己，唯道是親。既受玄旨治身之方，當奉以施行，與身同處，而意猶鑽仰，心雖未盡在。昔嘗聞役使鬼神之數，召致百靈之法，安坐則群邪立湊，施發則千祇合和，未審則逆察冥漠，有害乃咄嗟却禍。實聞其法，未覩其文。然天地有常，道德而弗教也。猶扁鵲不以人死而棄其針也，願蒙啓

悟以開其心。師乃使余還坐，見語：子未可教大道，後三年將語子也。乃退席却反，執巾櫛三年竟，未及啓白，師曰：汝可成也。可更齋三日，燒香沐浴，告汝要道，三皇天文大字、太清中經金液神丹之法。汝泄非其人，滅族，父母之鬼，受刑於玄丘也。余拜曰：昔卞和斷足而不釋璞者，識真之諦也。今賜一言，更生之願，謹無泄矣。

仙人曰：皇文乃是三皇以前，鳥跡之始大章者也。三皇安業，則天和地靜，紀綱陰陽，維制鬼神，伏辜萬精，與身俱生。乃王母之所玩貴，仙官之所崇仰，真寶文者也。世有此文者少，有之者，泰玄仙都九老仙君，輒遣一直符，衛此真文，書白錄者有過，可不慎哉。有之者但以瞽行，朝夕正心，拜敬斯經，則可享其所盡，五兵五毒，灾禍之鬼，一不敢視，若施用之者，豈可論邪。今為疏禁忌節度，仙官校錄，致人罪考如左，子勤而戒之。

授經非其人，自說及天文，罪至有

天文，罪至族刑，死父母之鬼，受罰於太玄都。

授經齋三日，受經齋三日，燒香沐浴，禮拜而施用。如不爾者，身面生瘡。


授經後而不相愛，愛經後而不相親，使鬼召神無度，鞭撻衆精無已，九天丈人使亂其胸心，及四肢血傷，志向終敗。

受經畢，至甲子日夜，西向存三皇文三卷，相去一尺許。畢，乃起向西，三拜大字，存於東方一拜。衣不借人，違之者神不附體，求道無應。


修道之科也。奉之者昌，反之者必亡，余伏受節度畢，師出懷中立成，如左：



高上名，靜齋五日，丹書帛五寸，蓋著靖室中。召高士太和，食頃立形至。



天皇名，召司命。青書縑一尺，清齋七日，著應中，食頃，司命形見，可問吉凶，勿久留之。



高天名，可召司錄，如召司命法，婦女帶淫目心閉。



太上名，可召司陰，亦如召司命法，書帶此符辟兵。



皇天名，可召司危。告齋三日，赤書青，著淨屋中，司危立至，可問吉凶。




蒼天名，可召天神。齋五日，丹書素五寸，以丹著室中。



高皇名，可召河伯，如召山神法。著水中，河伯立至，可問水旱。




上帝名，可召大丞相。告齋三十日，丹書黃，著室中立至，可問立身可否、吉凶。



天帝名，可召九天父母，齋如丞相法，問我後世及求願，帶此書無傷。



齋四日，丹書紙上，召六丁於室中。



齋四日，召日月將軍於宅中。

𠄎𠄎𠄎

齋五日，召日遊。

𠄎𠄎𠄎

齋五日，召蜚廉。

𠄎𠄎𠄎

齋七日，召天御史。

𠄎𠄎𠄎

齋五日，召社公。

𠄎𠄎𠄎

齋六日，召土公。

𠄎𠄎𠄎

齋五日，召阡陌亭長。

𠄎𠄎𠄎

齋五日，召百邪之長。

𠄎𠄎𠄎

齋五日，召門丞戶尉。

𠄎𠄎𠄎

齋五日，召百蛇之精。

𠄎𠄎𠄎

齋五日，召河中童。

𠄎𠄎𠄎

齋五日，召太一。

𠄎𠄎𠄎

齋七日，召天一。

𠄎𠄎𠄎

齋三日，召魂神魄鬼。

𠄎𠄎𠄎

齋五日，召百鳥之精，鳥頭人身。

𠄎𠄎𠄎

齋四日，召地中百精之神。

𠄎𠄎𠄎

齋七日，召九天錄史。

𠄎𠄎𠄎

齋七日，召九天扶命。

𠄎𠄎𠄎

齋九日，召北斗。

𠄎𠄎𠄎

齋九日，召南斗。

𠄎𠄎𠄎

齋二十日，召百里精。

𠄎𠄎𠄎

齋十日，召東嶽君。

𠄎𠄎𠄎

齋十日，召西嶽君。

𠄎𠄎𠄎

齋十日，召南嶽君。

𠄎𠄎𠄎

齋十日，召北嶽君。

𠄎𠄎𠄎

召中嶽君，主丹欲作神丹，先召問一生度。

𠄎𠄎𠄎

召四瀆夫人，齋日同。

右召五嶽及四瀆，皆丹書，若東嶽君用青一尺也，皆於山草之間，通不令人見，召時也。

齋七日，召河中夫人，丹書絳水上。

齋七日，召河中夫人，丹書絳水上。

齋六日，召六甲父母，丹書帛於陰室。

齋六日，召六甲父母，丹書帛於陰室。

齋五日，召北君夫魁綱主者。

齋五日，召北君夫魁綱主者。

齋十日，召南海夫人。

齋十日，召南海夫人。

齋十日，召高仙君。

齋十日，召高仙君。

齋五日，召平山大王。

齋五日，召平山大王。

齋十日，召蓬萊地主。

齋十日，召蓬萊地主。

齋七日，召高仙玉女。

齋七日，召高仙玉女。

齋百日，召王母，青書帛一尺，於淨屋之中，拜而與之。

齋百日，召王母，青書帛一尺，於淨屋之中，拜而與之。

齋七日，召衡山世子。

齋七日，召衡山世子。

齋七日，召都官司命夫人，主變化，先召之法。

齋七日，召都官司命夫人，主變化，先召之法。

齋百日，召九天父母之世種。

齋百日，召九天父母之世種。

齋百日，召黃山大伯中明子。

齋百日，召黃山大伯中明子。

齋二十日，召鬼使，使人隨所向也。

齋二十日，召鬼使，使人隨所向也。

齋三十日，召虎豹之精，於山中，丹書楓木一尺，廣四寸，精亦人也。

齋三十日，召虎豹之精，於山中，丹書楓木一尺，廣四寸，精亦人也。

齋十日，召百草之精，丹書絳一尺，於草間，亦人也。

齋十日，召百草之精，丹書絳一尺，於草間，亦人也。

齋五日，召百木之精，丹書黃一尺，於林間。

齋五日，召百木之精，丹書黃一尺，於林間。

齋九日，召河中將軍。

齋九日，召河中將軍。

齋千日，召海中三大夫。

齋千日，召海中三大夫。

齋七日，召源瀆攝都尉。

齋七日，召源瀆攝都尉。

齋五十日，召北斗父母。

齋五十日，召北斗父母。

齋百日，召西嶽父母。

齋百日，召西嶽父母。

齋百日，召東嶽父母。

齋百日，召東嶽父母。

齋百日，召南嶽父母。

齋百日，召南嶽父母。

齋百日，召北嶽父母。

齋百日，召北嶽父母。

齋百日，召中嶽父母。

齋百日，召中嶽父母。

齋五十四日，召四瀆父母。

齋五十四日，召四瀆父母。

右用繒廣九寸丹，書於室中，隨方面所用色也。

齋三十日，召三河父母。

齋三十日，召三河父母。

齋二十日，召九江夫人。

齋二十日，召九江夫人。

齋五日，召天門吏。

齋五日，召天門吏。

齋九日，召百靈魃，可取役使。

齋九日，召百靈魃，可取役使。

齋十三日，召三公父母。

齋十三日，召三公父母。

齋百日，召東王父。丹書碧於淨室，廣一尺八寸，謁而與之。

齋百日，召東王父。丹書碧於淨室，廣一尺八寸，謁而與之。

齋百日，召天皇君。

齋百日，召天皇君。

齋百日，召人皇君。

齋百日，召人皇君。

齋百日，召地皇君。帶此於心前，令人髮不白，延年長生。

齋百日，召地皇君。帶此於心前，令人髮不白，延年長生。

齋百日，召九都仙伯。

齋百日，召九都仙伯。

齋百日，召太山君王。

齋百日，召太山君王。

齋百日，召天帝遊女。

齋百日，召天帝遊女。

齋三十日，召東越三王。

齋三十日，召東越三王。

齋五十日，召洛水將軍。

齋五十日，召洛水將軍。

齋十日，召地拂丈人。

齋十日，召地拂丈人。

齋三十日，召土地百鬼師，以供使役。

齋三十日，召土地百鬼師，以供使役。

齋七日，召土地百傷，亦可使。

齋七日，召土地百傷，亦可使。

齋十日，召玉女子安。

齋十日，召玉女子安。

齋三十日，召高皇太祖，符著衣領中，人為之服。

齋三十日，召高皇太祖，符著衣領中，人為之服。

齋三十日，召高上聖母。

齋三十日，召高上聖母。

齋百日，召司陰世祖。

齋百日，召司陰世祖。

齋三十日，召西海趙夫人。

齋三十日，召西海趙夫人。

齋九十日，召九炁丈人。入山帶此，蛇蝎遠人一里。

齋九十日，召九炁丈人。入山帶此，蛇蝎遠人一里。

齋七日，召正一功曹。

齋七日，召正一功曹。

齋二十日，召西嶽世子。

齋二十日，召西嶽世子。

齋三十日，召太丈人。

齋三十日，召太丈人。

齋  
齋

齋三十日，召七世祖父母，埋符於門，死者不還家。

齋三十日，召咤水王、南嶽郎，二人俱。

上從高上名至天帝名，合九行，下注所施召，與鮑公內經節度有異。若按王君施行，當從九行所注。

書符之法，不得與衆共筆共墨共硯。皆燒香清齋，在密處。齋日畢，夜於潔宅淨屋之中，隨月建仙衣，服而召之。召天神者，以字向上。召五嶽三河江海百地之靈，皆以字向地。倚立須臾，則或覩所召到矣。天地神祇，及山川之精，或形如人，或鳥獸頭人身，或鳥獸龍蛇身人頭，或長或短，或香或鼻，或媚美色，或可畏惡。當正色靜躬，不得恐怯，然後按事而問之，彼亦登時答對。又天神來，不得久留，當即遣之，問非其道亦殺人。皆丹書，縑廣一尺二寸，長亦同。書不得中息而語也。若已疏，用五色，節度廣狹之制，一如之。其無注記用繒色長短廣狹

者，一如丹書，縑廣長尺二，置以室中。室中或家人，經死亡穢殮，或履乳婦，或六畜生產，皆爲不整，雖齋戒精勤，而天靈不至也。

### 抱朴密言

抱朴子曰：洪聞五濁之世，則真源不立，譬於清水流乎濁波之川，不得獨激其鏡灼矣。按天文所召，體在其家，家自無緣，都無有十餘日不見穢汗者也。如此當不如意，已分明矣。例欲在山，唯獨處不交人也，好齋而待之，必如反掌也。洪以咸和元年四月戊午，於所居西，養特牛近二十頭，時既有荒飢，家道迤否，又縣多虎災，不可防遏，虎來侵損群牛，前後百日，已六七頭矣。爾乃出別止，告齋十日，按法召高山君，使斷暴虎之害。夜乃行事，頃久乃見一人，著黃單衣，戴進賢冠，冠上又有赤鳥形，長短中人，手指可長一尺許，昂昂甚有威儀，自稱爲高山地主。吾因有言，令斷虎害，見答唯唯。虎取牛時，此君兜球先射之，中髀，箭登時折在肉中。尋竹中死虎，果

髀破，又得球箭鐵，益審明也。自後一里虎暴遂絕。初受此文，唯先召高山君耳。自後數召土公、社公及小鬼，或河瀆之小神，皆如言登時到。但洪精誠微薄，心未專正，未敢自信，難召天皇世祖、五嶽十將、三天九仙之大神，恐不得宜序，而禍見及也。

三皇文及大字，皆仙人王君所集撰，抄撮次第爲一卷，可按而用之。往聞鮑南海說：天文三皇大字，有四萬言。洪所見者疑少。鮑云：是三天八會群方文也，隨其所用，按而集之。此所撰立成，當不盡也。鮑云：彌演天道，與真人參，情當歸其本也。要召役施行，皆當詳而獲福，寧可輕哉。按科不敬，交致罪考，何況召致失據乎。鮑君不以洪淺薄，乃見授三文要道，但才極凡流，遂不能究洞神鬼之幽耳。長房、賀然、談昌、博生、方展、趙准，並役使鬼神，撻戮萬靈。而此數子，亦因術驕奢，不正其身，遂並不獲其終，豈不悲哉。人間之交，猶存冲卑，以自先持，時有不免於罪罰者，況爲鬼神主



者。當使心形不負於毫末，適乃過半耳，而可縱恣其本性邪。洪嘗聞：李先生道經之宗。李先生自說：往在瀛州，詣董仲君。仲君有九天《大有經》四卷，《小有經》四卷。字方二寸，落落疏秀，卷大如五寸竹。按目錄云有百萬言。先生疑其文少字多。仲君言：此文非世上文也，乃三天八會之大章也。一字有三十三字，東西上下，隨形所用分集之。指摛大有上數字見授，真上宿之奧典也。以此方三皇內天文大字，何緣四卷無四萬言也。又鮑先生《節解》說：三皇大字，抄出大小有文，而別名之耳。如是而論，益了了也。又齋日當以三皇大字著左右也，心常正思，慕其靈象也。又宜傍存六甲直符，今日甲子直符王文卿也。

洞神八帝妙精經

①『損』字據上下文義補。

②君：原作『居』，據文義改。

(王卡點校)

## 088 洞神八帝元變經

經名：洞神八帝元變經。撰人不詳，約出於東晉。係洞神部古經之一。言召役八卦鬼神法。一卷。底本出處：《正統道藏》正一部。

### 洞神八帝元變經序

原夫世塗莽昧，利害之道難知。得失未形，安危之機罕識。故蒼生庶類，莫不闔步艱難之裏，顛墜險阻之中。所以取困於斯者，皆不能逆見存亡，致茲危殆。故聖凡所寶者命也，賢愚共愛者身也。然則聖人好生，故設教以防其事，以律令威過失之心，禮法開敬讓之路，卜筮去是非之惑。此雖濟生異道，扶教遏非，猶殊途之一致，別贊而同功也。養生之要道，莫過於

避害，避害豈踰於去惑，去惑莫尚於卜筮，卜筮莫先於鬼神。鬼神之爲用也，或見徵祥於天文，或露祲災於地理，或構吉凶於人事。《易》曰：知變化之道者，其知神之所爲乎。神者藏往知來，曲成萬物，故人能通神，則與其齊功，非銷灾益智而已。然召役之文，其來尚矣。故東方朔翼奉漢朝稱聖，景純韓及晋代表奇。然則隱逸巖林，獲功效者不勝其數，且久傳斯術，遷流綿邈，辭旨疏缺，難以具聞。假有獲驗之賢，恐泄之而招禍，莫不飲效，故懷阻於傳授，自非金蘭之友，投分之交，豈容吐實以形其事。必有應符契道，分資役術者，方可逢其師，獲其旨要。然世傳斯文者，是沙門惠宗之所撰錄，神圖藥物不過三紙，悉改換藥名，令人不識，又與本草殊爲乖背。余弱冠好術，厭世希道，研磨茲文，未曾言倦。但章呈詭闕，無可牽尋。斯術玄微，效之者寡。所以吁嗟爽友，無可諮曰。余既好之不已，志在研幽，遐邇求師，勤於諮訪，遂遇先達者經驗斯術。余則寤

寐宵興，伏膺曩日，親蒙口授，咸決所疑，並得刊正藥名，餌服節度，符用委悉。及禹步尺版、祭立壇儀、徵驗雜候，斯等宗旨，咸得其要。今遂推觸類長之，隨所宜應，次第立目，合爲十五篇。其學斯術者，必先識次第，善於文要，故建提綱紀目，爲其經首，提綱紀目第一。君靈體別，功用大殊，露彼幽通，令人所慕，故以神圖行能爲第二。行術進旨，各有吉時，動靜所依，莫不循日，故以論時節要爲第三。步綱及祝，惟宜預習，召驗所期，用爲最急，故以禹步致靈爲第四。符功與術，徵驗是由，習若閑通，施無不速，故以服符見鬼爲第五。藥味敗虧，人心不專，神則不降，畢備新香，志在恭恪，靈祇方下，故以餌藥通神爲第六。凡欲修法，義須寬靜，若不見置，行術無由得效，故以神室處所爲第七。蔬餐素服，足以感神，節儉非久，無以成誠，故以術人服膳爲第八。惟清惟敬，可以招神，明靈降福，惟感其意，故以齋中供潔爲第九。設哺有方，食必有數，薦味差

殊，祈召致違，故以布坐奠餽爲第十。群神將見，先兆其候，若不預知，或生不預恐怖，故以徵驗見形爲第十一。已得通靈，慮其擾亂，趣欲傳通，不勞輕露，故以淺取輕用爲第十二。役使人多被殘害，皆由馭之無法，以罹此損，故以持神馭伏爲第十三。人恃所知，多求銜販，泄於非類，必致夷滅，故以誠身保命爲第十四。庸人不信，好爲詭謗，愚冗無知，或輕譏毀，故以先達已驗爲第十五。余敢竭駑蹇，裁之鄙見，皆以義類相從，爲之章句，其經旨所用，皎如白日，文辭璀璨，婉然成章，雖不博盡群言，亦謂所宜咸備，庶好求秀哲，研覽而具備焉。

## 洞神八帝元變經

### 提綱紀目第一

黃帝曰：南斗史佐，八大鬼神，名曰皇天使者，各有爲直日，來下人間，徧遊于世，營護學道之人。其有清身重法、懇切尊事之者，必能形見，爲人勝友，行住坐卧，與人相隨，吉凶之事，必先誠告，萬象潛萌，莫不預曉，能遏未然之禍，堪致無形之福，萬金非重，此法可祕。苟能慈順忠素，不拘名宦，淡然養性，如若不知，止自爲己，專於道者，猶須盟歃，方可傳通。脫以此道輕示庸豎，銜販功能，漏泄神意，凡於授受，各無利益。慎之。勿以傲慢，輕泄反映。

黃帝曰：術者所務，在於潔志一心，專求繫念，靜照觀行，晝夜無怠，拘攝身心，絕於亂想。亂想則心識不澄，心識不澄則境界不明，境界不明則不能鑽微洞幽，妙鑒無象。豈有逸志懈惰，而能感物者哉。其能不貪軀命而

以專求爲務者，若決摩霄之水，以注千尋之壑，其易也如此。直有好善之名，而無懇志之實者，若引幽澗之泉，倒越中天之嶺，其難也如彼。然世俗羸事，泄慢不勤，猶無功效，況至道冥冲，而不銳志可以輕致者乎。勉之，務在勤心耳。

凡行術者，必須預習禹步，及與祭文，術中法用，並須闡誦口持，使其熟利。藥物奠餽，特欲精好。可以庚寅日入齋中，合藥書符。以庚子日平日寅前，入室置座，備設懸符，帶符禹步，服符服藥並訖，方執版讀文，向壇祭之。經文所用，不得蹇澁，澁即致驗差遲。此爲術次第之綱維，總收大略之要紀，置術之所必須。道曠虛寂，齋院神室，彌欲灑淨香嚴，衣服案具，最用精華，進止威儀，不得差失。

### 神圖行能第二

八大鬼神，並是南斗史佐，列宿羣神。若有術者，精誠學道，心業純粹，好餌符藥，閑習禹步，此等八神，即來奉事。如侍天官，常加覆護，安營無

怠。而吉凶未象，禍福始萌，神能逆知，預來誠告，又令術者常得斯益。然群神呈效，各有所長，業行殊能，功用不一。或能辟兵來敬，雪怨報讎。或取藥供人，令得仙道。或招官除謗，致悅興財。或令致真見神，洞鑒精魅。或能轉禍為福，取食贍飢。或作醫巫，預知生死，千里轉通，令人聰慧，廣取財金，以供學者。或令田蠶倍收，珍物盡致。或令夜行襍盜，辟虎追奔。斯等之效，動延萬品，若欲備言，書不能述，略陳功用，并寫神圖，依經列次第，條之如左。

淺青衣淺紅裙



乾第一鬼神，名興文。能興人辟兵。所出入處，人常尊敬之，能報怨讎事，往來為人除害，能却陰邪之事。其神圓冠，有三道拂，以麥索着古衣革帶，右手持刀，左手垂下。

淺紅衣淺黃裙青緣



坤第二鬼神，名興成。能取萬年不死仙藥。陸地孔中有魚長一尺，咸能取得，與人餌食，使得長生壽萬歲。昔有術者張雍、宿靖、刑辨、董宣等四人，並使此鬼取食之，應時得道，今見在陽遂山中，不妨食穀而享長年。

青衣青裙並皂緣



震第三鬼神，名興松。能令人富貴，封侯累代，襍諸讒謗，身無非咎，萬事得意，常懷歡喜，種物倍收，百惡盡止，所願之事，無不從心。

淺黃衣淺紅裙並皂緣



巽第四鬼神，名興明。能令人不習禹步，不服藥，持此文三年，自然通見鬼神，昭然了了，凡世間諸鬼、樹木、水土、山林門戶、井厠舍宅、牛羊猪狗、蟲鳥狼虎，一切精魅，世間徵怪，經書所錄有姓名者，二百四十餘種，悉皆盡見形狀。不服符藥，直持此文，三年成真。

紫衣綠緣黃裙



坎第五鬼神，名興兒。若有曲事妄加，若身不實為詐，先能變化君主，轉禍為福，高步獨脫，直至有驗。若世遭儉飢，又可使取飲食米穀，供用無窮。

淺紅衣淺青裙並皂緣



離第六鬼神，名興叙。能令術人

作醫巫，預知生死。若人家有疾病，了知差劇死生之證，可使取千里消息，委曲之旨。令人耳目總明，取金銀財帛，置於人家。祕之。

淺青衣淺黃裙並皂緣



良第七鬼神，名興進。令人宜田蠶倍收。又能取珍奇可貴之物，盡置家內，又能取食魚肉立至。可使召女子，千里之身隨意即至。不傳於他人，必祕之，萬金不得示人。

素衣青裙青緣



兌第八鬼神，名興高。能令人夜行無畏，不逢劫盜，辟二十七惡，驅役虎狼，走及奔馬。祕慎之慎之。

此八大鬼神，兩神一對，直日下來

人間，三日一番，循環相次。受之者以其直日，依經齋潔室內，戶門西樞之間，置座設祭，呼名召之，應時即無差越，百試百驗。先賢後聖，歷代遵傳，豈妄設空文，誑惑後生，何益於先達者矣。若好道之賢，切敬祭之，應時必效，不踰於瞬息。

### 論時節要第三

兩儀興用，謂之大造，大造所要，必計陰陽，陰陽所宗，依於日月，日月所樹，名曰四時，四時呈效，謂之通變。通變致功，能成萬物，萬物所生，莫不因時之所用，其利遐博，故能裁成庶類，雕刻群有，而萬象潛萌，時堪引就，品物盛興，時登遷易。故時者，引漸成形，而所引不識其成。遷物令朽，而物遷不覺其朽。故時切妙密，厥用必然。所謂蒼生是賴，日用不知，惟達者通鑒。預悟斯旨，為功必就，時不可失。凡諸動時，莫不因時。故時之所用，廣矣大矣，無所不宗。若乃天時舛互，則風雨不調，地時不休，則玄黃罕育，人時不減，則彝倫頽毀。而賢達之遊於

世，或出或處，或默或語者，莫不候時觀變，然後獲安。堯曰：欽若昊天，敬授人時。呂望曰：時不再來。難得而易失，難成而易敗者，惟時之謂歟。故時者，動天地，感鬼神，成人事，可謂三才備用，六合神功者也。然道術所宗，學者所務，莫不趣法陰陽，遵候時節，必以令月喜辰，方可行術，然所以致失者，其惟過與不及耳。此乃亡機之巨害，剋就之宏宗。故失之秋毫，差之千里。是以立功之士，必寢志於候時之境，棲神於應機之域，勤求一向，棄命損身，罄心於此矣。

常以仲季秋二，春夏孟一月，此之三朔，並為上時。春時木王，木德主仁，仁主吉慶。然四時之最，莫尚華春。春者，乃是青升玄退之初，萬物咸新之始。然則年光艷逸，氣序葳蕤，晝靜宵清，炎涼適會，時和景暢，人性溫柔。寔術者可以修志。其修者，或於聚落寬園之中，或在平原道曠之所，或入名山恬寂之處。時乃荒郊闡翠，節物開妍，竹蔭山階，茅簷接苑，花飄異

馥。兼出萬規之模，葉散殊倫，更開千種之樣。或園樓帶沼，或綺棟連山，或閑居隱室，秀霏霧裏，或冲薨聳岫，半入雲中。哀禽巧哢，風度必聞，水響崢嶸，修流海至。茲晨所尚，可馳龍馭鳳，控鵠乘鸞，策雲車而陟玄庭，駕彩輿而昇紫極，況役術小文，何往不就。故夏爲次時，秋冬爲下時，而春上時者，非獨氣和時吉，亦欲就烏新卯，及濕和藥。夏中猶有晚烏稚卯，故以夏爲次時。所以秋冬爲下時者，恐烏卯淹敗腐，藥勢不新，致術遲驗故也。事不得已，不及上次二時者，採卯令乾，秋冬行術，亦得充用，不廢通神。故經曰：惟德是馨，黍稷非馨，神明歆德，何必專在祭餽藥物而已。

潔齋日法：未入神室，七七以來，或事不得已，或七七以下，乃至一七二七以來，並得在齋潔淨，至庚子日，始得入神室察之。

合藥日法：預備藥物，以庚寅日入神室中，人定亥時，搗藥和合令訖，並書符使了。

服藥日法：以庚子日寅前入神室，先禹步服符，然後服藥並訖，方讀文祭之，符依藥日，故不重言。

祭時日法：朝祭平旦寅前，夕祭人定亥後。

神下日：興文、興成，此二神寅卯辰日，下在人家。興松、興明，此二神巳午未日，下在人家。興兒、興叙，此二神申酉戌日，下在人家。興進、興高，此二神亥子丑日，下在人家。

右八鬼神各有下日，欲召之者，庚子爲始，入神室呼名，祭而召之。

神見日限，依法敬祭十五日，來神悉見身，與人言語，與跡相隨，任問從役。

神見日時：神欲見時，或在寅前，或在亥後，或在夜半。雖舛錯無常，不離三時，術者年時所宜。

凡受神役鬼之術，蓋是玄洞隱秘之文，道士求仙之法。或有吉人，清心重道，習靜好閑，志在養生，潛神隱逸，捐名棄位，不染俗途，寢寂安虛，不交於物者，斯人致學，必致得道，非特知微知彰而已。或有君子懷仁履信，體


義行忠，志道雖深，不能棄俗，身染世塗，亦得行此。唯恐漏泄未形，輕露凶吉，或爲神擾迫，矯誑生民，遇斯患者，罕不兵戮，故非流俗所宜應行，必好之不已。春秋未高，亦不宜學。年踰四十，可行此術。然強壯之年，行無尤悔，假有韜蘊博深，其堪寶密，斯人致學，或可無累。若能爾者，可謂乾坤之水鏡，六合之明心，以後篇目，自有懇勲誠約，故不復委云。

#### 禹步致靈第四

禹步者，蓋是夏禹所爲術，召役神靈之行步。此爲萬術之根源，玄機之要旨。昔大禹治水，不可預測高深，故設黑矩重望，以程其事。或有伏泉磐石，非眼所及者，必召海若河宗，山神地祇，問以決之。然禹屆南海之濱，見鳥禁呪，能令大石翻動。此鳥禁時，常作是步，禹遂摸寫其行，令之入術。自茲以還，術無不驗。因禹制作，故曰禹步。末世以來，好道者衆，求者蜂起，推演百端。漢淮南王劉安已降，乃有王子年撰集之文，沙門惠宗修纂之句，

觸類長之，便成九十餘條種，舉足不同，呪頌各異。詳而驗之，莫賢於先舉左足，三步九跡，跡成離坎卦。步綱躡紀者，斗有九星，取法於此故也。自茲以還，更無異效，可以尋研者矣。其欲召神見鬼，禹步最爲急要，步及呪文，時須熟誦，利即神來，生即乖闊。故以前件效驗文圖，列之如左。

禹步法：於室內，術人鋪前，面向神壇，以夏時尺量三尺，爲星相去之間率。以清淨白灰爲星圖，及八卦之數。術人立在地戶巽上，面向神壇坐之，方鳴天鼓十五通，即閉氣步之。




先舉左足踐離，右足踐坤，左足踐震，右足踐兌，左足從右並作兌。乃先前右足踐艮，左足踐坎，右足踐乾，左足踐天門，右足踐人門，左足從右足並，在人門上立。然后通氣，迺爲呪曰：

乾尊耀靈，坤順內營，二儀交泰，要合利貞，配天享地，永寧肅清，應感玄黃，上衣下裳，震離坎兌，翼贊扶將，乾坤艮巽，虎步龍驤，天門地戶，人門機衡，衛我者誰，昊天旻蒼，今日禹步，上應天綱，鬼神竇伏，下辟不祥，所求如意，應時靈光，不順之者，並收伏魁綱之下，無動無作，急急如太上老君律令。

服符見鬼第五

符者，蓋是天仙召役之神文，學者靈章之祕寶。然則符文於術，無所不宗。故云：玄文垂象，王者當有衰盛；坤文兆靈，百姓所以存亡；變怪見微，室家必有善惡；龜筮呈文，筮者豈無臧否；符文已彰，鬼神何能隱伏。故道家以靈文太版、真文大字，及都籙鬼符，並是役神之祕書，階仙之典誥。真人隱要，莫不因符。能效諸符之力也，或致天神地祇，或辟精魅，或服之長生不死，或佩之致位顯達。若備言功效，則書而莫盡，所以略叙綱維，其學者宜存志矣。



乾符第一，仙人興文之臨之符。乾上懸之，位在西北。



乾符同前。此乾神姓劉，字伯升，吞之。



坤符第二。仙人興成柱下之符。坤上懸之，位在西南。




坤符同前。此坤神姓朱，字姜孟，吞之。



震符第三，仙人興松建綱之符。震上懸之，位正東。



震符同前。此震神姓劉，字亮卿，吞之。



巽符第四，仙人興明玄精之符。巽上懸之，位在東南。




巽符同前。此巽神姓張，字曹龍，吞之。




坎符第五，仙人興兒大建之符。坎上懸之，位在正北。




坎符同前。此坎神姓焦，字君子，吞之。




離符第六，仙人興叙日精之符。離上懸之，位在正南。



離符同前。此離神姓馮，字馬許，吞之。



艮符第七，仙人興進日原之符。艮上懸之，位在東北。



艮符同前。此艮神姓王，字玉平，吞之。



兌符第八，仙人興高太玄之符。兌上懸之，位在正西。



兌符同前。此兌神姓劉，字孟元，吞之。

黃帝曰：欲召八史通靈，役使鬼神者，必以庚寅日人定時，在齋室之中，以桐板方三寸，背破向建，朱塗板上，閉氣以墨書之，令八符當時即成，寢著神室之中。至庚子日置着壇側，當位八方之上，亦當日以朱砂畫八卦符吞之，見神之後，乃止。

黃帝曰：此符乃是真人神仙之所奉行，若術人精心勇切，遵誠敬修，謹依經法，所制清淨，懸之必能立見鬼神，隨念即至。久服亦得白日昇天，豈獨通靈而已。

### 餌藥通神第六

藥之爲用，廣矣大矣，然則含靈通識，莫不資之所以存身。故還丹玉液，神仙之祕道，異草靈芝，養生之要路。故藥者，可謂流形之命，聖達之心。語

其功也，或能興雲致雨，愈疾通神，威虎辟兵，禳灾厭盜。或明人耳目，或移人性靈。故金朱增年，銀屑益壽，石膏發汗，大戟必瀉，麻黃見鬼，芎藭拾針，此乃藥性，殊能無所不致。斯則與覆載侔功，四時齊變，功庸無盡，難得而稱焉。

鬼兵一分，一名鬼箭，今時鬼箭草是也。咬咀取羽，共帶皮而用之，根葉枝莖，非所須也，是山之中，即有此藥，依時取任用之。

鬼扇一分，又方扇，是苗處山澤中，偏饒此藥，故不復言。

鬼軋一分，又名石軋。此藥出處正是山陰石上、水流過之處，石上水苔是也。但是諸山陰石上水流過之處，即有此藥。石苔是形如水中苔。

鬼苗一分，又方用鬼督郵苗，名爲鬼苗，見用之亦有效驗。

鬼臼二分，一本一分鬼扇根是此藥，世間常用易識，故不復委細注之。

真丹砂五銖，此藥出雄黃中，然與雄黃少異，其形色黃明潤澤，勝於雄黃，不甚有熏黃之氣，然猶是雄黃之類。

烏卵三分。易識，故不廣言。二月、三月春時，於烏巢中採取，未經斷壞者，良用之。若須合藥，及濕即須合。可取十五許箇，傾取黃白著瓦器



中，日曝令乾，刮取紙裹，藏之，擬秋冬用。所以乾之者，此藥既是一時之物，恐非時而求之，難可卒得，故須曝乾以備不虞。臨須服藥，當以泉水漬之，卵令其濕液，然後和藥爲丸充用。

**合藥法：**預備六種藥物，令六味具足，事事新香，不得腐敗。依經擇取庚寅日，淨持諸藥，取人定時，在齋室中，背破向建，合搗細篩，以烏卵閉氣，和之爲丸。合藥時不用一人知見，惟術者自掌，泄即無驗，徒費施功，不可不慎。

**服藥之法：**依經擇取庚子日寅前，入在神室，先懸符帶符了，次即禹步，服符藥訖，然後祭之。朝祭之前，即須一度服符，一度服藥。暮祭之前，又一度服符、服藥。符服兩道，藥兩丸，丸如梧桐子。一日之程，以此爲度。服時必須口含一丸良久，令藥口中解散，然後吞之，不得入口即吞，致神不降。但精心敬肅，依法服之，十五日內，此八鬼神悉來見身，共人言語，百試百驗，決得非虛也。


若恐鬼神傳通虛誑，譎詐不實者，可以藥一丸纏埋，著初見神所立之處

地中，即所召鬼神，永世不能妄語向人。此術厭之，數用有驗，神良假爲此術，衆事具足。若不服藥，無所見。要須服藥，始得神通，種種役問。此術之中，最以服藥爲其宗要。

**學道人言勝**，先張魯稱道仙經有四十卷，八千萬言，考研機實，或藥貴難得，絕穀不食而仙叵得，或食穀如常藥，而萬年神仙。所以然者，聖人不同，各師其意，故致如此。常廣寫仙方，見藥問鬼，鬼自識之，語人善惡，鬼神有信，實不虛言。

### 神室虛所第七

**召役之法**，要在山中虛靜之處，不能遠尋巖藪，或於聚落之間，訪覓寬閑園宅之中，置立齋院，必是傍無孝家。此室必須新造，若事不得已，舊室亦得充用。神室之中，特不得曾經停屍，及六畜產污。以香泥塗地洒掃，勿使不潔，致術遲驗。仍恐致室違經，故圖神室儀形如左：



爲術之處，置立墻院，或豎柴施柵，但令蒙密，闕不見內，即得充用，院方二十步，若事不得已，寬窄任人。去院內南墻、西墻各四步，置神之室，室令三間，間中丈六。東間壁下，術人地敷鋪，頭向北舒。中間南向開戶。西間南西北三面，各開一戶。西間下方八尺，於四面各二階道。以白墻土，和白草香末，熟搗泥壇，極令香白可愛。比至祭日，令乾，不得濕穢，勿令臨時不潔。神室東置齋室，大小方丈，神室東西近南角，開門通齋室，以厚席簾之，不用露見。神室之內，又開方尺窗，以紙糊，使室內明了。齋室北又置一室，亦令方丈。齋室北面東角開門，

令通此室。此室北面西角通門，擬術人出入。供祭具雜物，悉著此室之中。凡諸室門，兼令有簾有扇，神室宜以箔簾之，餘室以席簾之。

### 術人服膳第八

衣者可以禦寒濕，可以表禮敬，故

衣弊則慙避之志露，服新則勇伸之意生。垂纓鳴玉，則文雅之懷播；擐甲持矛，則雄武之情逸；布衣衰絰，則悲悼之義存焉；葛冠草履，則希道之心銳矣。以情隨服變，意逐事遷，表裏相感，中外合趣，所以動術者之心，致神來之意。求善者存性命，視奢儉。重肉美膳，則驕誕長淫；菜蔬簞食，必欲微神靜。衣食者，人事之急也。故道誠持之於先，臭味垢衣，猶非代俗所宜，況術者清嚴，安可輕耳。其要者也，必去奢節儉，雅素爲真，或著葛巾，或鹿皮冠，裙衫或裙襦，帛袜或氈靴，並得充用，衣裳新淨。若賓遊遠處，不得已，始取俗服，新衣亦得充用。

術人在神室東壁下，地敷氈被褥席，並得行用者也。

術人日得再食，食粥食鹽，亦得食飯與果。食常欲少，不可飽，令體內虛弱，弱即神祇易着，強即召神難成。可預儲十五日調水及食菜等，皆令備足。不得觸禁日日遠輩，無致誼雜，務在清虛，寂靜爲最。

### 齋中供潔第九

人事之先，莫尚於恭敬。修敬之所先，豈過於鬼神。故身恭可以服人，心敬可以感物。祈禱之禮，則先之以粢盛；召致之儀，必須預備以齋潔。當想神來，思神所能，存神所在，惟清心息，不亂而已，此外無所間然。術者當以庚寅日前三七日，來在齋室中，潔淨香湯，七日一浴，不得色穢、酒肉、辛葷、嗔怒之類，並不得爲。尤不用出齋室，浪與人言語，獨在齋室，清淨勤恪，專念神形，不得懈怠睡眠，以致驕慢。若能百日潔齋，術驗彌速也。從庚寅日前三七，乃至庚子日前，並在齋室中潔清，以己亥日香湯洗浴，即以此日夜四更中，入神室，敷設祭具使了。寅前入神室，依法祭之。從庚子日入神室

祭神以去，彌須敬切儼然，不得趣作出入，碌碌躑躅，以忤神威，兼亂術人之想，想亂不精，術必遲驗。如人鑽火，務在心速，速即應機，遲即疏闊，推此觸類可知。神室之中，日沒以後，荏子脂油，爲燈然之，不用過明，如常燈也。置燈在術人鋪南壁下，燈炷小大如簪細頭，又以絹籠之，纔使朧朧，類似白夜，不假分明，即鬼神不安，闇即人眼不見。以意裁量，折中取用。可斟酌脂油多少，令得達曙，不得夜半燈滅，中起續之，致延紛雜，令術者意亂，觸忤神來。惟欲靜心爲務，燈脂寧多而不得少，寧闇而不明。一一依經，不得差較。

### 布坐奠饋第十

靈祇分王，各有其所宜。布饋設饌，必在其方。猶如分野，儀無亂雜，五色體殊，豈容舛互。然則祈禱之文，莫過於祭祀，薦神致祐，豈踰於美食。然則心無至誠，群神不降，奠味不馨，則饋徒設。祭神所要，惟務心切食精而已，術者當以庚子日入神室戶西間

下，壇上白茅爲薦，置：

興文、興成，此二神之座於壇上東面，令坐整當階道，二座相去二尺餘，座做此設之。興松、興明，此二神之座，於壇南面。興兒、興叙，此二神之座，於壇西面。興進、興高。此二神之座，於壇北面，燒白香塗灑神壇，及種種掃潔，並用此香。

凡召役鬼神及祈禱，皆用此香。此香鬼神之所歆饗，餘香非是所用也。世人又名此香爲茅，田野之間偏饒。此香晉陽山中最是所出，牛馬畜牧不食此草。白茅爲薦，此八神之坐，悉以白茅揆紐，狀如藁薦，形似傍箕，還以茅爲繩編之。作經並不用麻茅薦，大小方尺。採茅時，若靈茅三脊者最良，必無可取，但令鮮潔，不得輕示穢污，使神不響。此乃神祇所坐，是以特用香嚴置八神坐，以茅薦置壇四面，面別兩薦，薦在壇內，不得出壇。一坐相去二尺，坐去角二尺。則別一吧，黃絹爲之，大小方一尺八寸。神坐前各置一吧，悉着坐東，令神東面受祭，置設吧訖，然後吧上設食。吧別兩盞，盞中安

酒必滿着，不得令少。酒醇清，不得添和，使有灰水。酒必須自醞，事不得已，始可外求。吧別安脯，必着鹿脯，特須新淨，不得腐敗，微燒令熟。其脯方寸者，一枚可爲設。若無鹿脯，可求之牛羊雉兔，亦得充用。吧別安好棗，棗安四枚。當用青州東陽所出之者特好，治事使之潔淨無塵垢，並須完全，不毀不蠹敗，始可堪用。乾香美者，方堪獻上。若無東陽，可求隨鄉所出，亦得充用。若七八月，社中復須設生棗，亦得充用。吧別安栗，栗安四枚，當取幽州固安所出者，特欲新香不朽壞者，炒之令熟，去皮，必使色貌黃潤，氣息氤氳。若無固安者，隨所出亦得行事。吧別安餅，餅安四枚，白餅糲熟，不用脂煮，餅徑一寸，直漱白麵爲之。麵必須當年新麥，不得蒼鬱。作餅必須清淨，不得穢器，及婦女爲之。壇上四面，面別置坐，坐東敷吧，吧別設之食，食數依經，不得損益，莫必須餽，不得一設再祭，以招不敬之失。徹下之物，宜術人服之，必致神來之速。祝文以

墨書桐板，讀文跪啓告板，廣一尺，長一尺二。朝夕二祭，常讀此文，祝詞曰：

某爲南斗，按行天下，除諸不祥，與子爲友，自東徂西，無復限礙，我常食汝，最上飯食，當與吾取金銀財帛，陰密之事，吉凶善惡，未來過去，使我預知。吾意所好，盡皆令得，無爽言信。今奉美酒、香棗、甘脯等饌，庶事馨香，願垂酣飲，醉飽爲度。早來隨我，永不遠離，畫形爲友，莫相負失。急急如律令。

#### 徵驗見形第十一

自是之後，即有影響，或即見身，或夢非常之物。但令心正不亂十五日，來神悉見。形當欲見，術人精神悸悸，驚怕憧憧，遍身毛豎，體中寒熱，悚惚不安。此神見之先徵，獲驗之決候。初見神時，但爲賓主之禮，無跪拜之儀。神初見之時，其形甚微，倏忽之間，漸漸分炳，形見未明，不須與語，彌加專念，勤祭而已。須臾形露，鬱耳分明，璨然覩訖，心念欲問，神即答人，自

道姓名，於是相隨，永不乖背。但人鬼道別，幽顯理殊，乍見群神，多怒恐迫，特須勇志，不得驚惶，見說少時，心自安帖，因此相隨，常爲勝友，潛萌任決，惠察無窮，徹視之明，自茲而著。術已訖，即於壇上盡供，備設竟夜醮神，必使酒沃滂沱，散餼狼藉，鼓舞盡情，寤寐達曙，敬玩斯徵，深懷欣泰，令人神慶悅，博盡歡娛。仍須七日以來，寢在神室，縱橫數祭，不得習常。此外任

行，無復限礙。必有官事牽纏，義不得已，當以其事啓白神知，方可出齋。假出齋外，猶須自抑，每事存心，務令聲色和柔，動止庠序，庶欲沈緩，勿得驚神。神初附人，其如調鷹馭馬。不得不勤之於念慮。凡與世交，尚須益敬，況持神馭鬼，安可輕哉。當初受得神時，術人作十許日，意情之中，不用見人。所以然者，乍得通神，術人耽翫，專味神談，欣於效驗，每事必知，所疑咸決，逸於新愛所致，此必須自抑，不得過然，令人着邪，返於正道。此之證候，令預件告庶，令術者深加防護，就

於休善，不得慢於舉範，被人疑已近左道之謗，君子所恥之。神術已驗，令人百日以來，神志怳怳，不能自安，或欲勤產求富，或欲學問立名，或欲規位希官，或欲捐家隱逸，如斯等比，思想萬端。若逢此候，特須忍抑，不得隨神所欲，種種施造，若不忍迫，必有災累。已過百日，還即清淨，人神吉正，永絕祆徵。術人者宜須預識，深以防之。

### 淺取輕用第十二

受得神訖，恐人情膚薄，不制剋志靜心，多矜所知，廣露凶吉。或於帝王之所，或在俗網之中，因神授訣，泄其徵驗，如是之徒，反被兵戮。自古以來，此輩非一，若飲羸略知之，不用言與鬼神爲友者，故立斯篇，微取少驗，纔得通傳而已。如此用者，決無災橫，全身兼術，不亦休乎。

術曰：淺取之法，可依前大術，一無別。唯不須服藥餌，直禹步訖，以藥一丸置頭髻下，又以兩丸塞耳中，又以兩丸內鼻中，又以一丸飾齒脣目臍中，二七日內，依法祭之，即得見神，亦

得具決吉凶。雖見神形，拙贗不甚分明，如藥真受之者，依前大法，服藥求之。十五日內，決定還得斯術效驗，無往不剋。唯恐羸率不慎，銜販猖狂，希道求生，反貽殃滅，若能徧知世事，杜口不言，預見安危，懷之不泄，止自養生獲安而已者，永無兵災，終離橫禍，必致神仙，享齡天筭，財寶貨產，坐延巨億，榮位宰輔，立求可至。但道士清虛，寂靜爲務，通人懷遠，棄俗清心，豈可有希財職，而論世利。故略說道要，恐未能修，凡所施爲，無所不致，所以導初學者，令知道義之宗耳。

### 持神馭伏第十三

黃帝曰：人性能通鬼神，而神與人道理有殊。神能告人吉凶，而人塗與鬼神體別。然後聖鑒圖備，盡性窮微，遂乃闡幽顯用，獎導群俗，敷演術藝，能役鬼神，憑茲利益，以致仙道。凡諸學者，若已證聖，心自明悟，不藉餘緣。其未聖以還，下及凡俗，設有聰明才智之賢，索隱研幽之士，此等適可閑於庶務，體識人倫。凡夫境界，自有

限量，肉眼所鑒，何能逆覩要籍神傳，方預不測。是聖人垂文教、役鬼神，欲令學道者逆覩未萌，坐知萬里，養生避害，以致茲益，可謂仁人之惠，其利博哉。但人鬼之道隱顯，非類而合，理會必難。且以父子君臣言之，若父子情乖，必有凶逆之徵，君臣猜貳，寧無吞殘之戮。況以有形世俗之人，驅策冥潛無形之鬼，斯趣微哉難哉，而馭之非易。故略叙持神要用，曉於將來，冀味道之賢，景行斯益。

凡召得鬼神，與人相隨，義如昆季，事等朋友，必須終身思念，懷敬數存，不得廢闕，使神心急，傳事致虛。以其虛損，人心不平，神知不平，神即忿怒，與神成隙，隙成多陷人以兵，勿得怠惰不勤，以招殃釁。

凡召得鬼神，不得過禮寵之，專從神語。寵過則神鬼驕，驕即慢人，人怒神即不平，人神成隙，必陷人以害，不可違失，以致災凶。

凡與神居，不得過行不善，或殺或淫、或佞或盜，或矯神言，恐嚇覓物。

斯等穢污，是神所惡，人以神惡，人或不平，人神成隙，多陷人以害。若履忠信而行之，必延福慶，吉無不利。

凡通鬼神者，或令人性移易，或令人健嗔急性，或令人耽行淫色，或令人多貪貨賄，此乃所得鬼神性品不同，故致如是。必須審探分明，深自抑退，不得任信神言，致使人倫舛互，舉止失常，以招殃禍。

凡鬼神體性，惟欲廣道吉凶，博傳衆事，彰其驗者，銜露功能，必須抑忍，不得浪泄，唯可心知，不得口道，道即來兵，泄即致害。斯事如影之隨形，響之應聲，特宜靜慎，即不罹惡。

凡與神居，鬼神之性，專欲令人傳其效驗，聘其神著，以露功能。人亦抑之，多為鬼神反來耗擾，或令人飲酒過度，猖狂狃厥，精彩昏錯，怛然不安。唯可堅忍，勿為彰露，須臾之間，還自安靜。但於至親眷之所，或在款曲朋友之間，靖密熟鍊，知其賢善，或可託以龜筮，或可陳其夢想，或相氣色，或假醫方，或因脉候之中，種種假託，微

依神告，趨作傳通，必宜以實，為其利益。一則暢泄神心，以致欣悅，二則申事以精，便加穎利，永無痼疾，神不見尤，得濟拔困厄，救度危亡，廣利群生，為世備益，可謂次聖。以還為人父母，真人廣濟，何以加茲，斯則後食獲利之道，唯英明聖達之流，乃能精心於此。

凡役鬼神之法，不得將不急之事，令神卜度，此名無理用神。不疑之事，人情所及者，亦不得故問，此謂勞神，神或不悅，不悅即於人致凶害。但惟欽敬，請問吉凶，無不利矣。

凡欲役鬼神之法，特須靜慎，敦厚謹密慈愛，先持身心，然後方可持神。特不得慢神，不得過為寵着，唯得微行假託，以暢神情。備如上說，此持神之經綱紀，又安知序目，千誠萬慎，唯須敬神，閉口不泄為務。漏即殃禍立至，兵戮無疑，慎之慎之。故聖人有言，追悔不如預防，斯之名教非虛論。

#### 誠身保命第十四

黃帝曰：聖人保命之最，莫上於身心。利害身心，豈過於善惡。善惡

所起本心，心法不住攀緣。是用所緣者，名曰境界，能緣者，名之曰心。故萬品所起，莫過於心。萌於心者，名曰行業，行業所標，名曰善惡。故縱欲爲惡，息貪爲善。善者能爲濟俗出塵之益，惡者必作敗德染穢之資。故聖人

知無形，而用心者也。形不自運者，心也。然心不託於身，則不能顯班備用，身不藉於心，則亡滅不起。故身心體異而理符，致用萬善而趣一。故能表裏爲用，動靜相持，身無獨往，爲心所使，心法不淨，唯欲攀緣，身量無涯，納行不息。故心爲凡聖之根，身爲苦樂之聚。聖人知患生於心，愆必由己，是以清心除患，潔志消愆。凡俗之流，其即不然，肆情縱欲，不知欲出於心，侮慢矜奢，不知慢生於己。唯聘愚暴，不顧其身，故以禍難所階，由之不識危亡，自此日用不知。故聖達愆愚，而興教道，欲令學者，夷志以息事源，拘身以遏貪緒。故設禮儀所以成俗，陳仙道所以出塵，二教備聞，致濟群俗。而未達還無，以還無預鑒未象，故遵之祕

術，召役鬼神，庶以逆見存亡，預知利害，令去危就安，以致仙道。故志逸者慕道以存生，好寂者清神以息務。自非蘊解中心，藏言不納，何以策馭群靈，保其遐筭。略陳誠身所要云爾。

凡役鬼神者，其事極難，必須靜慎，省作交遊，不用向帝王宰相之間，過爲關涉。多喜不忍所知，泄其神效，漏即披猖，死亡交至，此則誠慎之，誠慎之。

凡役鬼神者，永世不得語人，自道役使，泄即殺身，死不旋踵。且父子之間，不用令知，況百姓浪人，而得聞此。終身閉口，不得輕泄，泄即致禍，以自兵屠。此則身誠，慎之慎之。

凡役使之人，自恃其能，恣行不善，或矯變神言，恐迫取物，或伺人災隙，銜賣求利，或欺詐百端，詭誑千等。如斯過失，書不能盡，所謂負乘竊據，滅不踰時，明神有知，必加殛罰，是則勤誠，可不慎歟，可不慎歟。

### 先達已驗第十五

嵇康，字叔夜，晉大夫也。時人稱

其流輩，山濤、向秀之徒，號爲七賢。而康蘊業通經，博極群史，作養生之論，刊正典音，好屬文筆，尤工詩賦，學亮多謙，英偉通識，黃老冲虛之教，玄洞祕要之書，莫不盡窮，貫之心胸。遂寫斯文，畜之不倦，三年長嘯，呼八神之名，神乃見形，爲之驅役，預識未萌，坐延萬物。神又授康琴曲廣陵散，名傳今日。康竟不行禹步，又不服藥，直寫禹步服藥之文，懷而耽翫，亦得見神，種種役問。

沙門惠宗者，不知何鄉人也。但好斯法，繕寫此文，未受之間，遂在中嶽頂上，夏坐安居。居日未終，悉見群神，任之驅使。然仲舒令巫火自灼，林宗有知人之識，佛圖澄云趙必亡，釋道安言秦必敗。察斯皆因此術，以致其能。若無憑賴，竟與凡俗有何殊別。然凡世俗之人，學此術者，多生恐惑。所以然者，鬼既非常人所見之物，想預覩神，逆畏擾害，以此疑懼，信受致難。遂使探蹟之賢，闇於知解，雖有避害之名，而無離禍之實。徒有攝生之志，終

無延壽之真。皆由阻於通役，以自防護。余每愍其事，遂引先賢曾經驗者，著之篇目，庶俟索隱志道之賢，勤於斯事矣。

魏永平元年，有幽州人劉助、高榮祖、顏惡頭等三人，於幽州西山中學道，經已七年。忽然大雪尺餘，有一仙人自云：我姓呼延，字道僧。即教榮祖上備，教惡頭役鬼，教劉助使此八神。助因與朱天柱作幃幄，其洛京即天柱，除助作僕射，尋作幽州刺史。助教樂崇欣，欣教雁門王旭道人，旭教永泰寺靜愜，愜教弟子僧儒，儒教劉徽、祖積。積再於儒邊口訣，具足得之，今故傳之。冀仙術不朽，每授與好事者，無不獲驗。故左元放、鄭思遠、葛洪、公明、景純、卜裊，皆悉得之。嘗見其法，不能具備於此。神仙召役文圖，祕呪證經，東井沐浴之日，役召鬼神，非得此不獲得之。

正月十日，時加亥；二月八日，時加戌；三月六日，時加酉；四月四日，時加申；五月朔日，時加未；六月二

十七日，時加午；七月二十七日，時加巳；八月二十二日，時加辰；九月二十日，時加卯；十月十八日，時加寅；十一月十五日，時加丑；十二月十二日，時加子。

右此天上東井沒時，以沐浴召諸鬼神，皆得如意，來集役使。得此日沐浴召請，無不神驗。又使人富貴，常與天仙聖人交通，延年益壽，此乃道氣養神，長生久視之要道也。祕之不傳矣。

洞神八帝元變經

（王卡點校）

## 089 太上洞神行道授度儀

經名：太上洞神行道授度儀。  
撰人不詳，約出於南北朝。輯錄  
五種洞神三皇齋儀。一卷。底  
本出處：《正統道藏》正一部。

### 宿啓法

向北方再拜長跪，叩齒三十六通。

具位小兆真人臣某，謹上啓九天  
太上道君、太上丈人、九老仙都大神、  
九炁丈人、三皇真君、八帝尊君、玄君  
仙官、太玄真神、三十六天靈司官君、  
璇璣玉衡七星搖光君、三台紫宮北極  
天尊、天一太一君、太微玄神華蓋上  
靈、二十八宿中外靈官、五嶽八山四瀆  
九源洞天陽臺神州仙府震水大澤天后  
內宮九天九地無極世界一切衆神。今  
謹有辭讀辭訖云：今謹因朝禮之次，宿  
啓以聞，唯願諸神，鑒臨管護，禳災降

福。謹清齋潔己，期靈皇真，懺謝罪  
過，九祖以來惡根惡對，願得赦除，愆  
謫解脫。三官告下北帝，削落赤簡，過  
度厄難，尅保安寧，荷福元元，受帝之  
恩。畢，叩頭三十九下，又再拜。

### 言功法

向北方再拜，長跪，叩齒六通。

具位小兆真人臣某，謹上啓九天  
太上道君、太上丈人、九老仙都大神、  
九炁丈人、三皇真君、八帝尊君、玄都  
仙官、太玄真神、三十六天靈司官、璇  
璣玉衡七星搖光君、三台紫宮北極天  
尊、天一太一君、太微玄神華蓋上靈、  
二十八宿中外靈官、五嶽八山四瀆九  
源洞天陽臺神州仙府震水大澤天后內  
宮九天九地無極世界一切衆神。謹爲  
甲乙某事，行道所請衆神，鑒臨齋所，  
管衛勤勞。今既事畢，願各還宮室，隨  
功受賞。謹因朝禮，奉辭以聞，清齋潔  
己，期靈皇真，懺謝罪過，九祖以來惡  
根惡對，願得赦除，愆謫解脫。三官告  
下北帝，削落赤簡，過度厄難，尅保安  
寧，荷福元元，受帝之恩。畢，叩頭三

十九下，又再拜。

次燒香，叩齒二十四通，呪曰：

香煙之女，上白皇君，小兆真人甲

乙，清齋絕塵，期靈五通，上願成真，滅

禍生福，上昇三人。

次詠陽歌一首，一周而出。

清角陽歌梵，飄飄激十方。青青

萬卉曜，携我造九重。西絃抗音調，感

悟東王公。

### 洞神行道儀

向北燒香一周，叩齒二十四通，呪

曰：

香煙之女，上白皇君，小兆真人甲

乙，爲某種事云云，清齋絕塵，期靈五

通，上願成真，滅禍生福，上昇三天。

北向天皇，再拜長跪。

具位小兆真人臣某謹上啓：太元

三玄空天甲子元建天皇真君、太浩元

陰凝天，今爲某事云云，故沐浴清潔，

招真降靈，上願帝王身康國寧，下乞某

身福祚無窮，七世父母解脫愆羅。唯

願皇君，乞蒙照臨，垂神下盼，鑒察丹

心。叩頭三十九下，又再拜。



次向西南地皇，再拜長跪。

具位小兆真人臣某，謹上啓三元素虛玉天甲申元建地皇真君、南和三太非隆，今爲某事云云，故沐浴清潔，招真降靈，上願帝王身康國寧，下乞某身福祚無窮，七世父母解脫愆羅。唯願皇君，乞蒙照臨，垂神下盼，鑒察丹心。叩頭三十九下，再拜。

次東北向人皇，再拜長跪。

具位小兆真人臣某，謹上啓七微浩鬱虛天甲寅元建人皇真君、上非昌子南丹，今爲某事云云，故沐浴清潔，招真降靈，上願帝王身康國寧，下乞某身福祚無窮，七世父母解脫愆羅。唯願皇君，乞蒙照臨，垂神下盼，鑒察丹心。叩頭三十九下，再拜。

向北方九天九拜，

向西方九天九拜，

向南方九天九拜，

向東方九天九拜。

次詠陽歌九首，三周。

清角陽歌梵，飄飄激十方。青青

萬卉曜，携我造九重。西絃抗音調，感

悟東王公。

元洞啓運首，始陽萌萬芽。和風振瓊條，高林耀雲羅。勾芒勸農業，日月煥東遐。仙賢遊玄圃，飛梵起鳴笳。控景太霞室，齊輪九天庭。衆仙抗飛梵，陽歌時時鳴。自非靈人億，焉能禮化貞。

惠和陰陽歌，二儀稟半炁。棲憩志飛仙，不樂時所牽。未覺凌虛遠，超超已高玄。悟嘆馳競子，不知養命根。

鬱已盛陽茂，吟詠南金梁。融風拂林表，朱鳳引來翔。鳴梵乘虛起，逍遙奏九章。

結駕素林秀，命節叩金鐘。鳳吟八音和，真華耀王容。陽歌仙房上，飛簫兼來從。吾我自相韻，誰能明契中。

遊浪嵩嶽杪，茗茗戲韶松。零零高仙客，窈窕詠陽歌。齊聲九絃唱，息合妙音和。

明燈續長夜，玄炁照幽堂。飛梵鳳林表，清風拂玉璫。陽歌交來唱，四軒曜朱光。

列列廣寒庭，遼遼讌仙室。玄冥

唱陽歌，八景披雲出。緒沐合陽精，長梵誦太一。自非篤志賢，安能好遙逸。

向北方再拜長跪，叩齒三十六通。

具位小兆真人臣某，謹上啓九天太上道君、太上丈人、九老仙都大神、九炁丈人、太元三玄空天甲子元建天皇真君、三元素虛玉天甲申元建地皇真君、七微浩鬱虛天甲寅元建人皇真君、八帝尊君、玄都仙官太玄真神、三十六天靈司官君、璇璣玉衡七星搖光君、三台紫宮太極天尊、天一太一君、太微玄神華蓋上靈、二十八宿中外星官、五嶽八山四瀆九源洞天陽臺神州仙府震水大澤天后內宮九天九地無極世界一切衆神。今爲某事云云，謹清齋潔己，期靈皇真，懺謝罪過，九祖以來惡根惡對，願請赦除，愆譴解脫。三官告下北帝，削落赤簡，過度厄難，尅保安寧，荷福元元，受帝之恩。畢，叩頭三十九下，又再拜。

次燒香，叩齒二十四通，呪曰：

香煙之女，上白皇君，小兆真人甲

乙，清齋絕塵，期靈五通，上願成真，滅

禍生福，上昇三天。

次陽歌一首。一周而出。

清角陽歌梵，飄飄激十方。青青萬卉曜，携我造九重。西絃抗音調，感悟東王公。

### 洞神三皇醮祭儀

依經採錄，以爲要用，備同志者共修。先於子申酉三處布坐，香火、燃燈、几案、龍綵幡，及本命三椀九杯、酒脯果餅等物，如法安置。若王公大人爲重事求恩福者，自依經戒。若庶民貧素之士，隨豐儉之宜，唯當盡心竭力，以爲精至。

初入，依次燒香一周，北向叩齒二十四通，呪曰：

香煙之女，上白皇君，小兆真人某，清齋絕塵，期靈五通，上願成真，滅禍生福，上昇三天。

向北方天皇，再拜長跪。

具位小兆真人臣某，今故沐浴清潔，招真降靈，謹設微禮，奉請太元三玄空天甲子元建天皇真君、太浩元陰凝天，願垂神下降，鑒察丹心。又再

拜。

向西南地皇，再拜長跪。

具位小兆真人臣某，今故沐浴清潔，招真降靈，謹設微禮，奉請三元素虛玉天甲申元建地皇真君、南和王太非隆，願垂神下降，鑒察丹心。又再拜。

向東北人皇，再拜長跪。

具位小兆真人臣某，今故沐浴清潔，招真降靈，謹設微禮，奉請七微浩鬱虛天甲寅元建人皇真君、上非昌子南丹，願垂神下降，鑒察丹心。又再拜。

次酌酒向天皇君，再拜長跪。

具位小兆真人臣某，謹重啓天皇真君、太皓元陰凝天，今爲某事云云，敬設微禮，願爲醉飽，賜垂救護，得蒙恩福。上願帝王身康國寧，下願某福祚無窮。叩頭三十九下，又再拜。

向地皇西南，再拜長跪。

具位小兆真人臣某，謹重啓地皇真君、南和王太非隆，今爲某事云云，敬設微禮，願爲醉飽，賜垂救護，得蒙

恩福，上願帝王身康國寧，下願某福祚無窮。叩頭三十九下，再拜。

向人皇東北，再拜長跪。

具位小兆真人臣某，謹重啓人皇真君、上非昌子南丹，今爲某事云云，敬設微禮，願爲醉飽，賜垂救護，得蒙恩福，上願帝王身康國寧，下願某福祚無窮。叩頭三十九下，又再拜。

酌酒向天皇，再拜長跪。

具位小兆真人臣某，謹啓天皇真君、太皓元陰凝天，上勞神駕，鑒臨微禮，乞賜恩福，得如所願，不敢稽留，謹再拜奉辭。

向地皇再拜，長跪。

具位小兆真人臣某，重啓地皇真君、南和王大非隆，上勞神駕，鑒臨微禮，乞賜恩福，得如所願，不敢稽留，謹再拜奉辭。

向人皇再拜，長跪。

具位小兆真人臣某，重啓人皇真君、上非昌子南丹，上勞神駕，鑒臨微禮，乞賜恩福，得如所願，不敢稽留，謹再拜奉辭。

次燒香，叩齒二十四通，呪曰：  
香煙之女，上白皇君，小兆真人  
某，清齋絕塵，期靈五通，上願成真，滅  
禍生福，上昇三天。呪畢，收梓撤坐。

### 授度儀

#### 立壇式

壇方三丈，高下隨人。開三門，天  
皇門在子，地皇門在申，人皇門在寅，  
各施榜題之。亦可隨人多少大小作  
之。欄纂燈火，以意消息。出入當從  
人皇門行，若露文訖，遇風雨，可於室  
中度事。

天皇鎮坐，綵用皂繒一十八。地  
皇鎮坐，綵用白繒一十八。人皇鎮坐，  
綵用青繒一十八。本命綵隨年數，天  
子用疋數，王公用丈數，庶民用尺數。  
天子用紫紋，自他用縵，隨方色，悉置  
人皇案上。金龍三枚，庶民用環。青  
繒幡三枚，各長三尺。朱書三皇內文  
於其上，令如幡法。竹竿長一丈，懸之  
於三皇之位。几案香火三具，以安龍  
綵等物及三皇經。前件壇中所須，通  
爲國爲民，大灾重厄，求恩請福，行道

授度，悉用如此施置。受經者信用白  
絹四百尺，貧者四十尺。

行道畢，師徒外壇，叩齒二十四  
通，呪曰：

香煙之女，上白皇君，小兆真人  
某，清齋絕塵，期靈五通，上願成真，滅  
禍生福，上昇三天。

#### 次向北再拜呼：

太元三玄空天甲子元建天皇真  
君、太皓元陰凝天。

#### 次向西南再拜呼：

三元素虛玉天甲申元建地皇真  
君、南和王太非隆。

#### 次向東北再拜呼：

七微浩鬱虛天甲寅元建人皇真  
君、上非昌子南丹。

次以所受經首二尺，及盟文舒之  
於案上，俱再拜。弟子南向伏，師北向  
長跪。

具位小兆真人臣某，上啓太上元  
君、仙都大神，三皇真君，今欲授某郡  
縣鄉里某三皇寶文，未知可否，伏須告  
命。

便伏一時，須無風，便起再拜。弟  
子又伏，師長跪讀盟文訖，共噀丹水，  
朱筆共畫一於盟文之下。訖，弟子持  
信伏。師執經跪，叩齒二十四通，心存  
三宮各一真人，如嬰兒之狀，不著衣，  
口吐紫炁以熏經。徐而呪曰：

太上之天文，傳說天地初，皇人宣  
玄旨，是爲至真書。賢者今奉受，志願  
昇太虛。畢，弟子再拜，置信案下。受  
經畢，又各再拜。

#### 次詠陽歌三首，巡行一周。

清角陽歌梵，飄飄激十方。青青  
萬卉曜，携我造九重。西絃抗音調，感  
悟東王公。

元洞啓運首，始陽萌萬芽。和風  
振瓊條，高林曜雲羅。勾芒勸農業，日  
月煥東遐。仙賢遊玄圃，飛梵起鳴笳。  
控景太霞室，齊輪九天庭。衆仙  
抗飛梵，陽歌時時鳴。自非靈人億，焉  
能禮化貞。

次還天宮，北向再拜，長跪叩齒三  
十六通。  
具位小兆真人臣某，上啓九天太

上道君、太上丈人、九老仙都大神、九炁丈人、三皇真君、八帝尊君、玄都仙官太玄真神、三十六天靈司官君、璇璣玉衡七星搖光君、三台紫宮北極天尊、天一太一君、太微玄神華蓋上靈、二十八宿中外靈官、五嶽八山四瀆九源洞天陽臺神州仙府震水大澤天后內宮九天九地無極世界一切衆神。謹與某等對齋行道，授度事訖，所請衆神鑒臨齋所，管衛勤勞。今既事畢，願各復諸天位，加品帝秩，隨功受賞，謹上啓聞。便再拜。

次呪曰：

香煙之女，上白皇君，小兆真人某，清齋絕塵，期靈五通，上願成真，滅禍生福，上昇三天。

次詠陽歌一首而出

清角陽歌梵，飄飄激十方。青青萬卉曜，携我造九重。西絃抗音調，感悟東王公。

朝禮儀

北向燒香，叩齒二十四通，呪曰：香煙之女，上白皇君，小兆真人

某，清齋絕塵，期靈五通，上願成真，滅禍生福，上昇三天。

次北向天皇，拜拜長跪。

具位小兆真人臣某，謹朝太元三玄空天甲子元建天皇真君、太皓元陰凝天，今爲某種事云云，故沐浴清潔，招真降靈，上願帝王身康國寧，下乞某身福祚無窮，七世父母解脫愆羅。乞蒙皇君垂神下盼，鑒察丹心。叩頭三十九下，又再拜。

次向東北人皇，再拜長跪。

具位小兆真人臣某，謹朝七微浩鬱虛天甲寅元建人皇真君、上非昌子南丹，今爲某種事云云，故沐浴清潔，招真降靈，上願帝王身康國寧，下乞某身福祚無窮，七世父母解脫愆羅。乞蒙皇君，垂神下盼，鑒察丹心。叩頭三十九下，又再拜。

向北方再拜長跪，叩齒三十六通。

具位小兆真人臣某，謹上啓九天太上道君、太上丈人、九老仙都大神、九炁丈人、三皇真君、八帝尊君、玄都仙官、太玄真神、三十六天靈司官君、

璇璣玉衡七星搖光君、三台紫宮北極天尊、天一太一君、太微玄神華蓋上靈、二十八宿中外靈官、五嶽八山四瀆九源洞天陽臺神州仙府震水大澤天后內宮九天九地無極世界一切衆神。謹清齋潔己，期靈皇真，懺謝罪過，九祖以來惡根惡對，願得赦除，愆謫解脫。三官告下北帝，削落赤簡，過度厄難，尅保安寧，荷福元元，受帝之恩。畢，叩頭三十九下，又再拜。

次燒香，叩齒二十四通，呪曰：

香煙之女，上白皇君，小兆真人某，清齋絕塵，期靈五通，上願成真，滅禍生福，上昇三天。

次誦陽歌一首而出

清角陽歌梵，飄飄激十方。青青萬卉曜，携我造九重。西絃抗音調，感悟東王公。

洞神三皇之法，通靈使鬼，役召萬神，安國寧家，匡濟兆民，學士修行，可昇仙度世。但先師以來，經不備足，至於授度，亦多闕略。今依經撰錄符圖玉文，登壇授度，以爲身寶。其中經

文，率多徵召之法，乃是玉文之辭說，世亦罕能施用。故可自後抄集，以爲全備。學者多貧，卒難周辨，若能具足登壇者，最是令法。

太上洞神行道授度儀

（郭清點校、王卡復校）

## 090 太上洞神三皇儀

經名：太上洞神三皇儀。撰人不詳，約出於南北朝。言傳授洞神三皇經及契券科儀。一卷。底本出處：《正統道藏》洞神部威儀類。

### 度三皇券契章訣

若別登壇誦詠，巡行三周三壇者，各一周畢。

師向東發鑪。

次再捻香，出官如法。

次讀章：

登壇時，凡是所付文板簡等，悉次案上。

某州縣鄉里，係天師某治炁道士，男女生官、真人、先生、夫人姓名，年如干歲。叩頭乞恩辭訴，以肉人胎生，下流蟲蟻之類，宿慶所襲，擢形太陽，謬遭明時，師老布化，陶染玄風，沐浴靈澤，與充

治籙，兼進參真符，荷恩隆重，誠自慶悅，不揆愚暗，希進忌退。伏承上古有三皇天文符圖契傳，不死之道，學得登仙，並成真人。今供辦齋醮之具，仰齋信儀，謹冒昧奉詞上聞。伏惟明慈法師，垂矜一切有心之至，特申洪施，以見賜授，如蒙哀愍，則朽骸更生，謹詞。

太歲某月日時奉詞。

白絹四十尺，金三兩，白銀三兩，真丹二兩，米五斗，薪二束，手巾九條，刀子九口，澡盆澡盤各一，黃素四十尺，金環六雙，絳紋三十尺，銀環一雙，朱五斤，紫綾四十尺，碧絲五兩，黃布八十尺，黃紙一百張，黃筆一雙，金刀一口，五方綵三丈九尺，東青九尺，南絳三尺，西白七尺，北皂五尺，中央黃一十二尺，皆用紋。

右二十一件，某受三皇一部法信。

無者注闕，准者各詔之，詞後有隨補偏受，各隨願也。

某州縣鄉里係天師，某治炁某弟子姓名，年如干歲，字某，戶屬男女官主者姓名，治男女官道士姓名。

### 保舉五人連銜

右一人學道修生，貪慕神仙，靜志潛默，不從世榮，今齋法信，求受三皇內文，請依法傳授。

### 章文：

泰玄都正一平炁係天師、某治炁道士，奉行洞神三皇經事。某嶽真人臣某，稽首再禮，上言：謹按文書，臣以六蔽凡流小子，謬遭明時，得在人倫道士之末，銜命宣真，採擇種民，而以暗鈍，施化無方，未有善效，負愧皇一，伏自思省。誠惟蟲蟻，少不慕世，志在治身，棲心巖穴，性實所重，非敢虛飾。昔受仙隱祕法經文符圖，積歷年載，雖未山居默處，自銜受道以來，穰患却害，禍消福臻，百願咸從，效驗既加，宜宣大化，以副皇極。今有某州縣某鄉里男女官姓名，好道樂生，仰慕清虛，靜思內教，不貪流俗，投身山川，味道染法，採服神藥，絕穀修生，誠可甄稱，今投詞詣治，求受臣所受三皇內文。臣不敢隱蔽高妙，獨保清真，輒授於某。某受之後，約檢身心，承法祕密，

不敢輕泄，登嶽入淵，越海踰江，千精百禽、蛟龍魔魅，皆爲其執伏，呼召立至，驅役萬靈，金丹芝液，真炁自生，心中所願，不求自成，長存久視，得爲真人。臣章到天曹，願告下天地水三官、五嶽四瀆三河四海八極靈山名水、四面八方諸天諸地世間萬靈，社稷真官注氣，咸使聞知，某所遊方域，皆當奉承，以爲大信，某未受皇文之前，所犯千罪萬過，惟蒙原赦。恩惟太上分別，求哀臣愚，謹因二官直使、正一功曹、左右官使者、陰陽神決吏、剛風騎置吏、驛馬上章吏、飛龍騎吏等官，各十人，操臣男女官姓名，拜受三皇內文符圖契傳赤章一通，上詣三天曹，伏須告報。臣某誠惶誠恐，稽首再拜以聞。

臣姓某係某州縣宮觀焚修。

泰清七寶玉陛下。

太歲某年某月日。

### 付券契符圖印傳訣

操章畢，讀券契文。

一名玉券，一名金契，言其刻券者，語其分也。

### 三皇券文

維某年太歲某月朔甲子，某州縣鄉里，男女姓名，年如干歲，好道樂生，質合六神，冥契奇要，今率丹誠，詣某嶽真人男女官姓名，求授三皇內文天文大字、圖傳券契、竹使符等。謹按大有小有神仙圖文、天皇地錄，總領羣神，召會百鬼，役龍命真，封掌五嶽，司察川源。上聞太上仙都大神，太上丈人、太極四真，授經尅誓，並依本文。上願飛騰，中願延年，下願祿位貨財，自然委素投金，敵丹永約。某月齋告，良日吉辰，無風無雨，不雲不塵，五嶽列位，二十五神、七祖臨盟，上誓九天，所召即到，受事皇前，金石爲開，禍逆爲泯。違盟負約，不年而傳，賢愚失授，愆戾天文，身入風刀，尸絕幽泉，七玄父母，考于水官。臣某今謹授某先師本文。

大有錄圖經目如左：

洞神經卷第一，大有錄圖天皇內文。  
洞神經卷第二，大有錄圖地皇內文。  
洞神經卷第三，大有錄圖人皇內文。

洞神經卷第四，八帝妙精經上。  
洞神經卷第五，八帝妙精經中。  
洞神經卷第六，八帝妙精經下。  
洞神經卷第七，八帝玄變經上。  
洞神經卷第八，八帝玄變經中。  
洞神經卷第九，八帝玄變經下。  
洞神經卷第十，八帝神化經上。  
洞神經卷第十一，八帝神化經下。  
洞神經卷第十二，三皇齋儀。  
洞神經卷第十三，三皇朝儀。  
洞神經卷第十四，三皇傳授儀。


右十四卷，今以授某，謹誓天神地祇，日月星辰，玄妙錄圖大有皇文，九天真仙都大神、五嶽四瀆諸山河源千神萬靈、二十五神，皆臨盟輔衛某身，神仙符籙小有真文，令某飛昇。五嶽之君受符行事，不得妄傳。畫一敵丹，告于三官，如仙都律令。

男女姓名，詣某州縣鄉里，男女法師姓名，於某處受三皇天文，齋信對齋，敵丹爲盟。某授道不得二心懷疑，皆當承師之誓。若不孝不仁、不忠不信，妄傳非人，口是心非，得道之後，背

叛本師，宣露道真，綺言名道，世常聞見，是所寒心，身受災殃，延及子孫。各以手書，分符契令，傳必得其人，不得妄傳，故共畫一為信。

某州縣鄉里，男女法師姓名，於某處受。

### 三皇經券



維某年太歲月朔甲子，某州縣鄉里，男女道士姓名，如干歲，詣某州縣鄉里，男女法師姓名，於某處受三皇經券。

讀券竟，舒置板上，師執朱筆上，令弟子捉下，共畫一。畫一畢，放筆。師命弟子執刀柄，以刃正置同字上，牽刀，師推刀破券竟，各卷縱縛之，置案上。弟子執鑲一雙，師執刀子刻之。初刻左，呼天皇諱字，弟子隨師口道諱。次刻右，呼地皇諱字。次刻中，呼人皇諱字。三刻畢，各以

一鑲貫券，鑲小縱繫之，並置案上。

此初案無者，可用別巾籍置先案左右。貫鑲竟，弟子開三皇文，伏看之，師依音讀授弟子。弟子隨師口道之。音在第四卷中，臨用事取之讀訖，置案上。開大字，如皇文法畢，卷各納囊中，置案上。次度黃女

三將軍。弟子伏，師讀黃女神符，後年號至律令。次授三皇將軍。依文至後，弟子隨師讀訖，納囊置案上。次授九皇

圖，圖中文字，師從始至末讀之。弟子隨師口臨時取經讀之畢，置案上。次授諱，諱門中字，弟子隨師口讀。次祝內精符曰：

天皇主氣，地皇主神，人皇主生，

萬靈衛身，使我飛仙，得見皇君，上昇仙都，九者之門。弟子亦隨師讀訖。券方一寸，納囊中。

右縫塞囊口。次九天發兵飛騰符，

無呪，直閉氣向符，心存呼三皇諱訖，通氣。券符納囊中。

次授昇天券

昇天券有兩文，省略者無龍等，合同四分，理帶不異。初授三皇，先分前者，此文詰屈，離合成章，存思感通，神真降授，令承師口讀訣如左。入山隱居者，亦可受後者，與前不相

妨，理佩各依訣耳。

昇天籍地何耽仙，靈皇暢我八威天。勿語勿謔備汝身，口口銜受陰風門。

雷鳴電吼水發衝，坐起四顧返命根。龍虎吐納精和元，天井開闔玉閣聞。

小星出入如劍形，好固分別以求仙。先授東方青文曰：

高皇飛皇，靈皇祖皇，當保延某人神形。

次朱文：

子欲度厄，玉芝地生，上功有積，必超人形，別承木德，首昇皇庭。

次黑文：

大道太真，受學勤行。天師與其分券，三一以寧。太一須門，願子越兵，請命長久，道行身仙。

次受券訣

師命弟子起揖諸門，一拜一揖。次於大赫曜明門外，四拜太一、三元、四真也。次伏地，師上壇向北，拜太階正中經前。

朝太帝，向北奏青繒章，覆奏伏須報應。偏受須此青章，文如黃表，若總授初一黃表，不須更用青章。然後起徐步，不奏章直，再禮而起。召弟子引入大赫門，一曰奏炎南門

禮而起。召弟子引入大赫門，一曰奏炎南門



也。歷巡行一周太階向北，再禮太一上君。

次向北，六禮三皇君。

次轉向東，謁帝君再禮。

次轉向東，朝太清玉帝君、皇九君，九禮九揖。

次轉向南，謁南極太始太昊君，再禮。

次轉向西，謁帝君夫人、三師君夫人，各一禮。合八禮八揖。

次西迴東轉至南面，正向北，再禮，伏聽覆奏，重啓。偏授時用大謝啓，總授大謝啓在後。

師自迴案，分券受事，次謝四真四禮。次出月門，繞壇三周。步虛詠讚頌之儀也。總授未竟，不須謝四真，出月門步虛等。

師執券，弟子執刀鋸，依師命破之。先破日月合同，次破天門合同。先題東者下帶身，金龍隨之。以青縵纏龍，著券背，紫紋囊盛之，置案上。次題南者下付宅，玉虎隨之。次題西者下山中，金鈕隨之。次題北者下付河，石馬負之。題三方，亦

置案上，事都竟，依後文里宅及山沈流水也。

次授靈書內文頌曰：

上洞百八字，是明元始根。三皇世莽莽，故與獸同羣。化及黃帝初，選出三才賢。標舉八玄輔，倉頡至聖神。四目既聰智，畫迹善書文。文契既始立，却數劫爲年。用以相教化，劫劫有盟言。漸漸增智慧，各各著名勤。宣之轉恢廓，歷數成法輪。自非仁聖智，焉別三才元。故記賢用傳，漫漫山海津。妙哉神妙哉，孰知仙中仙。

右畢，納囊中，置案上。

次授丹書內文曰：

三皇八帝，寶此內文，存行無怠，長爲種民，運去隱淪，變白昇玄，神仙不死，應感則臻，來去是常，知之者明，當識真一，憶諱記名。

右畢，別受口訣，且納囊中，置案上。

次授八威五勝十三符曰

能知八威，萬兆不衰，五帝之符，坐致行厨，羣神道從，前後走趨，符道自然，效驗斯須，吾告萬兆，體而行之，生自貴道，飛騰可期，萬兆勿疑，勤當

得之，五八開用，凡十三符，吾重告子，祕而密修，道授其人，吾亦不尤，篇目玄洞，與吾俱遊。

右畢，納囊中，置案上。

次授三皇內諱板讚。先讀上板，鬼字至律，令別有音。次讀中板文，次讀下板文。畢，納囊中，置案上。次授三一內諱板，上一中一下一。畢，納囊中，置案上。

次授童子錄

總授者不須別刺章，直請度如常法。

讀錄敕符，乾坤百姓，御制天地，錄上真經，不得違離，神符當行，急急如太上老君律令。

次約敕度戒

臨時取經用，文多不重載。總受者不須別言功，謝恩後自誦戒閱錄。

次授九天符契

契敕符如前法。

次授九天印

五香湯浴之，真朱粉上，即拂令平淨，置案上不須別及言功醮等。

次授竹使符曰：

陰陽百二十官君，制百邪，見吾身

形，見吾萬神，中外言爾。畢，卷符納筒中，朱蠟塞口，封印之，置案上，不別章也。

次授傳授板上文如左：

紫雲何鬱鬱，散靈飛九天。卯酉正南北，精修改故形。每令外如枯，內中含清真。某使黃金景，天中復有天。真靈唯妙道，幽幽入冥冥。

貪生之道和於精，凝靈散氣九孔明，勿令自恣失窈冥。

右畢，授下板文。授文畢，以板付弟子，納衣中，正安上板，青緹合纏，兩頭安朱蠟，師執印印之，印字首向外訖，弟子捧之。

次師敕傳，向王叩齒十二通，祝曰：

天皇上帝主生命，地皇上帝拔死籍，人皇上帝除罪戾。急急如律令。

右畢，撰傳衣，置案上。後有病家忠信者，敕如上法，與病家懸在戶上。受恩戾退，即齋還。三日九日不退，亦送歸，更齋醮請效也。

次說三皇題曰：

第一天皇內學字。字者，志也。

明天使人仰觀上文，心識覺悟，捨惡就善，內志習勤，外不炫耀，先覺教後，後

生遵前，前後相隨，事入道神，神身相一，不死長生也。

第二地皇內記經文。文者，門也。內學志明，正而無惑，舒以廣濟，緣門至極。

第三人皇內文。明人俯察地理，法地則天，定內安外者，普度無窮，同歸玄門，由學所得也。

右畢，授要戒。

太上洞神三皇儀

(郭清點校、王卡復校)

# 091 太上洞神三皇傳授儀

經名：太上洞神三皇傳授儀。  
撰人不詳，約出於南北朝。言傳授洞神三皇經科儀。與《太上洞神三皇儀》原係同書，後分出單行。一卷。底本出處：《正統道藏》正一部。

## 次開真官錄

无上玄老太清天皇正真、上官直使功曹、太官直使功曹、左官直使功曹、右官直使功曹、中官直使功曹、都官直使功曹、正一直使功曹、左明功曹、右明功曹。

右九部各九千萬人度。

无上玄老太清天皇真仙，上官上部功曹、左官上部功曹、右官上部功曹、中官上部功曹。

右四部各九千萬人度。

天皇太上上真、上部功曹、都部功曹、左都部功曹、右都部功曹、正一中官都部功曹、都官前部功曹、都官後部功曹、太官上部功曹、上官下部功曹。

右九部各九千萬人度。

天皇太上上真促炁功曹、促炁左功曹、促炁右功曹、定炁功曹、左定炁功曹、右定炁功曹、陰陽功曹、左陰陽功曹、右陰陽功曹。

右九部各九千萬人度。

天皇真仙、太官左生炁功曹、太官右生炁功曹、中官中生炁功曹、太官中生炁功曹、左都官生炁功曹、右都官生炁功曹、治病功曹、左右治病功曹。

右八部各九千萬人度。

天皇真仙、左大官五炁功曹、太官都監功曹、太官左都監功曹、太官右都監功曹、右太官五炁功曹、中太官五炁功曹。

右六部各九千萬人度。

天皇神仙上真、太官監察功曹、左太官監察功曹、右太官監察功曹、太官三五功曹、左太官三五功曹、右太官三五功曹。

五功曹、中官三五功曹、都官三五功曹、九宮功曹、左九宮功曹、右九宮功曹、五星玉仙功曹、五星玉仙左功曹、五星玉仙右功曹。

右十四部各九千萬人度。

天皇至真上仙、上部使者、左上部使者、右上部使者、太官使者、中官使者、太官中使者、上官左部官使者、上官右部官使者。

右八部各九千萬人度。

天皇至真上仙、太官都使者、左都部使者、右都部使者、太官下部使者、上官下部使者、下官上部使者、下官都部使者、上官下部左官使者、上官下部右官使者、上官神官神仙大和。

右十部各九千萬人度。

天皇至真神仙、太和左官使者、太和右官使者、遐賢使者、遐賢左使者、遐賢右使者、洞達遠察使者、洞達遠察左使者、洞達遠察右使者、無極洞明上官使者、都部功曹使者。

右十部各九千萬人度。

天皇真形真符神將吏兵一部度，天

皇畢。地皇真仙太上神明无極洞明使者、左官使者、右官使者、上官使者、上官監神使者、太官監神使者、左官監神使者、右官監神使者、都官使者。

右九部各一十二萬人度。

地皇真仙、太上神明、太官監天使者、左官監天使者、右官監天使者、都官監天使者、无上正一監地使者、左監地使者、右監地使者、中官監地使者、太官監地使者。

右九部各一十二萬人度。

地皇真仙、太上神明、上官監水使者、左官監水使者、右官監水使者、中官監水使者、正一官監水使者。

右五部各一十二萬人度。

地皇真仙、太上神明、太官監兵使者、真正官監兵使者、真正左官監兵使者、真正右官監兵使者、真官監兵使者、正一都官監兵使者。

六部各一十二萬人度。

地皇真仙、太上神明、太官監屬使者、左官監屬使者、右官監屬使者、正一都官監屬使者、太上監生東嶽使者、

南嶽使者、西嶽使者、北嶽使者、中嶽使者。

右十部各一十二萬人度。

地皇真仙、太上神明、東海使者、南海使者、中海使者、西海使者、北海使者、水官使者。

右六部各一十二萬人度。

地皇真仙、太上神明、主正真三河使者、九江使者、主七十二名山使者、湯谷神王主八極使者、正真神主山林孟長十二淮濟使者、主十二河平侯使者。

右七部各一十二萬人度。

地皇真仙、太上神明、大將軍、左玄大將軍、右玄大將軍、中玄大將軍、上一大將軍、中一大將軍、下一大將軍、前一大將軍、後一大將軍、上元大將軍、中元大將軍、下元大將軍。

右十二部各一十二萬人度。

地皇真仙、太上神明、太元玄元大將軍、左太元玄元大將軍、右太元玄元大將軍、太元上部大將軍、太元下部大將軍、太初大將軍、太初左領大將軍、

太初右領大將軍、太初前部大將軍、太始大將軍、太始左大將軍、太始右大將軍、太始前大將軍、太始後大將軍、太始中玄大將軍、太始上玄大將軍、太始下玄大將軍。

右一十七部各一十二萬人度。

地皇真仙、太上神明、太素上元大將軍、中元大將軍、下元大將軍、左玄大將軍、右玄大將軍、前部大將軍、後部大將軍。

右七部各一十二萬人度。

地皇真仙、太上神明、太儀大將軍、太上大將軍、左領大將軍、右領大將軍、前部大將軍、後部大將軍、上素大將軍、中素大將軍、下素大將軍。

右九部各一十二萬人度。

地皇真仙、太上神明、太玄大將軍、左上大將軍、右上大將軍、前部大將軍、後部大將軍、中玄大將軍、下玄大將軍、真玄大將軍。

右八部各一十二萬人度。

地皇真仙、太上神明、太素太寶大將軍、大玄太寶大將軍、太寶左將軍、

太寶右將軍、太寶中將軍、太寶前部大將軍、太寶後部大將軍、上元大寶大將軍、中元大寶大將軍、下元大寶大將軍。

右十部各一十二萬人度。

地皇真仙、太上神明、神荼鬱壘、五道九皇君、五仙九靈皇極君、皇極九靈君、皇極君、皇靈君。

右六部各一十二萬人度。

地皇真形真符神將吏兵隨文度。

地皇畢。人皇真靈、太上神明、舉仙元皇九天君、太皇君、皇光永度九天君、中皇九昊君、中靈大德君、道化皇君、九真皇機君、太平元皇君。

右八部各七萬人度。

人皇真靈、太上神明、導神通明君、顯皇通炁君、皇神通元君、皇天太上陽明兄公君、九炁通真君、九曜元靈君、太極返真君、少陽君、上靈太仙君、皇極玉童君、皇極青腰玉女、東皇青陽明靈仙童、元皇青帝勾芒君、皇仙大洞元靈君。

右一十四部各七萬人度。

人皇真靈、太上神明、赤靈太陽太丹君、執法延壽司錄君、曜靈南極丈人、玉童、皇靈赤帝玉女、赤帝絳章仙童、南極太皇寶魄曜魂君、赤帝祝融太陽君。

右七部各七萬人度。

人皇真靈、太上神明、太子子留元道君、元素元皇君、浩皇元素玉童、化皇元靈玉女、九皇大洞玉機玉女、西皇白帝素仙靈童、元皇元影寶魂定魄君、太皇白帝蓐收少陰君。

右八部各七萬人度。

人皇真靈、太上神明、東極靈寶元君、真靈五靈元華君、太皇五靈玉仙君、太陰玄門太極五仙君、大辰九皇伐殺君、鬱冥皇機君、太元上皇道母玉女、仙皇陰皇仙靈、北太皇寶魄定魂君、黑帝玄冥君。

右十部各七萬人度。

人皇真靈、太上神明、中皇三天都錄司命君、中皇洞極玄天君、太山上皇君、領仙元皇玉童、元陽千二百官玉仙君、皇靈太山君、元皇保魂曜魄君、中

皇后土三泰千二百官君。

右八部各十萬人度。

人皇真靈、太上神明、皇靈度世昇玄功曹、皇靈陰陽治病功曹、洞元功曹、洞天元炁治病功曹、洞天治病功曹、陰陽護命功曹、紫元度命更生功曹、洞天無極度命功曹、洞天太元度命功曹、洞天紫元虎符將軍、洞天无極虎符將軍、洞天太元虎符將軍、洞天虎賁郎吏、符吏洞天虎賁郎吏。

右一十四部各七萬人度。

人皇真形真炁官將吏兵一部隨文度。次授金剛玄籙。太上洞神上元洞天金剛玄籙度太一神仙金剛大將軍、左將軍、右將軍、金玄大將軍、左將軍、右將軍、金威大將軍、左將軍、右將軍、金光大將軍、左將軍、右將軍。

右一十二部各十億萬人度。

大一神仙金剛羽車、金光羽車、風皇羽車。

右一十二部各六十六乘度。

大一神仙金剛羽蓋、金根羽蓋、獨轅羽蓋、金剛流精等騎金剛符吏。

右五部各九十六萬人度。

太一神仙破敵金剛、將齋章飛龍騎、太太上上太一君、天兵騎吏、開通仙路騎。

右四部各九十六萬人度。

太一太清神仙、上皇真人、高車刺吏、三陽功曹、五陽功曹、皇真天君吏、左右執法君、左右執法吏、皇天執法君、皇天執法吏。

右九部各九十六人度。

太一神仙金剛、上三天執法開化君、左右陰陽功曹。

右各九十六人度。

太一神仙金剛玉珮使者、羽佩使者。

右各九十六人度。

太一神仙金剛明導吏、通玄吏、通真吏、通道吏、通精吏、通神吏、通炁吏。

右七部各九十六人度。

太一神仙金剛無極長生吏、直符吏、直事吏、金剛功曹、主簿幹佐、傳言書佐習事小吏、零下五百吏、雲中輔章

吏、督卸從事。

右十部各六十六人度。

太一神仙金剛元洞玄籙一十四萬萬四千方部將軍、車騎、將吏、功曹、主簿、內外諸官、度金剛大符，度星斗真炁，吏兵真形隨文度。

次授法位

太上洞神三皇內景弟子臣某等，洞神法居三洞之初，法師遠遊，冠黃裙帔三十二條，左帶太一三元之劍，長三尺。右垂白玉之珮，持青黃白三色之節。

次師稱法位大謝

上清玄都三洞弟子、太太上上太上君、太元一君天師門下、督察大都監君、黃赤真一三一丈人、无上太一金剛金闕帝君、三洞法師玉清左監靈大夫，某嶽先生小兆真人臣某，稽首再拜，上白太太上上皇天上帝无極太上元君、太元一君大都督，鬼監君妙行真人、天帝大王、九天元洞无極大帝君、大帝丈人、玉洞九玄洞真洞玄靈寶三皇、洞神洞泉真君、太極高靈太帝真人、監齋威靈大神、大洞尊神、元始君、上清金闕

後聖帝君、三十六部寶經符圖太真君、太真丈人、太上王晨虛皇大道君、十方无極應感至真。臣九土之中，塵微細品，生逢道化，正法流行，搜選種民，宣弘要頤，而得預參受之例，窺盼寶文，授度靈官君將兵吏。外以佐國救厄濟人，內以立功保神護命，恩深施重，非蟲蟻所勝。尚慮積世以來，玄祖流逮，愆咎增積，未獲原除，己身瑕釁，充塞未解，豈宜越冒天憲，而傳付宣行，但盟告之。初玄科有約，五八數滿，法當流行，今有某等，清潔身心，歸依大道，列詞奉信，誓告神明，請受三皇寶文、洞神大法。觀詞審意，難可抑違，即與對齋露文，請乙應驗，人神交契，似合天科。以某日登壇，傳授事畢。某實自好道，希慕長生，非人拘逼，抑令伏受。其有臣及某，從來所犯一切罪惡，恩大宥之施，並乞蕩除，克己自新，於今更始。臣謹遣元始功曹、飛雲使者，齋盟文宣告付，某身謹以啓聞。伏惟太上高靈萬聖至尊皇天太上帝太帝玉陛下，愍其所求，許臣所奉，聽某佩受。

特乞勅下五方五帝君，各領玉童玉女三千人，侍衛經寶，祐護某身，又勅九夷八蠻六戎五狄三秦君等，各率所部，清淨法壇，某齋直禮拜。常如聖君三皇，對景鑑盼，使某修習成就，功行圓明，天官靈仙，遷功舉善，七世父母，昇入天堂，積世愆非，於今蕩滌。役御神鬼，制伏凶妖，爲天人師，利民佐國，功充之日，列品仙階。若某負約愆盟，輕師慢法，修行不謹，虧損天真，當謝三官，長充考責。謹慎恭守，則三寶垂祐，科戒有徵，限畢之辰，授與賢信，紹續大化，輔替教儀，天地萬靈，鑒其信誓。臣等不任懇悃，懺謝之至。謹啓。

起，各禮三拜。  
次取鞶帶衣外繫之，日在前，月在後，結於心下。次券文，囊盛結肘。次皇文大字，著鞶帶中。次黃女符繫腰。次九皇圖繫心前。次天水符髻中。次九天符肘後。次昇天符繫腰。次傳版在背後。次靈書繫肘。次丹書繫腰。次八威五勝符心前。次三一真形執之。次童子籙繫肘。次符契在肘。次

三皇越章印在腰。次符使符背後領下。次普下版笏上，重執之。男左女右。

次左行至申壇地戶

師曰：洞神三皇內景弟子某等，謁地戶亭長守室靈人。一拜。

師曰：帝君有命，令弟子某等，度地戶五瘟五魔，一切灾疾疫癘之厄。弟子再禮。

次出地戶，至下級壇前正位立。

師曰：洞神三皇內景弟子某等，朝太一君，再禮。太帝君，再禮。天帝君，再禮。帝君有命，令弟子某等，朝拜太一，免脱灾凶，長離地苦，永保天福。弟子再禮。

次先令弟子出壇

次師十二願

次復鑪

香煙玉女，侍直衆官，當令傳道之所，有英芝玉精，自生天帝御前。臣與弟子，身生紫絡，藏發絳煙，羣生享福，家國蒙恩，十方侍真，玉女傳奏，所啓徑達三皇真君几前。

次吟遊神頌

烈烈廣寒庭，寥寥宴仙室。玄冥唱陽歌，大景披雲出。鍊沐含陽精，長梵詠太一。自非篤志賢，安能好遊逸。

次學仙下壇

亦出戶呪

太虛三玄，虛天三元，素靈玉女，七微皓鬱，虛謁皇君。

某國年太歲月朔日時，州縣鄉里，某年歲月日生，今署洞神弟子，即日於某處皇壇之上，再禮：

第一簡謁天皇君，讀此至，再禮長跪，置簡案上。古法用朱玉爲簡，赤金爲字，今用朱書。

第二簡謁地皇君，

第三簡謁人皇君。簡文悉同，各長二尺二寸，闊二寸四分，厚二分，牙玉、金銀、銀木，並可爲之。作五行，行書令周備如法，禮謁畢。

次師引弟子度四門解厄，下就中壇西南月門之下。

師曰：洞神三皇內景弟子某等，朝太陰月君。再禮。

師曰：帝君有命，令弟子某等，度太陰水灾之厄。弟子再禮。

次行至東北人門

師曰：洞神三皇內景弟子某等，朝太陽日君。弟子再禮。

師曰：帝君有命，令弟子某等，度山林刑獄虎狼毒蟲日門之厄。弟子再禮。

次左行至天門

師曰：洞神三皇內景弟子某等，朝天門君。弟子再禮。

師曰：帝君有命，令弟子某等，度天門刀兵鋒刃刑殺之厄。弟子再禮。

無太玄內景，真元之靈，祐護臣身，使朝夕呪誦，響徹高尊，厄難超度，克獲神仙，拜見太一紫府之君，終入无形，與道合真。

次讚引至玄師前，散如常儀。

若醮籙，便可於十二願前醮，或來早醮了，次拜表言功。

太上洞神三皇傳授儀

（郭清點校）



## 092 陶公傳授儀（擬）

經名：陶公傳授儀（擬）。南朝梁道士陶弘景撰。內言傳授《三皇文》、《五岳真形圖》等經書符圖之科儀。原本一卷。《正統道藏》未收。據敦煌 S.3750 + BD11252 + P.2559 號殘抄本錄文<sup>①</sup>。

（前文缺）

臆祝曰：△甲志在山林，避處人間，身未淳虛，氣多濁塵，五藏未定，恐怖惡禽。今日奉受西嶽公禁山符印、太上中黃虎章、張天華虎王李精三五之符，上厭山精，下制百禽。請西嶽神君、主司衆神、飛天文人，主摧滅虎膽，制厭精氣；太一中黃，主吐氣救虎，衝熏凶目；玄上玉童，主閉虎五藏，逃走他宿猛獸。先王震虎制禽，役使可得。△

自今受符以後，虎見△當伏，申頭敢動。△爲虎起，虎走千里，所向皆開，金石爲摧，佩吞神符，長生不衰。因伏地，隨意所陳，又五再拜。畢，又跪師再拜，退還席。

師又上香曰：授受神符，言迄事畢，所請西嶽神君、飛天四神，臨饗既竟，願各嚴車騎，還莅所居。△等施用之日，應聲立驗，呼吸呼吸，隨神所集，叱叱叱，叱叱叱。因散香。投鷄於地，令弟子閉目，兩指闔執鷄，視得何處。得頭第一，用符必行。得翅第二，得背第三，得尾第四。都畢，攝器香火還。此羊鷄魚，若不自食，仍悉埋藏，不得分人。

若入山及山居住止，諸施用符印，大有法用。並別在《登真隱訣·巡山定室卷》中。今此中五條，既止是傳授儀，故不得備說。

依符中語，止是初受時一祭而已，若山居在多毒害之處，亦可年一祭之，於春月爲宜，迴互辭語，不復道傳授意耳。

### 授受五岳圖法<sup>②</sup>

此圖出鄭葛，是山世中佩奉要法，而無所脩存，止年常醮祭，祈福攘禍而已。

摹佩圖一卷，用好素二丈，朱墨各少許，雇手三百。又應寫序一卷，十四五紙，雇手一百。又小紫錦囊一枚，盛佩圖。序不須囊，可共一函盛之。

祭授圖，用月上建夜半。正月左好，餘月亦隨時耳。於庭壇東<sup>③</sup>〔向〕敷六尺席，西向位以〔絳紋〕五尺安席上，舒圖文於絳上，鎮竿兩頭，勿令風吹起。以一案著圖前，一中長桿擎五櫟<sup>④</sup>置案上，五岳君也。又一大長桿擎十槃著案南席上。又二小桿各〔擎〕一槃次南邊，青城丈人，一廬山使者。若住名山者，又設一杯桿以次廬山南，非名山中不須此。三窪勺<sup>⑤</sup>，五岳一、佐命一，丈人使者一。無者亦可都共一三香火，依窪處各一。章案一枚，并燭火。醮饌用水三斗，年常自醮用酒一斛，亦可五斗。白香、火香五斤，年常自醮用廿五斤，亦可十斤。果五種，隨時所用，甘蔗桿量一挺，則十八挺。又不得空大桿，應廿挺也。餘果與此相稱生菜一樣，不用薑辛菜。

弟子北向伏，箱盛信絹一匹置前，序中所請，委絹告盟。師隨杯桿奠果香，以生菜覆上訖，酌酒一遍。餘酒豐安座南，香果桿安座北。燒香長跽，讀章文，至

神饗止。伏存神到，良久起。又捻香一遍，更讀章後，至訖。依序中鄭君說，弟子別自章文陳說意謂，于時弟子未得如此，但令師併於章中載述，受圖後自醮，乃可自說耳。

因起卷取圖，將度案前，跽白：即日奉此《真形圖文》，授△甲佩服，願垂恩臨。便往至弟子前，東向跽，授圖。弟子長跽，右手執絹，左手受圖，繞腰三匝，男左繞，女右繞。起向案座五再拜，又跽師再拜，以圖內懷中。師更捻香一遍，燒香，白曰：依科委絹，以圖付授△甲已畢，願敕各遣五神侍給圖文，衛護佩圖之身，使灾消禍散，萬事吉安，泄慢之咎，具如章言。畢，呼弟子進，自捻香一遍，伏席，隨意自陳，五再拜，還位。

師又跽白：仰降神君，曲臨饗禮，展誠既畢，請賜福祚。乞真炁布體，充滿榮衛，疾病除愈，尸耶消滅，長生久視，通達諸靈。所向如願，萬事合心。因以別杯傾取上五样香各少許，自伏席飲之。又傾取佐命酒，賜弟子。弟子起再拜，伏飲之。畢，又白曰：已蒙

神賜，凡諸從官不得預同筵席者，乞請頒及，咸令懽悅。因取窪中香，遍灑四面。畢，更燒香，跽白曰：神光下盼，已淹時刻，恩沾既畢，不敢久稽，請敕嚴駕，各還所位，須歲月往復，又更祈聞，所留廿五神，言功糾過，皆如故事。因各伏思神去，良久起，燒章，內堰水中，令不盡小片，視所餘字，以占善惡。仍各啗此水，并洗眼。乃撤香火，下饌分張，共叙之。

若受圖後，年常自醮者，布置次第法用，具如前，唯改傳授法，易傳授語云：今日△月上建良辰，仰降五岳神君，諸佐命八山、〔霍潛〕儲君、丈人使者，并此靈山真官正神，願各留恩曲被，賜以真炁，使△五藏生華，六府宣通，消却殃禍，解除咎考，行來出入山世之中，廿五神常見擁護，歲終端等，言功報勞，諸有陳請，具如章言。伏席盡誠，仍起請賜。請賜送神，亦如前法。

梁天監△年太歲△月日子上建，天師△治祭酒，州郡縣鄉里，男女生姓

名，年如干歲，謹依道明科，傳弟子姓名《五岳真形圖文》，告齋脩祭，即日請五岳君、霍潛儲君、佐命八山神君、青城丈人、廬山使者，願並垂臨降。

奉請東岳泰山君、羅浮括蒼佐命；

奉請南岳衡山君、霍山潛山儲君；

奉請中岳嵩高山君、少室武當佐命；

奉請西岳華山君、地肺女几佐命；

奉請北岳恒山君、河逢抱犢佐命；

奉請青城丈人，奉請廬山使者。

奉請此△山真官神君、大岳衆官君，及千山百川諸靈陵真仙地主、原野丘阜江海溪谷一切群神，有泰清三天玄錄，非精稱下土者皆登，屈臨於此山露壇之上，歆微禮薄饗。

△今住△郡縣鄉里山中

因九光使者威明大夫請神饗

# 五岳真形圖

△以胎誕下世，〔沉〕淪鄙俗，籍緣微業，得奉大化，滌除垢濁，希尚清真。昔以△年月，受先師△甲《五岳真形圖文》，以自脩佩，被蒙安吉，實荷覆護，而不能執科秉法，必限五八，亟經傳付，皆成違負，夙夜愧懼，若履冰谷。徂樂道之子，在世屢有，加運季時危，人願自拔，傾心苟至，理不可遏。今有△郡縣鄉里男女生姓名年紀，丹情款切，告情備至，謹以吉日設醮委信，依法傳付。乞令△受圖以後，心開意悟，解達真旨，注心道炁，不令乖違，天親同炁，常相愛護。即日列上三天，章奏太上，賜削除死錄，書名生簡，三尸消滅，灾害不犯。使五方靈岳各遣五神，千山百川時差侍官，營守圖文，防護△身，長生久視，永享元吉。若值賢才，量宜審授，不得輕慢，自招愆罪。謹清齋祭付，恩惟鑒察，謹稽首再拜上聞。

右傳授章止此。

△以△年歲，從師△甲，奉受《五岳真形圖文》、西王母竹使符信，永以佩身。蒙受五岳君各遣五神，千山百川皆有侍官，並營衛圖書，防扞佩圖之身。△生長凡俗，染習塵世，心行未專，多違科律，穢忤靈文，犯觸非一，懼為神官所奏，結譴冥司。今以△月上建吉日，脩齋告祭，陳失謝咎，願五岳神君、儲君佐命、丈人使者，遠紆清真，屈臨鄙濁，錄其丹誠，恕其菲薄，從來所犯陽愆陰罪，一乞原釋，却禍致福，除死上生。使神光靈炁常現身中，凶鬼惡人自然弭伏，所向所願，皆得從心，長生久視，克獲神通，下及家人大小、支流部屬，咸蒙端等，永享吉泰。廿五神及與此山此境里域真官，常共保衛。須歲月代序，當復以聞。謹上。

右年常自醮章。從神饗以前，皆依上法，唯除傳弟子語耳。書此章用好白藤紙，朱書，備如章法。

## 授受三皇法

三皇是大經法，今世中有此數卷，皆由鮑葛所傳至此。大者之真字，唯《青胎》一卷是耳。

而《西城施行》一卷，全為劾召之要。其餘卷並吾所未詳，而合集得成一帙十卷，相傳併受之。

傳板二片。上片槐，下片梓，尺度如今模。

紫紋七尺為傳衣。朱牒二封。青系紵二條，各長七尺。摹佩文白素二丈。朱一兩。錦囊〔一〕副。雇手摹〔經〕并傳，可四百。右前件並出弟子。九老仙都印一紐，出師，封傳用。醮用酒三斗，一甕。脯三胸，荻扞脯一夾，屈之名胸。而此脯多雜肉，今一可自作白肉脯一合拌許。大米三升。金鑲三雙，一兩。三皇香卅丸，丸如梧子。並出弟子。窪勺一具。尺杵杯各三。三香火。並師自辦。信用白絹三匹，銀三兩。舊法乃用絹六匹，銀六兩，代白鷄之盟，意謂六數於事無義，又於貧者難辦，今各取三，於法為元。弟子北向伏，列法信於前。

夜半於庭壇敷席，北面南向位。依經天皇在子，地皇在申，人皇在寅。既器案難具，今同共北面，於法無嫌。當以天皇在東，次地皇、人皇也。舒碧巾三尺為座，杯杵奠貯置前，前設一奏案，以擎三皇經及傳等。師初北向微祝曰：香烟玉女，上白三皇真君，△甲正爾燒香醮禮，拜請三皇真


君，願降以靈炁，下入△身，所啓徑御三皇真君几前。

因燒香酌酒，三再拜，長跽曰：男生弟子△甲，謹奉請天皇天一真君，地皇太一真君，人皇玄一真君，並願曲垂降饗，鑒察丹心。因伏思神良久，起酌酒曰：△甲昔從先師△奉受天皇、地皇、人皇三部內文天文大字、青胎監乾衆符，合十卷，佩服在身。被蒙神炁，從來積年，未敢傳付，或云已經傳付。今有△郡縣鄉里男女生△甲，信心專到，願樂受持，依如科法，許聽傳授。謹以今日施設微禮，并陳盟信，對共啓告，封傳付授，謹以奏言，請賜矜允。因又伏地少時，弟子稽顙無數。起讀傳下板文竟，內衣，加以上板，縱纏兩頭畢，安朱臍，小火炙令軟。因執印加上封，兩上手大指捻印，起就弟子。弟子亦長跽，以兩手大指捻師指上。師微祝曰：三皇元精，上應乾靈，佩符帶傳，朝拜玉庭，仙童扶己，玉女侍形，出入天門，朝晏上清。因吐炁，三噓之，舉指捻印成文，起退，安下封，火炙，就弟子封如上。

畢，仍與弟子帶背，男絡左肩上，女絡右肩上，結於心前。師還位，弟子仍對杯，各再拜，又禮師再拜。師更跽曰：

弟子△甲已蒙帶傳，今請佩符。因卷取二卷素文，跽授弟子。左手受符，仍以繞腰三匝。男左繞，女右繞。師又跽曰：弟子△甲帶傳佩符已畢，今請授經。因取十卷至弟子前，東向跽，弟子左手受經，右手執信，交度，仍捧經，更三再拜，又拜師。師還，酌酒上香曰：△甲今日仰承皇恩，傳付弟子經符已畢，但恐肉人生長末世，心行不淳，正炁淺薄，灾禍易集，唯仰憑真道，乞垂保衛。令△佩奉以後，得荷安吉，師資天親，愛護爲本，應有傳付，時須賢哲。若違科犯慢，具依玄制，謹伏地稽顙，陳奏丹心。因各伏地叩頭，隨心請乞。師弟子各三再拜。師上酒燒香曰：仰降高靈，遠臨鄙濁，啓傳既畢，不敢稽留，呼吸上升，還神反位，請乞餘福，曲沾卑陋。因三再拜，送神畢，取酒各伏飲，又四灑如法。畢，乃燒香復爐曰：香烟玉女，真皇降臨，上還天府，授受之

身，並已荷福，香烟飛散，與道和合。都畢，撤座。



外郭朱，內郭黑，開中央。

此上板用槐材，燎者先以雌黃色之膠清和數過，上令調好，乃依此符朱畫畢，火炙臍，臍令光明，耐沾濕。

△年歲月日，州郡縣鄉里，男生姓

名，年如干<sup>⑦</sup>（以下原抄本缺）

- ① 案敦煌抄本首尾殘缺，原無卷題及作者署名。大淵忍爾《敦煌道經目錄編》據抄本內容，擬定為梁陶弘景撰《傳授儀》殘卷。又案大淵目僅著錄英藏 S. 3750 及法藏 P. 2559 兩抄本，未見中國國家圖書館藏 BD11252 殘片。今考三件原係同抄本，可直接綴合為一卷。有經文及小字夾注、符圖。其中部分注文及符圖朱書。
- ② 按原抄本此行界欄上有朱筆書「五岳」二字。此與陶弘景撰《紫文行事訣》等敦煌抄本體例同。
- ③ S. 3750 抄本止於此行，以下接 BD11252 抄本錄文。又按以下方括號〔〕中文字，係原本殘損或漏抄，據上下文義擬補。
- ④ 五櫟：據下文例當作「五槃」。
- ⑤ BD11252 抄本止於此，下接 P. 2559 抄本。
- ⑥ 原抄本此行界欄上有朱筆書「三皇」二字。
- ⑦ 按據唐張萬福《洞玄靈寶道士受三洞經誡法錄擇日歷》引述「陶公傳儀」，此卷內容原應有五節。第一授受六甲符法；第二授受禁山符法；第三授受五岳圖法；第四授受三皇文法；第五授受五符法。今敦煌抄本僅殘存其中三節。

（王卡整理並點校）

# 093 太上三皇寶齋神仙 上錄經

經名：太上三皇寶齋神仙上錄經。撰人不詳，約出於南北朝或隋唐。載三皇齋儀及信物制作法。一卷。底本出處：《正統道藏》洞神部方法類。

## 三皇神仙內神寶祝齋錄門

黃帝曰：凡學士精心願樂，勤道求生，苦齋大寂，希求神仙，朝夕求靈，不避飢寒，救護萬姓，以爲因緣，福流七世，免度大患，身超水火，形安體全。洞極上法，令兆神仙，學以成之，道德日新。

黃帝曰：三皇神者，胎靈之神也。皇上之祕篇也。兆有之者神仙，見之者延年，詠之者上見皇君，十方諸天皆來試觀焉。其文至妙，其位至尊，能令

人出入水火，變化幽冥，司錄三官，一時定生。精勤之哉，必書仙名，其術至真，非惟經篇。

黃帝曰：兆有此書，勤心齋戒，燒香祝文，沐浴雲水，燔烟上元，結齋三九，八帝神篇，叩心祝誦，上聞三天，七世罪除，冥考都蠲，過度苦道，削罪成真，勤而修之，上見皇君矣。

黃帝曰：先天有三皇之神，八帝次其治，皆高真爲輔，邪惡不生，災害不作，非世所傳。伏羲女媧之時也，其治各一萬三千歲。後上天爲八帝尊皇所受靈書妙術、長生久化之道，輔聖七錄、治世三奇，此其書也。又以青素書三皇文，三尺爲幡，以朱書之，以一丈竹竿懸於庭中。亦可以几請皇文，以北向爲坐，燒香願呪，叩齒二十四通竟，祝曰：

香煙玉女，上白皇君，小兆甲乙，清齋絕塵，期靈五通，上願成真，滅禍生福，上昇三天。畢。然燈行道，祝願皆如此法也。諸是災難禍害，无不盡消，疾病垂命，皆得更生。

又此齋法，侍燈勤苦，當日中一食，至夜生氣時，燒香陳願畢，又一食，此則每時食息也。但不得冒履穢濁，令不精專之人干犯齋禁也。行事節度，一如上法。

## 合上元香珠法

用沉香三斤，薰陸一斤，青木九兩，雞舌五兩，玄參三兩，雀頭六兩，詹香三兩，白芷二兩，真檀四兩，艾香三兩，安息膠四兩，木蘭三兩。凡一十二種，別擣，絹篩之畢，納乾棗十兩，更擣三萬杵，納白器中，密蓋蒸香一日。畢，更蜜和擣之，丸如梧桐子，以青繩穿之，日曝令乾，此三皇真元之香珠也。燒此皆徹九天，真人玉女，皆歌此於空玄之中。又加雄黃半斤，麝香四兩，合擣和爲丸，服如大豆大，十九日一服耳。常能服之，令人神明不衰，口生香氣，又感真徹靈，降致玉女，並萬病諸疰惡鬼、不祥妖魔，皆自遠伏也。

黃帝曰：皇文齋法，至真至貴，非世所傳。夫求長生及爲萬兆請福，救解厄難，除灾却害，當先行八帝大齋之

法，以解七世父母，及己身除罪。三年之後，乃得刻定仙名，以致不死之道也。若欲劾召百神，皆須積齋成功，感應自然，乃可召之。其時意中，皆自了於心中也。

黃帝曰：若萬兆有疾病急厄，及罪積深大，不可得救者，皆當告請三皇，以爲寶齋之法，以拔贖之也。當燒香，然燈各三枚，或五枚，或七枚，或九枚，或可三十六枚，以象三十六天之數也。如此四十日或百日，罪名皆除，於是司命司錄，以結定仙名，爲兆得無量大福。明燈以照神，燔煙以嚮氣，太真神樂，三皇燕集，兆得神仙，慶流萬世。一年之中，得三七行事，爲大度也。

黃帝曰：若爲萬民致福，救其急難厄禍，兆當清齋三日，若五日七日九日，適意耳。當沐浴玄雲之水，燒皇上之香，然玄液之燭，三燈五燈、七燈九燈，意適耳。相去間六尺，不得令燭行大闊。一香鑪、一油燈，不得使人從燈間中過，欲聽過，立纂門。又常守燈，令香煙不絕。至日中、日入，又再拜，

燒香祝乞，適所陳耳。此名三五大齋內禮之法也。

#### 作香玄腴法

用麻腴一斛，真檀一斤，青木香一斤，玄參一兩，香珠三兩，擣碎，納腴中，密蓋之，微火煎之，半日成也。

#### 作雲水之法

用水三斛，青木香四兩，真檀七兩，玄參二兩，合治煮之，令得一沸。畢，清澄適寒溫，以自沐浴也。此天真玉女玄水之法，名鍊胎神漿。此法及香珠，皆出於寶齋上錄篇中，非世人之所見也。

兆若欲知機通感，知人罪福者，皆應服三皇幽天符，即自通感神明，逆見將來之玄會也。

#### 醮儀

候夜行道竟，敷席設座，依三皇位。天皇北皂爲座，地皇西南白爲座，人皇東北碧爲座。三大長盤，三甌酒，昆布爲脯，南粽，果隨時珍，酒三斗，省肉脯。

初向北呪曰：

香煙玉女，上白皇君，某奉爲某清齋行道，十八時竟，正爾燒香獻禮，拜請三皇真君，願降以靈元，下入某身，所啓逕御三皇几前。

次酌酒三拜，跪曰：

洞神弟子某，謹爲某奉請天皇監太一君、地皇主真一君、人皇統三一君，願並降席，鑒察丹心。

次思神良久，跪曰：

小兆某上白三皇真君，某以凡庸，謬叨正法。昔奉受三皇寶文，內以自修，外以教世。今有某投詞披請，謹重宣聞。讀詞。謹承詞旨，率同法如千人，奉爲修建三皇齋直，三日三夜一十八時行道，竭誠首請，事已周竟。謹投蔬醪，薄獻蘋藻，仰願聖皇，特垂慈盼，赦宥某深愆重咎，解釋冤對，削落黑簡，延益祚曆，療治衆疾，永蒙康裕，克隆萬福，勤行德惠，家國兼泰，率土元吉。謹以奏言，請賜矜允。再三拜。

又隨意陳乞，言曰：

上降尊靈，遠臨鄙濁。祈禮既畢，不敢稽留，呼吸上升，還神反位，稽首

奉辭。

次再拜，燒香復鑪曰：

香煙玉女，真靈臨降，垂慈布澤，

上昇天宮，香煙飛散，與道和合。

次畢，作禮而退。

太上三皇寶齋神仙上錄經

（郭清點校、王卡復校）



# 094 洞神三皇七十二君

## 齋方懺儀

廣成先生杜光庭刪定

經名：洞神三皇七十二君齋方懺儀。唐末道士杜光庭編。醮祭天地諸神齋儀。一卷。底本出處：《正統道藏》洞神部威儀類。

### 東方九天帝君

伏聞一氣凝空，九天垂象，啓四時而東風出震，播五常而仁化行春，啓運三光，權輿萬有。今皇帝順天行化，用道匡時，德合陽和，明齊景曜，謹依科式，齋香花燈燭，供養之具，歸命東方九天帝君、歲星木德蒼龍七宿中外諸星官。願以是功德，降東上九天始陽碧城九氣垂霞，來輔皇帝身。於春季三月之中，甲乙寅卯辰位，有赤星暗

曜，地網天羅，本命行年，元辰衝破，一切灾厄，咸乞蕩除。碧簡題名，青宮益筭，二儀交泰，七曜貞明，風雨以時，暄涼應序，家隆國泰，遠肅邇安，内外士民，同霑善慶。得道之後，與天帝合真。

### 南方九天帝君

伏聞空洞凝華，丹天演化，運火德而炎精普照，播文明而禮教遐宣，高列九重，下臨南極。今皇帝稟慶自天，匡時降世，德兼神武，八方迴向化之心，道契淳和，萬國賴昭蘇之澤。謹依科式，齋香花燈燭，供養之具，歸命南方九天帝君、熒惑火德朱鳥七宿中外諸星官。以是功德，願降南上九天朱光丹臺三氣懸光，來輔皇帝身。於夏季三月之中，丙丁巳午未位，有地網天羅、赤星暗曜、惡宿衝破，本命行年，一切灾衰，咸蒙釋散。南宮注壽，丹簡題名，永垂富國之功，更耀長生之籍，宮闈隆盛，遐邇宴安，慶襲山河，福霑軍庶，得道之後，與天帝合真。

### 西方九天帝君

伏聞清濁分形，陰陽定位，秋至而九天氣肅，金行而四海風清，義定五常，功成萬物。今皇帝應運挺生，匡時播德，化洽而寰瀛向化，功高而天地同功，每仰玄科，以安邦國。謹依科式，齋香花燈燭，供養之具，歸命西方九天帝君、太白金精白虎七宿中外諸星官。以是功德，願降西上九天素華皓闕七氣流光，來輔皇帝身。於秋季三月之中，庚辛申酉戌位，有地網天羅、赤星暗曜、惡宿衝破，八卦九宮，一切灾衰咸蒙釋散。西方列聖，題名於七寶金門，高上衆真，延壽於三清玉籍，八風調暢，五穀熟成，福被邦家，慶霑軍庶。得道之後，與天帝合真。

### 北方九天帝君

伏聞洞陰凝化，北極居尊，渺渺大羅，統諸天而廣大，澄澄妙性，播羣品以生成。道冠三清，智周萬物。今皇帝名高萬古，德被四夷，長垂匡救之功，以協昇平之運。謹依科式，齋香花燈燭，供養之具，歸命北方九天帝君、

辰星水德玄武七宿中外諸星官。以是功德，願降北方九天玄陰蒼玄宮五氣飛煙，來輔皇帝身。於冬季三月之中，壬癸亥子丑位，有本命行年，元辰衝破，赤星暗曜、地網天羅，一切灾衰，咸蒙釋散。乞玉京迴鑒，金闕垂恩，七寶林中，益椿松之壽筭，五明宮內，降鸞鳳之禎祥。萬化成安，闔宮同慶。得道之後，與天帝合真。

#### 東方九地

伏聞大塊分形，方輿構極，四海之波瀾，浩漫未測其深；八紘之境界，渺茫難窮其大。今皇帝謹依科式，齋香花燈燭，供養之具，歸命東方九土皇君、東嶽山川丘陵原阜江海谿谷一切衆靈，懺謝建國已來至于今日，或興居動土，掘鑿不時，開拓山河，廣崇基址，驚喧厚地，觸犯皇君，切慮釁積坤維，灾生分野，祆祥未息，疾病互興。今以一心迴向大道，歸依上帝，委命真皇，建三皇寶齋，演洞神儀式，乞使風調雨順，海晏河清，陰陽和而萬化安，道德興而太階靜。皇帝淳和備體，金石齊

年，六腑常調，百關咸暢。闔宮眷屬，常保利貞，內外士民，長居善慶。得道之後，與皇君合真。

#### 南方九地

伏聞重離設象，九地居南，流火庭深，天池浪闊。蕭丘紫府，長生之籍可求，絳闕朱陵，積善之名斯在。今皇帝謹依科式，齋香花燈燭，供養之具，歸命南方九土皇君、南嶽山川丘陵原阜江海谿谷一切靈官，懺謝建國已來，至于今日，或興居動土，掘鑿不時，開拓山河，廣崇基址，驚喧厚地，觸犯皇君，切慮釁積坤維，灾生分野，祆祥未息，疾病互興。今以一心迴向大道，歸依上帝，委命真皇，建立寶齋，備依儀式，乞使陰陽調理，疆境晏安，麟鳳呈祥，龜龍協瑞。皇帝德符山嶽，慶雲廣覆於九埃，化洽寰區，和氣徧資於萬物。闔宮眷屬，咸保利貞，內外軍民，同霑善慶。得道之後，與皇君合真。

#### 西方九地

伏聞坤元資始，厚載權輿，高下分形，東西列位，振秋風而肅物，運陰德

以成功。鳳嶺流祥，龜山演化。今皇帝謹依科式，齋香花燈燭，供養之具，歸命西方九土皇君、西嶽山川丘陵原阜江海谿谷一切靈官，懺謝建國已來至于今日，或興居動土，掘鑿不時，開拓山河，廣崇基址，驚喧厚地，觸犯皇君，切慮釁積坤維，灾生分野，祆祥未息，疾病互興。今以一心迴向大道，歸依上帝，委命真皇，建立寶齋，備依儀式。伏願大慈廣濟，景福遐臨，布萬里之祥煙，發九重之瑞氣，風調雨順，歲稔時和。皇帝慶祚延長，神明保護，浩浩而滄溟比祿，峨峨而嵩華齊年。皇子王孫，天長地久。得道之後，與皇君合真。

#### 北方九地

伏聞北窮水澤，下極風輪，一陽生而萬物知春，四氣匝而羣陰復位，地數終於四九，國界列於三千。山聳羅鄴，境開崑閩。今皇帝謹依科式，齋香花燈燭，供養之具，歸命北方九土皇君、北嶽山川丘陵原阜江海谿谷一切靈官，懺謝建國已來至于今日，興居動

土，掘鑿不時，開拓山河，廣崇基址，驚喧厚地，觸犯皇君，切慮釁積坤維，灾生分野，祆殍未息，疾病互興。今以一心迴向大道，歸依上帝，委命真皇，啓建寶齋，備依儀式。乞使四時應序，萬物生全，風雲長契於禎祥，水旱不爲其灾沴。皇帝德符天地，道契羲黃。福庭下際於八紘，壽域上參於七政。家國隆盛，遐邇晏安。内外士民，同霑善慶。得道之後，與皇君合真。

北謝太一

伏聞三元祖氣、太一尊神，剖清濁以立二儀，運陰陽而生萬物。普迴靈鑒，廣布玄功。今皇帝謹依科式，齋香花燈燭，供養之具，脩建洞神三皇七十二君寶齋，歸命太一元君、九皇玉帝、無極境界已得道大聖衆，一切神明，普懺前世今生，六情三業，故誤之罪，咸乞蕩除。東華增無盡之年，南極注長生之籍。功高萬古，位列諸天。降真氣於身宮，保太和於性府。山河並固，金石同堅，境域晏安，家邦慶泰。得道之後，長享自然。

洞神三皇七十二君齋方懺儀

(郭清點校、王卡復校)

# 095 太上洞神太元河圖三元仰謝儀

經名：太上洞神太元河圖三元仰謝儀。唐末道士杜光庭編修一卷。底本出處：《正統道藏》洞神部威儀類。

## 太上洞神太元河圖三元仰謝儀序

廣成先生杜光庭修

經曰：河圖仰謝之法，學道之士常能行之，度洪災之劫，昇為種民。若兵戈水火，旱潦螟蝗，星辰變怪，天地易常，山摧川涸，日月薄蝕，風霜不時，雷電害物，妖氣作沴，鬼邪惑衆，四境不寧，猛鷲為暴。若帝王國主不安，及疾厄災異，至於民間危急，當告謝天地，玄感穹旻，乃可解度耳。

天道憫物，玄聖流慈。太上出河洛龜龍之書，青文綠甲之字，以授帝王。此蓋教民致福謝過，度厄解災之法也。行之則上合天道，舉無不應矣。三元仰謝齋，用壬辰、癸巳之日，戌亥之時。戌亥為天門，蛇對於樞，知變即成龍，龍當其機，識化即入道。戌亥者，天門之津塗。辰巳者，龍蛇之樞機也。感悟求真，必由斯日，故用辰巳日也。壬者，陽氣所生，太一之位也。故戌亥時昇壇告謝。子時，陽氣通生之首也。道法執象導物，伏鬼制神，御天統人，以十二辰為用。立德於子，表成於丑，慎衰於寅，戒敗於卯，運智慮於辰，用消息於巳，救傾於午，即安於未，防亂於申，開大於酉，歸根於戌，太平於亥。歸根則陰氣盡，太平則陽氣昇。道運則陽昇，水柔則道合，故壬癸為勝，順陽合道故也。急有祈謝，未及壬辰日者，寅以慎衰，午以救傾，戌以歸根。此三辰日時，急亦可用，合天道矣。苟能丹苦感徹，必契神明者，餘日無爽，不拘於此矣。未齋三日，掃灑內外，禁絕庶事，約飭僚友，惟務精嚴，一心營備，無忘謹敬也。


天道憫物，玄聖流慈。太上出河洛龜龍之書，青文綠甲之字，以授帝王。此蓋教民致福謝過，度厄解災之法也。行之則上合天道，舉無不應矣。三元仰謝齋，用壬辰、癸巳之日，戌亥之時。戌亥為天門，蛇對於樞，知變即成龍，龍當其機，識化即入道。戌亥者，天門之津塗。辰巳者，龍蛇之樞機也。感悟求真，必由斯日，故用辰巳日也。壬者，陽氣所生，太一之位也。故戌亥時昇壇告謝。子時，陽氣通生之首也。道法執象導物，伏鬼制神，御天統人，以十二辰為用。立德於子，表成於丑，慎衰於寅，戒敗於卯，運智慮於辰，用消息於巳，救傾於午，即安於未，防亂於申，開大於酉，歸根於戌，太平於亥。歸根則陰氣盡，太平則陽氣昇。道運則陽昇，水柔則道合，故壬癸為勝，順陽合道故也。急有祈謝，未及壬辰日者，寅以慎衰，午以救傾，戌以歸根。此三辰日時，急亦可用，合天道矣。苟能丹苦感徹，必契神明者，餘日無爽，不拘於此矣。未齋三日，掃灑內

太上洞神太元河圖三元仰謝儀

壇堂第一


壇堂相近，以便法事。闊狹豐儉，隨處取足。賓主房室，勿逼堂墀，食屋浴室，與圍相遠。內外區分，慎無敞露。若住止迫迮，嚴加障理，新淨帷幔，葦薦籬蔭。斷隔牢密，勿使煙臭相參也。齋堂中正面設太上位，左右經寶、師尊及講誦之所，屏幃案几，香燈鑪奩，四周舒陳，皆令整潔也。

堂位



壇圍柱纂，詳見黃錄立成儀。

壇北位



太歲 本命 行年 元辰 生月 胎月  
 遊年 三丘 五墓 九幽  
 宮宅 門戶 窗床  
 堂房 井竈 圍溝  
 倉庫 園

右四十燈，隨位安之，各列牌榜。

神位第二

神位之設堂，於庭中平地作墀，方三丈九尺。應三界九壘。墀外護淨八尺，以繩約之。四方方然八燈，合三十二燈。燈高九尺，應九玄三十二天。次第二墀，方二丈四尺，應二十四炁。四方方然七燈，合二十八燈。燈高五尺，應五星二十八宿。

二十八宿中間，正四方方然一燈，正中中央然一燈，又夾二燈。並高七尺，以應七曜。又隔七尺，即為天心。天心方一丈，正中央然十燈，又安二燈。各高七尺，應台斗。天心前施一案，不然香，以置大羅之策。策左又一案，然一香。策右又一案，然四香。策之四方各一案，然一香。墀外正神九十一燈，各高五尺。太一、十二辰、二十四炁，太歲、本命、行年、元辰、生月、胎月、遊年、三丘、五墓、九幽，合六十一燈。宮宅門戶窗床堂房井竈圍溝倉庫園，各二燈，合三十燈。凡一百七十燈。

策用檜柏香材竹等，長一尺二寸，廣四寸四分，厚三分。符板亦然。皆長九寸，闊一寸八分，厚二分，竅其上端，絲繩穿之，或懸或閣，隨便而用。

符板六十四枚，燈牌二百三枚。各長七寸，闊一寸，厚二分，懸之。策一枚六十神，板亦如之。

夫燈以釋暗增明，捨陰就陽。凡用薦席三周，其外步障禁隔，悉取精足也。所用之物，力可堪者，悉須置之。

堪而不置，是獲悖財慢法之罪，怠惰之謫，雖小不原。立功務德，勇猛為上。又不得牽引非己之物，及強乞逼借，有忤神明，其咎不赦。謹而精備者，福降無涯。自下昇高，階賤成貴，積微至著，鍊偽入真，解身中宿根二十八結，度陽九百六之災。通究上玄，保長生之樂。帝王修之，可以神明通感，陰陽交泰，國安民和，無三災水火兵疫之憂矣。得不勉哉。

門用長纂八枚，門檐四枚，釘鈕懸榜。門間短纂二十枚，朱繩六十四尺。紵芒為之。門榜四枚，廣六寸，長五寸，覆翼相稱。西北亥天門，玄書白上。東南巳地戶，黃書朱上。西南申月門，白書朱上。東北寅日門。朱書黑上。

甲子王文卿，乙丑龍季卿，丙寅張仲卿，丁卯司馬卿，戊辰季楚卿，己巳何文昌，庚午馮仲卿，辛未王文章，壬申侯博卿，癸酉孫仲房，甲戌展子江，乙亥龐明公。

已上十二神列於北方，始於亥，訖於丑。

丙子邢孫卿，丁丑趙子玉，戊寅虞

子卿，己卯石文陽，庚辰尹佳卿，辛巳陽仲公，壬午馬子明，癸未呂威明，甲申扈文長，乙酉孔利公，丙戌車元昇，丁亥張文通。

已上十二神列於東方，始於寅，訖於辰。

戊子樂石陽，己丑范和卿，庚寅褚進卿，辛卯郭子良，壬辰武雅卿，癸巳史公來，甲午衛上卿，乙未杜仲陽，丙申朱伯衆，丁酉臧文公，戊戌范少卿，己亥鄧都卿。

已上十二神列於南方，始於巳，訖於未。









庚子陽仲叔，辛丑林衛公，壬寅丘孟卿，癸卯蘇他家，甲辰孟非卿，乙巳唐文卿，丙午魏文公，丁未石叔通，戊申范伯陽，己酉成文長，庚戌史子仁，辛亥左子行。

已上十二神列於西方，始於申，訖於戌。

壬子宿上卿，癸丑江漢卿，甲寅明文章，乙卯戴公陽，丙辰霍叔英，丁巳崔巨卿，戊午從元光，己未時通卿，庚

申華文陽，辛酉邴元玉，壬戌樂進卿，癸亥左石松。

已上十二神列於中央，繞方丈之外四邊各三，始於申，訖於未。右六甲直符姓名，各懸所屬之燈，書版策，依次書符，題天如左。

太皇黃曾天	太明玉完天	清明河童天	玄胎平育天	元明文舉天	上明七曜摩夷天	虛無越衡天	太極濛翳天
							
從官九 億萬人	從官九 億萬人	從官九 億萬人	從官九 億萬人	從官九 億萬人	從官九 億萬人	從官九 億萬人	從官九 億萬人

右八天位屬東方八符。朱書青氣生文，他做此，八直符黑書。

赤明和陽天  
從官九  
億萬人

玄明恭華天  
從官五  
億萬人

耀明宗飄天  
從官五  
億萬人

竺落皇笏天  
從官十五  
億萬人

虛明堂曜天  
從官九  
億萬人

觀明端靜天  
從官十二  
億萬人

玄明恭慶天  
從官十七  
億萬人

太煥極瑤天  
從官十八  
億萬人

符黑書。  
右八天位屬南方八符。黃素朱書，八直

元載孔昇天  
從官十八  
億萬人

太安皇崖天

顯定極風天

始皇孝芒天

太皇翁重浮容天

無思江由天

上揲阮樂天

無極曇誓天

符黑書。  
右八天位屬西方八符。黑地白書，八直

從官七  
億萬人

從官十五  
億萬人

從官四  
億萬人

從官七  
億萬人

從官七  
億萬人

從官七  
億萬人

從官七  
億萬人

皓庭霄度天

淵通元洞天

太文翰寵妙成天

從官五  
億萬人

從官五  
億萬人

從官五  
億萬人

太素秀樂禁上天

太虛無上常融天

太釋玉隆騰勝天

龍變梵度天

太極平育賈奕天

符黑書。  
右八天位屬北方八符。青地黑書，八直

大羅策文

太上無極至真無上無為大道應感真精  
大羅梵氣虛皇玉靈百八十道君無極世  
界天師至尊道德衆真已得道無量大聖  
衆此四十九字紫書

右一策版竹隨時安南方，首北正中，  
別案檠及香。此名鎮策，細書取容。題簡策  
法，皆應朱書，忽急促無朱，用墨。鎮策紫書，取  
通皇極無象，見則吉昌，相生制用，內外和同，各  
有其趣，慎勿誤換之。書天畫符章。

從官五  
億萬人

從官五  
億萬人

從官五  
億萬人

從官五  
億萬人

從官五  
億萬人

次題燈如左：

角二，亢四，氏四，房四，心三，尾九，箕四。

已上東方七宿，始辰訖寅。

斗六，牛六，女四，虛三，危三，室二，璧二。

已上北方七宿，始丑訖亥。

奎六，婁三，胃三，昴七，畢八，觜三，參十。

已上西方七宿，始戌訖申。

井八，鬼五，柳八，星七，張六，翼二十二，軫四。

已上南方七宿，始未訖巳。

右二十八宿各懸所屬之燈。  
日寅卯之間。月酉戌之間。歲星卯。熒惑星午。太白星酉。辰星子。鎮星中。

右七曜，各懸所屬之燈。

陽明一，陰精二，真人三，玄冥四，丹元五，北極六，天關七，輔星八，弼星九。

右北斗九星名，各懸所屬之燈。

上台虛精，中台六淳，下台曲生北斗九星，與此三台十二燈，列於正中，縣策居纂之半，鑽繩令堅，鎮星附之。

太一壇北正中。十二辰齋所四

方。二十四炁太一之北。太歲隨歲所在。本命家主一人。行年同上。元辰，生月，胎月，遊年皆以家主一人年命。三丘丑上。五墓姓墓。九幽合六十一燈。宮屋之正中。宅所居正中。門，戶，窗有紗錢者。床蕩關正中。堂內前外前。房側廂內外。井，竈，圍，溝，倉六燈在東。庫北方。園合三十燈，並前九十一燈。園燈隨所在，無或遠者，置門外之東。凡十五名，各二燈，無亦勿關。

右列燈符，東向存思，請願等法。

甲寅，丙寅，戊寅，庚寅，壬寅。

已上列東方之北。

乙卯，丁卯，己卯，辛卯，癸卯。

已上列東方之中。

丙辰，戊辰，庚辰，壬辰，甲辰。

已上列東方之南。

丁巳，己巳，辛巳，癸巳，乙巳。

已上列南方之東。

戊午，庚午，壬午，甲午，丙午。

已上列南方之中。

己未，辛未，癸未，乙未，丁未。

已上列南方之西。

庚申，壬申，甲申，丙申，戊申。

已上列西方之南。

辛酉，癸酉，乙酉，丁酉，己酉。

已上列西方之中。

壬戌，甲戌，丙戌，戊戌，庚戌。

已上列西方之北。

癸亥，乙亥，丁亥，己亥，辛亥。

已上列北方之西。

甲子，丙子，戊子，庚子，壬子。

已上列北方之中。

乙丑，丁丑，己丑，辛丑，癸丑。


已上列北方之東。

右六甲各五位同所，諦識却邪，勿妄求正，姓名如前，簡書之。此為北向存請之法。凡燈版符簡采色裝畫，每令膠固，雖風雨亦不可收，以至竟事。或有損污，告真而修之，切在嚴淨，可以致福。風雨暴至遷燈卮。

南第一太  
黃皇曾天  
從官九  
億萬人

南第二太  
明玉完天  
從官十六  
億萬人

南第三清  
明何童天  
從官十七  
億萬人







南第四玄 胎平育天 從官十 億萬人




南第五元 明文舉天 從官十一 億萬人



南第六上明 七曜摩夷天 從官八 億萬人




南第七虛 無越衡天 從官二十 六億萬人




右北方七宿，黑地白書符，取生氣，他做此。天及讖丹書。

西第一太 極濛翳天 從官十 億萬人




西第二赤 明和陽天 從官十八 億萬人




西第三玄 明恭華天 從官五 億萬人



西第四曜 明宗飄天 從官五 億萬人



西第五竺 落皇笏天 從官十五 億萬人



西第六虛 明堂曜天 從官九 億萬人



西第七觀 明端靜天 從官十 二億萬人



右東方七宿，青地黑書符，天及讖丹書。

北第一玄 明恭慶天 從官十七 億萬人




北第二太 煥極瑤天 從官十八 億萬人




北第三元 載孔昇天 從官十八 億萬人




北第四太 安皇崖天 從官七 億萬人




北第五顯 定極風天 從官十五 億萬人



北第六始 皇孝芒天 從官四三 億萬人



北第七太皇 翁重浮容天 從官四十 三億萬人




右南方七宿，赤地青書符，天及讖丹書。


東第一無 思江由天 從官九 億萬人




東第二上 撲阮樂天 從官三 億萬人



東第三無 極曇誓天 從官十六 億萬人




東第四皓 庭霄度天 從官十六 億萬人



東第五淵 通元洞天 從官十 四億萬人



東第六太文 翰寵妙成天 從官十 二億萬人



東第七太素 秀樂禁上天 從官十 六億萬人




右西方七宿，白地黃書符，天及讖丹書。

太虛無上 常融天 從官八十 億萬人



右西南方，黃地朱書符，天及讖丹書。

太釋玉隆 騰勝天 從官八十 億萬人



右東北方，朱地青書符，天及讖丹書。

龍變梵

從官八



十億萬人

度天

右東南方，黃地白書符，天及讖丹書。

太極平育

從官八十



億萬人

賈奕天

右西北方，玄地黃書符，天及讖丹書。

諸天之氣，凝為星辰，結為山嶽，天星通應，以掌人倫。故河圖龍文，演之以示於世。世人知而修之，可以解灾致福耳。始乎北者，拜宿為端，心注天路，逆歷星官，依度環回，期逢玄祐。凡拜四維，各十二拜。

大羅策及符版燈簡，諸天位號，與東向法並同。所書簡畫符，悉當春東、夏南、秋西、冬北，向王潔淨，燒香書之。書訖，當懸策之前。師盥漱向王，臨目握固存神，列符簡於案上，叩齒三十二通，咽液三十二過，敕符呪曰：

下遊上昇九玄祐，黃奕始通神氣覆。事竟，收符策，存神如前，又呪曰：若風雷之變，公私之急，暫收符策，不須敕呪。

行善守玄魂魄正，三天降福九君令。策中從官人數，變化隨時，春十夏百，秋千冬萬，四季同億，五化周徧。自天子至于庶人，可通用億數為勝。其數東九、南三、西七、北五，此為氣數。子庚丑辛，值七為金，寅戊卯己，得三為火，此五行之氣數也。故東方九氣青天矣。

修此齋者，經云：一者存思定心業也，二者祝願習口業也，三者拜禮改身業也。以善易惡，惟在至誠，三業既俊，百福斯至，可不務哉。方壇或墀，使外方五十五尺，應羅天大衍之數。纂高丈二，門廣五尺，散纂九尺，門榜書處，地方三寸三分。四方及中，施六十燈，各高六尺。大約燈可用二百三十，若地狹力貧，促令至少，亦須三十枚，不可減矣。

詳擇吉辰，肅備法物，招結道友，延請高流。皆須澡浴，鮮潔衣裳，至齋所前。三日却葷污，斷外事，一心清淨，以俟修奉。雜役之者不得多，人多則誼聒，必擇修謹敬慎者，周事而已。

更直更息，不得俱卧。侍香芬馥，使晝夜不絕。侍燈明徹，令達旦揚輝。齋官平旦供糜粥，正中蔬食，必令素淨甘鮮，不得用血腥葷雜之物，可甘自熟之果，勿啗向王之菜。賓主相率，在於翹勤，謙懇為上。此齋無署職，宿啓只以朝中二時。如靈寶法，禮方啓告，至夕即大謝。先入戶呪曰：

三元正氣，入我身中，通達所啓，皆得上聞。畢，次華夏讚，引入讚頌，旛節列止壇前，出亦如之。

### 入壇第三

入壇以亥後。眾官自齋堂依位庠序，讚詠導引，至亥上天門。法師呪訖，入纂內，左巡天外一周，至戌，入環三光一周。法師於本位立，眾官繞三光至南面，對北正立。都講唱，各禮師，存念如法。

### 思神第四

法師鳴法鼓三十二通，臨目內觀，先存三寶，次存受法三師，次存三一，次存三萬六千神，羅列內外，備衛身心，諦念三十三天，七十四方，想見無

極神氣、雲彩網緝，與天官地司，九府七曜、五行六甲、土皇洞靈、一切真仙、將吏兵士、職宰典者、直符直事，一時雲集，滿於空中。周繞壇墀，齊整肅然。願今歸命天尊，賓主蒙恩，一切存亡，咸荷福祐。次都講唱，鳴法鼓三十通。法師鳴鼓訖，咽液三十二過，跪上香。

### 上香第五

法師於策案側一案四鑪中上香，三十三過。一鑪六捻，一鑪十六捻，一鑪八捻，一鑪三捻。畢，起立。衆官二人爲侍香，從地戶入，取四香鑪。一仍出天門，於衆官前行香。人各三捻，上香竟，侍香從天門入，置鑪本處，出地戶，還本位。次都講唱，各稱名位，次發鑪呪曰。

### 發鑪第六

上清玄都大洞三景弟子無上三洞法師，奉行太玄河圖大謝法事，某嶽某帝先生，小兆真人臣某等，謹上請太上玄元太上無極至真、無上無爲大道應感真精、大羅虛無自然紫虛妙有無爲無礙玄青元黃始白祖氣、高上大有玉

清上清玄都玉京七寶紫微太清太極洞冥小有三元四始五重九極紫陽至真玄精神氣、領聖官君、統真神吏、主仙靈司、總錄典者、左右龍虎騎、侍香飛龍玉童、傳言繡衣玉女、三界直符、諸天直事、諸地幽僚、諸水玄職、諸土皇執事、諸洞府郵驛、諸日月星宿山嶽谿谷池澤河海溟漢川濟江淮泗瀆九宮六甲諸方使者、有漏無漏出世在世無量無邊無鞅境界，及此間土地里域真官正神，並出嚴裝。又請東極大夏兵九萬人，南極銅頭鐵額兵三萬人，西極金剛敢武力士七萬人，北極大項大甲神兵五萬人，中央食鬼鐵面兵十二萬人。又請九聖九真九仙兵馬各九億萬騎，一時齊集，侍衛壇墀。臣等克以某元吉之夜，欽奉皇帝詞忱，瀝悃勵誠，燒香立齋，禮謝懺祈，謹以啓聞。願蕩滌妖氛，請降真氣，流灑玄澤，浹降皇帝及臣等身中。騰臣所啓，衆願允遂，家國蒙恩，即得上御太上至真虛皇玉帝御前。

### 禮三十二天第七

次都講唱曰：

臣等至心歸命太黃皇曾天帝君，  
臣等至心歸命太明玉完天帝君，  
臣等至心歸命清明何童天帝君，  
臣等至心歸命玄胎平育天帝君，  
臣等至心歸命元明文舉天帝君，  
臣等至心歸命上明七曜摩夷天帝君，  
臣等至心歸命虛無越衡天帝君，  
臣等至心歸命太極濛翳天帝君，  
臣等至心歸命赤明和陽天帝君，  
臣等至心歸命玄明恭華天帝君，  
臣等至心歸命耀明宗飄天帝君，  
臣等至心歸命竺落皇笏天帝君，  
臣等至心歸命虛明堂耀天帝君，  
臣等至心歸命觀明端靜天帝君，  
臣等至心歸命玄明恭慶天帝君，  
臣等至心歸命太煥極瑤天帝君，  
臣等至心歸命元載孔昇天帝君，  
臣等至心歸命太安皇崖天帝君，  
臣等至心歸命顯定極風天帝君，  
臣等至心歸命始皇孝芒天帝君，  
臣等至心歸命太皇翁重浮容天帝君，

臣等至心歸命無思江由天帝君，  
臣等至心歸命上揲阮樂天帝君，  
臣等至心歸命無極曇誓天帝君，  
臣等至心歸命皓庭霄度天帝君，  
臣等至心歸命淵通元洞天帝君，  
臣等至心歸命太文翰寵妙成天帝君，  
臣等至心歸命太素秀樂禁上天帝君，  
臣等至心歸命太虛無上常融天帝君，  
臣等至心歸命太釋玉隆騰勝天帝君，  
臣等至心歸命龍變梵度天帝君，  
臣等至心歸命太極平育賈奕天帝君，若  
請恩，從方始者，隨宿依度，向東始者依方氣數，各  
住之。

臣等至心歸命太上無極至真、無上無  
爲大道應感真精、大羅梵氣虛皇玉靈  
百八十道君、無極世界天師至尊、道德  
衆真、已得道無量大聖衆，一切正真諸  
君聖人。一拜。

### 懺告第八

跪伏叩頭，唯在精志，不用免冠散  
髮。

上清玄都大洞三景弟子，無上三  
洞法師，奉行太玄河圖朝懺法事，某嶽

某帝先生，小兆真人臣某等，謹同誠上  
啓無上無先無爲無極大羅梵氣虛寂玄  
精至真、太上無極大道、道中之道神明  
君、玉皇上帝、三十二天帝君、三十九  
上真、十方五司、王公丞相、上宰輔弼  
疑丞、羅天壘地諸山諸水諸日月星宿、  
諸土皇洞府天師至尊、得道衆聖、應感  
尊聖、過去當來見在得道無量正真，巨  
億世界無鞅數衆、一切神仙諸靈官。  
某等塵凡賤陋，智識昏蒙，叨荷宿因，  
躬逢道化，早參真教，獲奉玄經。靈貺  
所覃，歡感罔極。但以明科獎善，聽許  
立功爲先，佐國度人，俾效誠節，未能  
固棲山之操，隆隱世之功。常懼運終  
受責幽夜，負天真之訓違，大道之恩，  
晷景易遷，寸效難立，敢緣慈貸之澤，  
誓竭丹心，謹與同志等，沐鍊形神，束  
身歸命。伏願至真衆聖，垂哀宥之慈，  
許以自新，遂其懺請。況奉辭旨，敢不  
上聞有辭即讀，無辭即云秉心回向，願憫所陳。  
皇帝，以祇荷玄休，仰應皇運，居四大  
之重，握萬化之機。業業兢兢，晝乾夕  
惕，竊慮功虧撫御，未洽神明，絕塞窮

荒，莫孚恩信。兵戈水火，旱蝗疫毒，  
妖氣鷲暴，猶困烝黎，震悼之懷，若履  
冰炭，思傾丹慊，上告玄穹。某官以積  
善所鐘，預蒙真祐，而處身濁俗，混迹  
塵穢，乖五常修省之儀，爽四序保和之  
妙。動貽悔吝，累結尤違，不自覺知，  
未嘗懺滌。慮積生往世，或構罪瑕，肆  
意任心，或成殃釁，凡情罔測，神道難  
知，罪目貫盈，而興造不息。上不敬天  
道，下不信鬼神，違戾陰陽，悖亂神理。  
前愆未懺，後惡又加，輪轉海深，重沓  
山積。又五行代謝，灾福不常，二命循  
環，吉凶相倚，星辰躔緯，有臨照之期，  
晝夜晦明，有昇淪之數。或前生今世，  
宿有冤仇，或陽景陰關，猶逢債訟，或  
己身所犯，或先遠殃流，無量無邊，不  
可憶識。臣等擢質太陽，處身道運，得  
以塵穢，參奉洞真，三洞金書，九天玉  
笈，鍊景胎元之妙，凝神抱一之規，鳳  
氣龍圖，迴年駐景，朝元復命，證聖超  
凡，歷代所傳，萬年所寶，師資開悟，咸  
得窺臨。地耳庸襟，值天章之宛奧；  
蜉蝣朝菌，識椿壽之延洪。餐味至音，

踴躍忘倦。必謂九清三境，有朝拜之期，日闕星津，有超騰之望。而昏愚積習，識性易迷，淪溺罪河，漂沈穢海，耽染聲利，留滯繁華，捨正徇邪，構造諸惡。或輕侮聖典，疑毀真靈。或竊盜神書，傳授非道。或規逐財色，貪冒浮榮，外假清虛，內虧真正。或依託三寶，營己奉私，受人崇施，不修功德，侵欺常住，誣調神明。或詐識星文，干知凶吉，自作一法，隳背典常，日積月深，永不知覺。或內乖存注，外闕秉修，瀆亂三宮，昏翳八景。赤子有淪胥之痛，丹田有蒙塞之悲。六氣失和，百關或壅。是以愆能招禍，德可消災，而怨道不慈，疑神不祐。捨本逐末，曾未懺除，渺渺生津，追望何及。至有崇修城闕，制創池隍，經行官任，卜宅相居，土木興工，幽明觸犯。或侵傷土府，或摧壞丘墳。或殘毀神墟，暴害靈跡，穿鑿福地，涸竭泉源，穢污江河，反違天地。或前生累世輪轉受身，億劫以來，莫知終始。或曾居尊位，無道無慈。或爲人臣子，不忠不孝。或殘害物命，以養

己身。或故殺誤傷，恣爲罪犯。或因行討伐，憑公挾私，玉石俱焚，曾無惻隱。賢愚齊殞，豈有矜嗟。致使蠢類無依，人鬼咸痛，以茲前過，流逮此身。或九祖七玄先亡眷屬，幽冥負責，延累子孫。或墳壠不寧，魂神悲怨，因爲注訟，亦致凶衰。況乾坤有刑德之神，天地有司察之吏，陰陽有繩非之日，曹僚有主過之官。善惡必書，纖毫不漏，一失壽域，永陷罪庭，萬劫不還，良可悲念。又常情之內，暗惑者多見，爲善者致災，即謂修善無益。不知前世之餘殃未盡，殃盡則福來。見爲惡者安寧，即謂爲惡無損，不知前世之餘福未盡，福盡即禍隨。遂得逞肆，胸襟縱橫，任意沈於冥夜，衆苦備嬰。自非大道流光，永乖生路，伏聞玄經垂訓，開首悔之門，一旬精修，則太清却其一刻。二時不懈，則上清錄其善功。三年啓叩，則玉清除其衆罪。諸天憫世，萬聖延恩。委曲誘其迷津，丁寧示其溺喪。躍龍魚以綠圖朱字，現龜馬以玄檢青文。出謝災遷善之書，著度世修生之

訣。證之則常樂，體之則成真。隆善貸之仁，弘無盡之祚，勤行克念，必果安全。皇帝仰緣河洛品文，玄元聖旨，歸依稽首，懺罪希恩，普三界以虔祈，徧諸天而悔謝。華燈散景，遐象星關，香霧騰芬，仁通雲路。敷真文寶懺，列璇極瑶樞，布款披心，冀迴真鑒，上願二儀寧晏，三景昭融，緯候循常，風雨時順，宗祧先聖，社稷尊靈，承祐無涯，與天共永，玄黃分次，無乘凌孳蝕之災，海嶽封疆，無水旱兵蝗之變，三邊澄靜，兆庶歡康，賊子姦臣，悛心革面，夷蠻戎狄，航海梯山，帝壽延長，卜年悠久，聖賢佐理，忠孝推誠，武偃文興，天清地靜。臣弟子某官等，明誠上達，祈向感通，天錫休祥，神資楨貺，宿冤蕩釋，債訟和平，萬惡雲收，千災冰泮。幽陰受福，玄祖生天，恒居道中，常與福會，不逢魔惡，不墮邊夷，水火無侵，刀兵不害。常善救物，立功佐時，舉世太平，咸歸道化。心神朗慧，壽命延長，五帝四司、三官九府、天關地域、水陸冥曹、泰山艷都、九幽泉曲，落除罪

簡，著上生名，三業障消，十惡根淨，死生受貺，幽顯蒙恩。今故燒香，歸身歸神，歸命大道，伏地首悔一切罪尤。伏願大羅虛皇、無極上聖、三尊三寶、道德至尊、三十九真、三十二帝、日月星宿、台斗真官，六甲五行，諸天諸地，一切尊聖、得道神仙，賜敕告幽明內外寮屬，監天司過司命高真，察皇帝臣等改往之誠，獎皇帝臣等自新之志，無邊之覺，並賜蕩除。法籙吏兵，直符神佐，鑒領騰奏，立冀感通，如願之辰，仰荷天尊弘慈之澤，副皇帝臣等歸命之誠。謹啓以聞。

### 次十大念

臣等一念天地交泰，二念日月齊明，三念陰陽順序，四念國土安寧，五念帝王景祚，六念宰輔忠貞，七念萬姓歡樂，八念九穀豐盈，九念幽途離苦，十念大道興行。

### 復籙第九

香官使者、侍直衆真、五帝直符、諸天司察，臣等奉爲皇帝燒香，朝謝事訖，上願大羅三十二天天帝、直符百八

十道君、直事三十九真使者、三元百二十曹職司，與今歲月日時將吏、七曜五行、上下中央四面土地里域真官正神，三界內外一切靈司，同記皇帝臣等自新之誓，諦納請願之誠，使嘉氣榮光，照耀神州壇場之內，三元五帝，呈瑞宮闕齋靜之中，龍馬負圖，龜魚表貺，朱綈再出，綠字重新。皇帝道德昭彰，玄功遐被，祚曆延永，率土太平，臣及弟子等衆罪蠲消，萬善臻集，普天受福，幽顯沾恩，九祖三師，克昇真果，侍香侍燈玉童玉女，三界官屬，應感神明，奏臣所啓，徑御大羅虛皇玉帝御前。

### 次學仙引出

次巡中燈，出地戶，繞三光，巡天一周，至地戶

### 次出戶呪曰：

六方降真，九天垂祐，善神相親，功德成就。畢，叩齒嚙液各三十二徧。

### 次出還齋所。

太上洞神太元河圖三元仰謝儀

（郭清點校、王卡復校）

# 096 太上大道玉清經

經名：太上大道玉清經。簡稱《玉清經》。撰人不詳，約出於唐代。十卷。底本出處：《正統道藏》正一部。參校本：敦煌 P.2257（卷一）；S.5507（卷四）；P.2405、P.2341（卷七）；P.2385（卷十）等抄本。

## 目錄

- 卷一  
本起品第一  
緣對品第二  
世界品第三  
慈悲戒序品第四  
說戒科品第五
- 卷二  
慈悲方便品第六

言龍中劫方便度人品第七

### 卷三

通濟幽冥品第八

### 卷四

上元品第九

中元品第十

下元品第十一

三元寶經流通品第十二

### 卷五

八節品第十三

齋戒品第十四

### 卷六

昭靈品第十五

威魔品第十六

### 卷七

道化四夷品第十七

### 卷八

幽棲品第十八

### 卷九

明威真人威邪品第十九

### 卷十

法印品第二十

## 太上大道玉清經卷之一

### 本起品第一

道言：昔元始天尊與諸賢聖億億萬衆處處周旋，最後下觀棄賢世界。是時四天下一切人民福德欲盡，不久之間，大劫改運，人民凋逝，天下失止，大道不行，唯好攻伐，刑殺無度，處處興兵，更相謀害；鄰國絕義，不相互好；以強凌弱，割奪孤寡；劫盜四起，天告灾祥；日月薄蝕，星宿殞墜，七曜逆度，無雲雷雨，或復雨血及諸怪異等。水旱不調，百穀焦枯，大地震動，處處坼裂，山嶽崩倒，金玉銷化，惡獸噉人，凶神露形，而行毒癘，地生毛髮，六畜出語，皆如人聲。天下兆民，心中不安。君臣相猜，父子相刑，不修善道，唯惡是與。五百年中轉就加甚，求生不得；亦有不堪苦惱，投淵赴火，自縊而死。饑餓困苦，人民相食。大地乾燥，泉流不通。是時天尊與諸聖衆

愍念衆生壽命不幾，無所恃賴，驚怖馳走，悲號切怛，苦痛切己，如被火毒。於是天尊大慈力故，與諸聖衆俱坐玄虛之中，去地百丈。是時天地大動，七日七夜而不休息；虛空告瑞，日月重輪，光彩暉煥，星辰明朗，風雨施散，雲霞流布，氣序調適；香煙纏虛，梵唱齊和，金鐘清朗，玉磬鏗鈴，雷音遐暢，周遍遠聞，萬變天樂，空中自鳴；龍座敷際，羽蓋高張，靈節影霄，長旛垂天，仙花薦地，雲帳羅空；師子仰號，神离俯鳴，金鳳齊唱，虬龍吐音，琳琅撫節，萬籟沉吟。天尊與諸聖衆俱放身光，照耀十方，無幽不燭，其光千種，須臾萬變，一一光中皆有真人，一一真人各有侍從；清音朗徹而說妙法。四天之下一切諸國王臣民、人及非人，各各皆見天尊大聖坐在空中，與大造真君、巨靈仙人議定劫數，擠度萬物，重校蒼元大錄，延續期運，金簡尅書五帝真文、雲彩霞章，以鎮五方。又勅五帝、河精、四海龍王通流泉源，天灑甘露，潤洽大地。又命風伯、雨師調和陰陽，令寒暑

得宜。又勅五帝、地祇合和百穀，生長藥草。又勅五帝使者殺伏妖殍。又命天龍、雷神驚肅姦逆，駭動陰邪。又命收風列仙以調和氣，淳熟人行，令君臣和睦，父慈子孝，兇弑變善，幽顯交歸，毒癘潛藏，邪魔匿形；芳卉藥草，處處萋茂；五穀結實，冬夏成熟；流泉甘水，通同盈溢。又命五斗仙君周正璇璣，分疏日道，布置星辰。又命四天善神輔佐天子。又差仙官次知國政，使天下德化，萬民安樂，鄰國交通，怨結解散；人弘大義，皆行正道，各守其分。於是太上大道君哀愍萬流，蠢蠢危脆，故扇玄風，以導羣生，餐服和氣，沐浴道化，使反朽歸榮，臨敗得成。此時大慶，更延九百萬歲。上元九府，刻玉左契，以授天子，使葉葉相承，則天正化，不傾下邪，推運應化而爲帝者。皆是金闕之中差次仙官，下來理民，得三百萬歲，轉差星官之中仙官下知天位。如是國主皆是諸天真聖應運降下，故得延續期運，保守天祚，有生之類，無不恃賴。

爾時天尊與諸大聖、無數億衆各乘天寶瓊臺而下諸國，國中天子、諸王羣臣、一切人民，男女大小，隨處供養，香花伎樂，歌頌讚歎而爲聽法。爾時復有南方八蠻道君與諸聖衆六十四億萬俱乘絳雲之輶，從南昌宮中而下，與北方玄天之中五狄真君二十五萬億仙官各乘玄雲寶輶而下，空中校定水火、期運劫數。爾時復有西方六戎道君與三十六萬億仙真各乘三素流霞寶輶，從皓元天中而下。爾時復有東方九夷道君與八十一億萬衆各乘碧霞飛輪之輶，從始青天中而下，與六戎道君校定兵病之災，記注善惡功過之錄。然後起居中央虛皇太玄老君並受左右玉契，請說造化妙理、幽祕至法，正定天元，迴易運會，調和四氣，生成萬有之事。

爾時棄賢世界有一國王名曰德正，聰明正直，利根辯惠，皆是應運降神福德之身，爲衆生故，而爲導首，遍告國內臣民男女而作是言：今得太平，天下無事，火災消滅，兵病不起，百



穀熟成，皆由道恩，非自然也。何以報道罔極之恩？唯當傾心盡意，恭敬供養，造立宮觀，香花燈燭，晨夕禮誦，齋戒悔過，以求福祐。今正值天尊校定吉凶、期運之際。我今自爲，又應爲汝，稽首歸命無上正真，特乞哀救，授我至法。今我國內兆民男女壽命延長，各得終考。又欲奉請無上正真降臨我所，申我微心、供養之志。汝等民人同我願不？於是國中有六十萬長者，神心長者、五通長者、文明長者、玄會長者等而爲上首，從四遠來起居國王，聞王教敕，未敢全信。復有八十大臣，寶明大臣而爲上首。於是餘臣及諸長者心懷疑貳，顧相謂言：自我出生世界以來，祖父相承，聞有真道，而目不曾睹，太虛寥廓，豈有徵驗？今者太平自由上天，何關道力？爾時大臣寶明聰辯正直，言常有徵，天下所信，知人狐疑，心不純信，即於王前高聲唱言：我聞太極天尊造立天地，覆載萬物，開明日月，分布星辰，運化真氣，長養有生，雖處上界，而應化下土。今之

太平，劫祚延長，皆道之力。而含生蠢蠢，唯知日用，心無慙愧，反更忘本，而言今者太平自由上天，不關道力。汝等云何自欺？我聞大道生天生地。天尊道，故得安靜；萬物貴德，故能盡生。汝不信道，是汝深咎，亦猶世間愚癡之人，心不慈悲，反逆父母，離棄兄弟，兀然猶居，謂我自咸，不由父母。汝等愚癡，亦復如是。於是寶明出此言時，德動天地，虛空雨花，香雲四暝。又聞上方空中有人言曰：道德不自彰，真人不恃功。窈冥中有信，慈惠故能同。空中之聲纔絕，須臾，西北邊上忽然風雷電激，雲霧翳天，唯天王與寶明身邊光明，各方一丈。諸人遙視，見此祥瑞，心生悔過，叩頭乞命，歸投大王，信向冥契。須臾之頃，風雷消滅，雲霧廓清，闔國臣民稽首王前：不審大王向所言教，欲請天真降臨王所，請王教敕，所須何者？唯願大王哀愍衆生，開悟未聞。王言：道在人心，唯當供養恭敬，造立宮觀，供給所須，晨夕禮願，悔過請福。諸人聞說，心中歡

喜，禮謝受生之恩。王又告言：汝等諸人且各各還家，退齋思失，沐浴身心，並傍告未聞，如我教敕。諸人聞已，一時辭王，各還其家。王即敕大臣寶明遍告城邑內外人民，嚴整宮殿，掃灑城郭，處處燒香，供養恭敬，盡世所有，陳列牀座。於是退齋日訖，國內人民四方雲萃，王與內外羣臣眷屬，香水灑地，安施牀帳，成辦以具，合國大小，遙禮十方，七日七夜，行道禮願，願得無上正真降臨下土。微生蠢蠢，誠可哀愍。於是三月十五日日中之時，上方西北邊忽有九色流霞，光彩煥爛，香風清暢，梵唱和雅，天樂流亮。大灑甘露，大地震動，雨百寶天花，以驚於地。雲車羽蓋，浮空而至。衆真大聖各乘天寶之臺，臺中皆有陰輝夜明。又有五色神光照朗虛空，光逾日月，臨於王城，七日七夜。是時天尊以慈力故，成就大悲，救護衆生，愍念衆生，開決孽瞽，療治衆病，爲作導師，爲作津濟，保鎮劫運，更生萬物。於是國王大臣及諸人民重復作禮，苦請天尊開發大化，

慈造羣生，明其耳目，令得正道，堪受祕要。於是天尊命巨靈仙人而告王曰：子以爲一國之主，天下所推，位登世極，凡間之貴，不先於此。但以正法治化，不枉人民，亦足功感上天，何煩祕要？祕要之道，難可卒聞。王及大臣先是福德之身，以方便力，欲爲衆生開張耳目。

天尊告曰：祕要之階不過慈善，慈善之法不違科戒。我以大慈悲力成就國土。諸人聞說，皆盡欣喜，心願奉戒。天尊告曰：戒有多種，人亦多品。上品之人，身先無犯。身既無犯，亦無所持。中品之人，心有上下，睹境即變，以戒自制，不令放逸。如此之人，或受十戒、五戒，以自防護。下品之人，惡心萬般，難可禁制。下品之中，復有二種：上品者，身欲奉戒，或受一百九十九戒，或受觀身三百大戒，或受千二百威儀之戒，以自防保，令無越逸；下品下者身同禽獸，雖有人形，而無人心，縱受其戒，終無所益。今且授第二中戒十種科禁入道初門。諸人聞

說，歡喜過大，悉皆伏地而奉戒言。

天尊告曰：第一戒者，不得違戾父母、師長，反逆不孝；第二戒者，不得殺生，屠宰割截物命；第三戒者，不得反逆君主，謀害家國。此戒最重。何以故？是諸國王皆是應化推運，總統天下，一切人民之所機要，一旦無主，不得其死。以其義故，汝等當知。第四戒者，不得媼亂骨肉、姑姨、姊妹、及他婦女；第五戒者，不得毀謗道法，輕泄經文；第六戒者，不得汗慢靜壇，單衣裸露；第七戒者，不得欺凌孤貧，奪人財物；第八戒者，不得裸露三光，欺凌老病；第九戒者，不得耽酒任性，兩舌、惡罵；第十戒者，不得狼戾自任，冤枉威刑。如是十戒，當終身奉持。天尊言：不孝父母師長者，死入地獄，萬劫不出；縱生人中，小小孤露，受人凌刺，常居卑賤。好殺害者，五百生中，受人割切，苦痛萬般。反逆君主者，死入地獄，萬劫受苦，出生邊地無主之域，常被攻劫，晨夕恐怖。媼戒最重。若有男子、女人於父母、姑

姨、伯叔、兄弟、姊妹、六親骨肉一念之頃而生色想者，八萬大劫受地獄報，鐵釘刺身，種種燒煮，從地獄出，受六畜形；又八萬劫，從六畜又作溷中蟲，又八萬劫。善男子，汝今當知一念之頃，於骨肉之親而生色想，受報尚爾，況復身於骨肉之親而爲惡行，罪不可說。如此之人，不合共行、住、坐、卧，同里居住，我名此人爲十惡之人。此人身雖強健，魂魄以被惡鬼攝持，善神不祐，此人之身不合在道，應速驅逐，令其急出，不合教令作其師匠。作師匠者，與其同類出沒相似。九祖被考，又名此人爲敗壞人。善男女等，汝今當知媼、殺、劫、盜、欺凌孤弱、輕忽貧病、誹謗善道、破德行人、泄慢真文，此罪極重，不煩一一記示之耳。汝等但精心守戒，道自降子。於是國王大臣善男子等歡喜奉行，不敢違犯。

道君又命巨靈真君授王雲篆天書上中下章總一千條秘法，皆以柔玉爲簡，紫金爲字，以授與王而誦持之。云此寶經是上天寶文，勤心誦念，使人身

得飛行，永不復滅，六通之道，在意所爲。道君因告王曰：汝等當知四天下，慶同今日，無有異世。大道威神，處處隨類，方便引接，不可思議。千日之後，任王傳授國內正信賢者之法，共匡天下，使玄門廣闢，道化流通。一國男女精心守戒，如護明珠。王及諸臣以正治國，專心誦念。遍敕一國，令立宮觀，唯道自務，餘無所求。國內人民作禮而去。王修誦真文，千日之後，乃棄位禪祚，與其第一太子，名曰善修，專知國政，而習父風。九十餘年而復傳位與弟，弟名善善，以政治國，還習父風。其王子弟六千餘人，葉葉相承，經三萬六千歲，天下太平。父王與善修修守至妙四十餘年，而得六通。以其夕知國政，沉滯常倫，道君先以其中仙之位令知國政，而未階太極。今日之後，太上道君以其勳名巨大，授其祕要，錫王子等太真之任，令侍從天真，教化諸國，隨類現形，濟拔厄難，說法度人。於是太真與諸聖衆互相顯發，遞爲師資。以開光元年七月十五日北

越玄谷，登閬風之臺，禮無上真君，請入大羅天中謁元氣之祖、高玄之宗。真君曰：子雖得六通，道數未足。何以故？子非自然，由學成真，而元氣之宗，真氣混化自然之身，元氣之祖，萬道獨尊，委氣大聖，虛無之真，難可得見，億化如一，綿邈遐曠，恬澹虛寂，寥廓冲邃，都絕言像。十方異道，三萬六千種無不祖於虛無之真也。又我成道以來，不可計劫，唯以二過相見耳。又天帝推校，應運令下，化度衆生，侍從天尊，往四天下教化諸國，布散道氣。何以故？爲延此劫火氣之災，法行道教，以鎮陽九之禍，使火精消滅。至後劫天地崩壞，人民福盡，法當不救。運數之極，自然如此。水劫之初，吾道大行，三十七萬年中，人民淳朴。以後漸漸大道不行，陰氣轉盛，人民僥倖，造營空冢，多起廟舍，遍於世界。男女邪心，修習滅法，不依儀格，叫呼求死，或入火坑，或投深淵，自割自截。群聚行道，歌讚悲泣。或入空冢，默然而坐；或抱死尸，或恭敬枯骨，或以糞穢爲

壇，或以香尼塗地，或以不敬父母，種種苦行。或噉食穢惡，無種不爲，終不能得正真之道。人心偏側，父子無義，於邪教中徒黨興盛。大水劫前有小水劫，十年始歇。從此之後，四千年內於邪教中應有兵革，更相謀害。或稱國王，或得十日、百日，還復自滅。父子無禮，以強凌弱，同姓骨肉自相媾亂。雖有人身而無人心，凶險馳競，不相信用。若此時至，邪道漸興，陰氣極盛，非久之間，漂流沉溺，人化爲魚，蛟龍噉人。當此之際，法應搜選種民，置之福鄉。子當勤苦，晨夕勿懈。是謂大道弘之在人，我命在我，由人攝持，心正則道應，從邪則禍來，好殺還自伐，應當行大慈。

### 緣對品第二

爾時太真與泰清天中新得道者三萬六千人侍從天尊，教化極天之境，周遊下界蠻夷、鳥獸、雜類之國，隨其所好，而爲作法，種種示現，教誨利益，方

便神變，隆伏其心。決到西方黑水之右，有一世界，方八千里，其中衆生種種雜類，悉皆穴處，更相食噉。地生荆棘、毒草諸樹，水泉黑臭，不中灑漱。其國西畔有一大河，其河正方五千餘里，河水滓濁，唯多毒龍，在此河中，風波峻急，不可舟濟。其河東岸而有平地三千里，高此河際，懸五百丈。其世界中所有人民，一半無眼，相牽而行，饑則相食，渴便飲血。有目之人皆遭惡疾，眉髮墮落，身體瘡膿，濁血流出。復多蟒蛇，吞噬人民。無君臣、父子之義，多相戰鬥。無眼之人聞其刀仗之聲，自然驚走，或墮河中，爲此毒龍之所噬齧，不墮河者，復爲羣賊之所食噉，叫喚驚駭，苦痛懊惱。又有溝坑穢惡流溢，臭處蓬勃。其坑之中多有蟲蛆，頭面似人，形長一丈，又能叫喚，無有手足，蜿蜒腹行。復有獾鳥，啄而食之，狼藉薰臭。復有惡鬼，其毛如針，吐氣噓人，皆如火燒。於是平地北畔有六大地獄，獄門大小，俱方一丈。深入其中，漸漸闊大，莫知窮極。其地獄

中唯聞風雷火車之聲，叫喚苦痛，刀鋸槌棒之鳴。又聞唱求救求活之聲。煙焰炮烈，火氣衝天。正西第一地獄之中，又聞風水之鳴，其氣嚴冷，不可當近。又聞暗中咻咻之聲。六大地獄所出風氣皆應焦臭腥薰，不可思議。其獄之門北一里半地，又有沸湯湧泉。泉方六里。其湯之中黃水脂膏、爛皮骨肉隨沸騰湧。又聞泉中有啾啾之聲，湯氣衝人。其湯北岸又有刀山劍樹，新故骨肉零落山下，刀劍之端多掛死屍，屠割筋肉，骨脉相離。睹此苦痛，不能自視。復有生剥皮地獄，殺羊之人死後墮此獄中，受此苦惱，五百年中出生羊中。又五百生備償羊身，輪轉相償，無有窮竟。此沸湯之東復有風刀地獄，方闊一里，毀敗善道及違科犯戒、泄慢真文、傳非其人、販賣道法以贍己利，如此之人，死入此獄，一劫受苦，烈風吹之，往反刀刃，一日之中，千生萬死。從地獄出，還生人中，身繫邪病，根性暗鈍，常居下流，永不聞法。地獄罪魂得出之時，多生邊地、無道之

境，多被攻劫，晝夜恐怖，身體殘陋，氣息腥臊，永不聞法。愍此罪人心無時已，於是道君與太真及諸聖衆救脫罪魂，及此世界之中聾盲之人，令生死開度。即於此世界之上、空玄之中，去地百丈，遙禮元氣。高玄無上天尊以道神力，入六虛大定，分身百億，一身上又放千種光明，一一光中皆有真仙坐飛龍之座，演說妙法。瓊音雷震，左鳴金鐘，右擊玉磬，張九色流霞遍覆此界，一一霞中各有聖衆圍繞說法。大地震動，天灑甘露，香泉流溢，萬籟駭虛，三景齊照，地生百穀，水變清涼，人心淳朴，無相惱害。惡龍攝毒，癘鬼匿形，地獄停悲，劍樹摧鋒，罪魂受生，積痼痊除，聾瞽聰明，殘跛攣蹙，皆得復形。巍巍大化，無得而名。於是衆中新得道者未階玄極，睹此神變，莫知所由。衆中有一五通童子，名曰善積，與金髻童子、華智童子、葆光童子八萬四千俱從座而起，長跪叉手，上白天尊：自我成道以來，經八萬大劫，周旋八方，無所不至，未曾得睹大道威神自在

之力如今日也。自我慶會，今日遭遇大化。唯願正真哀愍未聞，開悟下根，釋諸疑結。於是天尊默然不答。是時童子三請不已，天尊於是凝思冲邈，神

彩澄朗，彈指警效，良久而言：善哉善哉，子之所問，深乎微矣。大道寥寂，理絕見聞，玄默希夷，杳冥深信。子雖經劫數，道德尚存，所居之境近迫泰清，固絕重玄，何由混化，散在三萬六千種內，而不知元乎大羅高玄之宗，局於見聞。明此妙致，遊行無闕，且得長存必也。忘其元氣之主，天傾之禍，亦未由得免也。於是善積聞天尊所說，心開意解，與諸童子深自念言：我宿福深厚，遭遇慶會，欣喜未聞。今得開悟，唯當誓願，而昇大羅，謁先氣之宗高玄道君，諮受秘法、進修之道。是時善積童子與諸眷屬八萬四千人俱前進作禮：太上道君，向蒙開示所未聞，欲將大眾上登大羅，謁高玄之尊。唯願道君慈悲聽許。道君答曰：子欲去者，當捨見聞，雖將大眾，心間無侶，專志願寂，雲泥一貫，收視反聽，道自玄

合。於是善積與諸眷屬奉行教命，先禮上方，辭別道君，上升太虛大羅天中，謁元氣之主高玄之宗。

爾時此界人民皆得蘇息，欣喜踴躍，悉皆舉手，向天彈指，而作是言：我等宿罪，生出惡土，忘失正念，唯惡是與，世世相承，無能悟者，罪垢積習，生入地獄，循環苦趣，不能自知，堅固宿業，一旦消除，不賴道恩，誰如之何？而欲報道，罔知所由。唯願天尊降臨下土，授我所請，允我微心。於是道君先知其意，化作凡人，遊其世界，言語交通，教其道法。或就乞食，止宿其所，教立屋舍，變生爲熟；或作導師，爲其說法，方便引接；或作醫巫，爲其愈疾；或作農夫，教其種植；或作孝子，教其慈義。隨類現形，同其嗜好。爲立君臣，漸漸改革，長幼有序，男女有辨。種種教誨，一十五年，和氣流行，人漸識法，起立觀舍，書經造像，供修齋會，香油燈燭，喜捨珍財，專心奉道，孝養仁義，君臣禮節，異類得生，幽冥開泰，物各守分，不相殺害。於是

道君託作大師，寒棲山林；或有徒衆齋戒說法，或時單己，默坐思念，或復講誦，爲人說法，或時吉凶，言有徵驗。神變恍惚，老少不恒。合境歸化，施設供養，傾世所有，燒香散花，各陳心願，願得天尊降臨塵穢，開悟衆生。叩頭仰天，流血灑地，悲淚嗚咽，七日七夜，心無休息。爾時道君以大慈力故，與諸聖衆乘九色流精、真光之氣，仙童導從，散花燒香，神風激籟，天獸和鳴，麟舞鳳唱，浮空而來，去地五丈而止虛中。爾時先所化人名曰空生，爲諸衆生唱導之首。不審天尊導化有勞，慈造萬物，得無疲極？迂延雲駕，曲臨下土。我等積劫沉滯，罪垢縛累，一旦披霧，沐浴玄津，過太之餘，罔知所謝。真源遐邈，上界虛寥，而塵穢之身忽遭大化，朝菌之命，長睹太陽，枯朽載榮。生成今日，欲申微願，輕觸高尊。唯願大慈賜以蟲蟻忘退之志，誠有質疑，心所未悟。願從天慈，得聞宿命。此土因緣、衆生本起，特視玄鑒之恩，賜爲分別。是時合界大小一時上請，叩頭

流血，涕淚交連。道君以大慈悲故，凝思良久，即命左侍仙童四十九人齊鼓玄雲之璈，同聲合響，奏天鈞大雅合神之曲。又命右侍仙童三十六人吹九和之簫，以合鳳唱，揮玉京八會空洞之音。又命侍香玉童焚百和返魂之香。又命長牙左吏以扣金鐘。又命右直事吏以擊玉磬。久久之間，衆音合會。慶霄纏虛，流霞四張，神風八達，天樂停音。於是天尊口吐香光，大震雷音，而告空生曰：汝今應知大道慈力，生成萬物，故奏衆音，流變萬化，合和生氣，以祛煩惱。汝與大衆生此土者從煩惱中來，造諸惡業，輪轉受報，墮此邊地，不聞善道，忘失本心。此世界者一名報對世界，一名生死地獄。此地獄者，隨處皆有，衆生居中，不能得知，日夜焦爛，坐待消滅。又此河者，名爲生死業報漂浪死津。此六大地獄者，隨人六根造諸罪過。死入此中。又此沸湯者，名曰沸湯地獄，世間有人用湯殺物命，死墮此獄，億劫不出。此刀山劍樹者，世間愚人好斫刺畜生，死受此

苦。又生剥皮者，世間愚人劫奪人財，生割魚肉，死後受苦，生下其肉。又此毒龍蟒蛇者，世有惡人破毀功德，侵剋善人，死受此報。又此溷坑中蟲者，是世間愚人，於父母伯叔阿姨姊妹同姓骨肉而生殺想，又於伯叔阿姨姊妹六親骨肉父母師長而生媯想，死入地獄，萬劫不原，今又受雜類之身而生此蟲，常在溷中恒噉臭穢。空生，當知世間逆人奸媯骨肉，或懷殺想，生死之罪，萬劫說之，亦不能盡。如此之人定不得道，生神不降，生氣不布。空生，汝今當知如此惡人身心以定，不須教化，應須遠離，莫受其供，莫坐其床，莫入其門，入者犯戒，神邪所嫉。三萬六千威儀，此戒最重。故我慇懃，重爲汝說，今廣流布、讀誦此經。世有聾盲之人，不能讀誦之者，但常燒香禮拜，供養經卷，功德無量。若貧乏之人無可書寫經卷，應往有經之家行道禮拜。空生當知，如太真之科，諸善男女等好喜放生，施惠窮乏，醫治疾病，孝養父母，山林寒棲，誦念真經，此五種功德

無有差別，生身受度，必得真道。空生應當開示未聞，念悟心解。爾時大衆聞天尊所說，身心開悟，一時度幸，奉受要言，作禮而去。

### 世界品第三

爾時天尊與諸眷屬、衆真大聖浮空而越炎洲之陽，入光鍊之池，以黑帝真文一篇鎮遏火精，一時而返。以次東遊，過扶桑之陽東南方，經九億萬里，有賢善之國。其國正方八萬餘里，四據滄海，一名極樂世界。其國有王名曰花秀，有八百大臣，又有三萬八千眷屬、六十四大城；復有六千四百小城。其王皆以正法治世，不枉人民。其國豐樂，多饒珍寶，節氣溫和，風雨調適，穀帛殷貯，無諸病苦。其國西北復有一城，城方二千五百四十里，城高七千仞；有四大門，門高六千仞，俱闊一里。樓峙高妙，非常華麗。城中復有七千寶臺，臺中各有夜光明月之輝，照曜晨夕。城中皆是仙人道士，形如

金玉，衣食天厨。而此國王、王臣及諸眷屬皆是應運降神，下知國政。其城一日之中三過香風，吹去微塵，天雨甘露，以潤土地。地多泉池，皆潛通玉津，石髓流黃，飲此水者形如金玉。又復一日之中，三過鳳鳴，萬籟虛吟，香雲凝空，流遍演暢，梵唱和雅，微音清朗，非爲自然，積福所應。爾時天尊與諸聖衆九百億止此城內，俱坐百寶飛龍之座，座高萬仞，出於城上，雲錦瓊羅，以爲敷具。張九色流霞之帳，一一帳中皆懸明月神璣。其帳四角玄虛之中，皆有龍燭光暉，靈鳳舞空，風琴朗霄，香氣氤氳，天香飄颻。爾時天真高尊而命左仙侍童扣金神之鐘，又命右仙侍童擊靈光之磬，又命侍香玉童梵九龍虬鑪百和之香。真儀以列，天鈞又陳。於是天尊放身香光遍照世界，其光萬變，非可目名。彈指之聲，猶如雷音。一國男女聞皆警悟，互相謂言：今日何緣有此祥瑞，香光洞徹，風雷調暢，升沉飛走，跳踉踴躍？此當非凡，急宜速往，看是何緣。於是國王、

王子、大臣、妃后、眷屬又相顧言：此國土福德成就，常有大聖降臨此地，非是餘緣，必定善瑞。汝等諸人各各嚴裝，所須之具，我尅明日，與汝等衆，俱詣寶城。一國男女同時而至，遙見城中光色輝燠，其光之中皆有真仙歌誦靈章，王及國人叩頭禮謝：今日有幸，得睹天尊降此寶城，喜慶交集，不可思議。各各燒香，以陳願念。王及人民立城南門叩頭伏地，良久不起，自思何緣承何福慶，遇會今日。不敢仰視尊顏，唯願高真大慈之心特見哀愍，開悟未聞，解釋疑網。

天尊良久警歎彈指，衆音停奏，而告王曰：子此世界是福之鄉，上界高尊時時周旋，但以劫數遐遠，非子所悟。昔天地未光，混沌未分，有天尊上聖下遊此城，于今以得九億大劫。我昔時與造化道君勘校劫運，同時在此。今者重來觀此世界，亦是因緣，法當更來。又此城中諸仙晚學業以淳熟，大聖雖來，無所言說。國中男女亦階初地，以道因緣而來生此。非久之間，天

真慶會，道法大度，惠及於汝。子當專心，恭敬寶城，持戒布施，心不退轉，道自降子。於是衆中有一童子名曰真行，從座而起，前進作禮，上白天尊，而作是言：自我承福天庭，仰陪霞輦，陶染玄化，百劫于茲，周旋十方，靡所不至，希睹此城莊嚴華麗，人民豐樂，仙伍森羅，瓊林玉枝，虛吟萬籟，淳風反朴，真氣和生，福德巍巍，難可度量。唯願慈光照朗蒙昧，令此大衆豁然開悟。天尊告曰：子見此城適子懷抱，睹此世界，歎未曾有。此界雖名極樂，猶有習氣。此中人民、仙人、道士皆是諸方業道之人，功未充足而來生此，未至重玄冥寂之境。此中時有聖降爲其師，而不久住。真行當知，亦如香積童子自言：道極來詣我所，從我執蓋，首末半劫，請我爲說微妙道法，方始悟解。我又示其大羅高玄之名。於是童子遂往起居，諮問妙致，于今未返。真行當知，汝今所見，亦復如是。幽祕之理，未可輕說。子道數自極，當應得見。於是真行與賢善國王臣民疑意不

了，重白天尊：不審極樂城中仙人道士、國王臣民前世以來修何功業而生此中？天尊答言：修習之法亦有多途，非爲一種。子當諦聽，吾爲汝說而化國中。有四種人天，第一品人孝養父母，奉事師長，濟度窮厄，施爲道法，持戒誦經，晨夕不懈，行道禮願，悔過請福，求見升度。功滿行成，上感楮天，名著左契，金簡刻書，以記生錄，身得自在，飛行上清，隱影萬變，道齊真人，長生不死，白日登仙，位應上真，侍衛道君。暫過此中，或經一劫、半劫而還天中。如此之人，名爲上品。第二品人在世之日，聰明高潔，助國理化，出言利益，施惠廣大，興顯正法，扶助善道，身得尸解，如蛇蛻皮，來生此中。如是等人，亦名現身升度。第二品中復有一種，或遇上帝垂恩，開度生死，枯骨死尸，變鍊成人，感激真氣，自然而仙。或有前身，與道結緣，慶流今身，來生此中。第三品人在生之時，持戒守善，不作非法，起造宮觀，供給香燈，齋講設會，書經造像，晨夕誦念，亦

得尸解，來生此中。第四品人，或承其祖先福德餘慶，身死之後，改姓易氏，來生此中。真行童子與諸大眾疑意不了，重白天尊：不審第四品人承其祖先福德餘慶之力，來生此中者，不審此慶修何功德而慶隆後胤？唯願天尊重爲分別，令心啓悟。天尊答曰：吾言福慶之因者，或其祖父前世施財施食，放生活命，衣食窮寒，扶助孤弱，給賑老病，供養山棲，功不成就，中道而退，身不得度，慶及子孫。或生豪貴之門，聰明利智。或求道未足，法當減度，來生此中。如是之人，德隆九世。真行當知，善惡相似，過積者亦殃及九世，亦猶世間愚人，或承先慶，身生豪貴，自恃強梁，不信宿業，恣意凶險，殺害物命，劫奪人財，威刑無度，毀敗善道，誹謗行人，讒嫉勝己，欺凌孤弱，鞭撻下賤，漁獵殺害，燒煮蠢動，斫刺衆生，不孝父母，反逆君長，耽酒嗜色，媼亂骨肉，犯他歸女，罵辱尊老，裸露三光，不敬有道，惡居其上，輕慢靜壇，泄漏經寶，破齋犯戒，常爲亂首，伺人衰便，

更相陷害，殺生求生，背叛道德。如此之人，亦殃流九世，九品子孫所向傾敗，受人驅役，常被枷鎖，橫羅惡縱，死入地獄，生受六畜，被人燒炙，種種苦集，輪轉惡趣，生無定形，沉溺生死，漂浪苦難。真行當知，我觀下界衆生苦樂之事，亦無多別。何以故？汝言極樂世界城臺樓閣非爲自然，皆役神功所爲，不如上界應化宮殿不由神功，皆自然也。亦如香積童子自謂果極，不睹太虛大羅道境，便謂勝報極於慈土。我觀子心與此無異。真行當知，三萬六千種法由人機緣感動，修習業行，雖云成道，遲疾不等。亦如寶光童子在世之時從古先生而受滅度。八萬大劫勤苦修習，不能得道。最後之身而遇，言龍初會，天道大廣，始入道位，猶在七地下品之上。向不遇元皇之真，何由可得昇入無形者乎？於是真行靈子及諸大眾聞天尊所說，心開意解，叩頭作禮，各還本座。國王、王子、臣民男女聞說因緣本起之事，皆悉慶幸，各各奉賚明月寶珠，上獻天尊。天尊受以，



安著城內。王及大衆歡喜踴躍，作禮而去。爾時天尊與諸大聖各攝神力，升入無形，忽然不見。

#### 慈悲戒序品第四

爾時玉清天中瓊闕金真後聖天尊昔生多喜世界姬氏之家，年始六歲而知玄文，深達妙理，洞曉幽微，乃棄家求道，入長明山中，精思十年，上感西靈虛無天尊而受道要。年二十七歲而得六通。成道以來，數過塵劫，常以願力而度衆生，周遊十方，如日旋照，隨類現形，同其音聲，方便引接，皆爲饒益，平等無二，齊一子念。以元化八歲在庚子七月十五日，與諸聖衆三萬六千人俱下遊玄天，到北極長冥世界虛空之中，俱坐霞光之上，眇看六合。經百小劫，身心不動，猶如寶山。是諸聖衆亦以百劫身心不動。是時世界忽然光明，猶如春日，和氣通暢，風雨調適，雲霞鬢鬣，雷音清徹，藥草滋茂，百穀冬生，地出甘泉，微妙香美，龍麟踴

躍，鸞鳳騰舞，異類集聚，皆相親附。人民、非人，身心變善，悉如宿化、教學所成。

於是天尊及諸聖衆端虛寂靜，都無言說，但以慈力，天地萬物悉皆自化，亦無光音而可視聽，幽明玄會，殊神合契，無爲之道使之然也。吾亦不知其所然。道雖不言，德化流布，真氣感激，妙理精應，不由運動，其土人民亦無覺知，心無別慧，各安其居，人人守分，終其年命而已。爾時三月十五日，雪山之中有一童子名曰法喜，自號仙人，與其眷屬千二百五十人，俱其名曰金髻童子、金粟童子、寶頂童子、調御童子、十住童子、海惠童子、七覺童子、通王童子、自在童子、善財童子，如是十一童子，而爲大衆唱導之首，悉皆各各自號仙人，俱乘白象而來下土，圍繞讚歎，遙禮天尊，燒香散花，種種供養，各陳本願，問訊天尊而作是言：我等諸人幸承宿慶，昔因皇初劫中遇古先生哀愍化度，得入道位，賜以惠眼，遙見天尊下此世界，欣喜慶幸，故來起

居，欲有諮請。唯願天尊憐愍開示。於是天尊以知其意，默然不答。是時仙人三請不已，各各伏地良久，俛仰叩頭，而作是言：唯願天尊垂慈悲力，憐愍訓誨，示所未聞。於是天尊愍其勤，即命右侍真童名曰寶相，而告之言：汝等諸人欲求何願而來至此？於是法喜與諸大衆重復頂禮，而作是言：我見天尊及諸聖衆威德嚴凝，未曾有也。令此世界福德成就，都無言說，萬物自化，改易天地，流變氣候，日月明朗，星辰合度，風雨施散，百穀成熟，藥草榮茂，甘泉流溢，百獸騰舞，異類親睦，人民豐樂，未曾有也。不審天尊修何功德，造化萬物而得自在秘要之道？願垂誨示。及重伏地，良久不起。

於是寶相還向天尊具陳其意。爾時天尊告諸人言：無上大道但以慈力生化萬物，覆護衆生，無有言說。若有言說，即生形迹。形迹之教雖會至道，未極妙理。何以故？不可以形迹、語言造化天地、生成萬物。何以故？形

迹、語言理不恒故。理若不恒，云何造化？是故大道法無形迹語言，令物自化。善男子，汝所謂我有所修習而得化者。汝今修習，亦應得化。善男子，汝作此見，未離煩惱，猶處纏縛。無上大道久離此見，心無結縛，無爲無作，無起無滅，無形無相，言語道斷。汝所見我有威神功德，嚴凝形相，造化天地，生成萬物，是汝邪見，妄想分別。無上大道以離邪見、分別妄想之見。善男子，汝等所言遇古先生，身得化度。古先生者，是我弟子。令其教化邊地，說三乘滅度、衆生修後世果。以彼土難化，人無和氣，雜畜之種心性不具，飲血茹毛，強梁自任，故作神變，廣說譬喻，開悟下根。如此之法，不盡至理，權示形迹。先生去後，攝迹歸本，形迹漸滅。縱有存在，亦多紕繆。或自號仙人，或自稱梵天，或默坐空室，或燒身自滅，或墮落高巖，或供養水火；或作天人形像，三面千手，種種神像，屠殺祭祀，羣聚行道，叫呼求滅；或諦觀光相。如此之法，名曰訛謬。

雖有經文，無有實法，邪正混雜，不能得道。於是法喜及諸大衆聞天尊所說，心中開悟，始知先所修習未至道要，重復頂禮，上白天尊而作是言：如我國中之所修習，具如天尊大慈高鑒，無有異也。唯恐我等大衆罪垢深重，不可濟拔。唯願天尊賜我法水，以漸澄汰，洗除滓穢，開方便門，示方便力，賜我入道，初聞威儀齋戒之法，以漸修習，繩準身心，令有依止。天尊告曰：汝彼國土地氣陰惡，所生人民亦復如是。何以故？此名金方雜類衆生，生此邊地，不聞正法，唯聞三乘譬喻之說，不知大道祕密之藏，天書雲篆，龍章鳳彩，頓教成真、生身入妙之法。於是法喜合衆聞天尊所說，恐其身命不合道真，大衆悲泣，叩頭流血，重白天尊而作是言：彼土衆生腥臊臭處，豈圖即身而得升度，與道結緣，冀得身來生中國有道之邦。唯願天尊大慈之心，賜我等衆齋戒威儀之法。天尊於是以大悲力，不違其心而告之言：汝彼土人性有多種，應多受戒，約縛身心，不

如棄賢世界人心淳朴，縱欲受戒，不過五種：第一五戒，第二十戒，第三一百九十九戒，第四觀身三百大戒。此名四科。又有三萬六千威儀之戒，受此諸戒以應三萬六千威神。又攝三萬六千種道，內有三萬六千生神，外有三萬六千戒神。內外防護。受戒之身，上品成真，中品成仙，下品延壽。此戒是玉匱金科上真禁戒，受竟輕犯，身謝冥官，九祖受考。吾今爲汝略說一科，就一科中分爲三品，上中下品。一品之中又分爲三品，合有九品，以成陽數。此九品科法，齋戒相須，不但單行專授。汝等凡有齋講設會之處，及國王、王子、大臣、官長、學人男女集齋之日，應差一人音聲清亮者，正其威儀，北向讀之一過，以示大衆。大衆人民作禮伏地而聽戒言。

又復正齋初夜，又讀一過，以示大衆。此論一日之齋，法應如此。若二日、三日、七日，當應日日讀之一過。若初入道之人，先授其戒，千日之後漸進餘法。若有善人行先無犯、未度，三

日之內，即授其戒，不須千日而後授法。若授戒之後，身犯十惡五逆之罪，法師應須燒香，對三寶御前，悔奪戒法。若未受戒，及受戒之後身犯輕罪，非十惡之條，苦求悔過，進請受，法師與弟子對齋，日六時禮悔，誓不更犯，然後斟酌量授其法。子當慎之，子當慎之，勿犯吾戒，身得逆罪，諸天不祐。於是法喜與諸大眾各各伏地，注筆而聽天尊爲說戒言。

### 說戒科品第五

第一不得殺，媼殺、戲殺、賭殺、斂殺、誘殺，不得嗜肉愈病，藥分俱斷。第二不得叛逆父母、君主，亂敗家國。第三不得劫盜、怨盜、謗盜，死罪，謗口謗、書謗、狀謗。第四不得裸露三光，訶天罵地。第五不得姦媼骨肉，因生刑害。第六不得毀敗善道，離人骨肉，滅人種親。第七不得耽酒，毒酒、媒酒、色酒。第八不得陰惡，損敗他人，身作、口作、書作。第九不得侵尅

良善，割奪孤貧。第十不得盜劫死尸，散人骸柩。第十一不得戰鬪之所剥脫死屍，割取頭髮。第十二不得侵欺老病，脫其所有，心無慈悲。第十三不得毀破巢穴，傷胎殺穀。第十四不得販賣生命，以贍己利。第十五不得故觀兵戰鬪，及故合兵鬪戰。

右十惡五逆。科犯者，見身受報種種苦惱，身死之後，與九祖同考，萬劫不原。

道言：朝禮之法，不得高處朝禮低處；不得對御涕唾；不得對御高視；不得對御邪視；不得對御高言；不得對御邪語；不得對御中絕語；不得對御餘語；不得對御動五體語；不得對御摸頭語；不得對御戲色語。道言：入齋戒道場之法，先當慈悲。第一不陰惡，第二不思色，第三不思媼，第四不思殺，第五不思肉，第六不思勝，第七不思欺，然後沐浴五香，盪除塵累，整其威儀而詣道場。道場之外，置立香湯，

浴室二所，男女各別。又當立二屏處，屏處燒香，立衣架如法。一人屏處，應脫淨服挂架。一出屏處，入浴室，盪身手巾、豆末，事事具足。又不得煮殺蟲蛆，以絹濾水過，作湯及羹飲。又不得燒蛀薪以營齋獻。又不令乳產穢污、惡瘡膿血、淫人、十惡五逆之人臨齋厨所。如法安施竟，師著淨服，取淨鑪炭火以燒香。朝拜訖，依位而坐，儼默端直，身心思行上戒，一慈、二悲、三善、四信。善男女等，汝今當知我用此四法，故得成道。此四者是一切善道之門戶，是一切善道之本基，是大道之機要。離此四事，自外無道。故我有此四階善道保鎮天地，生成萬物，調和氣序，綜統幽明，禳災滅禍，濟拔窮厄。汝若離此四種，不得入道場，不得受國王、王子、羣臣，兆民供養之具，不得受國王、王子、一切男女恭敬禮拜，不得與自身及一切人請福求願。我詔此人爲道法中賊，不合共住，人鬼所嫉，諸天不救。

善男子，入道場中復有三法：第

一思孝，第二思忍，第三思辱。善男子，入道場中復有七法：第一見一切男女，生父母想。第二見法師善人，生諸天想。第三見經法靈文，生難值想。第四聞說法音聲，生難遭想。第五見諸疾病、貧窮、孤陋之人，生己身想。第六見衰憊老人，生無常想。第七見一切有生之類，生平等想。善男子，汝今當知入道場中及出道場中，不捨大悲，心不分別。不分別故，諸惡不生。若見覺聞知行立坐卧，離此戒者而得安樂，無有是處。善男子，汝欲求道、見身升度者，離此戒而得道者，無有是處。善男子，汝欲無疾及救拔生死，離此戒者，得如心願，無有是處。善男子，汝若違戒，而為邪所嫉，王法所加，身命夭逝，諸天不救。

道言：入道場中不得茹葷，不得穢污，不得多語，不得邪視，不得鬧衆，不得傾聽，不得涕唾，不得輕衣，不得垢衣，不得鼾睡，不得邪坐，不得背坐，不得仰視，不得大笑、大語；不得吒食，不得藏食，不得挾食，不得語食，不

得笑食，不得顧食，不得仰食，不得漱食，不得鳴器食，不得拈食，不得嫌食，不得數食，不得非時食，應正時食，慈悲食；不得急行，不得拖脚鳴行，不得曳踵行，不得動頭動手行，不得顧盼行，不得仰視行，應平正行。

若學道人受他惠施，慈悲為受，不得數謝、數辭、數顧，應受已，如法供養，如法施行。

諸學道男女不得數入國王、王子、大臣、官長、俗人之舍。若為因緣故須應入時，正其威儀，在門外立，正事陳說，不入其家，不坐其床。若諸學人起居父母、伯叔、姑姨、兄弟之時，應加恭敬，而況諸餘。

若諸學人無大故，不得入軍營塵肆。

若學道男女官不得入屠舍、娼舍、樂舍、十惡五逆敗壞人舍。

若學道男女官不得與非類同舍同床坐，同床食，服飾不得共用。

若學道男女官不得畜多欲侍者及畜穢文書矣。

若學道男女官不得與俗人爭利，有利應讓俗人及無知小弱。

若學道男女官不得畜兵器、樂器，不得燒薰皮毛角骨薰臭等物。

若學道男女官不得穢污生草蟲蟻之上。

若學道人男女官不得向北大小便，不得仰視便利，不得污山泉淨地，不得入雜處居卑、當風下濕、心無慎護。

若學道男女官及道民應當莊嚴道場，治堂靜廬慎密防護，灑掃內外，恒令清潔，不得早眠晏起，朝禮失時，大小無法，不相尊重；不得無故開靜戶；不得敞露經法；不得入俗歸不盥沐；不得道場中舍女人骨肉之親，無大故，不合諸道民；不得借貸常住法物以為他用。諸道場中常住法物、香油、燈燭、財寶，應有定用，不得迴易餘用。諸護淨居域之內，不得令進諸雜畜污穢；不得販奴婢、六畜，取物營靜舍；不得用十惡五逆財營靜舍；不得於敗地立靜舍。違此戒者，身受考病，

所學不成，犯物不還，三代被考。慎之！

道言：諸善男女應當內外持法，爲法城塹；不得侵毀精舍；不得抽剔藩籬；不得盜伐果林；不得盜師果子；不得割師田地；不得費耗師穀帛；不得壞師法具；不得假借師物，久沒不還；不得私費法財；不得私換法財；不得私使法師畜僕；不得羣聚法場，講說非法；不得羣聚法場射賭；不得羣聚道場歛聚，食肉飲酒；不得將婦女舍法場中宿。

道言：若道民男女犯此科戒，護法善神地官考之，連及三代。慎之。

道言：若學道男女道民書寫寶經時，不得安不淨處，不得令不淨人見經，不得令不信人聞經，不得令敗壞人知經，不得令敗壞人見所寫之紙，不得不淨財買寫經紙。書寫之法，應別室安經，常當燒香於案上，一日之中一過，盥五香水盪洗手，大小便利，易衣出入，常當齋潔。寫經之人不得竊用祕言，宣泄唱令。犯此戒者，考病立

至，死受風刀之考，長不聞法。慎之！

道言：諸學道修身之人先當廣尋經文，勘校科格，求師決斷，慎護所受，莫自媒銜，邀求世利。同心結好，男子不過三人，女子不過四人，於密處精思，以期冥契，勿令他人知覺見聞毀譽者，應密往山林，避處人間。犯此戒者，善神不護，衆邪亂考。慎之！

道言：若諸善男子欲救疾病者，先當廣備道術，善知方藥分明，謹案齋醮科儀，持戒忍辱，不違物性。無憚苦辛，不辭曉夜，無論遠近，怨親平等；不視財色，不分別貴賤男女，不責意氣酬償。忽得酬償，應施行功德，不得專贍己利。不得艱難，心無欺詐，恒行大慈。如此救疾，功感諸天，療疾易差。若違科犯戒，假造謬妄，神人立考，死入地獄。慎之慎之！

道言：若善男女有心好道，或遇時迤否，不得遠遊名山，應於家持戒，修造精舍，作重牆複壁，使內外音響不得相聞。唯令潔淨護治，每令精密，亦無異於山林之中也。功滿行成，道來

曲室，身得道真。若違犯科戒，輕泄疏陋，薰臭混雜，敞露真文，徒勞積紀，我道未聞，身立傾敗，萬邪所殺，身不得道，魂魄受考。慎之！

道言：若學道之人，或身受師訓，叨佩靈文，遇運應時，法應助國。或身先列職，後遭師匠，身受至法，未遂清虛，助國治民，匡贊天下，應須內持戒行，慎密所受；不得敞露天文，輕犯科禁，心無慈孝，恣性威刑，貪婪財贍，剋削兆民，令天下萬民心中冤酷。如此之人，徒有匡贊之名，而無廉貞之德。如此之人被三種考罰：第一身中監神迴惑其心，令萬向傾敗；第二治國之神令其犯法受戮；第三地官考之，殃流七世。子當慎之。是諸仙人得受戒已，歡喜踴躍，深自慶幸，各起作禮，信受奉行。

太上大道玉清經卷之一

## 太上大道玉清經卷之二

### 慈悲方便品第六

爾時天尊與諸大聖在於上方空虛之中，以方便故，欲度衆生，以大慈力升入無形太虛大定。是諸仙人雖有通力，不能見，莫知所在，便謂天尊以歸上界。是諸仙人悲惋懊惱，不能自持，各見其身無復威德，猶如死屍；又見所乘之象變成臭肉。於是大衆心中迷悶，無復所知，進退無據，不知何計，各自自定，諦觀因緣，心識蒙朧，不能自曉，如入夢中，見諸事相無有定實。於是諸御仙人謂諸人言：我等福德輕鮮，道力微弱，未能究竟微妙至理，始入初心，道數未足，縱有通力，不能明了。但捨我等先所知見，唯當歸命虛無之中；或當感念，今令我等衆重見天尊。是諸仙人聞聽所說，心中小悟，各各專心存念，歸命太虛，叩頭禮願七日七夜，心不休息，須臾之頃，心中醒

悟，如睡得覺。仰視空中，忽見天尊與諸聖衆儼然不動，與本無異。是諸仙人叩頭禮拜，悔過自責，禮謝天尊而作是言：我等大衆積劫以來，修習小見，小聞，分別妄想，迷悶邪見，深淪結固，罪垢深重，自見己身猶如死屍，無有光明，所乘之象變成臭肉，髻中寶珠化成瓦礫。無常變異，迷悶恍惚，如從夢中見諸色像，不能分別。我等大衆不知何計，心自念言，唯當捨我先所知見，歸命大道，憑向虛無，悔過自責，七日七夜，心中忽然平復，如夢得覺，歡喜無量。唯願天尊特見哀愍，令我等衆心中開悟。

於是仙人言語未了之間，天尊又入光明大定，通身光明，猶如皎日，無有障礙。令諸聖衆各乘羽蓋，坐飛龍之座，在天尊左眉一毫之端。又令諸仙人及十方國土、山陵、河海、城邑、人民俱在天尊右眉一毫之中，而不迫窄。各見天尊而在其前，而說妙法。是諸仙人作此見時，了了分明，心無障礙。又見靈山之中舊住之所近在日前，已

經六劫，不能得知天尊神力自在無礙。爾時天尊以一音聲普告衆生，隨其類音悟解。天尊告諸仙人言：汝等諸人睹此道力，心中何如？仙人答曰：我等大衆但知聞法慶幸，心無所覺。天尊又言：大道慈力，非真非假，非起非滅，非空非有，非彼非此，無去無來，所謂中道自在之力，大慈悲力，無障礙力。令諸仙人心中安隱，不覺不知，但以聞法，餘無所知。是諸仙人聞天尊所說，心始開悟，合衆彈指，歎未曾有。天尊又告仙人曰：汝等今當知大道威力不可較量，無有比說，於諸餘法，譬如螢火，並於日月，亦如掬水，比於大海。法喜當知，汝等師古先生入道初門，三乘之法，但有名字，無有定實，多說譬喻，說化下根，非是超絕生死，綿綿長存，見身受慶，骨肉俱飛，永爲真人之法，身如真金，無有變易，亦如金剛，不可毀壞。善男子，譬喻之法訓化邊地愚癡衆生，中上之人不應修習。千生萬生，流轉苦難，不能超出生死愛河。譬如良地而種稊稗，終不變成粳

梁五穀。譬喻之法，亦復如是，不能令人得成真道。善男子，我知汝心局於小法，迷邪失正，故攝汝身，令汝開悟。善男子，汝在雪山雖數百歲，不修大道，終不免死，必墜地獄；雖自號爲仙人，實無仙質。汝承宿慶，今得見我，重得開度，是汝因緣，法當受生。善男子，汝來此中，雖得六劫，我以道力，促此六劫以爲六日。又我觀六劫猶一瞬間。善男子，大道威力不可思議，窮劫說之，亦不能盡。於是法喜與諸仙人疑意不了，重白天尊：向蒙天尊垂慈悲力，開悟未聞，未曾有法，心中慶幸，莫所謝。我等蒙昧，局於見聞，便以爲極，不能廣知。無上大道深妙祕蹟，威神廣大，自在無礙，不可思議。我等塵累未祛，習氣深重，幸逢高會，遭遇良時，釋彼穢邪，仰陪霄駕。唯願哀憐，納受已死之命，便得再蘇塵穢之身，沐浴玄化。於是合衆叩頭流血，伏地良久不起。

天尊以大慈力故而告之言：汝以六劫之中聞我說法，今猶未悟，是汝垢

重。何以故？邊地衆生唯以肉飲血，生食羊馬，遇古先生淘汰滓穢，餘習未盡，使之然耳。爾時天尊又以大悲方便之力，忽令千二百五十白象合爲一象；又令千二百五十仙人合成一仙，坐此象上；又令十方國土合成一土，大如微塵，此中人民及諸大衆合成一人，在此塵中微毫之內。須臾之頃，毫間二人見一真人形長千尺，容貌奇特，將諸大聖八萬四千人俱引毫中。二人出於毫端，又從左眉毫端而入天尊先所。大衆三萬六千人又從右毫端二處內外，各無罣礙而不迫窄。九日九夜，心無疲厭，謂如食頃，不覺不知，與本無異。是時二人爲聞法故，身心悅豫。天尊又言：善男子，汝等昔日與道結緣，功微業淺，所得通力非是真實。山出美玉，南方有石，亦名爲玉。二名相亂，凡夫之人不能分別，不知何者是真玉也。汝號仙者，如彼石玉，非是真玉，有智之人了了分別。

善男子，如汝髻珠實是魚目，非真珠也。汝亦如是，非真仙也。善男子，

汝從今日以後，沐浴道化，除汝塵累，始名真正，始入法流。於是二人聞天尊所說，歎未曾有而作是言：今日有幸，得遇高尊授我真道，令我開悟，悅除煩惱，如蛇脫皮。爾時天尊以大慈力而告之言：汝諸來衆今何所在？於是二人不知何答，各自顧盼，唯見向者真人大聖各坐龍座，唯有一象。又見十方國土近在日前，心中小悟，知是天尊自在之力。天尊以知其意，即告之言：我以道力，愍念汝等罪苦衆生，方便引導，示汝神變，令心開悟。須臾之頃，平復如本。此諸大衆心中亦覺知去來之相，道言如此，自在神力皆是不可思議。非是五通、三乘、七覺、八門、三界之所辯了，事離心想，見聞知覺，非有非無，非起非滅，非因非果，不可言說，不可思議，離諸語言，絕諸視聽，唯一道力究竟，一切諸法皆悉通達，畢竟無復遺餘。善男子，汝等當知我雖作此變化，初中後心未曾覺爲變化一相，但以大慈一子之念普度衆生。善男子，我雖度衆生，初中後心亦無度衆

生之想。善男子，大道之力、大道之神、大道之化、大道之機、大道之微、大道之虛、大道之無名，不可思議，解脫不可思議，知見不可思議，方便不可思議，造化不可思議，生成不可思議，動用不可思議。善男子，汝等應生希有之心、慶幸之心、難遭之心，成就慙愧，不可思議。

爾時仙人歡喜讚歎而作是言：我等大眾蒙天慈流霈再造之澤，喜慶之心無以爲喻，如披重雲，得睹日月，猶如盲人得見色象，如籠中鳥而得鸞翥，如小水魚得遊江海，亦如枯骨而得成人，過泰之慶，巍巍難喻。

爾時天尊愍之勤勤，授千二百五十人真童之任，今知天下新學道人功過之錄，注記生死。是諸聖衆爲因緣故，二萬七千二百五十人俱放身光明，照耀十方無量世界，香花幢蓋，萬種天樂，大地震動。爾時天尊與諸聖衆各坐九色雲龍之座，浮空而去。於是長冥世界之中國王、王子、羣臣、兆民遙見天尊、聖衆昇東南方而去。須臾之頃，流霞四冥，莫知所在。國中男女方始警悟，相顧悲泣，悔過自責。其世界中有一國王，名曰真會，聰明辯慧，而告大眾，作如是言：汝且莫悲，聽我所言。我昔曾聞有虛無之真造化天地，生成萬物，神力自在，幽寥冥寂，行不言之化。我此世界祥瑞如此，必是虛無之真福我此土，使之然耳。我今大眾當報道恩，選覓園中最高勝地，豎立宮殿，香花供養。國內人民聞王所說，異口同音，皆悉稱善，各各解其身中無價寶珠以填此地，取諸香木而作宮殿，高廣嚴飾，百寶裝校，施諸牀座，花香燈燭，種種供養，傾世所有。爾時天尊遙知其意，即放左手掌心十彩真光照曜此宮，晨夕恒明，猶如白日，常有香周流世界，彼土人民時因夢中得見天尊，爲其說法，身心明了。夢覺之時，書記文言。一國人民校定勘會，文皆符同，無有異色，故寫此文爲自然道經。是時人民轉加精進，國中太平，人民豐樂，壽無中天。於是國人感此非常效驗，幽明符會，悉皆精進，雖無師

匠，自修其心，皆入仙位，漸契微妙，不可思議。爾時天尊三大願之力成就衆生，處化度，心無偏黨。與諸大眾下遊地戶極泉之境，入一小天之中，空虛而住。其天周圍六千七百五十四里。天高一百九十九里。其中化主名無量壽，有三大臣：第一臣名德王，第二臣名捨邪，第三臣名雲音，皆以正法化世，不枉人民。此中男女身長七寸，皆悉辯了，聰明智慧，慈順父母，奉事化主。此天之中，昔古往劫言龍初會。虛無天尊命造化真人、巨靈仙人下此天中，布散無邊，量立靜壇，刻玉簡文，以鎮此天。從以後國人修習道法。承此功德，時有託生中國，改姓易氏，號曰神童，聰明利智。或以一身、二身，不過三身，應遇天尊而得濟度，長生不死。爾時法喜與千二百五十真童疑意不了，從座而起，前進作禮，上白天尊而作是言：不審天尊言龍初會之時，今經幾劫？虛無天尊命大造真人布散元氣，化成萬物，微妙之理，以何法爲宗，頓得如此自在無礙？唯願天尊憐

宗，頓得如此自在無礙？唯願天尊憐



愍不達，誨以未聞未曾有法。於是天尊愍其慙，即告之言：善男子，此會之時甚自久遠，經百億大地微塵之數，不可計劫，唯道與道乃能知之。五通神人以此爲久。我今所見未過俯仰瞬息之間。汝欲知者，其義如此，元氣之道非汝所聞。

爾時法喜與諸大衆重複叩頭，上白天尊言：弟子出生穢土，習業不淳，蒙昧愚迷，布逢良匠，守偏方小，見局湫隘，心靈分謝重昏。何期披霧，日無私照，鏡朗幽冥。道不私恩，念流一子言龍初之會，以奉決疑元氣之宗。願垂開示，冀得咀嚼甘露，沾洽雕朽，降以靈符，反生枯骨。弟子合衆慶幸，過泰有餘，不期驂御霞森，聳身玄闕，沐浴恩化，心忘止足，知進成愆。願垂赦宥。出此語時，合衆悲泣，地爲震動，日無精光。上方空中有如龍吟。一切人民、蜎飛蠹動皆悉悲鳴，草木顛頓，金石失潤，香雲徘徊，凝結虛空。神風滂渤，和氣不暢。於是真童感動天地，異類悲鳴，一國男女助爲啓請，傍欲聞

法。爾時天尊愍其感動，放千光明，從口中出，照耀諸天，處處洞徹。天雨香花，萬種音聲空中自作；日月重輪，和風拂塵，仙花薦地，霄蓋羅天，神鐘寥朗，真儀四陳，龍麟騰曜，師子微吟，瓊鑪焚香，真童散煙，天地告瑞，異類同心。十方國土朗然而見，諸天大聖乘空而來，下界神人涌地而出，俱集此天。及諸天神、地祇、山海諸王、衆獸之王皆來會所而聽說法。

爾時天尊警歎彈指，而告之言：善男子，汝所問元氣之道，以何爲宗。汝今諦聽，吾爲汝說。善男子，汝今當知元氣之道，祖於虛無天尊，空生自然，綿綿長存，化生元氣，元氣生太極，太極生天地，天地生萬物。善男子，元氣之道其妙如此，故大道無名，元氣無形。以無名故，動用無極，流變萬化，有情無情稟道而生。人寶元氣，故能長存。元氣爲神，與氣合并，能入無形，與道合真。善男子，萬類不同，元氣一理。譬如大海，流澍無極，任人取用，隨其灌溉。有智之人深鑿溝渠，以

導其流，則澆灌無極。愚癡之人執持漏器，詣於河海，隨漏獲潤甚少。或有盲人都不見海，無所受潤。善男子，汝今當知水性不動，潤有深淺。元氣之道，亦復如是，不可思議。爾時一切大衆聞天尊所說，心開意解，皆悟無形微妙之理。是時天地山川，天神、地祇、蜎翹蠹動悉皆同聲合響，猶如雷震，而作讚曰：大道無生滅，元氣不終休。失之永朽爛，得者長遨遊。俯看六合內，漂沉生死流。仰盼霞中人，蕭然無有憂。是時空中作此讚已，須臾之頃，天上有五色流霞結於空中，去地百丈，自成雲篆八會天書，字方一丈，八角垂芒，光彩煥爛，洞朗虛空。大衆人民仰視天書，恭敬禮拜，悉皆同聲而作是言：此是天尊自然真氣應感真童元氣，變化而成此文。我等唯聞天書，目不曾睹，今日幸會，不期得見。不審天尊，我等塵穢，得寫天書、讀誦以不？天尊答言：此是大道威神之力應變所成。汝等欲得傳寫真文龍章鳳篆，供養禮拜，專心誦念之者，應先受戒鍊

行，離諸塵穢，然後書寫，受持讀誦，一如戒言。於是大眾聞天尊開示，歡喜踴躍，信受奉行，作禮而去。

### 言龍中劫方便度人品第七

爾時玉清天中金闕天尊與諸大聖微塵之眾具大慈悲，皆以六通應變自在，神力無礙，綿綿長存，無始無終，神契機微，精感密妙，常以一道化成億兆，隨類動用而得長生。

是時天尊以大慈力，常以法雷而警眾生，令其覺悟。常以大雲等覆眾生，令不孤露。常以法雨潤洽眾生，令無渴乏。常以慈風搖動眾生，令立信根。常以慧日而照眾生，令不昏冥。常以舟航廣作津濟，攝生理具，運載無窮，長養覆護，為作導師。慇懃教授，譬如父母，一念諸子，善以珍寶，隨其取用，心無吝惜。眾生不知，反更怨咎，失道敗德，興作仁義，隨業流亡，而不知返，迷沒邪逕，不行正道，各執異端，五內攻劫；隨逐惡黨，六賊外爭，

愛塵覆蔽，惱結增長。為一我故，造三種業。漸漸滋多，以至十惡。百福遠離，死入九幽，備受眾苦，從恩愛生，不能了達，甚可憐愍。不忍放捨，是故慇懃種種誨示，提携引接，令不邪僻。爾時天尊與諸大聖哀念眾生，猶如慈母顧愍其子，雖遊土方，必赴其念，尅應歸還，飲食覆護，乃至長成，猶不捨離；況于童稚，晨夕孚乳，隨其時節，感其願念而無差失。是時言龍中劫之後六百萬歲，四天之下，人民福盡，天地崩壞，災氣蔽天，日月不明，星辰失度，風雨不調，地震動，河海水減，金石焦枯，泉源乾竭，處處坼裂，山崩鬼哭，藥草不生，樹木凋落，百穀不實，黑風發屋，吹起沙石，相擊出火，遍燒山澤；有十萬惡鬼各將徒黨無數億萬馳走天下，口中出火，噓瞎人眼；飛鳥墮落，六畜自死；又有四大蟒蛇身長六百萬里，圍繞崑崙，張口四向，其蛇鱗中又出百億小蛇，四散迸走，毒氣猛烈，噬中人身，登即爛壞。如斯苦惱經六百年，眾生困苦。爾時天尊與諸大

聖眾數如微塵，以玄化元年，歲在辛卯七月十五日，日中之時，於玉清天中雲宮之內，俱放神光，照耀下界，四天之境，其光流變無數億萬，一一光中各有道境，無邊廣大；日月星宿、山川城邑、樓臺宮闕，非常華麗。一一城臺各邑有泉池周而圍繞，其池之中涌出金蓮寶花，微風吹花，出妙香氣，遍滿虛空。其花高大，出於玉清。一一花中各有龍座浮在花間。一一座上各有天真大聖演說妙法。泉池四邊周而寶樹，蘇牙琳碧，瓊枝玉條，偃蓋廕遍覆世界，七寶華葉夜光珠寶。常有微風吹動寶樹。其樹葉間出妙音，聲中演出空洞自然梵唱生神寶章反魂之篇，以和三氣，生化萬物。其空虚之上有凝光九色結成寶蓋，彌滿世界。其宮臺之下有七氣浮空，以承宮殿。其宮四邊玄虛之中皆自然音樂，寥亮清徹，非常和雅。臺中各有真人吟詠凝胚混化之章，生長萬物，消滅災害。爾時天尊大微塵之眾以十月十五日日中時，俱從玉清天中雲宮之內浮空而下，四天之

中、晨星之上。中斗寶車以捧神足，東斗扶左，西斗扶右，北斗爲傘，南斗爲杓；日侍其左，月侍其右。華蓋垂蔭，香雲四冥，神風調虛，甘露流津，天地復位，山嶽涌成，源河涇流，苦海變清，四氣和調，三景齊明，枯骸成仙，垂化得生，百穀豐熟，天下太平；邪魔喪精，真道流行，羣兇變善，人神守貞。蕩蕩大化，難得而名。爾時四天之下國王、王子、羣臣、妃后及諸宰官、萬兆男女，人及非人，各各仰視上方空玄之中，遙見天尊真儀煒燦，神彩澄朗，光明暉煥，尊顏彪炳，寶蓋彌天，長幡飄颻，虬鱸揚煙，神香反魂，萬籟齊唱，仙樂同音，咸乞衆生深識業緣。是時諸人睹此奇特，內懷慙媿，而欲禮謝，心疑道遠，恐不上達，私心願念，請高尊大聖霄駕下臨穢土。各住其居，迴心上方，叩頭禮願，流血灑地。九日九夜，燒香散花，願念不絕。人皆疲困，精神恍惚，如夢中事，雖極不怠。天尊感其意故，即於上方分身百億，俱坐雲龍之座，各見其前隨其類音而爲說法，

皆令留悟，四天之下，如一不異。時有四天人王須臾萬頃，又復各各皆聞天尊在其心中而說妙少，身心欣悅，快樂安隱。雖自忻幸，未能了達，各各作禮，請問天尊心中法音因緣本起，而作是言：我等諸人過泰之慶，得見天尊降臨下土，賜我妙法。荷負慈尊恩造之澤，深自慙媿，不知所謝。又聞心中而出法音，身意泰然，欣樂安隱。不審此事是何因緣？爾時天尊答人王曰：善哉善哉，善男子，汝等當知無上大道威神之力不可思議，無所不在，何獨心中而有法音，乃至支節、毛孔之內及以天上地下一塵一介皆有道氣。善男子，汝等人王應深慙媿，心中法意，恒自觀察，除汝邪見，除汝異念，除汝躁求，除汝貪愛。以道沐浴，滌盥塵累，常行大悲，恭敬供養無上大道，持戒布施，忍辱精進，煩惱垢盡，道性妙光顯見人中。是時四天之下一切諸王及其人民同時各見天尊慙媿教誨。良久，攝念身心不動。須臾之頃，各見大悲天尊與諸聖衆同時建心幢蓋，無數億

萬，從其心中、支節、毛孔、皮膚之間安庠而出。幢蓋高廣，彌滿世界。爾時大悲天尊以此幢蓋，引諸衆生往四天之中崑崙山上，止虛空中，去地萬仞，入一微毫之內，與諸大衆儼然而坐，九日九夜，神光朗徹，照曜虛空，大震雷音而說妙法。其音遠聞，遍於十方，靡不周遍。普告衆生而作頌曰：大道常慈悲，愍念諸衆生。至法普開化，能行與未行。我本無心相，推運立形名。今當恣汝問，應念即教令。權實無二慧，玄寂一真精。元氣廣流布，無情及有情。爾時大悲慈尊說此語已，與諸大衆默然而坐。爾時東方始青天中諸天子等，無意天子而爲導首，與其眷屬九億大地微塵之衆，爲聽法故，齎青天之寶，供養之具，燒香散花，作諸天妓樂，乘天宮殿，建持青節、青幢、青幡、青蓋、青霞之坐，坐高極頂，蓋覆無邊，浮空而至。乘道威神，入微毫內，圍繞讚歎，禮拜問訊，陳列天儀供養之具，却坐東面儼然不動。

爾時次有南方丹天之中諸天子

等，焰光天子而爲導首，與其眷屬八億大地微塵之衆，爲聽法故，賚丹天之寶、供養之具，燒香散花，作天妓樂，乘天宮殿，建持丹節、丹幡、丹蓋、丹霞之座，浮空而至。以道神力入微毫內，圍繞天尊歌頌讚歎，作禮問訊，陳列威儀供養之具，却止南方儼然而坐。爾時復有西方皓天之中諸天子等，素真天子而爲導首，與其眷屬六億大地微塵之衆，爲聽法故，齋皓天之寶、供養之具，燒香散花，作天妓樂，乘天宮殿，建持素節、素幢、素幡、素蓋、素霞之座，浮空而至。乘道慈力，入微毫內，圍繞天尊歌頌讚歎，作禮問訊，陳列威儀、供養之具，却止西方，儼然而坐。爾時復有北方玄天之中諸天子等，冥慧天子而爲導首，與其眷屬五億大地微塵之衆，爲聽法故，齋玄天之寶、供養之具，燒香散花，作天妓樂，乘天宮殿，建持玄節、玄幢、玄幡、玄蓋、玄霞之座，浮空而至。乘道慈力，入微毫內，圍繞天尊，歌頌讚歎，作禮問訊，陳列威儀、供養之具，却坐北方，儼然不動。爾時

復有八海大神、龍王水帝爲聽法故，乘大波濤，汹涌滔天，以道神力，浮空而至，居毫四方，猶如大雲。次有五帝、地祇與其眷屬五萬億大地微塵世界，其中各有山陵、河海、國土、人民，一一世界具足諸有，乘道威神，爲聽法故，具來會所，在微毫外，與八海神王重立虛空，湛然而止。爾時中天大聖元皇道君虛無天尊爲影響法故<sup>①</sup>，與十方大聖無數億萬來會空中黃雲之上，去此微毫五百餘仞，二會之所陳列以畢，於是中央道君即呼神風激籟，演出空洞契，九十九日吟詠始畢。

爾時玉清大悲天尊於微毫之中，即命太微中仙九億萬衆揮反魂拂魔之章六萬四千八百四十二契陰生之曲，調理羣數八十八日，衆音乃畢。爾時天尊成就二事，委曲畢已，與諸聖衆默然而坐。是時八海大神與五帝地祇忽懷疑惑<sup>②</sup>，生不信心。天尊知其疑惑，即以慈力令此地水互翻互覆，七反上下。復令此大地震動坼裂，碎成微塵，

倏忽之間，還令合聚如一芥子<sup>③</sup>。又令八海波濤四散，忽然乾竭，其水帝、魚龍皆悉露形，須臾之頃，令此八海成一滴水，大如鍼鋒，吹着空中。倏欵之間，復令平復。時地祇與八海大神睹此威力變化自在，悉皆自失，雖乘道力，未能辯了諸法性相。何以故？地水體陰，神心不聰，是故不達。久久之間，神心小悟，即於毫外北方禮悔自責，五體投地，猶如山崩，通身血見，悲泣良久。於是地祇自天尊前而作是言<sup>④</sup>：臣以冥生竊靄，職當持地，濫知九土，未嘗遲怠，乘道正氣，生育萬物，助善興化，不敢有勞，爲諸塵故，不能達道。惟願天尊大慈憐愍。言畢悲泣，不能自持。次及八海大神、龍王眷屬、水族之類，其數無量。驪珠龍王性最聰敏，爲諸水神唱導之首，凌波而出，上白天尊而作是言：臣以多幸，職掌水府，濟度舟航，下潤一切<sup>⑤</sup>，助道興化，蕩垢滌塵。雖有微勞<sup>⑥</sup>，心無恃賴，日夜沉溺，漂沒波濤，羸身巨大，無由輕舉，與諸濁氣相繼。然以見聞狹劣，

未造玄微。翹仰至尊，積有年歲。今乘道神力，爲欲聞法而來會此，微毫之外，而不得入。心自孤疑，不能決定。惟願天尊大慈悲力，賜見接引，令得入微。言畢自責，瀆薄溢潰，波浪滔天，悲嗟沸涌，黯然而出哭聲，哀歎悲切，流慟苦毒。須臾之頃，一切河海悉皆血沸，五帝地祖震動大地，同其悲苦，金石流淚，草木擁霧，源泉逆流，大地出聲，殷殷如雷。地中衆生心意戰慄<sup>⑦</sup>，目不能瞬，飛鳥墮落，走獸自撲。五帝地祇兩眼流血，遍灑大地。地及河海一時變赤，猶如丹霞，足經八月而色始變。

爾時復有諸大神王，天神、地神、電神、雷神、風神爲聽法故，飄動風雷，霹靂剛堅，驚作深蟄，傾拔諸根，吹去埃塵，來會四方，空中而止。爾時復有地中雜類諸王，大山之王、香樹之王、神藥草王、魚王、龜王、鳥王、馬王、牛王、師子之王、風獸之王、猛獸之王、天麟、天禽、天馬、天鹿，如是諸王皆隨大地來至會所，耳雖聞法，口不能宣，見

諸神精悲號苦惱，皆悉哀鳴，眼中流血，各各伏地而不能起。爾時天尊愍諸神精沉滯穢濁，不聞正道，悲苦如此，即以雷音而告之言：善哉善哉，汝等今當知此會之所、本起因緣之事，以言龍中劫之後六百萬歲，天地福盡，災害興作，我不忍見，與諸大聖臨四天下，保鎮劫數，更生萬物<sup>⑧</sup>，應運度人，故來會此。我以自在神力，令汝等來。汝今當知此會大衆皆是十方天地無量道境來入毫中，尚不迫窄，而汝等衆唯乘五萬億大地微塵世界、八大海水，何足爲多？疑此毫中不能納受，是汝神精濁惡邪見，志度<sup>⑨</sup>狹劣，未能深信無上大道威神之力。汝欲來入此毫中者，應除雜想、煩惱、恩愛、貪嗔癡等顛倒邪見、種種疑惑、塵勞覆障，斷諸結習，乃能入微妙之會。若必存見聞，分別善惡，怨親憎愛，繼有縛着，永不得入微妙會中。爾時天尊以方便力，爲降伏神精而告之言：汝等衆精罪業深厚，濁惡垢滯，未得入此微妙會中。汝應思共遠塵離垢，當來見我。天尊說

此語已，即從毫東雲門之中出見，左手團此大地，和以海水，如一芥子，擲向上方空虛之中，經八萬大劫，湛然不動。爾時天尊在此毫中爲諸大衆說微妙法，經八萬劫說訖已，乃於上方虛空之中接取芥子，安着毫端，還令人地大海平復如本。地祇、水帝、人王、兆庶、一切衆生都不覺知。爾時天尊知此諸神心中未悟，即見大身滿虛空中，從毫左邊安庠而出，以一鍼鋒，乘此人地及以大海引入毫中，安着北方玄虛之中。譬如大空有一微塵，都無妨礙。是時八海龍神與諸地祇入毫中，圍繞天尊，窮劫不弔。又以飛行，亦不能弔。方始覺悟，歎未曾有。其大地之中，國王、臣民、異類之屬從地入者不覺不知，無去來相。此毫之中有無邊道境，天天相次；一一道境備諸所有天地日月、山川河海、國土人民無數億萬，總有三萬六千人天種性。時有中根之人一萬二千種，中有一長者名曰慧命，與諸大衆睹此神力，心意不了，互相携獎，來至會所，恭敬作禮，上白天尊：

不審天尊初從天中下降之時，宮闕城臺、高妙樓閣及蓮花之中，天尊大聖并初聞道之人，其身心之中各有天尊演說妙法，及慈悲天尊從其心中安庠而出，寶樹周而自然天樂，及此微毫之中，國土城邑、幡幢寶蓋，座座高妙，種種變化，奇特如此。不審是事爲有常邪，爲無常邪？

天尊答曰：善哉善哉，善男子，汝當諦聽，吾爲汝說。我從天中下降凡夫，應變七種微妙之事。汝今當知無上大道常以七覺聖道而下化世，以應自然微妙七氣，以成七變之法，以世有限，故大道應之以名數，所言名數，皆應自然微妙之法。善男子，汝所問此妙致，爲有常邪，爲無常邪。善男子，汝等當知，大道之法無生無滅，云何問常之與非常？善男子，大道神力無種不爲，無所不在，無所不適，無所不應。真化無窮，凝神深根，俯悼羣品，應化官殿，小小因緣，不足疑問。欲有即有，欲無即無，欲常即常，欲斷即斷。以道神力，無所滯礙。又問蓮花中天

尊是我真氣，流布廣大，還是我身，非爲他聖。又問初聞道之人，身心之中出妙法音，此是人王第一聞道，深信淳熟，不受諸有。即此之身而爲法身，百骸九竅俱受道氣，此人之身與道不異。會中諸人亦復如是，是故大道慈悲，見其身中。善男子，汝又疑此微妙會中種種奇特。汝今當知，而我大道以此毫中爲一道境，以一道境爲無量道境，道境亦常。何以故？凡夫之人謂之無常，常道大聖故名之爲常。何以故？凡夫者壽命不定，以不定故，即謂大道爲非常道。常道大聖長存綿綿，明了常道。善男子，汝今當知，若爲凡夫說常道者，心即狐疑，顛倒邪見，增長不善。是故大道隋緣逗機。何以故？下界凡夫多有不同，心性各異。上品聞道，專心修行，身得真仙，永不退轉，爲冥說常。中品聞道，未能淳信，心有上下，或爲說常，或說無常。下品聞道，誹謗橫起，爲說無常，示見亦爾。微妙衆中，天真大聖名之爲常，所說之法或常、無常。何以故？天真大聖爲此會

中諸魔鬼神及雜類衆生所說之法，名爲無常。善男子，微毫亦爾。凡夫之人不見常道，不達妙理，不能得至微妙真際。雖乘道力，暫入精進，恐後退墜，名之無常。天尊大聖心無結縛，出虛入無，常不滯礙，名之爲常。善男子，妙道威力不可思議，以不可思議故，能令十方天地一切所有盡入毫中，無有迫窄。善男子，無上道力若可思議者，則天地萬物不能得入微妙會也。善男子，汝等當知我諸聖衆能入會者，皆是住不可思議、解脫知見。何以故？入此會者，亦非身入，亦非心入，亦非身作，亦非心作，亦非理入，直以大道慈悲忍辱之力而能得入微毫之會。爾時慧命長者與其眷屬一萬二千人微塵之衆聞天尊所說，心開意解，重復禮謝天尊而作頌曰：

稽首冥慧虛無尊，稽首歸命重玄主。  
裁成天地無得稱，悉爲衆生作恃怙。  
慈濟五道轉輪魂，哀救三塗地獄苦。  
歸命金闕天中尊，歸命六度慈悲父。  
歸命玉清無上真，以離生死長綿綿。

出有入虛無所待，能令枯朽變成仙。千劫萬劫難一遇，爲衆廣說業因緣。迴骸起死永長存，使我形神無變遷。

爾時慧命長者說此頌已，舉體投地，禮謝天尊而作是言：不審天尊成道以來，于今幾劫？修何功德？巍巍如此，修何業緣而得不死？以何功德濟地獄苦？

天尊答言：我成道以來，如十方天地微塵之數，不可計劫。譬如虛空，不可度量。善男子，我修大慈大悲，願度衆生，常以忍辱柔弱，不失中和，故能不死，常以六度而濟地獄。善男子，我雖成道，猶故不離慈悲忍辱，而況凡夫。於是慧命長者與其眷屬一萬二千人俱聞天尊所說，慶快歡喜，重復叩頭，稽首天尊而作是言：我等宿福深厚，生逢道化，面睹慈尊，耳聞法音，心先暗昧，領受祕要，多所忘失；雖以愚蒙而心好道德，恐身朽邁，不得久留，常慮一旦奄同螻蟻，身謝長冥，無由見道，一失命根，萬劫流轉。幸逢高聖，願得濟度，乞受長生久視之道。唯願

慈尊賜垂生活。說此語已，五體投地，自叩悲泣，遍體流血。天尊默然而不許可。於是一萬二千種人微塵之衆悶絕擗地。爾時天尊愍之勤勤，自起引接，良久乃蘇。天尊告曰：子等諸人往劫以曾供養虛無真仙、道德衆尊，慶流今身，名着左契。又復我等法衆劫劫下化，是因緣與我相遇。子當勤心，屏除雜累，退齋思失。三月後來，我當授子真道長生之要。諸人聞說，歡喜踴躍，禮謝天尊，各還其家，洗除塵累，內外清潔。三月訖已，各齎香花、供養之具，來詣會所。是時會中微塵世界所有國王、王子、臣民、男女不可計數，聞慧命長者欲請道要，皆各同聲，上白天尊而作頌曰：

冥契本無偏，隨機應業緣。願得長生道，散着我心田。六度清源水，流澍無涯邊。

是時大衆說此頌已，一時伏地，同請受度。爾時五帝大魔見此諸人伏地請法，各奏弦歌鼓樂，良久乃止。於是青帝大魔而作頌曰：

修道須積功，入試由天魔。莫令身缺犯，勞我空中歌。倏歛收汝形，誰能奈我何？先當遣所欲，盥漱名山阿。勿作塵中人，遑遑逐世波。

赤帝魔王頌曰：  
炎宮映丹青，朗朗光氣浮。邪風鼓濁塵，氛氛長不休。我界難可度，臨去及淹留。功過自分明，非魔強欲求。

白帝魔王頌曰：  
銀宮出太虛，圓羅燭夜暉。萬遍演靈章，遊魂逐氣歸。背道入冥墟，苦霧長霏霏。恩愛喪精神，沉骸絕望飛。我界不肯度，令魔空裏哀。

黑帝魔王頌曰：  
玄滋秀瓊根，玉液練真儀。落景迴扶桑，形神長不衰。何事叛道德，朽爛常懷悲。六天誰欲保，臨安反更危。

黃帝魔王頌曰：  
雲宮窈窕出丹青，浮空飛蓋上初朝。密契靈源騰六氣，虛中真宰自相招。鬱鬱天衢秀紫霧，詵詵玄路上霞森。孰知我界沉淪苦，何事躊躇不肯超。世自依依入長夜，非關魔衆強相邀。

是時五帝大魔唱此歌已，各放身香，以薰衆人；又奏邪音五百餘種，以惑衆心；又建邪幢以亂衆目；或作美女，種種相邀；或作異相，非世所識；或出身光，照耀百里；或出惡聲，聞者

毛豎；或頭上出火，或足履虛空；或

入地中，或變形老少，善作幻惑，氣息

衝人；或以身觸人，或化作人形，或作

人親識故舊，種種諂媚；或入人身中，

令人得定，眼能洞觀，心知一世生死業

緣。威儀殊特，善說法要，惑亂人心。

於是此會大衆以道神力，專志不散，魔

不能敗。須臾之頃，五帝大魔與其眷

屬攝其威神，却北面立，侍從天尊，爲

聽法故，儼然不動。爾時東方始青天

中諸天子等爲聞法故，歡喜踴躍，以道

神力并助贊成後學之人<sup>①</sup>，令其堅固。

而作歌讚，以暢其心，令得真道，而作

歌曰<sup>②</sup>：

扶桑啓初暉，鬱鬱吐青牙。神氣浮圓羅，靈禽曜紫霞。自得長生道，冥寂至真家。

次復南方丹天之中諸天子等而作

歌曰：

炎氣浮丹天，真光秀神符。飛霞煥八瓊，靈液化霜珠。九光暉寶器，流彩曜玄都。塵劫如瞬頃，形魂終不枯。昇身入太微，九祖出長塗。

次復西方皓天之中諸天子等而作

歌曰：

玄真駐頽景，落照反初暉。靈液灑金津，欸被流霞衣。蕩蕩歸上帝，秀秀登紫微。控駕神光遊，合體長仙飛。

次復北方玄天之中諸天子等而作

歌曰：

旋綱蹈神足，魂魄輔真精。右扶白元尊，左衛常無英。玄液吐靈津，芒霞逐月生。令汝調年子，不衰亦不傾。

爾時諸天子等爲聞法故，饒益衆

生，方便助道，開發大化，度脫有生，證成道果，演說歌讚，自然之音，以授後學成真道者。尋誦思惟，密求真契而不妄泄，必得成道而不疑惑。說此讚已，各還本座。爾時上方中央大聖元皇道君虛無天尊與諸聖衆爲影響法

故，證成大信，護念受生之人，令其真正，攝除亂意，身入道流，永離生死，故來上方空中而住，與微妙會中玉清天尊同神合契，應化下土，正定天元，劫劫示見，非獨今日。

爾時虛無天尊爲度人故，與十方

大聖微塵之衆，一一聖衆各乘天宮殿，從上方空中而下微妙會中，在大悲天尊左邊，同一座坐，其座高廣，上極有頂，彌滿十方，以慈悲力，令此微毫本相不動，毫中大衆亦不迫窄，如本無異。爾時二尊身相光明，有踰初日，是諸聖衆亦復如是。爲欲度衆生故，見大慈悲方便之力，令諸聖衆足下出光，千變萬化，漸漸通身貌體洞徹，猶如水晶，攝諸天地、日月星辰、山川河海、國土人民、一切衆有，盡昇大悲天尊左足之趺、一毫之端。須臾之頃，又升虛無天尊右足之趺一毫之端。須臾之頃，又升空中，去地九億萬里，正對虛無天尊金吻之邊。是時天尊以微噓香氣，是諸天地碎成微塵，遍滿虛空。又令合聚，平復如故。須臾之頃，又令諸天



大地人民昇虛空中，正對大悲天尊之前。天尊以道神力吹此天地，令日月星辰、山川河海、城邑人民、鳥獸合成一體，大如芥子，圓明皎徹，堅入金剛。須臾之頃，還令昇入虛無天尊左手之中、掌文之內，變成光氣。光氣之中有四種氣色，所謂清、濁、白、黑，於天尊掌文之中漸漸分別長大，清氣爲天，濁氣爲地，白氣成日，黑氣成月。日爲陽精，月成陰精，化成男女，萬物因此化生。

爾時衆中諸天子等睹此神變，歎未曾有。於是東方始青天中無意天子爲衆生故，從座而起，前進作禮，上白天尊而作是言：不審天尊以何因緣作此神變？復以何緣壞成天地？復以何緣令物入無？復以何緣令物出虛？弟子識淺，不達至理，願從天尊得悟妙致。惟垂哀愍，誨所未聞。

爾時虛無天尊以頌答曰：本爲人福盡，來降四天下。真體本常寂，爲物應虛假。變化憐有生，哀歎不能罷。劫至天地壞，成之由我身。不忍見此

苦，下世見威神。令物反歸根，方當信業緣。塵濁自空無，任道成真仙。衆累既消盡，清澄不受餘。永斷生死道，蕭然出太虛。

爾時天尊說此頌已，告諸天子言：善男子，汝等當知度人之法，不得輕易。以道慈力，先當爲其示見種種神變，降伏其心，觀其機根，而爲作法。我常哀愍，引之左手，雖示吹噓，不令驚恐。我雖示此種種神變，天地萬物本性湛然，常在不動。我亦未曾強爲神變，直以一道一法、一慈悲力爲衆生，隨其根性，見種種法，而此法性實非種種。善男子，汝今當知度衆生法亦有多種，天尊大聖神力自在，方便濟度，令其不覺，所謂大道方便藏用。世間凡人，助善與化，宣揚道法，要須文字語言譬諭。若不爾者，無從得信。善男子，我今度此會中一切男女，皆令受生，着之左契。此衆得道，我以潛運生氣使其不死，攝諸魔試，以除其亂。爾時慧命長者與一會大衆聞天尊所說，心開意悟，皆得六通無上道果。是

時五帝大魔睹天尊道力，身心變善，與其眷屬前進作禮，上白天尊：我等諸鬼受報不幸，生隨邪道，不得自在。或爲天地所使，遊四天下，行諸毒害；或爲糾過所侵，注記罪簿，試初學人，保舉真正。役役之勞，不敢言極。直以身體腥臊，形骸醜陋，私心好道，日夜尅責，悔過慙愧，欲從天尊求乞生化，得入道流，遠離魔形，即死無恨。惟願天尊開道之恩，廣濟無限，人神不隔，咸蒙度脫。說此語已，踴上空中，高六千丈，放身投地，遍體流血。如是諸魔一時氣絕。天尊愍之，良久，即命侍香金童焚返魂之香以薰諸魔。又命太上仙布散生氣；又命六甲直使與魔陰生之符；又命主生道君呼魂召魄；又命易形道君改魔之身。如是良久，諸魔蘇息，形神變易，精爽清和，心識淳朴，具大慈悲，位登道分，逆照未來九萬劫事。此皆神符之力使之然也。侍從天尊禮謝受生之恩，踴躍歡喜。於是天尊錫諸魔等五億萬衆入靈人之任，令其進元上道法。

太上大道玉清經卷之二

- ①「道君虛無」，敦煌寫本P.2257「君」作「居」，誤。
- ②「惑」，道藏本原作「貳」。P.2257作「或」。據後文「天尊知其疑惑」，應是「惑」之假借或偶脫下部。今據改。
- ③「令」字原脫。茲據敦煌本補。
- ④「於是地祇自天尊前而作是言」，P.2257作「於是地祇前白天尊而作是言」。
- ⑤「臣以多幸職掌水府濟度舟航下潤一切」，P.2257作「精以不幸職當水帝濟度舟航不敢言極」。
- ⑥「助道興化」以下，原「雖有微勞」後有「功德」二字。P.2257作「滌盪塵垢雖有小勞心無恃賴」。據此，「功德」乃衍字，當刪。
- ⑦道藏本無「衆」，據敦煌本補。
- ⑧道藏本無「生」，據敦煌本補。
- ⑨「度」，P.2257作「庭」。
- ⑩道藏本無「是」，據敦煌本補。
- ⑪道藏本「道」原作「通」，且無「并」字。茲據P.2257改、補。
- ⑫P.2257無「而」作歌曰「四字」。
- ⑬道藏本「役役」原作「役」，脫一字。茲據敦煌本補。
- ⑭道藏本「從」原作「使」。茲據敦煌本改。
- ⑮「清和」，P.2257作「瓌璋」。
- ⑯「劫」，道藏本原作「切」，誤。茲據敦煌本改。

太上大道玉清經卷之三

通濟幽冥品第八

爾時諸靈人等身得受度，位登道境，心生慙愧，作是思惟：不期一旦遭遇天尊，身得生化，永離煩惱。荷佩道恩，誠濟之極。私心願念，承道威神，廣被幽顯，立誓度脫一切危難，宣揚道化，令不斷。互相謂言：憶我往昔不值良緣，沈滯垢穢，輪轉生死，墮在邪中，不聞正道。念此苦時，當何所依？復慙傷痛，猶在心目，雖蒙濟度，未忘悲苦。又恐天尊大聖氣係上元，下土薄福，穢惡充滿。真仙虛寂，不久住世。此一會中，雖以受度，猶有九幽痛爽，不睹日月，冥冥長夜，綿歷劫數，無由解脫。

是時東方青帝靈人前進作禮，上白天尊言：不審天尊今者化度通同無礙，九幽苦趣蒙解脫不？弟子蒙昧，未能了達。唯願天尊大慈之心，願垂分

別，令得開悟。

天尊答言：善哉善哉，靈人等，汝今所問，不爽大悲。我以應身往彼化度諸地獄中受苦之魂，非十惡之例，以得受生。若罪根深重，自有限極，道所未化。何以故？十惡之人自招殃對，非他與也，自貽殃咎而墮地獄。或其生世之時，不奉師訓，不見經教；或生邊地，不遇善友，唯知盜殺，作諸非法，死入地獄。如此之人，罪目尚輕。若有中國之人雖至愚癡，亦曾聞法，而身故犯，死入地獄。如此之人，生死之中，終不信道，任其自性，造諸惡業，輪轉報對。譬如世人，為性兇頑而不畏死，徒以威脅，終無所懼，當如之何？亦如孩童，性愛戲弄，父母約束，或得餉時，從以誨示，心終不轉；或加撻撻，亦不能悟。十惡之人，亦復如是。又如蒼蠅而愛腐臭，性之所便，無由自改。十惡之人，亦復如是。如蛾徇明，自取焦滅。十惡之人，亦復如是。靈人當知十惡之人所在之處多諸惡伴，善能方便，構成惡事，以是因緣，誤入

墮惡。又復教訓眷屬、妻子，行不正行，還習惡業。以是因緣，連累幽顯，互相承負。子孫欲安，罪魂危之；罪鬼欲出，子孫誤之。生死業報，如循環中，不見其際，冥冥長夜，無由解脫，展轉受苦，不暫寧息。靈人當知大道慙慙，常爲於此不忍放捨。衆生不知，反生怨害，無上道法而不能行，威儀、戒律而不依信，清虛志尚而不肯爲，塵濁滓穢無端而入，貪樂聲色，紛紜馳競，饕餮滋味，傍邪求食，商賈販賣，唯入險徑，安平大道終不暫進。殺生害命，心無慙愧。唯務飽煖，蓄積無厭，一旦窮之，便懷賊心。百種規度，以求如意，損物益己，不聞思退。生無片善，日後積惡，死入地獄，魂魄受對，種種苦楚，自與殃咎，當如之何？道雖慙慙，無知不從。靈人當知，譬如春雨，是物皆潤，獨有枯木而不受洽，縱不潤者，益其朽爛，終不能生枝葉花果。十惡之人，亦復如是，雖聞大道，終不能發無上道心。

爾時靈人白天尊言：不審十惡之

人從何受生，悖戾反善，惡根深固，不可拔擢？天尊答言：善惡二種，元同一道。亦猶行人，一者向道，二者背道。背道之人，迷入冥山，轉向幽谷；又多惡獸，荆棘毒刺，衣糧窮盡，爲苦所逼，百種煩惱，故卒而致死，魂魄流轉，隨業受報。向道之人，所適通達，設求如意，無願不合，復多善友，處處得舍，欲見國王，隨意即往。以向道故，無利不尅。如是二種，習業不同，背向各異，非道使然。道本無礙，行者背向，逆順相反。十惡之人，身自失道，非道失之；向道之人，身自得道，非道得之。靈人當知，我諸聖衆劫劫下化，十惡之人雖不信道，道終不離。於是靈人重啓天尊而作是言：恐十惡之人習業堅固，生死背道，不可化度。猶如瓦礫，一破之後，不可更合。天尊答言：大道威神，譬如大冶，鍊金一切，無不銷者。靈人當知，十惡之人，我未化者，且令受苦，待其厭惡，然後化之。我當示其無上威神自在變化，仰令歸伏。靈人復言：不審天尊示其

神力，爲如前法，爲別有方？願爲示見，解脫網羅，人神開泰，幽顯普度，蕩蕩大化，不亦快乎。天尊答言：且待須臾，令汝得見。是時天尊即以無礙大悲，化作十萬十惡之人，形容長大，氣力壯盛，利辭辯慧，各言犯罪，不畏生死地獄因緣，在天尊前，須臾之頃，又命中仙直使十萬人執持信幡，下入九幽之中，引出罪鬼十惡之人，如一瞬間，皆悉俱到，與諸化人俱在一處。天尊又化作百萬力士，持大鐵棒，詰問化人造惡之由。化人不伏。是時力士以棒打之，碎如微塵。次詰罪鬼，未及尋棒，鬼以懸伏，求欲歸命，從道之化。是時天尊又命靈人百萬俱握左契，飛行四方，追鬼子孫。須臾之頃，無數億萬，承道威神，俱來會所。亦不歸信，心無慙愧，自言不應忽來三此。於是罪鬼見其子孫，悲苦號叫，切齒而言：汝等五逆惡黨從何而來？久欲殺汝，未能得便。待我自在，當滅汝種。子孫聞之，身毛皆豎，立便頭痛，寒熱苦毒。是時罪鬼形體殘毀，不可復識，或

無手足，或被剥皮，或被破腹，或被火燒湯煮，或被割下其肉，或挑出兩眼，或拔出其舌，或刀鋸解骨，或遍體錐刺，或鈎腸出肚，或六畜食噉，種種苦惱，不可名言。其鬼子孫生世間者，負其祖父，造十惡業，遍罹衆罪，生受報對；或盲聾啞啞，手脚攣蹙，通體惡瘡，眉髮禿落，徹骨蟲癩，疽癭癰腫，面目尙斜，膿血不淨，貧窮孤露。是時人鬼罪狀相似。良久顧視，相向悲泣，不能自勝。

爾時天尊微聲問言：汝等人鬼何爲如此生死二種俱不如人？我今愍汝，不忍捨離，故以道力，攝汝遠來。是時人鬼內懷慙愧，瞻仰天尊大聖身，紫色，是諸靈人形如冰雪。是時十惡衆中，內有一人名曰求利，前進作禮，白天尊言：不審天尊大聖所建何功，頓得如此身相奇特，神力無比，辨才無滯，與世不同？願爲我說，欲知因緣所從何來？天尊答言：我此聖衆無餘所修，唯以慈悲、忍辱、精進、持戒、惠施、不殺衆生，以是因緣，令我如此。

諸十惡人聞天尊所說，心小變善，默自悔過，伏地不起。

爾時十惡罪鬼之中而有一鬼，名曰反真，見其子孫，心生悔過。亦以作禮，白天尊言：不審鬼道之中堪聞法不？自愍生平造惡，鬼神受考，報對未了，不可免脫。

天尊答言：汝但念道，勿行邪曲，在在處處，心存道法。我當救汝。是時諸鬼心智歸信，瘡疣漸損，是諸生人亦皆小愈。須臾之頃，忽見司非之鬼將諸獄吏飛空而來，白天尊言：向奉嚴敕，令放群鬼，不敢拘留。不審天尊以何因緣卒放大恩，原除十惡盪莫大罪？諸惡鬼等罪簿尚存，報對未了。天尊以知其故，即以方便，問司非言：此等諸鬼，生平何緣死入地獄，復應幾劫於受苦？司非答言：第一，群鬼生平在世，媼殺父母、伯叔、姑姨、兄弟、姊妹；第二，群鬼反逆君主，誤殺兆民；第三，群鬼在世之日，斷水陸商旅，殺取財寶；第四，群鬼平生之日，穢慢道法，輕泄經文，毀敗善功；第

五，群鬼在世之日，販賣父母、六親，取財以贍己利；第六，群鬼生平之日，好將破掠家國；第七，群鬼生平之日，劫屍破冢，散人骸骨；第八，群鬼生平之日，不孝父母，獨甘美食；第九，群鬼生平之日，反師背道，心無慙愧；第十，群鬼平生之日，凌脅孤貧，陰賊兩舌，坐此罪故，死入地獄，萬劫受苦。天尊又以方便故，爲諸十惡之人重問司非言：云何名媼殺父母、伯叔、姑姨、兄弟、姊妹？司非答言：十惡男子或媼母殺父，十惡女人或媼父殺母，伯叔、姑姨、兄弟、姊妹，亦復如是。是時十惡之人聞司非之言，各省已過所犯罪目，與其祖父皆悉相似，恐其死後還入地獄，身毛皆豎，心中戰怖，不能自持，皆悉悔過，自扑流血。是諸罪鬼闔衆悲號，猶如山崩。

司非復言：此諸十惡之輩生死罪簿皆我執之，唯以注惡，無善可記。生死二衆不知悔過，云何天尊而欲開度十惡之人，都不科罰，與其昇度？後世愚人造罪日增，都無忌憚，不弱之流求

生無處。唯願天尊莫度此人。天尊答言：無上大道怨親平等，常以一慈悲、一願力，悉令普度，愛無偏黨。司非當知，我先令中仙十萬執持信幡，下入九幽，召出群鬼。復令靈人五萬握吾左契飛行四方，追鬼子孫。以是因緣，法當開度，大道玄科許其悔過。悔過之後，若更犯者，聽執之，我道不救。是時司非奉天尊敕，不敢更言。是時求利與其大眾恐懼因緣，病便增長，苦從天尊求乞濟度。天尊以知其意，即告之言：汝等諸人習汝祖父十惡之業，冥司注記，與汝祖父所犯無異。汝等云何作畜生行，媿犯六親，殺害骨肉，陰賊良善而無慙愧？以汝罪身，未堪佩法，但當莫犯十種惡業，日夜精進，自得濟度。無上祕道未可得聞。爾時諸人各各書取十種條目，戒約身心，不敢更犯。是時求利重白天尊：不審此衆祖父罪魂云何濟拔，令得離苦？天尊答言：汝等各各還家，建立精舍，供養道法，晨夕禮悔，持戒布施，辦諸香燈，盡世所有，營九幽大齋三日三夜，

傳香行道，傾誠倒意，前後三過，作此大謝；又營中元大獻，給濟餓鬼。汝等當此之時，請諸法衆轉讀是經，宣示愚人，令其殫盡內外慙懃，福乃成就。汝諸祖父承此法力，魂度南宮，即得受生有道之國。若不爾者，無由得度。諸人聞說，各各禮謝，過奉教敕。爾時天尊告靈人言：我以大慈，爲此諸鬼，令其離苦；復欲方便留教後世，故令建齋，以約其心。後世衆生欲拔亡者，當依此法以謝宿罪，分解考謫。又令其禮悔，銷其宿罪，并繼其心，令不放逸，惡根斷滅，善業增長。汝今當知化度之法，法應如是。爾時天尊即命南昌宮中主生之君領取群鬼，速令受生，勿使留停。於是群鬼禮謝天尊，悲喜而去。爾時靈人重白天尊言：人鬼已度，無量慶快。猶有畜生道中求乞濟度。元其罪目，亦從十惡中來輪轉報償，一墮畜形，失其本心，雖不具智，皆有道性，恩愛生育，哺乳時節，飲食長大，群分類合，依附林藪，驚怖狂悖，各護身命，但念水草，餘無所知，不可思

議。愍之無智，不斷其種，繁育滋多，更相食噉。不忍見此心無恃賴。天尊答言：善哉善哉，靈人汝等，今當知而我大道常以慙懃教化衆生，并濟地獄窮魂痛爽，欲爲是等斷畜生道，先澄其源，則其流易清。何以故？畜生之道從人中來，是故應當先化人道。人既得化，則衆惡不生；衆惡不生，則畜牛道斷。昔不曾聞我爲諸龍王水帝演說法要，良爲此耳。汝今遺忘，都不記憶。是諸靈人却自尋思，方始開悟。爾時復有五帝行病鬼王聞天尊下降，大度人鬼，率其部黨五億萬衆來至會所，白天尊言：我以果報，得爲鬼王，統攝天下色欲二界所有人民，生死簿錄，皆悉貫之。行病殺活，時無空過。被人所禱，食有盈餘，所贍生命，曾無暫闕。近數千年，福祚都絕，人受道氣，我法不行。以是因緣，福祿減少，所有部從皆悉饑虛。正由天尊道氣所爲。唯願天尊莫久住世，物貴自守，不相妨害。今日天尊甚成害我。天尊以知鬼意，即化作殺鬼大將，身長百丈，

前後從騎無數億萬，左帶金剛揮神之鈴，右秉玉戟流曜昆吾，神劍金鉞，雷震霹靂，光明熠燿，周帀騰沸，從西北方乘玄雲之車下天尊前，稽首天尊，致敬無量。前後導從，萬種鼓吹。是時化人悉皆大震雷音，俱唱拂魔靈章。是時化人自稱是殺鬼大將，侍從天尊。

爾時大將日出流光，猶如奔星。是時五帝鬼王及諸徒黨睹此威神，悉皆震懾，膝步下風，不敢仰視。爾時大將訶責群鬼：「魔邪妖魅，乃敢爾耶？一叱群鬼，鬼王皆靡。良久乃起，狼忙匍匐。大將又問鬼曰：「四天之下，人民枉疾，非橫夭逝，汝所爲耶？」答言：「是神爲之。又問：「汝等諸鬼能行幾毒，病苦衆生？」汝實答我，我即免汝。汝隱諱我，我當誅汝。是時青帝鬼王答言：「我主春行病，令人頭痛寒熱，身發惡瘡。赤帝鬼王答言：「我主夏行諸熱，令人苦毒苦瘦。白帝鬼王答言：「我主秋行病，令人轉筋吐痢，消渴煩悶。黑帝鬼王答言：「我主冬行病，所作陰濕，入人支節，令人腫痛。黃帝鬼

王答言：「我主四季行病，令人腹內堅強、刺痛。是時諸鬼語卒，化將各令諸鬼着此毒病；又振揮魔之音，以滅鬼氣。是時諸鬼一時之間千生萬死，楚痛號叫，如被火燒。爾時天尊復令諸鬼苦痛暫止，即以語言：「汝諸鬼等爲惡以積，今日罪滿，故受此苦。衆生無辜，橫遭夭喪，殺生求命，益其重罪，終無福祐。皆由邪魅貪殘恐動。於是化將又更瞋目，鬼又苦痛，求死不得，毛孔支節、耳目口鼻悉皆迸血。爾時群鬼苦痛如此，身心戰悼，求去不得，皆失其足，宛轉于地。猶如飛鳥，止其兩翼，都無所能。爾時化人重問鬼言：「衆生命錄定由汝不？諸鬼恐怖，不敢虛妄，答言：「不由。又問：「若不由者，云何能令衆生有諸疾苦？」答言：「鬼實不能令衆生病。何以故？是諸邪鬼因衆生病而入病之。又問：「云何因衆生病而入病之？」答曰：「人居世間，不明逆順，喜怒忿諍，飲食男女，勞逸失度，風寒暑濕，自成痼疹。或不爾者，不孝父母，返逆師長，輕慢天地，持戒不完，

自天罰之，身受病疾。邪神因此傍行威福，得他祭禱，以活性命。實非鬼邪能殺良善。若背道之人，與邪相通，身無戒行，善神不祐。若忍辱精進，行大慈悲，身心合道，鬼不能害。時諸靈人聞鬼所言，以爲誣隱。上白天尊：「不審群鬼作此答言，其理云何？」

天尊答云：「此諸鬼等所答之言亦以盡理。是諸鬼等睹此化將威神，歎未曾有，而復禮敬天尊。當知大道神力無比，降伏衆魔，摧諸異學。一切諸法，並歸大道。我等小鬼力不自支，皆失本心，無復威德。唯願天尊救活我命，長爲天尊而作侍者，供給大衆，守護學人，不敢怠墮。是諸鬼等發是願已，身痛得止。爾時天尊知諸鬼意，即復問言：「汝等諸鬼何因緣故，忽遭病苦痛惱如此？復何因緣而得差損？」諸鬼答言：「向所苦病，緣見殺鬼大將威光嚴厲，忽然得病，求死無處，皆失本心。不知何故苦痛如此？今得損者，是諸鬼等不堪此苦，進退無據，求生不得，心中願念，願得天尊救活我命，長

爲天尊而作侍者，供給大眾，守護學人，不敢怠墮。作是誓已，漸得平復。天尊告言：汝諸鬼等病一切人，心無慙愧，今得惡報，非爲殺鬼大將之所作也。此大將者雖名殺鬼，身登正忍，入慈悲地，具足六通，心海大度，常以智力殺煩惱賊，不以身手而害衆命。以是因緣，名爲殺鬼大將者，將領六度兵馬，破諸魔怨，安着衆生，致於忍地。以是因緣，故名大將。汝等諸鬼莫作邪見，疑此大將是真殺者。若作邪見，汝諸鬼等長墮邪道，衆惡增長，所病不差。爾時天尊而說頌曰：

邪正無二道，清濁同一源。吹噓本出空，中分成威恩。道爲衆福先，邪爲生死怨。邪勝自然正，迷極反歸根。自然而使然，大道不曾言。

爾時天尊說此頌已，復告鬼曰：汝諸鬼等應自厭離，應自觀察，應自慙愧，應自剋責，應自思惟，種何業緣，墮此鬼道，腥臊臭穢，常俟人衰，求人禱祝，殺害生命，心無慙愧。連群合黨，唯惡是理，嫉妬道德，破亂善人。爲諸

灾怪等，恐動衆生。汝等邪鬼，何能爲一切人民作正福田？不識大悲，唯滅物命。汝諸鬼等常爲不善，贓滿罪定，當入地獄，火燒湯煮，風刀鋸解，種種苦惱，以謝衆生。是時天尊知諸鬼等心未淳信，即令諸鬼諦念良久。天尊以自在神力攝諸鬼等，入炎鑪地獄；復入鑊湯地獄，復過鋸解地獄，復過刀山劍樹地獄，復過寒冰地獄，復過長夜地獄，令諸獄吏以棒驅之，不得寧息。是諸獄卒瞋怒之時，七孔出火，以燒群鬼，驚叫奔走。是諸獄門悉皆關閉，四出不得。是時諸鬼心自念言：願得天尊濟活我命。須臾之頃，天尊化作善人，將領侍從，開地獄門，引出群鬼，令諸獄吏莫相拘執。將諸群鬼還到會所，遙見天尊，悲泣流淚，具述受苦，果如天尊向者所言，備受怨對，不可堪忍，於此苦中思念大道，或見善人開地獄門，引出還此，重見天尊，喜懼交集。又恐忽更怨對，墮地獄苦，無身能堪，願從天尊乞得受度，免離鬼道，解脫地獄種種苦對。天尊復告鬼言：汝諸鬼

等受此苦惱，由汝昔來橫害物命，枉疾良善，作諸怪祟，恐動衆生，今得此報，非他與也。汝諸鬼等向言，欲爲大道而作侍者。汝罪深重，陰賊不除，腥臊臭處，驚觸大眾。諸惡鬼答言：願從大道求乞法水，沐浴塵垢，澡鍊身心。若不爾者，豈敢無端將此罪身干忤大聖。唯願天尊大慈之心，不問穢濁，賜以法流，洒盪塵臭，堪受正氣，則是千生慶幸今日。是時群鬼說此語已，悲號動地，叩頭自搏，兩眼流血，氣絕復蘇。是時靈人愍此諸鬼悲苦乃爾，即從北面洒淚而言：弟子有幸，以蒙度脫，得入道流，侍奉天尊，億代深緣，不動而感，荷佩恩造，心所罔極。不以其揆，煩勞神思，曲垂哀宥，特見流念，干忤聖心，濟度下鬼，慙懃煩劇。念此諸鬼亦如弟子，未識道前，獨見外壅，多疑內積，常遊昏冥，無因曉悟。一睹天日，積夜開明。遭遇慈尊，衆疑頓決，得庇騫樹，滌盪玄津，塵累豁消，道性昭顯。若太陽之泮積雪，似夜炬之朗重昏。窈靄消亡，層冰解散。法雨流

澍，廣潤心田。無上道芽，隨時增長，慈雲普覆，枯朽再榮，白骨成人，獨驗今日。唯願天慈濟度群鬼，惜昔無一，中路乖張。今更得同念，歸一道下。鬼無惠心，局見聞頑駭無知，誠可哀愍。

天尊答言：我以示其希有神力，欲以諸鬼付南昌宮主，令生世間。以其願念，爲我侍者。我不忍違諸鬼之心。爾時天尊即命左真仙童焚反魂之香；又命右侍上真秉靈一之符；又命始青天中主春道君潛運生氣，濟活群鬼。

爾時諸鬼得濟度已，懽喜慶幸，圍繞天尊，禮拜讚歎，而立誓言：天尊所在之處、大會之中，若有微塵，我悉舐除，不用灑掃。會中若有新學道士威儀不正，我悉正之。四天之下一切男女身受道法，我悉護之，令其成就。若有所須，我當給使，令無乏少。是時諸鬼身心變善，不違本願，修功補過，以報道恩。天尊問諸鬼曰：汝今已離諸苦，爲欲受生世間，爲欲入道正位？是

時青帝鬼王答天尊言：我等諸鬼未識道前，流轉生死，生出人間，年未滿百，死時已至。魔爽漂浪，流轉五道，隨業受對，無有休息。今遇天尊，願捨衆苦，如吐出口，終不更食。我今亦爾，不願更生凡夫之身。若生凡間，如反食吐，希有願者。出生凡間，如履湯炭，係不燒灼。我今有幸，得見慈尊，遠離盲道。唯願天尊哀愍我等，聽爲侍者。天尊告言：大道曠蕩，法無圍制，除爲十惡，善無不會。是時天尊愍念諸鬼，心知回向，錫其五部五億萬衆，入善爽之位，護持道場，輔助新學，典知淨爐，常運香木，以給灰火。爾時靈人見此諸鬼身得度已，心助歡喜而作頌曰：

神風鼓玄津，忽起大慈波。蕩滌無明垢，翛然出愛河。痛汝未度時，勞我深咨嗟。慈雲廣流布，枯朽反英華。何期九幽子，歸我長仙家。

爾時靈人重作歌曰：世路紛紜竟不休，出沒沉浮恩愛流。何不一向無爲道，強將生死作冤讎。

寂靜空閑不肯住，葷辛塵濁苦相求。那不仰眄英雄士，乘雲秉節自遨遊。

爾時靈人作此歌已，語諸鬼言：汝等有幸，得睹大道開度汝身。汝應日夜勤加精進，助道興化，護念善人，常行慈悲，與道合同。我與汝等長爲天尊而作侍從，在在處處，不相遠離。是時青帝善爽答靈人言：無上大道，我獨後聞。日月雖明，盲者不見。今得受度，悲喜交集。不期大道威神頓能無比，資生萬善，津濟群化，爲諸幽顯無上福田，不可思議，不可思量。重復悲喜，禮謝靈人而作是言：善善相會，正在今日。願助憐愍，時見教招，開示善道，令得解悟。

天尊見諸善爽媿謝靈人，知其深信，進此二仙證道一階。爾時復有雲霧之神、四天神王、崑崙四方八十天神遙聞天尊大開玄囿，將領部從一十四萬乘風而來，至於會所，悉皆見身三十二相、八十種好、十八神力，足指案地，震動世界，身生水火，眉間放光，裸形跣足，頭面着地，胡跪合掌，遙禮雲門。



爾時天尊知是外道，即命執蓋小仙見神力，身坐空界，當門而坐。

爾時諸邪禮敬畢已，心生狐疑，俯仰良久而作偈曰：

我在幽仞山，三界之所尊。夙聞無上道，乘霧入雲門。是謂天中天，何期無相仙。五情不異世，神識未超然。雖處雲宮上，焉無生死緣。

爾時仙人承道威神，應天魔之偈，便即身具衆相，神力萬變，遍體毛孔皆悉放光。天地大動，令諸魔衆立不安所。

爾時諸魔頭頂禮拜，仰瞻仙人，五體戰慄，遍身流汗，震懾忘形，不能自持，身光消滅，形如聚墨。

於是仙人重告魔曰：汝來何爲？三問群魔，不能仰答。半時之頃，乃得發言，重復頂禮而答仙人：我聞無上大道長存上界，神力自在，威德無雙，耳目不睹，足跡不致。晨夕欽仰，無能自進。輒以今日相率而來，敢申禮願，伏乞哀宥。言畢伏地。仙人告曰：汝在下界爲世所尊，自稱十號，邀世利

用，果報自足，來此何爲？此名道境，非魔所登。汝罪自深重，不合見道。汝在慾界惑亂凡夫，自稱調御；或名梵天，或號能仁，求世供養；或稱天人大師，誤諸良善，墮生死河，受汝訓化，不信大道，群數縛着，計息邪念。復說諸行法皆無常；又言其身不可毀壞。或說死滅爲極樂法，令人自殺，刳截其身，速得轉凡軀成金剛體。或說他方世界極樂化生，身坐蓮花，衣食自然，離此肉身，永斷生死。汝諸魔等以灰滅穢質竊比金剛，以無明法虛談六通，惑亂世人，令捨孝養，不敬父母。如是邪法，出世之時，門徒師弟自相媢亂，身見諸相，自言無見，空談無礙，不達至道，流動漂浪，忘本失正，心昧中道，恒處有餘，爲受生死，不能常住，不離名數，三十二相，以縛着故；十八神力，以有爲故；八十種好，以作法故；足指案地，以恐動故；供養水火，以邪見故，以貪食故。說有十利，以愛膾腥，妄說功德。汝諸魔等是真外道，藏覆惡行，息世譏嫌。汝說灰滅因緣小

事，假說天仙而來聽法，我是仙人，那不曾來聽魔說法。汝真外道，髡頭拔髮，裸形跣足，十惡五逆，性便誹謗，憎惡忠良，翻斥大道。又復邪道作法之時，男女師弟並混屏處，不令人見，藏護瑕疵，畏人知聞。羸惡言行，虛談虛說，無所依承。以是因緣，不合見道，恐動流俗，惑亂凡愚，僞作邪法，教他邪定，思想光怪。紛紛迷亂，多陳詭譎，誘導童蒙，凶逆謀議；招集惡黨，髡割無智。毀損凡容，遍滿慾界；造立空冢，焚殺凡軀。群聚讚歎，生入地獄。無明增長，髡拔毛髮，不除惡根，以此邪術，望去纏累，如負乾草而欲救火。又如愚人抱疾避病。亦如童稚奔走避影，穢惡紛紜，盈塞世界。以汝罪身，不合見道。

爾時魔衆聞仙人言，皆應其心，一時悲苦，號咷哭泣，悔過自責，踴身白撲，遍體流血，拔脫鬢髮，如燬穢草，兩眼淚流，五體戰慄，袒膊求哀，頂禮神足，顛顛憂苦，不可思議。雲宮天尊愍之改悔，即放靈眸紫光，遐映仙人。仙

人知天尊愍之，語諸外道而作是言：諸求法者不應悲苦。若悔過者，但改其心，不以髡截髮毛，殘形滅性而求悔過。魔聞道言，闔衆乃止。

爾時魔衆之中有一外道自號梵王，是諸外道唱導之首。裸形胡跪，合掌而言：不審天尊道濟幽明，澤流枯朽，凡在有生，咸悉開度，伏乞憐愍，造化群微，度以自新，弃邪歸正，庇影騫樹，盥濯法流，投足洞清，栖神玄路，洒掃壇靜，出入侍從，執蓋御車，晨夕受事。伏願天尊慈悲聽許。言訖歔歔，銜淚頓首。仙人告曰：我非天尊，位始登仙，在此親侍大悲天尊。是時外道聞仙人之言，皆悉流汗，心自念言：我在慾界，身登四果。今日忙怖，不覺自失，定知所得非正法也。上界仙人神力無比，天尊威德當應云何？恐我等衆濁惡垢重，不堪禮謁無上天尊。進退防徨，無能自處。

爾時六十萬外道一時解頸寶珠、瓔珞，積着雲門，遙心奉上，供養天尊。仙人告曰：汝下界珍寶，唯有金銀、琉

璃、碑磔、碼碯、珊瑚、琥珀、真珠等寶。我上界天中，萬種珍奇，所謂日月明機，星辰寶珠，金精萬變，曜電流霞。大悲天尊法眼不顧，詎須瓔珞塵穢雲宮。外道答言：慾界衆生唯珍瓔珞，不識上界諸天奇寶。以推心施，用表丹誠。仙人告曰：大悲天尊貴人心寶，不重瓔珞。外道答言：慾界肉身心中無寶。仙人又曰：汝身无寶，何不施心。是諸外道即起求刀，欲劈其心。仙人知其迴向，即與其刀。

爾時梵王自開其肚，出見五藏。諸餘外道盡欲見心，仙人止之，而作是言：凡施心者，除汝外道邪見小覺、小知小聞。專志大道，名曰施心，非以五藏、血肉、骨髓而爲施也。外道聞之，心始開悟。

爾時仙人以大慈手案合外道腸胃五藏，平復如故。是時外道各相顧視，心氣調暢，皆悉歎言：未曾有也。既聞妙法，又睹神力，上白仙人而作是言：天人大師真是醫王，療治痼疾，決斷衆疑，皆悉平復，無復遺餘。欲從天

師而請壽命。願賜長生不死之道。仙人告曰：下界所修何法而能駐壽一劫半劫？外道答言：下界衆生不聞正法，修四如意，縱能駐壽，不過八萬大劫，後還退墮，翻生慾界。我今已壽七萬餘劫，恒憂無常、生老病死。此法有限，不出三界，不越五通，不免生死。仙人告曰：長生之道，非凡所聞。汝等外道欲求長生，恐汝習氣深重，根業結固，年又老耄，髓腦空竭，形神沉濁，津液穢滯。又復誑惑世人，罪目已結，三司刺奸，五帝糾過。汝欲求度，殊成大難。我又奉大悲天尊金口之敕，假使天尊許度汝者，猶應退齋千日思失，然後乃度。爾時外道聞仙人言，闔衆於雲門外遙禮天尊，焚香願念，七日七夜，叩頭拜伏，以求報應。是諸外道正中之時，忽覺神香洞薰鼻根，流入其心，心中歡喜，煩惱消除，內無饑渴，耳目聰明，倍於初來。是諸外道彈指相顧，互言其身膚容潤澤。

爾時仙人心知天尊愍諸外道，是諸外道心亦自覺，內懷歡抃，不敢出

言，但以禮謝，遙心想念大悲真帝。又復七日七夜，拜跪雲門。仙人告曰：大悲真帝常以一慈度諸異類，惑無言說，所謂大道行不言之教。又如慈母善別嬰兒，聞其啼呼，知其饑渴，及以痛痒隨宜飲食，及與方藥。汝今已得道力。外道答言：實如高鑒。仙人又曰：汝有何覺？答曰：覺有香洞薰鼻根，流入心中，豁然開悟。心中歡泰，數倍於前。耳目聰明，亦復如是。仙人曰：汝得道力，已續性命。當於何憂？但以汝身塵濁日久，未堪親見大悲天尊，未堪稟佩無上道要。汝等徒衆且還慾界，退齋三劫，澄鍊身心，然後更來親近天尊。是時外道答仙人言：我身朽邁，恐命不固，忽然三劫，沉滯下界，無常奄及，失道須臾，魂識漂流，隨業受報，何當復來得見天尊？大師當知，慾界邪仙極上壽者不過八萬大劫，中壽之者一劫半劫，下壽之者與凡不異。此衆難保。大師云何隨賜小法，且駐年命？仙人答曰：上道大通，都無小法。僅修一法，皆得成真。

是時外道勤勤不已，各解髻中寶珠以獻仙人。仙人知其盡心，受其獻已，還着雲門。須臾之頃，雲宮之中靈音微響，如撫金石，以和虛琴，音韻流轉，清雅寥亮。忽見七色香光徘徊雲門，其光之中有二仙童端虛而坐，東西相對，齊撫雲璈而告諸魔曰：

真氣周流布十方，重昏巨夜明晨光。幽扃苦爽同時曉，遊魂逝魄及神香。慈悲手執金剛劍，調柔忍鎧折邪芒。六度威兵齊列陣，俱乘定惠聘龍驤。高據雲門銷五苦，恒秉丹旌定八方。掃除戰堞行屍臭，灌沐枯骸鎮使芳。

爾時二仙童撫璈畢已，而自言曰：慾界多塵，薰臭盈滿，甘露不潤，氛翳天庭，屍氣衝人，非常蓬勃。歎訝仙人能忍久住。仙人答曰：非爲能忍，親奉明敕有辭。爾時仙童語外道曰：色慾二界人氣干天，何爲淹留？且當退齋，三劫之後，戒香盪濁，歸正除邪，餐和服丸，消此魔氣，形體清明，內外芳潔，當更上來。大悲天尊已施玄祐，香光薰映，消汝惡根，加汝壽命，

亦無傾天。是時群魔重加喜慶。二仙童曰：汝還下界，捨汝邪見，勿以噴嗃，自稱十號，邀求供養，增長惡根。勿稱人師，招集童蒙，令其邪僻。勿以毒火燒殺凡愚，歡喜讚善。此大陰賊，方便損傷，教化讚死，髡截凡夫。此罪極大，無上大道慈悲好生，常疾於此。時諸外道諾奉教旨，辭別仙童，退還慾界。

太上大道玉清經卷之三

## 太上大道玉清經卷之四

### 上元品第九

爾時上元大慶，正月十四日晨朝之時，二景交暉，月華收彩，星精斂曜，圓羅啓旦，芒霞豐照，太空虛朗，香花互啓，元氣發生，和液入堅，地秀輕霧，天散浮煙，海清不波，玄源演津，飛蓋彌羅，丹旌吐雲，靈幡飄飄，華森秀秀，空樂長鼓，虛籟永吟，五精導途，雙景翼軒。

爾時上元太真皇極天尊與諸侍從，日宮之中雲霞寶座，齊下神足，安庠而起，登於焱輪、凝精寶車。香雲纏蓋，慶霄四冥，騰皇整轡，金光理御。正中之時，下觀十天，盼看六合，後會陽寥之宮。

爾時天尊與諸大聖俱放慈光，從心中出，明照幽顯，無遺纖塵。光非千色，無有邊際。天上地下，朗然無滯。法輪常轉，羣生俱會，噓太和以發萌，

呼柔弱以散剛。甲裂盤施，含靈踏馳，琳碧敷華，瓊根秀枝。至十五日日中之時，三天仙人無數億衆，不可記字。心越五通，身無死地。能調六軍，降十大怨。在於郊間、忍辱之地，權立一城，高廣無比，有四大門，樓峙聳峻，出於雲心，悉用七寶以爲關鍵，渠濠深邃，洞入淵際。其城之端有三萬六千寮孔，網以珠緇，地以蒼珉，墀道周巾，平夷廣遠。城中宮殿亦悉高妙，陰輝燭夜，朗然無翳，珍玩穀帛，盈積府庫。是諸仙人，大設天儀，雷震法鼓，秉大丹節，舉大丹旌，仗大金鉞，搗大神劍，精器利銳，譬如鱗角。服大法鎧，柔如雲袍，善却毒箭，五兵不傷。是諸仙人，手執鈎鑲，鋒芒纖礪，前驅後殿，威如鳳爪。晨朝之時，俱駕六龍，齊引寶車，出於郊間，陳列威儀。鳴鼓吹角，未及作令，怨敵以伏。解甲釋衣，雄氣頓靡，銷金裂鼓，摧旌毀節，被髮解帶，披心露膽，膝行肘步，下風而趨，匍匐求盟，心血自見。仙人各擁命魔靈幡，導諸投化，登太玄之路，入洞清之源，陟

長明之阿，昇金鳳之壇，焚逆風名香，誥以左契，醮以玄津。時諸大怨睹此神妙，忍辱之力，誠知無比，心靈頓改，願爲仙人，作善知識。爾時仙人至於食時，與諸侍從翻入大城，於其城中，各捨威儀，齋百寶名珍、神鄉奇物，昇入上清，供養天尊，所謂日月寶珠、星精寶珠、陽燧寶珠、陰諸寶珠、曜電寶珠、驪龍寶珠、忍辱寶珠、大悲寶珠、大慈寶珠、六度寶珠、絕塵寶珠、和光寶珠、無瑕寶珠、離欲寶珠、含真寶珠、英華寶珠、堅固寶珠、精進寶珠、持戒寶珠、心海寶珠、智慧寶珠、方便寶珠、雲雷寶珠、和風寶珠、發生寶珠、甘露寶珠、如意寶珠。是諸寶珠，光彩各異，圓明一等。復有三種無價善寶，所謂大慈善寶、儉約善寶、退讓善寶，如此善寶，若有衆生懷此寶者，所求如意，無願不剋。若有衆生爲諸病苦，懷此寶者，病自消除。若有衆生心多反逆，懷此寶者，自然慈順。若有人王，天下不化，災殃屢表，鄰國鬪爭，五兵交戰，百穀不熟，水旱不調，羣臣陰謀，懷此寶

者，天下自化，灾殃不生，鄰國交好，金芒喪精，百穀四熟，水旱調平，羣臣盡節，陰賊不生。是諸仙人復齋四種香飯，所謂豐山香飯、龍山香飯、浮山香飯、太和香飯，香氣豐布，食之無盡。是諸仙人復齋七種寶漿，日精寶漿、月華寶漿、星精寶漿、甘露寶漿、金液寶漿、靈光寶漿、玉匱寶漿，各以諸天寶器盛諸供具。復齋無價寶衣，所謂自然瓊羅寶衣、自然雲錦寶衣、自然流霞寶衣；復齋無價名香，所謂反魂名香、反風名香、逆風名香、七色名香；復齋諸天雜果，所謂萬歲靈桃、空洞靈瓜、霜梨玉棗、赤子金葩，種種珍奇，來至會所，供養天尊。大獻珍寶，列滿玄中，香氣氤氳，周流十方。百寶光彩，映朗無際。時諸仙人圍遶天尊，百千萬帀，齊鼓天樂、太和之曲，億變萬轉，音聲和美，清妙寥亮。神禽鼓翼而騰舞，靈獸叩節以齊和。龍吟鳳歌，衆音合會。清風吹絳樹之響，名香轉徘徊之蓋。日月停輪，衆星曉明，芳煙拂迴，甘露如傾。是諸仙人良久之間，輟

衆音之繁會，弭未遇之高節；收疊飛蓋，傍息騰皇，併却焱輪，虛立雲庭。一時稽首，問訊天尊而作是言：不審天尊衆善法身，道化愍憫，以勞聖慮。萬兆無福，實貫神心，而塵穢蒙籠，根業沉濁，仰佩玄祐，曉夕開懷，悽悽之誠，恒對心目，空形任道，無以報恩。復念生成，未能忘本，塵衆相率，建此微心。而三天罄窮，敢獻塵露，藉以上元大慶，慈尊高會，天恩無限，不問塵臭，願爲納受所獻丹心。言畢稽首，伏聽哀旨。

爾時天尊凝思遠視，神彩冲邈，金顏發輝，真光四照。萬天在眸，神力周備。塵界非遙，令諸仙人心疑豁消。是時天尊即命右侍金童焚香百和，反風名香。又命左真上相千二百人齊鼓雲和之璫。又命左直主春上元真宰千二百人齊擊神金天寶之鐘。又命東極太仙九千人以扣萬石紫瓊之磬。又命西極太仙六千人齊擊神山天寶方金。又命和風吹出空洞萬變之音。衆樂齊奏，良久之間，九色雲龍蜿蜒騰舞，八

霞回空，香風轉苑，騫鸞翔鳳，靈禽仙獸長吟虛庭，不緩不急，如飛雲之旋天，似迴波之引流。衆音之中，演出空洞微辭，而告仙人曰：

上元正氣皆自然，主生皇極爲衆緣。紫房吹動氤氳氣，太和流衍散剛堅。大道生成法如此，故我移居治此天。風雷消解諸盤結，六氣能驚長夜眠。此亦神功自通妙，非關吾強使之然。衆寶以陳玄理界，即是虛心上福田。

爾時諸仙人聞空中微辭之音，自然妙響，清通虛豁，道德流布，理無不存，歡喜適內，神光發外，一切有生皆發英華，昇沉飛走踴躍騰舞，寶樹香草應時花敷，諸雜根枝萌芽啓甲。是諸仙人登六通果，九祖承慶，免離憂苦。上元之功，其德如此。三日三夜，天事乃畢。

爾時天尊爲受供已，轉設天真靡不周遍，以無相施故，如道神力，果報無窮。香飯寶漿，湛然不減；日月寶珠，彌加明盛；時諸名香，其氣不絕。是諸仙人大衆之中有一上仙，名曰昌

期，而作步虛曰：

整控啓皇極，乘運入中天。披空獻心寶，妙覺朗身田。日宮散和氣，寥庭騰願煙。大道難思議，隆福慧無邊。空身遊道境，冥心入太無。披玄尋寶際，幽契自相符。故能明假外，噓累絕羣愚。誰知不死道，遐因空洞書。玄風鼓太無，天樂演微音。龍章昭鳳彩，玉字發虛琴。飛猋上雲路，散髮寫瓊簪。稽首禮皇極，焚香陳我襟。

爾時仙人說步虛已，重複稽首，請問天尊而作是言：上元高會，以蒙仰睹，沐浴恩化，空心荷佩，福被幽顯，存亡獲濟，忘退罪愆，願垂赦宥，欲從天尊，求乞一願，願爲四天之下一切衆生，度脫苦惱，免諸厄難。欲請天尊下降丹臺神州之中，大度天下人及非人。

於是皇極天尊而告仙人言：汝等當知三元高會，良辰吉日，元乎正氣。正氣化生一氣，一氣化生平氣。如此三氣，上應三元天寶宮，所謂日宮、月宮、星宮。宮有一尊，我處日宮，號曰皇極天尊，主於上元正月十五日春陽

之時，發生萬物。月宮之真，號曰正一天尊，主於中元七月十五日，以成萬物。星宮之真，號曰衆妙天尊，主於下元十月十五日，藏養萬物。子但專心於神州之中，及四天之下，教化衆生，令遠邪道，宣揚三尊真帝名字，晨夕願念。至此之日，三尊互下，降臨洞府，分形萬億，濟諸天人。

爾時衆仙謹承明勅，以正月十七日日暝之時辭別天尊，歸於下界，過北斗之中，夜候真人，朝謁靈童，停留七日，而下神州，會於首山之上，議定流化三日三夜之後，東到扶桑之陽，南到炎洲火池之陽，西之崦嵫流金之西，北越陰谷積雪之北，次到負壘、青丘、崆峒、具茨，以次告報新得道者，一如上元皇極天尊金口辭也。云中元大會七月十四日正一天尊下降神州，各令仙人下同具備，謠歌唱令真帝名字，聞四天下。各令此日辦諸天供，具盡世所有，施安牀座、幡花、香燭，心心繼念。是時四天之下，同於此日，殊心合契。

### 中元品第十

七月十四日晨朝之時，天下仙人及諸國王、一切人民仰視上方，渴如所待。

爾時正一天尊與諸大聖六千萬上真之衆各乘月宮而下其中，諸人皆見，如雲之垂，降臨下土，爲人保證無上福田。

爾時天尊將二侍者下於丹臺，諸餘真衆各赴所感，丹臺羣仙侍從天尊。至十五日日中之時，青丘仙人八十一萬衆俱乘青龍之輿，齋諸供具，來至會所。員壘仙人六十四萬衆俱乘朱雀之輿，齋諸供具，來至會所。崆峒仙人三十六萬衆俱乘白虎之輿，齋諸供具，來至會所。具茨仙人二十五萬衆俱乘玄武之輿，齋諸供具，來至會所。崆峒天仙二十五億萬衆俱乘黃龍之輿，齋諸供具，來至會所。須臾之頃，東九夷、南八蠻、西六戎、北五狄邊遠之方，諸仙人等各齋供獻，承道威神，浮空而

至，各各陳列供養之具，奉獻天尊。陳列事畢，圍遶天尊步虛歌讚，焚香散花，作天伎樂。衆音合響，神風徘徊，香光纏虛。列位以次，俯仰節度，左齊右整，北面長跪，微言寂氣，問訊起居而作是言：萬兆紛紜，多惡少善。不期感動，降下高尊。而此塵穢之徒竊好真道，濫當開度，功不補過，無能自勉。又恐九祖承負釁咎，墮在幽扃；或生出殊方，受形異類。幸藉微緣，遭遇大聖，不動而感，高會良辰。小兆微生敢求多福，唯願天尊誨示未聞，開發金口，演出靈章《中元寶經》開度後世。

爾時天尊高抗深視，良久而言：月宮兆魄，圓羅孕輝，隰壤消煩，金風扇威。火木藏養，炎涼氣交。皇華垂津，收束氛妖。吉辰開宥，萬帝來朝。六塵外靜，三毒內消。二世獲安，介福所招。無所之先，朴散爲元。形名之後，妖邪所怨。萬物亡本，進退乖根，良辰不度，無思道恩。悠悠萬兆，痛不能言。

爾時天尊說此語已，俯而彈指數

聲，天地震動，河海騰波，神氣不暢，悲風不和。是時衆仙各起禮謝而作是言：不審天尊以何因緣，俯而彈指，天地震動，日月不明，神氣不暢，悲風不和？小兆道淺，不達至理，心中疑懼，不能自寧。唯願天尊大慈憐愍，哀所不悟，唯垂分別，誨以未聞。

天尊告言：我無名之先，真道大行，言教未施，天下德化。我見世後人民多智，各習異端，尚多聞見，仁義互興，財食親輔，棄貧賤弱，父子相嫌，君臣不忠，六親怨爭，鄰國相讎，四海交兵。以是因緣，不善增長，輪轉相報，無解脫時。不如今日衆生尚善，初來聖衆降四天下，一切衆生欲求智慧，以離愚道。漸漸工僞，百競馳起，雖地獄空虛，不久盈滿。以是因緣，故我彈指。衆仙聞說，不覺悲悴。

爾時崆峒仙人從座而起，稽首作禮，請問天尊：不審羣化之心可迴改不？欲請天尊自在神力防遏萬原之端，擁未萌於機上，使合生復根，億兆藏初，唯守一道，泯絕羣生，心無起滅，

形同太虛。

天尊告曰：善哉善哉，善男子，汝所言者，是大道之第二十之子也。何以故？大道元乎虛朴，虛朴散爲元氣，元氣自然，成形有生。從生立名，因名有言。因言生正教，正教生即智慧生，智慧生即巧僞工。巧僞工即愚智辯，愚智辯即是非起，是非起即憎愛生，憎愛生即攻戰作，攻戰作即君臣立，君臣立即萌賞罰，賞罰萌即利害見，利害見即陰賊生，陰賊生即罪目結，罪目結則冥司立，冥司立則有水火之罰。輪轉無窮，自然如此，非道爲之。汝所言者，居乎萬機之下。故曰我道雖明，背之則暗；我道中正，反之則邪；我道柔弱，捨之則剛；我道長生，輕之則亡。大道無親，唯與善人。我觀羣化，非可卒正。自有萬分之一生感和氣，歸原復根。大道爲此下流正教，以表羣目，欲其影從，而汝後學即斯人也。

爾時崆峒仙人請問天尊：不審水火之罰，其義云何？小兆不達，願垂分別。

天尊告言：水火之罰，凡有四種，陰陽二過，冥司謫之。經水過火，所謂冰炭之罰也。衆垢齊積，焦沉禍至，天

屯地否，水火交會。乾極則八海騰煙，山嶽灰燼，天門祕捷，金玉銷燦，三景藏精，風雷扇炎，火翳流焰，天地成治。地否之時，陰成告瑞，移陸溟海，中天

涌波，衆真遷治。西北水母形如素旒。衆鳥南飛，群聚天際。飄風激濤，崩騰山嶽。金石相觸，磨滅泥滓。善男子，

汝今當知，此二大災以應天下，及以萬民。何以故？天下無道，萬民不化。

此災者，喻如衆生五內反逆，蓄泄不調，自然成患。況於天下失道敗德，衆塵齊累。天地愍之不能已。苦應施罰，前示其教，次告其氣，後垂其象。

愚癡之人不信正教，不明氣象，凶惡不改，天不得已，示其大威。譬如臣子，

君父寵念，承恩驕恣，變心失忠，不孝君父，私懷反逆。謀狀以露，仁君慈父猶不即滅，先當施令如是。臣子心猶不悔，後付司殺，君猶哀之，但不得已。

天帝亦爾。時諸仙人聞天尊所說，皆

悉歎言，未曾有也。禮謝天尊；煩勞金口，愍諸小兆，宣示未聞。荷負恩造，流霈之澤。

禮謝畢已，天尊告勅，令復本座。至十七日晨朝之時，正一天尊初來，真衆應緣，畢已，從四天下歸入丹臺，問訊天尊：起居道化，得無勞極？

天尊告言：真化無勞，道化無極。子赴萬兆，得無疲厭？衆真答言：承道威神，豈有疲厭。

天尊又問：生死二緣，得解脫不？衆真答言：地獄罪魂，以天尊下

降丹臺之時，登即解脫。四天之下一切兆民雖解無脫。爾時丹臺諸仙聞上真之言，心中不達。爾時昌期仙人即從座起，稽首天尊：云何地獄罪魂未見天尊而得解脫？云何四天之下一切兆民雖解無脫？願爲分別。

天尊告言：善男子，汝今諦聽，吾爲汝說。所謂大道藏用，雖濟度萬物而不爲尸，暗德運載，以是因緣，能令罪魂而得解脫。雖解無脫者，所謂天下人民雖解煩惱性空，而不免脫。何

以故？凡夫之人雖解法性，不習真常，但明至理，身在合道。是故道與理乖。譬如有人身坐狹室，心遊十方，無所障礙；或說至理，聰辯無滯，離合隨心，此名心得入理，不名身得入道。以是義故，理雖合道，不能令身而得入理。喻如夢遊，身不隨心，是故衆生心得入理，身不入道。心入理者，名之爲解；身不入道，名爲無解。無極大道，身心無礙，能令微塵世界一時赴感，故曰大道自在解脫，能令十方世界如觀掌中。

前際亦復如是。是時天尊說此語已，即放左手五指十種光明，遍照虛空，令十方世界俱見光中。時此大會真人、仙人、靈人悉皆洞睹微塵世界。又於光中見其二際，身所經業，了了分明。是諸仙人洞觀希微，道窮真常，皆得六通自在之力，九祖獲慶，受生道境。天尊中元之緣畢已，七日晨朝之時，天尊大衆俱昇雲輅。玄風鼓樂，紫霞虛邁，空谷謠歌，天吟萬籟。

爾時衆仙而作步虛曰：吉光騰紫氣，霄輅逸丹天。翻颺



香風轉，蓋動起浮煙。道中還復道，玄中已復玄。真光不識際，大象竟無形。法輪常自轉，希音不可聽。空閑侍三寶，虛中聞洞經。七變遊魂反，萬氣駐頽齡。香風飄羽蓋，遊氣轉森車。泠泠上雲路，窈窈入長虛。顧愍埃虛子，應運演靈書。妙果諧今日，冥契自然符。

爾時仙人上送天尊，歌頌讚歎，入至雲庭，過四十天門。是時天尊止諸仙人言：天路遙長，無勞遠送。是諸仙人俯仰躊躇，良久之間。

天尊愍之，重告仙曰：子後學成道，雖得六通數千萬劫，猶是人身，與我大衆自然之體、光氣微妙，未可全同。天尊即命運氣上真，調暢玄風，噓出無上萬變靈章、雲和清雅太玄之辭三十九篇。其時日精上浮，月液下流，真氣順生，金風反和，瓊林發藥，玉樹花敷，法輪三轉，流霞七波，天外長謠，虛裏空歌。令諸仙人明道優劣。又告仙人曰：上道之希，其法甚微；神力至妙，不可名言。略示希有，以與汝分

別。仙人歡喜，禮謝天尊：唯願大聖時見影響。言畢辭別，復歸下界。

### 下元品第十一

爾時衆妙天尊以十月十四日晨朝之時，與諸大聖五千萬億真仙之衆俱從丹天之中星宮之內應運下世，威儀度物。先當引日入左目，月入右目；左斗昇左耳，右斗昇右耳；南斗蓋通天之端，北斗在瓊簪之下，中斗在神足之間。碧霞縈左鬢，素霞縈右鬢，丹霞映三理之中，玄雲浮玉枕之上。青龍吟左，白虎嘯右，金鳳前唱，玄武擊節。五星吐氣以迴繞，陰輝停虛以懸照，慶霄纏幕，仙雲起蓋。諷誦靈篇，虛吟萬籟。地涌寶樹，隱草萌萐，芝蘭脉發，積雪冰消，寒谷和氣，溟泉吐溫，神煙逆吹。召魄呼魂，雲雷揮音。洪靈翟精，謠歌靈章，空洞虛鳴。聾瞽聰察，孿臂復行，河海靜波，昏霧廓清。真光浮輝，寥朗長天，五辰合度，三景齊明。異類親睦，百穀豐盈，怨敵解圍，天下

太平，正道雄張，妖魔滅形。

爾時天尊俱乘星宮，齊整雲庭，告羣生之吉祥，應衆仙之靈瑞，鼓棗浮虛，俯臨太無，下元吉慶，景福羣儲，進道修德，理契神符，紫藏交絡，六府花敷。神力變於下土，真氣流於太空。御運垂期，玄中優游。於是萬變不盡。須臾，令冬林以發榮，使枯木以花敷，復含生以反真，攝萬類以藏初。收道幽寥，寂簡高居。如此神力，登應金口。

爾時丹臺仙人夙承上元皇極天尊金口之勅，睹此祥瑞，知是天尊下降神州，即出丹臺，遙見玄中光明赫奕，星宮高妙，幡蓋彌天，羅列真儀，遍滿虛空。是諸仙人叩頭，上請天尊降於丹臺。須臾之頃，天尊即命左真人通命仙人曰：我應運教化，主知下元，度諸新學證成真仙。諸有善功，名著青籙，晨夕求願，香煙熏於帝庭，清唱聞於太一者，我當示其進修之道，命羣魔以侍衛下界凡夫迴心真正下元齋戒，爲其九祖，我當拔濟存亡二代，未聞令

聞，未見令見，未解脫者令其解脫。諸有病苦，我當療治；怖畏之者，令其安隱。我今法當降下地中，宣道布化。中元之時，正一天尊以下丹臺，爲汝說法。汝功德圓備，以具六通，得無閔智。但以身非自然，後學成道，所以爾者，未得入登大羅之上。諸學成道，但至自在，長存不死，名著左契。塵劫如瞬，形隨日新。汝等諸仙即當其人。奈何兆民形命蜉蝣，朝生暮死，與道相絕。汝當知之。爾時仙人隨從天尊，暫治地中，下元施化，濟度羣生。

爾時天尊與諸真仙微塵之衆俱御浮霞明星寶宮，以汎其上，下至地，中列諸星宮，去地七仞，凝九色慶雲以爲大城，七變光氣以爲樓臺，萬變金精以爲四門，金剛寶光以爲關鍵，太虛真氣以爲寮孔，忍辱寶光以爲却敵，智慧寶光以爲城塹，玄源洞清以爲泉池，四信寶光以爲階道，六度寶光以成寶樹，戒珠寶光以爲花寶，朱雀寶光以爲幢蓋，青龍寶光以爲神麾，白虎寶光以爲瑞節，玄武寶光以爲鐘磬，玄風寶光以爲

仙樂，法雷寶光以警衆生，法輪寶光以宣道化，空洞寶光演出靈文，萬氣寶光以召生魂，神符寶光以召死魂，陰生寶光以起枯骨，九轉寶光以除痼疾，太和寶光以爲天厨，甘露寶光以爲良井，日月寶光以爲燈燭，香雲寶光以爲飛蓋，天花寶光以爲穠地。

爾時天尊以一慈力流出諸光，上極無上，下窮無下，十方世界皆悉洞徹，遙見天尊如在目前。此會大衆亦睹十方，猶如指掌，生死二魂皆悉乘光，一時雲萃，羣妖奉節，自喪其精，亦皆乘光匍匐而至。爾時諸地水神排破堅冰，撥開積雪，湧出半身，飲和至化。爾時地中草木遊根伏牙，悉皆湧出，其纔見霜雪，盤施甲裂，騰雲吐紅。須臾之頃，神嶽冰消，溟津凍泌，地乳瓊漿，天垂甘澤。

天尊凝視良久，喜諸羣微，心知向道，乃開發金顏而啓法口，怡然微笑。萬變真光，流出金吻。十方世界皆於光中洞觀真相，欣喜踴躍，不覺自失。人及非人，悉皆傾想，注念真光，入其

心目，三日三夜，停然不動，亦無勞極。又於真光之中各各見其魂魄，圍繞天尊，須臾之頃變成嬰孩，入其身中，各坐府內，湛然不動。自覺其身改爲童子，色美髮黑，氣力如雲。時諸死魂飲和生氣，悉成人形，反真復胎。靈魔變節，道德成心，地水之神半身沐光，以極其靈，胎卵潛胞，隨母獲安，皆含正氣。開剖之日，順性成就，飛走輕利，無諸夭傷。積疾新痼，登即痊除。羣蟲不螫，毒草樹滅。

天尊告諸有生言：此非自然，皆因道化。一瞬之頃，神力周備，萬物以具，受真正氣。至十五日日中之時，下土凡夫各獻丹誠，并齋供具，以慶下元，盡世所有，供養天尊。

天尊告諸仙人言：凡夫不同，或獻丹誠，或獻珍寶，及以穀帛，一香一味，一塵一色，大道慈悲，應爲納受。爲說正法，示正威儀，長其信根，令其歡喜。以是因緣，遠離邪僻，免脫生死，長入道流。可不善哉，可不善哉！是時諸仙人及非人，天地之間有形無

形，悉皆同聲，一時稱善。當此之時，香光徘徊，流霞四象，三景交道，互西互東，真謠長虛，梵歌太空；寶蓋浮煙，長幡引風；龍王負鑪，以散反魂；仙童擊磬，居城四門；天樂和善，響徹無邊。能令衆生虛裏披玄，寂坐飛龍，默誦靈篇，植根先劫，樹果後來，見在無際，都忘二邊，泯諸煩滓，無心默淵。自冥光氣，柔弱剛堅。

天尊說此法已，即入大悲大定。須臾之頃，寒谷吐風，吹諸幢蓋，鏗鏗鈴鈴，虛響空鳴，變爲悲聲。玄雲不流，真光湛然，神煙籠象，七曜收輝，日道南移，月路陰歸，九壤復堅，衆流溷溷，水精浮景，遊氣潛形，濕族淵居，甲否盤榮，蠢伏藏氣，蟻蚊吞聲。

爾時天尊至十五日禺中之時，微動左手，抗齊神心，彈指三聲。

爾時羣仙及諸凡夫皆見天尊出大悲大定，歡喜稽首而作是言：慙愧慈尊道化有勞，濟度無窮，幽顯解脫，歡喜無量，聖凡慶快。不審天尊，衆生未度之前，何故金容啓笑；化度之後，翻

入大悲，日月不明，七曜收輝，霜氣吐凝，嚴風扇威，皇道南移，月路陰歸，羣物顛顛，五内含哀。彈指之聲，令衆慘悲。願爲分別，釋結除疑。

天尊告言：善男子，汝當知我初微笑，喜衆迴向，易得度脫。得度之後，勿忘大悲。若忘大悲，雖度非度。以是因緣，故我爲諸衆生入大悲大定，彈指當心，示其內外和合，三轉法輪而爲羣生。無上大道，法應如此。諸人聞說，衆疑頓決，重復稽首天尊：謝煩金口。中時已至，欲請天尊聖衆慈悲，爲受衆生微塵供養成就之心，願垂愷悌。

爾時天尊不違其意。大衆列坐會中而受供養。爾時天尊以方便力故，臨受食時，即命中真左侍飛往上界大羅之中，取太虛寶光之器二口，各圓十分，安着座上。玄虛之中，一器先盛大羅天中自然天厨、日華月液；以一空器擬盛下界衆生所獻珍心。爾時四天之下一切人民及諸異類持物施者，或手，或口，或心所獻之物，一時俱到天

尊座前，各各心疑寶器狹小。天尊知其疑惑，即告之曰：汝等但施，勿嫌器小。諸人心疑，不敢仰答。

天尊又曰：汝心狐疑，不能決定。我知汝心嫌此器小。是時天尊即命中真捧下寶器，小傾其口，而向諸人，即告之言：汝欲施供具之者，先令人王，次及羣臣、兆民、異類，各持本心，入我器中。諸人受命，俯觀寶器，忽見無際，不測淺深。四天之下，一切人民一時持獻而入器中，或車或輿，或步或騎，升沉飛走，都無妨礙。未入之人見器猶小，入中始知器無邊際，歎未曾有。而作是言：我等小智，欲以度量天尊太虛寶器，不受塵露，是我各煩惱覆障，不能得知大道法器。向若不蒙天尊故命中真敬器示我，我心狐疑，施亦無福。

爾時諸人入寶器已，周遍按行，莫知其極，見有無量世界並在其中。仰視上方，天天相次，日月星辰倍明下界，寶器之中盡是天真大聖，空間虛白，甘露大海、百寶山嶽、天禽天獸、隱

草瓊樹、香雲香風、法雷法雨。是時大衆復觀所施，蓋不足言。次周行，忽至天尊說法之所，從器中出，亦不覺知。其時圓光停照，時不改中。天尊媿其盡心獻諸供具，欲以方便，示其稀有天厨上味，即告大會之中國王、王子、羣臣、兆民、仙人、非人等，而作是言：我愧汝等爲道遠來，獻我供養。我以爲汝受納之訖。諸人慙其供具微少，默而無答。

天尊以知其意，重告之言：下元大慶，萬福俱會，齋時以至。恐汝饑虛，我此一器之中先盛上界太虛天厨，欲施汝等無上法食。汝當列坐，受我法食。是人諸人以次而坐，復思前施，及入太虛寶器之時，各更狐疑，互相謂言：向者施供及入寶器，是爲夢中，爲是覺時？寶器極小，若是覺時，不應得入；若是夢時，應無施心。又復寶器纔經一寸，一切天地並在其中。我等恍惚，未能辯了。

爾時衆中有一人王，名曰辦心，告諸人言：我等大衆未得真道，常如夢

行。法器大小，入與不入，施與不施，一種同夢。汝等勿言，但當思念。中時以至，天尊哀愍，施我等衆無上法食。須臾之頃，天尊即命七童使者駕六龍大車，載天寶器，以次施食，任諸大衆、仙人、兆人等而取多少食之。既飽隨意，懷藏器中，天厨都不減少。諸人食之，五藏花敷，腸胃盈滿，耳目聰察，關節調理，衆病永滅，六識開張，思惟道恩，得六通慧，反照前後，九萬大劫所經業緣，皆如指掌，方悟前心定如夢幻。爾時辦心與諸大衆禮拜天尊而作是言：不審天厨亦有盡不？

天尊告言：虛空若盡，天厨乃盡。是故大道有無盡藏而給衆生。辦心又問：食此天厨，果報云何？

天尊告言：食天厨者，壽命無盡，形同太虛。

爾時天尊即命中真傾此寶器，散於天厨，着空虛中，所拂草木皆成花實，日華月液變成甘露。汎空中者化成真光和氣，萬劫之後，若有道德天子及諸學人飲我甘露，餐我和氣，凡百人

民食我果實，隨其根性，皆獲利益。

爾時會中睹此殊妙，不可思議，合衆上啓天尊而作是言：無上大道至法微妙，神力無比，而此大衆已蒙天尊慈悲之澤，不揆塵穢，欲從天尊暫陪霄駕，遊於上界，以申禮願，所希便足。不審天尊大慈之心願見聽許？天尊告言：汝等大衆法食之後，心中何如？時會大衆各各答言：法食之後，萬倍於前。

天尊又問：昔夢之心，存亡如何？答言：法食之後，夢想頓忘。天尊告言：汝等諸人欲見上界，各各復思，令汝自見。是時大衆復思良久。

天尊告言：思何所見？答言：都無所見。又問：思何所聞？答言：思無所聞。又問：汝心何所起？眼無所見。汝心何所滅？耳無所聞。答言：心無所起，眼無所見；心無所滅，耳無所聞。

天尊告言：無見之見，謂之正見；無聞之聞，謂之正聞。無上大道，法無起滅。無聞無見，無去無來，無身

無心，無光無相，形洞太虛。

天尊說此語已，攝諸大會入太虛寶器，擲着上方。是二寶器同時而上，到於太空大羅之中，如彈指頃。是時諸人各各皆見元氣之尊虛寥獨坐，在於玄虛，中出空洞自然靈章，亦無光相，窈冥寥寂。是時諸人各申禮願，叩頭良久，問訊天尊而作是言：不審天尊大聖虛寥獨絕，與世永隔，都泯聲譽，使下界凡夫翹誠渴仰，欲求多福，無處依歸。唯願天尊宣揚道化，救脫來生。又復叩頭良久，伏地不起。天尊不答。須臾之頃，空虛滅無，唯見天中汎然遊氣，如有如無，纔聞清天之上微有空洞靈音，俯聽則有，仰視則無，綿綿冥冥；諦聽或聞，其辭希微，不可得解。天尊又於會中舉大慈手，入於有頂，接取諸人還着會中。須臾之間，又環遶擲之，周旋十方微塵世界。一彈指頃，以周七帀，還到會中。諸人各自自知乘道神力，得見十方虛空道境。又從器中而出，了了分明，心中無惑，始知上界空無所有。

爾時天尊與諸來衆到十六日夜三更之初，攝取太虛天寶，及諸光氣、一切威儀俱入星宮。是時天下仙人、神人、靈人、人王、兆衆皆知天尊真化事畢，欲還上界，恐畏以後無處決疑，新入道人及諸來生欲建三元齋請，不明科法，不如今日上聖化度自在解脫。合衆苦請天尊教示後學，建福修功，必有成剋。

爾時天尊告諸人曰：三元大慶自是道法自然之良辰，衆真朝拜太極之吉日也，下仙凡人修身拔亡之要機也。此時詮簡功過，校定吉凶，上帝下觀，司非糾彈，地司上奏，水府錄簡，有功成真，過謫罪魂，冥司考罰，苦不能言。汝欲齋請，當依正法，三日三夜，燒香禮悔，精思念道，吟誦經戒，常存十念：一念道恩，二念經恩，三念師恩，四念天恩，五念父母恩，六念善神恩，七念施主恩，八念善友恩，九念過去恩，十念見在恩。天尊告言：若有善男女等，修此十念，生十善道。一善之中，十神扶衛，故名百神之身。人無十

念，名爲百惡。所謂百種善神翻賊其身。上士十念，身得真仙；中士十念，身得延壽；下士十念，身得長年。

天尊告言：三元齋請，隨時豐儉，要在聖盛潔內外合同。當此之日，諸天大聖皆悉下觀，善神監齋，在人左右，三日三夜，功過上聞。子當精進，殷勤勿怠。道在玄中，遙鑒子心。

### 三元寶經流通品第十一

爾時四天之下諸國天子前進作禮。辨心天子而作是言：不審天尊演說此經，當何名之？云何奉持？云何流布？云何供養？云何付囑？願爲分別，開示未聞。天尊告言：善男子，此經名《太上大道三元寶經》。如經奉持，廣宣流布四天之下，使不斷絕。此經所在之處，別笈盛貯，燒香供養，付囑有道國王、王子、大臣、學真道士，齋戒之處，爲人解說，開悟未聞。時會大衆聞天尊所說，燒香散花，讚歎圍繞，奉行教勅。是時天尊至五更之初，浮

空而去。是諸仙人徘徊雲路，戀慕霄駕，而作步虛曰：

飄飄上雲路，黯黯入長霄。星官日去遠，光陰劫數遙。仰聽金顏隱，傾想伫神猷。願得映霞軫，焚香稽首朝。玄風轉飛蓋，紫氣汎仙車。浮空不待駕，合景忽昇无。徘徊哀下界，顧盼愍羣諸。三元真化畢，翛然入大虛。萬氣浮空上，千光合太微。霄間望華蓋，虛裏盼霞衣。真儀入雲路，圓曜逐風飛。願得三元會，金容乘運歸。

爾時下界仙人及諸大衆作步虛已，翹仰雲路，傾盼神光，目送霞猷，拜辭真帝。須臾之頃，天垂紫雲，地起輕霧，煙霞交合，唯聞天樂漸漸高遠。時會大衆各還本土，依金口宣揚道化，流布寶經，齋講設會。四天之下，皆蒙玄祐，福德無盡。

### 太上大道玉清經卷之四

①敦煌本 P. 5207 於卷前有并列三行注：「皇極天尊說上元寶經左真玄會注筆」、「正一天尊說中元寶經中真洞虛注筆」、「衆妙天尊說下元寶經右真昌會注筆」。

### 太上大道玉清經卷之五

#### 八節品第十三

爾時西靈上仙與其侍從千二百人俱以虛皇三年八月二十六日晨朝之，時齊駕飛龍之輿，上登雲路，入玉清天中謁高真上帝大悲天尊，請受《八節真經》，並觀至聖威儀、上道所治中天福境微妙真化之事。心進天門，步虛雲庭，齊整威儀，一時稽首長跪而止。良久之間，仰瞻上方雲宮之中，見大悲真帝神儀澄湛，精彩遐邈，凝凝溶溶，處於天心，坐於雲光之中，猶如輕霄，澹於玄天，以浮雲之籠朝暉。日上靈眸，初月臨眉，紺髮凝煙，丹唇吐霞。首巾萬變之金精，身佩億轉之瓊羅。手飛承天，足蹈招搖，恍惚希微，虛寥宵冥。道適長存，理契無生。真通精應，妙感神情。不隱不彰，不濁不清；如有如無，如晦如明。俯同有識，昇入無形。閑居綿邈，虛演真經。窈窕神唱，無聲

而聲。真儀不動，運化無停。手迴八氣，足轉七經。合會有生，覆載無功，陰德無稱，焉能強名？道光無限，玄源不測。心居何有，形遊絕域，泯然黯忽，寥廓常冲。混同先後，不必居中。無起無滅，無始無終。真宰挾侍，神人有群。瓊鐘鼓節，金鑪颺氛，甘露流津，靈氣凝雲，真光徹照，香風洞薰，皓元蒼黃，胚胎不分。難得名言，斯皆自然。爾時諸仙仰瞻真帝，心無疲倦，嗒喪其刑，都忘威德。始欲無言，未通玄默，道數不窮，誠希有剋。須臾之頃，重復再拜，心欲有陳，懼不能宣，敢冒威神，惟思道恩。

爾時真帝愍其戰慄，乃命左侍上真呼語仙人曰：子等是三天上仙，幸因宿慶，身入道流，已登不退，猶應進修無上祕要，爲世救燔，無瞬息寧。來此何緣，默而不言？我等大聖，雖至極至尊，不忘大悲，動息六虛，心遊萬機，有志必感，誠無所違。爾時仙人長跪而言：小兆不揆，竊好真仙，形弊骨葦，至塵至穢。特以天慈普被滋潤，無

疆零落，反榮枯朽，沾洽金符，育骨玉字。生尸沐玄源之浩津，酌洞清之流澤。竊聞道窮則反，物極有歸。塵穢之徒恒復思本，數千萬劫念睹高尊。恐習氣未消，不敢輕觸。躊躇之間，已經億劫。不期乘機遇運，肘步天庭，遭遇天尊，以申翹想。久欲諮啓，未敢陳辭。仰睹真威，恍然自失，五情無主，口不能宣。特以慈尊沉愛情深，賜垂提飾，借以威光，令得有言。敢騰力款，申此微心。

爾時左真奉天尊教勅，宣揚道化，爲諸後學決斷衆疑。而告仙人曰：汝欲何願，恣女所陳。仙人闔衆歡喜，禮謝真人，而作是言：雖道在人，亦非以輕生重法。億劫勤苦，履峰蹈險，經水過火，不憚艱危，遂感高真念此無知，出靈文以見授。真氣布無涯之澤，大道降陰生之符。反已逝之危魂，榮已凋之朽質。上愧日新之道，而下元日新之德。數千萬劫，環轉三天。不期乘運上昇，塵穢玉清之境。遠披六霧，洞出八天。裂三界之羅，登七覺之位。

雖有養道微功，未能泯無形之地。今日有幸，得入太玄無生之生，生道固矣。所翹所望，於此頓足。直以有心，欲聞八節真要。修齋立功，求福謝愆，拔悲苦願，生死開泰，昇入道源。

爾時真人聞上仙之辭，愕然而言；子在三天之中，何得聞八節真要？此乃是太極生神寶章之首篇也。天帝所祕，上真所修，傳之於口，不見其文。法授當來成真之人。子從何緣而得聞之？

爾時仙人頓首而言：小兆去聖遐遼，真文隱絕，特以言龍初會九真大集，朝慶太一虛無天尊。爾時大聖出法度真，聞唱篇目，不睹其文。中心憶持，未曾捨離。輕陳渴仰，干忤天心，賜以大慈，願垂愷悌。真人告曰：子有真相，得聞至法。是子運會應合成真。傳吾寶經，當得其人。違科輕泄，退真無道。

爾時上仙拜諾真人，奉遵教勅，不敢泄慢。是時真人即命金童焚天寶名香，啓金臺寶藏，開笈發蘊，出《八節寶

經》一篇著碧案之上，正當天尊之前。是時仙人一時作禮，頓首良久，不敢陳辭。天尊以知其意，俯而愍之，即命真人捧此寶經以授仙人。受已，復禮天尊。真人告曰：此經是上道之寶文。大悲天尊昔聚雲氣以成其文，令諸真人仰而則之。此文大道真氣化成雲篆，氣布已後，靈章復虛。子欲寫之，刻玉爲簡，紫金爲字。寫之了日，當還付我。真人又曰：汝等仙人且舍靈宮西臺摹寫真文。此舍自有天厨，供給學人。亦有丹臺瑶林，恣汝遊息。是諸仙人歡喜受諾，往舍西臺刻玉鏤金，摹寫靈文。大悲天尊《八節寶經》曰：立春之日，溫氣始生。雲宮開東北之門，三司進朝，以定善惡。春分之日，和氣始成。雲宮開正東之門，三司進朝，以定善惡。立夏之日，暄氣始生。雲宮開東南之門，三司進朝，以定善惡。夏至之日，炎氣始成。雲宮開正南之門，三司進朝，以定善惡。立秋之日，清氣始生。雲宮開西南之門，三司進朝，以定善惡。秋分之日，涼氣始成。

雲宮開正西之門，百神俱朝，議定罪福生死簿錄。功過進退，纖塵顯露。衆真大鏤，百神受事，功過毫分，無不上達。立冬之息，嚴氣始生。雲宮開西北之門，三司進朝，以定善惡。冬至之日，凝氣始成。雲宮開正北之門，三司進朝，以定善惡。天尊告當來學真之士：修吾八節之道，立功修行，身不履非，志不邪遊。常當齋戒，以求昇度。嚴其始終，供贍所須。丹志勤勤，恒始救燔；拳拳不怠，動息無忘。常思師道，如在目前。孤身幽林，永絕人事。六時禮願，以求密契。綿綿微微，不興不廢。功滿行成，與真俱會。未至節一日，行道禮願，隨心所陳，氣合香煙。六時上聞，動止合儀。默坐精思，三日三夜，騰九祖之宿躉，謝一身之極過。上爲天子，次及兆民。奉道之門，施力救功，供給齋厨，同爲啓陳。當此之日，誠無不達，道無不聞。懷道之士勤而行之。上士長齋，不獨此時，恒祈昇度，心無暫休；形絕外遊，志不邪求。營生得生，當復何憂？於是大悲天尊

演《琴心上經》，其文曰：

回首仰圓羅，合景挹靈芒。拘魂制七魄，思審定中方。行住禮虛無，寢息宴玄房。饑餐黃壁花，渴飲瓊根漿。神旌命大魔，合體鍊真光。復照觀太無，恒在空中遊。圓通民波際，真化靡中期。宵眇無終始，行者當明知。寂寥忘理教，應運闡弘規。降道不自昭，要當先所施。會歸無二處，隨心自合離。

大悲天尊曰：後世合真之人得吾此文，調虛琴而行之，恒立青蓋之下，駕雙白虎，挾二赤龍。塵劫未始，聖不知終。一十八年，剋見太平。真道之原，慎勿妄宣，七祖受考，身不得僊，億劫絕望，與道無緣。爾時仙人刻玉文訖，送經奉還真人，并見新文以簡天尊。天尊告曰：上道寶經七百年中許傳三人。世無其人，韜之玉笈，禁不妄宣。是時仙人頓首禮謝：小兆有幸，得叨祕法。特蒙慈尊，弘愍之至，內懷喜慶，誠不自申。又復頓首。天尊告曰：子得寶經，真道畢矣。勤而行之，

當應自知。天尊又曰：子且遊觀玉清道境。待秋分之後，復歸下界。爾時仙人奉天尊教勅，歡喜禮謝，次禮真人。

真人告曰：子奉恩遊觀，此有常法。我玉清天尊有真光之車，以給仙真遊行十方。乘此車者，微塵世界一瞬已周。是時仙人既受教已，齊駕真光之車，如一瞬頃，以至玉清天西南方太空之中，不測邊際。至二十八日秋分之節晨朝之時，忽見諸天真仙億萬衆從雲宮西門而入，陳列天儀，施張供具，遍滿玄中，燒香散花，作天妓樂，歌頌讚歎，朝謁天尊，三日三夜。三司校錄生死罪福，諸得度者名編青簡，天降雲車，浮空上升，骨肉俱飛，永爲真仙；罪過塵積，注名黑簿，減年奪筭，沉尸九幽，罪魂受對，萬劫無原。

爾時三司之官各奏其音，昇降相背，哀樂不同，天官之司奏和雅調暢之音，地官之司奏宮夷之音，水官之司奏悲魂長夜之音。凋風折金石之聲，嚴氣動風雨之鳴。此乃天地自然之音，



常會吉凶之際。衆音雖繁，而我大道天尊未曾聞之，夷心在玄，泯然不覺。三司塵穢不關耳目，每所感授，默與無言，暗達彼心，量任其宜，生成無功，陰德不差。適諸有生，日用無知，大道雖高，鑑之甚卑。大道凝然，機中則施。不去不來，不踏不馳，不亡不存，不合不離，不虛不滿，動用無訾。吾辰敷華，雙景曜芒。循環紫戶，寢宴金房。六氣下流，三元上騰。不疾不遲，不減不增，自然而明。去死納生，不爲而爲，不行而行。真神不動，化合萬并。真神元心，應化元情。能卷能舒，能晦能明。不二不中，不隨不迎，不興不廢，不死不生。不形而形，不名而名。處晦而明，處濁而清。不獨不羣，不混不并。綿漠希微，不順不違。往無所適，來無所歸，居無所止，動無所依。空步不移，坐應萬機。恍惚難尋，冥寂無違。輕我者衆，則我者稀。逐臭如塵，詎反靈機。朦朧愛覆，動用習疑，背道流亡，誰當復歸？險逕孤遊，惛惛可哀。汎川無反，何時逆來。三塗永

吟，九夜長哀，苦魂離散，衆怨兢裁。告汝來生，道如晨暉，德同下流，無日不新，無時不歸；下攝萬川，上總千機；照而不煩，瀋而能希；無情可鑑，無心可照；八爻空轉，虛迴七曜，自然經緯，生靈之要；微中又微，妙中又妙。告汝來生，行不乖常，動不離無。常能不傾，無能深根；常無不適，無無不生。不動而適，不勞而生。適無不遍，生無不周；遍而不廢，周而不休。其形如雲，其氣如流，流極還來，雲低必浮，來而能有，浮而能虛。告汝來生，勿用其明；明極則暗，暗極還明。常能守暗，身恒太平，辟却三灾，銷滅五兵，十惡不來，六賊不行，郊境無陣，城邑不驚，百實成熟，花樹敷榮，風雨調適，萬物自生。告汝來生，去情離欲，餐元服一，抱道懷德；招集善友，驅遣陰賊。以威自儀，以戒自勒。嗜味損己，貪媯自剋，所願無成，所求不得。殺盜資身，橫行威福，勿恤下賤，行害施割，呵天罵地，奔馳惻怛，五神內戰，怨憎外結，陽氣蓄泄，陰經天闕，

狹邪作道，不得其末。子當慎之，勿得輕泄。勿將死尸佩吾生文，莫將毒志懷吾寶經，莫將邪聲吟吾正真，莫將陰賊入吾道場，莫懷媯想強行吾道，莫將敗壞之身以求全生之道，莫將十惡之身破毀十善之道。莫以五逆之劍自割，破其五藏；莫以惡眼而視善人，莫以亂意入吾定門，莫以六塞之身求吾六通，莫以沉濁之身仰吾森軀，莫以臭爛之身洿吾道場，莫以淫母害父之心亂吾法。衆善男子，入吾道場，纔起一念，機雖未發，罪目已構；況身親任，萬福捨離，百禍叢聚，生死重罪，報對不休。善男子，行吾道者，戒慎虛無，不欺太空，與道爲儔。依吾戒者，真道易求；背吾戒者，生死長憂。可不慎之，可不慎之！

爾時天尊重告仙人言：夫朝禮之法，不獨八節之日。月一日、八日、十四日、十五日、十八日、二十三日、二十四日、二十八日、二十九日、三十日，當此之日，修身謝過，大道遙鑑，如對目前。諸學道人初中後心平等不異，求

福無厭，修身不倦。善男女等，專志守一，能得吾道；虛襟任真，能成吾道；慈悲忍辱，精進不懈，能周吾道。神人爲儔，衆靈給使。子若反是，空喪一生。語諸來生，孰思吾言。爾時諸仙奉天尊嚴誡，歡喜頓首，所望便足。不敢有言，恐多洩贖，默然伏受天尊明勅。爾時天尊又告仙人曰：玉清道境，自然無學，故曰虛無自然。元始天尊非學所成。我以大悲，授子真道。子歸下界，寶而行之。從今已後，九萬大劫，金闕後聖下臨四天，處於神州。當爾之時，上界諸真及十方天尊、上僊法應同時下遊。當此之時，自應見我。此中事畢，子可復歸下界，諸後學成道，治不在此，暫得彼往求法決疑。爾時仙人奉天尊勅，各各焚香，頓首辭別上界姦軻，復歸下天。

爾時仙人前後請法，經遊三萬六千天門，謁三萬六千祕法。位雖居下仙，行同上真，心眼明了，洞曉三世，無復遺餘。以是因緣，爲得天尊真言道要，修行不日而得，洞達後世。男女好

道之子不遇明師，心多質疑，又不堅固。歲月已往，身又朽邁，皮肉焦枯，髓腦肉竭。雖有耳目，其實聾盲。又多縛著，耽吝窟宅，衆緣相續，不能割捨。如繩繫鳥，萬慮窮盡，唯貪資養，所求無足，百病已生，無方療治，漸就增劇。須臾之頃，死時將至。傾城贖命，終無得法。臨決之際，悔不行善。餘氣之言，欲將何及？善男女等，我每悲愍一切羣生，雖知飲食，稀別五味，雖知資生，稀能養道。死於利害，敗於聲色。馳騁狼藉，委頓困苦。怨憎鬪競，自爲冤讎。煙散灰滅，命盡之後，冤魂罪鬼紛紜爭訟，報對不絕。復注生人，爲不善業，遂至如此。不從道誠，不信罪福，輕慢至聖，毀謗善人，殺害無辜，偷竊劫盜，欺凌老病，侵損孤弱，自恃威勢，恣行刑罰。如此之人，氣未盡時，已受冥考，功過輕重，纖塵不遺。語諸來生，安詳寶經，勤修戒行，無令缺犯。大道玄鑑，幽明合符，臨危獲安，始驗威神。

爾時仙人復歸下天西靈寶宮，與

諸天大衆神光遠映，萬倍於前。三天仙人來相問訊，歎此稀有，目未曾睹。懸知優劣，道德不同，各各作禮，願聞道要。

爾時西靈上仙語諸仙人言：道雖無心，可以情求。違逆似忤，從善如流。我遊諸天，無方不周，備蒙真帝哀我勤求，授我至要，戒我精修，逆爲來生說戒威儀。又紀九萬大劫之後，金闕帝君下臨神州，上天真宰同此而遊。道法大度，子當何憂？

爾時禹餘天中諸大仙人八十萬億聞西靈上仙下歸三天西靈宮中，與諸大衆俱來問訊，燔香散花，鼓衆妓樂，步虛玄中，圍繞上仙，稽首作禮，而問起居：行道有勞，遠適萬天。神光映朗，億倍於前。大道既弘，普爲衆緣。伏願仙尊慈愍哀憐，流通道化，宣示未聞。

上仙答言：我奉上玄玉清天中大悲天尊賜我至戒，科禁嚴明。大道祕要不許妄宣。子但有心，即須精思。九萬劫後，金闕天尊下降神州。當此

之時，諸天大聖同時而來，道法大度，廣濟天人，億紀勸誡，爲諸來生。當此之時，與子同遊。

爾時衆中有一下仙，名曰融真，成道以來，始經六年，未達三世，猶在學地。心疑九萬大劫日月悠長，復疑下仙之壽不至此時。前進作禮，未及陳辭。

上仙已知其意，即告之言：善男子，我知汝心狐疑劫數及以仙壽。善男子，汝今當知，下界凡夫學成道者，名曰後聖，一入仙位，永無退轉。我生西靈寶宮，近始如昨，已九萬億大劫，上聖觀之，謂如瞬頃，九萬大劫，須臾之間。汝得道成仙，始經六年，猶如赤子，但知求乳，未有他慧，欲於劫壽心生疑惑。愍汝嬰童，不達至道，朦朧淺智，輕陳短見。善男子，無上大道玄源洞清，深不可測，太玄太虛，不可度量，自然至真，無始無終。後聖亦爾，不知下界塵臭邪俗，修習外法，八萬劫壽後還退墮。此名外道魔俗之法，不出三界，不得六通，不達三世，不離生死，微

間小伎，即號大仙。譬如下世凡夫名曰金剛，愚人聞之，便謂此人堅固勇健，身無毀滅。智者明了，知非堅固，假名金剛，須臾變滅。邪俗亦爾，竊此仙號，飾彼行尸。亦如下界庸夫，竊號天人；如彼塵穢邪俗，自名大仙。智者明知，邪正相反，壽夭相絕，八萬大劫同於瞬頃。譬如電菌，一時之壽。

下界塵滓多自名仙，聞無上道中仙之名長存不滅，耳目不睹，便謂正道，同彼妖邪，書記傳說，惑亂行尸。弱喪聞之，心生邪僻。自欺冥福，招求罪罰，億劫漂流，生死背道，修習邪法，叫呼求滅，螻積蟻聚，塵飛霧委，種種苦行，不能得道，皆由失正，元用邪僻。厭惡身命，猶如涕唾，速求變滅。不知此身而爲法身，遑遑外索，棄捨內法，多習邪書，毀謗大道，棄本逐末。如此之邪，出於邊戎，神州所無。汝今云何於正道中而生邪念？善男子，人修內法而得道者，不論前後大小階級，但至仙位，即能長存，自在無礙。不似下世邪俗之法，以灰形爲得道，以朽爛爲證

果，此名外道，生死之中而不自在。障邪偽，息世譏嫌，藏姦匿詐，招集童蒙，假託光怪，誘導一切，勤求世信，志窺財色，行不正軌，衣食不義，貪養陰賊，常思損物，資益行尸，藏護三毒，蠱敗善根，殺生求生，無功補過。或不遵師匠，竊服良藥，盜修小法，微得利己，便稱道極。此名暗去夜來，無明增長。外道邪俗，竊號仙名，誠非虛白守一之道，非爲自然虛無之道，非爲慈尊忍辱之道，非爲六度六通之道，非爲元始無上大道，非爲自在解脫之道，非爲長生不死之道。善男子，汝若聞有雜法，言離大道，即是邪法，不免生老病死、饑寒困苦。善男子，汝於大道，心莫狐疑。汝師爲誰，修習何法，志度狹劣，都無道氣，云何化世，證他福田，濟拔生死？善男子，汝雖得不退，飛行自在，無我大聖，未可全同。法當進修，心勿止足。道數足日，身心大通，三世之事，猶如指掌。九萬大劫，未方一瞬息，而我大道以百億大地微塵劫數爲一瞬息。何有疑惑？

爾時仙人融真頓首禮謝：小兆不達，塵黷天庭。昔來餘慶，幸遇天真，下觀六合，哀以翹誠，見授陰生靈符，修之得命，運睹今日，實所未達無上道法。願哀蒙昧，賜以未聞。

上仙告曰：我識汝心，知汝所師，見汝修學，一時告汝，不得不爾。須臾之頃，下界三十七天諸仙人等、無數億萬，俱如十月二十日上會立冬朝慶西靈之真，各焚名香，騰試上天，遙禮大帝虛皇天尊，三司校錄，水府上聞，三十七天各陳天儀，張設供具，遙獻上帝無極大道，三日三夜，旋空步虛。地祇作樂，以樂仙真。五魔長謠，願化歸玄。列子調風，雲將收煙。天花迴空，香霧散虛。左右仙童，吟誦靈書。須臾之頃，八氣溫舒，明霞飛度，雲庭洞曉，天開玄路。睹太虛之無涯，見元和之廣布。三一尊神、萬氣道君，澄漠似淵，容與如雲，權實不異，乍合作分。於是一時居中俠侍合形歸無，上升仙居，下遊金城，灌漱瓊津，呼吸紫雲，吐納雲芒，形隨日新，塵劫歸嬰。不去不

來，不滅不生，恍惚希微，難可備名。玄道無心，會於能行。一時高位，塵劫長寧。傾天背道，吾所未聞。爾時大常虛皇天尊遙放真光，洞於萬天，溫沃幽顯，灌沐慘舒，流潤乾焦，淘汰垢穢，開決聾盲，補諸不足，養生愈疾，制御萬魔，銷滅災氣，十方世界，無不蒙益。生死開泰，人神喜慶。當此之時，巍巍難思，一彈指頃，福慧周普。大道威神，不可思議，不可思量，不可名言。

爾時大衆遙心注念，皆願道業普得成就，升入太空，親侍天尊；願玄門廣闢，濟度無窮；願五苦罷對，三塗赦魂；願邊土有生，悉皆行道；願積痼痼疾，咸悉痊除；願有情無情皆不傷夭。爾時大衆發此七願，七覺道圓，七氣天君歡喜讚善。是時七色慶雲翻然下流，彌覆衆會；七色香光明太玄，七變天樂和攝七神。七真空生，隨氣成形。是時衆仙朝慶事畢，光音寂響。至二十四日晨朝之時，遙禮上方，拜辭真帝，浮空而下。是時西靈上仙當此之時，即入凝神大定，身心不動，真光

湛然，自如懸月，經九大劫凝而不瞬。

#### 齋戒品第十四

爾時棄賢世界皇氏之家積修十善，無橫罰害，常持齋戒，立靖供養。三元八節，焚香禮虛；十直吉日，朝慶悔過。專志大道，誠無諂求。家贍資財，又多僮僕，常於四衢給濟窮乏，舍諸行旅，施散廣大。每以冬天露積原野，濟惠鳥獸，憐哀貧病、老幼、孤弱，供給所須，令無闕少。齋講設會，心無厭倦。長者有妻，其姓豐氏，忽然中時於家睡卧，夢見明璣，自天而下，入其懷中。又見日光照曜其身，須臾睡覺，便覺有娠。自此已後，心意怡悅，顏色鮮盛，行步輕便，氣力倍常。足經十月，以四月八日登臺遊觀，忽以中時見有紫雲，去地百丈。東南而行，聞紫雲之中有人言曰：上仙童子，何不出來。夫人仰聽，聞有天樂在紫雲中。須臾之間，香光滿臺，薰人鼻根，心意泰然，便覺嬰兒從左腋而出。心知非凡，即

命侍女下報長者。俄頃之間，龍王吐水，灌灑嬰兒，天雨寶花，以爲敷席。長者來見，知其神異，即於臺中養育此兒，字曰仙童。常有紫雲蓋於頭上，口氣芳香，紺髮紫容。年至三歲，紅爪貝齒，目有雙瞳，垂手過膝，音響如鐘。虎視龍步，舉動鳳翔，所蹈無跡，頂出紫光。年至五歲，日誦萬言。凡是經書，悉皆洞達。俯仰合度，進止儀容。其辯懸河，其德猶龍。幽通至極，舉世無雙。孝養父母。常於膝下吟誦真經，中究大義。下明地理，無伎不知。年至七歲，遊皆有方，言隱事微，聲翼遠方。德彰世表，名徹天王，聘爲國師，辭不應命。專心孝養，奉事父母，恒如敬天，瞻仰顏色，四時溫清，無瞬差違。每得美食，口不先嘗，隨時奉新，必獻一親。父母漸老，年過百歲，衰病相侵。仙童晨夕侍疾，勤苦三年。上天愍其丹誠，諸天善神下遊其家。地藏出穀，以充供食。大醫真王改容同凡，下爲療疾，重得平復，年壽一百三十歲而終於堂。雖有慧心，無正修

守，不能即身而成道真。

是時仙童號咷切怛，悲慟哽咽，絕而復蘇，遍體傷毀。涕淚流血，哀動天地。飛鳥墮落，衆獸不乳，苦霧屯擁，淒露鬱凝，地祇鳴鼓，山嶽助哀。國王聞之，束帛贈祭；四遠人民皆悉顛頓，遠近馳赴。衆鳥銜土，爲其域墳。仙童伏塚三年，營植嘉樹，連廕接野。衆鳥翔集，晨夕悲鳴。三年已後，仙童還家，以二親生資供贍功德，所居宅舍施作道場，香油燈燭，幡花供養，常自灑掃，修父母生時十善之業，齋講設會，濟惠窮乏。常於夢中見其父母語仙童曰：我生世之日，雖修十善，濟給窮厄，無正所修，身命不固，輪轉受報，出生富貴，今在鬼道。承昔善業，不被拘繫。雖無罪對，猶負九祖餘孽，停滯太陰，未度南宮。汝前後所營齋供，雖伸薦拔，未真感通。汝當爲我如法建齋，薦拔九祖。

爾時玉清天尊遙感其意，即令上真定光將諸侍從一十四人下降地中五臺之陽，託作寒栖大師，時出行世，應赴齋戒，救世危難。爾時仙童遙聞大師寒栖五臺之中，知是真仙大士，匍匐往請，還家供養。爾時仙童到五臺之陽，雲昏霧合，草樹蒙籠，猛獸踞道，而不得前。

爾時仙童倚崖歎息，而語猛獸曰：我是棄賢世界皇氏之子，家修十善，信用大道，久絕伐害。與汝無怨。我爲二親棄世歸泉，追思不已，欲建功德。世無真師，遙聞此山有寒栖仙士，深達至理，曉明齋戒，故我遠來，欲請大師還舍供養。願汝闢道，令我得度。

爾時猛獸聞仙童之言，褰牙據爪，努目舐脣，騰伏哮吼，轉劇於前。爾時仙童思惟良久，而自念言：計我生身，不覺有過，始欲排進，猛獸忽能噉我。終不忘孝，建福不就，忍不突進，不見大師，又非孝也。拭淚而言：大道有靈，願見遙祐。天神、地祇願哀念我，猛獸開道，得見大師，成就功德，遂我

孝心。泣淚良久，忽聞雲霧之中有人言曰：善男子，來特爲此事，復有餘緣。仙童答曰：豈敢餘緣，遊涉名山。地神愍仙童之心，而復告仙童曰：子父母在世，惠及昆蟲，天上地下，莫不稱歎。子爲大事，遠見真師。我不敢障，但以大師降此未久，我等山神瞻仰未足，未有供養。以此因緣，故令猛獸遏斷道路。汝是十善之子，百福扶持。我雖山神，願與善子俱得聞法。仙童答言：善知識者，不必一類，幽顯交歸，人神不隔，內外相持，善功乃就。山神攝除惡獸，神乃露形，與仙童交言。言訖導途，仙童隨之，猛獸俠從，上至半山，見寒栖大師居在絕巖之下，碧玉爲居，黃金爲床，龍虎列侍，神人在傍，紫雲凝蓋，盤螭承爐，金真秉節，玉童焚香。

爾時仙童拜伏而起，頓首而言：弟子受生不幸，禍不滅身，心無孝養，天喪二親。上下無依，唯憑道真。俗纏多累，生死因緣，荼毒崩心，痛不能言。欲營齋請，以拔罪根。伏承大師

慈悲赴緣。敢欲奉屈，爲證福田。言畢叩頭，希聞報言。真人告曰：子二親在生，恒修十善，濟惠窮乏，救活昆蟲，名動上天，功聞帝庭。天尊命我下來。我是雲宮中真，受事天尊。以是因緣，下降此山。子是神童，生十善門，示有孝養，軌範世間，暫託凡胞，不久應仙。昔呼子時，還是我身，暫遊下世，或御流雲。

爾時仙童聞真人之言，朗然覺悟，悲喜交集。真人又曰：子欲建福修齋，不可輕陳，且先還家，盛潔道場。仙童頓首，叩頭啓曰：不審真君上天齋法，建立道場威儀所須，請示其目。真人告曰：天上請齋威儀不同，下界之法不得及此。仙童，汝先約勅僮僕效功之人，灰濯垢膩，熏沐五香；男女各居，穢氣不交；香泥塗地，盛灑床座，滌蕩敷具，汲盥器皿，皆度香水；厨爨清泔，不焚蛀薪；澡豆華水，處處置立黃壇之上，更加新土，蓋之令平。每使綿密，朱柱嚴整，燈燭炫晃，所作精妙，每令盡心。應市之物，不與爭

價。不用穢財以營齋戒，所謂敗生不義之物。身不慈善，不入道場，不臨齋厨。前後慎護，一七日中。齋日雖訖，心行平等，猶不非時而妄所食，況於履穢飲酒食肉，心遊邪肆，志不平等。身坐道場，情交塵濁，如此建齋，功不補過，徒費香煙，上帝不聞，愆過不解，罪魂不釋，百福不扶，災氣不滅，真道不降，邪精下應。

爾時山神、五嶽羣靈侍立真人，傍聞仙童欲請真人下臨舍宅，證成福田，皆願隨從天尊出遊人間。

爾時五臺山神前進作禮，上啓真人而作是言：此世界之中，唯有仙童十善之家與物無怨，天下人神皆樂聞見，悉願輔成就其善功。真人然之。

爾時仙童聞山神之言，即問諸神而作是言：無上大道，鄉里供養。不審神靈齋須何食？山神答曰：大道降世，五帝大魔及以地祇皆悉侍從，隨逐受事，乘道威神，都無所須。但願與汝作善知識，衛護道場。若有外道惡人邪心破亂，惱懷善人，誹謗嫉妬，諛

佞讒諂，我當滅之，令舌卷縮，呵唾其身，令成癩病；面有瘡疱，眉髮墮落。內外影響，名爲護法。我常助道，興顯正化，非今日也。

爾時仙童聞此語已，歡喜而歸，教令其家一依真人金口之敕。時諸六親聞仙童歸還，遽來問訊。是時仙童具向親表述此上事。諸人聞之，身雖坐馳，深思遠想，曉夕忘寐，皆願真道降臨其舍。各從仙童求乞教令。

爾時仙靈出見其目，是時諸人各各傳寫，教勅其家，傍示親族，咸悉依戒。各淨其家，隨其富貧，盡心供養，遙思遠念，如對目前。

爾時仙童裝校壇宇，一一事畢，復向山中迎請真人。諸人聞已，悉願隨往。是時有千二百人，其名日月愛長者、弘心長者、大權長者、德王長者、達命長者、心海長者，如是長者而爲大衆之所首領，各齎香花，隨逐仙童，北向五臺，一十二日到於山門，俱時焚香，遙禮山神。食頃之間，仰望山上，見師子、虎、狼、狹、侍道側，盤螭交結，三匝真

君。地祇作樂，仙卿焚香，仙童拜伏，問訊道君，上勞雲駕降此空山，下界衆生無可供養。

又復再拜，時六大長者仰睹真威，悉皆自失，五體戰動，喜懼交集，拜伏不暇，流汗負水，瞻仰金容，不覺忘言，誠惶誠恐，倚立不寧。

爾時山神而作是言：大士仙童，今得重來。六大老人並何色目，爲宿習善根，爲始知迴向？恐心無貞操，志不殊堅，來此何緣？況心未冥真，體猶凡濁，污我名跡，不宜尸臭，以見真君。我雖名山之靈，身無濁穢，受形已定，雖不任道，常爲真君而作外護，不欲濁惡，以此忤真。仙童答曰：此六老人是我法親，聞我請道，心助懽喜。雖非十善，亦無重罪；身雖俗士，亦有好心。聞有真道，目不曾睹，遙思遠念，誠在可哀。山神聞仙童之言，復語老公曰：子審如仙童之言，安定身心，不須震懾。思惟正法，依教修行。時諸長者作禮而退。

太上大道玉清經卷之五

## 太上大道玉清經卷之六

### 昭靈品第十五

爾時南昌宮中上仙，名曰昭靈，與其侍從萬五千人俱皆是言龍初會凡身受度，修道成聖，具慈悲力，身得六通，能遊無間，壽命已定，如鍊真金，無有變易；昇自在，智慧廣大，不可度量；身心無礙，猶如虛空。以七月十五日上登太霄，昇入玉清天中，朝謁天尊於雲宮之中，頓首道前，問訊起居而作是言：兆以塵濁穢賤，濫當開度。昔蒙大道，慈流非分，援擢錫以壽命，叨佩至法。自此已後，依戒修行，果所希望，理應晨夕侍衛天尊，常當受事。特爲下界凡夫形骸暉臭；又爲天路遙長，非凡所登，誠違起居。每以翹想青雲之上，欽慈紫闕之下，徒以人微道淺，致乖心願。鬱悒之情，歷劫纏懷，不任戀慕之誠。仰披雲霧，上冒威嚴，得睹尊顏，以申虔拜。言畢頓首，喜不

自勝。

天尊愍之而告仙人曰：生化之道，理合自然。我亦未曾故有所施，亦無情而鼓物，焉能生汝？善男子，如人愛滅，道亦無心逆其情而生之；汝心好生，道亦無心違汝情而滅之。若以萬物之情，極昇沉之願者，於際會之間，自然而辦。道處玄極之際，故能順物如流，生之與滅，道不能違也。生而不滅，吾道無心而能滅之；滅而不生，道亦無心而能生之。汝今得生，由汝願力，道無心而生之。心有背向，各尚其志，雖有道力，不能先之。汝願學道之初，元由汝心，自因自果，不我知也。所謂自然之道，冥自然之心耳。是時諸仙人聞天尊之言，不敢辭對。天尊又曰：天路遙長，汝來何為？仙人答曰：故申對謝，欲觀上道微妙至法。天尊告曰：上道混化，塵沙不辨，如胚胎之未分，似混沌之無元；棄賢去智，不晦不明，溟滓無際，焉能有妙與汝觀之？無上大道，若變化一事，若起滅一事，若受一事，若持一事，若居

一事，若舉一事，若顯一事，與衆觀之，與人疑之，無有是處。無上大道亦無微妙，冥冥空寂，自覺覺他，無心觀察，無心分別，此之與彼，況能有妙與汝觀之。無色無相，猶如虛空，無有內外。善男子，汝欲觀者，可往雲宮東北方，去此方有大地微塵里數。太虛之中有三上真在彼空中修無上道，今入凝神大定，于今已經九億大劫。次應入忘形大定八億大劫。次應入六虛大定七億大劫。次應入無礙大定六億大劫。次應入太虛大定五億大劫。次應入洞惠百萬大劫。次應入生惠十萬大劫。當來應下，觀三十七天。次遊凡境。俱號後聖太平天尊。將諸侍從億億萬衆說無爲法而度衆生，此時成道，數如塵沙。汝欲觀者，觀此天尊微妙之法。

爾時仙人聞天尊教示，歡喜拜伏，奉辭天尊。時諸仙人齊駕慶雲，浮空而去。倏欵之間，已到太虛，遙見三真在於空中，窈靄溟漠，依稀紫雲之內，霏微於明霞之上。丹霄結緯，黃精爲床，三氣凝液，二景銜芒，太虛爲牖，虛境爲窗。胚胎未始，混沌初元，服氣藏真，寥寂無言，沖虛絕象。萬化未根，空湛靈軀。五花潛敷，三宮育真，六府凝神，三魂不浮，七魄不遊，神情不動，真氣不流，恬淡澄淳，無所經求。爾時仙人睹此微妙，齊下慶雲，膝步輕雲，汎虛而往，空陳所因，匍匐飲氣，不敢有言。虛跪玄中，不知劫數。注心觀妙，不覺有身。倏欵之間，不見三真，霞帳所明，不測所之。良久之間，欵亡空帳，唯存光炁，臃臃而然。又良久之間，忽見三真出虛入無，或亡或存，呼吸風雲，乍合乍分。良久之間，冥然絕影，合氣都亡。復經良久，靈風八震，神氣四衝，吹噓交扇，顯晦不恒。又良久之間，不動而生，不營而成。三晨坦察，萬化潛萌。兆靈根於紫精，散靈魄於雲房，動空塵於無境，流元和於皓蒼，噓萬氣於叢生，布真精於萬萌，垂神足於靈綱，閉握固於初嬰。出六虛而無辦，爲衆有而窺窗。不沉不浮，處空而停；不動不寂，履化而經。無形之形，無生之生。處幽而孚，處昏而



明。反觀復照，妙體無形。常住不變，焉能所更。心冥不動，假寓無驚。不宰不割，不教不令，不智不愚，不令不行。夷然用道，無情交競，捐機釋垢，虚心自鏡。塞穴窒隙，收視反聽，影響雖繁，端心無異。冥乎太空，形無死地。

爾時仙人睹此神化，五情自失。雖經劫數，冥然不覺。忽見真人入於生惠，始悟風雲改變，萬物動生。是時仙人但於空中頓首，霄間行願，雖承道力，喜懼不敢自寧。

爾時三真愍諸仙人，知其來意，乃震希聲而語仙人曰：子來何爲，艱辛雲路？吾與子同稟一道，外何所觀？爾時仙人不敢陳辭，但求哀愍，賜垂開度。

是時太平道君告仙人曰：子何不任神氣於忽恍之間，委自然於有無之際，隨會合離，縱運推移。欸恍浮虛，體不常居。存於無形，銷聲滌慮，曠若長虛，冥神無處，鑑虛映空，服氣藏真。混紫精之靈根，晦凝魄於雲房，泯輕塵

於太始，息元和於昊穹。任物自生，從真晦明。輕少雲崖之端，能不動而常行，宅中虛而已立，恒如嬰兒之未嬰。不聽不窺，隨之有情。不釋不取，不滿不空，泯而無際，是謂玄同。爾時仙人虛聞真君之言，微聲一諾，響未卒聞，仰視真人已昇虛極。追從不及，欲啓不聞，形入太無，氣泯浮雲。思心欽戀，願欲侍從，丹誠僅半，欸而告言：我絕待無繫，云何自滯？子未都忘，乘雲御氣。

是時仙人纔欲有言，以見太真御空而邁，速逾奔星，迅過電掣。爾時仙人思惟良久，忽見真君金容在玄，應周色象，汎汎而然，若遊氣之在虛，不可視聽，知其神化微妙之事。

爾時仙人與其侍從住於虛中，但以思念太平天尊所作神變，虛心上翫，欲知真要，願從天尊遊於下界。心心願念，志不暫移。天尊愍之，乃於玄中而告仙人曰：無上大道法皆自然，神力變化，雖能隨心，而心未曾勞；雖復隨身，身亦不作。所謂無爲而爲，無作

而作。無作而作，無所不作；無爲而爲，無所不爲。若有爲而爲，爲而不周；有作而作，作而不普。不役於心，不勞於身，心不煩而能靈，身不勞而能生。生靈合并，無種不成。所謂不作而成，不爲自生。道常無爲，無所不爲。混元根本，理盡於斯。善男子，我亦無心而爲此神變，推運降合，和生氣，爲諸來生而作法門，不得不爾。汝今當知無上大道，而爲諸塵，經於心口。慈悲之道，法應如此。亦如汝等昔在塵中，而遇大道，廣作津濟，亭毒含弘，濟度枯朽。此亦大道而施慈母之恩也。懷抱養育，飲食覆護，種種教招，雖不爲勞，亦經於心。天道至大，應之甚微，亦無感而不動，未聞求而有違。大道如海，衆流所歸；大道如天，群物所依。善男子，我不游之日，近無多時，數萬劫間瞬速已至。剋此已前，應上大羅之上朝謁元尊。次往諸天遍啓群真。汝等雖是上仙，周遊之法未至極天。汝且還南昌宮中，十萬劫後，我當下過南昌之中，自應見汝。爾時

上仙受大平天尊教敕，拜辭而去，歸南昌宮。

爾時天尊亦以浮生，上昇大羅，朝謁元尊，默而無言，俱以神交。又昇大羅之上，朝謁虛無天尊，亦皆無言。太上冥寂，道境默然而止，不謁不言。又入太虛道境，都無所見，太平天尊亦皆無形。久如三劫，微以遊氣汎然而下。如是三尊昇上一萬二千天中，冥然無形。次入中一萬二千天，有形無言。次入下一萬二千天，始有言說。

天尊後至玉清天中，見雲宮之內大悲天尊，言推運日至，應勞道化。太平天尊答言：爲此因緣，上朝真帝，粗得周遍。爾時太平天尊三聖法身同坐一座。又經十劫，與大悲天尊靜默而坐。

爾時南昌上仙睹天尊真光遠映，不比尋常。是時玉清之天已下，諸後學得道上中下仙億億萬衆各賚供具，香花幡蓋，作衆伎樂，浮空而來，朝慶太平天尊，并朝大悲真帝，燒香散花，歌頌讚歎，鼓衆伎樂，圍繞雲宮七日七

夜。諸天雨花，香烟凝虛，瓊林敷花，以承甘露。金山涌出，玉髓流津，龍芝起霞，隱草擎雲，空洞虬吟，仙霞翳天，白虎嘯歌，微風拂塵。衆仙四周，真宰列筵。

爾時諸仙各下浮雲，齊整威儀，一時稽首，長跪瞻仰，正見天尊各坐三宮，通披霞衣，神識似嬰。瞻仰未周，已入無形。三宮紫雲靄空而生，良久之間，忽見一尊獨坐一宮。復良久間，忽見二尊列坐挾侍，或恍忽存亡，或混三爲一，或散一爲三，出有入無，體不常居。

爾時仙人頓首，良久，南昌上宮照靈仙人長跪空中而作是言：昔在太虛，得睹天尊，數億劫中立侍太空，忘退之心。濫蒙垂愍，示以期會，非分提携。自辭以來，傾誠如昨。下界迍否，屢有壞成。翹勤之心，恒如渴饑。忽睹真光遠映，與本不殊。如是天尊周旋事畢，輒率仙衆塵穢天庭。又復再拜。天尊告曰：我知汝心，不煩多辭。各且復坐。

爾時仙人一時再拜，應命而坐。天尊告曰：我本無言，亦忘所心，空傳響應，冥汝虛襟。汝知之不？仙人答言：伏蒙告勅，不敢不知。天尊然之。

爾時大衆默坐百劫，寂然不動，時聞雲宮四方玄中有陰生梵唱四字之章，恍忽難詳，似清風振於虛絃，如玉樹出於瓊音，和韻宛轉，辭理微妙，不可盡解。時諸仙人不敢視聽，心中記憶，時得半章。其文曰：

靈芝無根，衆化之原。中凝七魄，主結三魂。二十四真，出入無門。杳冥之精，恍忽無情。隨劫存亡，逐氣而生。外凝混朴，內養七經。五神植花，三台敷榮。紫闕素童，反形歸嬰。騰雲而昇，騁霧現空。中有玉真，號曰神公。右挾無英，右衛白元。玄獸過後，丹禽擁前。上浮翠蓋，下涌金蓮。香雲凝空，甘露無窮。用之無盡，尋源不終。

爾時諸仙聞上方空歌內經，不可記憶。百劫之後，昭靈仙人仰視尊顏，見五色香雲從天尊口中而出，上騰太

虛。爾時昭靈仙人合衆俱起，作禮請問：不審天尊默坐百劫，音響無聞，今日何故口出香雲？欲知天尊所爲因緣，願爲分別，開悟未聞。天尊告曰：

我口出香雲，以應後聖金闕帝君。我前下四天之中，時已臨至。是時衆聖各應一事。當此之時，天地又應。天應之時，三景告瑞，五色明霞以爲重輪；地應之時，五岳呈祥，地藏發泄，金玉露形。若此之應，金闕帝君不久下世，今未剋日。當此之時，我亦觀之。

爾時昭靈仙人又更諮問空歌內章所出因緣。太平天尊告仙人曰：子不知乎，大悲天尊治在此宮虛中，真氣演出此音，自然天經，靈章寶文，難可得遇。後聖諸仙聞亦不解。此音合和，生神調理，真氣之道，凡所不聞。我知汝心，非分記錄。汝諸仙人未合受持空歌內經自然之音。

爾時昭靈仙人答天尊言：兆以輕生，經當誦念。願垂赦宥，聽許受持。天尊告曰：子得聞之，是子宿命，法應

成真，慎勿妄宣。閉口脩之，學不負人。泄則禍生，祕則福臻。

爾時大衆俱起作禮，奉受內經。一時之間，上方雲篆空明虛中，字方一丈，八角垂芒，煥煥光明。

爾時諸仙重更刻書玉文，各寶一通，韜之錦囊。于時雲篆停空不滅。天尊告曰：真氣所覆，彌久彌盛。汝等修之，亦復如是，壽無劫數，形隨日新。上真所寶，不施下仙。道數未足，況於下凡。天尊告昭靈：當知上道一事，皆不妄泄也，況於天經。汝當寶之，勿將內經下化。凡夫之心，未能及此。

爾時昭靈仙人作禮長跪，上白天尊：下界凡夫雖居葷穢，亦有知道，修學成真。忽有此人可能傳受不？天尊答曰：如此之人，億數無一。汝等云何得知合真之人？昭靈答言：臣南昌宮中亦有真仙之錄，三元八節，下司上聞，陳其功過，亦無遺失。

天尊告曰：下界凡心亦難分別；或許修吾道，匿穢藏奸，心有外求，志

不能堅固。察奸糺過，考其精神。若不爾者，清濁難分。或意在聲利，依倚玄門，窺窬下風，唯尚多聞。汝欲教凡，當明此人。

爾時昭靈仙人不明聖旨，重更諮問：不審若爲考其精神，願爲開示，私心樂聞。天尊告曰：凡人之身中各有神，神鎮在心。心欲所爲，神已知之。身欲造惡，神不從之。人身陰賊，魂不受拘，魄不受制，三元八節能聞上帝。以是因緣，可得而知。人有陰德，三魂不離，七魄不散，善神扶助，天兵衛護。以是因緣，自然合道。善男子，無上大道不言而知。恐汝未達，深須戒之，勿得輕宣。善男子，汝數億萬劫遇我於太空之中。又今值我，得聞妙法，不久之間，自然洞曉一切諸法，真僞之心如對目前，無不辨了。此諸身心通道，故能洞達，無有障礙。

爾時諸仙聞天尊慈悲，即互相歡喜，頓首長跪，各命侍從奏樂娛善。千音合響，法鼓凌霄。其時浮霞流轉，香烟遶虛，飛蓋迴空，長幡舞風，龍吟遙

天，鳳唱虛庭，天地震動，二景垂輪，神蟾出月，以蹈虛靈，鳥鼓翼以翔空。當此之時，下界三十七天後學成仙見此祥瑞，一時騰空，上至玉清，如雲之交。太平天尊語昭靈曰：仙無大小，皆能感動天地，制御萬靈，當知道力不可思議，令諸下仙皆得聞知。爾時三十七天人億億萬衆遍滿雲宮，燒香散花，各陳本願。

爾時天尊遍知其意，即爲諸來大衆而入慈心大定，攝受衆心，入於靈冊之中，合自然九變之道。化成九天，中有九氣，結成九府。爾時三尊分居九府，各坐九龍寶座。當此之時，號爲九府真人。太平道君引諸仙人一時而入九府之內。

爾時天尊爲諸仙人說九仙之道，上應九天，中應九宮，玄應九氣，下攝九泉，能入無間。所謂一生三，三生九，九九八十一，主於始生之法，輪轉無窮。今諸後學之人能生能成，常居始生，自然成真。諸來仙人睹此微妙，不敢致辭，亦各知其從此得生，不知今

者天尊開示。慙慙委曲，內懷慙愧，不知何謝。

是時天尊逆知其意，即告之言：無上大道都無所須，何俟多言。我身坐道場，神交萬帝。我非不凡，受于虛言。若言得道者，下鬼凡夫，唯除暗啞人，未曾無言，不能得道。我非謂大道應凡之時，都絕無言。我今真身，汝又非凡。以是義故，汝於此中爲不了達，心請問義，自外默聽，無上大道，法無辭謝。

是諸仙人，受天尊教勅，各各頓首，心思道恩。良久之間，南昌宮中昭靈上仙稽首而言：昔承天尊推運下世，周遊十方，時刻未到。願得天尊下臨南昌，少時影響，不敢久留，則是萬劫翹誠，於此滿願。合衆叩頭，伏地良久，而聽告言。天尊告曰：我已上辭大帝，遍別諸尊，歸至雲宮，因緣已畢。汝欲請我，不違汝心。仙人聞天尊告勅，喜躍無量。

天尊又言：汝等諸仙，宜且前去，雲宮之中，由來寂靜，不宜久住塵穢。

雲宮大悲天尊昔應世之時，暫有言說，今還雲宮，復歸虛無。爲我來此，天尊大悲俯觀後學。汝等諸仙應當知此。

爾時上仙昭靈又更請問天尊：不審天尊何當得來？天尊答曰：我當不久，一萬劫後尋即發來。

爾時諸仙奉諾訖已，一時再拜，辭別天尊。次別大悲真帝，頓首退後，仰瞻高座，不見天尊。時諸仙人顧瞻三聖，亦已入無，唯見雲宮闐然虛靜，香風微動，爐烟尚氛。飛蓋停空，幢幡立虛，天樂不鳴，音響無餘。是時諸仙睹上道之威神，忽出有而還無，良久徘徊，冥寞無依。齊駕雲車，相隨復歸。

爾時一切仙人皆已隨從昭靈上仙歸於南昌宮中，修行天書陰生寶經，一十八年，皆成真道。二萬劫中，虛心伫立。

爾時天尊在雲宮之中遙見諸仙得成真道，乃於雲宮之中出見諸真大慈左手。當此之時，三十三天其門洞開。是諸天人皆見天尊左手，猶如白虹貫於太虛，五指爪甲出五色光明，照於南

昌之宮。

爾時諸真一時稽首，再拜左手，各於光中遙見天尊在於雲宮虛無之中，有天書左契，一字八色光明。時諸真踴躍歡喜，知是天尊遙來印授。道無二言，見其左手在雲中宮，經一萬劫，然後乃收，還於雲宮。光亦如是，萬劫之後，隨手而歸。二萬劫後，時諸真人蹈空立虛，遙瞻上方，以正月一日晨朝之時見有三色光氣，從東方初日之中直下南昌宮中，盤縈宛轉，遍於虛空。香風酷烈，不並尋常。九萬年中，朝朝如此。是諸真人晨朝之時，正首挹氣，九十過經。三十年中靈氣洞徹，虛凝體中，從其項後出上衝天，青赤白色，永不復滅。一萬劫後七月一日，晨朝之時，忽見太平天尊三聖法身，坐在三氣之中。爾時天尊各故真光，心間出光，光初如螢。須臾，遍體內外洞徹，映朗南昌上宮。良久之間，太平天尊道身如光，無有分別，合天炯炯，譬如盛日，但無炎烈，瞻視煥目，光芒射人，不昏不異。足經千劫。是諸真仙在此

光中懽娛怡悅，形容反嬰，色如稚子，足蹈虛空，汎若輕雲。真光之力，乃能如是。雖經劫數，心無於悒，以道自娛，都忘其餘。千劫之後，三聖法身忽見光中真仙無數億萬，仰視上方，長跪而立，不敢有言。天尊盡知其意。

是諸仙人，俱得大通，皆具神交，亦知天尊愍其大眾，廣開法門，慈悲成就，皆得無礙，神通道力，亦能七變九化，達觀諸法。不知天尊千變萬化，能大自在，能轉他人，凡夫之身，不經久時而成法身，天上地下，萬道獨尊。神力無等，不可思議。

### 威魔品第十六

爾時復有色慾二界六群邪仙八萬四千人性好論議，常於下界較其神力，善習幻化，心意矜高，自號大師，獨行三界，心得五通，壽八萬大劫。聞天尊下降南昌上宮，率其部落，乘駕獅子，經六小劫，上至南昌，思見天尊，欲較神力，校試道術。天尊已知其意，與諸

大眾默然不動，坐一龍座，去地七仞。爾時八萬四千邪仙一時到已，仰視聖衆，無心恭敬，亦復不識太平天尊真仙階級，欲登高座，無能上者。

爾時邪仙之中有一大仙，名曰羅比羅，是邪仙衆中第一道首，變色而言：我是三界大師，獨明禍福。聞有無上大道，而此大眾，何者爲尊？爾時天尊指昭靈真人已爲天尊。是時羅比厲聲言曰：子有道乎？昭靈答言：我身無道。羅比曰：子無道術，以何玄法禁此高座？吾欲坐議，即當昇上。昭靈答曰：我此高座，名曰大道慈悲之座。子將此身窮力上之，亦不得昇，忽強昇之，亦終不得。羅比問曰：云何不得昇坐？昭靈答曰：子是下方色慾二界直脚魔邪，假託仙號。

爾時邪仙齊舉其脚，悉皆堅直，不能得屈；求欲坐地，亦不能得。是時羅比盡其神力，亢聲說呪。是其徒衆八萬四千空中自撲，隨呪緩急。

爾時羅比又盡神力，欲動天地，是其徒衆一時倒地，轉身翻覆，求止不

得。是時羅比心猶不信，更求與昭靈真人較隱形之法。爾時昭靈真人大悲聽許。羅比曰：子先隱身。

爾時宮中聖衆一時俱隱，是八萬四千邪仙連臂空行，不能得見，還復本處，歎未曾有。復須臾之間，大衆儼然，未曾一動。昭靈道君即令羅比合衆隱身。是時羅比竭其威力，變成黑氣。昭靈真人一過吹之，八萬餘魔一時氣靡，猶如死尸，冥然無知。良久之間，道君又微氣噓之，一時俱蘇，各起悔過，信向歸伏。

爾時道君又以慈力吟拂魔之章，令八萬四千邪仙半生半死。良久，是時邪仙得蘇息已，自覺其身有腐爛氣喘，頓首道前而作是言：不審天尊修學何法，神力如是？壽命幾何？

道君告曰：我修無上大道慈悲忍辱之法，身無死地，神力自在。道君以大悲力試而問之，子修何法？住壽幾何？羅比答曰：我修欲界四天神呪，一名如意，足能壽八萬大劫。上壽之中，不過於此。命過之後，隨業受生。

而我法中能勤苦行，心得五通。雖有神力，不脫老死；雖達空理，無法長生。

爾時道君逆知其意，而不答之。又問羅比：知汝法中根本以不？答曰：不知。此事久遠。難可詳究。

道君告曰：汝此法者，是汝天中崑崙山精，自號四天之主，或稱四天王，或稱神王，出此法教化色慾二界邊地衆生。汝之所師，原本如是，非是無上大道自然之法。汝下二界邊地衆生，工一小伎，即號仙人。因此邪仙更相放效，不識大道無上至法。羅比又問：上道幾法？仙有幾品？經名何者？聞有天尊，目未曾睹。而此大衆盡名天尊，復有餘號，盡是上真，亦有下仙。

爾時真人告羅比曰：上道法一，論其支流，三萬六千種法，元於一道。仙真之品有一百二十級，皆宗天尊。雲篆成文，自然天書，故天經。太平真君虛無天尊常在玄中，以汝凡眼、五通小見，不能得睹三尊真容。我近學道，

經數億劫，位登真人。而此大衆皆是上仙。羅比又問：真人神力，尚以無比。天尊威神，應復若爲？真人答曰：非汝所見，非汝所聞。數萬大劫之後，應下化世。以汝危命八萬劫壽，不見此時。汝莫問此，非汝所及。汝身腥臊，尸臭無常，欲至滄我天宮，汝當急去，不得久停。

爾時羅比無立足處，復歸下界。天路遙長，憶初上時經六小劫，此時年尚少壯，猶故遲滯，今轉朽邁，漸無神力，混神迷性，進退無據。相顧悲泣，涕淚交連，辭別真人，遽還慾界，圍遶崑崙，起居邪王，具說遊行之於上界，睹大道真人，示其神力，語其根本。邪王聞之，五神振懾，絕而復蘇。良久醒悟，語羅比曰：止止勿言。諸神聞之，出於人間，傳說我等道術不行。是諸邪仙却居山南，約水而住，四時八節，或附著人，歌吟哮吼，自號仙王，求索禱祠，修習幻化，遍行下世，自出支流，改制邪法，擅立位號，六百餘種。金闕天尊應運之時，邪仙殄滅，無復遺餘。

爾時昭靈道君白諸真人曰：邪仙初來，天尊大聖不自對此下界邪俗。命我小道，示其威神。我乘大道大眾之力，非我獨能威此外道邪仙。塵穢之事，實非所宜。無上大道逗機之時，或應如此，不足異也。

爾時丹霍洞真名曰通玄，從坐而起，長跪請問昭靈道君曰：拂魔之章可記錄不？願見傳授，敢欲修行。昭靈道君曰：此中雖復天真大會，諸有傳受，不敢自專，先當上聞。爾時二真具以因緣，上白太平天尊，告曰：欲威下道妖精，先當左叩金鐘三十六下，而誦威章三遍。其文曰：

金鈴電火擊，烈咆憤九元。殺氣流蕩焰粉，萬魔滅種，千妖絕殞，雷父蹈空，霹靂迴風。斬首馘醜，推妖殄根。逆我者滅，順我者存。七星裂血，金神曜電。精刀曜電，玉斧含霜。威兵前驅，何鬼敢當？爭氣者滅，拒逆者殃。上浮紫蓋，下坐金牀。丹霄羅映，日月爲光。門據靈蟾，戶衛金芒。五毒藏奸，萬魔滅亡。七真內養，千威外

張。魂歸紫闕，魄入丹房。

天尊告曰：此是太玄內威呪，滅凶殺邪。後學諸仙道未玄極，恐多凶殺，誦此神呪，依儀鎮衛，千邪喪精，萬魔滅氣，神平體安，朗然無畏。

天尊告曰：上道之法無心自成，不必須呪誦此威章。此是太玄虛靜道場之內威振靈冊，於邪門左叩金鐘三十六下，以召威兵，右擊玉磬一十四通，以集真靈，中建法鼓一十二鳴，以聞上帝，生神內列，威兵外張，雙曜入眸，口吐靈芒，頭建七星，足蹈玄綱，玉爐颺煙，身坐金床，萬精滅氣，千妖自亡。

天尊曰：下土凡人單行此法，不得真要，年二百四十歲，鬼不能害。是時丹霍洞真伏受要言，歡告禮謝，奉而行之。

爾時丹霍洞真與後來三十七天諸真仙等億億萬衆一時頓首長跪，上啓天尊：兆以夙承餘慶，運遇高尊，賜以慈悲，提携淪墜，得易凡軀。叨茲上首，濫階玄極，過泰有餘。不揆愚微，

轉當忘退心願，停此庇影南昌，待慈尊下世之時，願陪雲駕，晨夕侍衛，執蓋參爐。惟願天尊大悲恩許。辭畢再拜，伏聽教言。

天尊告曰：大道無親，善善相因。子承願力，何俟多陳。運期非久，數萬劫間，天堂遐曠，任子遊居。下世之時，亦須汝等助宣正法，流化下土。我等三聖各化三界，此時度人，亦乃無數。

爾時諸真聞天尊垂許侍從，深果所願，歡喜慶快，一時禮謝。爾時天尊又告後來諸直：汝道猶淺，未達至理。且作一劫入凝神大定，思念都盡。次入忘形大定，應感皆空。次入六虛大定，隨方起應。次入太虛大定，分身萬億。次入動惠大定，能爲萬化之根。次入生惠大定，能遍生萬物。次入大慈大定，能長成萬物。次入大悲大定，能藏養萬物。汝能成此八事，然後位登上真，俱號後聖。應爲大道差次應運，賜汝尊號。欲隨我下世教化，心不自定，不能生化，真應有滯，不能起感。

爾時天尊說此語已，即人不動，凝神大定，如本無異。爾時諸真亦隨天尊入凝神大定。爾時天尊出此定已，

又入忘形大定。是時真人亦隨天尊入忘形大定。天尊出此定已，又入六虛大定。是時真人亦隨天尊入六虛大定。出六虛大定已，又入太虛大定，是時真人亦隨天尊入太虛大定。是時天尊出此定已，又入動惠。是時真人亦皆隨天尊而入動惠。爾時天尊出動惠已，又入生惠。是時真人亦隨天尊而入生惠。天尊出生惠已，又入大慈大定。是時真人皆隨天尊而入大慈大定。天尊出大慈大定已，而入大悲大定。是時真人亦皆隨天尊入大悲大定。爾時天尊出定惠已，即入自在神力，忽而升玄，倒景步虛，一瞬之間，已周三萬六千天中，復歸本處，凝然不動，懷藏三萬六千日月。又於身中開闢三萬六千天門。又於身中登現三萬六千天帝，一一天帝身中各見三萬六千天門。又見三萬六千天帝各有三萬六千侍從，一一侍從各坐三萬六千龍

座，一一龍座各懸飛蓋，其蓋高廣，遍覆諸界。須臾之間，復令三萬六千天地一時震動，天雨香花，地涌寶山。

爾時天尊身中又出三萬六千龍輪，乘三萬六千日月，復歸諸天。爾時三界地中所有枯骨變起成人，復令衰老，一時反嬰，素鬢歸玄，落齒更生，五藏花敷，耳目聰明。須臾之間，復令三萬六千天中一時風雷大動，甘雨驟流，萬象發生，英華動敷，天洒甘露，玉髓通流，真無凝仙，梵唱清玄，寥亮虛通，響徹無邊。又令應出星宮空列雲房，上凝紫霞，下結金剛，十絕垂天，寶蓋高張，牖開明月，戶映靈芒，白玉爲几，金精爲床，真宰俠侍，仙童焚香。爾時天尊與諸上真俱爲雲房，列坐龍座，鳳唱虬吟，庭舞仙禽，神力萬變，所作隨心。時諸真人歎未曾有。

爾時天尊告諸真曰：上道之法，力神萬變，未覺經心，定惠虛通，無心故爲。心不經而自成，惠不爲而自明。強爲不明，強作不成。甚希甚微，難可而名。汝大通之日，自應如此。衆真

齊起，一時禮謝，諾受要言。天尊又曰：如此神變及以定惠，乃是大道階級之事，已應運化，度世之法，亦法如此。

爾時天尊知諸真人心無礙，智力廣大，堪任大事，即與衆真昇入大羅之上，謁請虛無天尊授其上真之任。至億劫之後，應加尊號，而至大羅之上謁虛無天尊。天尊告曰：子道數已極，宜錫上真之任。我各侍至真之司，玉函青簡，刻書已畢。命諸真人讀簡看名，尊號已定。衆真再拜。

天尊告曰：如此冥默。衆真奉辭，歸於南昌雲房之中。列坐大會，衆真朝慶，七日七夜，天雨香花，振動三十七天。大地之中，應時踴出山岳，而應上天。天地合響，一時稱善。當此之時，太平三尊與諸上真一時入於冥寂大定，天宮闐然，唯有香官使者騰烟不絕，足經一劫。一劫之後，天尊又出冥寂大定，入於動惠。須臾之頃，神霧四秀，溫氣八衝，微風颺煙，甘露柔塵。爾時天尊出於動惠，遂入生惠。倏欻



之間，萬象空生，雲霧上騰，雷吟電轉，神草含英，鳳嘯瓊林，蓋動霞生。天尊告諸真人曰：動生之法，以應金闕後聖降世之期，非久欲至，十方大聖同爲告瑞，非獨我也。

爾時天尊說此語已，是諸衆聖一時默坐，凝然不動，金爐香花，鬱鬱常然，下降之時，千變萬化。當此之日，希有神力盡應見世。

### 太上大道玉清經卷之六

## 太上大道玉清經卷之七

### 道化四夷品第十七

爾時玉清天中右瓊臺上真，名曰寶光，以爲上元，推其降運，下於神州天王皓元之門。以七月十五日日中之時，乘紫雲之輿，從二仙人，俱時化爲日光，降玄氏之胞，因睡之中，從口而入，處胎三年。爾時夫人年始十八，晝寢而覺有娠。神香鬱烈，根識朗悟，華容豐偉，膚體充盛。獨處之時，恒聞側近有金石之聲，或聞髣佛清誦，如唱真經和心之文。身體輕強，倍於常日。却後三月三日日中之時，夫人將三百綵女遊宴東城，觀看花園，息於芳林之臺。忽聞香氣衝人，須臾之間，見二繡衣童子手執金符在夫人左右。夫人問曰：子何人耶？童子答曰：我是玉清天中直事神童，爲玉清天尊之所役使，受事至此。夫人問言：來此何爲？童子答言：上帝有命符召大王。夫人答

曰：王不在此。童子又言：夫人懷中之王也。夫人聞喜，即垂脚床前，忽覺嬰兒出其左脇。夫人乃擁羣侍女抱出嬰兒。二仙使者長跪問訊，而作是言：睽間三年，勞於下生。嬰兒搖頭，微笑良久。目下重瞳，遐映紫光，孩笑三聲，泯然而止，斯須之間，忽見芳春臺前月沼騰波，五色龍王涌出池中，口含香水，以沐嬰兒。父王聞之，馳駕而赴。羣臣朝慶，傾國作樂，大赦天下。父王命羣臣、後宮綵女大張音樂，廣齎束帛，香花幢蓋，迎兒還宮。車駕來城，大會七日。抱出嬰兒。大臣議定，冊爲太子。錫官百司，厚加寵祿。

爾時慶霄下流，天獸來衛，父王自立此兒，名之重光，字曰天挺，育於凌雲之宮。保母五人，傳手抱養；侍女八百，晨夕供侍。或抱出寢幃，兒見天日，常以仰笑，口出紫光，上連天口，甘露如繩，直注兒口；玉女散花，以拂兒身。神鳥停空，張翼蔽日，香官颺煙，以薰宮中。

爾時重光三歲能言，聲聞百步，常

樂獨坐，不須人抱。年至四歲，獨言獨笑，談及世表。年至七歲，不學而知，遐思遠視，身邊有光，照耀一室。坐立如山，行如龍步，側卧東首，四肢半伸，紺髮翠眉，目開日角，光含紫映，方口圓鼻，耳長五寸，三門成就，齒白齊密，足三十六數，脣色如丹，方額高準，人中四起，長十二分。闊額平正，玉枕如星，髮不參差，柔軟光澤。項負三約，四乳方肘，闊胸微偃，心處深厚，臂圓煦直，垂手過膝。爪堅色紅，常有光明。掌中有華文，三道通達，手心色紫，指長六寸。臍中深圓，峻有伏骨，雙靨駢脇，腹生白子。髀骨方直，藏踝不見。足跌微偃，筋脉不露。蹠底平滿，圓文日輪。爪根深下，指端微起。膚容細軟，充滿香潔。青骨素髓，五藏蓮花。紫胃筋腸，食不全粒。顧盼迴身，坐立平正。年至十九，形長一丈，聲響如鐘，韻驚塵飛。遙聞十方常有紫虛蓋其頭上，而止之處，無有霜雪，和氣調平，風不狂勃，甘雨微津。溫仁忠恕，忍辱慈順。仰觀雲天，善明經

緯。一切伎藝，不習而工。幽通至極，預知未然。父王珍之，大集羣臣，議定禪祚。三讓不受。爾時五嶽響應，虛鳴萬歲。嘉祥畢集，幽明符會。苦不得已，然始受位。治民事天，弘道安世，正化無爲，不勞人心。貴德尚善，不令而從。恩流孤弱，惠及昆虫，人神交歸，異類羣睦。每以秋冬，天降甘露，五色之雲，以旋日月。城闕不閉，郊境無防，四海通同，萬邦歸一。嘉禾瑞草，合根離穎。一樹十枝，隨時四熟。仙娥布野，榮絹亘原，絡織成文，以充衣裳。鹽池醴泉，隨處而出，靈芝夜光，遍挺園苑。神禽奇獸，馴狎墻廡。麟鳳羣萃，晨夕和鳴。爾時有黑水之北，牂羝之狄，斜通河源，雪山之陽，與雜畜之戎，性狡難狎，陰生奸計，聞王善政，不用戎威，相率興兵，來入王國。始到雪山之東，羊馬穴厲，羝戎疾病，羣鬼露形，殺滅戎狄，十分遺七。中路自悔，跪拜叩伏。王知其逆心，固不加伐，任其進退。

爾時大王遍勅國內而作是言：邊

戎無知，忽懷逆心。天已罰之，即時自翻。刀不任進，天下萬兆不須驚疑。我若無道，天必喪我。三日之中，邊疆報國，云賊已退。是時羣戎復歸，其兵昏氣，天之十喪其八，瘡痍由興，災殃未殄，邊陲恐怖，羣聚相謂。享人禱天，災氣轉盛。荒戎之中有一主者，微辨世事，向諸衆等而作是言：大國之主，德合於天，修道守正，志不邪偏。萬福扶持，百神守衛。我等云何相率興兵而恃上善？我國遭災祥，必由於此。我當急告鄰近諸王，嚴裝所須，速往辭謝。是時邊戎一百二十五落戎狄之主將諸侍從八萬四千人，俱乘白象，齎香花瓔絡，馳入大國，屏氣玉闕，負揭琛賂，肘伏王前，抽膊求哀，劈準流血，拔髮如蓬，自撲紛紛，遍體青腫。獸鳴鳥噪，不可悉解。疆人重譯，悔過謝愆，而作是言：我等邊隅不治正朔，三才濁氣，二象醜形，雜類之種，不識恩美。雖日有生，實非正氣，忽起兇頑，率心不義，而興獸心，塵穢大國。羣聚未久，已遭天罰，荒陬殤夭，十分

喪八。毒氣未休，故猶興盛。讓者以爲反逆，上天縱毒，享人禱祀，轉加增甚。敢從大天求乞哀愍。言畢自撲，披髮悲號。大王告勅：我承有道之君，係統天下，唯善是履，不務其餘。猶不自哀，云何哀汝？我於萬物受同

一子，未曾偏黨，乃至幽冥，亦復如是。汝生逆心，來向我者，我身不知，付之於天。我無情而責汝，天無心而伐汝。汝身受罰，如仰唾天，不離其身；如仰射天，箭還自中。自然之道，理無差也。汝等所齎香花瓔絡，非我所珍。我此國中，唯修道德。及以穀帛、頸珠、瓔絡，邪俗嚴身，非正所貴，轉重累物，外滯塵滓。何以故？此名外飾，故不足珍。我此國中一切人民盡用忍辱、退讓精進，儉約以爲嚴身之具，以道德戒行爲諸香花，不須汝之所有。爾時諸戎見大國之王不受其獻，恐畏無福，災害不消，悲泣相顧而作是言：大王不受我獻，或恐嫌薄。我等大眾各以白象奉上大王，以求哀愍。大王勅言：瓔絡寶珠，尚非我貴，況於白

象，腥臊臭處水草巨大，又須看牧，爲我國累。龍鳳輕妙，吾尚不須。時諸陰戎煩冤懊惱，自拔頭髮，悲泣而言：大王不受我獻。我身無福，定不免災，不如自殺以遠此禍。

大王勅言：夫求福者空心奉道。身心既空，道亦虛無。以空虛故，則無禍患。既無禍患，名爲福德。又求福者，無希無望。汝所獻者，誠有希望，故我不受希望之獻。我此國中諸賢良等常以善心而自嚴身，不以瓔絡、白象爲求福也。大王又言：我此國中，唯當奉行無上大道，餘無所求。諸戎當知，諸求福者，心不邪偏，平等一行，不順利，不違害，亦不變禍爲福，亦不恃福，故能無禍。何以故？惡不勝善，凶自成吉，禍自變滅，亦不見福。汝欲求福，所避禍者，是汝顛倒，不達禍福，心生背向。何以故？禍福同門，根於虛無。汝審此禍從何所報？知禍所起，自明福本。諸求福者，先知其禍。譬如良醫，欲療衆病，先識病源，然後與藥。病藥相當，無疾不愈。汝諸戎等，

挾禍求福，不除禍本，望福降者，譬如有人執杖和怨，負水求火，勤苦積紀，終不能得。汝禍所起，起汝身中。云何求福，二滅汝身？夫滅身者，不名爲福。云何戎狄自欲滅身？身爲福本。云何滅之？諸滅身者，名之滅福。又身爲道本，諸滅身者，名之滅道，非滅禍也。諸滅禍者，不恃福以滅禍；諸求福者，不因禍而致福。

是時諸戎聞大王勅言，不能辨了，請譯人譯之，歛衽畏懼，不解報答，唯知頂禮，內懷厚媿，跪立不安。爾時陰戎之中有一主者，名釋頭分，請譯人宣傳，自稱是浮提竺乾之王，而作是言：慙愧大天爲我等衆說希有法。但以邊戎淺識，不究至道，迷遠相傳，沉滯邪津，歷劫未悟，不但今日。唯願大天哀愍昏惑。狂胡無知，情所不了，念達一言，以陳鄙志。向聞大天示以此國，唯奉大道，無上至真，可得聞乎？

大王勅言：無上大道常以希聲，而聾者不聞。大道甚微，而盲者不見。汝等衆生，雖有眼目，不能正視，雖有

耳根，不能正聞。衆色紛紛，引汝之明；邪音淒咽，窒汝之聰。汝雖有耳目，不異聾盲。以是因緣，不能聞道。汝欲聞道，除汝邪聞；汝欲念道，除汝邪念；汝欲修道，除汝邪修；汝欲行道，除汝邪行。行於正行，慈悲善順，名爲道行。行此行者，自當聞道；既得聞道，亦能見道；既能行道，即能平等，觀諸衆生與己無異，觸物生慈，心不分別。先建此誠，然後聞道。

爾時諸戎重復請問：大王無上大道至真妙行以爲何宗？全生妙用，昇入無形，綿綿長存，絕待無累。願垂開示，令得解迷。大王告曰：無上至道以自長生爲宗，即此之身而爲法身。以慈悲平等爲重，以忍辱柔弱爲用，以方便惠物爲利，以無爲虛白爲寂，以智度無礙爲通，以道眼觀照爲達，以弘廣容物爲虛，以形能隨神爲無，以無作爲自然，以無形爲長生。爾時諸戎聞大王之言，皆曰未曾有也。神識雖鈍，亦以朦朧，未能盡解，猶亦在疑。

爾時大王爲邊戎釋除疑結，心開

意悟。於是大王以八月八日爲諸戎狄請寒林大師，召集國內出家道士，備陳威儀，爲諸邊夷七日七夜齋戒悔過。又却還其所獻珍玩，及以瓔絡。諸我奉勅，不敢不受，受已轉施寒林大師。大師受已，即分瓔絡而作二分，一分與衆中貧下給使之入，一分與諸戎。白象還令諸戎，爲象著此瓔絡。爾時二萬四千大象著此瓔絡，一時跪拜寒林大師。象又四散，以鼻繞花，奉上大師。是給使下人佩此瓔絡，心生慙愧，皆自歎言：大師平等，一心視物，寶珠瓔絡，惠施天下人民，及諸白象，頓首辭謝。寒林大師語曰：無上大道寶，轉凡成聖，尚以平等惠利衆生，而不恃功。瓔絡外飾，邪俗嚴身，塵滓瑕疵，何足及言？外荒雜類，不解獻心。將此施我，我以爲受，迴以與汝，何用謝之？但取勿疑。至月十五日日中之時，大師與諸道士九萬七千人同時受食，畢，漱口寶瓶，餘水散灑南西北方，立成雲雨，風雷電擊。大師又向三方噓氣，口出金光，遠映諸國。是時邊戎

弊疾者，登即差愈，皆於光中遙見大師，如對目前，風雨蕩穢，雷音舉愆，一切灾殍，應時殄滅。又令八萬四千戎夷，悉於光中得見其家。至月二十日諸戎留後，各遣使者馳入大國，報奏平安，具狀所見瑞相如前。

是時諸戎披髮謝過，歡喜道前，頓首伏地，請問大師：不審大師修習何法？神變乃爾，自在無礙。只名大師，復有餘號？向聞大王勅言，大國之中奉事大道。不審大師之道與無上大道爲一爲異？蒙昧不曉，唯願大師廣爲分別，開示未聞。爾時大師彈指警歎，而告羣戎曰：善哉善哉，念法邊鄙，哀汝知問，不可思議。汝當諦聽，吾爲汝說。我是玉清天中雲宮東臺號曰太真，自然虛生，名無上道。無所修習，但以大慈大悲，應世神變，隨心而成，無心故爲，不勞於身。我與大王同時應運，下治兆民、國王，因寄凡胎。我權號大師，託在寒林。互爲賓實，潛相影響，不一不異，不處中間。汝等諸夷出生慾界，受質邊戎，人心無慈，荒涼

弊惡，性便戕害，而不好生。飲血茹毛，形骸臊腥，神凝濁氣，體結偏精。拔本塞源，抑本崇末。性重財貨，不珍大道。積劫如此，非獨今時。大道不行，其來久矣。雖知若此，物有輪轉，罪爲善本，惡是慈源。汝等衆生向無逆心，終不見我。大道無私，冤親不二，以德報怨，不捨大悲。是故國王請我法衆爲汝悔過，爲汝消災，慈心平等，無有異念。故令雲雨施散，光音普被。

爾時大國太帝及以太妃、王子、羣臣，先心不知寒林大師與大王重光，同是降神大師。初來之時，國人大小咸謂大師是凡常之人。後見大師隨心神變，傾國歸依，悔過自責，隨其富貴貧賤，辦諸供具，雲萃國內，列滿東城，芳春之臺，大設齋會，合國士女填塞衢路，車駕紛紛，塵飛霧起。

爾時大王爲施高座，罄國珍玩，裝校道場，開發大藏，巨惠穀帛，周窮濟乏。出諸名香，焚煙衝天，結蓋凝雲。張設妓樂，驚天聒地。五嶽震動，四海

波蕩。春雲涼風，調和氣序，韶光暖景，同於始春。長林再花，和鶯重發，百鳥翔舞，魚龍躍鱗，天地吉氣以輔王國。時會大衆喜慶無量，行道旋繞，歌頌盈溢，法衆步虛，梵讚歎詠。爾時大師登座撫几，巖坐如山，千善爲心，萬福成體。大衆欣仰，一睹真相，皆發道心，異口同音，百心齊一，合禮道君，願聞希有。

爾時無上大道君爲衆生故，及命國主重光三捻焚香，遙禮雲宮大悲天尊，長跪立願。

第一願者，道化流行，普天懷德；二願一切有生，咸皆悟道；三願九夜悲魂，一時解脫；四願孤爽無依，咸得受生；五願天下太平，百穀成熟；六願臣忠子孝，君仁父慈；七願四海通同，怨親和解；八願潛胞處殼，俱得生成；九願積疾新痾，登即痊愈；十願孤露衆生，豐衣足食。

爾時大王陳此十願，起禮大師，而作是言：唯願大師爲衆久處，降跡同凡，不棄塵穢。大王作此語已，感動天

地，虛空雨花，天灑甘露，萬變仙樂，鳴玄駭空，地震動，麟吟鳳歌，龍魚鼓淵。

爾時道君面門，洞曉真光，遐朗無際，靈音遠暢，和適羣化，沉尸受生，槁林吐葩，有情無情，含英發花。道雖不言，諸法已備。令此衆會生希有心，自然而然，吾亦不知其然所。

爾時諸戎仰視忘瞬，自失其形，兀而不動，猶如枯本。須臾之頃，雲宮天尊降於應身，與諸侍從九億上真下臨青雲之上，凝結慶霄，方入萬里。其霄四方，平整如地。時諸上真列坐其端。慶霄正中，有紫霞之座，五色雲龍，交結負座。座高八萬四千九百九仞。大悲天尊昇此座坐，漸下玄中，去地七百八仞，正臨東城，眈眈若虛，湛然不動。唯見明霞之上，紫光含雲，彤彤混然。衆目仰視，不覺天真大師分身上騰，入於雲中先所座上。復入二真，容貌相似。良久之間，二會寂然，無有音響，真儀不動，猶如金山，光明洞映，不測邊際。大會之中，人及非人，默然不

動，心無疲厭，歡喜仰視，樂真觀相，傾心注念，不覺有身。九日九夜，寂無饑渴，身心不動。

爾時諸戎重睹浮雲之上大悲天尊威儀侍從，大驚恐，自拔頭髮，悔過責己，刀劈其準，遍體血見，踴身自撲，猶如山崩。睹此希有，求欲捨眼、施頭、燒身、破骨，以爲供養，聲徹大王。

王因出勅而告諸戎曰：無上道法，好生惡殺。莫以邊鄙穢法洩我大邦，燒身謝過，過在身亡，魂神受弊，永失人道。燒身求道，道存身滅；滅身求道，道非滅法。云何滅身而求道乎？汝諸夷等入我大國，永不陶化，云何欲聞無上道乎？汝欲聞道，應全耳根，不以耳聽而聞道也。汝欲見道，應全眼根，不以敗壞之眼而見道也。汝欲行道，應須全生，不以滅生而行道也。汝欲行道，先全汝身，不以缺犯之身而行道也。汝欲懷道，應除十惡，不以五逆之心然後行道。汝今當知，生不全者，不足聞道；身不全者，不足學道。汝諸戎夷，雖非法器，得睹天尊，

萬劫之後，承此功德，轉輪受形，必生大國、有道之邦。能立誓願，必不重生鄙野之方。從今已往，當全汝形，勿以披髮燒身破骨，反天逆地，心無慈順，生死墮邪，永不見道。諸戎夷等一時拜跪，答大王言：我之風俗，殘形滅生，燒身粉骨，浮煙上騰，謂之昇天；或棄尸深水，謂之水仙；或棄尸林野，以飴禽獸。不貴生身受度，勞於長存。

大王告曰：汝戎狄等以長存爲勞，以髮膚爲累。我此大國之法，以生滅爲累，故求長存無生之道，昇入無形，不覺煩惱，不以殘形滅生，以遠勞累，亦不吹累而累自消亡。汝諸戎等不捨邪心，具足外道，不除十惡，樂處生死，不遣三毒，人形獸心，不足見道。勿以戎狄之法穢我大邦。

是時諸戎直以謝過，不敢拔髮，燒身破骨，皆云：不達至道，忽出僞言，以干正直。只言生而必死，是故昇求滅度。不知無上大道長生無窮，昇入無形，絕待無累。願垂哀愍，賜以自新。

爾時大王又勅諸戎：汝野性暗鈍，不識道德，自作凶逆，招求罪罰，來此悔過。大道慈悲，念汝無知。寒林真師降汝景福，大悲天尊愍汝癡頑。無上大聖來會我國，萬兆無言，傾心注玄，專志大道。汝諸戎狄輕陳短見，不能安靖，驚觸法衆，自鬧鬧他，亡失惠利。汝但默住，雖不解法，亦得魂識漸漸受潤。

是時諸戎奉大王勅，胡跪默住，不敢動搖，七日七夜。却後日晡之時，忽見南、西、北方三大天魔各從地司飛空而至，頻首真君，頂禮大王，迴訶諸戎，怒目切齒，傲論而言：大王道國，人無三毒，久離十惡，守正修仁，尊道貴德，國無亂臣，家無逆子。汝諸狂胡，將此罪鬼、行尸之魂，塵穢王國，悔過請福，求聞道乎？天科地律，十惡無原；反逆君父，罪莫大焉。合粉骨灰身，抽筋裂血，剝剔五藏，剖膽披心，拔出汝舌，不足以謝惡言；挑出汝目，未足以申惡眼。汝家國遭災，子孫亡滅。一人造逆，誤殺萬民。是諸戎夷，身毛皆

起，恐怖悲悴，肝膽塗裂，王體攣縮，流汗如雨，氣吟口噤，五神無主。地司執簿以簡大王。

王即告諸魔言：無上大道，不問怨親，於我無傷，云何伐害？縱能損我，亦不加報。大王問諸魔曰：譬如嬰兒，或執瓦木，及以錐刀，而傷父母，寧殺之不？魔王不也。王言：我亦如是。寧損我身，終無有心傷害物命。況於狂戎智慮微淺，不及嬰兒，於我無損。天以伐之，荼毒狼狽，愍之在心，每爲傷痛。

時諸天魔聞大王之言，俱時彈指，皆曰：未曾有也。相顧而言：大國聖王寬心慈善，大悲及爾，德同造化。雖暫爲王，已具衆相，身基萬善，千福成心，不久之間，受號天尊。我等大眾已來至此。此會不久，必當度人。大道難遇，妙法難聞。我白大王，求乞停住。

大王知己，即告之言：大道弘廣，如空無礙。此會之中，以道爲法。法無分別，法無起滅，法無見聞，法非內

外，亦非中間。法離生死。此會之中，淳一無二，皆以一慈悲法。汝諸魔等，欲諸住者，應如法住。

爾時諸魔聞大王之言，凜然肅整，還與諸胡參一處立，三日三夜，却後晨朝日初出時，見建木之鄉，仙人道士六萬八千人俱廕以飛蓋，手執花幡，過於龍宮，各持明月神珠、紫瓊靈芝，飛空而至，奉上天真。後有八十一種島夷之王，皆披五色鳳文之衣，各將侍從八千人俱。是時諸王各齎神藥珍香，一時而至，奉獻大王，所謂虎沫七明，龍胎舍利，金暉炳煥，光明耀空。此舍利者，皆是八瓊霜珠化成舍利。王能服之，身有金姿玉顏。虎沫七明，龍胎上藥，王能服之，身立飛行，千變萬化，隨心而成。我昔學道，師於長桑道君，見賜神藥，服之得仙，後受道要，下治九夷。聞君降世，助衆生喜。又聞玉清天尊玄立影響，左臺上真託棲寒林。爲緣俱會，希音遐震，八表皆聞；虛光洞空，十方徹照。故來至此，爲敬起居。

爾時八十一仙說此語已，昇身入空，去地百仞，朝禮天尊，空中而住。爾時復有東地鬼將，名曰電豕，形長三丈，鋸牙鑿齒，銅頭鐵毛，鈎舌火氣，目似奔星，黑面赤體，牙如鷗足，脚似馬蹄，聲如擊雷，吐氣成雲。將眷屬六億餘鬼遙聞真人降世爲王，以道治國，不撓含生，願爲大國守護郊境，匡贊大王，俱乘黑雲浮空而至。頓首王前，而作是言：臣爲鬼方之王，役使遊精。諸有妖魅不賓之者，臣能噉之，生殺在己。遙聞王國人民慈善，輒率徒衆、塵穢王國，敢欲爲王而作守護。若有大聖仙士所在之處，我當給使，晨夕受事。若有齋講之所，當率徒衆而爲外護。若有外道惡人誹謗善道，衰損法衆，我當滅之，令其惡疾，毛髮墮落，與其重病。若有衆生於道場中心不端直，邪視念視，我當考之，令此惡人生身受疾，死入地獄，罪延七祖。若有衆生慈善孝順，念誦經戒，供養大道，以道爲心，我當親近，常當守衛，不令惡鬼得其衰便。唯願大王聽我徒衆衛護

道場。

大王告言：善哉善哉，我念衆生猶如一子。於汝亦爾，心無偏黨。幽顯雖殊，咸願與汝俱爲善識。

爾時諸鬼歡喜，受語禮謝大王，圍繞東城芳春之臺，敬禮真人，伏首而住。爾時復有火光惡殺六萬餘鬼，形長三丈，頭頂放光，猶如散螢，通身黑色，眼赤如火，手持鐵棒，吐氣噓人，立便倒地。毛豎寒森，悶絕迷亂，鼻口逆血。聞王有道，以正治國，不損衆生，願爲大王威伏惡逆，俱乘黑風從北方來，長跪王前，而作是言：聞王有道，惠潤廣大，一切幽顯，皆沐王恩。故率徒衆，願爲受事，利安王國，守護善人。若有法會之所，我當外護，摧伏惡魔，正諸邪道。若有衆生毀敗道場，潛生毒害，邪心惡眼，來視法衆，我當鐵棒打殺此人，或拔出其舌，或復令其眉髮禿落。若有衆生入道場中，穢身污慢，我當與其癩病，種種灾怪，所在不安，自然恐動。大王又語諸殺鬼：汝光影毒厲，不可近人，雖有威神，勿行傷夭。

當念衆生，扶持善人，願聞道法，速得轉身，成無上道。諸殺鬼受勅，歡喜而住。

爾時復有金剛之神八萬五千飛空而至，身長丈六，勇健希有，除道神力，餘不能過。翕然而至，莫知所來。常爲大道而作侍衛。先禮上方大悲天尊，次禮真人，問訊大王，宛如舊識。而作是言：真仙下世，道化有生，內外相持，人神符會，萬邦咸集，邊士俱臻。清濁混淆，真偽無辨。大聖寬宥，不問昏明。此會因緣，固非輕小，深宜戒約，以絕不真。唯願真王聽我說法，正彼道場，惠利善人，變滅凶惡，使人及非人咸尊正道。大王默而然之。

爾時金剛即於大衆之中瞑目一踴，上入青雲，奮身而下，地陷石裂，飄氣揚沙，塵飛晦日。怒目成電，齧齒如雷，叱吒千精，驅馳敢違，攘袂鼓肘，抗聲大呼，外道亡精，鬼魅失氣。爾時金剛顧盼而言：我是護法善神金剛力士，侍從大道，受事天真，影衛道場，扶持善人，糺彈罪失，察獲奸邪。一切衆

生莫犯威神。輕過流血，重釁滅形。內外整肅，勿使不精。爾時會中男女大小咸起恭敬，禮拜金剛，畢具復坐。

爾時金剛爲護法故，調伏幽明二衆之心，而說呪曰：

雷火明空，神光朗幽。毒龍四據，靈虎八周。頭巾七星，足踏斗牛。神力列宿，金鈎耀精。元首威兵，騰步虛行。中絕妖邪，下滅遊精。抽肝出膽，翻腸拔脉。左斬右剉，前烹後馘。截妖無原，收束衆怨。噉鬼使者，摧拉生吞。巫俗歌鼓，飲血食肉。形膾骨臭，魍魎翻覆。腥臊穢賤，心形詭譎。神杵碎首，金刀刎腹。藏凶匿害，忽來降伏。左秉金符，右持罪目。太一金鈴，虛皇玉節。知過不改，懸首自截。何妖不喪，何精不滅？六神不藏，七星裂血。上有真師，下有金剛。齊烝降氣，口吐靈芒。飲以月池，餉以玄霜。五藏生華，長存不殫。

爾時大鬼神王四目電光，同爲護法，銷滅不祥。守衛道場，察奸糺過，降伏惡人及諸外道、無正信者。而說



呪曰：

神風拂塵，傾拔邪根。六天喪精，五毒亡怨。金頭鐵齒，噉鬼止魂。挑光烈戶，雙景曜門。奔星殺氣，朗然無畏。百脉川流，七經調理。神安體平，長存不死。

爾時大鬼神王說此呪已，遙禮上方，後拜真君，告諸鬼曰：汝爲道侍衛，守護善人。說法之師與道無異，不得邪忤真正之氣，捉獲上聞，萬劫無赦。是時大鬼神王語會中諸來法衆而作是言：我爲天帝驅馳，職當歸道，扶持新學、入道初門一切男女，攝除亂意，不得邪視，傾聽犯戒。威儀察護，生人同鬼受考。不但殺鬼，亦以降伏強梁，殺伏邪心，調理生人。無正信者聞此神呪，應起恭敬。此神呪者，是天帝威章、自然之文。諸天魔王、五方鬼將、真官地司助道興化，守護家國，安靖道場，扶衛善人，皆誦威章，消伏不真，馘滅凶試，摧落邪鋒。外道惡人喪精失氣，雜毒魍魎遙聞敬畏。諸有法會齋講之處，道場俗舍，我等徒衆常在

觀之，齋戒如法。丹誠所爲，大道降臨，福德立至。身心睽背，爲利名聲，誠不得已而爲齋者，我不守衛，大道不降，魍魎遊精，雜毒下鬼，臨饗其齋。輕道慢法，三司糾彈。道不虛行，要在丹心，非可假求資貨貿易。奉道之子深可慎之。

爾時鬼將說此語已，却一面立，儼然不動。

爾時大王車駕西域，迎載父母，百辟卿士皆執花幡、鼓衆伎樂，大備威儀，迎載父母，還芳春之臺，焚香頓首。大悲天尊次禮真師，問訊法衆，歡喜委曲。太帝年老，夫人亦衰。大王孝順，瞻視顏色，心恒喜懼。

爾時真師命其復坐，而告太帝曰：汝之父子名善知識。汝是紫微之精，下託凡胎，應運爲帝。大王重光是玉清上真，化生汝門。雖爲世帝，形不衰老，皆是自然無上法身。

爾時真師又語大王言：九夷仙人遺王神藥，可以救老。命汝父母俱時東向，丹水服之。是時重光自開寶奩，

取藥持水，饋於二親。父母受，東向長跪而服。大王取八十杯，分作三分，一分奉上真師，真師不受。亦與父母，丹水服之。服之七日，面有金姿玉顏，行步如翔，足纔履地，自抑其身，委縱其形，立便飛騰。又從真師奉受靈書雲篆，和神保生三萬六千字，晨夕吟誦。頂浮五氣，目有浮光，神彩清澄，威容嚴麗，警響通徹，紫氣連天，顏貌反嬰，素髮歸玄，出有入無。進退之間，合衆歡喜，爲王作禮。仰視上方，慶霄忽變青光，以照會東。復良久間，變成赤光，以照會南。復良久間，變成白光，以照會西。復良久間，變成黑光，以照會北。復良久間，變成黃光，以照會中。五色光中各有一音，合會流變，寥亮清雅。五光連雲，猶如天虹，皎潔洞徹。須臾之間，會中真師又放眉間四色光明，以應上方，所謂慈光、悲光、善光、信光。是時大會仰視真光，身心忘倦。又聞八色光明有自然音樂，心音開悟，如服甘露。是時諸戎八萬餘人睹此光已，目冥心悶，猶如大醉，六識

閉塞，低倒無知。

爾時國中有一大臣，名曰守正，見諸夷人低頓無知，前白真師而作是言：我等宿福，生逢有道，得睹真師，見道威神，心開意悟，耳目聰明。傾心注玄，歡喜忘倦。不審羣夷何故低倒，六識閉塞，神似昏醉？身負何罪，迷悶失志？唯願真師示所未聞，令衆開悟，悉其緣業。真師答言：大哉，結固業緣不善。汝當諦聽，吾爲汝說。善男子，汝今當知，諸戎狄等初建逆心，招集凶險，上天縱毒，下鬼伐之。所有驍壯，一時殄滅。國土空虛，十遺其九。又悉遭疫，疢痛苦痛，羊馬死盡，羣戎饑餓，寒凍殞逝，不可計數。此諸胡鬼，悉詣天帝，言訟其主，冤魂執之，惡業不忘。是諸戎夷元來悔罪，不圖聞道，雖筮生會，死氣不消，身神被拘，形容無魂。以是因緣，使之低倒，迷昏睡熟，爲此邪。

爾時真師說此語已，大衆一時顧視諸夷，忽見地蒸黑氣，平高一丈，蔽覆諸夷。色如聚墨，黯無分別。忽聞

黑氣之中有冤魂吟响，或大或小，悲鳴悽咽。是諸戎狄各於睡中見其眷屬，相向悲苦，冥目自撲，遍體流血，號咷哮吼，叫喚嗚咽，猶如豨鳴，聽之驚人。合衆傷痛，彈指泣淚。真師告曰：善惡之業，生死相隨。譬猶形影，無暫捨離。道雖愍之，當如其何。此黑氣者名曰陰氣，又名殺氣，又名怨氣，又名尸氣，又名濁氣。此是坤母地氣，天雨黑灰壅諸夷身，毛髮拳縮，形體垢膩。

爾時真人俯而彈指，大地震動。須臾之頃，上方慶霄之中微灑甘雨，以沐諸胡，香風下流，以熏諸胡。六日六夜，目始能開。一十二日，黑氣始消。羣胡形體，悉皆消瘦，無復顏色。鼻流涕血，兩眼垂淚，尸氣染身，通體如墨，心眼朦朧，視聽不諦，振掉怛忽。譬如狂人，眼中各見冤家，雜畜諸鬼揮刀驅之。時諸戎狄舉手捫虛，四散迸走，馳出城外。先所乘象見之驚奔，藏伏草澤，莫知所在。諸戎狄等見世怨對，眉髮禿落，七孔流血，徹骨蟲癩，忘失本心，善惡業緣，如聲響應，容谷無情，隨

人所呼。一切善惡，亦復如是，不迴易。

爾時大王愍之，狼狽自出，道前叩頭；玄師爲諸戎夷攝取怨對，說法度脫。爾時玄師從座而起，三捻焚香，遙禮上方玉清天尊。禮訖復座。須臾之頃，分形萬億，攝取戎鬼，來入會中，爲說三寶第一之義，所謂慈悲、忍辱爲諸行先。是諸功德，第一中最。一切幽明，若離此者，長墮惡道，永不聞法。又爲諸鬼說離生死法，不顛倒、不縛着。復觀實際，空無所有，妄想分別，見有怨親。實際既空，怨親亦空。

是時真師大混玄澍，沐浴羣鬼。次爲諸鬼說無上道法，所謂一道一法，一慈悲力，一受一生，永無變易。法變易法，永離生死。既無生死，則無怨對。諸結縛着之法，永墜生死無底大河，業風所飄，波浪不息。離此法岸，永沒泥滓。汝諸鬼等欲離生死，應捨大怨，常行一慈。設復有人衰損我者，我爲虛受，不以惡心加報於彼。如此之法，名離大怨。若離大怨，則能遠離

生死之怨。大事已辨，名之無餘。一切怖畏不能恐動，深根固蒂，不爲業風之所傾拔。譬如大士，不吝財寶，負債速還，有財不收，斷除一切怨家債主，求於道寶，爲法施主，不吝塵穢無明之財。是時羣鬼聞真師說微妙法，悉捨本心，歡喜踴躍，皆發忍辱無上道心。上元真帝應時心開，洞發慈光，下照羣鬼。是時羣鬼睹此神力，深信道法，曉悟長生常住之道，心無變易，捨離怨對，虛己和敬。一切異類皆爲知識，爲欲聞法，求入道場。真人許之。大眾作禮，安坐北面，儼然不動。

是時諸戎身所患疾登即差愈，亦悉同時各見真人爲其說法，身心開悟，皆發道意，俱得解脫。真師告曰：汝諸戎等，罪業結固，障累未銷，未得入會。且於城外罽帳寥立，專心願念，各自悔過，一日六時，遙禮城中法會之所。

之場？真師坐而熟告之言：此諸戎狄前身先是此國中人，住在玄谷之陰。以其前身爲大齋主，因散席之次，相共田獵，放火燒山，傷殺禽獸三百餘命。以其承齋之功德不圓，就生於邊地，作戎狄主，連今三生。承此禽慶，故得見我。向不殺生，應生中國富貴之門。此戎今生餘報未盡，更相率欲起叛心，謀害大國道德天王。羣鬼縱毒，殺其家國，十損其九，冤魂上訴，身神被執。以是因緣，未得入道，服於正法。故令住此城外，遙禮法會。闍人聞說，重問真師：弟子職當守衛，掌知車駕，城門多事，四方輻湊。奉勅在此，部分迴列，使車騎出入，行伍次第，諸聽法人教其進止。爲此煩劇，不得入會，禮拜聽法。晨夕願念，翹想丹盡，唯願真師哀愍孤露，爲作依怙。真師告曰：汝但有專誠篤志。大道遙鑒，不論內外，及以近遠。大道常以平等濟物，邊遠戎魂，尚沾玄化。汝以有福，親衛城門。一切善人晨夕攸往。汝善知識，最廣餘人，今又見我，真善知識。憶昔

往劫，我下爲緣，託棲丹霍，七十小劫，坐一林間，爲諸仙人說三十二天住壽之法。汝於爾時受身鴛鴦，三百生中依棲丹林，晨夕見我，或時復銜棗果獻供法衆。乘此因緣，生於中國，重得見我。闍人聞真人之言，悲涕嗟歎，頓首伏地。

爾時真君又告闍人曰：汝起，取水沐浴汝身。沐浴竟已，真人又曰：燒香敬禮上方慶霄之中大悲真帝，然後伏地。爾時真人以自在神力，令此闍人心中忽然開悟，見其前生所經業緣，了了分明。起禮真君，號咷悲泣。

真君告曰：汝爲小罪，今身之中未得成道。爲汝知聞，鞭撻人畜，冥司注記，以汝毒心。向不爲此，生身合度。汝當努力，兢兢戒慎，官犯衆惡，後身之中，正得昇度。闍人悲泣，重白真人：不審此愆可首悔不？真人告曰：汝自終身悔過，始應免罪。闍人又問：不審道尊往劫爲諸仙說諸住壽，其法祕要，可得聞乎？真人告曰：我分一身，即時在此會中爲仙人、道士及

王父太帝王，欲序說上天住壽之法。汝欲聞者，隨我往聽。聞人答言：奉勅典衛，不敢遠游。真君語曰：我已分汝之身為兩人也。聞人後顧，又見一身執事知當。乃知真師上道威力，隨心變化。乃隨真師入會聽法。復見座上有一真師，金容相似，大眾人民不能分別真應之事。

爾時聞人請問真師：無上大道，至真至妙，分形散體，為得幾身？答曰：無上大道分身為氣，天上地下無所不在。雖云真應，實不曾異。大眾歎言，道無不在。方知萬物皆有道性，得一道者無不太平。

爾時道君告諸大眾曰：此慾界之中，同於一天，四方言之，名曰四天。四天之中，亦有真仙，不願上昇，治在此天。天號雖殊，上下仙壽，等無優劣，俱不退轉。或以應身亦有生滅，神化隱遷，希微常住，湛然不動。此四天下，男女善人學成後聖，住此世壽，修短任意。或入名山洞府，及諸小天之中，億百千劫。後願上昇，先入太黃天

中，住壽一億萬劫。次昇太明天中，住壽二億萬劫。次昇何童天中，住壽三億萬劫。次昇平育天中，住壽四億萬劫。次昇元明天中，住壽五億萬劫。次昇七曜天中，住壽六億萬劫。次昇趙衡天中，住壽七億萬劫。次昇蒙翳天中，住壽八億萬劫。次昇和陽天中，住壽九億萬劫。次昇恭華天中，住壽十億萬劫。次昇耀明天中，住壽十一億萬劫。次昇竺落天中，住壽十二億萬劫。是諸真仙欲住天中者，不願上昇，亦隨其意，勝報無盡，不論上下。次昇入虛明天中，住壽十三億萬劫。次昇入端靜天中，住壽十四億萬劫。次昇入玄明天中，住壽十五億萬劫。次昇入極瑤天中，住壽十六億萬劫。次昇入元載天中，住壽十七億萬劫。次昇入皇崖天中，住壽十八億萬劫。次昇入顯定天中，住壽十九億萬劫。次昇入始皇天中，住壽二十億萬劫。次昇入浮容天中，住壽三十億萬劫。次昇入無思天中，住壽四十億萬劫。次昇入阮樂天中，住壽八千萬億劫。

次昇入無極天中，住壽九千萬億劫。次昇入皓庭天中，住壽百千萬億劫。次昇入元洞天中，住壽千千萬億劫。又次昇入妙成天中，住壽萬萬億億劫。次昇禁上天中，住壽億億億劫。次昇入常融天中，住壽兆兆世微塵之劫。次昇入玉隆天中，住壽兆兆大地微塵之劫。次昇入梵度天中，自在住壽平育天中，上昇太虛，攸往大羅，入於無形，寥廓玄冥。從皇曾天，上至太虛天，無成壞住止之數。計於欲界劫運，以示衆生。已上道境，名之虛無。道亦虛生，自然之形，光氣成體，不可名言。皇曾已上天大聖亦然。及至慾界四天之中，名山洞府，後聖真仙雖睹天地，數有劫運，形隨日新，神力自大，永不退轉，常住不變。一階仙位，永斷生死，綿綿長存，不可思議。不如邪俗教中經書注內，邪俗之妖，竊號位仙，九萬大劫，生天受樂，轉還退墮。此是精鬼魍魎，與正真之道更相違背。聞此說者，即是邪說，非真正也。

爾時太帝左侍名曰大章，聰敏中

正，立性好道。未達真帝，心猶在疑，前進頓首，上啓道君而作是言：臣生年已二十有五，仕知內史，直侍太極，人世至尊。四海子來，百司供給，天下宗仰，果報難加。年來百餘，勞生萬慮，雖處廟堂，心遊遐外，治民事天，心勤寐寤。行步不逮，耳目失聰，筋窮力衰，髓腦枯竭，氣力微弱，動止苦辛。每瞻顏色，五情如切，加以悲顧，寢食無寧。生未百年，萬種煩毒。不審真仙之士塵劫長存，形神不亡，饑勞辛苦。

是時大章語未卒間，真師神力，急令太帝容儀復嬰，膚體充潔，猶如凝脂。太帝夫人色美髮黑，肌如冰雪，齒白齊密，氣力倍常，立便上昇慶霄之上，朝謁天尊。亦能五變，所謂入木如木，入火如火，入金如金，入水土如水，昇玄步虛，立便無累。

爾時真君即入無形，莫知所在。良久而見，坐空中，去地千丈，八色雲龍以捧神足，七色慶霄覆蓋隨磨。三景環照，身洞慈光，安庠而言，語大章

曰：七明慮沫，五色舍利，申下二藥。大王父母服之，尚爾神力自在，況於至道，可得言乎？行尸短見，敢於道前，特疑大聖，示汝小道，威力何如？無上大道改凡成聖，即此之身昇入無形，大則無外，小入細微。我道能之，自外邪道要在灰滅，不能即身而成法身。由其外法，神木微弱，不能存濟。以生爲累，寒暑破體，是非交胸，疾患饑飽，種種煩毒。生老病死，無明之形，不任久處，求早滅度。不如上道轉凡成聖，體如金剛，塵劫如瞬，形隨日新，出入無間，何憂累乎？生死象斷，煩惱不繼，誰能勞之？昇入無形，誰能滅之？復歸本除，同於太空，誰能見之？神變自在，存亡恍惚，誰能知之？不知其始，焉知其終。萬天在心，塵界入毫，本相如故。汝意云何？

是時大章匍匐下殿，散髮叩頭，悔過自責。大王重光見其父母，忽爾昇玄，焚香仰天，叩頭禮拜天尊，頓首真君，慙謝九夷八十一仙，而作是言：衆緣諧遂，聖凡慶快。願南蠻、西戎、北

狄，邊陲異落，非法無聞，戴角披毛，獸心人面，有情無識，飲血茹毛，蠢動含生，幽明人鬼，願生死開度，同入道流。說此語已，上方慶霄大悲天尊與即座真君俱放慈光，照明下土，慈音普被，異類咸聞，各見天尊下在其前，爲說六度、六通之道，自在解脫無上法門。是時大會聞天尊所說，心開意悟，知有爲法不離生死，出家修道皆得長存。

爾時大悲天尊通流法雨，隨其緣業，潤有淺深，平等見形。衆生睹相，容貌各異，一音說法。衆生領受，悟解不同，信用相反，而不相似。而此會中略有三種大王父母，運偶善緣，不動而感，成道須臾。神鄉男女，受用惠利，能令其身以收長生，長守清虛，與道爲偶，生身受度，形神不灰。猶如金剛，不可毀壞。是諸戎夷聞說長生，心則迷悶，神精狂亂，身毛皆豎，或復五體緩縱，不能自持，昏憤睡熟，呼吼無知。大道愍之，勤勤不舍。

爾時真師語諸夷言：各起燒香，自申願行。時諸戎夷焚香訖已，業緣

拘束，不得餘言。皆願修行因緣之法，一時起請大道真師爲說滅度因緣之道。真師然之。大衆歡喜，一時作禮，聞真師爲說滅度之法。諸戎狄等無復憤非乎孔之患。

真師又告諸戎曰：善男子，修道樹因，譬如良農，三陽之時，善役調牛，鉤引懸澍，隄捍綿密，踏乘通濶，加以好糞；次選良種，治擇蕪穢，溫濕宜之；然後調樹，芸耗莠稗，壅護苗根，晨夕看視，無令六畜侵食踐蹋。如是苗子三月假生，萋蔚繁盛，水陸通美，無有蝥螘。涼秋結實，高下通熟。即命僮僕收藏貯積，藏吏監守，不令餘耗，唯供食用，儲備盈長，家給豐足，傍惠貧乏，周濟飢匱，施廣散大，恩德弘普，功聞上天。一切幽明，咸皆護善。福德成就，利涉合諧，所求如意，無願不成。如是良農，終卒獲利，不可稱量。善男子，汝等大衆於道福田勤行修習，心無懈倦。如彼良農，必獲果報而不差也。善男子，往昔劫中，玄谷之北休酋國王夫人有娠，雙誕二子，六歲

已來，形貌相似。父王重之，每在懷抱。年至七歲，遠祈師傳，一種訓之。其王自名此兒，一曰紹光，二曰紹明。二子同學。父王時時躬往約勅，令不怠惰。師以義方，授其業藝。爾時二子晨朝之時，俱會受業，受意思義，各還一院。爾時紹光誦曰上口，默坐思惟，晨夕不寐。爾時紹明立性疏懶，又多昏睡，耽酒嗜色，神情奔躁。雖讀其文，都不思義。若見父王，巧能方便，手不釋簡。性又陰惡。爾時師匠不敢專制。於是紹明常懷刀刃，凶險悖戾。年至十七，集羣臣議立太子，令諸公卿對衆簡閱，讎校優劣。紹光伎藝，無言不讎，遍該世伎，性又慈善。次問紹明，有問無對，即枉師傅，授業遍黨。師對王言：王子性戾，不遵教命，不授臣訓，情性凶險。大王不信，試檢懷抱，果懷刀刃。師言：臣不自衛，焉敢訓之。王即擯出紹明於城外立。後懷怨心，便生謀逆，未及聚衆，已被察獲。心懼刑網，奔入邊郊，鄰國不舍，執而送之。羞見父王，祕氣而死。羣臣議

之，以爲逆子亂臣，不收葬，棄於荒外。鳥獸蟲蟻嫌其凶逆，不噉其肉，脂膏滂沱，流洿草澤。一爲不信，自取滅亡，天地不哀，人神共疾，魂爽徒謫，萬劫不原。縱得出生，亦失人道。爾時紹光拜爲太子，大會公卿，普赦天下，焚香登殿，遙望如神，色正顏和，德含春日。四海無事，天下太平。方外子來，龜朋遠萃，匡贊王國，人神合符。風雨以時，百穀成熟。爾時太子溫仁忠恕，慈善孝敬。年至三十，父王禪祚，即以國政付囑太子。太子三辭不受。又恐逆命，非孝子也。即以頓首父王，受天正位，以道治國，不施雜令。未滿一年，頌聲溢路，人神交歸，衆瑞紛錯，芝草盈庭，麟鳳翔集，天人下遊，仙雲四張。上元真宰以爲門師，授其道要，身佩生籙，威神扶衛。年至九十，老而更丁，色如童稚，耳目聰明，生氣布養，五藏華榮，白髮如黑，朽齒更生。太醫仙王爲合神藥，復氣如形，終身不衰。年百七十，一旦委國，上騰太霄。于今治在太清天中，處於玉華瓊臺，長存無

窮，猶故修學無上道法。一生立信，經必昌期。道不負人，其義斯在。善男子，汝諸衆等於道立信，勤修功行，身無缺死，名之道基。

爾時諸戎聞說至法，領受歡喜，大衆頂禮，一時開悟因緣之道，心無緣外。着各各嚴裝，所乘之象，辭別天真，各還本國。是時胡鬼乘此法力，身度南宮，受生東方極樂世界有道之國。是時中國男子亦各還家，尊修至法。一國道士在會中者，九萬七千人，皆得六通，無礙自在。或隨其人，周遊下界。九夷諸仙昇入無形，莫知所在。大王父母猶昇慶霄，玉清天尊錫太帝之身，號爲洞玄、太玄。又錫夫人爲玄臺仙君，給以女仙侍衛二十四人，飛蓋焱輪，以昇洞天，主諸新學女冠道士。

爾時真師爲世救焚，猶在寒林。玉清天尊與諸真帝常在玄中，湛然不動，四時八節時放光音。一切有生咸皆恃賴。

太上大道玉清經卷之七

## 太上大道玉清經卷之八

### 幽棲品第十八

爾時玉清天中雲宮右臺真宰上相，名曰慈忍，一號通玄，位總三十四天上司，主知三界興衰、灾否之事，掌握諸天之樞，總持九地之機；迴轉靈綱，旋運玉衡，瑩拂二景，開明五辰，灑潤甘露，蒸發雲雨，化諸未化，編隸幽藏。含氣之徒不失所宜。役使群龍，驅馳萬神，調御正氣，流布仁和；使四序不虧，八節固常，二十四氣不失恒則。正定黃道，開闢天原。遏陰成於巨冥，鎮陽長於淥波。消火精於炎方，滅水靈於北阿，植五芝於天田，孕應帝於紫微。十二真官變育有生，六儀威神環輔形魂。雲書自明，天經朗虛。萬兆則之，智慧日生。不言而化，不爲而成。掩偏氣於六天，置四司以主生，植百穀以繼命，顯神藥以導生。億百千劫，深根不傾。以道續絕，故得如

此。

爾時有大唐世界行道國王名曰昭德，其姓玄氏。合國臣子專心行道。時有邊邦小國三萬六千，國王遙睹威神，迴心想念，各將臣宰陳大威儀，香花幢蓋，作妙音聲，披誠露膽，內外殫盡，從初發心。行至道場，念念相續，無諸雜想。聚集大國，焚香陳願，渴仰上方太空之中，翹誠願念，如有所待。願爲九玄七祖、一切兆民，并及王身，而作是言：願得無上大道，覆護憐憫，延續劫運，慈造衆生，解脫網羅，赦諸愆咎。使幽明兩途，同得開悟。信根成立，堪任至法，見身成道。是諸國王陳此上願，一日一夜，六時啓請；一日一夜，六時作樂。其音和雅，微妙清暢，能令聞者皆發道心，捨惡從善，誠不疑貳。香烟上騰，薰於帝庭；微言清暢，聞於真宰。

爾時雲宮天尊以正月七日晨朝之時，應有生以無形，教含識以希聲；垂神足於太虛之表，彈法指於遙空之中。真光掩日，洞朗無幽，微音清暢，隨隸

應之。瑩拭凡眼，開決俗耳，揮空洞之音，而讚慈忍曰：善哉善哉，慈忍護世，得力無比。常以道眼而視衆生，常以道心而憫衆生，常以道手而携衆生，常以道體而化衆生，常以道足而導衆生，常以道父而子衆生，常以道母而育衆生，常以道朋而友衆生。時諸天子遙聞上方光音清徹，歡喜攝念，各作是言：道不虛行，果在今日。是諸天子倍加精進，都忘雜想，唯道自理，不慕其餘。雖聞希音，猶限三萬六千天地。但願至道無違，敢希玄鑒，乞骨肉俱飛，永爲真仙，九祖獲慶，魂度南宮，即是天下太平，人民歡樂。

爾時雲宮天尊又暢微音，而告諸王曰：天子則天而無心，民奉天子而無事。天子與民俱太平，即此無憂亦無慮。善男子，無上大道雖居三萬六千玄天之上，俯觀凡境，猶如指掌。汝諸王等，精修至道而不懈者，未有不成立聖者也。譬如良農，善能播植，既植其母，必得其子。汝守太平之道，焉得不處常樂？我施至法，與諸上真主知

諸大而得太平。上真化下，與我無異。汝欲奉道，志願生身而得度者，此亦不難，但問志之何如，未有學而不成，未有種而不生。子審其原，自果其流，理固自然，必定無惑。

爾時諸王雖欽和教，而心未通真，私心願念，欲見天尊。天尊已知其意，即命上真通玄，擊太空神磬，演出虛琴之辭，而語諸王曰：虛白爲道本，太虛爲道體。虛白無所染，道本無所邪。真人重至法，塵俗慕誼誼。願看行尸間，接踵驚榮華。眄此雲宮真，向道皆驕奢。耳目不視聽，聰察無所遮。寂靜守無爲，檢志勿紛葩。圓通無異趣，忘想是真家。法體常虛無，其量包太空。唯當裂塵網，摧除煩惱藂。孤標流俗外，冥然與道同。道本無所見，內視自觀心。結固不能繼，障累日銷沉。高步雲崖端，無中咀德音。安坐不移處，賢聖自相尋。所在存惠利，屏跡棲山林。披褐挹流霞，焚香陳子心。功成同道體，萬化無不昇。塵劫猶未旦，冥冥無始終。告汝登真機，德滿道彌

冲。

爾時諸王睹此神異，歎未曾有，各相謂言：大道威神，無所不在。太虛之聲，尚演微辭。金口之言，若爲微妙。計我迴心，未過三月，已得見聞無上至法。終身修習，定不廢捐。我等徒衆已得道恩，不當退敗，失去前功。各捨王位，從道出家，生身受度，豈不快樂？耽翫榮名，權握四海，不免威刑，亡失善利，生老病死，凋逝朽爛，沉淪滓濁，良可爲哀。時諸天王登即禪位，付囑勳臣，却後七月七日，焚香禮虛。大臣誓願，願從大道，求乞出家，捨世煩惱，棲隱山林，請入玄臺之中。作此願已。

爾時三萬六千玄天，及十方國土真闕光明，進於常日。仙霞慶霄，流洒甘露。九色之雲，結成鳳文，羅絡四天，光映下界。微風吟籟，噓唱靈章。天樂自鳴，諷詠真經。衆音和會，不可名目。皆是雲宮真帝流布道氣，演出正音；化生王身，使真氣速感，改凡成聖。爾時真帝但以威神，應感諸王，不



以法身對凡，演說如天，則道不言而言，但以四時化成萬物。天爲道子，猶能若斯。無上大道以氣化物，真精流變，不可見聞。唯得度者，而自見聞；不受度者，未能得見。

爾時諸王各各仰視上方，採誦天經、雲書靈章三十九篇，以十月七日焚香禮願，請入玄臺之中。是時諸王已能出入無形，坐在立亡，恍惚難測。目有流光，身生五氣。既入玄臺，各坐於瓊樹之下，廕以瑤枝，坐以金床，雲龍俠座，仙童立侍，天給香花，以承正足。背以蒼壁之垣，面以金精之池、五河之靈，潤以瓊津。九地之母植種金芝，龍英吐氣，芬芳周流。是時諸王心眼明朗，遙睹真帝近在目前，胎結銷亡，洞鑒無礙。不但三萬六千天地、十方世界猶如指掌。是時諸王各坐瓊林之下，九億大劫而不移處。爾時雲宮真帝遙錫諸王中真之號。却後百億大劫，又錫上真之任。後又萬億大劫，錫王後聖道君之任，號太虛真王，于今治在常玄天之中。諸王之身爲聞道故，

形貌反嬰，猶若盛年。十六童子亦能分身，遍滿虛空，攝形歸無，絕凡視聽，非是下仙四衆之人所能知也。所謂幽通藏用，微妙之至，無以比譬。或見象而無言，或有言而無象。行一事終會，萬道之宗，總衆妙門，則變通無極。衰俗紛擾，虛談僞辨，徒勞始卒，無的依憑。痛傷流俗，糜爛沉溺，學無明師，又無真經，安得周衛而免死厄。好真之士，可不研精，詳審真僞，驗其邪正。求其機要，不在狐疑。專心祈度，誠無迷惑。上士學道，即身成聖；中士學道，蟬化隱遷，猶應示死而不滅亡；下士學道，積劫勞苦，出入生死，不可計劫。

道言：此諸國王亦勞生死，積劫勤苦，治民事天，功聞上帝。信用大道，棄捨世榮，入山求道，嘗味百藥，吐故納新，精研至經，明了深義，常行慈悲，專利廣大，專志守一，遠世塵濁，道使之然。俱得受度而成後聖。却後計得百萬億大劫上元真道，遷於三萬六千天王後聖道君，各治一天，遞知化

世。上元真帝昇入無形，息諸動用，雖復寂寥，虛豁泯默，無心應物，不違神齊影響，無情而運，不覺有爲，是故名之息諸動用。

爾時大唐世界弘道九劫，却後八年，歲在壬子正月七日，有一大臣，名曰廣德，其姓王氏，年已百歲。聽察未掩，氣力猶強。以正輔國，不枉人心，蠢動含靈，皆沐其德，四時八節，常建齋壇，罄其生資，盡心供養。比國諸臣聞其中正，遙仰德音，密遣使命賫持信好，遙奉大臣。如是不絕，足滿九年。大臣廣德，遙感其意，晨夕焚香。香烟潛薰鄰國諸臣，遍體香氣。每夕得夢，夢見神人，身長丈六，對近目前。如是諸臣心各自念而作是言：將非是我供養德人？大道感念，見我威容。遙誠信向，彌加恭敬。亦各焚香，晨夕禮願，願得其身親奉大臣，精至齋潔，足滿千日。却後十月七日夜半之時，忽見中庭有二童子手執神燭，宣大臣教云：欲相見，評論道德。諸神忽聞童子之言，匍匐出外，禮訊童子，目注神

燭，不暇還別。覺行八步，奄見大城，臺閣宮闕，得睹大臣廣德，作禮問訊。良久之間，自思神異，始覺已踰八千餘里。比近之臣，亦有三千五千里間。如一瞬頃，已至中國。

爾時總有五萬九千大臣，俱發道心，願捨名位，入山修道。執燭童子總有一十一萬八千。童子俱是雲宮右臺中真侍者，遐感好道之人，炳神燭而照之，令心正體堅，目不邪視，耳絕淫聽，執持道要，行趨道場。內外調善，果業成熟。速得道真神燭之光。功德如是。

爾時童子聚諸神燭，爲一惠炬，縱廣正等六百餘里，其光清涼，洞徹照曜無窮。時諸大臣睹此惠炬，心眼洞明，悉皆歎言：未曾有也。先禮童子，次禮惠炬，而作是言：弟子凡膚，肌腥骨臭，夙無餘慶，不樹善緣，德薄功微，不足聞道。不期大道慈憐，示以希有，不勝恩造，喜懼交集。童子告言：大道慈悲，不須遜謝。汝等諸人棄榮世祿，山棲求道，先當入此智炬之中，然後秉

節除魔，高棲巖岫，咀嚼真經，諷詠天書。拂圓鏡之遊塵，揮伏日之金精。神室凝珠，八威吐芒，香烟上騰，以陳子心。功聞帝庭，上昇紫晨。不久之間，勤苦山林。我道至神，不虛見聞。精至之士而能得之。子欲山棲，當奉明戒，勿傷所疾，謂養嬰孩，勿犯不淨，動止須清。一事有虧，萬途盡傾。子未見聞，安得自明。

時諸臣等從惠炬出，長跪請戒。童子告言：戒言慎也。子雖有智，猶未辨微。聰利之人自恃其智，輕犯所忌，不懼威神，身未成道，猶處方圓，俯仰失儀，勞而無冀。一至自在，隨意無礙，昇入無形，都忘衆相。是時童子即爲諸臣而說戒曰：子欲山棲，先擯塵俗勞累之事，道所不爲者，勿強爲之；真所不履者，勿強履之。但知行道存身，不慕餘事。欲棄人世而棲山林者，先求同志之人，不過三五。上士山棲，不過二三。多則喧鬧，心意不專，互相窺瞰，輕觸威神。不履污穢，男女混雜，講及俗事，坐卧慢處，心遊邪肆，察

聽外事。雖居山林，心志不一，穢垢通津，邪風往來，髓腦枯竭，牙凋喪明。怠不栖沐，皮膚積垢。真氣遠離，無所希冀。裸露三光，善神不祐。耽睡懶起，供繕怠墮。真君青簡，無功可記；有罪不誨，九玄被考，四司糾彈，立退見敗。思慮不專，雜想紛擾，真精不守，邪鬼來任。不辨邪正，妄生異見。真人造房，不知恭敬。衣服法具，非類雜用，塵濁流淹，魂神沉滯。此首便利，不知背向，洿慢神泉，地司舉愆，罪盈黑簿，生身受持。或竊覽天經，妄授不真，侍經舉過，釁及九玄。或泄露幽密，輕慢真文；或大言大語，大噴大喜，陰經畜泄，內外失和。或泄真誥，自陳夢想；或食肉飲酒，味嗜薰辛，藏神煩惱，亡失正氣。或朝禮燒香，顧眄迴視，招魅來禍，上帝不聞。如此禁戒，真道所疾。隱學之士，深宜慎之。爾時童子告諸臣言：善男子，學道如道，求邪如邪。以類推之，則可知也。汝等雖賢，未辨聖教。諸學聖道者，聖言正也。以正事求之，然後可以免脫

死厄，綿綿長存。善男子，修吾道者，即能變練形神，轉凡成聖，不更受死，昇入無形，衆累不繼。

爾時諸臣從地而起，長跪答曰：臣等雖有向道之心，未明道義，不解科格幽靄至理，或恐夙不樹功，無德可恃。年既朽邁，筋力衰微，忽之禍方，永隔生道。情鬱悒，煩惱纏懷。復聞世人誹謗大道，而作是言云：學道之人不免生死，輒以輕陳世說，干忤真君。願爲決疑，消除憂慮。真童告言：善男子，汝所云者，愚人狂言，非至聖說。何以故？往昔之時，有愚癡之黨，兄弟三人，竊聞至士避害，棲庇山林，斟酌玄流，咀嚼甘露，形神不灰，色如童子，億百千劫，綿綿長存。不知至法精微，虛白玄妙。而兄弟三人自師短見，便學不死。第一大兄名曰冥子，穿鑿懸岳，冶鐵爲鑱，繫以一床，空中而坐。無所服御，饑渴而死。其第二弟名曰大閻，乘筏入海，卒遇大風，遂至沉溺。其第三弟名曰蠱生，自計避死，深入石穴，忽被毒龍之所吞噬。

在後凡庸，相承不絕，因以書記，而爲盛談，不達深義，便謂至人學同於此，傳說惑亂，輕泄下凡。世之聾盲，良可傷之。歎汝等諸人欲學真道，勿信邪說，喪汝一生；非唯一生，無量生中不得見道。樹果之人，雖經初因，必定當知剋獲果報。若住惡因之中而修功者，億千萬劫輪轉惡因之中，不能得果。如人學邪，生生相續，邪因不絕，無有因緣得入正道。學正亦爾。真人上士無處不正，所謂正身、正心、正慧、正命。命若有盡，不名正命；慧若有邪，不名正慧。善男子，汝今當知，道不虛行，傳得其人；傳不得人，是名泄慢。禁戒嚴重，不可不知。

爾時諸臣奉禁戒已，又更啓請真童，求受保神內經、生魂育魄之道。真童又言：保神內經，生魂育魄之道，並是龍章鳳書、雲篆天文，光彩洞映，起死迴骸。一名諸天寶文。天無此文，不能廣覆；地無此文，不能生成；日月無此文，不能照曜；星宿無此文，不能正躔次；河海無此文，源流枯竭；

天子無此文，萬兆不化。此經者，是上皇所寶，九萬大劫一時下世。我雖奉無上真帝金口之勅，授汝入山之科，未奉別教，授度寶經之信。汝欲聞見，且待須臾。於是童子焚香靜念，遙禮上方，長跪而住。爾時諸臣亦以燒香，叩頭伏地。始旦中，忽覺上方神香酷烈，下薰衆人。香花進日，九色羅映，鬱然滿目。過日至夜，二更之後，九色流霞明於太虛，香風吹霞，結成天書，字文一丈，光芒煜燦，星月不見。又聞天樂遍於十方，和雅寥亮，無以爲喻。九日九夜，其音始畢。須臾之頃，忽聞流霞之中有人清唱保生內篇之首，窈窕寥亮，汪洋宛轉，徐庠和雅，韻動浮雲，天雨香花，霏霏霏霏。其流霞之狀，或枯或潤，籠籠離離。乍見金容尊儀，列坐無數，猶如雲龍初會、九真大集，威儀容與，霞衣霓裳，逐風迴旋，蜿蜿輕妙，如雲龍之在虛，類舞鳳之翔空。左鐘右磬，音節交和，乍近乍遠，乍高乍低。天清氣朗，四海無波。水陸飛走，異類群狎，悉皆仰視而聽法音。其篇目

曰：七氣成真，六儀運虛，五靈續絕，二曜扶衰。旋綱躡空，飛步雲宮，胚胎有始，塵劫無終。金城孕質，玉洞凝神，真氣內養，以成聖人。上入六虛，下洞幽泉，雲宮寶闕，中有真魂，出入福鄉，周旋生門，咀嚼靈芝，灌漱金泉。甘露川流，懸澍丹田。紫霞朝映，三氣凝烟。瓊室化仙，安坐金蓮。真儀掩日，塵劫爲年。

爾時諸臣聞雲宮上真清諷靈篇，誦詠道經，各各顧視，衆人氣色如雲，心中自明，三際之事，了了分明。身轉自昇，隨意立果，無有滯礙。真童問諸臣曰：汝聞上方真宰吟誦寶經，威神潛感靈驗，須臾與道合同，豈不快乎？夫學道得真，果不移身。汝等諸人先弘誓願，入山求道。上元真帝愍汝殷勤，知汝不退，成就汝身，令速得道。汝等猶有本願，法當棲山，教諸後學。爾時真帝遙錫諸臣上真之號。時諸上真遙禮上帝，雖隔三萬六千玄天之中，以通達故，如對目前，道合無言，不聞所陳。

爾時上真一時昇空，上登崑崙，治山正中，四時八節，上昇玉清，謁於雲宮。無上大道或時停留，九萬大劫，下遊四天，度諸後學，隨類見形，同其音聲而爲說法，皆爲饒益，無量無邊，不可思議。諸後學之人，不懷山水，無清高之志，狎在塵濁，煩惱縈纏。假有微心，不能大成。又無堅固，不遇明師，不識真要，信邪倒見，不辨科禁。真偽相參，淨穢交雜，未偕因地。自謂得果，其身未度，說法度人，大道不聞，空勞邪聽。師既愚暗，弟子亦頑。自誑誑他，與俗竟進，規求世利，以活行尸。常之禍鄉，不憚凶險，進退自伐，累劫失生。冥司注愆，生死徒謫，永失人道。甚可哀哉。

道言：往昔下界雲臺之陽，時有五人，結朋學道，南入丹霍之山，下尋地道，却出伏龍之山，從小阿南竇出於山陽。同居數載，服術餐松，不解科法，不見真經。積年勤苦，心不懈倦。不交塵俗，不求世利，常服草衣。一日六時，朝禮上天，願乞濟度，長生不死。

如是積四十六年，上玄哀其單盡，使日宮神童下試五人。第一之試，變爲美女，投其寓宿。時天寒雪，經停九日，與之共床。於是五人採藥供給，設火溫暖，視如父母，心生慈愍。神童洞鑒其意，即便暫退。已後九日，忽變爲大兕觸殺一鹿。其鹿亦是化作，死其廬側。於是五人往視悲淚，故取埋之。兕知其意，即便退去。又經七日，五人入山，尋採藥食，奄遇寶窖，金銀無量。是時五人目不暫視。又經七日，於是神童化爲貧病窮人，投之乞食。如是五人安養供食，足經千日，便爾還去。後又九日，爾時神童化作惡虎三十餘頭；又化作蟒蛇十頭。虎尾鈎連，蛇身交結，圍繞五人。是時張口吐舌，欲相吞噬。於是五人情地不懼，顏色怡悅，氣平身安，綽如無事。

爾時大道哀愍，衆聖慈憐，二曜停空一十四日；盛冬冰泮，玉樹敷花，雷音清暢，天洒甘露，神香鬱烈，和風發生。無上大道空中授手，遍於世界。天文映明，群瑞祥集，麟舞鳳唱，衆音

和雅，合讚五人。一切世間聖凡異類、土石草木，皆能演出微妙法音，所謂天經地緯、織凡成聖，皆可採聽。

爾時五人採服微音，皆以心體柔軟，德力無比，百關強健，六府調和，耳目聰明，神識凝玄，不違四時，不逆五行，歸依常道，遠離虛妄，善用中和，故能無病，妖魔消伏，真正日新。神童歎言：世人雖賢，不能用德，偏執異見，謂無常道，順俗灰滅，夭喪真性；不知即身，去道不遠，分意不永，甘心滅度，遊魂倚變，隨境而舍。昔有風氏兄弟二人，大兄名運，二弟名遇，同一母生。運年十六，弟年十四。母教令學，遊往他方，遭二種師：一師貧賤，唯富貴道德，積居常山，年已九百；一師富貴，多饒財寶，善明世事。兄弟二人各事一師。大兄事師，山隱學道；小弟貪財，奉事世師。執手辭別，隨師而去。逐事流變，六十七年後於廊間，忽然相遇。大兄識弟，弟不識兄。兄雖年老，顏容不衰，少於往日。分別之時，其弟形容，甚至顛顛，耳目已損，瞻視不明。

兄弟相隨，三日不悟。弟謂其兄而作言曰：子非魅乎？忽作此言，言是我兄，必欲中我。奄便揮劍，以刺其兄，如刺虛空，竟無傷損。其弟心懼，五體戰慄，發聲大呼，聲震禽獸，自仆地驚惕，欲絕其兄。慈愍弟故，扶起案摩，消息將養，漸漸得蘇，猶未敢信。其兄向弟一一具說父母生處，所經事業，村邦鄉里。弟雖小悟，猶恐鬼魅而能得知。良久之間而作是言：汝今定當是我兄者。不是我兄者，以劍刺汝。不覺所中，以此驗之，固不敢信。其兄告言：吾聞道乎遍體受生，身無死地。以是因緣，刃所不中，非是鬼魅。汝今勿疑。我昔與汝生一父母，年各長大，稟學不同，羸妙相絕，優劣懸隔。若使汝不癡貪，志求生道，亦得如我，無有異也。猶狐疑心未淳信。爾時兄弟二人相隨至家，見其父母，拜跪問訊。父母見兒，歡喜無量。兒雖未言，父母已知其子學有優劣。是時中表親舊聞其學還，皆來勞問所學因緣。

爾時大兄以其初學因緣，答其親

族，又序其弟所事師範，一一具說因緣之事。其弟心中以漸開悟，始知是兄，真實不謬。為兄作禮，長跪悔過，深心剋責，三月謝愆。雖知謝愆，心尚猶豫，不知請兄而受至道。逮後六月，重辭父母而向他方，尋求學業。忽於他邦單貧之家而遇外道，求假衣食，請從服事以為師匠。於是外道便即許之。服勤六年。於是外道卒乃授其邪法之道。辭師還歸至鄉里，經涉勤苦，遂成勞患，傷損筋骨，卒於道傍，形骸不收，為獸所噉，遂失生道，魂魄苦惱，甚可哀痛。後生邊陲，化諸流俗，今已九百生中，為人演說邪法之道，求世利養，資其身命。而雖有功，不足成就，終不能得即身而為法身。然此外道亦遊山林，荷負餅鉢，入村乞食。居無定方，修習不正，惑辭聾瞽，招誘童蒙。上天以其噴嗃之愆，制役下鬼，惑亂其心，使其愛死，不重生道，與諸魔邪以為群黨。如是外道，至於後劫淳澆之世，法流二界，大道不行。當此之時，眾生福盡，天告灾祥，百穀減少，人民饑饉，水

劫改運，一時漂沒。

爾時風運以無上道法授其父母，精修千日，老而復丁。後隨其子，入玉輪之阿，飲以金精，咀以玉芝，身生紫氣，目有流光，骨體輕便而能飛行。不久三人升入無形，長存綿綿，塵劫為瞬，彌久彌新。遇之與運昇隆若斯，同本一元，中道流浪。一時相失，億劫長乖。不識明師，遂至如此。告諸後學，明鑒此經。人生難得，不可失生。

爾時真童逆告來生學真之人，或志不在俗，擯塵割累，願居山林，幽身虛巖，研味上道，求見昇度，要在清潔。不潔無冀。廣尋至經，明視節度，修道方法，心性慈順，便易感通。淨持神室，晝夜不睡。瑩拂明鏡，徑九寸，令無瑕翳，懸對目前，以鑒精魅，辨其偽真。開闢明堂，遐招二景，隨以晨夕，互咀精霞。密室坐卧，任其便所，不必一也。採服輕妙，呼吸中和，不緩不急，不麤不細。猶如嬰兒飲其母乳，綿微吸，取類引絲，使不斷絕。不勤不勞，如幽泉之潛澍，內外靜息，百關不

躁，忘所馳競。冥昧泯默，如無耳目，不以視聽用其聽察也。於是塵濁消沉，道德明顯，生神內養，和氣調暢，存亡去留，隨心攝運。生道一固，欲死不可得也。尋真之士，寶祕此經，慎勿輕泄。傳非其人，九祖受考，身不得道。深加微密，勿得唱露。勤而行之，尅定太平。失之則亡，得之則昌；密之則真降，泄之則禍來。

爾時神童為諸來生欲學道者，志遠人世，隔諸塵濁，願棲福地，入諸名山，尋求真經，採服靈芝。千年萬歲，不為凶害之所侵損。地多善神，土氣調良，水藥宜人。崑崙四方，元過東南王屋山南玉洞，上應諸天，日月星辰亦如上界，無有異也。地道十通，千徑萬路，真仙攸往。亦有宮室，天經備足，不減上界。洞天之中，多有神人，時出登山，眇諸後學。地多黃精、白朮、上中下芝，甘泉玉液，飲之不衰。常有神香，自薰鐘磬。恒鳴天樂，在虛神唱天經。能棲此山，真道易成。次有五臺之山，山下有洞，傍通王屋。山上山

下，亦有靈仙，今古與人，常常不絕。次有常山，山下有洞，交通十方，亦有神藥。次有太白、終南。之次有五嶽、方壺、伏龍、天台、丹霍、曾城、羅浮、洞天江源，大面、武陵福鄉，地多五金、朱砂、雄黃，丹水金精，玉髓神芝。茹服不衰，兼得還年。研誦天文，悔罪謝愆。香烟上騰，以陳子心。功高行成，勳徹皇天。大道愆之，迎以焱輪，身昇太虛，受號聖人。

神童又言：邊邦諸山，地多毒厲，寒熱不調，地氣損人。又多精魅。後學之人，未堪患難。真氣未布，穢濁未消。既無良師，又無真經。苦欲有心，去山遙遠。若諸女人及衰弱者無師可怙，未能遠去。如此之人篤志不移，亦可選覓平地，重墻複壁，不交人事，依禁受行，萬無一犯。於曲室中燒香願念，一日一夜，六時行道，陳心所願，隨意而言，要在悔過，上為九祖，下及一身，所犯愆咎，乞請天曹原赦，四司、五帝恩蕩愆尤。微氣低聲，每令殫盡。初取香火及正陳啓，勿得顧盼，及以雜

想。心念不真，邪氣來應，輕觸至聖，陳啓不聞，徒勞苦辛，空無所獲。驚動流俗，嘖嘖自欺。正道不行，坐待灰滅。臨絕之際，謂道無靈。嗚呼，行尸不能正信，沉淪生死，心不厭惡，不樂一生而得解脫。五逆十惡掩其耳目，蟲蛆三毒入其藏府。或遇真經，心終不信。聞人得道，便謂凡身不合成聖，要更灰滅，魂神得道。此名邪見，修習外舍、淺近之法。上學之士若見此人，勿與同行，及共居住，應當遠離。染污良善，窺窬誹謗，或爲調戲，真道所疾。深宜慎之，勿與交集。上學之士銷聲

林壑，絕跡幽山，結宇依巖，永離人世。澡練形神，研味至法。採服良藥，衣糧窮盡。不假外求，披草服氣，支持性命。如此之人，非鄙衣食，憎惡飽暖，志遠惡人，不與交好，恐其能壞善根，故深避患，入諸名山。至論大道無所不在；人間多難，不得專心。歲月易流，身命難保，無常忽至，求悔如何。真童又言：昔崑崙東南、葱山之陽，時有二人同志，聞有生道而欲學之。口

常言語，向他陳說，積經六年。此人村中先事邪神，神詬其故，恒伺其衰。後於夜中厭殺二人，遂失生道。上天以其有心，下勅四司，攝其魂神，受生人間，不經地獄，速得人道。二人改氏，生於姬門，一名弘道，一名弘德。于今七百生中未遇真師，流浪人間，忘失宿心，永無所冀。子欲有心學生道者，當慎口言，莫令流俗之所知聞，惡人讒嫉，神邪所害。

道言：人初學道、感通之始，多有諸天上聖下臨其所，教授學人。上天威神隨從聖人，下遊凡間。當此之時，下士鬼神受事給使。又亦防衛學道之人及其家門神精辛苦，不得自在，常不欲得。世人學道，恐其承事，不得自在。

爾時有武當山中學道之人，名曰祝元，與其同志一十三人，積棲武當三百六十二載，而採服松栢，形容不衰。後入陸渾，時遊太室，採石密芝朮服之，不得真經，但遵藥餌，耳目精明，行及奔馬。七千餘歲棲隱山林，時入洞

天，謁諸後聖，志心不暫替。後遇王母賜其玄霜玉丹，一時冲天。于今治在泰清天中。雲宮天尊愍其堅固，即命左真侍童授其雲書二字，與今服之，位爲上真。世人愚癡，學未經旬，心已懈退。欲以行尸，窺窬上道，不亦難乎？此一十三人者，志雖不退，在世之日及以隱山，心不願念，亦不尋求明師，請受真要，直以遠離人世，不交塵濁，授服良藥，填補其身。不犯穢惡，無別修守，所以不能即身得成真道。若使此人尋求明師，請受真要，道成益速，不俟多年。

道言：學道之人感得明師，修守真要。或其前世善功未足，法應滅度；或承先福慶，真帝愍之，學道不日而得成真。往昔水劫之間，崑崙之西有一戎人，名弗多梨，姓頗尸迦，常以晨夕遙禮崑崙，自弘誓願，願得長生度世。如此積得四十餘年，奄遇女真王琴心從泰清天上下遊崑崙，停留閬苑九萬大劫，常愍此人而作是言：下界西南，地氣穢濁，人唯殺害；戎狄凶

險，不聞至教。獨有此人欲聞大道。

爾時女真作如是言，白諸真官。真官答言：狂戎之徒，非肉不食，非血不飲，羊毛皮衣，內外腥臭。無上大道非其所聞。若有心者，待其滅度，轉其魂神，生於中國，度其後身，與得成道。女真又言：無上至道，其猶大冶，銷鑠天地，混化衆生，土木金石，變成灰燼。此人有心，何不可度？

爾時女真勤勤固言，男真道君便即許可。女真歡喜，便以四月八日夜半之時，即命中真侍女於人睡中攝其精神，上至閻宮，教以生道，授其五石鎮生玄映神丹，又授此人餐和服氣神水之法。此人睡覺，書記誦持，無有遺失，至心修守三千餘日，而果中仙之道，位知下司，主領西國戎狄雜類，有心行道，令其教授，治在龍山正中而居。亦能飛行，身生日光。四時八節，上昇泰清，朝謁女真。此人成道，女真之力也。今已得十萬劫，于今在焉。

太上大道玉清經卷之八

### 太上大道玉清經卷之九

#### 明威真人威邪品第十九

玉清天中雲宮北方明霞紫房上真道君，受號明威真人，以慈忍之道，赴感含識，大悲成就，濟度危難。常在凝神，九億大劫爲一瞬須。俯乘應變，下流二界，幽明兩途，上中下心，受真正氣，各乘一信而行其身。率無不服，任其大歸，不乖其常。自愚至智，不出洪冶，雖任其性，無能迴越。獨有大道而超之。明威真人哀世不出，故悲覆之，教以乘服之道，漸趣無爲。

是時十方世界後學聖人，及以凡夫畜生之類，并諸鬼神，一切祇向，除得正者，傍則大道，隨分乘服，以趣一道。所謂學聖之士，乘道妙氣。學世事者，乘世軌範，乘服滅法，形骸朽爛，遊魂流浪，而不能止。各駕其氣而適一方，固其所知，占道專德。於是衆生所乘既異，遇感不同。乘道妙氣，必果

正真；乘服邪道，自至朽爛。無上大道哀其夭傷，故流生道妙氣而養諸有。於是上皇太真普施道化，出法對治，善決衆病，覆載含識。演正一之道，而化上士；盟威之法，相裂邪根，聚天雲瑞氣，成陰生之文以超枯骨；置天官上司，以主衆生。太醫真王變生起死，痊除痼疾，續絕補闕，流通經緯，益血足腦，開決聾盲，使聰察映朗，齒長形幼，彌久彌嬰。明威大真神力無礙，權實之道等無優劣，真應之身遍於塵界，道德威神始終不異，起感之形隨類應變。音聲萬殊，嗜好亦爾。下世不達，自離其源。一身之中忽相睽背，妄想生患，神邪兆焉。不明大冶洪範之始。中古以下，淳澆狼狽，勃然興僞，颯焉以廢。衆於邪道，求其至當，奔馳擾競，不免塗炭。甘心愜分，良可哀哉。

爾時明威大真以萬物未始，洞曉其終，逆制威儀，顯示當來上述真正，不言邪道，令修習之人心有繩準，的當指實，辨知邪正。邪正之道立便試驗。試驗之道，所謂正行、正命而行正法。



足傾敗盡須臾。

正法醫邪，正身不傾，正行不動，正命不夭。不夭之命，謂命無窮盡，不傾之身謂塵劫反嬰，不動之行謂動之行，謂行無上道。修習大聖真實之法，變鍊形神，出有入無，永斷生死，衆累不繼，即此之身而成法身。不受生老病死之苦，謂之永斷生死。習邪道者，其狀易露。何以知之？知邪之修法，習不定生，習之老而死，不能易，令人反嬰，骨朽皮皺，牙凋髮白，喪聰失明，須臾爛壞。背道敗德，輪轉邪俗，不能絕待，不能遣累。蠶食行世，惑亂下愚，身命不正。強言神變灰滅之後，形離識散，自謂精靈證無上果，此名邪說，不可依憑。若見此人，亦不放捨，應以方便，爲說生道而濟度之。無上大道哀諸邪僻，故出明威，指歸溺喪。好真之士弘誓修習，自密其身，不動流俗，當正爾儀，當潔爾行，掩爾之明，蔽爾之聰，服諸輕妙，內外芳鮮；不問貴賤，不辨妍醜，視酒色財同於腐臭。臭想不懷，况更輕犯。一接身心，真氣遠離，况常親近，狎之求道，邪鬼乘間，禍害來任，翹

明威大真逆紀後劫，偏邪之道邪

起陰氣，濁惡之世便即易興。淳朴既喪，澆浮競作。下界四天，自號神王，如此之魔，名爲天神。濁惡之世遍於下土。四天之下，山林石精，附着生人，皆相放傲，自號仙王，并及六天故氣之魅，共爲羣黨，支流散釋，隨世立名。背道之人供食祈福，蛀人精氣，食人血脉，滅人年命。人不自知，入人身中。亦能令人惡生愛死。如是諸鬼入汝身中，子息繁育，精氣強梁，交通生人。蟲魅鬼女亦能令人辨諸空義，妬嫉生道。若有男女修學生道，是諸惡鬼競來侵害，欲人死亡，取其魂神，共作儔侶。以是義故，憎惡生道。後學之人身得成道，邪魅惡黨服事驅使，不得自在。以是因緣，學道之人須應明知外道邪疾，預曉明威之法揮割崇，保護形神。世若有人奉事邪道，心堅不捨。於是善人方便，教招不從，不得親近，勿受其言。何以故？初學之人道力尚微，未任降伏諸異道。是故應當

敬而遠之。大歸之會，自有大道下世教化，示其威神，降伏強梁。大歸之際，功過邪正，分明自判，無能迴改。後學之人好樂真道，先擇明師，幽求博遠。能進修者專精上道，傍通世典，貫鍊羣籍，俯仰經緯。一藝無疑，上辨天經。明道深義，請受必決，分別邪正，雖處凡地，可謂聖師。第二之師不便世事，又亦不明大道深義，但遵一法。堪度世者，齋潔精至，執意不回，凝神守戒，誓不爲惡。如此之師，與道合同，精氣不散，易得感通；形固神凝，中和內養，非久之間，刻時昇度，骨肉俱飛，永果真道。雖曰第二，不失明師。第三之師，無的修守，但以慈悲、忍辱、常修不殺，領戶化民，救治疾病，了達明威，誠不欺誑；不視貧富、妍醜、貴賤，施散財食；行平等意，視他之親猶如己親，視他之身猶如己身；見他危難，方便濟度，令得安穩；見人遭苦，願與同疾，慇懃愍念，不相棄捨。及至大悲，埋尸殮骨，減割衣食，分乞窮乏。終身行孝，不作非法，不於怨憎

而起加執。竟信幽冥，不慢虛室。與道冥符，邪氣自遠。不欲求道而道自來。

道言：後世凡夫欲學者達此諸事，而得道者無有是處。後世男女欲求道者，先當立功之法，亦有多種。第一之功，弘道化物，以輔天子，孝養父母；第二之功，弘道除害，傾邪滅偽；第三之功，孝及一切暄飛蠕動，及諸草木；第四之功，寒棲苦行，事師求法，服食專志，內外芳潔；第五之功，立靖建齋，率化有緣，請師祈福，悔諸愆咎，供養寒棲學真道士，衣資藥食，床敷香燭，及諸具度供功德者，令無闕少；第六之功，贖放生命，不限貴賤，及以小，窮源水族，為引流澍，若無決處，取送深水，令得蘇息；飛走之類胎殼涇化，巢穴崩毀，子未能行，恐其不養，方便為其修緝補綴，無令驚恐，使其不育。如此之人號世法師，濟度窮厄，與道同德。大道友之，得免生老病死之苦，長存綿綿，永絕勞累，眾患不繼。如此之人，謂求道之要，得道之機。

道言：諸善男女立功之法，復有一種，所謂善解明威，分別邪正，揮裂

蟲鬼，馘截奸邪，願與眾同得無病，行住安穩，忍辱之地，雖無正修，各得守分。立功之人，平等愍念一切眾生，若見偏邪不正之疾，慇懃不捨，決之令愈。一坐道場，利益無量。苦惱眾生，師先教令。邪病之人灌沐塵濁，教其願行正信大道，勿起邪念，敬向道場，視師如父，披服鮮盛，內外芳潔，焚諸名香，禮師如法，師即為其陳心所苦，上請大道真威生神，億億萬眾，消邪滅偽。師為眾備受諸法，內以治身，外堪救物。服道內法，所謂三清寶文，雲書靈章，龍圖鳳篆，九氣垂芒。精心修行，威制天地。如是寶經總有三萬六千大藏，一一藏內復有三萬六千部經，一一部經各有三萬六千柔玉之簡。如是真經，得一便足，不必備受三清寶文。但當專修三清一法，足得成道，生身度脫，信之在目，立驗須臾。救俗之法，不事內經天寶文也，但受明威生神之籙、九天真符、九天兵符、九天社令、

九天神鳳，九府神劍，揮邪拂魔，九府神符，驅鬼役精，玄手真訣，登綱躡紀，飛步七辰，束縛強梁，威震邪僻，翻風止雨，收卷昏霧，迴晨駐景，呼吸神氣，變禍為福。此諸法者，是九天真氣自然之道，大聖慈悲出之救俗。九符生神主養含識，下應兆民。凡百男女有心敬信無上大道，威神而衛護之。此威神者，是正真之氣化成，威神遍滿虛空。信道之人請福滅禍，影響之頃，威神立至。此威神者，雖復氣繼上天，神周色象，故曰大道授乎，遍滿世界。大道真氣化成風雲，大道妙氣凝成甘露，大道慈氣化成膏雨。或為甘泉，或為良井，或為山嶽，或為源流，或為深淵，或為茂林，或為藥草，或為禾稼，或為香樹，或為花果，為世資用，饒益廣大。下世愚人便為天地三光、風雷雲雨、霜露萬象空生自別，不由大道。若有愚人作如是心，當知是人為邪所惑，欲求正道，終不能得，不愧根本，忘恩背義，心不慈慎，勃戾自任，反天逆地，縱得暫生，不得其死，傷殘塗炭，困苦狼狽，

人神不哀，鬼魅同疾，輪轉邪道，沉溺生死。譬如朽敗，不可令堅，猶如巨石，墜千丈坑，難可逆上。邪俗之人，永不欽尚正直之道，況求道要，心希昇度。哀哉流俗，永與道隔。失真之初，行乖絲忽，漸漸廣遠，瞻望不及，都忘先始。隔道之初，雖處洪冶，器象區域，乖於正真。譬如惡人瞬息邪視，心尚不端，陰血冥沸，嗔氣以成，損身害命，患源斯作，疾用醫方，倍功療治，猶不能愈，況於終身淪沒邪僻，不見明威正真之道，焉得生乎？

道言：往昔火劫之初，戎山之精化作人身，體備衆相，行世教化。聚徒八萬，教之事火，及觀水法，一十二年。吸人精氣，人皆失正，邪觀已成。爾時諸人同心受死，各入衰草，叉手跪坐，脫衣解纓，顧人熱火，衰草盛然，一時燔傷八萬餘人，毛焦皮裂，疱汁崩潰，手脚攣縮，拳屈盤地，苦通悔恨，不能出聲。

爾時山精彈指讚歎，而作是言：有生之類，終歸磨滅，煩惱之身，百毒

營室。應速遠離，求早度脫。當滅此身，以求法身。嫌火毒烈，當赴深淵。

爾時山精說此語已，八萬餘人匍匐赴水，風浪所漂，涇族吞噉。河靈執其魂魄，水府役其精爽，徒謫困苦七千餘年，于今未休，一旦被邪，生死不離。爾時戎山之精誘殺凡俗，自知有罪，上懼大威，深藏石中。春遇雷神，霹而出之，驅使從龍，日夕辛苦，不得自在。如此強精，欲揮之法，可使雷公馘而裂之，不煩天官上司威神之力，不勞大道真妙之氣，不用大道生神之威，邪自銷亡。爾時復有遼左島夷，國中鐵錘之精，化作人身，行世教化，其法遍流八十一國，令人受死，生便哭之，歌而送終，年老之人謂之鬼朴，棄之草澤，令其速死。是諸戎夷行此風化，首末已得三千餘年。被棄老人餓死空澤，困頓狼籍。明威真人愍之塗炭，因使五億金剛童子銷滅鐵精，及諸木魅，制以孝道養老之法，以救凡俗。爾時鐵精復形，是諸金剛埋之入地，鎮以七寶神符，于今在焉。後學真師欲揮此精，宜

請金剛童子億億萬衆，殄滅精魅，即自銷亡。

爾時復有西南金方鐵圍之山精化爲人，出世教化，其法遍滿荒戎之中，百國之內，流變五百餘種，其名外道，奉事衆象，天地、日月、星辰、風水、金木、鑪火、城堡、道路，種種苦行，變易衣服，及改形貌，立像供養，木葉書經，殘損形貌，披服戎衣，受持禁祝，入城乞求，皆各自言，此爲勝果。齋祭血味，祝號天王。或稱梵師，專事烹宰，奉獻天神，望求多福，邀世財利。各各自言：能施我者，得福無量。如是外道，附着人身，悲啼叫呼，自拔頭髮，躄身自撲，受死求滅。或默坐閻室，諦觀光相，言睹大聖，或見一切罪福之相。凡夫聞之，競來布施，捨諸珍寶、妻子、奴馬、城邑、田宅，或捨身命、頭目、髓腦，心無所吝。是諸外道教其愛死，輒見死者歌頌讚歎，棄尸荒野，名曰生天。合衆禮拜，歡喜歎言。大士高人厭世求度，身充禽獸，塊識生天，煩惱不繼，豈不樂哉。

是諸外道苦行之法，然大火聚，而作是言：若有善男子、善女人，能入火聚，燔燒其身，是名第一大士，得離煩惱，證無上果，獲得長樂無垢之地，得登長樂不動之地。是諸外道，讚言大士勇健，德力無比。能為世間作大利益。愚人見之，競燒其身。當爾之時，外道遊精飛空歌讚，作衆妓樂，令其甘愜。一百戎域，數十年中，過半傷殘，被此外道作法誘道。後學之士欲滅異道，當修正一之法，具大威神而降伏之。以大道妙氣、生神真威而擯落之。外道凡形，自然歸化，外道精靈亦自消滅。後學之生欲滅此邪，善用火鈴之道，邪即須亡。此諸外道雖求勝果，終不能得，滅命之道非得真也。此名行尸邪僞之道。

大道法中，亦有此人，人心流動，身行不正，邪神任之，亦名外道。如此之人不辨真僞，清濁不分，自來邪魅。心既偏僻，大道不行，媚精入心，惡聞生道。後學之士深宜辨之，當以道氣清諸穢濁，請天司威兵、五部神將各五

萬五色兵吏、五億萬衆，廣施道場，摧裂凶試而自消亡。是時北方五十五國戎狄之中，萬歲老狐化作國王，治在崑崙山東，媚好諸女，生得狐子，孫息興盛，遍滿諸國。魅殺人民，食噉畜產，作諸光怪，亦有強精合為羣黨。其魅

人之狀，化作美人，男女之形，與人交通，亦能化作生人宗族。或時髡人頭髮，令人失心，狂走妄語。亦能令人惡生好殺，陋其身命，心腹刺痛，乍消乍脹。聰明辨慧，晝伏夜遊，愛好彩色，欲常獨處。其變狀也，有似木精之狀，興於春秋生落之時。木精易除，但使雷神霹而滅之，即自消亡。後學之士深辨狐魅，欲揮之法，當用西戎寶金鑄作神劍，密藏身上，疾用火鈴奔星之道，上請大道生神威兵億億萬騎，摧折強精，擊揮狐魅，聞聲震伏，萬里逃蹤，幻化之道自然擯喪。女娠狐胎，堅未潰者，上請威兵醫治。玉女齋五方之藥、針刀火艾，入其身中，隨病對治，速令崩落。於是道氣流行，元始風布，邪胎消潰，生道潛備。上聖醫之，不窮倏

忽，上人醫之，經旬始效。如是病人，髓潛空虛，血脉不注。教使安心，持奉經誡，取令平復，解禁自在。重病之人，令其奉道，師授明威辟邪之法，晨夕存念，供繕香燈，受持師法，如對御前。

爾時明威真人以大慈力，故出此正法，下流凡界。是諸強精遙聞敬畏，復形潛蹤而不敢動。當爾之時，不用揮割，是諸邪精率心輔正承侍。大道慈悲，不忍加滅，故出明威之法，流傳後學，防諸精魅。或能犯過，干忤正真，後學之人當依正法，馘而裂之，絕滅魃魅，消殄精崇，令正信之人心有指歸，一切衆生賴此安穩。此經所在，則為有道德人修之，助道興化，治護衆生，不問貴賤，不恃其貴他酬報。上聖遙鑒，善道友之，冥司記注，其功自全。無上大道降下生神，而來衛之。如此之師，所在之處，一切人神之所恭敬，不得輕觸，譏謗罵詈，及以捶打，竊其財食，天神地祇立見考罰。如此之師，心體堅直，與道合同。一切人民皆應

作禮，重心恭敬，猶如敬天。何以故？如此之師雖暫居世，德並天真，威能制天，天猶敬之。以是義故，一切人民應起恭敬，欽尚其德。能制天地，濟度廣大，功侔造化，道力無倫。一切男女應於此師弘大道心，願得一切人民同師修習，果無上道。

明威真人說此法時，魔宮振動，魅魅喪精，和風慶雲，周流下界，法雷法雨，潤動四天，藥草樹應時花敷，邪道歸正，五魅銷蹤。爾時明威真人聲光遠聞，十方渴仰，四天之下一切男女燒香叩頭，仰天弘願，願得大道降臨下世，爲凡見形，以申翹慕。

是時大秦國王伊耆若提，睹於真光，一心注念，七日忘食而作是言：若有大道遙感我者，我當屏棄國累，從道出家。時有日南外道，名弗多梨，徒衆六千，髡頭裸形，擎一鑪火，來入王國。門人白於王，王出頂禮，謂是真師，迎進城中，晨夕供養，廢治國務。王從弗多梨出家求道，令王晨夕頂禮此鑪，一國男女亦皆事火。火精興盛，漸入王

心。王及國內盡皆受死，各立誓願，燔燒此身，以求上道。王及臣子期取四月八日，聚樵燔身。明威真人愍王無知，即命北海龍王、玄武大將乘大海水，往於南方。去地六尺，遍覆大秦。足滿一月，外道與王無復生許，一國無火，人噉生羊，火精之魅自然消滅。王心自疑，即白外道而作是言：汝師，我聞西北有師徒奉事水神，將非是此來相試耶？

爾時外道合衆震怖，不能自持，即答王言：大王當知諸異道法五百餘種，修之果極，超至梵天。一種求道，亦有何定？我今與王迴心事水。爾時國內男女大小悉皆傾心，向水恭敬。又經一月，二更之初，忽聞水中有人言曰：大道雖無形，應之如影響。虛空本無際，睹境猶心想。水炭傷爾生，魂神滯幽壤。雲宮自在嬰，飄然乘氣上。哀哉習邪道，進退迷塵網。悲生老死至，朽爛誰携獎？何不學長生，一瞬周天壤。形神忽已昇，精氣長寥朗。爾時王及外道聽得正音，便即精研正音，

經一七日，心忽開悟，行尸之身變爲芳骸，聽察真正，洞睹上方，雖有神水，不能障蔽。研詠至音，寂坐虛室，心無邪想，專志大道。足經千日，心香上陳，求師解釋。

爾時明威真人以慈愍之心，見其法身、光氣之體，爲王注解。王及弗多梨并諸臣子九億從衆一時成道，見身昇虛，不受生死。爾時大秦國王成道之後，重請真君爲後來生銷滅五方灾害之法。真人告曰：大道之法唯貴長生，助國扶命，救度兆民。背道失生，自勞舒慘，不能扶助，衛護有生。以是義故，無上大道故出生道，蕩除死氣。精心行之，德動天地。兼修假習，無所能爲，五種之灾，皆可消滅。學道之人盡誠助國，齋醮禳灾，志求徵應。師爲向所方面，齎好雄黃七斤，密器盛之，沉以深淵，勿令人見。金書真文鑄以玉簡，鎮國五方、神山之中，幽巖深洞，齋戒請福，而爲天子及諸兆庶。若有吉應，則神香氛列，風不動條，四極廓清，則大福來應，國祚延永，天下太平。

當此之時，亦令國王登壇告天，卑宮菲食，恩流國內，惠恤老病，仁及蠢動，不傷含識。如此之君長處天位。學道之士應如此經，告語天子，亦可豐贍資助，長齋名山，潛行至法，而為天子及以兆民。此名陰德，貴無顯露。依附高貴而行至法，恐動俗間，能無罪失，而得平行也。學道之人當與國主而同其德，俱為天下一切兆民。德不同者，強行吾道，天不助之，勞而無功。

道言：學道之士當具十德：第一之德，分別真偽，不浪修習；第二之德，精研至法，窮諸妙門；第三之德，專志守戒，心不放蕩；第四之德，通詠聖教，心不疑惑；第五之德，慈孝忍辱，不與物爭；第六之德，供繕法事，心不怠墮；第七之德，柔弱用道，微密其行；第八之德，勇能進道，履險不顧；第九之德，威震外魔，解脫纏累；第十之德，救身死厄，長存無窮。

道言：學道之士不免死厄，不離邪法，非得正也。雖曰丈夫，實無道力，不能常住，為物所遷。不名道士，

是名外道，與俗無別。虛無辨慧，強明

空義，無道心體，四大流散，不能全生，魂識漂浪，遇合而倚，動億千劫，不能得道。悲世行尸，哀其失生，老死爛壞，神勞往返。一為失正，二為罪深，三為不動，四為邪僻，五為強梁，六為重濁，七為馳競，八為不慎，九為怯弱，十為自傲。有此十事，能敗真道。如是十事，元於失正，流變十惡而無窮已。修習正法，流變萬化，妙隱玄中，亦無窮已。學道之士立功建德，勤修生道，遠離死厄。行成之日，真道見形，携其同遊。無上大道好生惡殺，好生之人能得吾道，好殺之人自喪吾道。人自背向，非道違之。大道無心，應於能行。不能行道，道亦應之，應有陰陽生死二道，榮枯成敗，出入洪冶，昇沉有殊，哀樂相背，恒懷引接，無奈不從，哀哉流俗，滅亡不反，使其營生，如營死者。天錫雲車，浮空而遊。使其好道，如愛財色，真人為儔，眾靈為使。使其行柔，如行剛者，塵劫嬰孩，未曾有傷。學真之士吟詠此經，寶愛自戒，

終身無患，必獲昇度。

道言：學道之士未昇之前，猶在人世。應當哀愍一切眾生，為其消災，生活民命，其德甚大，第一之功。師於有災之方，建立道場百千之所，盛治方域，香水盪穢，施立床座，安置經像，令眾歸依，燒香然燈，六時禮願。意在丹款，不假浮辭，微聲下氣，不與眾聞。師為啓陳大道，言彼災殃，元兆所起。次請五方威神，其名曰：東方青龍將軍九人，從官八十一萬眾；南方朱雀將軍三人，從官六十四萬眾；西方白虎將軍七人，從官三十六萬眾；北方玄武將軍五人，從官二十五萬眾；中央戊己黃麟將軍一十一人，從官九萬眾。羅列天儀，下來壇內，運動神力，滅鬼生人。隨其病源，神方對治。師為願念，哀愍病人，猶母愛子，欲其無病。約勅壇內，每事整肅，忌噉葷辛、魚肉之類，男女穢氣，衣服垢膩，講論非法，舉動傲慢，心不珍重，天道不助，邪神不滅，所疾不差，翻招殃咎。其道場內三五日間，一過香湯，灌灑場內。

人不灑沐，不得入道場。每置一壇場，數旬始解。任其來者，師無責坐。困病之人不能行道，任他世上，不必須要病身自行道，或可立瞻對，但取效驗，不拘常則。

道言：凡醫邪之法，復有三種：

第一色人志在出家，未明科法，用意偏僻，媚鬼入心，應須醫之。不醫不愈。如此之人，所用心信，香水而已。貧士之香，直心而行。第二色人專心在道，未佩生籙，長齋苦行，功德未立，忽被凶試，來入道場。事須香燈、米木草果，三過供養。第三色人，身雖假道，志在邪求，身染疾患，欲求救療，來入道場者，責其心信，謹依醮法。又責束帛，隨其富貴，以酬道恩，與師營辦法具及師衣、師屋敷具等用。又將買藥及食供施貧病不自活者，贖放生命，及買香油治舍，都不得俗用，犯者罰病十日。十日之後，善神遠離，所學不成。病人不專，心想散亂，及犯穢污，不自舉愆，不從師教，所醫不差，登即受考，世醫不救。學道之士建功立德，未辨

隱修，在世醫救，戒慎戰慄；如在名山，用心無異。爲人所請，不得辭勞，推注有事，或前喚後出，或詐言不在。斯託疾病，嫌疑貧賤，無價可貪，責望財信，以贍私費，不救懸急，罰病百日，善神遠離，爲邪所考，世醫不救。

道言：學道之士，道有淺深，德有優劣。若遇明師，伏膺膝下；或遇真人下遊；或九祖流慶；或先身業道，功德未成，暫歷太陰，報生王國。乘此運會，盡受寶經，王氣周身，威神衛體，不更生滅，尅獲道真。未昇之前，或遊凡地，門徒繁廣，未盡澄淳，忽染不真，應須清蕩。如此威神，都無所用，但爲吟拂魔之靈篇，詠上皇之大曆，心騰絳氣，目騁奔星，揮以神金良劍，照以圓穹寶鏡。或以高坐虛堂，精誠守正，內視陳啓，無勞口辭，三洞生神，隱居經緯。於是六邪外殄，五毒內消，賓主之心，不覺勞處，任所營爲，無復障礙。如此之師，威力弘大，一切神邪，皆爲侍衛。或有門徒，男女業障未消，司非糾彈，或應受考，師以慈悲，爲其首謝，

上爲九祖，下及一身，專心悔過，無不解了。

道言：莫大之愆，不過媼殺父母及其師長。此罪極大，無能悔免，永沉苦趣，無有出期；永不見道，永不聞法，況能得道。學道之士及諸俗人，應生正信，慈悲孝順，勿生邪念，背道忘義，進退受罰，不可思議。若有世人及諸經紀言殺父母、師長罪可悔者，猶固合道，此是鬼魅所說妬嫉，神邪之所教化，顛狂之人作如此言，大道不聞，天地不赦，惡鬼所罰，湯炭燒煮，永失人道。一切故殺蠢動含靈，天猶不赦，况故逆心殺害師父而可首悔？學道之士宣吾寶經，開凡耳眼，遍使知聞，功德無比，不可稱量。

道言：龍漢初會、火劫之中，寥丘之國在海之中，西去霍丘七萬餘里。中有道士名曰乾忠，其姓聞氏，年始十二，出家求道，修不殺戒，治病放生，孝順父母，敬事師資。身未服佩長生之文，但以建功立德，心不懈退，首末已得。二十七年，功感諸天，其道場之內

常有真人下降，改形同凡。又有地水諸神爲其給使，供繕法事，授其神藥，療諸痼疾，不覺不勞。下手之驗，如湯沃雪，斬伐邪精，都不用力。大建功德，憐哀貧病。雲宮天尊感其殷勤，知

不退敗，正月七日故命明威真人授其長生之道，合景昇虛，受號真人，治在三十四天，已得八億大劫，形貌反嬰，亦能授手過滿世界。大道以其德廣，却後十年，勅五龍王升其住宅，九十七人，男女貴賤，移居泰清天上，俱得不死。功德巨大，道潤合家。凡夫之人，一身不度，七祖、父母何所恃賴，而得免罪，受生人間，不可思議？

道言：學道之士，功德廣大。大道慈悲，故飛其宅，及其家人所有畜業盡得長存，免離死厄，非是上天之上而無金闕玉房，直以方便示見凡夫威神之力，欲令一切凡夫遠離邪道，超出朽爛老死之法，超出惡世無常境界、煩惱窟宅，獲得常樂不變易法。善男子、善女人，心信之後，劫劫之中，應有世賢學無上道，合其舍宅，一時昇虛。善男

女等，應當念此希有之事，迴心信向，知一切凡夫皆可成道。學失真要，不能成道，修習得真，未有一人不成聖也。無上大道驗之在即，何用殷勤而教誡也。

太上大道玉清經卷之九

太上大道玉清經卷之十

法印品第二十

爾時玄臺玉宮中和真人爲諸後學，以七月七日大會崑崙玉輪之阿，停留三月，以十月七日大會崑崙金壇之上。辰星之精，夕炳神燭，耀靈陽景，分暉停照。又經三月，以正月七日，上玄首元，青天之氣流入萬象，群有化生之初，中和流變之始，中和真人動用三元，三會之初，良辰吉日，以朝上帝。爾時中和真人法衆、真位三萬六千上真，俱乘正一中和法輪，真精靈轄，雲龍導途，騰蛇俠儀，三界大魔飛空從車，四部靈仙以擁飛蓋。香官颺烟，燔之反魂；龍吟鳳歌，和以天鈞。神風微吹，周流和雅。香花幡蓋，飄飄上昇。是諸法衆神足蹈虛，不勞運動。譬如浮雲，霏霏輕妙。須臾之頃，上登玉清大慈天尊法門之前。

爾時上界諸真晨朝之時，朝謁天



尊，又往玉清右雲宮中朝慶大悲真帝。時遷於巳，十方上仙之衆集朝上帝大悲天尊。時遷於中，次有下仙天官上司簡度仙籙。時遷於子，次有水火下司注記生死之簿。天尊爲諸衆生，亦以三元之月，月十五日三司進朝，後學朝慶，但用三元之月月初七日，晨夕願念，悔過求願。大悲二尊真帝是天地之祖宗，萬化之元根也。一切後學聖人無不祖於慈悲之道。朝禮思念，先當行慈。以是義故，十方世界天上地下凡聖所云大悲正言、二帝慈悲之道，下世衆生但用其末，希識其根。三司之官四時八節不朝二尊，則失慈悲之道，不能含養萬物。是故天覆地載一切萬物而不有辭。上則三尊慈悲之道、二尊之號施於下界凡俗之夫所言慈親象於此也。一切衆生得慈悲之道，故能子育群生，雖不普得大道一心，不如大道而能子育一切動植。一切含氣若無慈悲，則不自養，安能養萬物？是故上學之士先具慈悲，則修學易成，言必聞上。凡夫有心，可於密

室修學上道，道亦感之。是以四部下仙道心不退。吾見其志，方便示導，爲昇玉清朝謁真帝，我諸真衆當所神交，恒與二尊以爲親侍。雖隔三萬六千天地，亦猶凡夫同一室住，不以爲遠。何以故？十方塵界同一道體。以是義故，十方世界未有一物一法能離道體，一切有生皆是二尊之道氣也。故我爲諸下仙升於上界，朝慶二尊，作禮問訊，而請仙印，教悟後學。

爾時中和真人與諸侍從稽首雲門，拜伏良久，焚香心念，未兆所言，復良久間。如是良久，計於下界已經九萬大劫。仰觀雲宮之中，虛白清曠，寥亮皎潔，唯有九色慶雲垂布圍遶，光彩交暉，無以爲喻。虛中真氣，結成天經，遍於道境。文字分明，諦觀易曉，輕誦之者無由解悟。是諸真仙心念大悲天尊，欲陳心願，而作是言：願爲後學之人斷諸疑結，欲請天尊金口法印。作是言已，默住良久。忽見大悲天尊雲龍座前百寶香爐烟氣自浮，猶如神嶽蒸發大雲，停勃蔚蔚，遍流他境。天

花飛空，雲龍舞虛，甘露微潤，風塵不動，鸞和鳳吟，音響相和，合成靈章，吟詠天經，動經億劫而不休息。聽者忘倦，遺其雜想，正心憶念，皆得蒙益。如是良久，奄見天尊凝神出虛，光氣法身遍滿空有。真氣遐布，無所不在，不獨上界而有天尊，十方世界所在皆有，森羅萬象無非法身。

爾時執蓋直事四部靈仙八萬四千人不在衆數，見大悲天尊道力奇特，一時驚歎，皆言未曾有也。是時中和真人與諸上仙先果六通，默而無言，並以神交沙界，無所滯礙，但以方便，欲令下仙見聞上道，昇入上界，朝謁天尊，爲諸後學而請法印，不自爲師，法應上聞大悲真帝。

爾時中和真人爲諸後學上啓天尊，而作是言：下界塵臭，煩惱多途。沐浴玄恩，積經劫數。常蒙法手携引，愚迷，流浪之徒未能盡善，五情內爭，六賊外馳。後學之夫多懷異見，不行大道，迷墮邪津，順入苦流，生老病死。爲此因緣，不忍聞見。

天尊答言：善哉善哉，善男子，下世凡夫後學道淺，何由能超生死苦流。生老病死，世間常事。逆苦流者，唯有道者能之。諸俗法中雖有逆言，而無逆體，雖有逆理，而無逆事。理通事壅，非道所尚；有言無體，又非所尚。理事俱通，言體雙達，我道能之。淺俗浮僞，因緣穢賤，下土所尚。如此之

事，不足致問。

爾時真人頓首受命。於是八萬四千直使、執蓋小仙、四部靈人未聞至道，不辯深義，誠在質疑。爾時衆中有一小仙，名曰寶相，前進作禮，上啓天尊而作是言：臣等末學道淺，不曉深義，常聞下士凡庸書記傳說亦言我法能度生老病死，出生死流，身得六通，智能無礙。復見此人與凡不異，生而老病，終不免死。不審此說虛實云何？唯願天尊慈悲高鑒，哀所不悟。言畢叩頭，伏聽哀旨。

爾時大慈天尊愍諸小仙，以大慈故，而語之言：善男子，汝等得道，位階四部，始入道流，未免生死。以汝等

衆得承宿慶，遇會天真，延續性命。若不爾者，久以灰沉。子所言者，世俗經書之所傳說，亦言我法能度生老病死，出生死流，復見其身隨世生滅。此是入理之人作如此說，事體不通，但明空義，辯能無礙，非能理身而得無礙。方寸之心與凡有異，生老病死不能異。俗間苦惱、生死流轉。入理之人，身無道力，不能逆之。獨有大道而能超之。無上道法能度生老病死，逆諸苦流。善男子，用我法者，理於生人，能得長存，轉凡成聖，復歸於無。昭合光氣，出有入無，無所妨礙。善男子，善用我法，理於衰老，其形反嬰，歸於長生，此名度老。用我道法，度於癡人及病苦者，令其不病，所苦得差，此名度諸病人，令其不病。用我道法，度諸死魂及諸罪魂，令得離苦。欲受生者，令其如意；不願生者，令其無生，此名度死。善男子，世法苦流，以貪欲爲本。大道法中有除尸制魄，修學此道，即無欲想。又苦流者以恩愛煩惱、衣食爲累，而我大道有八寶天衣、自然之服，隨其

大小及與長短。大道法中有太和生氣、陰生靈符、神水玉液，以充饑渴，却除老死、煩惱疾病，與世服用危固不同。此名大道正法，逆煩惱苦，永斷生死。諸浮俗法，言能度生老病死，逆世苦流。譬如有人身嬰百病，又復貧苦，所求不得，即出僞言誑惑下凡，自言我是天人大師，善療衆病，辨諸方藥，及以鍼灸。愚人聞之，齎持競往，依止愚師，受其方法，所疾不愈而久彌癡。一切貧病與師相似。賢人觀之，心知其謬，捨置而去。於是賢人擇師承受，既遇明師，實能愈疾，門徒慈善，憐諸貧病，諸有病苦，施爲療治。下手之時，如湯沃雪。是諸愚師及其門人各同愚人，承受明師之法，作如是言：能依我法，苟得利養，支持身命，亦復何嫌？二部之人，明昧相反。爾時愚師門徒子弟妒嫉明師，日夜譏謗。爾時明師晨夕進道，行大慈悲，不與彼諍。善男子，世俗之法譬彼愚夫，所習邪道，明師之法喻我大道，真實之教，能度老死，逆諸煩惱，順入道流。

天尊又言：世俗之法，不得六通，智能無礙，此亦僞言，不可依信。何以故？世俗之法，人能修之，而得六通，與道相似，等無優劣者，即應能逆老死之流。今既老病，終於絕滅，即名無智，定無六通，定無道力。善男子，以我法印，印諸邪僞，自當得知不修法印，得知邪僞無有是處。善男子，世間有人直修空義，無所爲作，自證其身，與道無異。如此之人止得高心、嘖嘖之罪，千生萬生，終不得道，何以故？此人高心，不願見道，永與道隔，長墮生死，順入苦流。

道言：若復有人求無上惠，不見有生，自言我本無生，今有此身，譬於夢幻，而願滅度，以求不生。善男子，如此之人身染邪魅，妄出狂言，無所忌憚。何以故？欲求無生，應修上道微妙之法，以道法力逆於老死，不順俗流，然後昇入無形，不生不滅，非以滅生而能無生。善男子，無道之人不能留形，以是驗之，明無道力。既無道力，不能不生。後學之子持吾法印，印

諸僞道，其法自靈，不假得其所修之法，而得知之。善男子，若復有人學無生智，而作是言：我學無生，不能留得，即身而成妙道，見身昇度，但滅此身，復歸於無，自無有生。若有衆生作如此說，此名邪說，非正說也。何以故？道非滅法，滅身求道，道存身滅。修吾法印，存生求道，道存身存，然後乃能虛身合道，非謂滅生能合道也。

爾時天尊又告仙人曰：道雖存而能虛，身雖有而能無，能虛能無，乃名爲道。善男子，能存不能亡者，非爲道也；能亡不能存者，亦非道也。無上大道能存能亡，得道之人亦復如是。是諸外道能亡而不能存。善男子，汝今當知順向死易，逆不死難。善男子，汝今當知，順死之物名得道者，一切死尸亦名得道。若一切死尸不名得道，明知外道滅形非得道也。此諸外道名爲入死之道，非爲昇入無形長存之道。善男子，昇入無形謂修吾道印，轉凡成聖，練質入微，不可毀壞，猶如虛空而不變易。善男子，若有衆生任身生滅，

不能生堅固，四大離散，形骸糞壤，欲望魂神證無上道，猶如愚人披空尋跡，終不可得。以吾法印印此愚人，去道甚遠。善男子，若我法中師徒子弟以因緣之道而化衆生，所謂建立清堂，香燈供養，方便惠利諸不達者，仁及蠢動，不害物命，設齋請福，悔諸過咎，不應割其珍玩穀帛，損敗衆生，以活己身，不應忘義，捨大慈悲。如此之人非我弟子，是邪徒黨。不損衆生，不捨大悲，真道弟子。若我弟子以因緣之道化諸下根，迷滯衆生，著人我者，耽嗜臭穢，及以酒色，蓄積無厭，爲說無常，身命危脆，四大難保。況諸外財方便教招，不損財命，如此之人，真我弟子。若我法中門徒師弟教他施財，及以玩好、奴婢、畜生、屋宅、田地，私及己費，不營功德，此名道賊。不斷癡貪，不足化人，教從後學，下世凡夫。若見此賊，慎莫親近。

道言：下世愚人竊吾道要，而銜賣之，以求財帛，及規酒色，如是過失，亦名道賊，非我弟子，是謂外道、邪神

之黨，同諸陰賊共作儔侶。大道之士持吾法印，若見此人，應須遠避，勿同鄉里，及以交言。

道言：是諸邪師、門徒子弟爲貪利故，勸化凡夫，修因之道，令其布施，取其穀布，入己私費，自說其身名世大師，能爲衆生長福生善，能施我者，獲福無量。後世之人、學真之士，修吾法印，印此愚夫，名爲邪賊。諸布施者，莫施此人。忤其後生，墮三惡道。諸惠施者，成此之善，莫成彼惡。以是因緣，不當惠施。學道之士執吾法印，慎莫如彼邪俗之法。

道言：往昔劫中有一邪師，字曰求名，身懶衣食，詐稱得道，隱於寒林，常自唱言：我已證道，善知法相。視地而行，入村教化，積經三年。林外人民競往惠施，財食盈溢。因此此財私給妻子，及市魚肉，屏處噉之，詐言齋食，前後八年。天司殺之，謫其魂魄，八百年中墮溷坑地獄，已後出生寒林之下，受形羊胎，一歲三生，備償施主，足五百生。後受牛胎，備償人力，使復

五百生。今爲僕隸，猶未解脫。雖生長壽，百歲不死，筋力又羸，驅策不逮，常爲世人之所惡賤。八年欺詐，自稱得道，窮劫受辜；况人終身常行噴嗚，自稱人師，惡求名利，損害一切衆生財命，億劫受罪，猶未解脫，望入無生，安得有冀？後世男女執吾寶印，慎莫欺詐，受人惠施。

爾時諸仙雖奉天尊金口法印，心尚朦朧，未能辯了，合衆作禮，重啓天尊：向蒙慈尊金口法印，云用我法者，能度生老病死。不審慈尊以何妙法濟度衆生，而得不生、不老、不病、不死？以蒙垂愍，願見生老病死之苦，與世邪俗不能有異。唯願慈尊重爲分別。言畢叩頭，悲哽流淚，伏地不起，希降玄息。

爾時大慈天尊告靈人曰：善男子，此道至妙，其法極神，教諸成真，不授俗流諸下仙輩。汝等見我，去真不遠。愍子有心，故我不秘。汝當諦聽，吾爲汝說。須臾之頃，大慈天尊即命左右侍者三十九真齊鼓太虛大慈宮

中，自然生根，復虛理魂，妙唱和合三十九章金鳳之歌，以調三十九氣，吟其篇目，一時之頃。其時琳碧抽條，瓊枝吐葩，調畢成實，萬化歸根，三十九真變爲虛光，金鳳易形以成妙氣，光氣交映，猶如春藂。須臾之頃，變成仙雲，入於宮中，凝斂梁棟，冥然不動，大慈宮中生根復虛，理魂妙唱。其詞曰：

慈宮洞真暉，昭晰掩朝陽。六合開門戶，太空明牖窗。雲帳羅輕蓋，九氣變飛龍。一舉神足遊，飄然無有蹤。道名大慈尊，神力無等雙。天經列衆象，吟嘯和心胸。

爾時天尊眉毫神彩，光踰初日，洞暉道境，幽冥開曉，十方世界皆於光中朗然而見。爾時寶相及諸來衆，睹此真光，心眼明了，盡見十方世界一切色像，皎然無礙。須臾之頃，大慈天尊遍滿光中，處處說法，一切色像，亦皆能言，助說天經。善聽之者成賢成聖，用吾妙道，超離苦流；服吾妙氣，立便無待。死魂得之，則能受生；生人得之，則能無病，老人得之，則能反嬰；病人

得之，登即痊除；道人得之，歸根復源；俗人得之，所願通達；愚人得之，永離盲道；上天得之，三景貞明；大地得之，永不崩淪；萬物得之，能終其生；啞啞得之，而即能言；跛痾得之，立便飛行。

天尊告諸靈人曰：吾此法印是諸後學存生全形無生之道。一切衆生失吾此道，悉皆殘形滅生，順流入死。既無道力，不能無生，不能無死。後世男女，學真之士，持吾法印，深思此道，是諸後學之根本也。若有衆生離吾大道微妙之法，能得全形無生之道，終無是處。失吾生道，如鳥失翼；亦猶濟人，亡其船筏，遙想彼岸，無由得度。一切萬物亡吾道氣，終不得生。一切衆生言離大道而能得道，猶如草木遠離地水，定不虛生。一切衆生遠離吾道，定不得道。善男子，事可類推，昭然易見。物不類用，愚人不知；可類用者，人亦不知。浮俗之夫雖知類用，與不類用，用亦不能至當。用之得當，即能全生；用不得當，自用殘形。得失相

反，生死相背。昇沉邪正、生死之際，自然而辨，無乎一遠，則生二見。能復歸者，萬無一人。以是因緣，得道者少，失道者多；真正者少，邪行者多。

大慈天尊曰：汝諸衆等但誦大慈宮中至真妙唱，採服靈驗，即能善出生死之流，即能救脫生老病死之苦。

天尊又言：此微詞非是虛言，要在服用，言行俱行，靈驗在即；誦言無數，所不觸老死；行而不言，可以絕塵。子能絕塵，與道爲鄰；與道爲鄰，物不能怨；物不能怨，是名歸根。無形可繼，全生入無，謂之無生。善男子，形不全者不能無生，生不全者名爲入死。夫入死者，名無道力；若無道力，不能無生；生而入死，不如草木及以蟲蟻，朝生暮死。人出一生，自言學道，唯學空行、噴囂之法，不免生死。何以故？空行之法，上聖能之；在學凡夫，觸事有礙。不理生具，不攝形神，生不能固，形神流散，空生空死，不能得道。後學聖人初在學地，攝生理具，晨夕不懈。得道之後，即能空虚，

非謂在學而行空法。善男子，下世流俗邪僞之黨，傍聞大道微妙法中存形存生，能入無生，邪俗之夫便謂殺身之後，精靈罪鬼而能無生。此等邪俗行空之法，自謂其心能行無礙，力能反覆天地，迴易陰陽，和合水火，不見天地萬物生死妨礙。作此見者，名爲得道，欺誑世俗，要求聲利。不敬父母，或言無生，妄想而有，有死之時，自言無死，況有煩惱，饑寒疾病。如是諸見皆是妄想。邪俗之夫作此見時，名爲得道。若我法中初學之人作如此見，名無忘諱，反逆大道，道不玄祐，身無道力，暗生暗死，一切事數皆不能免，況能證道？冥司之官猶注黑簿，以其噴囂，自誑誑他。如此之夫誤無數人，永失生道。如此之夫空有大言，不行大道。亦猶疾人言善治病，亦猶跛人賣能行藥。乍而聽之，一往如實；知者觀察，即知其謬。

爾時寶相合衆再拜叩頭，而作是言：向蒙慈尊言道妙氣，服者無待。願請其方，以輔形命，終身奉行，不敢

輕泄。

天尊告曰：無上至法授與能行。子既有心，吾道不秘。汝當諦聽，至神之道無能先之。寶相合衆伏地，諦心領受。

天尊告曰：道氣之妙，其法至神。天地萬象，元氣所生，未有一物不由元氣而得自在。昇沉飛走，乘氣而遊，得氣則存，失氣則亡。存者不可得死，亡者不可得生。氣有清濁，事有否泰。服清氣者活人，御濁氣者殺人。清氣上浮，濁氣下沉。清氣爲天，濁氣爲地。真精妙氣，謂清氣也；凝黷穢滯，謂濁氣也。死道昏濁，如濁水也；生道澄徹，如清水也。人猶魚也，氣猶水也，水濁則魚瘦，氣昏則人疾。善男子，下世衆生志多勃逆，煩惱奔躁，求諸可欲，情性喜怒，狼狽情烈，皆死氣也。仁慈孝順，安庠徐審，和悅中雅，皆生氣也。忘身冥道，不覺衆累，萬化不過目，千響不經耳，所動如無，所止如虛。恒存清氣，流入雙闕，散適經緯，遍體雲行，天闕微呼，出一半氣。

心念半氣，循環雙闕，令不馳散。朝餐紫華，夕味黃蘗。如此之法，是服日晨氣，用我晨氣，保見太平。取飽爲度，無正限也。於是經緯流通，百關調柔，色美髮黑，氣力倍常。存身全生，莫先此道。此道是後聖之戶牖，學真之樞機，是一切萬有之生根也。流布凝結，成天成地，成日成月，成星成辰，風氣、雲雨、霜雪，山川土石，草木水火，賢愚凡聖，人及非人，皆是一氣變動，乘諸得生。如吾道者，爲賢人用吾道者爲聖人，不用此道者名爲行尸，形骸流散，魂神罪鬼，沉沒九泉矣。

爾時天尊說此法已，金口應時流出三萬六千真光妙氣，衆籟齊吟，天樂流遍，有情無情，悉皆自鼓。是諸下仙得真道氣，同謝受生，歡喜悅豫，不可思議。奉行妙道，皆得全身，入無生道。成道已後，固修不廢。

道言：諸學道之子得道力者，凡夫不知，但觀其形，雖不肥臍，色正力強，身體輕妙，皮容潤澤，聽察不掩，行步輕便，晨夕不睡，身無疵癘，形貌鮮

潔，聲響清潤。如此之人，名得道力。進修不退，定得免脫生老病死。善男子，持吾法印印此上士，立驗在即，不待得之然後始知。

大慈天尊重告仙人曰：汝欲知僞道之夫？道觀其形。世若有人自言得道，深明道義，或言我今日夜修道，身心不迨，或得三十、四十年間，邪正可辯，得失易知。善男子，汝知邪道之夫？第一血食，第二耽嫖，第三惡疾。氣腫瘡疣，疥癩疽癰；習邪失性，水腹癥瘕；顏色焦乾，耳鼻枯燥；處處疼痛，氣喘液竭，無有津潤；貪睡履污，不忘生死，形容垢膩；體氣臭處，所向便利；好講惡事，馳競奔躁，積聚無厭；肉大骨小，瞻視淺近；性無仁慈，心不孝順。此等色人定不得道，此名有漏之身，亦名敗壞之身。假有道氣，不能自度，況能度他；猶不自活，何能活人？善男子，僞道之夫作法之時，男女交雜，關閉門戶，施惠財食，還與外道，不忍普惠，此名有漏作法，有漏惠施，非是正法，非是法施。無上大道仁

及大地，布散元氣，長養萬物，顯仁藏用，不恃其功，不見所施，不見所受，况覓其報。外道之法不斷癡貪，此名有漏，定不得道。若我弟子作此惠施，同彼妖邪。我弟子後學之士持吾法印，若見此人，勿與同行，非法居住，應須擯挫，以法教語；如不從者，自天罪之，不得奪命，及以鎚打，犯刑殺罪，天科不赦。

天尊曰：後學之子修吾大道，初在學地，未證果前，慈悲忍辱，恩流蠢動，孝及一切，單衣菲食，蔬素芳潔，燒香禮願，晨夕懇懃；精密其行，恒慎凶惡；不馳不競，宴處虛寂；吟詠寶經，微聲平氣；身心調柔，忌諸雜想，專心念道，如有所待；餐服妙氣，吐故納新，菇諸靈芝，神符聖水；幽身避世，不交人事。如此修學，未踰一年，神靈給使，衆毒不害，舊疾消除，顏貌反嬰，氣力丁壯，自求多福，身心無厭。我印此人克成真道。

大慈天尊又告寶相曰：下世愚夫不修大道、無上至法，而作是言：應滅

此身，冀得清虛，會真宗者，喻如下世崑崙山陽，往昔之時，有一戎夫，名曰憂波斯那，立性兇頑，多畜妻子。其第三妻貌甚鄙，累生十子。戎夫自計，心陋此妻。妻又懷娠。於是戎夫但念其子，不暇待產，酖殺其母。母既命終，剝腹出子，子猶未成，始凝胚混，隨母爛壞，不可捉持。戎夫自惡，後方悔恨，而作是言：我妻身體不能如騾，懷妊之時，剝腹取子。傍觀之者而告之言：長者當知騾懷妊時，候其日滿，知母欲產，剝腹出子，乃全子命。如長者妻，異於騾身，况復懷孕始經三月。假使月滿，亦不殺母。剝腹取子，何如養母而育其子？子得長成，母自老死，何用殺之，而欲此兒紹隆家業。猶翦樹根，望果成實，終不可得。善男子，邪俗行尸，亦復如是，不修至理，求欲滅身，而望罪魂得會真宗。如彼戎夫殺妻取子，一何執滯。哀哉流俗，浮偽若此，安可與其聞大道乎？執吾法印不應如彼。善男子，修因之道，尚須誓願，願得見在、未來見道聞法，况求即

身而覓解脫。善男子，汝學大道，存形存生，無生之道，喻如舟車，堅固輕利，縫緻綿密，陸行堪載，濟能勝溺，保達所在，永不勞慮，豈不樂哉。善男子，世有愚人聞他得度，傍而學之，身無智力，性有疏懶，不能鑿車，捨他破壞，所棄舟車運危濟溺，未至中道，傾覆敗亡，摧折淪沒，不可思議。善男子，汝今當知，敗車破船不能自勝，何能度人？邪俗之法，亦復如是，不能自濟，何能濟他。下界凡夫憑向外道，邪俗之法，拔濟存亡。亦猶愚夫運敗舟車，摧沒之禍，立便可待。善男子，世若有人乘破船筏，得濟渡者，外道之法應得無生；若以破船不得濟者，外道之法不能無生。善男子，後世男女欲學道者，採用天經，吟詠寶文。此文在天爲經，在地爲緯，南北爲經，東西爲緯，在中爲神，在物爲氣，在人爲靈。故曰天經地緯，織成凡聖。一切萬物，有形無形，無非大道真氣織成也。

諸仙人曰：敢問慈尊織成之方。天尊答曰：天無言而有信，故可軌之

成仁<sup>①</sup>；三景不言而明，故可則之成身；地不言而有義，故可範之養物；道無言而有靈，故能生天地。天地萬象亦經緯也，織凡成聖。

仙人曰：敢問天地萬象非道之體，云何織凡成聖？答曰：道生元氣，元氣生太極，太極生天地，天地生萬物。是故天地萬象皆道之子孫也，何為不能織凡成聖？大道經緯，羅列天地，所布日月、星辰、風雲、雨露、金玉、土石、草木雜類，皆可採用，以輔學人，甚疾成聖。既得聖道，能制御天地及以萬物。

爾時有一下仙，名曰證明，聞天尊所說，迷惑不悟，重敢致問而作是言：不審慈尊金口法印，所云學道之士採用日月、星辰、風雲、雨露、金玉、土石、草木雜類以輔學人，甚疾成聖，既得成聖，還能制御天地及以萬物。弟子蒙昧，不明妙理，祇言用天之道德劣於天。惟願慈尊，賜垂分別。

天尊答曰：學道之士用天之道，及以萬象，甚疾成聖者，無上大道真精

妙氣隱在天地及以萬物，善用天道及以萬物，大道感之。譬如孝子供養父母，心無拒逆，四時溫清，瞻視顏色，設復遠行，心中憂念，存憶父母，如對目前，寤寐之間，精神不離，自天祐之，鬼神護之。孝至二親，尚能感天；孝至於天，理應感道。

爾時燈明并諸後學聞天尊所說，心開意解，信知天地萬物皆於學人深有益，明知天地萬物無非是道，歎凡夫之徒不能用之，如我未悟，亦復如是。合衆禮謝天尊受生之恩。爾時大慈天尊又語仙人曰：天地之德，德具於道。其中萬物，德不盡備，但取一用，和合利益，功德道同，知用天地及以萬物以輔身者，無煩三清祕文、三洞真法。三洞祕文，道高法妙，難可叨佩，及以見聞。學道之士求真不懈，功滿行成，我道自來度於子也。是諸仙人深明道義，洞曉存形無生之道，進仙三階，登不死地，盡能昇入無形，始驗無生非滅生也。燈明中和真人為諸仙人請法印已，一時辭別天尊，七日七夜

徘徊雲間。

天尊又曰：得道之子遐觀洞聽，身心自在，微妙快樂，解脫無礙。我今與子雖隔三萬六千天地，猶如指掌，近在目前，有何可別？不如下界塵俗行尸對面胡越。汝歸下界，勸化衆生，令遠邪道，漸頓之法，量物所宜。是時仙人稽首再拜，奉行法印，升入無形。大慈天尊分形諸仙，流布道化。

爾時諸仙歸下界已，止住空中，去地萬仞，坐於慶雲之上。是時天柱四方，大地震動，龍神歡喜，天地朗然，烟收霧卷，三景倍明，香風遐暢，甘露滂流，地涌乳泉，川澤平濟，祥麟瑞鳳，紛紜雜集，神芝嘉卉，連廕接野。是諸天王咸謂國慶，皆稱萬歲。大赦天下，出庫穀帛，矜恤老病，普天作樂，頒賜爵祿。天子、諸王、群公卿士，不可勝記，登壇朝禮，大謝恩造，巨施珍寶，立靜供養。普天奉道，妖邪絕蹤，萬國太平。普天齊濟，人民豐樂，謠歌諷頌。九萬年中，天無雜色，獨有紫雲，潤不別流，唯洒甘露。下界小仙睹道慈力，



知是大慈天尊威神之力。是時仙人各陳心願，遙禮太空之中。

爾時大慈天尊與諸上真及諸上仙各各授手，遍滿下界，爲說妙法，授諸下仙上道一階，各令下仙進修至法，入於全形無生之道。大度衆生，入真妙法，登不退果，不可計數。胡夷蠻獠及諸鬼神、地獄罪魂等衆，悉沾玄化，皆得利益。從此已後，人漸澆競，多事凶害，大道不行，妖魅萌生。雖不受度，道猶授手，施大慈法。後世男女既無正心，試行吾道，道亦與之，不責於人。亦有因與漸進，亦有中道而退。吾見其退，亦不執之。道雖無心，常慈養物。大道如水，止渴除穢。道猶良藥，勤而服用，定能愈疾；有病不服，稀能自愈。後世男女勤修吾道，定免死厄，全身保生，能入無形，與道爲儔。背吾道者，不除死籍，不免死厄，形如灰土，魂識漂浪，隨業受報，生無道力；死望道生，終不可得。從今已後，陰氣漸盛，人不畏死，修學外法，不得大道。如此之夫，多被妖邪執其魂魄，身遭疾

病，無方療治。命滅之後，隨邪群黨，定不得道。雖有小善，無由報應，由其失正，不願行道，邪鬼侵之。如此之人，雖言萬物皆空，我身亦空。物境既空，何有能侵？我身亦空，有何所受？妄想言受，畢竟空寂，都未曾有。愚人偏見，作此觀時，邪精魅物，競來侵害，無所畏忌。亦有生身遭魅，隨逐邪神，一絕而去，此名全身入邪，不須待死，取其魂魄。若有女人，生身懷邪，顏色萎黃，處處疼痛，常吐涎沫，或復洪腫，水土惡氣，百節酸痛，風疰入心，恍惚迷忘，救氣不暇，安覓道乎？痛傷流俗，自取滅亡。身各有道，不知用之，與道爲鄰；不肯析之，徒近玄流，無心洒垢；神醫在側，不知愈疾，甘心受苦，嬰抱楚痛。如此之夫，去道不遠，邪惑其心，障覆其目，順流而去，不能逆來。

大慈天尊爲一切衆生演說法印，流通供養。精至之士寶而行之，邪俗之夫誹謗四起。善男子，汝今當知信敬我道，亦不益我；誹謗我道，亦不損

我。善男子，邪俗之夫，如獵犬食，無有定主。譬如東家修善長齋，持戒不煞。西家十惡，專事屠販，漁獵殺害，家豐薰臭，所食之餘，棄之域內。東家犬子承臭而往，食其殘餘，遂至忘返。於是西家先復無犬，大小見之，歡喜餘食，倍與薰臭。爾時犬主性器弘大，亦不呼歸。歲月經久，犬遂長大，不識前主。主忽出遊，暫過西鄰，犬便驚吠。前主慈悲，亦不致怪。却後數日，十惡之家，忽被天殃，合家滅命。先人收養臭爛之餘，亦以窮盡。犬既饑餓，終日號鳴。舊主聞之，合家議言：犬子少小愛往彼家，所食臭爛，穢性以成，卒不能改，設呼暫還，終歸不活。須臾之頃，犬便餓死。主又歎言：犬子向在我家，常得聞法，縱不悟解，亦潤其神。冀犬後身得生人道。無故往彼十惡之家，飲血吞膏，食噉臭爛。今忽餓死，無一善緣。此犬必定不生人道。善男子，我喻惡人邪俗嫉妬，忘失根本，誹謗大道，與犬無異，爲逐臭爛，故不識前主。學道之士含垢懷辱，忍受誹謗，

彌加精進。求無上道，復應却照，邪俗之夫，不離生老病死之苦，不能超出纏累泥滓，淪沒邪道，癡貪三毒，以成其身。十惡五逆，是其徒黨；財色窟宅，是其居處；惡口惡舌，是其歌頌；誹謗妒嫉，是其心行。邪俗之夫不見真經，不聞真說，無以止惡，禍患如此。後學之士應離此人，不須酬對，與其諍論；自求昇度，晨夕不懈。邪俗之夫，法有興廢，身有老死，未死之前，已被災害，是其邪法不驗之徵。學正道者，身無疵癘，是其元吉全生之徵。應自慶幸，深避患害，執吾法印，勿受邪言。善男子，劫初之時有建木鄉人，入於山南，街賣真珠。時有山東商人，姓頗羅墮，名曰滿願，出庫百金，買得一珠，圓明曜掌，大徑一寸，囊肘自隨，不令他見。數旬之間，忽有山南一人，名曰雷詰，僞賣魚目。滿願西鄰壽量之家亦出百金，買得魚目，亦以懷藏，不令他見。却後六年，二家惡疾，祈得明師來療此病，和合藥分，須好真珠。爾時二人各出真珠以閱明師，師遙見之，懸知

後人買得魚目。師即語言：此非真珠。壽量狐疑，恐師行誑，請師水之，浸經一宿，合器腥臭，真珠入水，彌益光明。九日出之，引長六寸。滿願服之，所苦立愈。後又市珠，請師教浸水，服之丁壯，于今已壽九萬餘歲，上皇玉簡題不死名，一切善神遞為給使。此人又復得吾真氣之道，亦能御氣而遊，無復死厄。西鄰合家因此惡疾，以至滅絕。唯有一奴，名曰勤子，少小有心，常仰天歎，願得天道救其所苦。我命上仙大通教其餐松，并服松子，于今不衰，入於太白，時遊天山，上登崑崙。吾以授其晨氣之方，必定免死而得真道。善男子，真僞之道，生死相背，不可倫疋。執吾法印，能辯邪正。修學之士望濟一身，傍度幽顯，不可造次，以規聲利，忘其大成。至真法中幹用之士，道迴天地，德拒四時，不為晝夜改易。乾坤崩淪，道能成之；天地毀缺，道能補之；生氣不足，道能足之；萬物不養，道能育之；天下不化，道能化之；一切凶惡，道能變之；一切為

善，道能福之；愚暗之者，道與其光；孤遊恐畏，道來友之；饑寒病惱，道為除之；履涉危難，道來安之；白刃臨項，道能救之。善男子，汝欲學生，莫於無上大道至真法中生不正行，諸所施為盡皆中正，大道玄祐，不畏邪道無正根力，無的依憑。譬如迷人，進退失路，不知要道，始年昏惑，所習不定。或言忘心，不見有身；心既無生，聽可得忘；即心有累，云何忘之？始欲此身復歸四大，身雖暫忘，四大猶在。假使體空，不能無觀。一物一觀，已成二事。前境未忘，後觀續生。一切因緣以四大而起，身由四大和合而生。絕滅之時，還歸四大。外道之夫猶如草木，因四大生，因四大滅，不能不生，不能不滅。欲其即生，亦不能得；欲其不生，亦不能得。外道亦爾，於生死中不能自在，為物所負，隨境生滅。善男子，得道之士能忘身心，不見所能，不見所忘，境智體空，觀無所起。我所受形，從道得生。今忘此形，復歸於道，不為四大之所攝持，不為四時之所生

滅，不爲累患之所繫縛。所謂無上大  
道能存能亡，亡能無形，存能長生，寂  
寥幽奧，恍惚希微，不可以智知，不可  
以心識，應物有周，動用無極。善男  
子，無上大道慈悲之力，不可思議。後  
世男女持吾法印，深心思念，當正億  
持。爾時天尊說此經已，五百外道柯  
葉惟等悉捨邪法，肉袒求哀，從道出  
家，欲求濟度，悔過自責，遍體血流，拔  
除鬢髮，如鳥斃翻，踴身自撲，猶如山  
崩。

爾時天尊即命中和真人開度外  
道，授其往生因緣之道，敬觀無常，戒  
莫戕害，斷其癡貪，不令蓄積。中和真  
人曰：汝諸外道，從今日後，慎莫自  
高，詐稱汝是天人大師，損他財命。天  
司黑簿，注汝罪名，九祖受考，身爲逆  
鬼。汝今生存，單衣菲食，以支身命，  
忍辱精進，求早化滅，後生中國，見道  
聞法。即身穢滯，不堪全形，入無生  
道。是時五百外道歡喜禮謝中和真  
人，辭別天尊，各還其居，建立精舍，晨  
夕行道，觀身無常，求早滅度。四天之

下，人及非人，咸悉歸依正真之道。是  
時天尊與諸聖衆真應之身遍於法界。  
於是靈仙之衆八萬四千執持法印，作  
禮奉行。

太上大道玉清經卷之十

①「軌」，敦煌本P.2385作「執」。

（丁培仁點校）

## 097 元始應變歷化經

經名：元始應變歷化經。撰人不詳，約出於南北朝或隋唐之際。《正統道藏》未收。《道藏缺經目錄》著錄《洞玄靈寶元始應變歷化經》，當即此書。一卷。底本出處：敦煌P.2449號殘抄本。參見P.2467《諸經要略妙義》抄本。

(P.2449抄本，前缺)

以堅齒骨，神仙兵馬七億萬人，各衣素衣，營衛其身，少陰之氣匝繞其形，白元尊神定肺安魄，立秋〔秋〕分，列名七氣素天，西岳舉善，太白奏仙。冬化腎中，為北方洞陰朔單鬱絕五靈玄老帝君，太玄玉女、太玄玉童真精鎮守，上出於耳，為玄冥童子夜光真人，照五千日，生五千神，玄武之精斗牛女

虛危室壁，流耀於身，以潤津液，神仙兵馬五億萬人，各衣黑衣，營衛其身，太陰之氣匝繞其形，桃康之君和腎凝精，立冬冬至，列名五氣玄天，北岳舉善，辰星奏仙。四季化脾中，為中央玉寶元靈元老帝君，黃庭玉女、黃房玉童志意鎮守，上應於口，為黃常童子說法真人，照萬二千日，生萬二千神，勾陳之精魁魁魑魍魎，流耀於身，以生肌膚，神仙兵馬十二億萬人，各衣黃衣，營衛其身，中和之氣匝繞其形，司命納生，定志安脾，四季王月，列名一氣黃天，中岳舉善，鎮星奏仙。人居宇宙之內，含天地之形，內外神靈，表裏相明，天人相應，心與神通，運動施為，天皆知之，心修於內，神應於外，是以衆行員備，神舉其身入無形也。故諸天五億世界、三千日月星辰、山河草木、土地城邑、州縣鄉亭，具列人身，分無量因，一一氣化，隨處生神。此一一神各因於道，千二百老子、一百八道君、萬二千精光、三萬六千神明，乃至一千五百天尊、一千一百六十天尊、廿

八宿、卅二天，環繞身中，分靈布化，念念不住，轉變其神。一切凡愚，莫之能識。大行梵氣，分布十方，中有百靈，主授罪福。其統之者元始天尊，其悟之者止在心也。言大羅者，大梵氣也；三清者，三丹田也；九天者，九宮也；三界者，三毒心也；十方者，周一身也。所謂大羅，無不包也；所謂三清，證果處也；所謂長樂，湛常存也；所謂梵行，超生死也；所謂六度，淨六根也；所謂四等，除四迷也；所謂三界，在輪迴也；所謂金闕，會聖真也；所謂玄都，至道源也；所謂玉京，德巍巍也。並從心生，受異名也。學道求心，不求人也。先自空心，不空境也。靜心不靜境也，定心不定境也，洗心不洗境也。智者明了，自觀心也。愚者暗昧，見諸身也。三洞分門，由是興也。所以經由內外，法有真偽，教有大小，道有通塞，行有優劣，聖有尊卑，德有廣狹，心明暗也。是故元始歷化應變，大慈平等，勞謙忍苦，善巧方便，開度衆生，祇期悟道，除妄想也。妄想

者，衆生妄心起想，生種種見，殺生偷盜，放蕩耶淫，嫉妒慳貪，瞋怒罵詈，惡口兩舌，妄語綺言，顛到愚癡，憎嫌勝己，不孝五逆，犯地違天，染著世間，諸不善法，流浪生死，墮落三徒，苦痛切身，不能自出。爲是義故，開解脫門，導引衆生，令去煩惱。寫經造像，立觀度人，布施放生，持齋奉誠，燒香念誦，行道讀經，供養出家，懺悔發願，含垢忍辱，調御其心，普入道場，離諸怨結。所以寫經者，欲廣法門，教未悟也。造像者，係念存思，歸至尊也。立觀者，聚諸賢明，化愚迷也。度人者，擇諸有心，聖行言也。布施者，捨其慳貪，惠諸貧也。放生者，發大慈悲，愍無知也。持齋者，洗滌身心，齊物情也。奉誠者，制斷衆惡，止罪根也。燒香者，願持淨意，獻天尊也。念誦者，絕諸攀緣，無偏心也。行道者，運氣動形，歸自然也。讀經者，精研妙理，通未聞也。供養者，遍及人天，興敬心也。出家者，普離世間，煩惱門也。懺悔者，改惡制情，不犯非也。發願者，誓我本

心，至道源也。含垢者，和光同塵，不自明也。忍辱者，常處雌柔，不剛強也。凡諸方便立行之門，欲以調和剛強心也。若心柔弱，妄想不生，此諸行門，亦復除也。永消患累，登大智惠源，常住湛然，畢竟虛寂。

高上老子稽首稱善，復問天尊曰：未審十方三界，五億諸天，爲復一種，亦有不同？爲復常存，復有破壞？天尊答曰：諸天無量，受氣源由，未異本同，凡有三種。一者道氣應化，包裹諸天，名曰大羅，覆〔蓋〕一切，獨高無上，彌絡無窮，常住不傾，永無淪壞。二者一氣布化，爲上三天，散景分靈，九天列位，氣生三氣，三十六天，輔上三清，總爲道境，空色俱淨，遠近同明，入此界中，自絕因待，了然虛寂，永斷習緣，無始無終，長存不壞。三者道化漸薄，淳氣轉澆，三氣下流，五常斯應，神化五老，文成五篇，氣散五行，天分五氣，氣生八景，景照十方，方以數名，數因方立，正分四八，梵起四維，三界四人，淨穢殊域，自三界之下，則爲劫

火所燒，其中衆生，志皆摩滅，三洞經教，得道聖人，超出三清，不被燒滅，是故諸天有不同也。又問曰：三界被火，爲復十方同耶，有不同耶？天尊答曰：各隨衆生業力所感。若惡業衆生，遭此火劫，善緣衆生，自不覺知。又問曰：如尊所說，自由造惡所感，何獨三界內耶，又超出三清，復何等耶？天尊答曰：實由衆生造惡，遭此劫火，但三界衆生，未能盡善也。若其總善，亦無此火，假有善者，善不能常，積久惡成，還遭火劫。爲是義故，說三界內不免災也。超出三清，自是遭火之方，非謂其他方也。亦猶世間遭水逢旱，自有處耳，謂可遍通諸方耶？又問曰：三界十方，亦有同遭劫不耶？天尊答曰：若三界十方衆生等惡，則同遭也。又問曰：同遭之時，獨其中人物滅壞，天地復盡耶？天尊答曰：火劫之時，天下地上，化成洪炎，煥赫標灼，天地萬物，山河草木，同爲火聚，消作灰塵。無南無北，無東無西，無光無象，幽幽冥冥，經九小劫，有大雨注，滴

經百里，從他方諸天來。復經九小劫，水積齊無色界半，有大風四面同氣，更相鼓激。又經九小劫，化成七寶五明靈化之山，正立界中，周迴八方十二億萬里。又經九小劫，諸天神仙將、諸天金剛力士、天丁神王，無央數衆，造諸宮殿，屋宅四民，天中男女來居，與之爲種，稍自生化，從是之後，緣業相生，萬類皆備。又問曰：人者四民<sup>⑨</sup>，男女爲作種也。鳥獸草木，一切蟲魚，復從何生耶？天尊答曰：感氣生也。又問曰：既感氣生，云何造罪報生，復作六畜、鳥獸蟲魚耶？天尊答曰：化生之後，隨業受報，作諸身也。猶世間諸物，有種生者，有化生者，有無識化有識者，有有識<sup>⑩</sup>化無識者，有無識化無識者，有有識化有識者，有何疑乎？又問曰：有識有知，聽可有業，無識無知，誰作業乎？天尊答曰：若稱無業，化則不生，若言有生，生則有業。猶居淨土則有靈禽神獸、芝英仙藥，若在穢境則有惡蟲猛獸、荆棘毒草，此豈非業耶？又問曰：淨穢所生，豈非是感，云

何天尊說言業造耶？天尊答曰：若衆生業惡，則感報以惡，衆生業善，則感報以善，云何非造耶？又問曰：如雲從龍，風從虎，水流濕，火就燥，氣同則應，豈復造耶？天尊答曰：善則應善，惡則應惡，是氣同也。氣同由業，云何非造。即衆生業惡，生處亦惡，乃至國主人王，大臣宰輔，人民草木，鳥獸蟲魚，父母妻子，兄弟眷屬，一切皆惡。若衆生業善，生處亦善，乃至國主人王，大臣宰輔，人民草木，鳥獸蟲魚，父母妻子，兄弟眷屬，一切皆善。故善惡起乎心，吉凶應於天，而運用在於神，報應關於道，則動與神會，應與道通，亦未有非業造也。又問曰：善之與惡，皆從業造，造既無極，業則不常，造業不常，云何得證道耶？天尊答曰：爲衆生作惡，故令造善；若斷諸惡，善亦自忘；善既自忘，造心亦息；造心既息，亂想不生；亂想不生，靜意便靜；意靜無靜，靜亂俱忘；靜亂俱忘，煩惱斯斷；煩惱斷已，名爲得道；無斷無得，始會真常，一切皆空，稱爲極果。

高上老子稽首稱善，白太上曰：天尊云何名此經耶？天尊曰：名《元始應變歷化經》也。問曰：天尊說經，不稱太上，而言元始耶？天尊曰：有二種耳。一者吾師元始，以一切法門付囑於我，我今所說，說元始教，而稱元始。二者天地萬物，稟質受神，皆有元始道氣，應變歷化生身，從初至終，經營生化，覆育亭毒，不捨須臾，是故名《元始應變歷化經》也。

### 元始應變歷化經

- ① 衣：原誤作「依」，據文義改。
- ② 立秋分：原漏「秋」字，據文義補。
- ③ 西岳：原誤作「四兵」，據文義改。
- ④ 斗牛女虛危室壁：原誤作「升牛女虛危室辟」，據文義改。
- ⑤ 真偽：原誤作「真化」，據文義改。
- ⑥ 惠諸貧也：原誤作「惠諸貪也」，據文義改。
- ⑦ 讀經：原倒作「經讀」，據文義改。
- ⑧ 原脫「蓋」字，據文義補。
- ⑨ 四民：原作「四人」，因避諱而誤。
- ⑩ 有有識，原誤作「有有諸」，據文義改。

# 098 太上靈寶元陽妙經

經名：太上靈寶元陽妙經。簡稱《元陽經》。撰人不詳，約出於南北朝。原本卷數不詳。現存十卷（第十卷後原缺）。底本出處：《正統道藏》洞玄部本文類。

## 目錄

- 卷一 聖行品上
- 卷二 聖行品下
- 卷三 慈行品
- 卷四 問行品
- 卷五 觀行品上
- 卷六 觀行品中
- 卷七 觀行品下
- 卷八 德行品
- 卷九 德行高貴品
- 卷十 昇大羅品

## 太上靈寶元陽妙經卷之一

### 聖行品上

爾時元陽真人光妙音，聞天尊在玄都寶殿、紫微上宮、妙樂國土、元陽世界，與諸天大聖，飛天神王演說大乘經教，為諸神仙眷屬開闡玄義，微妙經典，神通變現，不可思議。妙音既聞斯事，心生歡悅，即率門徒弟子八萬四千人：我今聞有聖尊，威德堂堂，不可譬喻，汝等可辦名香貴寶，幡蓋輿輦，音聲伎樂，供養之具，剋明日中尋訪明師。爾時弟子既聞斯語已，各各驚疑，歎未曾有，即辦行裝，珊瑚琥珀，明珠寶幢，香華馥郁，盡世珍奇。侍從徒眾，乘雲駕龍，浮空而去。既到天尊之所，妙音眷屬，心懷戰懼，動止不寧。時眾之中，有一真人名曰賢智，高聲唱言：我今弟子，整頓衣冠，明潔視聽，以百和名香，立空之案，幡幢寶蓋，音聲伎樂，備衛左右，羅列虛空。賢智身

被正帔，手執香爐，低眉斂膝，下氣和聲，叩頭稽首，前進作禮，諮審靈顏，問訊尊體，開揚法教，德無損和。賢智宿因，有幸過忝上真，輪轉因緣，遭遇道運，慈愍之歡，實為無量，然猶宿滯，尚有深疑，沉迷既久，無緣曉悟。今聞天尊發大鴻恩，開慈愍路，為諸百姓子男、凡夫眾生作大舟航，作大梯磴，作大明師，作大道主。賢智敢藉威光，憑斯妙力，輒有諮問心所疑滯，伏願大師憐愍凡愚，降垂辯答。

天尊默然良久，五色開顏，三光朗曜，七十二相，八十種好，徧明十方恒河世界，發大法音，喧動國土。善哉善哉！子之所問，要乎深矣，隨汝所問，當為解析。賢智上白天尊言：既蒙開示，曉悟眾生，未審修何行願，可登道果？

天尊答曰：若修自然妙道，當須除身六種弊行。賢智真人白言：以何因緣，名為六種弊行？天尊答言：一者慳貪，二者破戒，三者嗔恚，四者懈怠，五者散亂，六者愚癡。真人修自然

道者，當須除此六種弊行，真道可獲。復次五種觀身。何等爲五？一者觀身不淨，二者觀身苦惱，三者觀身無常，四者觀諸法無我，五者觀身空寂，一無所有。善男子，真人道士常當修習是五種觀行。復有一行，是天尊所謂《元陽上品妙經》。云何真人所修聖行？真人道士若從天尊得聞如是大聖經已，心生敬信，敬信法已，應行如是思惟：有無上道，有大正法，有元陽經典。我今思惟，常爲愛樂，求至要故，捨離所愛妻子、父母、兄弟六親眷屬，所居住宅、金銀珍寶、僮僕奴婢之屬。復作是念：居家迫迫，猶如繫縛，一切罪根，由之而生。出家閑靜，猶如虛空，一切善因，緣之利益。若在居家，不得讀誦元陽經典，修於智惠，我今應當捨離恩愛，出家學道。復作是念：我今定當割愛，修學無上正真自然之果。真人道士如是欲出家時，有諸天魔鬼生於撓惱，即當與我興大鬪爭。善男子，如是真人，云何復與人鬪爭？爾時真人道士即至元陽宮中，若見天

尊及諸弟子，威儀具足，諸根清淨，其心和軟，寂靜無爲，即至其所而求出家，棄捨俗衣，著於法服。既出家已，奉持法戒，威儀不缺，舉止安詳，不犯愆過，乃至小罪，心不敢作，護持法戒，猶如赤子。譬如有人帶持浮瓠欲濟巨海，爾時海中有一海神，即從此人乞取浮瓠。其人聞已，即作念言，我今乞汝，必定沉溺。答言海神：汝寧殺我，浮瓠必不可得。海神復言：若不全與我者，可乞一半。是人猶故不肯與之。海神復言：汝若不能與我半者，可三分之一。其人又復不肯。海神又言：汝可與我如手許大。其人又復不許。海神又言：我今饑寒困苦，願當濟我如絲毫許。又復不肯，復言：汝今所索，計自不多，然我今日方涉海水，不知邊際，去岸遠近，云何與汝？我今何緣，出海之難，脫喪身命，悔將何及？善男子，真人道士守持法戒，亦復如是，如彼涉海，愛惜浮瓠。真人如是守持法戒，時常有煩惱諸惡海神語其人曰：汝當信我，終不欺誑，但破五禁護

持法戒，以是因緣，令汝安穩，得入元陽仙品。爾時應作是言：我今寧持如是禁戒墮玄沙地獄，終不毀戒犯法而生天上。煩惱海神復作是言：汝若不能破五禁法者，可食人肉，以是因緣，令汝安穩，得入元陽仙品。真人亦不復從其語。海神又言：汝若不能食人肉者，亦可犯偷劫罪，以是因緣，令汝安穩，得入元陽仙品。真人爾時亦復不從。海神復言：汝若不能犯偷劫罪，可犯五逆罪，以是因緣，可得安穩，入於元陽仙品。真人爾時又復不從。海神復言：汝若不能犯五逆罪者，可入淫室，以是因緣，令汝安穩，得入元陽仙品。真人爾時亦復不從。海神又言：汝不犯淫室者，可破四盟戒，以是因緣，可得安穩，入於元陽仙品。真人爾時心自念言：我今若犯四盟戒律，不首悔者，則不能度生死岸而得元陽仙品。真人道士於是微小諸戒律，守護堅固，心如金剛。真人道士持百八十戒、智惠上品戒，供養尊重，等無差異。真人若能如是堅持，則爲具足真



道，禁戒迴向元始正真之道。爾時賢智真人復有五錄戒：一者不殺生，二者不盜人物，三者不邪淫人婦女，四者不噴嗃妄語，五者不飲酒食肉。真人若修五錄戒者，終不爲惡，即入無爲真常之樂。復次，善男子，有二種戒：一者修心清淨戒，二者息世機嫌戒。修心清淨戒者，謂行無點污，志不犯非。息世機嫌戒者，不作販賣財寶，以求福樂；不假他人形勢，以顯己身；不求世間肉味，以潤飢虛；不樂華麗衣物，以爲服用；不樂高廣屋舍、床席、屏幃、氈褥、錦繡等物。如是之事並能除斷，善男子，名曰息世機嫌戒。真人道士堅持如是禁戒，等無差異。善男子，真人道士受持如是法戒，以發是願：寧以此身投於猛火深坑，終不破犯元始天尊所制法戒，與諸凡夫衆生而行不淨。復次，善男子，真人道士又發願言：寧以熱鐵澆身，不敢破法而受信心賢者衣服。復次，善男子，真人道士又發願言：寧以此口吞熱鐵汁，終不敢破法而食信心賢者飲食。復次，善

男子，真人道士又發願言：寧以此身卧熱鐵床，終不敢以破法而受信心賢者床卧褥具。復次，善男子，真人道士又發願言：寧以此身受於重病，終不敢破法而受信心賢者醫藥。復次，善男子，真人道士又發願言：寧以此身投沸鐵鑊中，終不敢破法而受信心賢者房舍屋宅。復次，善男子，真人道士又發願言：寧以鐵棒碎我此身，不以破法而受信心賢者恭敬禮拜。復次，善男子，真人道士復作願言：寧以鐵鉤挑我眼瞳，不以邪心翫他好色。復次，善男子，真人道士又發願言：寧以鐵錐刺耳，不以染心聽好音聲。復次，善男子，真人道士復發願言：寧以利刀割去其鼻，不以染心貪諸香氣。復次，善男子，真人道士復發願言：寧以利刀割去舌根，終不染心貪著諸味。復次，善男子，真人道士復發願言：寧以利斧斬身，終不染心貪諸色觸。何以故？以是因緣，願令一切衆生守持法戒，得清淨法。善男子，真人道士修治如是清淨法時，即得住不動之地。

云何名不動之地？真人住是不動之地，不動不墮，不退不散。善男子，譬如玉京山猛風，不能搖動，真人道士住是地中，亦復如是，不爲色聲滋味所動，不爲邪見淫風所散。善男女，不動傾者，不爲貪慾嗔恚所撓。又不墮者，不墮三惡。又不退者，不退法還家。又不散者，不爲退逆元陽經之所散壞。復次，真人道士亦復不爲諸煩惱魔王所動，不爲邪鬼所傾，乃至坐於道場騫林樹下，雖有魔王，不能令其退無上正真大道，亦復不爲死魔所撓，是名真人修習真行。善男子，云何名爲真行？真行者，天尊及諸仙之所行故，故名真行。以何因緣故，名天尊、真人爲聖人耶？如是等人有聖法故，常觀諸法性寂靜故，以因緣故，名爲真人。有聖法故，故名真人。有定惠故，故名真人。有七真財，所謂信、法、慚、悚、多聞、智惠、捨離故，故名真人。以是因緣，復名真行。復次，善男子，真人道士真行者，觀察是身不淨，因緣和合，共成此身。云何而得坐起行住，屈伸俯仰，視

瞬喘息，悲泣喜笑，此中無主，誰使之爾？作是問已，座中諸仙，忽然不見。復作是念：或識是我，故使諸聖人不爲我。復觀此識，次第生滅，猶如流水，亦復非我。又作是念：若識非有，出息入息，或能是我。又作是念：出息入息，直是風性，而風性乃是四大，四大之中，何者是真？地性非真，水火風性亦復非真。又作是念：此身一切，悉無有真，唯有心風，因緣和合，變現種種。所作事業，譬如呪術所作，亦如鳴鍾，隨意出聲。是故此身，如是不淨，因緣混合，共成其體，當於何處而生貪欲？若被罵辱，復於何處而生瞋怒？如我此身，百關不淨，六根臭穢，何處堪當罵辱者？若聞其罵，即便思惟，以何音響而見罵耶？一一音響，不能見罵，若一不能，衆亦如是。以何義故，不應生瞋？若他來觸，亦應思惟，如是觸者因何而生？復作是念：因心因作，反以我身，故名爲觸。我今何緣橫瞋於他？乃是我身自作其罪，以爲我身受於五陰故。譬如因的則有弓

箭，我身亦爾。有身有觸，我若不忍，心則迷散。心若迷亂，則失正念。若失正念，則不能觀真不真義。若不能觀真不真義，則行惡事。惡事因緣，則墮三塗十惡地獄。真人爾時作如是觀已，得四種念處，得四種念處已，則可住於堪忍之地。真人道士住是地已，則能堪忍貪欲、嗔恚，亦應堪忍寒熱、饑渴，種種惡觸，種種疾疫，惡口罵詈，鞭杖楚撻，身心苦惱，一切能忍，是以爲住堪忍之地。元陽真人賢智白天尊言：仙人道士，未得住於不動之地，淨持戒時，頗有因緣，得破法罪。善男子，真人未得住不動之地，有因緣故，可得破法。真人言：唯然。天尊，何者因是耶？

天尊告真人賢智：若有真人道士知以破法因緣，則能令人受持，愛樂元陽經典，又能令其受持讀誦，文句通利，書寫經卷，廣爲人說，志不退轉無上正真自然大道，爲如是故，故得破法。真人爾時應作是念：我寧一切墮於玄沙地獄，受於苦惱，要令是不退

轉於無上正真自然大道。爾時元陽真人賢富、子林等白天尊言：若有真人攝取守持如是之人，令不退轉自然之心，爲是毀法，若墮玄沙地獄，無有是處。

爾時天尊讚賢智真人：善哉善哉！如汝所說，我念過去於閻浮地作大國王，名曰受見，愛念敬重元陽經典，其心純善，無有穢惡，嫉妬慳貪，口常宣說柔軟之語，心常攝護貧窮孤獨，布施精進，無有休息。時世無聖人，我於爾時愛樂元陽上品大乘經典，九年之中，事道士爲師，供給所須。過於九年，施安已訖，即作是言：師等今應發無上正真自然法心。道士言曰：大王，自然之性は無所有，元陽經教亦復如是。大王，云何乃欲令人同於虛空？善男子，我於爾時心樂元陽妙經，恭敬讀誦，乃有如是無量功德。復次，善男子，修聖行者，當知有漏之法，有二種事，有因有果；無漏法者，亦應有二種，有因有果。有漏果者，是則名苦；有漏因者，則名爲集。無漏果者，

則名爲滅；無漏因者，是名爲法。復次，善男子，真人道士有八種苦相，所謂生、老、病、死、愛、憎、離、別。能生如是八苦法者，是名爲集。無有如是八法之處，是名爲滅。善男子，生者出相，所謂五種：一者初出，二者至終，三者增長，四者出胎，五者種類生。云何爲老？老有二種，一者念念老，二者終身老。復有二種，一者增長老，二者滅壞老，是名爲老。以何因緣，名之爲病？謂身中毒蛇，互不謂適。以是義故，復有二種，一者體病，二者意病。體病復有五等，云何爲五？一者因水爲病，二者因風爲病，三者因熱爲病，四者雜惡爲病，五者外物爲客病。以是因緣，客病之中復有四種：一者非意彊爲，二者忘誤墮落，三者器仗瓦石，四者魍魎邪鬼所著。心病之中，亦有四種：一者邪心踴躍，二者心生恐怖，三者心有憂愁，四者志性愚癡。復次，善男子，真人道士心性之病，復有三種。以何因緣，名之爲三？一者身心作罪，受於業報；二者不得遠離諸

惡對罪；三者四時代謝。如是因緣，名爲分別病。諸病名字，心意迷亂，是名爲病。云何爲死？死者，捨離所受之身。捨離受身有二種別：一者壽命盡死，二者攀緣死。命盡死者，復有二種事：一者壽命盡，非是福盡；二者福盡，非是命盡。攀緣死者，復有二種義。云何二種義？一者非分自害死，二者橫爲他人害死。又有三種死：一者放逸死，二者破法死，三者壞命死。云何名爲放逸死？若有毀謗元陽上品大乘經典，是名爲放逸死。云何名爲破法死？毀謗過去未來見在諸聖人所制法律，是名破法死。云何名爲壞命死？捨棄五陰，是名壞命死。如是等死，名曰大苦。何等名曰愛別離苦？所愛之物，破壞離散。如是愛別有二種別，云何名爲二種？一者人中陰懷，二者天中陰懷。如是人天所受陰懷，分別計數有無量種，是名愛苦。云何名爲怨憎會苦？所集聚，其有三種：一者地獄，二者餓鬼，三者畜生。如是三趣，分別多少，有無量數，如是之名

爲怨憎會苦。云何名爲求不得苦？其有二種：一者有所冀望，求之難得；二者多用氣力，不獲福報。如是之事，名求不得苦。云何名爲五陰苦？五陰苦者，生、老、病、死、愛、憎、別、離，是煩惱根本。善男子，當知八苦之中，爲身大患，若能挫銳閉情，專心斂意修行供養元陽上品大乘經典，可得免離如是八種煩惱，八種憂患之苦。

爾時元始天尊告賢智真人曰：一切凡夫衆生，顛倒覆心，貪著生相，厭離老病。我今不爾，觀於初生，已見病患。真人，如有女人，名曰善信，入於蒲鄰世界長者之舍。是女端正，顏貌美麗，世間錦繡，紋繒服玩，莊嚴其身。長者見已，即便問言：汝今名字云何？從何而來？女人答曰：我即是今世界中功德大富主。長者問曰：汝今所至之處，爲何利益？女言：我所至處，能生種種甘果飲食之味，金銀銅鐵，錦繡紋繒，牛馬車乘，奴婢僮僕。長者聞之，心生歡喜：我乘昔因緣，逢善知識，爲大利益。即便恭敬禮拜，燒

香散華，至心稽首，願能慈愍。爾時門外復有女人，形容醜陋，衣裳臭穢。長者見已，問言：汝自何等？女人答言：我名黑業。長者曰：以何因故，名爲黑業？女人答曰：我所經遊，能令其家財物衰耗。長者聞已，即持利刀，趁逐令去。如有留滯，即害汝命。黑業答言：汝莫愚癡，無有善心。長者問言：何故名我愚癡，無有善心？黑業答曰：汝家中女人名曰善信，即是我姊，常共經遊，汝若趁我，姊亦須逐去。長者還入問善信：門外女人，是汝妹不？善信答言：實是我妹。我等姊妹，處處經遊，未曾相離，在所履歷。我常爲善，彼常爲惡，我作善業，彼爲惡業。長者既能愛我，亦復須憐彼。長者答言：若有是事，我皆不用，即便急去，勿復有遲。是時二女便去還其所住。爾時長者心生喜悅，歡樂無量。是時二女相隨便至貧家，貧人見已，心生踴躍，即請之言：從今已去，願二女常在我舍。女人答言：我等先已爲他驅逐，汝今何緣俱留我

住？貧人答曰：汝今念我，我亦念汝，是故俱請令住我舍。賢智真人等亦復如是，不願生天，以生當有老病死故，是以俱棄，曾無愛心。凡夫衆生，不知老病死，是故心常貪愛生死二業。復次，真人道士，如有妙智童子爲饑所逼，見糞穢中有諸果子，即便取之。有賢者見之，即便呵責：汝妙智童子，種性清虛，何故取此糞穢之果？妙智聞之，心直慙愧，即答之言：我實不食，爲欲洗淨，還棄捨之。賢者語言：汝大愚闇，若還棄者，更不須取。善男子，真人道士亦復如是，於此生中不取不捨，如彼賢者呵責妙智童子。凡夫衆生，欣生惡死，如彼妙智童子取果還棄。復次，賢智真人，譬如有人於四達道中，器盛美食而欲賣之，有人遠行饑乏，見其美食，即復問言：此是何物？食主答言：此食香美，若食此食，能除饑渴，得見諸仙，唯有一病，所謂命終。是人聞已，即作是念：我今不用仙，亦不用死。即作是言：食此食已，若運命終盡，汝今何爲賣之？食主答言：

有惠之人，終不肯買，唯有愚癡，不知是事，多與我值，貪食其食。真人道士亦復如是，不願生天，但免煩惱。何以故？以其不免諸苦惱故。凡夫衆生，隨其生處，貪受諸觸，以其不見老病死故。復次，善男子，猶如毒樹之根汁能殺人，真人道士於受生處所受五賊陰身，亦復如是，一切能殺。復次，善男子，猶如糞穢，多少俱臭，真人道士，生亦如是，設受千年下至十歲，俱亦受苦。復次，賢智真人，猶如嶮處，有草覆於岸邊，多有甘露，若有食者，壽年千歲，永除諸病，安穩快樂。凡夫衆生貪其味，故不知其下有深坑，即前欲取，不覺墮坑，遂殞其命。賢者知己，捨棄遠離。真人道士亦復如是，尚不欲受諸天妙食，況在人中？凡夫衆生，乃於地獄吞噉鐵汁，況復人天妙膳而能不食？真人道士，以如是譬，及諸無量無邊，當知生爲大苦。真人道士，是名聖人，住於元陽世界，讀誦大乘微妙經典，觀於生苦。真人道士，云何聖人於元陽世界觀於老苦者？能爲嗽逆上

氣，能懷勇力憶念，進持盛年，歡樂自恣，及斯老苦，皮肉消瘦，形容臭穢，爲人所輕。真人道士，譬如池有蓮華，光色鮮榮，芬芳可愛，忽值天雹，一時零落。真人道士，老亦如是，悉能破壞盛壯好色。復次，賢智真人，譬如國有忠臣，善知兵法，有他國拒捍，不從威令，王遣忠臣往彼伐之，即便擒縛將來詣王。老亦如是，擒縛壯色，將付於王。復次，善男子，譬如折輪無所復用，老苦將至，亦復如是。復次，善男子，如大富家，豐諸珍寶、衣服、卧具，怨賊入家，劫奪家資，悉皆空盡。善男子，盛年壯色，亦復如是，常爲老賊之所劫奪。復次，善男子，猶如窮人貪諸衣服，雖復冀望而不能得。善男子，老亦如是，雖有貪心，欲求富樂，而不能得。復次，善男子，猶如陸龜，心念於水。真人道士，老亦如是，既爲衰賊之所乾涸，心念壯時所受富樂。復次，真人道士，譬如秋月，所有蓮華，爲人所愛，及期銷歇，人不欲見。善男子，壯年盛色，亦復如是，皆爲人愛，及其老至，人

所輕賤。復次，真人道士，猶如甘蔗，既被壓已，無復甘味。美年壯色，亦復如是，既爲老賊侵壓，無有道味，出家讀誦精進之味。復次，善男子，猶如滿月盛光，晝則不明。善男子，老亦如是，少則端正，刑<sup>①</sup>貌鮮潔，老至憔悴，顏容枯瘦。復次，善男子，譬如有帝王，以正法治國，理人無曲，時爲敵國之所侵奪，流離波迸，遠入他境，他境人民，見而愍之，俱作是言：大王往昔正法治國，不濫百姓，如何一朝波迸流離，乃至於此？善男子，人亦如是，既爲衰老所毀，常念少時所爲事業。復次，善男子，譬如燈炷，唯藉於油，油既消盡，勢不久停。真人道士，老亦如是，唯藉油明，油既消盡，衰老之炷，焉得久明？復次，真人道士，猶如枯池，不能潤益人及非人，飛禽走獸。善男子，老亦如是，爲老所枯，不能利益生所作業。復次，真人道士，猶如河岸臨險之樹，若遇驚飈，必當顛墮。善男子，老亦如是，臨老險岸飛飈，一生勢不得住。復次，真人道士，如車無輪，

不堪運載。善男子，老亦如是，不能請受自然之法。復次，真人道士，猶如嬰兒爲人所賤。善男子，老亦如是，恒爲萬物輕毀。真人道士，以是因緣譬喻，及諸無量無邊，不可思議，如是老苦，實爲大病。善男子，是名真人道士修行元陽上品大乘經典，觀於老苦。爾時賢智真人：云何善男子修行元陽上品大乘妙典，觀於病苦？所謂諸病，能消滅一切樂事，譬如雨雹，傷毀苗稼，損於穀實。復次，真人道士，如人有怨意，恒愁惱而常恐怖。善男子，一切衆生凡夫之人，亦復如是，常憂病苦，心懷愁惱。復次，真人道士，譬如有人，形貌端正，爲王妃后，欲心所念，遣信逼呼，與其交通，時王知之，挑其一眼，截其一耳，斷其一手，刖其一足，是人爾時，形儀改異，人所輕賤。善男子，病亦如是，先雖端正，六根具足，既爲病苦之所纏逼，則爲衆人心所輕賤。復次，真人道士，譬如芭蕉及驟有子，爲死所逼。善男子，病亦如是，有病則死。復次，真人道士，猶如風輪王，主

兵大臣，恒在前導，王後隨行；亦如四種畜生王，商主在前，行亦如是，諸衆悉隨，無捨離者。善男子，死風輪王亦復如是，常有病臣，不相棄離，四種商主，亦復如是，常爲死衆之所縈逐。真人道士，病因緣者，所謂苦惱愁怖，憂恐身心，或爲怨賊之所惱害，破壞浮瓠，發撤梯磴，亦能欺奪正念根本，復能毀美貌怒色，能爲身心焦損膚體。如是等喻，當知病苦，是爲大賊。善男子，是名真人道士能行元陽大乘微妙經典，觀於病苦。爾時賢智真人：云何善男子修行讀誦元陽上品大乘經典，觀於死苦？所謂死苦，能消滅故。真人道士，如劫火起，能焚一切。善男子，死火亦爾，能焚一切，唯除真人道士，住於元陽世界，因天尊力勢不及故。復次，真人道士，如水灾起，一切漂溺，唯除三仙，力不至故。善男子，死水亦復如是，漂溺一切，唯除真人，住於元陽國土大乘世界。復次，真人道士，如風灾起，能搖動一切，諸物悉令消壞，唯除四仙，力不至故。善男

子，死風既至，能吹一切所有，唯除真人道士，住於元陽國土大乘世界。賢智真人白天尊言：彼四仙力，以何因緣，火不能銷，水不能溺，風不能搖？天尊告賢智真人曰：四仙力者，是諸過患，一切無故。善男子，初仙過患，內有觀察，外有火灾；二仙過患，內有歡喜，外有水灾；三仙過患，內有喘息，外有風灾。善男子，彼四仙者，內外過患，諸漏悉無，是故諸灾不能及之。善男子，真人道士，亦復如是，安住元陽國土大乘世界，內外咎過悉皆却盡，是故死至不能及之。復次，真人道士，如金翼之鳥，能食能消一切禽魚金銀等物，唯除金剛不能吞噉。真人道士，死金翼鳥亦復如是，能食噉諸衆生，唯不能消住元陽國土大乘世界真人道士。復次，賢智真人，猶如嶮岸所有樹木，洪水暴長，悉隨漂溺，流入大海，唯除楊樹，以其軟故。善男子，是諸衆生亦復如是，悉皆沿流入於死海，唯除真人道士，住於元陽國土大乘世界。復次，賢智真人，猶如天丁力士，

能摧伏一切魔鬼，唯除大風。何以故？以無礙故。善男子，死天丁力士亦復如是，悉能摧伏凡夫衆生，唯除真人道士，住元陽國土大乘世界。以何因緣？以無礙故。復次，賢智真人，有人於怨憎中，妄作親善，恒相隨從，如響從聲，伺候其便而欲殺之，其怨謹守，堅固自防，故使怨人不能得害。善男子，死怨亦爾，伺候凡夫一切衆生而欲殺之，唯不能殺住元陽國土大乘世界真人道士。何以故？如是真人，不遊放逸故。復次，賢智真人，猶如卒降暴雨，破壞山林、樹木，土石、沙礫，一切諸物，唯不能毀壞金剛之寶。善男子，金剛死亦復如是，悉能消滅凡夫衆生，唯除金剛真人道士，住於元陽國土大乘世界。復次，賢智真人，如金翼鳥能噉龍魚，不能噉三洞法師。善男子，死金翼鳥亦復如是，能食無量衆生，一切含識，唯除真人道士，住三洞者。何謂三洞？空無之相。復次，賢智真人，有如毒蛇放毒螫人，雖有良呪，世之草藥無如之何，唯有聖人甘露妙藥能消

其毒。善男子，死毒所害亦復如是，一切醫療無奈之何，唯除真人，住於元陽國土大乘世界。復次，賢智真人，猶如有人爲官所嗔，若能卑辭遜謝，低言軟語，償於珍寶，便可免脫。善男子，死官所逼，其事不爾，雖以軟語珍寶償之，死不得脫。善男子，夫死者，於險難處無有糧食，去人懸遠而無伴侶，心懷煩惱，不知何處，深邃幽闇，無有光明，入無門戶，而有處所，雖有楚痛，非可療治，爲無遮遏，往不復脫，無所毀壞。見者愁憂，非是惡色，令人恐怖，敷在體上，不可覺知。賢智真人，如是譬喻，當知是死，真爲大苦。賢智，是名真人道士修行元陽上品大乘經典，觀於死苦。爾時賢智真人：云何真人道士修於元陽上品大乘經典，愛別離苦，能爲一切凡夫衆苦根本？以是因緣，則生憂苦，以憂苦故，則令衆生生於衰老，恩愛別離苦，所謂壽命終盡。善男子，以別離故，能生種種諸苦，能生種種微細煩惱，今當爲汝分別，一一顯說。善男子，過去之世，人壽長遠。

無量劫時，有王名曰受見，其王爾時身爲太子，及登王位，壽四萬歲。時王頂上生一肉髻，其髻柔軟，如綿細軟，漸漸增長，不以爲患。滿一年中，肉髻自開，生一童子，形貌端正，世界罕雙，色相妍華，人中獨步。父王喜悅，字曰莊嚴，時受見王因以國事委付。莊嚴棄捨國內珍寶，妻子眷屬，入妙樂之山，蒲鄰世界，修學元陽上品大乘經典，滿一千歲。爾時莊嚴於一月間，處在高臺，沐浴、冠帶、受齋。即於東方大福堂鄉納善世界，有金輪寶車，其輪轂軸，盡皆具足，不由規矩，自然華麗，而來應之。莊嚴大王即作是念：我往劫時，曾聞六通聖人說，若普惠王於一月間，處在高臺，沐浴受齋，若有金輪寶車，轂軸具足，不由規矩，自然華麗，而來應者，應知是王，當得作人天聖帝。復作是念：我今當試。即以左擎輪寶，右執香鑪，長跪禮拜，而發誓願：如是輪寶，若實不虛，應如過去人天聖王所行道去。作是誓已，如是輪寶，飛昇虛空，徧滿十方，還來住在莊嚴左

手。爾時莊嚴，心生喜悅，歡樂屏營，復作是言：我今定作人天聖王。其後不久，復有金寶，狀貌端嚴，如蓮華葉，七枝柱地。莊嚴見已，復作是念：我往昔時，曾聞六通聖人說，若人天聖王，於一月間，處在高臺，沐浴受齋，若有赤金寶象，狀貌端嚴，如蓮華葉，七枝柱地，而來應者，當知是王，即是人天聖帝。復作是念：我今當試。左擎香鑪，右膝著地，而發誓言：是金寶象，若實不虛，應如過去人天聖王所行道去。作是誓已，是金寶象，從旦至夕，周徧十方，盡大海際，還住本處。爾時莊嚴王，心生歡樂，喜躍無量，復作是言：我今定是人天聖王。其後不久，次有白銀寶馬，狀貌端嚴，髦尾金色。莊嚴見已，復作是念：我往昔時，曾聞六通聖人說，若人天聖王，於一月間，處在高臺，沐浴受齋，若有白銀寶馬，其色華麗，髦尾金色，而來應者，當知是王即是聖帝。復作是念：我今當試。即執香鑪，長跪禮拜，而發誓願：如是寶馬，若實不虛，應如過去人天聖

王所行道去。作是願已，寶馬馳驟，從旦至暮，周徧十方，盡大海際，還住本處。爾時莊嚴，心生踊躍，歡喜無量。復作是言：我今定是人天聖王。其後不久，復有妍麗女寶，容儀琬琰，姿貌第一，身上毛孔，出諸名香，口氣香潔，其眼能視見十由旬，耳聞鼻嗅，心識聰哲，有大智慧於諸衆生，常有軟語。是女以手指王衣時，即知未來安樂休否，亦知王心所緣之處。爾時莊嚴，復作是念：若有女人，能知王心，即是女人之寶。其後不久，於王宮內，自然有珍寶，有大明珠，能於黑闇之中照一世界，若有魔王邪鬼來撓世界凡夫衆生，此珠照了，魔不能近。爾時莊嚴，復作是念：若人天聖王得是寶珠，必爲聖帝。其後不久，當有賢臣主藏，自然而出，增益珍寶，庫藏充滿，無有少乏，報得眼根，力能徹視十方世界所有伏藏，王所思求，應念即來。爾時莊嚴，復欲試之，即共乘船泛於大海，語藏臣言：我今隨汝入海，心有所求，欲得珍寶。臣聞王言，即以手撓海水，時手指頭出

諸寶藏，以奉聖王，而白王言：大王有所求，須隨王意翫。爾時莊嚴，心大歡喜，即作念言：我今定是人天聖王。其後不久，有主兵智臣，自然輔相，勇健第一，智慧無比，善知術數，妙解兵書，若有不賓之國，而能摧伏，已摧伏者，力能守護。爾時莊嚴，復作是念：若人天聖王，是臣守護，當知之是聖王。爾時莊嚴，人天聖帝，告諸大臣卿相：當知此閻浮世界，安穩福樂，我今已有，珍寶具足，更無所之。諸臣答曰：東方大福堂世界，猶未歸德，大王親往，教化彼國。爾時莊嚴聖王，即以七寶珍玩、人物侍從，而往彼國。人民歡樂，悉皆歸化。復告臣言：我今國土安穩，人民豐樂，七寶充滿，臣子具足，更何所爲？諸臣答言：西方盛行世界，猶未賓伏。爾時莊嚴聖王，復與七寶珍玩，人物侍從，而往彼國。人民歡喜，悉皆歸伏。復告臣言：我今國土安穩，人民豐樂，七寶充滿，臣子具足，復何所爲？諸臣答言：北方清淨世界，猶未歸化。爾時莊嚴聖王，復與

七寶珍玩、人物侍從，而往彼國。人民歡樂，悉皆歸伏。復告臣言：我今國土安穩，人民豐樂，七寶充滿，臣子具足，更何所爲？諸臣答言：南方棄賢世界，猶未歸化。爾時莊嚴聖王，復與七寶珍玩、人物侍從，而往彼國。人民歡喜，悉皆歸伏。復告臣言：我今國土安穩，人民豐樂，七寶充滿，臣子具足，復何所爲？諸臣答言：三十二天，壽命長遠，安穩快樂，彼天形容，端嚴獨步，所居卧具，悉是珍寶，自恃福樂，未來歸化，今當往詣，令其賓伏。爾時莊嚴聖王，復與七寶珍玩、人物侍從，飛騰虛空，上至三十二天世界，見有一樹，枝葉鬱茂，果實葳蕤。聖王見已，即問天主神寶天王：此是何色之樹？神寶天王答言：此名騫木，諸天神仙，四時節月，常於其下，歡娛愛樂。又見雲色，猶如紫氣，復問神寶天王：彼是何色？答言：是善福堂處，諸天仙聖，常集其中，論人天之事。於是神寶天王知莊嚴王有大威德，即共昇善福堂，分座而坐。彼時二王，形容相貌，等無



差異。是時聖王，即生念言：我今退彼王位，即住其中，爲天王不？真人道士，爾時神寶天王，受持讀誦元陽上品微妙經典，剖折玄義，皆悉通達，以是讀誦受持，分別爲他廣說因緣力，故有大威德。善男子，是莊嚴王於神寶天王，生諸惡心，即便墮落，還閻浮世界，與所愛念，遂乃分離，生大苦惱，忽遇惡病，即便命終。爾時元始天尊，是人天聖王，則我身是。善男子，當知如是愛別離苦，極爲大患。善男子，真人尚憶過去如是等事，愛別離苦，何況真人住於元陽國土、大乘世界，而當不觀見在之世有別離苦。善男子，云何真人道士修行元陽上品大乘經典，觀於怨憎會苦？善男子，是真人道士觀於天上、人間、地獄，畜生餓鬼，皆有如是怨憎會苦，猶如有人觀於牢獄，禁繫枷鎖，揣以爲憂苦。真人道士，亦復如是觀於六道，一切衆生，皆悉怨憎合會，爲大苦惱。復次，善男子，譬如有人常畏怨家，捨棄父母妻子，產業服具，而遠逃避。善男子，真人道士亦復如是，

恐懼生死，具足修行，尊六度行，求於無上道果。善男子，是名真人道士修行元陽上品大乘經典，觀於怨憎會苦。善男子，云何真人修行元陽上品大乘經典，觀於衆生求不得苦？一切衆生，盡求不得。盡求者，有二種義：一者求善法不得，二者求不善法未得。苦惡法未離苦，是則略說五陰盛苦。善男子，真人道士是名求不得苦。爾時賢智真人白天尊言：如尊所說五陰盛苦，是義不然，何以故？如天尊往時告富子元：若色苦者，凡夫衆生不應求色，若有求者，則何名若<sup>②</sup>？如天尊告諸道士，有受苦受樂，受不苦不樂。如天尊先爲諸道士女冠善男子說：若有能修行善法，則得受樂。又如天尊說：於善道中，六染受樂。眼好諸色，是名爲樂；耳好諸聲，是名爲樂；鼻好諸香，是名爲樂；舌好諸味，是名爲樂；身受細滑，是名爲樂；意好榮華，是名爲樂。六味好法，皆悉受苦。天尊即爲而說偈曰：

持戒爲歡樂，身不受衆苦。誦詠

元陽品，名入不死戶。如是怨憎會，聞經病自愈。念法愛浮瓠，魔鬼不得腐。轉論爲聖王，因緣作慈父。慎莫行惡心，有惡傾天主。若能愍衆生，以法爲梁柱。晝夜常恭敬，願去三官府。真人及道士，精心鳴法鼓。曉悟六道中，常與法爲伍。大乘是世界，天堂爲淨土。一切罪根盡，皆由我規矩。

天尊說偈已，如諸經中所說事相，其義如是。賢智真人等，既聞斯義，了然解悟，稽首作禮，辭退而去。

太上靈寶元陽妙經卷之一

① 刑：疑當作「形」。

② 若：當作「苦」。

## 太上靈寶元陽妙經卷之二

### 聖行品下

爾時高上玉晨天尊告元陽定光真人曰：我觀一切諸法，皆悉無常，性相不定。若有諸法，從因生者，則是無常。是諸仙人，無有一切，不因緣生。善男子，道性無隱無顯，無生無滅，無去無來，非見在，非未來，非過去，非因所作，非緣所生，是故名常。善男子，道性即是天尊，天尊即是法，法即是常。善男子，常者即是天尊，天尊即是真人，真人是常，道性是常。以是義故，從因生法，不名為常，是諸下仙人，無有一切，不從因生。善男子，是諸下仙之人，不見道性，天尊妙法，是故下仙之人所可談說，皆悉妄語，無有真實。一切衆生，先見衣服、卧具、車乘、象馬、城郭聚落，後見相似，便言是常，當知其實非是常耳！善男子，一切有為之法，皆是無常。虛空無為，是故

為常。道性無為，是故為常。虛空者，即是道性；道性者，即是天尊；天尊者，即是無為；無為者，即是常樂；常樂者，即是法；法者，即是無為；無為者，即是常樂。善男子，有為之法，凡有二種：一者色法，二者非色法。非色法者，心心數；法色者，地水火風。善男子，心名無常，何以故？性是攀緣相，應分別故。善男子，眼識性異，乃至意識性異，是故無常。善男子，色境界異，乃至法境界異，是故無常。善男子，眼根相應異，乃至意根識相應異，是故無常。善男子，心若常者，眼根應獨緣一切法。善男子，若眼根識異，意根識異，則知無常。以法相似，念念生滅，凡夫見已計之為常。善男子，諸因緣相可毀壞，故亦名無常。所謂因眼、因色、因光、因明、因思惟生於眼識。耳識生時，所因各異，非眼識因緣，乃至意識異，亦皆如是。復次，定光真人，諸善男子，懷諸行因緣，故心名無常。所謂修無常心異，修苦空無我心異。心若常者，應常修無常，尚不得觀

苦空無我，況復得觀真常之樂。以是義故，下仙法中，不能攝取真常之樂。善男子，當知心法必定無常。復次，善男子，心性異，故名為無常。所謂邪見邪疑之人，心性殊異，不信真法，不敬真人，不崇有道，作諸惡心。善男子，應知用心之法，有三種心：一者出家心，二者在家心，三者在家遠離心。樂相應心異，苦相應心異，不苦不樂相應心異，貪欲相應心異，瞋恚相應心異，愚癡相應心異，一切邪見邪魔心相應亦異。所謂愚癡相應心異，疑惑相應心異，邪見相應心異，動止運為，其心亦異。善男子，心若真常者，亦復不能分別諸色，所謂玄黃、朱紫、赤白之色。善男子，心若常者，諸憶念法不應忘失。善男子，心若常者，凡所讀誦不應增長。復次，善男子，心若常者，不應說言已作今作，若有已作今作，當知是心，必定無常。善男子，心若常者，則無怨親，非怨非親。心若真者，則不應言我物他物，若生若滅。心若真者，雖有所作，不應長。善男子，以是義故，

當知心性各各別異，有別異故，當知無真。善男子，我今於此非色法中，演說無真，其義已顯，復當爲汝說色無真。是色無真，本無有生，生已滅故，故知無真。凡夫無知，計以爲真，以是義故，名曰無真。若無真，即是無苦；若無苦，即是不淨。善男子，我昔於元始之運，先問斯事，因得了然。復次，善男子，諸法無我，總一切事，謂色非色，色非我也。何以故？可毀、可滅、可破、可壞，生增長故。我者，不可毀滅、破壞、增長，以是義故，知色非我。非色之法，亦復非我。何以故？攀緣生故。善男子，若諸邪見，以專念故，知有我者，專念之性，實非我也。若以專念爲我，性者，過去之事，則有忘失，有忘失故，定知無我。善男子，若諸邪見，以憶想故，知有我者，無憶想故，定知無我。如說見人手有六指，即復問言，我先何處，共相見邪？若有我者，不應復問，以相問故，定知無我。善男子，若有邪見，以遮故，知有我者。善男子，以有遮故，定知無我，如言童子

者，我亦如是。若定是我，終不遮我，以遮我故，定知無我。若以遮故，知有我者，汝今不遮，定應無我。善男子，若諸邪見，以伴非伴，知有我者，以無伴故，應無有我。有法無伴，所謂天尊，空虛道性，我亦如是，實無有伴，以是義故，定知無我。復次，善男子，若諸邪見，以名定故，知有我者，無我法中，亦有我名，如貧賤人，名字富貴。如言我死，若我則殺我，而我實不可殺，假名殺我。亦如座人，名爲長者，以是義故，定知無我。復次，善男子，若諸邪見，以生已求乳，知有我者。善男子，若有我者，一切嬰兒不應執持不淨，以是義故，定知無我。復次，善男子，一切衆生於三法中，悉有等智，所謂姦姪、飲食、恐怖，是故無我。若諸邪見，以相貌故，知有我者，相故無我無相，故亦無我。若人睡時，不能進止，俯仰視瞬，不知苦樂，不應有我。若以進止，俯仰視瞬，知有我者，機關木人，亦應有我。善男子，亦不進不止，不俯不仰，不視不瞬，不苦不樂，不

貪不恚，不癡不行，真道如是。真實有我，若諸衆生邪見，以見他食果，口必生咨，知有我者。善男子，以憶念故，見則生咨，咨非我也，我亦非咨，非喜非樂，以是義故，定知無我。善男子，如是衆生，癡如小兒，不解智慧，無有方便，不能了達常與無常，苦與無苦，樂與無樂，淨與無淨，我與無我，壽命非壽命，衆生非衆生，於道法中，取少許分虛妄，計有真常之樂，而實不知真常之樂。如生盲人，不識乳色，便問他言：乳色何似？他人答言：乳色白如貝。盲人復問：是乳色者，如貝聲邪？答言：不也。復問：貝爲何似邪？答言：如稻米味。盲人復問：乳色柔軟如稻米味邪？稻米味者，復何所似？答曰：如雪。盲人復言：彼米味者，冷如雪邪？雪復何似？答言：猶如白鶴。是生盲人，雖聞如是譬喻，終不能得識乳真色。是諸邪見衆生，亦復如是，終不能識真常之樂，以是義故，我道法中有真常之義，非於邪見。爾時定光真人復白天尊言：希有大

師，於今過去方便，更轉無上法輪，乃作如是分別。真常天尊告定光真人：汝今云，何故於大師生過去想？善男子，大師實是真常，不變不過去，若有計我，是法成無上正真大道。我即是法，法是我身；我即是道，道是我身；我即大師，大師即是我身；我即真仙，真仙即是我身。我能說法，令他聽受，我轉法輪，餘人不能。大師終不作如是計，是故大師不轉法輪。若有人作如是妄計，我即是眼，眼即是我，身、口、意、耳、鼻，亦復如是。我即是色，色是我身，乃至真法，亦復如是。我即是地，地即我身，地水火風，亦復如是。若人計言，我即是言，言是我身；我是多聞，多聞即是我身；我是布施，布施即是我身；我是持戒，持戒即是我身；我是忍辱，忍辱即是我身；我是靜定，靜定即是我身；我是精進，精進即是我身；我是智慧，智慧即是我身；我是六念處，其六念處即是我身。四種正勤，四種如意，五心淨分，八聖道分，亦復如是。善男子，大師終不作

如是計，是故大師不轉法輪。若言常住，無有變改，云何說言大師轉法輪？是故汝今不應說言，大師方更轉上法輪。善男子，譬如因眼緣色、緣明、緣思惟，因緣和合，得生眼識。善男子，眼不念言，我能生識，乃至思惟，終不念言，我生眼識，亦復不作念言，我能自生，如是等法，因緣和合，得名爲見。善男子，天尊亦爾，因六度行、七種之法，曉了諸法，復因咽喉、脣齒、口舌、言語、音聲，初始說法，名轉法輪。以是義故，天尊不名轉法輪也。善男子，若不轉者，即名爲法，法即大師。善男子，譬如因燧、因鑽、因手、因草而得生火，燧亦不言，我能生火，鑽手乾草，各不念言，我能生火，火亦不言，我能自生。天尊亦爾，因六度行，乃至名轉法輪，天尊亦復不生念言，我轉法輪。善男子，若不生者，是則名爲轉正法輪，是轉法輪，即名天尊大師。善男子，譬如因酪、因水、因鑽、因餅、因繩、因人而得出酥，酪不念言，我能出酥，乃至人手亦不念言，我能出酥，酥亦不言，

我能自生。因緣混合，故得出酥。天尊亦爾，終不念言，我轉法輪。善男子，若不出者，是則名爲轉正法輪，是轉法輪，即是天尊。善男子，猶如因子及地水火風，沃壤時節，因人作業而牙得生。善男子，子亦不言，我而能生牙，乃至作業，亦不念言，我能生牙，牙亦不言，我能自生。天尊亦爾，必不念言，我轉法輪。善男子，若不作者，則名爲轉法輪，是轉法輪，即是天尊。善男子，猶如因鼓、因空、因皮、因人，因緣混合，出於音聲，鼓不念言，我能出聲，乃至因緣亦復如是，聲亦不言，我能自生。善男子，天尊亦爾，終不念言，我轉法輪。善男子，轉法輪者，名爲不作者，即是天尊。善男子，轉法輪者，乃是諸仙大師，境界非諸弟子所知。善男子，虛空非生非出，非造非作，非有爲法。天尊亦爾，非生非出，非造非作，非有爲法。如大師性、道性亦爾，非生非出，非造非作，非有爲法。善男子，諸仙大師之語，有二種義：一者世間語，二者出世間語。善男子，天

尊爲諸弟子說世間語，爲諸真人說出世間語。善男子，是諸大眾之中，復有二種：一者求於小乘，二者求於大乘。我於昔日，於元陽世界，爲諸仙弟子轉於法輪，今者始於甘露城中，爲諸真人轉大法輪。復次，善男子，有諸二人，中根、上根。爲中根人，於元陽世界轉於法輪，爲上根人中法王定光真人等，今於甘露城中轉大法輪，廣開法幢，爲大利根。善男子，極下根者，天尊終不爲轉法輪。極下根者，即是邪魔愚癡之輩。復次，善男子，求無上道者，復有二種：一者中心精進，二者上心精進，於元陽經中，最能精進，轉於法輪。今於此城，爲上心精進，轉大法輪。復次，善男子，我往昔時，於彼甘露城，初轉法輪，八萬真人得自然道果。今於此城，八千萬億人，心無退轉，於正真道中皆獲清淨。復次，善男子，甘露城中，元陽真人稽首，請我轉於法輪。今於此城，定光真人稽首，請我復轉法輪。復次，善男子，我昔於彼甘露城，轉法輪時，演說無常、苦、空、常、樂。

今於此城，轉法輪時，如實演說真常之樂。復次，善男子，我昔於彼甘露城，轉法輪時，所出音聲，聞於大羅之上天尊。今復於此城，轉法輪時，所出音聲，徧於空歌國土，九天恒河世界。東西南北，四維上下，亦復如是。善男子，諸天人凡有所說，皆悉名爲轉法輪也。善男子，譬如國王有所高慢，不生信敬，未降伏者，能令降伏，已降伏者，能令信法，得於安穩。善男子，諸天人凡有所說，亦復如是。無量煩惱，未調伏者能令調伏，已調伏者令生信向，作諸善根。譬如國王所有輕慢，則能降伏，信向真道。天尊演法，亦復如是，能令一切諸煩惱賊，皆悉清淨，俱得寂定。復次，善男子，譬如國王所有輕慢，下上輪迴。天尊說法亦復如是，能令下趣諸惡衆生，上生人天，乃至真道。善男子，是故汝今不應讚言，天尊於此更轉法輪。爾時元陽定光真人白天尊言：我於此義。非爲不知，所以問者，爲欲利益諸衆生故。我久知轉法輪者，實是諸天人境界，非

是邪見之人所能齊等。爾時天尊告元陽真人：善男子，是名真人住於大乘，得道之人所行聖行。元陽真人白天尊言：復以何義名爲聖行？天尊告曰：善男子，聖者即是天尊，以是義故，名爲聖行。天尊若是諸真人之所行者，則非邪見所能修行。善男子，是諸天尊安住於此元陽宮中，而作如是開示，分別演說其義，以是義故，名曰聖行。及諸衆生邪見之人，如是聞已，則能奉行，故名聖行。善男子，是諸真人道士得是行已，則得住於無所畏地。善男子，若有真人道士得住如是無所畏地，則不復畏貪嗔煩惱，生老病死，亦復不畏惡道地獄，餓鬼畜生之報。善男子，惡有三種：一者邪淫恣意，輕慢經寶；二者誹謗善人，不信有道；三者犯五逆四重。善男子，住是地中諸真人道士，終不畏墮如是惡處，亦復不畏天魔惡鬼，魑魅魍魎，亦復不畏受諸汙穢，苦惱悲酸。是故此地，名爲無畏。善男子，真人道士、百姓子等，住是地中，皆得無上正真大

道，自然福樂安穩之處。善男子，既得真道，能壞地獄。有能無退真道，能壞畜生；有得心樂真道，能壞餓鬼；有得飽滿真道，能壞天魔；有得調伏真道，能斷黑闇；有得光明真道，能斷寒冰夜庭；有得溫暖真道，能斷邊夷；皆生中國真道，能斷閻浮提；皆得清淨無憂國土真道，能斷諸天魔王，皆信經法。善男子，是知真道能爲一切衆生作大法眼，能爲一切衆生作大法幢，能爲一切衆生作大法航，能爲一切衆生作大法炬。善男子，當知真道即是天尊法王，令諸衆生隨意即得。欲知三千大千世界所有衆生，心知所念，亦悉能知。欲以三千大千世界所有衆生，內於己身一毛孔中，隨意即能。亦令衆生心無迫想，若欲化作無量衆生，悉令充滿三千大千世界中者。亦能隨意能分一身以爲諸身，復合諸身以爲一身，雖作如是，意無有著，猶如寶華。善男子，真人道士得入如是真道法王已，即得住於自在之地。真人道士住是自在地者，得自在力，隨欲生處，即

得往生。善男子，譬如聖王領四天下，隨意所至，無能障礙。真人道士亦復如是，一切生處，若欲生者，隨意往生。善男子，真人道士若見地獄一切衆生，有可教化，令住善根者，真人即時往生其中。真人雖生，非本業果，真人道士住自在地，有因緣故，而生其中。善男子，真人道士雖在地獄，不受諸苦。善男子，真人道士所可成者，如是善根，無量無邊，恒河億數，尚不可說，何況天尊威力，功德福田而不測量。爾時衆中有一真人，名曰賢智，有大威德，成就神通，得大總持，法相具足，得無畏懼，即從座起，前進作禮，長跪執板白言：如天尊所說，諸真人道士所可成就功德智慧，無量無邊，百千萬億，實不可說，我意猶謂，故不如是元陽經典。何以故？因是元陽大乘經力故，能出生諸天尊無上正真大道。爾時天尊讚言：要乎深矣，不可思議。善男子，如是如是，如汝所說，是諸大聖，微妙經典，雖復成就無量功德，欲比是經，不得爲喻，百倍千倍，無量無邊，恒

河沙數，不可譬喻。善男子，譬如從牛出乳，從乳出酪，從酪生酥，從酥生甘美法味，若有服者，衆疾皆愈，所有諸藥，悉入其中。善男子，天尊亦復如是，從天尊出元陽妙經，從元陽妙經出大道法，從大道法出精進法，從精進法出忍辱持戒法，從忍辱持戒法出自然道果。自然道果，即是甘美法味。所言甘美法味，喻於道性。道性者，即是天尊。善男子，以是義故，說言天尊所有善根，恒河沙數，不可稱計。賢智真人白天尊言：如天尊所說，元陽妙經猶如甘美法味，最爲微妙，若有凡夫衆生能服，病自除愈，一切諸藥，悉入其中。我聞是已，竊復思念，若有不能聽受是經，當知是人爲大愚癡，無有善心。天尊，我於今者，實能盡心盡意書寫如是元陽妙經，受持讀誦，令其痛利，然後爲人廣說其義。天尊，若有衆生貪著財物，我當施財，然後以是元陽妙經勸之令讀。若尊貴者，先以軟語隨順其心，然後漸當以是元陽妙經勸之令讀。若凡愚者，當以威勢逼之令

讀。若驕慢者，爲作僕使，隨順其心，令其歡喜，然後復以元陽妙經而教導之。若有毀謗大乘經者，當以威力迫之令伏，既威伏已，然後勸令讀誦元陽妙經。若有願樂真道經者，我令應當躬往恭敬，供養尊重，彈指讚歎。爾時天尊讚賢智真人：善哉善哉！汝今愛

念真道經典，貪真道經，樂真道經，信敬受持，供養禮拜。善男子，汝今以此善心因緣，當得超無量無邊，恒河沙數。真人道士，成無上正真自然之果，汝亦不久，復當如我。廣爲大衆解說如是元陽妙經，天尊所演祕密之藏。善男子，乃至過去天尊未出，我於爾時作精進，修天王，修真人行，悉能通達一切仙人所有經論；修真常行，具足威儀，其心清淨，不爲邪見，能生慾想之所，破壞滅嗔癡火，受持福業真常之樂；周徧求索大乘妙典，乃至不聞元陽經名字。我於爾時住於妙樂之山，其山清淨，流泉池沼，樹木甘果，仄塞其地，處處充滿，崖石之間，有清流水，多諸香華，周徧界域，驚禽駭獸，不可

目名，甘果繁蔚，種種芬苾，復有無量香根。我於爾時獨處其中，惟食諸果香根，食已，繫心思惟精進忍辱之行，無量歲中，亦不聞有天尊出世微妙經名。善男子，我修如是難行之行時，彼天人等，心大驚怪，即共集會，各各相謂而說偈言：

天尊說至典，出法演元陽。號爲衆生父，功德莊嚴王。斷除貪惑行，消滅愚癡狂。清淨妙樂山，逍遙甘露場。

爾時衆中有一天王，名曰普慧，復說偈言：

如是諸真人，清淨爲第一，善解大乘義，深能知祕密。若有求至道，當除意遊逸，體達苦空行，永無煩惱疾。

爾時復有一仙人，名曰定光，而說偈言：

至法體玄妙，寂寞理難窺，自非總持者，誰曉元始儀。今得聞此教，可以樹良規，斷除諸惡業，閑出入無爲。

說是偈已，諸真人天王言：我今讚歎說偈，諮請天尊，爲其賢士并諸衆生，不爲己身，爲欲利益諸凡夫衆生，

而修種種無量苦行。如是之人，見生死中諸過咎故，設見珍玩滿此地上，諸山大海，不生貪樂，如是糞穢。如是賢士，棄捨珍寶，所愛妻兒、骨肉、髓腦、肢體、手足，所居屋室，牛馬車乘，亦不願求生於天上，唯願一切得於歡樂，如我所解。如是賢士，清淨無染，衆結永盡，唯欲志求無上正真大道自然之果。

復作是言：如汝言者，是人則爲攝取一切世間有道樹者，能除煩惱毀謗。若諸衆生住是道樹蔭涼中者，煩惱諸業，皆得消滅。若當未來世中作善逝者，我等悉當得滅無量煩惱。如是之事，實爲難信。何以故？一切衆生發自然道意，見少微緣，於自然意中，即便動轉，如水中月，水動則動。猶如畫像，難成易壞，自然道意，亦復如是，難發易壞。如有多人，以諸鎧甲，牢自莊嚴，欲往討賊，臨行陣時，心生恐怖，則便退走。一切衆生，亦復如是，發自然道意，徒自堅牢，見生死過，心生憂怖，即便退悔。我見如是一切衆生發心之後，皆生動轉，是故我今雖見是人專修

苦行，無煩無惱，住於道中，其行清淨，未能信也。我今要當自往試之，知其真實堪任荷負正真大道自然重擔。譬如車有雙輪，則有載用，鳥有兩翼，堪任飛行，修苦行者，亦復如是。我雖見其堅持禁戒，未審其人有智慧不？若有智慧，則能堪任荷負正真大道自然之擔。又如魚母，多有胎子，成就者少。又如果樹，華多實少。衆生發心求真無量，及其終始，少不足言。真人，我當共汝俱往試之，猶如真金三種試之，乃知堪燒打磨，試彼苦行，亦復如是。爾是元陽真人，自化其身，變爲猛獸，形甚可畏，下至妙樂之山，去其不遠而便立住。是時猛獸心無所畏，勇健難當，辯才第一，音聲清雅，宣揚過去天尊所說，以偈頌曰：

諸行本無爲，是其生滅法。轉輪寄因緣，雖捨還復合。當諦專一心，修持淨三業。正道可翹期，度脫於貧乏。說是偈已，便住其前所現形貌，甚可怖畏，顧盼左右，觀於四方。是苦行者，聞說是偈，心生歡喜，譬如羈客於

險難處，夜行失伴，恐怖憂遑，忽遇同侶，心生歡喜，踊躍無量。亦如宿病，未遇良醫，於儻欬頃，忽遇妙藥，病得除愈，心生歡喜，踊躍無量。如人沒水，遇得舟航，得度彼岸，心生歡悅，亦復如是。如人渴乏，忽遇醴泉，恣意酣飲，得無渴乏，心生歡喜，亦復如是。如被冤家趁逐，忽然得脫，無諸煩惱，心生歡喜，亦復如是。如囚詣市，卒聞恩赦而得解脫，心生歡喜，亦復如是。亦如農夫遇旱，忽便得雨，而苗得長，五穀豐熟，心生歡喜，亦復如是。亦如人遠行，忽便還家，心生歡喜，亦復如是。善男子，我於爾時聞此偈頌，心生歡喜，亦復如是。即從座起，四向顧盼，而作是言：向所聞偈，誰之所演？爾時四顧，不見異物，唯見猛獸。即說是言：誰開如是玄妙之門？誰能雷震微妙音聲？誰於生死眠睡之中而能曉了？唱如是言：誰能於斯，開導生死了？唱如是言：誰能於斯，開導生死了？唱如是言：誰能於斯，開導生死了？

良醫？說是偈已，啓發我心，猶如半月，漸見光明。善男子，我於爾時一無所見，唯見猛獸。復作是念：將是猛獸說是偈邪？心復生疑，似非其說。何以故？是物形容，甚可怖畏，若有得聞是偈頌者，一切怖畏醜陋即除，何有此物形容？如是能說是偈，不應火中遂生夜光芝草。善男子，我於爾時復作念言：我今無有智慧，而此猛獸或能得見過去仙人，從天尊所聞如是偈頌。我今當問，即便前至是猛獸處，作如是言：善哉善哉！汝於何所遇是過去離怖畏者所說偈頌？定於何所而得如是光明寶珠偈頌之義？乃是過去未來見在元始天尊，正真之道，一切世間，無量無邊。凡夫衆生，常爲疑惑羅網所覆，終身於道法中，不能得聞如是十方天尊所說玄義。善男子，我聞是已即答，我言：是大真士，汝今不應問我是義，何以故？我不飲食，已經多日，種種求覓，了不能得，饑餓困苦，心迷誑語，非是本心之所知也。我今力能飛行虛空，處處求食而不能得，以是



之故，我說是語。善男子，我時即復語猛獸言：若能爲我說是偈頌竟，我當終身爲汝弟子。汝所說者，名字不終，義亦不盡，以何因緣不欲說耶？夫以財物珍玩布施者，則有竭盡，而法施因緣，不可盡也，法施無盡，多所利益。我今聞此偈頌，心有疑惑，汝今幸可爲我除斷，說此偈竟，我當終身爲汝弟子。猛獸語言：汝今智太過物，但自愛身，都不見念今我定，爲饑餓困苦所逼，實不能說。我即問言：汝所食者，爲是何物？猛獸答言：汝不須問我，若說者，令人怖畏。我今復言：此中險處，更無有人，我不畏汝，何故不說？猛獸答言：我所食者，唯人煖肉，其所飲者，唯人熱血，自我所餐，唯食人肉，徧處求索，困不能得。世之多人，皆有福德，爲諸天善神之所覆護，而我無力，不能得殺。善男子，我復語言汝：但具足說此偈頌，我聞偈頌已，當以此身奉施供養猛獸。我設命終，如我之身，無有所用，當爲惡蟲之所噉食，而復不得一分之福。我今爲求無

上正真大道之果，捨不淨身，以易淨身。猛獸答言：誰當信汝如是之言，爲真道故，棄所愛身。善男子，我即答曰：汝大無智。譬如有人，施他凡器而得真寶，我亦如是，捨不淨身，得堅固身。汝言誰當信者，我今有證，無量天王等皆證此事。復有天眼諸真人道士，爲欲利益一切衆生，修行供養大乘經典，具四等六慧者，亦能證知。有十方天尊，利益衆生，亦能證我真道，故捨此身。猛獸復言：汝若如是能捨身命，當諦專心，爲汝分別說其偈頌。善男子，我於爾時聞是語已，心中歡悅，即解己身所著衣服，爲此猛獸敷置法座，白言真人，願上此坐。我即於前長跪，斂手而作是言：唯願真人爲我演說偈頌，令得具足。猛獸即說偈言：

身。我於爾時，深忖斯義，然後種種書寫此偈，繫著衣服，恐今死後形體露現，即緣大樹。時樹中神復問我曰：咄哉！仁者有何事故？時答曰：我欲捨身，以答偈頌。神又言曰：如是偈頌，何所利益？我時答言：如是偈頌，乃是元始天尊之所演說，我爲此法棄捨身命，不爲名聞利養財物，但欲利益無量凡夫，故捨此身。善男子，我捨身時而作是念：願令一切慳貪之人，悉皆見我捨離此身，若有愛惜，有嘖嘖者，亦令見我爲一偈頌捨於身命，如棄糞穢。我於爾時作是語已，尋復捨命，自投樹下，下未著地，虛空之中，出百種聲。爾時猛獸還復捨身於虛空之中，捧接我身，安置平地。元陽真人，神仙眷屬，稽首作禮於我座前，讚歎：善哉！真是賢智，能大利益一切衆生，欲於無明之中燃大法火。爲我愛惜天尊妙法，故生撓惱，唯願大德，許今首悔懺謝罪愆，汝於未來，必定成就無上正真大道自然之果，願見救度。爾時真人及諸大眾，一時辭退，忽然不見。

太上靈寶元陽妙經卷之二

①法色：當作「色法」。

太上靈寶元陽妙經卷之三

慈行品

爾時元始天尊於紫微瓊宮，金暉玉殿，九曲之房，元陽世界，告妙樂真人：汝今於此國土修慈悲喜，住於恩愛一子之地。妙樂真人稽首禮拜，上白天尊：以何因緣，名爲恩愛一子之地？天尊曰：猶如父母養兒安穩，心生歡喜。善男子，住此地中，亦復如是，觀諸衆生同於一地，見有修善，生大歡悅，是故此地名曰恩愛，猶如父母見子遇病，心生憂惱，初無棄捨。善男子，住是地中，亦復如是，見諸凡夫一切衆生，爲煩惱病之所縈纏，心生憂惱哀愍，如子諸毛孔中皆流出血，是故此地名爲一子之地。如人小時，拾取糞穢，置於口中，父母見已，心生愁怖，恐爲其患，以水灌洗，挑出糞穢。善男子，住是地中，亦復如是，見諸凡夫一切衆生身口意業，多爲不善，真人見

已，則以智手拔之令出，憐愍凡夫，不欲令彼流浪生死，受諸煩惱，是故此地名爲一子。猶如父母所念之子，忽遇疾病，俄頃之間，子便終沒，父母悲泣，願與同命。真人亦見一切衆生，墮於三塗，亦願與其俱生地獄。何以故？是一切衆生若受苦時，或生一念改悔之意，我即爲說修善方法，彼於一念生善根，是故此地復名一子。猶如父母唯有一子，行住坐卧，心常愛念，若有罪咎，和聲軟語，方便慰誘，不加其惡。真人道士，亦復如是，見諸凡夫一切衆生墮三惡道，心生慈愍，終不生瞋，以惡加之，是故此地復名一子。妙樂真人白天尊言：如尊所說，其言祕密，我今智短，云何得解？若諸真人住一子地，能如此者，云何天尊昔爲甘露國王時，行真人行，斷法龍長者之命？若得此地，則應生心愛念凡夫，若不得者，復何因緣不墮三惡？若憐愍衆生，等視一子，心無偏愛，如此之言，云何於義不相違背？天尊住虛空地，凡欲求乞飲食，要須觀人，若有於己生嫉妬

心，則不須行，乃至極饑亦不行乞。何以故？真人道士，常作是念：我憶往昔劫時，於福田所生一惡念，以是因緣，墮落地獄，受諸苦惱，我今極饑，終不乞食，終不令彼於我有疑，墮於地獄，受諸苦惱。復作是念：若有凡夫一切衆生，疑我立者，我當終日端坐。若有凡夫，疑我坐者，我當終日立不行卧。是真人道士，護念衆生，尚有是心，何況大聖通靈。若得一子地者，何緣天尊，出如是言，使諸凡夫起重惡心？

天尊告妙樂真人：汝今不應作如此難言，我爲諸凡夫作煩惱因緣，假使力能傾竭海水，我終不爲諸凡夫一切衆生作煩惱根本。假令天地悉爲非色，水爲堅相，火爲水相，風爲注相，我終不爲諸凡夫衆生作煩惱根本。假使毀犯四盟禁罪，及一凡夫誹謗正法，現身得成十聖無畏，我終不爲諸凡夫衆生作煩惱根本。假使下仙弟子及一邪見，常住不變，我終不爲諸凡夫衆生作煩惱根本。假使諸真人等犯四盟科

律，作於誹謗真正之法，我終不爲諸凡夫衆生作煩惱根本。假使一切無量衆生斷滅道性，我終不爲諸凡夫衆生作煩惱根本。假令擲索能繫縛風，吹諸猛火燔燒石山，我終不爲諸凡夫衆生作煩惱根本。寧與毒蛇猛虎同共一處，不應發言，聖人爲諸凡夫衆生作煩惱根本。善男子，天尊真實能爲凡夫衆生斷除煩惱，終不爲作煩惱根本。妙樂真人，如汝所言，天尊往昔劫時殺法龍長者。善男子，我今小小蟲蟻尚爾不殺，況法龍長者！是於善士，常作方便，惠施衆生，無量壽命。夫施食者則爲施命，真人道士行布施時，常施衆生無量危命。善男子，行不殺法，壽命長遠。真人道士，行持戒時，則爲施與凡夫一切衆生無量壽命。善男子，檢口無惡，得命長遠。真人道士，行忍辱時，常勸凡夫一切衆生莫生怨想，推直於人，引曲還己，無有瞋恚，得命長遠。是故真人行忍辱時，已施凡夫一切衆生無量運命。善男子，專心修善，得命長遠。真人道士，行精進時，常勸凡夫

一切衆生勤修善法，凡夫行已得壽命，是故真人道士行精進時，已施凡夫一切衆生無量運命。善男子，修攝心法，得壽命長遠。真人道士，行靜定時，觀諸凡夫一切衆生修平等意，凡夫行已得壽命長遠，是故真人行靜定時，已施凡夫一切衆生無量運命。善男子，於諸法中，心不放逸，得命長遠。真人道士，行智慧時，勸諸凡夫一切衆生於諸善法不生放逸，凡夫行已，以此因緣，得命長遠，是故真人行智慧時，已施凡夫一切衆生無量運命。善男子，以是義故，真人道士於諸凡夫一切衆生終無棄捨。妙樂真人，汝向所問殺法龍長者，時得是地不？善男子，我時已得愛念，故斷其命根非惡心耳。善男子，猶如父母唯養一子，愛之甚重，犯於官律，是時父母以怖畏故，若擯若殺，雖復擯殺，終無惡心。真人道士，爲持善道，亦復如是。若有凡夫一切衆生謗元陽經者，即以鞭杖，苦而治之，或害其命，故令改惡修於善道。真人心常作如是思惟。以何因緣能令凡夫一切

衆生發起善心？隨其方便，要須爲之。法龍長者，命終之後，生玄沙北獄，即有三念：一者念我從何而來？到此即便自覺，從人道中來；二者自念我今所生爲是何處？即便自覺，知是玄沙北獄；三者自念因何業緣而來至此？即便自覺，從謗元陽經典，不信因緣，爲國王所殺而來生此。覺是事已，於元陽經典生恭敬意，尋時命終，生於福樂自在世界，於彼而得壽命具足。善男子，以是義故，我於往昔劫時，乃與是人同於壽命，云何名殺？善男子，善人掘地，刈草斫樹，斬截死屍，罵詈呪詛，以是因緣，墮於地獄不？妙樂真人白天尊言：如我解聖人所說義者，應墮地獄。何以故？如天尊昔爲邪見說法，汝諸弟子，於諸草木，莫知惡心，何以故？墮於惡道。爾時天尊讚妙樂真人：善哉善哉！如汝所說，應善受持。善男子，若因惡心墮惡道者，真人時實無惡，何以故？真人道士，於一切凡夫衆生乃至蟲蟻，悉皆慈愍增益心故。所以者何？善知因緣諸方便故。以方

便力，欲令凡夫一切衆生作諸福業。善男子，以是義故，我於爾時，以善方便，雖奪其命而非惡心。善男子，若殺蟲蟻滿於億數，微有罪報。虎狼、毒蛇、蚊虻、蚤虱、熊羆、貓獸，能爲一切凡夫衆生害者，斬奪其命，微有罪報。若殺凶害惡人，則有罪報，殺已不悔，則墮三塗地獄。若能懺悔發露，三日斷食，其罪即消，無有遺餘。若害善人、德行道士、及其父母、女人與牛，墮於地獄，無有劫數。善男子，我及真人，知殺有三。何者名三？所謂爲三：一者下，二者中，三者上。下者蟻子乃至一切畜生，唯除真人示現生者。真人道士，以願因緣，示受畜生，是名下殺。以下殺因緣，墮於三塗地獄，具受諸苦。何以故？是諸畜生有微善根，是故殺者具受罪報。是名下殺。中殺者，從凡夫乃至初學，是名爲中。以是業因，墮於三惡，具受中苦，是名中殺。上殺者，所謂謀危國主、父母、尊屬、真士、善人，是名爲上。以是因緣，墮於惡道三塗地獄，具受上苦，是

名上殺。若有能殺十惡五逆者，則不墮於三種惡中。善男子，彼諸兇人等皆愚癡，猶如掘地刈草，斬斫樹木，罵詈鞭撻，無有罪報，殺一兇逆之人，亦復如是無有罪報。何以故？諸兇逆者，無有信等，無有利益衆生，是故雖殺而無罪報。善男子，汝上所言天尊何故罵受業大士癡人食唾，汝亦不應作如是問。何以故？天尊凡所發言，不可譬喻。善男子，或有實語，爲人所愛，非時非法，不爲利益，如是之言，我終不信。善男子，或復發言橫惡，邪諂虛妄，非時非法，聞者不愛，不能利益，我亦不信。善男子，若有音聲，雖復橫惡，真實不謬，是時是法，能爲一切凡夫衆生有於利益，聞雖不信，我要說之。何以故？天尊神通智力，徧知方便。善男子，如我昔時遊於山林，聚落城邑，在樹下有一大鬼，名曰警昌，純食肉血，多殺衆生，復於其聚，日噉一人。善男子，我於其時，爲彼大鬼說諸法相，然彼愚癡不受教法，我即化身爲大力神，傾其宮室，令不安住。其鬼爾

時率其部屬，出其宮殿，欲來拒擊。大鬼見我時，即惶怖迷悶，蹙地猶如死人，我以慈念，手摩其體，即復起坐，作如是言：大哉！有幸還得身命，是大神力，具大威儀，有愍念心，赦我罪咎。即於我前生敬信心，我即還復天尊之身，復更廣說真要道法，令其鬼神受不殺業。即於其日，聚落城中有一長者，名曰法龍，次應當死，家人已送付與鬼神。鬼神得已，即以施我，我既受已，而為長者更立名諱，名曰儒首。爾時其鬼即白我言：今此眷屬，唯仰血肉，以供性命，今以受法，當何資給天尊？

身。雖作如是，亦不令彼諸鬼神輩有毀滅相，直欲令彼安住正法，示其如是方便之法。善男子，我於往時，亦不罵辱邪見邪疑；亦不愚癡，食人涕唾；亦不生諸惡道中，三塗地獄，受諸苦惱；亦不毀謗道士及諸學人；亦不違犯四盟之罪，誹謗元陽正法，微密經典，非諸晚學之人；亦非下仙之流。善男子，下仙晚學，實非邪見邪魔境界，唯有聖人之所知委。善男子，是故汝爾不應問言天尊何緣嗔責諸仙晚學，汝於諸天所有境界，不應如是生於疑惑。妙樂真人白天尊言：猶如甘蔗，噉嚼口中，得於甘味。我亦如是，從聖人數聞經典，多得法味，所謂道味、法味、智慧味、達解味。天尊猶如真金，屢加銷鍊，轉轉益明，調和柔軟，光色妍淨，其價難量，然後乃為人天之寶。天尊聖人，亦復如是，鄭重諮問，則得曉諸深奧之義，令得受持，悟於無量。凡夫衆生，發自然道意，然後為諸人天之所尊重。爾時天尊讚妙樂真人：善哉善哉！真人道士，為欲利益

凡夫一切衆生故，啓天尊如是妙法。善男子，以是義故，隨汝意願，說是元陽大乘微妙經典。所謂愍念，猶如一子之地。妙樂真人白天尊言：若諸真人道士，修慈悲喜得一子地者，修捨心時，復生何地？天尊言：善男子，汝善知時，知我有說，汝則諮問。真人道士，修捨心時，則能住於虛空平等法地。善男子，真人道士住是虛空平等法地，則不見有六親眷屬，怨憎中心。善男子，猶如虛空無有六親眷屬，乃至無有怨憎，一切諸法，亦復如是，無有眷屬。一切諸漏，真人道士，見一切法，亦復如是，其心平等猶如虛空。何以故？善能觀度諸空法故。妙樂真人復白天尊言：云何名空？天尊曰：善男子，如是空者，所謂內空外空，無為空，有為空，一切諸法皆悉是空。善男子，云何觀於內空？真人道士，觀內法空，是內法空，無有眷屬，怨憎中心。真常之樂，天尊法子，所有財物，是內法中。雖有道德性，而是道德性，非內非外，所以者何？道德性常住，無有遷動，

是名真人道士觀於內空。所謂外空者，亦復如是。無有內法，內外空者，亦復如是。善男子，唯有天尊法子，道性不在，內外二空。何以故？如是等法，真常之樂，是故道法不名為空，是名內外俱空。善男子，有為空者，有為之法，悉皆是空，所謂內空外空。內空者，真常之樂。天尊法子，第一義空是中道性，非有為法，是故道性非有為法空。善男子，云何真人道士觀無為空？是無為法，悉皆是空，所謂無常苦樂，無我陰界，入衆生相，有為漏。內法外法，無為法中，平等一法，非有為法，非無為法，非有為性，非無為性，是名常往。非內非外，是名真人觀無為空。云何真人道士觀無始空？是真人道士見生滅無始，皆悉空寂。所謂空者，真常之樂，皆悉空寂，無有變易。衆生命相，三寶法性，及無為法，是名真人觀無始空。云何真人觀於法空？是真人道士觀一切法，本性皆空，所謂陰界入常無常、苦無苦、樂無樂、淨不淨，觀如是一切諸法，不見本性，是名

真人道士觀於性空。云何真人道士觀無所有？如人無子，言宅舍空，究竟觀空，無有親愛。愚癡之人，言諸十方皆空，貧賤之人，言一切空，如是所計，或空或非空。真人觀時，如貧賤人，一切皆空，是名真人道士觀無有空。云何真人道士觀第一法中皆悉是空？善男子，真人道士觀第一時，是從眼生，從何而來，及其滅時，去無所至。昔無今有，本有還無，推其實性，無眼無主。一切諸法，亦復如是。云何名為第一義？法有業有報，不見作者，如是空法，名第一法空，是名真人道士觀第一法空。云何真人道士觀於空法？空是空中，乃是下仙弟子所迷沒處。善男子，是有是無，是名空；空是是非非，是名空空。善男子，三世真人尚於是中通達少分，猶如微塵。善男子，如是空法，亦復不同下仙弟子所得空空，是名真人道士觀於空空之法。善男子，云何真人道士觀於大空？善男子，是大空者，謂天眼智慧，是名大空。善男子，真人道士得如是空妙，則住於虛空

等地。我今於大衆中，廣為演說諸空義時，有無量無邊真人道士，即得住於虛空等地。善男子，真人道士住是地中，於一切法，無有滯礙、繫縛、拘執，心無迷悶，以是義故，名為虛空之地。善男子，猶如虛空於可愛色中，不生貪著，不愛色中，不生喜怒，真人道士住是地中，亦復如是，於好色中，心無貪著。善男子，猶如虛空廣大，悉能容受一切諸物，真人道士住是地中，亦復如是。廣大虛空，悉能容受一切諸法，以是義故，復得名為虛空之地。善男子，真人道士住是廣大虛空地中，於諸妙法，亦見亦知，若行若緣，若性若相，若因若果，若凡夫心，若根若本，若善知識，若善因緣，若善法戒，若善施為，若善科禁，如是等法，一切知見。善男子，真人道士住是地中，知而不見。云何為知？知自我法，投水赴火，自墮深坑，常翹一足，五熱灰身，常卧塵中、棘刺、樹木、惡草、牛糞之處，羸衣布服，茹菜噉草，若行乞食，限至一家，主若言無，即便捨去，設主更招，終不顧

盼；不食肉味，世間五味，如是等法，皆悉除斷，能為無上解脫因者，無有是處，是名為知。云何不見？真人道士，不見一人行如是法，得正解脫，是名不見。善男子，真人道士，亦知何等為見，見諸凡夫一切衆生，行是邪法，必墮地獄，是名為見。云何為知？諸凡夫衆生，從地獄出生於人中，若能修行布施，乃至具足諸精進法，是人必得入正解脫，是名為知。善男子，真人道士復有亦見亦知。云何為見？見常無常，見苦無苦，見樂無樂，見淨無淨，見我無我，是名為見。云何為知？知諸聖人定不畢竟，入不滅度；知諸聖人身如金剛不壞，非是煩惱所成就身，又非臭穢腐敗之身；亦復能知一切衆生悉有道性，是名為知。善男子，真人道士復有亦見亦知。云何為知？知是衆生求於妙法，是人順流，是人逆流，是人正住；知是衆生已到彼岸。順流者，謂凡夫之人。逆流者，從無為乃至諸仙。正住者，真人道士等到彼者，所謂天尊神通慧眼，應正徧知，是名為

知。云何為見？真人道士，住於元陽世界，大乘法門，修行妙行，妙行心以淨天眼，見諸凡夫一切衆生，造身心口業，三事不善，墮於幽牢地獄之中；見諸衆生，修善業者，命終當生天上人中；見諸凡夫一切衆生，從閻入閻，有諸凡夫一切衆生，從閻入明，有諸凡夫一切衆生，從明入明。是為知見。善男子，真人道士復有亦見亦知。真人道士，知諸凡夫一切衆生，修身、修行、修法、修戒、修定、修慧，是人今生惡業成就，或因貪慾，瞋恚，愚癡，是業必應三塗受報。如是之人，直以修身、修行、修法、修戒、修定、修慧，見世輕受，不墮三塗。云何是業能得理報？發露懺悔，有諸業，既悔之後更不敢作，慙愧成就，供養三寶，故常自呵責，故以是因緣不墮三塗，見世受報。所謂疾病百種疹患，罹諸死殃，饑餓困苦，身體楚痛，如是等事，見世輕報，是名為知。云何為見？真人道士，見如是人不能修習身行，法戒定慧，造少惡業，此業

因緣，見受報對；是人少惡不能懺悔，不自憶責，不生慙悚，無有畏忌，是業增長，幽牢受報，是名為見。復有知而不見。云何知而不見？知諸凡夫一切衆生，皆有法性，為諸煩惱之所覆蔽，不能得見，是名知而不見。復有知而少見。真人道士等，知諸凡夫一切衆生，皆有法性，見不明了，譬如闇夜所見不了。復有亦見亦知。所謂天聖人，亦見亦知。復有亦見亦知，不見不知。亦見亦知者，所謂世間文字言語，衣服卧具，床席屏帷，飲食五味，世間珍玩，衆生命相，是名亦見亦知。云何不見不知？聖人所有玄妙之義，無有男女乃至園林，是名不見不知。復有知而不見。知所布施，知所供養，知所受者，知因果報，是名為知。云何不見？不見布施供養，受者果報，是名不見。真人道士，知有八種，即是元始天尊神通慧眼所知。妙樂真人白天尊言：真人道士，能如是知，得何等利？天尊言：善男子，真人道士能如是知，得四無礙力，無礙法，無礙義，無礙智，

無礙慧。無礙法者，知一切法及法名字。義無礙者，知一切法所有諸義，能隨諸法所立名字而爲作義。智無礙者，隨有經論深奧之理而能解析。慧無礙者，所謂真人道士，凡所演說諸仙有疑者，無有障礙，悉能明了一切法相。善男子，是名真人能如是知見，即得如是四無礙法。善男子，法無礙者，真人道士徧知神仙大士，諸妙經典深奧之法。義無礙者，雖有三乘，知歸其一，終不有異、差別之相。智無礙者，真人道士於一法中作種種名，經歷天地，無量劫中，說不可盡，下仙弟子能作是說，無有是處。慧無礙者，真人道士於無量劫，爲諸凡夫一切衆生演說諸法，若名若義，方便異說，不可窮極。善男子，法無礙者，真人道士雖知諸法而不取著。義無礙者，真人道士雖知諸義而亦不著。智無礙者，真人道士雖知名字而亦不著。慧無礙者，真人道士雖知有慧如是最上，而亦不著。何以故？若取著者，不名真人。妙樂真人復白天尊言：若不取著，則不知

法；若知法者，則是取著。若不知著，則無所知，云何天尊說言知法而不取著？天尊言：夫取著，不名無礙，無所取著，乃名無礙。善男子，一切諸真人等，有取著者，即名無礙。若無無礙者，不名真人，當知是人，名爲愚癡。何故取著名爲愚癡？一切愚癡，取著於色，乃至著識以著色，故則生貪心，生貪心故爲色染繫，乃至爲識之所染繫。以染繫故，則不得免生老病死，愁惱大苦，一切煩惱。是故取著名爲愚癡。以是義故，一切愚癡，無四無礙法。善男子，真人道士已於無量恒河沙之劫，知見法相，以知見故，則知其義。以見法相及知義故，而於色中不生繫著，乃至識中亦復如是。以不染故，真人於色不生著心，乃至識中亦不生著。以無著故，則不爲色之所繫染，乃至不爲識之所染，故則能免生老病死，憂苦大悲，諸煩惱業。以是義故，一切真人得無礙法。善男子，以是義故，我爲弟子元陽經中說繫染者名爲邪執，若不染者，則脫邪執。猶如有

罪，凡夫之人爲官所繫，無罪之人，官不能執。真人道士，亦復如是，有執染者，爲邪所執，無染繫者，邪不能執。以是因緣，真人道士而無所染。善男子，無礙法者，真人道士善知方便而不妄失。所謂方便者，如土如山，如眼如雲，如人如母，一切諸法，亦復如是。無礙義者，真人雖知諸法名字而不知義，得無礙義，能知其意。云何知義？所謂如地能生一切草木，凡夫衆生，以是因緣，名爲如地。善男子，所謂如山者，真人道士，修學道法，思惟其義，令無搖動，以是因緣，故名如山。所謂如眼，能有諸光照了相，見一切義，以是因緣，名爲如眼。所謂如雲，能有蔭潤利益衆物，以是因緣，名爲如雲。所謂如人，能持一切諸法妙義，爲世良醫，療諸疾病，以是因緣，名爲如人。所謂如母，愛養兒子，心無偏黨，以是因緣，名爲如母。善男子，真人道士知一切法深奧之義，亦復如是。無礙辭者，真人道士以元陽妙典大乘之辭，開演一句，無有疑難，亦無有義，譬如一切舍



宅草木等名。善男子，何故無義？如是之義，乃是真人道士、諸天聖人境界；辭者，凡夫境界，以知其義，以是因緣，名辭無礙。無礙慧者，真人道士知法義，時於恒河沙劫說其義味，理不可窮，是名無礙慧者。善男子，真人道士於久遠劫時，修第一義法，故得無礙義；亦於久遠劫時，修習靈寶大洞真經，故得無礙法；亦於久遠劫時，修習三清妙法，得於智慧，無有疑難。善男子，諸仙弟子若有得是四無礙力者，無有是處。如是元陽經中我說，諸仙弟子有四無礙力，諸仙弟子真實無有。以是因緣，真人道士爲度凡夫，故有如是四無礙力。諸仙弟子修下仙法，志願仙品，未登妙果，以是因緣，諸仙弟子有四無礙力。妙樂真人等即起于席，長跪歛板，上白天尊：今聞宣說，具了道源。諸天時衆，稽首作禮，各還本座。

太上靈寶元陽妙經卷之三

①有：疑當作「無」。

## 太上靈寶元陽妙經卷之四

### 問行品<sup>①</sup>

諸弟子等上白師尊言：衆生各有緣品，及諸大士、男官、女官等。如弟子惟忖，今聖非過去聖師，廣演次第，即元陽昇仙大法，演大義經。諸法衆聖，男官女官，外契內契，我於過去諸仙男女，得大莊嚴，神通明了，曾見此瑞，放斯光明，即說大法。是故當知師尊現示變化，廣演言教，神通第二。一切諸法，亦復如是，故令弟子等咸得聞知。一切世間難信之人，故發斯瑞。諸男官女官等，若過去無量無邊，不可思議劫時，有一王名大相燈清淨法王，應化八萬四千地。其地平整，歡樂饒人，無有山河、沙石、溝坑，原陸堆阜其城，黃金爲壁，水銀爲池，真珠玉室，瑤華寢，連綿四百餘里，人民慈善。有一弟子，名大法林，廣聞諸法，明惠具足，超登無上，化導天人，其義不雜，其

音巧妙，具足明白，五通之相，說法利益，度脫衆生，了一切法空。是爲真人，與上六神王俱次得道元陽上品真人第二，能成就一切道智。次復有一弟子名常精進行相大士，名曰明如長相。是人曾於二十二身得生文昌宮，由以宿植德本。靈智自天，稟化玄風，餐訓妙法，積福具備，證果九天，獲慶將來，得蔭太清，凝神天府，功德彌厚，靈嶽真府，仙官授手，其所習翫，紫陽仙公太清圖品，應爲第七。未出家時，有一大士，智慧具足，其所祖述，紫陽爲師，而每勤學神仙元陽，爲上天圖仙品。其人能知初仙、中仙、下仙，初善、中善、後善，其義深遠最後。仙真人未出家時，有八從弟子，一名晃林，二名珍林，三名意林，四名表林，五名善林，六名樂林，七名寶林，八名除疑林。是人而繫名天宮元陽上品，具足智行，備五神通，威德自在，各領天人。初出家時，思惟樹下，棄捨高位，發大悲心，秉意逃逝。常修真行，皆爲仙伯，於千萬歲後，所植諸善，悉皆成就。夜半子

時，建剛仰〔候〕<sup>②</sup>北斗魁中紫微文昌，忽然而開，但見太上老子乘雲青龍而下，下則青馬也。謂其人曰：是何真賢？時老子答言：吾是東海小童李元真人，天人慶會，遣我來下，化子林大士，後能演無量義經，開敷元陽神仙第二，天花覆其上，普化世界，種種震動。爾時會中有一真士，厥年十一，上白師尊曰：如我大衆，得未曾見今歡娛喜樂，長跪端心，觀師尊所說，善辭巧妙，善喻方便，能放光明，普照一切，令其會中，蒙得開明。所爲因緣照明，元陽上品，仙聖大品，天人之界，其土清淨，得未曾有，故使百千萬歲中，衆生永安大福。條林法靜真人曰：吾師說元陽上品以來，曾經六十小劫，不起于座，今欲攝應歸本，正月七日當還天宮，慶集天人。汝等若有一人、二人，乃至十人，於我去後，能宣傳妙法，勸化衆生，皆當往生元陽品中，莫得懈倦。六十小劫，天人並位，齊心受記。乃告諸大士等，得條林法靜真人言，今當慶會天人。其人去後，妙元林與光妙林，應達

五通廣智神仙。巧利經記當得淨惠，開悟衆生，號曰淨惠。度真人授記已，便於壬辰年正月七日，忽然去矣。

元陽淨惠度林真人者，生於深妙王宮，其先代積行，勤心翹念，耽讀真經，每習仙記，常所祖述太一元宮。其所修學太一仙經八百卷，其中廣演言教，化度衆生。說妙林仙記八千卷，滿八十小劫，不起于座，爲人演說。有八弟子：一名晃林，二名妙林，三名教林，四名堅固林，五名燈香林，六名樂林，七名度林，八名化林。是八弟子皆有明行，於元陽上品第三弟子也，處臺榭園田廣林樹下。有成仙品者，名曰伯皇真人，求在左右，通利誦典，廣演諸經，宣暢至品。曾於大衆過去之世，經六十小劫，其衆嚴敬，演教度一切無數，令入元陽上品。初出家時，有三弟子，見神大聖，諸仙隨從，說此經中無量種義。諸天仙人，當廣分別。吾當說此時，即於天上玄坐虛空中，八十小劫，下觀汝等廣演言教，昇入無量品。天香寶蓋，天龍仙王，供養人中，一切

諸仙，世界嚴淨，其土如脂，多諸寶樹，名獅子象王宮。即時種種天人神響，震動淨惠度林真人，放神通光明，見諸希有之相，悉見彼土一切人民。其土清淨，真珠爲地，黃金爲城，白銀爲壁，瑠璃爲室，黃青赤繩，連綿其中。瑪瑙界側，水精爲殿，白玉爲樓，處處行樹，園林臺榭，清淨蓮池，花果茂盛。一切衆生，受樂其中。連綿相續四千餘里，天光普照，衆寶莊嚴，瑠璃玻瓈，內外朗徹，不由日月。諸仙供辦，餽膳飲食，自然天厨，供具餽膳。彼有天人明淨第一，出乘雲車，駕龍神虎，飛鳳嘯歌，四面懸鈴，八方安施，自然伎樂，身色光明如金寶山，端嚴奇妙如淨瑠璃，內外圓滿。次一大士，厥名辯惠度厄真人，所從弟子，皆得昇天，太一官府，開度無數。因我光明，飛行自在，悉見大衆諸仙，山林精進大士，持戒符契，妙靈仙品，猶如明珠。有一弟子名莊妙林，其人修行常在山林，精進持戒，淨行、施惠、忍辱，元陽仙品。有一弟子名大智藏，入深妙定，身心寂滅，廣

智定慧。次一弟子名妙梵林，智法深曠寂滅，神智不動。各於其國，說法上品。次一弟子名大梵林，現大神通，其心歡喜。四部弟子，廣演言教，各各相問元陽仙品。次一弟子名觀梵林，好樂至道，天人所尊，三界第一，能讚諸仙，世間希有。次一弟子名真妙音，廣知一切，天人所趣，歸信大行，能奉至業。次一弟子名寶玄林，玄智虛空，照明仙記，每讚陰陽，廣演言教，慶集天人，妙光世度。次一弟子名智慧深，智慧五通，滿八十小劫，能開世教，不起於座，所說上品，妙奧難測，號曰月光無上仙師。次一弟子名寶妙林，天人並悅。諸法實相，已爲汝說於中長短，十月五日歸還天宮。語諸弟子言：汝等一心精進，當昇天宮，號曰太清天人。如是弟子皆是元陽仙品，神通無礙。淨惠度真人說是既已，語諸弟子言：自吾與子仙紀斷絕，慶會天宮，有何隔乎？吾至十月五日當還天宮，上命甚速，吉會非常。於是真人還以此月十五日日中之時，與諸衆仙，雲車羽

蓋，侍從八千萬人，飛仙天仙，無量聖衆，乘之而去。

元陽度太清天人，從無著王宮，乘三世界安庠而起，告諸弟子曰：吾受真人智慧甚深，無量智慧，見生智慧門，五神洞朗，諸根猛利，饒益衆生。一切世間，難解難了，難入一切，天人所不能及。所以者何？吾曾親近百千萬億、無數真人大士，盡行無量大道，勇猛精進，名稱普聞，成就甚深，得希有法，嶽靈天圖仙官授法，下化三界，隨宜啓導。吾從成真人以來，種種因緣，種種譬喻，廣演言教，無數方便，引導衆生，令離諸著。所以者何？吾之方便，知見深遠，皆以具足百姓子人。我太上先師，其智廣深遠，無量無邊，無所畏憚，心定解脫，深入秘藏，知見無際，成就一切未曾有法，皆至天宮大妙仙圖元陽上品大仙。寶經種種，分別巧說諸法，言辭柔軟，悅可衆心。百姓子等，取我要言之法，無有限量，承我所說，悉皆成就，不可思議。子等不須復說，何以故？我所成就，微妙第

一，義趣難解，唯吾上師，乃能分別。諸法深奧，不能究盡。吾今有如是相，有如是性，如是體，如是力，如是作，如是緣，如是因，如是果，如是報，如是本末，盡等究竟。爾時天人授記與信行善男善女，一切咸使聞知，悉皆開悟。乃<sup>①</sup>天老玄淨王少子，其先自出慰田王宮，其所祖述，大寶爲上，其<sup>②</sup>所修習，太清經八千卷，能廣演言教，六十小劫，不起於座，本從無數，具足諸行，甚深甚妙，難見難了。有從弟子三人，一名玄妙真人，二名證果真人，三名明智真人。然此弟子有大聖行，能說法元陽仙品，千日千夜不起於座。次一弟子名真梵林，諸根猛利，甚深微妙，行此諸品，還得成果。我以悉知如是大果，元陽功德。次一弟子名大梵林，種種方便，我及十方諸餘衆生，悉能演化，開悟暗冥。次一弟子名真淨林，其人智慧，信力堅固。及諸弟子煩惱漏盡，住是最後，悉皆昇天，太上仙宮，依位各處。

### 太上靈寶元陽妙經卷之四

① 本篇體例篇幅均與其餘各卷不同，疑有缺文。

② 「候」字據敦煌P.2450抄本補。

③ 「人」字據敦煌本補。

④ 乃：原誤作「及」。其上疑有缺文。

⑤ 其：原作「甚」，據文意改。

### 太上靈寶元陽妙經卷之五

#### 觀行品上

爾時東方玉寶皇上天尊，於空歌國土清淨世界，與其神仙眷屬，飛天神王，至真大聖衆，八萬四千徒侶，俱會香林七寶樹間，演說元陽上品觀行妙經，爲諸來生作大福田，曉悟深疑，令知妙道。善男子，應當發心願念，遵行四種修學之法。作是語已，時衆之中，有一真人名曰靈華，整頓衣冠，手執香鑪，長跪白言：宿因有幸，得遇威光，過泰之歡，實爲慙悚。今聞演說元陽祕藏，甚深義味，不可思議，云何？天尊答曰：善男子，四種修學之法，一者從師，受與元陽經典；二者從善知識，開道深疑；三者思惟玄義，得苦空法；四者修行精進，志願成道。善男子，當知四種之業，親近明師尋知識，請說玄義，得解疑難。真人應知，思其四種修學之法。復次，善男子，身口意

業有四種惑。何等爲四？一者貪惑，二者癡惑，三者淫惑，四者嘖嘖惑。善男子，修學大乘經典，求自然果者，應當捨除如是四種惑法。云何貪惑？所謂貪惑者，非分貪求世間榮華，衣服珍玩，種種規求，種種計度，殺害衆生，侵損物命，恣意所爲，縱情吞噉，如是之事，是名貪惑。云何癡惑？所謂癡惑者，身心意業，所作罪愆，不避三光日月星宿，不敬三寶。有道之人，聞他作善，心生破壞，談說是非，謀謗尊老，師父有命，避會不肯依從，如此之事，是名癡惑。云何淫惑？所謂淫惑者，愛樂女色，不避親疏，姦人妻妾，私懷謀度，潛欲誘引，離人骨肉，放蕩無度，如此之事，是名淫惑。云何嘖嘖惑？所謂嘖嘖惑者，心懷諂妄，構架百端，因公傍私，潛行威勢，身爲出家，誑惑衆生，取他財物，詐言道術，無真實相，如是之事，名爲嘖嘖惑。善男子，若欲至心求無上自然果者，真人當知四種惡惑，悉皆除斷。復次，善男子，有二種信：一者至心信，二者心不信。真人

當知心信者是善心，不信者不名爲善。復次，信有二種：一者常往法座，二者不往法座。真人當知常往法座者善，不往者不名爲善。往法座者，復有二種：一者禮拜，二者不禮拜。真人當知禮拜者善，不禮拜者不名爲善。其禮拜者，復有二種：一者至心聽法，二者不至心聽法。真人當知至心聽法者善，不至心聽法者不名爲善。真人當知至心聽法者，復有二種：一者思尋其義，二者不思尋其義。真人當知思尋其義者善，不思尋其義者不名爲善。思尋其義者，復有二種：一者如說行，二者不如說行。如說行是則爲善，不如說行者不名爲善。如說行者，復有二種：一者有大智慧而能利益一切衆生，二者有大智慧而不能利益一切衆生。所謂能利益一切衆生者，是則爲善，不能利益一切衆生，不名爲善。真人童子，應知利益衆生，安穩歡喜，得自然果報。善男子，如諸寶中，有明月寶珠，最爲勝妙；如諸味中，有甘露漿，最爲勝妙。真人能於人天之中，演

說元陽經義，利益衆生，最爲勝妙，不可譬喻。善男子，是名真人童子住於大乘清淨無爲九法之中。真人童子住是九善，即得真於觀行。復次，善男子，有觀行心，謂慈悲喜捨。靈華真人長跪白天尊言：若多慈心，能斷瞋恚，修悲心者，亦斷瞋恚。云何而言四無量心？尋理而言，則應言三。天尊曰：慈有三緣，一緣衆生，二緣於法，三則無緣。悲喜捨心，亦復如是，若推其意，唯應有一，不應有四。衆生緣者，緣於五情，願與其樂，是名衆生緣法。所謂緣者，緣諸衆生所須之物而施與之，是名法緣。無緣者，緣於天尊，是名無緣。慈者多緣。貧窮衆生，天尊大師，永離貧窮，受第一樂。若緣衆生，則不緣道，法亦如是。以斯義故，緣天尊者，名爲無緣天尊。慈之所緣，一切衆生，如緣父母、兄弟、妻子、眷屬，以是義故，名衆生緣。法緣者，不見父母、兄弟、妻子、眷屬，見一切衆生，皆從緣生，是名法緣。無緣者，不住法相及衆生相，是名無緣。悲喜捨

心，亦復如是。是以名三，不應有四。天尊曰：人有二種，一者見行，二者愛行。見行之人，多修慈悲，愛行之人，多修喜捨。是故應二，不應有四。天尊曰：夫無量者，名曰無邊，邊不可及。故。名無量者，則應是一，不應有四，若有四者，何得無量？是故應一，不名四也。天尊告靈華真人：善男子，諸天聖人爲諸衆生所宣法要，其言祕密，唯子可知。或爲諸衆生說一因緣，如說何者爲一因緣，所謂一切有爲之法。善男子，或說二種，因緣及果；或說三種，煩惱、業、苦；或說四種，無明、諸行、生與老死；或說五種，所謂受、取、有、及、生；或說六種，三世因果；或說七種，謂識、名、色、六入、觸、受及以愛取；或說八種，元、明、行及生老死其餘八事；或說九種，生老病死。善男子，如是因緣，爲衆生故，種種分別，無量心法，亦復如是。善男子，以此義故，於諸天尊，深祕行處，不應生疑。善男子，天尊有大方便，委曲教化，子細宣揚，令一切衆生深解法性，除疑惑

心，無苦說苦，無樂說樂，無因說因，無果說果，無真說真，無法說法，無仙說仙，無道說道。善男子，天尊以是無量方便，爲調伏衆生，豈虛妄耶？善男子，或有衆生貪於財寶，我於其人自化其身，富貴長者，於無量劫歲，隨其所須，種種供給，然後教化，令其解悟無上正真大道。若有衆生貪著五欲，於無量歲，以知五欲充滿其願，然後勸化，令其安住無爲之地，曉悟無上正真大道。若有衆生自恃榮豪，我於其人無量歲中，爲作僕使，趨走給侍，得其心已，即復勸令安住無爲之境，明達無上正真大道。若有凡夫衆生，心生狠戾，自作惡事，須人呵諫，我於無量歲中，教誨呵諫，慰喻其心，令復調順，然後復勸令入清淨之境，明曉悟解無上正真大道之心。善男子，天尊如是於無量歲，以種種方便，令諸衆生，入清淨之境，修是無上正真大道，豈虛妄耶？諸聖人雖處穢惡，無所染污，猶如明珠在沙積中，猶如蓮花在濁水內。善男子，應知如是四無量義，是無量

心，如汝所言，慈能斷瞋，悲亦斷恚。何以故？善男子，恚有二種：一能奪命，二能鞭撻。修慈則能斷彼奪命，修悲則能除彼鞭撻。善男子，以是義故，豈非斷恚耶？復次，瞋有二種：一瞋衆生，二瞋非衆生。修慈心者，斷瞋衆生；修悲心者，斷非衆生。復次，瞋有二種：一者有因緣，二者無因緣。修慈心者，斷有因緣；修悲心者，斷無因緣。復次，瞋有二種：一者於過去久已積集，二者於見在今始積集。修慈心者，能斷過去；修悲心者，斷於見在。復次，瞋有二種：一瞋聖人，二瞋凡夫。修慈心者，斷瞋聖人；修悲心者，斷瞋凡夫。復次，瞋有二種：一者上，二者中。修慈斷上，修悲斷中。善男子，以是義故，則名爲四。何故難言？應三非四，是故。靈華真人是無量心，類例相對，分別爲四。復以器故，應名爲四。若有慈，則不得有悲喜捨心，以是義故，應四不減。善男子，以行分別故，應有四。若行慈時無悲喜捨，是故。善男子，以無量故，亦得

名四無量者，則有四種：有無量心，有緣非自在；有無量心，自在非緣；有無量心，亦緣亦自在；有無量心，非緣非自在。何等無量，有緣非自在？緣於無量無邊，衆生不能得自在，雖得參真染法，或得或不得。何等無量，自在非緣？如緣父母、兄弟、姊妹、妻兒，欲令安樂無量緣。何等無量，亦緣亦自在？謂諸天聖人。何等無量，非緣非自在？晚學法人，不能廣緣，無量衆生，亦非自在。善男子，以是義故，名四無量。非諸晚學法人所知，乃是諸天聖人境界。善男子，如是四事，晚學法人，雖名無量，少不足言，諸天聖人，乃得名爲無量無邊。靈華真人白天尊言：如是如是，實如聖言，諸天聖人所境界，非諸晚學法人所及。天尊，頗有真人住於大乘元陽經中，得慈悲心，非是大慈大悲心不？天尊言：有。善男子，真人若於諸衆中，三品分別：一者所親，二者怨憎，三者中人。於親人中，復作三品，謂上中下，怨憎亦爾。是真人童子，於上親所與憎上樂，於中

下親亦復平等與憎上樂，於上怨所與少分樂，於中怨所與中品樂，於下怨所與憎上樂。真人如是轉憎，修習於上怨所與中品樂，於中下怨等與上轉復，修習於上中等與上樂。若上怨所與上樂者，爾時得名慈心，成就真人。爾時於善父母及上怨所得平等心，無有差異。善男子，是名得慈悲，大慈也。天尊，何緣真人得如是慈，猶故不得名爲大慈悲？善男子，以難成故，不名大慈。何以故？昔於無量劫中，多集煩惱，不修善法，是以不能於一日中調伏其心，得堅固相，無有懈怠。善男子，煩惱之人，堅牢難去，真道之心，輕浮易去。譬如家犬，不畏於人；山林野鹿，見人怖走。瞋恚難去，如守家犬，慈心易失，猶如野鹿。是故此心難可調伏。以是義故，不名大慈。復次，善男子，譬如畫石，其文恒在，畫水易滅，勢不可住。瞋恚難除，譬如畫石；善根易滅，猶如畫水。是故此心難得調伏，如大火聚，其明久住，電光之明，其光不停。瞋火聚，慈如電光，是故此心

難得調伏。以是義故，不名大慈。善男子，真人童子住於真地，名曰大慈，何以故？善男子，最極惡者，名爲邪見。初住真地，修大慈時，作邪見時，心無差別，不見其過，不生其瞋，以是義故，得名大慈。善男子，爲諸凡愚，除無利益，是名大慈。欲與凡愚，無量利樂，是名大悲。於諸凡愚，心生歡喜，是名大喜。無所擁護，名爲大捨。若不見我法相己身，見一切法平等無二，是名大喜。捨自捨己，樂施與他人，是名大喜捨。善男子，唯四無量，能令真人增長，具足四種威儀，其餘諸行，不必能爾。善男子，真人童子先得四無量心，然後乃發無上正真大道之心，次第方得出世間者。善男子，因世無量得出世，無量以是義故，名大無量。靈華真人白天尊言：除無利益與利樂者，實無所爲，如是思惟，即是虛觀，無有實利。天尊，譬如道士觀不淨時，見所著衣服，悉是皮相，而實非皮；所可食噉，皆作蟲相，而實非蟲。觀好美羹，作糞穢汁相，而實非糞穢；

觀所食乳酪，猶如髓腦，而非髓腦；觀骨碎秣，猶如粉相，而實非粉。四無量心，亦復如是。不能真實利益衆生，令其得樂，雖言發口與衆生樂，而實不得。如是之觀，非虛誑耶？天尊，若非

虛妄，實與樂同者，彼諸衆生何故不以諸天聖人威力故，一切受樂？若當真實，不得樂者，如天尊所說：我念往昔，唯修慈心經，此劫世界百返成壞，不來此生。世界成時，生於龍變梵度天上；世界破時，生於太極平育天上。若有衆生能發道心於我所，唯修慈悲，乃得如是人天果報。若不實者，云何得與此義相應？天尊言：善哉善哉！善男子，汝真勇猛，無所畏懼。即爲靈華真人而說偈言：

善能明法相，不起三毒心。所爲平等行，是能宣妙音。百姓男女輩，當以淨神襟。是名觀行品，得果會香林。天明諸道士，明律善幽深。從容紫微上，窈窕玉京岑。若能體真實，玄義必須尋。六時常讀誦，八節恒歌吟。凡夫及衆生，當除殺盜淫。身口意業盡，

邪鬼不能侵。一切善因果，皆緣願所欽。我今說此頌，開發諸迷沉。聖人甘露味，妙漿隨意斟。仙意奉法服，玉女上神簪。元陽隱密偈，猶如五合琴。子能辯至要，身體淨黃金。

善男子，夫修大慈者，實爲非妄想，是其真實理。若是下仙初學之人，是名虛妄，諸天聖人，真實不虛。云何知耶？善男子，真人童子修行如是元陽上品大乘經者，觀土爲金，觀金如土，地爲水相，水爲地相，水爲火相，火爲水相，地爲風相，風爲地相，有爲無相，真爲假相，實爲空相，隨心所成，無有虛妄。觀諸衆生，非爲衆生，觀非衆生，爲實衆生，隨其心成，無有虛妄。善男子，當知真人童子四無量心是真實義，非真實義。復次，善男子，云何名爲真實思微？謂能斷除疑網，息諸煩惱故。善男子，夫修慈心者，能斷貪愛，修悲心者，能斷瞋恚，修喜心者，能斷不樂，修捨心者，能斷貪恚及衆生相。以是義故，名真實義。復次。善男子，真人修四無量心，能爲一切諸善

根本。善男子，真人童子若不得見貧窮衆生，無緣生慈，若不慈，則不能起惠施心。以是因緣，令諸凡夫得安穩樂，所謂飲食、車乘、衣服、香華、床席、卧具，種種珍玩，種種甘果，種種文繒，種種錦繡，如是施時，心無悔惜，不生貪著，必定迴向無上正真大道。其心爾時無所歸依，妄想永斷，不爲恐懼、名稱、利養，不求人天所受快樂，不生驕慢，不望反報。不爲誑他，故行布施，不求報，故諸所施時，不見受者。持法破法，是由非由，此是善知識。作此施時，不擇日揀時，直心布施，無有悔恨，亦復不計飢窮豐樂，不見因果。此是凡夫，此非凡夫，是福非福。雖復不見施者、受者及以衣物，乃至不見斷及果報，而常行施，無有斷絕。善男子，真人若見持法破法，乃至果報，終不能施。若不散捨，則不具足自然果，若不具足自然果，則不能成無上正真大道。善男子，譬如有人身被毒箭，其人親戚欲令貞吉，爲除毒故，即命良醫而爲拔箭。彼人方言，且待莫解，我今



當觀如是毒箭從何方來，誰之所射，爲是憎惡之人，爲是鬼神所害，爲是自然自有？如是癡人，竟未能知，尋便命終。善男子，真人亦爾，若行施時，分別受者，持法破法乃至果報，終不能施。若不能施，則不具足自然之果，則不能成無上正真大道。復次，真人童子行施散時，於諸凡夫，慈心平等，猶如子想。又行施時，於諸凡夫衆生，起慈念想。譬如父母，瞻視病子，行施散時，其心喜悅。猶如父母，見子病愈，想既施散之後，其心施捨。猶如父母，見子長大，能自養活。想是真人童子，於慈心中布施食時，常作是念：我今所施，悉與一切凡夫共之。以是義故，令諸凡夫，得大智食，勤心迴向無上大乘元陽妙經。願諸凡夫、一切衆生，平等一想，得善智食，不求高貴富饒之人乞求飲食。願諸凡夫衆生，得食吾食，不求他食。願諸凡夫、一切衆生，悉得自然之食，皆令飽滿，攝取無礙，增於善根。願諸凡夫、一切衆生，解達空相，得無礙身，猶如虛空。願諸凡夫、

一切衆生，常爲受者，憐愛一切，爲衆福田。善男子，真人童子修慈心時，凡所施食，應當堅發如是無上正真等願。復次，善男子，真人童子於慈心中布施漿時，常作是願：我今所施，悉與一切凡夫衆生共之。以是義故，令諸凡夫衆生趣大乘河，飲八種味水，速悟無上正真之道，離諸疑滯，斷煩惱業，渴仰法味，愛樂大乘元陽經典，具足法身，得諸法藏，入於甚深智慧大海。願諸凡夫、一切衆生，得甘露水，飲醴泉味，真道出世，皆得清淨，如是諸法。願諸凡夫、一切衆生，具足無量百千法味，具法味已，得見道性，見道性已，能雨法雨，雨法雨已，道法徧覆，猶如虛空。復令其餘無量衆生，得一法味，所謂大乘，非諸邪見。衆生異種差別，非善之味。善男子，真人童子於慈心中布施飲時，應當堅發自然之誓，如是等願。復次，善男子，真人童子於慈心中施諸衣服錦繡，車乘卧具，常作是願：我今所施，悉與一切凡夫衆生共之，以是因緣，普令一切凡夫衆生成於大乘元陽

之果，得住大乘元陽之果，不退大乘元陽之果，不有動轉大乘元陽之果。善男子，於慈心中施諸衣服錦繡，車乘卧具時，常應如是堅發誓願。復次，善男子，真人童子於慈心中布施衣時，常作是願：我今所施，悉與一切凡夫衆生共之，以是因緣，令諸凡夫、一切衆生得慙愧衣，法界覆身，裂諸邪見，衣服離身，得清淨身，所受諸觸，淳善無礙，顏色溫潤，肌膚柔軟，恒光無色。願諸一切凡夫衆生，皆得無色之身，過諸色境，得入無色大乘祕藏。善男子，真人童子於慈心中布施衣時，應如是念，堅發自然誓願。復次，善男子，真人童子於慈心中布施百和寶香時，常作是願：我今所施，悉與一切凡夫衆生共之，以是因緣，令諸凡夫、一切衆生聞其香薰，皆得悟道。願諸凡夫、一切衆生，形如皎月，所見諸色，微妙第一。願諸凡夫、一切衆生，皆獲一切，萬善莊嚴。願諸凡夫、一切衆生，隨意得見可意之色。願諸凡夫、一切衆生，常值名友，得無礙香，離諸穢氣。願諸凡

夫、一切衆生，具諸善業，無上貴寶。願諸凡夫、一切衆生，知識和悅，無有憂惱，悉悟苦空，不相愛念。願諸凡夫、一切衆生，持無礙法，香氣苾芴，布滿世界。願諸凡夫、一切衆生，得堅固法，無悔恨法，一切戒法，離諸破法，悉得無法，未曾有法，無師法，無作法，無穢法，無污法，染竟法，畢竟法，得平等法，塗割善惡，等無偏愛。願諸凡夫、一切衆生，得無上法，大乘之法，非小乘法。願諸凡夫、一切衆生，具足自然道果，猶如真人初得法時。願諸凡夫、一切衆生，悉爲布施、持戒、忍辱、精進、神妙，香華之所薰修。願諸凡夫、一切衆生，皆得成就元陽上品微妙寶香，其寶香氣，徧滿虛空。願令凡夫、一切衆生，純食元陽上品大乘香膳，如蜂採花，取其香味。願諸凡夫、一切衆生，得成自然無量功德所被之身。善男子，真人童子於慈心中布施香時，常當堅發如是自然誓願。復次，善男子，真人童子於慈心中施榻席時，常作是願：我今所施，皆與一切衆生共之，以

是因緣，令諸凡夫得天中所卧之榻，得大智慧，坐四如意處，卧於真人之榻，不卧邪魔非法之榻。願諸凡夫得安穩卧，離生死席，成自然師子卧榻。願諸凡夫坐此榻已，復爲其餘無量凡夫示現神通，有大智力。願諸凡夫住此元陽大宮，爲諸凡夫演說道法。願諸凡夫坐無上榻，不爲世法之所降伏。願諸凡夫得忍辱榻，離於生死、饑餓、困苦。願諸凡夫得無畏榻，永離煩惱，一切怨賊。願諸凡夫得清淨榻，專無上正真之道。願諸凡夫得善法榻，常爲善友之所擁護。願諸凡夫得左脇卧榻，依於聖人所行之法。善男子，真人童子於慈心中施榻席時，應當堅發如是誓願。復次，善男子，真人童子於慈心中施屋宅時，常作是願：我今所施，皆與一切凡夫共之，以是因緣，令諸凡夫處大乘屋，修行善友所行之行，修大悲行、度妙行，諸天真人所行之行，無邊廣大，如虛空行。願諸凡夫皆得正念，遠離惡想。願諸凡夫悉得安穩，住常樂淨，永離四傾。願諸凡夫悉皆受

持微妙文字。願諸凡夫必爲無上一切智屋。願諸凡夫悉皆得入觀喜甘露法屋。願諸凡夫初中後心常入元陽清淨之宅。願諸凡夫於未來世，常處真人所居宮室。善男子，真人童子於慈心中施屋宅時，常當堅發如是誓願。復次，善男子，真人童子於慈心中施燈明時，當作如是願：我今所施，悉與一切凡夫共之，以是因緣，令諸凡夫光明無量，安住道法。願諸凡夫常得明朗。願諸凡夫得色光澤，微妙第一。願諸凡夫肉眼清淨，無有翳障。願諸凡夫得大惠炬，善解無我，無凡夫相，無人無命。願諸凡夫皆得了見清淨法性，猶如虛空。願諸凡夫其目明皎，遠見十方恒河世界。願諸凡夫得法光明，徧照十方無量國土。願諸凡夫得無礙明，皆悉得見清淨法性。願諸凡夫得大智明，破一切闇及有邪魔。願諸凡夫得無量光明，普照無量無邊諸天世界。願諸凡夫燃大乘法燈，離小乘見。願諸凡夫所得光明，滅無明闇，過逾千日。願諸凡夫得大光明，徧照三千世

界，所有幽闇，皆悉朗徹。願諸凡夫具足五眼，悟於法相，成無上師。願諸凡夫不見無明。願諸凡夫悉得大乘元陽微妙光明，示悟凡夫真人實法之性。善男子，真人童子於慈心中施燈明時，常應堅發如是誓願。善男子，諸天真童子慈為根本，修習慈心，能生如無量善業。所謂穢惡，出息入息，無常生滅，四聖果處，五種善業，三達觀行，八種功德，一切入空，無有形相。知他人智及諸神通智，本際智，仙人智，童子智，真人智，天尊智。善男子，如是等法，慈為根本。以是義故，慈是真實，非虛妄也！善男子，能為善者，名實思微，實思微者，即名為慈。慈即天尊，慈即大乘，大乘即慈，慈即天尊。善男子，慈即自然，慈即真道，真道即慈，慈即天尊。善男子，慈即仙人，仙人即慈，慈即天尊。善男子，慈者能為凡夫、一切衆生作於父母，父母即慈，慈即天尊。善男子，慈者乃是不可思議諸法境界，不可思議諸法境界，即是慈也。當知慈者，即是天尊。善男子，

慈者即是凡夫法性，如是法性，久為煩惱之所覆蔽，故令凡夫不得睹見。法性即慈，慈即天尊。善男子，慈即太虛，太虛即慈，慈即天尊。善男子，慈即虛空，虛空即慈，慈即天尊。善男子，慈即是常，常即是真，真即是道，道即是慈，慈即天尊。善男子，慈即是喜，喜即是仙，仙即是法，法即是慈，慈即天尊。善男子，慈即是清，清即是淨，淨即是道，道即是法，法即是慈，慈即天尊。善男子，慈即是我，我即是道，道即是法，法即是士，士即是慈，慈即天尊。善男子，慈即甘露，甘露即是慈，慈即法性，法性即是道，道即是士，士即是慈，慈即天尊。善男子，慈者即是真人無上之道，道即是慈，慈即天尊。善男子，慈者即是諸天聖人無量世界，無量世界即是慈也，當知是慈，即是天尊。善男子，慈若有無，非有非無，無如是慈，非諸下仙初學等能思議。善男子，慈若不可思議，法不可思議，法性不可思議，天尊亦不可思議。善男子，真人童子住於大乘妙苑

修如是慈，雖復安於睡眠之中而不睡眠，勤精進故。雖常明了亦無明了，以無眠故。於其眠中，諸天雖護，亦無護者，不行惡故。眠不惡夢，無有不善，雖睡眠故。命終之後，雖得生天亦無所生，得自在故。善男子，夫修慈能得成就如是無量無邊功德。善男子，是大元陽上品微妙經典，亦能成就如是無量無邊功德，諸真人亦得成就如是無量無邊功德。靈華真人白天尊言：一切真人童子，所有思微，悉是真實，下仙晚學，非真實者。一切衆生，何故不以真人童子威力等受快樂？若諸衆生，實不得樂，當知真人所修慈心為無利益。天尊言：善男子，真人之慈，非不利益有諸衆生。一切凡夫，或必受苦，或有不苦，若有衆生必受苦者，真人之慈為無利益。謂一切凡夫，若有受苦不必定者，真人之慈則為利益，令彼衆生悉受快樂。善男子，譬如有人，遙見猛獸毒蟲，自然生於憂怖，夜行見鬼，亦生恐懼。善男子，如是諸人，自然怖畏。衆生如是見修慈者，自

然受樂。善男子，以是義故，真人修慈是實思微，非無利益一切衆生。應當至心供養，讀誦元陽觀行上品妙經，深解慈悲喜捨之心，皆得度脫，登無上自然大道之果。善男子等，勿得輕慢，疑惑邪心，不信經教，訾毀聖文；若有心生不信，當墮三惡道中，畜生之報。於是靈華真人、神仙眷屬、善男子等，既得明了，心無疑滯，一時恭敬作禮，左繞三匝，稽首而去。

太上靈寶元陽妙經卷之五

①義：當作「議」。

太上靈寶元陽妙經卷之六

觀行品中

爾時元陽妙樂真人與諸天大衆、神仙眷屬、八萬四千童子，俱會元陽世界，設大高座，香華伎樂，幡幢寶蓋，萬種羅列，徧滿虛空。一時剖析玄微，元陽祕藏，得使來生男女，咸聞聖教。天尊於是發大慈悲，動諸光相，演說微密經典，開悟衆生：如世間知者，我亦得知，世間不知者，我亦悉知。其義云何？善男子，一切世間，不知、不見、不覺道性，若有知見、知覺道性者，不名世間，名爲真人。世間凡夫，亦復不知、不見、不覺三十六部尊經，三十六種因緣，元陽上品觀行之義，若能知見覺者，不名世間，當名真人。善男子，是名世間不知見覺。云何世間所知見覺？所謂造化之法主，世界終始，斷常二見，說言初心，至非非想，名爲真道。善男子，是名世間所知見覺。真人童

子於如是事，亦知見覺。真人如是知見覺已，若言不知、不見、不覺，是爲虛妄。虛妄之法，則爲是罪，以是罪故，墮於地獄。若男若女，說言無道，當知是輩，則名爲外魔之親屬，名爲毀謗道法。如是毀謗法者，名謗天尊，如是之人，即墮三惡道中，非人之類，受諸苦報。爾時妙樂真人及諸法衆，聞是事已，即以讚歎而作偈言：

恩愛愍衆生，爲我說元陽。善拔衆毒箭，故稱大醫王。世醫所療治，雖差還復傷。天尊所治者，究竟得無殃。聖人甘露藥，是諸神妙漿。衆生既服已，不死亦不亡。天尊今爲說，剖析隱密章。衆生聞祕藏，即登自在場。

妙樂真人說是偈已，即啓天尊：如尊所說，一切世間，不知見覺，元陽童子，悉能知見覺者。若使元陽童子是世間者，不得說言世間不知、不見、不覺，唯是元陽童子能知見覺，若非世間，有何異相？

天尊言：善男子，言真人童子者，亦是世間，亦非世間，不知見覺者，名

爲世間，知見覺者，不名世間。汝言有何異者，我今當說。善男子，若男若女，若有初聞是元陽上品觀行妙經，即生敬信，發無上正真大道之心，是則名爲世間童子。一切世間，不知見覺，如是童子亦同世間不知見覺。童子聞是經已，知有世間不知見覺，應是童子所知見覺。知是事已，即自思惟，我當云何方便修習，得知見覺？復念念言：唯當至心修持法戒。善男女，以是因緣，於未來世在<sup>①</sup>處，常無驕慢、邪見、疑網，終不說言天尊，畢竟入於玄妙，是名真人。修持戒行，行既清淨，次修真法，故在生處，正念不忘。所謂一切衆生，悉有道德性；三十六部尊經，天尊真人，常樂我淨，一切真人童子，悉見道性。如是等事，憶而不忘，因修定故，得十二空，是名真人童子。修清淨法戒，法戒已備，次修淨慧，以修淨慧故，所受持法戒牢固不動。善男子，譬如玉京之山，不爲四風之所搖動，真人童子亦復如是，不爲四倒之所傾動。善男子，真人爾時自知見覺，所持法戒

無有傾動，是名真人所知見覺，非世間也。善男子，真人所持法戒牢固不動，心無悔恨故，心得歡喜。得歡喜故，心得悅樂。得悅樂故，心得安穩。心安穩故，得無動定。得無動定故，得實知見。得實知見故，厭離生死。厭離生死故，便得自在。得自在故，明曉道性，是名真人所知見覺，非世間也。善男子，是名世間不知見覺，而是真人所知見覺。妙樂真人復言：云何元陽童子修持法戒，心無悔恨，乃至明了見於法性？

天尊言：善男子，世間戒者，不名清淨，何以故？世間戒者，爲於有故，性不定故，非畢竟故，不能廣爲一切衆生，以是義故，名爲不淨。以不淨故，有悔恨心。以悔恨心故，心無歡喜。無歡喜故，則無悅樂。無悅樂故，則無安吉。無安吉故，無不動定。無不動定故，無實知見。無實知見故，則無厭離。無厭離故，則無解脫。無解脫故，不見法性。不見法性故，終不能得無上大道之果。是名世間法不清淨。善

男子，真人童子清淨法者，法非法故，非爲有故，定畢竟故，爲衆生故，是名真人法清淨也。善男子，真人童子於法戒中，雖不欲生無悔恨心，無悔恨心故，自然而生。善男子，譬如有人，執持明鏡，不期見面，面像自現；亦如農人散種良田，不期生芽，而芽自生；亦如燃燈不期滅闇，而闇自滅。善男子，真人童子能持法戒，無有悔恨之心，自然而生，亦復如是。以淨法故，心得歡喜。善男子，如端正人自見面貌，心生歡喜，能持法戒者，亦復如是。善男子，破法戒之人，見法戒不淨，心不歡喜，如形殘跛陋者，自見形像面貌，不生歡悅。破法戒之人，亦復如是。善男子，譬如牧牛，有二人一持酪餅，一持漿餅，俱共詣市而欲賣之，於路脚踏，一餅俱破，一則喜悅，一則愁惱。持戒破法，亦復如是。能用心恭敬持淨法戒者，心生歡悅，心生歡悅故，則便思惟天尊諸法中說有能持清淨法戒者，則得真道。我今修習如是法戒，亦應得之。以是因緣，心則歡樂。元陽

真人復言：喜之與樂，有何差別？善男子，不作惡時，名為喜悅，心持法戒，名之為樂。善男子，觀於生死，則名為喜，見於法相，名之為樂。下名為喜，上名為樂。離諸共法，名之為喜，得不共法，名之為樂。以汝戒淨，故形貌輕柔，口無麤過。真人童子，爾時若見若聞，悉無諸惡，以無惡故，心得安穩。以安穩故，則得靜定。得靜定故，得實知見。得實知見故，厭離生死。厭生死故，則得逍遙。得逍遙故，得見法性。見法性故，得於真道。是名真人童子清淨持於法戒，非世間法戒。何以故？善男子，所受持清淨法戒，五法佐助。云何為五法佐助？一者信，二者慙，三者愧，四者善知識，五者宗敬真法。離五蓋故。所見清淨，離五見故。心無疑滯，離五疑故。云何名五疑？一者疑道，二者疑法，三者疑真，四者疑戒，五者疑不放逸。真人爾時即得五根，所謂信念精進定慧。得五根故，得五種真法。謂色逍遙乃至識逍遙，是名真人童子清淨持戒，非世間

有也。善男子，是名世間之所不知見覺，而是真人所知見覺。善男子，若我弟子受持讀誦元陽上品經，有破戒者，有人呵責輕賤毀辱，而作是言：若元陽奧藏大乘經典有威力者，云何今汝毀謗所受法戒？若人受持元陽妙經毀禁戒者，當知是經為無威力。若無威力，雖復讀誦，為無利益。若是輕毀元陽經故，令無量無邊衆生墮於地獄。受持是經而毀戒者，則是衆生大惡知識，非我弟子，是諸邪魔眷屬。如是之人，我亦不聽受微妙經典，不以毀戒謗法，受持修習。善男女，若我弟子中，有人能精進受持、讀誦、書寫、演說元陽祕藏大乘經者，當正身心，慎莫調戲，輕躁舉動。口為調戲，心為輕動。求有之心，名為輕動，身造諸業，名為調戲。若我弟子中，求有造業，不應受持是元陽經品微妙之義。若是受持經者，人當輕呵，而作是言：若天尊祕藏大乘輕有威力者，云何令汝求有造業？若受持經者，求有造業，當知是經為有威力。若無威力，雖復受持讀誦，

為無利益。緣是輕慢元陽經故，復令無量無邊衆生墮於三塗地獄。受持讀誦是經求有造業，則是衆生大惡知識，非我弟子，是邪魔親屬。復次，善男子，若我弟子中，有人讀誦書寫演說大乘經義，莫非時說，莫非法說，莫不淨說，莫輕心說，莫滅道法說，莫熾然法說。善男子，若我弟子受持是經，非時而說乃至熾然世法說者，人當輕呵，而作是言：若元陽祕藏大乘經有威力者，云何令汝非時而說乃至熾然世法而說？若持經者作如是說，當知是經為無威力。若無威力，雖復讀誦，為無利益。緣是輕慢大乘經故，令無量衆生墮於地獄。受持是經，非時而說乃至熾然世法而說，則是衆生大惡知識，非我弟子，是邪魔眷屬。善男子，若欲受持讀誦者，說大元陽經者，說法性者，說大乘祕藏者，說神仙經者，說童子得道者，說逍遙解脫者，見法性者，先當清淨其身。淨故，則無呵責，無呵責故，令無量人於元陽經生清淨心，恭敬讀誦受持是經。若聞一偈、一句、一

字，嗟歎歡喜，爲人演說，開悟衆生，便得無上正真大道之心，當知是人則是衆生真善知識，是我弟子，非爲外魔眷屬，是名真人也。善男子，善女人，是名世間之所不知、不見、不覺，而是真人知見覺。復次，善男子，云何名一切世間所不知見覺而是真人所知見覺？所謂六念處。何等爲六？一者念天尊，二者念真人，三者念童子，四者念法戒，五者念道士，六者念慈悲。善男子，云何念天尊？聖人應正徧知，明行足，善逝世間，解無上士，調御天人師，常不變易；具足威力，身無所畏，畢竟清淨，到於彼岸；無能勝者，無見傾者，無有怖畏，不驚不恐，無侶無師，自悟疾知；大智、利智、深智、解脫智，成就人王，調御天人師，爲大施主，爲大法師。以知法故，名大法師。以知義故，名大法師。以知時故，名大法師。以知足故，名大法師。以知我故，名大法師。知衆生種種性故，名大法師。知一切衆生諸根利鈍中故，名大法師。說元陽妙道故，名大法師。復次，妙樂

真人上白天尊言：云何爲應？天尊答曰：世間之法，悉名怨家，法應害故，故名爲應。夫四魔者是。善男子，怨天尊爲善男子時，能以智慧破壞四魔，是故名應。復次，應者，名爲遠離，爲善男子時，應當遠離無量煩惱，故名爲應。復次，應者，名樂。過去天尊爲善男子時，雖於無量劫爲衆生故，受諸煩惱，終無不樂，而常樂之。天尊亦爾，是故名應。又復，應者，一切人天，應以種種香華伎樂而供養之，故名爲應。云何正徧知？正者，名不顛倒；徧知者，於顛倒中無不通達。又復，正者，名爲苦行；徧知者，知因苦行，定有苦果。又復，正者，名世間中；徧知者，畢竟定知修習中道，得於無上正真之果。又復，正者，名爲可數可量；徧知者，不可數，不可量。是故號天尊爲正徧知。善男子，假使真乘於無量劫，觀一色不除，不能盡知，以是義故，無有徧知。云何明行足？明者，名得無量善果；行，名脚；足，善果者，名無上正真之道。是故名爲明行足。又復，

明者，名呪；行者，名吉；足者，善男子，是名世間義。呪者，名爲解脫，吉者，名爲無上正真之果，是故名爲明行足。又復，明者，名光；行者，名業；足者，善男子，是名世間義。光者，名不放逸，業者，皆得自在之果。又復，明者，名爲三明。云何爲三明？一者真人明，二者天尊明，三者無明明。真人明者，即是自然之果。天尊明者，即是慧眼。無明明者，即是畢竟空。行者，於無量劫爲衆生故，修諸善業。足者，明見法性。以是義故名明行足。云何善逝？善者，名高；逝，名不高。善男子，是名世間義。高者，名爲無上正真大道；不高者，即是天尊心也。善男子，心若高者，不名天尊，是故天尊名爲善逝。又復，善者，名爲善知識。善男子，是名世間義善知識。善知識者，即是初發心，果名爲元陽上品天尊。不捨最初發心，得大妙經，是故天尊名爲善逝。善男子，是世間義，名見法性，得深妙理，善男子，真道之性，實非有也，天尊因世間故，說言是有。

善男子，譬如有人，實無有人，實無有子，謬稱有人；實無有道德，謬言有道德。真法亦爾，因世間故，謬言是有。真人成無上道，故名善逝。云何名無上士？上士者，名之爲斷。無所斷者，名無上士。天尊真人，無有煩惱，故無所斷，是故號天尊爲無上士。又上士者，名爲鬪爭，無上士者，無有鬪爭。聖人無爭，故號天尊爲無上士。又上士者，名語可壞，無上士者，語不可壞。天尊所言，一切衆生所不能壞，是故號天尊爲無上士。又上士者，名爲上座，無上士者，爲無上座。三世聖人，更無過者，是故號天尊爲無上士。爾時妙樂真人，心復有疑，諮問天尊。云何調御大丈夫天人師？天尊答曰：一切真人童子，若能修於四法，則名大丈夫天人師。何等爲四？一者，依善知識，修學真法。二者，心能聽法，深解妙意。三者，思惟玄義，無有疑難。四者，遵於法戒，行能伏物。善男子，具是四法，則名大丈夫，無此四法，則不名爲大丈夫。何以故？身雖是丈夫，心懷

諂曲，意有邪姪，是故不得稱爲大丈夫。天尊威力，能調伏衆生，令知正法，是故號曰調御大丈夫天人師。復次，善男子諮問天師云：何謂調御天人師？天尊曰：師有二種，一者善教，二者惡教。我今以善法教諸衆生。何等善法？謂身口意，善哉！今教諸衆生作如是言。善男子，汝當遠離身不善業，何以故？以身惡業是可遠離得自在，是故我以此法教汝。若此惡業不可遠離得自在者，終不教汝令遠離也。若諸衆生離惡業，已墮三惡道者，無有是處。以能遠離，成無上正真之果，是故我今常以此法教化衆生。口意亦爾，是故號曰天人師。復次，昔未得道，今以悟解，以所得道，爲衆生說。從本已來，未修善行，今以修竟，以所修爲衆生說。自破無明，復爲衆生破滅無明。自得淨眼，復爲衆生破除盲冥，令得淨眼。自知二智，演說二智，既自解悟，復爲衆生說解悟法。自度無量無邊生死大海，復令衆生皆悉度脫。自得無礙，復教衆生令無怖畏。

自得無上正真之道，復爲衆生演說無上正真之道。是故號天尊爲調御天人師。復次，善男子心又生疑，輒敢諮問：云何名天？答曰：天者，名晝，晝長夜短，是故名天。又復，天者，名無愁惱，常受歡樂，是故名天，又復，天者，名爲燈明，能破黑闇而爲大明，是故名天。亦以能破惡業黑暗，得諸善業而生天上，是故名天。又復，天者，名吉，以吉禎故得名爲天。又復，天者，復名爲日，日有光明，故名日爲天。以是義故，名爲天也。人者，名爲能，多恩義。又復，人者，身口清香。又復，人者，名有傲慢。又復，人者，能破傲慢。善男子，我今雖爲一切衆生無上調御師而經中說爲天人師，何以故？善男子，諸衆生中，唯天與人能發自然道意，修十善業，能得無上正真大道之果，是故號我爲天人師。復次，善男子諮問天尊：疑心未盡，更有諮請，云何名爲大道？天尊答曰：道者，名通，既自通曉，復能通佗。善男子，譬如有人通知有賊，賊無能爲。真人童



子能通一切無量煩惱，既通子已，令諸煩惱無所能爲，是故名道爲通。以是通故，不生不老，不病不死，是名真道。善男子，當知我道法中，有大吏兵，天驕甲卒，天丁力士，能收邪魔惡鬼，一切煩惱盡皆消伏，又能成就諸善法故，有大威力徧十方故，又能種種大布施故，又於無量劫中不毀壞故。善男子，若男若女，能如是念道者，若行若住，若坐若卧，若晝若夜，若明若闇，常得不離，見諸真道。善男子，何故名爲真道應正徧知，乃至真人童子而有如是無量功德大名稱耶？善男子，真人於昔無量劫中，恭敬父母師長，於無量劫，常爲衆生而行布施，堅持禁戒，修集忍辱，勤行精進，真定智慧，大慈大悲，是故今得七十二相，八十種好，真金之體。又復，真人童子於昔無量劫中，修習信念，進定慧根，於諸師長，供養朝拜，常爲法利，不爲苦害。真人童子若持三十六部尊經，若讀若誦，若講若說，常爲衆生，令得逍遙，解脫無爲，安穩歡樂，終不自爲。何以故？真人

常修出世間心，無取捨心，無繫縛心，無生死心，無疑網心，無貪欲心，無瞋恚心，無愚癡心，無驕慢心。作如是心已，皆得清淨，深曉道源，無穢濁意，無煩惱意，無苦意，無量意，無廣大意，無空虛意，無世間意，常自在意，常解脫意，無報意，無願意，善願意，無語意，柔軟意，不注意，不退意，無常意，正直意，無曲意，淳善意。如是意已，故得無所畏，常樂我淨，是故修無上正真大道之心，是故真人童子之果。云何真人童子念法？善男子，思惟諸法，所可說法，最妙最上，因是法故，能令衆生，得見在果。唯此正法，無有時節，天明所見，非肉眼見，然不可以譬喻爲比。不生不出，不住不滅，不始不終，不去不來，不動不轉，不長不短，永斷諸樂而安穩樂，畢竟微妙。非色斷色而亦是色，乃至非識斷識而亦是識，非業斷業而亦是業，非結斷結而亦是結，非界斷界而亦是界，非有斷有而亦有，非出斷出而亦是出，非入斷入而亦是入，非因斷因而亦是因，非果斷果而亦是

果，非真斷真而亦是真。作是觀行，即能體達苦空，成於妙道。復次，非虛非實，斷一切實而亦是實；非生非滅，永斷生滅而亦是滅；非相非非相，斷一切相而一<sup>③</sup>是相；非教非不教而亦是教；非怖非不怖，斷一切怖而亦是怖；非忍非不忍，永斷一切忍而亦是忍。如是一切法，永能除一切煩惱，永能消息，清淨無相，永斷諸相。無量衆生，畢竟住處，能斷一切生死。熾然乃是天尊所遊居處，常不變易。是名真人童子念法。云何念法？諸天真人，如法而住，不可破壞，無能撓害，不可思議。一切衆生，橋梁福田，雖爲福田，無所受取，清淨無穢，無惡其意，調和平等，一心無有二見，常不變易，無有撓觸。是名念法。云何念戒？真人童子，思惟有戒，不破不犯，不壞不雜，雖無形色而可護持，雖無觸對，善修方便，可得具足，無有過咎。真人童子之所讚歎，皆獲無量妙因。善男子，若能修持淨界，一切劫盜，不敢撓害，火不能焚，水不能漂。若修是戒，得自然之

果，則得無上正真大道之心，當爲一切衆生廣說妙法而作救護，是名真人我念戒。云何念施？真人深觀此施，乃是無上正真大道之因。諸善男子，親近修集如是布施，我亦如是親近修習。若不惠施，不能莊嚴供養四部之衆；施雖不能畢竟斷結，而能除破見在煩惱。以施因緣故，常爲十方無量無邊恒河沙數世界衆生之所讚歎。善男子，施衆生食則施其命，以是果報，得道之時，常不變易。以施樂故，成道之時，則得安樂。童子施時，如法求則，不侵彼施此，是故成道，得清淨之果。真人施時，令諸衆生不求自得，是故成道，得自然果。我以施因緣，令他得力，是故成道，得二種施因緣。令他得語，是故成道，得三種善根。真人童子，修習此施，爲無上因。我亦如是，修習布施，爲真善因。是名念施。云何念天？有九天神仙處，乃至非想非非想，多聞、布施、智慧，得九天神仙處，乃至得非想非非想處。我亦有分，然非我欲。何以故？九天神仙處，乃

至非想非非想處，皆是無常。以無常故，生老病死，以是義故，非我所欲。譬如幻化，誑於愚夫，智慧之人，所不惑著。如幻化者，即是九天神仙處，乃至非想非非想處。愚者即是一切凡夫，我則不同凡夫愚人。我曾聞有第一義天，謂諸真人童子，常不變易，以清淨常住故，不生不滅，不老不病不死。我爲衆生，精勤志求第一義天。何以故？第一義天，能令衆生除斷煩惱，猶如意樹，若我有信，乃至有慧，則能得是第一義天。是名真人念天。善男子，是名真人非世間也。是爲世間不知見覺，而是真人所知見覺。善男子，若我弟子，謂受持、讀誦、書寫、演說元陽上品微妙祕藏經典，及以受持、讀誦、書寫、敷演、解說大乘經教等無差異者，是義不然。何以故？善男子，元陽經者，即是一切諸天真人神仙甚深祕藏，以是諸天真人甚深祕藏，是則爲勝。善男子，以是義故，元陽妙經甚奇微妙，不可思議。妙樂真人白天尊言：我今亦知元陽妙經甚奇微妙，不

可思議，道法尊高，不可思議，真人童子，亦不可思議。以何義故，復言真人不可思議？善男子，無有教者而能自發無上道心，既發心已，勤修精進，正使大火焚燒身首，終不求救，捨念法心。何以故？真人童子常自思惟，我於無量劫中，或在三塗地獄畜生之中，天上人間，爲諸劫火所燒，初未曾得一決定法，決定法者，即是無上正真大道之因，終不護惜身心與命。我今爲無上正真大道，正使碎身，猶如微塵，終不放捨勤修精進也。何以故？勤精進心，即是無上正真大道之因。善男子，如是真人未見無上正真大道，乃能如是不惜身命，況復見已，是真人不可思議。又復，真人童子，所見生死，無量無邊，諸惡過患，非是一切邪魔所及。雖知生死，無量無邊，諸惡過患，爲衆生故，於中受苦，不生厭離。是故復名不可思議。真人童子，爲衆生故，雖在地獄受諸苦惱，託跡同凡，故名受苦不可思議。善男子，譬如長者，其家失火，長者見已，從舍而出，諸子在後，未

脫火難，長者爾時，定知火害，爲諸子故，旋還救護，不見其難。真人童子，救護衆生，亦復如是，雖知生死，多諸過患，爲衆生故，處之不厭。是故復名不可思議。善男子，無量無邊一切衆生，發自然道意，見生死中，多諸過患，心即退悔，歛閉六情，絕除五欲，修於妙道，思念真經。是故復名不可思議。善男子，若有唱言，我能浮度大海，如是之言，不可思議不？天尊曰：如是故？若人度者，則不可思議；如妄言度者，即名可思議。善男子，我今所說，論其實錄，必無虛謬。天尊言：人中亦有可思議者，不可思議者。天尊曰：人有二種，一者聖人，二者凡人。凡夫之人，則不可思議；賢聖之人，則可思議。善男子：我說凡夫，不說聖人。天尊曰：若凡夫之人，實不可思議。善男子，凡夫之人，實不能度大海水也，而是真人，實能度彼生死大海。是故復名不可思議。善男子：若有人能將藕絲曳懸玉京山者，可思議不？

天尊曰：善男子，於一念頃，悉能稱量一切生死，是故復名不可思議。善男子，我於無量劫中，常觀生死無常、無樂、無淨，而爲衆生分別演說常樂我淨，雖如是說，然非邪見。是故復名不可思議。善男子，如人入水，水不能溺，入猛火，火不能燒，如是之事，不可思議。真人童子，亦復如是，雖處生死，不爲生死之所惱害。是故復名不可思議。善男子，人有三品，謂上中下。云何名爲上中下？下品之人，初入胞胎時，作是念言：我今在廁，衆穢歸處，諸死屍間，棘刺叢林，大幽闇中。初出胎時，復作是念：我今出廁，諸穢惡處，乃至出於大幽闇中。中品之人作是念言：我今入於衆樹果林，清淨河中，閨閣宮宅。出時亦爾。上品之人作是念言：我昇殿堂，在鷲林間，乘於駿馬，登上高山。出時亦爾。真人童子，初入胎住時知住，出時知出，不起貪欲瞋恚之心，而未得初住之地。是故復名不可思議。善男子，元陽上品祕密奧藏，實不可思議，不可以譬喻

爲比。善男子，心亦不可譬喻比量。真人童子，無有師資受學之處，而能得是元陽上品甚深意義，得此法已，心無慳吝，常爲衆生而演說之。是故名不可思議。善男子，有身遠離非口，有口遠離非身，有非身口而亦遠離。身遠離者，謂殺、盜、淫，是名身遠離非口。口遠離者，謂離妄語、談毀經論，惡口赤舌，諂曲誹謗，是名口遠離非身。非身口亦遠離者，所謂遠離貪嫉惡妬，瞋恚邪見。善男子，是名非身非口而能遠離。善男子，不見一法，是身是業，一切過患，是諸惡業，而能遠離，是故復名不可思議。口亦如是。善男子，從身離身，從口離口，從惡離惡，從業離業，非身非口，悉能除洗，是名遠離。善男子，無有一法，能壞能作，有爲法性，異生異滅，是故此慧不能遠離。善男子，慧不能破，火不能燒，水不能溺，風不能動，地不能持，生不能生。老不能老，住不能住，壞不能壞，貪不能貪，瞋不能瞋，癡不能癡。以有爲性易生易滅故，真人童子終不生念。我以此

慧，破諸煩惱，而自說言，我破煩惱，雖作是說，非是虛妄。是故復名不可思議。妙樂真人白天尊言：今者始知真人童子深曉法藏，不可思議。道法微妙，元陽經藏，及受持者披析至理，功德深重，不可思議。

天尊曰：無上道者，住當人近，幾時而滅？善男子，若元陽祕要有四種觀行。云何爲四？一者，觀身常淨，不染穢惡。二者，觀心常定，無有異想。三者，觀諸法中，無有我相。四者，觀於萬物，一想平等。是爲四種觀行。我弟子有能受持、讀誦、書寫、演說其義，爲諸衆生之所恭敬、尊重、讚歎，種種供養，當知爾時，道緣未滅。善男子，若元陽經具足流布，當爾之時，我諸弟子多犯禁戒，造作衆罪，不能敬信如是微妙經典，以不信故，不能受持、讀誦、書寫、解說其義，不爲衆人之所恭敬，乃至供養；見受持者，輕毀誹謗，是爲慢法，非我弟子，當知是人，將滅不久。妙樂真人復白天尊言：我親從聖人受如是經義，云何爲一慢法誹

謗道法，即當滅乎？天尊曰：聖人隱形託跡，變見無方，非是慢法而能毀謗，應滅身乎？若如是義，云何爲理？若其無者，無者說言，聖人過去。善男子，如是之義，今當重說，至心諦聽。有二種法，云何二種法？一者世法，二者第一義法。世法可求，第一義法則不可求。復有二種，云何二種？一者無常、無我、無樂、無淨、二者常樂我淨。無常、無我、無樂、無淨，則有顯晦，常樂我淨，則無顯晦。復有二種法，云何二種法？一者外，二者內。外法者，則有可顯，內法者，則無可顯。復有二種，云何二種？一者有爲，二者無爲。有爲之法，則有可得，無爲之法，則無可得。復有二種，云何名爲二種？一者可得，二者不可得。可得之法，則有始終，不可得法，則無始終。善男子，若我弟子受持、讀誦、書寫、解說元陽經典，恭敬供養，尊重讚歎，晨夕禮拜，思念神仙，當知爾時，道法興盛，無有終始。善男子，汝尚所聞真人童子有是經不？善男子，元陽經者，悉

是一切聖人祕藏。何以故？天尊雖說如是經典，不說法性，不說天尊常樂我淨，一切真人，不畢竟妙道，是故此經名爲元陽祕密之藏三十六部尊經。所不說故，故名爲藏，如人七寶不出外用，名之爲藏。善男子，是人所以藏積寶物，爲未來事故。何等未來事？所謂饑年積穀，狂賊侵境，值遇惡首，爲用贖命，道路艱難，財寶得時，乃當出賑。善男子，諸天尊祕密之藏，亦復如是，爲未來世諸惡道士畜不淨物，爲四衆說天尊畢竟無有滅神，虛費供養，不敬經典，如是等惡，見於世時，天尊爲欲滅是諸惡，令得遠離邪見。有能供養天尊，則爲演說是經。若是經典祕密之藏，無不見時，爾時道法興盛。善男子，元陽經典，常不變易，云何難言？元始之時，有此經不？善男子，元始之時，所有人民，悉皆淳善，智慧滋多，雖復志性未曉真道，身心清淨，調柔易化，有大威德，總持不退。善男子，今世衆生，貪慾厚重，多諸煩惱，愚癡喜忘，無有智慧，多諸疑網，信根不

立，世界不淨。一切衆生，咸謂聖人無常遷變，畢竟入於真道，是故天尊演說如是經典。善男子，聖人之法，實亦不盡。何以故？常不變故。善男子，若有衆生，我見無我，無我見我；常見無常，無常見常；樂見無樂，無樂見樂；淨見不淨，不淨見淨；真見不真，不真見真；道見非道，非道見道；生見非生，非生見生；滅見非滅，非滅見滅。味道之語，名爲魔語。實是魔語，以爲真語，如是巧黠，種種詭誑，當知此人，墮三惡道，不見善因，萬劫沉溺，無有生期。善男子，寧說以索繫縛猛風，不敢說言真道盡昧；寧言大火之中生大蓮華，不敢說言真道昧；寧說月可令熱，日可令冷，不敢說言真道昧。善男子，若真人初出，得元陽微妙無上正真大道之果，未有弟子解甚深義，而聖人隱形變化，當知是法，長久住世。復次，善男子，若真人初得大道之果，已有諸弟子解甚深義，聖人雖復變化，當知是法，久住於世。復次，善男子，若真人初出得大道之果，雖有弟子解甚

深義，無有篤信白衣忠良之人敬重道法，聖人過去，當知是法，長久住世。復次，善男子，若真人初出得於道果，已有諸弟子解深義味，多有篤信俗人敬重道法，聖人過去，當知真道，久住於世。復次，善男子，若真人初出得大道之果，已有諸弟子解甚深義，雖有篤信俗人敬重道法，而諸弟子演說經時，貪爲利益，雖復如此，終爲過去，當知此法，長久住世。復次，善男子，若真人初出得大道之果，已有諸弟子解甚深義，復有忠信俗人敬重道法，彼諸弟子凡所演說，不貪利益，度脫衆生，令歸正法，雖復如此，終爲誘引，當知是法，久住於世。復次，善男子，若真人初得道果已，雖有弟子解甚深義，復有忠信白衣清信之人敬重神仙，心念道法，而諸弟子多起爭訟，互相是非，聖人過去，當知是人，不久住世。復次，善男子，若真人初出得於妙果，有諸弟子解甚深義，復有敬信凡人尊重道法，彼諸弟子修和敬法，不相是非，遞相愛重，聖人雖復過去，當知是法，久住不

息。復次，善男子，若真人初得道果，雖有弟子解甚深義，復有敬信凡人尊重妙法，彼諸弟子，爲一切衆生演說元陽妙法，互相恭敬，不起爭訟，然去一切不淨之物，復自讚言：我今必定得於道果。聖人過去，當知此法，常當住世。善男子，若真人初得正真道果，已有諸弟子解甚深義，復有中信凡人愛重道法，彼諸弟子，能說元陽祕藏甚深經法，善修和敬，互相尊重，不去一切不淨之物，亦不自言須於妙果，聖人過去，當知此法，久住於世。善男子，汝等當知：諸法無有定相，不可測量，不可忖度。何以故？隨衆生受性利鈍，業根受識，有麤有妙。善男子，我今慈念衆生，無有偏恩貴賤之心，無有人我貪著之心，是故我今平等一相，無有二邊。善男子，譬如良醫，爲病服藥，隨其病根，應病與藥，天尊觀諸衆生煩惱病根，方便教化，令知經戒，修於正法。我今救度衆生，除煩惱業，令得清淨，無復遺餘。汝今當知聖人久住於世，非是過去，無有休息。爾時元陽世界，

神仙眷屬，皆得明了，無有疑滯。妙樂真人，既得總持，深解妙理，於是歡喜讚歎，恭敬禮拜，左繞七匝，而說偈言：

大道體玄妙，至理甚希夷，寄名真實相，隨運應明時。開度諸衆生，號曰天人師，是能合妙藥，爲世作良醫。剖析元陽教，祕密實可思，八萬諸徒衆，皆得附光威。三塗悉解脫，五苦永停悲，罪魂皆得返，餓鬼悉充饑。神仙乃交映，珠玉自相暉，策鳳往玄都，乘鸞上紫微。衆生既曉悟，無爲信可期，今日蒙恩愛，福祚永巍巍。諸天盡歡樂，稽首辭退歸。

太上靈寶元陽妙經卷之六

太上靈寶元陽妙經卷之七

觀行品下

爾時元始天尊在元陽世界寶騫林樹間，將欲遁世時，見國王名曰善種，悶絕躓地，即告大衆：我今當爲是王住世，至無數劫，不入真道。於是元陽第三真人名曰隨業，稽首上白天尊言：當爲一切衆生不入真道，何故獨爲善種國王？天尊言：善男子，是大衆中無有一人，謂我必定入於真道，善種國王定謂我當畢竟永滅，是故躓踊自投於地。善男子，如我所言，爲善種國王不入真道，如是深奧之義，汝未能解，何以故？我言爲者，一切凡夫造五逆者，又復爲者，即是一切有爲衆生，我終不爲無爲衆生而住於世。何以故？夫無爲者，非衆生故。善種國王即是具足煩惱。又復爲者，即是不見道性，若見道性，我終不爲久住於世。何以故？見道性者，則非凡夫。善種

國王即是未發無上正真大道之心。又復爲者，名爲道性，善種國王者，名爲不生，故不見道性。以不生煩惱故，則見道性，以見道性，則安住正真之道，是名不生。善男子，天尊密語，不可思議；道法玄妙，不可思議；真人清淨，不可思議；元陽經典，不可思議。爾時元始天尊放身威光，八十種好，七十二相，光明徧照，國土清涼。元陽真人與諸大衆神仙眷屬自相謂言：我今鄙陋，諸穢未盡，以何因緣，逢茲瑞相？天尊所放光明，其光本無，云何忽有？非色非無色，非相非無相，非無非不無，非有非不有，非白非黑，非青非黃，非欲度衆生，故發斯瑞，故使可見有相，可說有熱有冷，有青有黃，有赤有白。是光雖爾，實不可說，以何因緣，放此光明？時衆之中，有一第四真人名曰拘正林，答言：今此瑞相，將爲善種國王身有重疾，言世無良醫治療身心，故放光明，先治王身，然後及心。王言：真人天尊，亦見念邪。真人答言：譬如一人而有七子，是七子中一

①在：疑當作「生」。

②離五蓋故：此句上疑有漏文。

③一：當作「亦」。

子遇病，父母之心，非不平等，然於病子，心生偏愛。大王，天尊亦爾，於諸衆生，非不平等，然於罪者，心生偏愛，於遊逸者，則生慈念，不遊逸者，心則放捨。何者名爲不遊逸者？所謂天尊、真人、神仙眷屬。於諸衆生，不觀種性下賤，僮僕卑陋之人，唯觀衆生有善心者，若有善心，則便慈念。大王當知如是瑞相，即是天尊威德所被，能令衆生除煩惱熱。大王當知甘露法味，亦復如是。一切衆生之所愛樂真道，名爲甘露法味。灌洗身心，得悟真道，是謂良醫。善種大王問元陽第四真人言：我聞天尊不與惡人同止坐起，語笑談論，猶如大海不宿死屍，如青鸞赤鳳不棲雜木。我觀天尊，亦復如是。我等云何而得往見，設令見者，我身將無陷入地耶？我觀天尊，寧近虎狼、師子猛獸、大火可畏之處，終不親近四種五逆之人，是故我今若爲思念，當發何心，往見天尊？第四真人拘正林答言：大王，譬如有人饑渴欲求飲食，疾病之人求於良醫，苦惱之人求於救護。

大王思求道果，亦應如是。大王，天尊尚爲邪疑衆生說元陽祕藏，何況大王非是邪疑，而不慈悲救濟？大王言：真人，我昔曾聞，有一邪疑，不信不聞，不能觀察，不得義理，何故天尊而爲說法？真人答言：大王，猶如有人身遇重病，是人夜夢齒髮墮落，裸形露體臥糞穢中，復與亡者行住坐起，携手食噉，毒蛇滿路而從中過。是人夢覺，心生煩惱，以煩惱故，身病轉增，以病增故，家人遣使迎醫。貧乏無可遣使，形體短缺，六根不具，語其良醫，速隨我去。爾時良醫即自思惟，今見是使，相貌不吉，當知病者難可療治。復行是念：使雖不吉，當復占之，爲可醫不？於是占日候星，皆非吉祥，如是病人亦難可治。復作是念：占日候星，雖復不吉，應當觀時，秋時、冬時、日入、夜半時，又不吉，當知是病，亦難可治。復作念已，衆相不吉，雖復衆相不吉，或定不定，當觀病人，若有福德，皆可療治，若無福德，雖吉則不可治。思惟事已，尋與使俱在路。復念：若彼病

者有長壽相，則可療之，如無長壽相，則不可治。作是念已，即於路中逢二童兒鬪爭罵詈，頭面流血，或見人持火炬火，忽然自滅，或見有人斫伐樹木，或見虎狼惡獸。見如事已，復作是念：所見諸相，皆非吉祥，當知病者，難可救濟。復作是念：我若不往，則非良師，如其往者，不可救治。復更念言：如是衆相雖復不祥，我今既爲良醫，當往救濟。思惟事已，復於前路聞有哭聲，號天叩地，復聞犬鳴鳥噪，惡獸之聲，種種音響，喧動土境。聞是事已，復作是念：當知病者，難可療治。既至病家，即觀是病，或寒或熱，頭面洪腫，形容臭穢，大小便利閉塞不通，言聲喘急，眠寢不安。醫見是已，問瞻病人：病者昨來氣息是何？答言：大

瞻病人言：吾今且還，明日復來，隨病人所須，恣意勿禁。至明日，復遣使往，因即延引。言：我事未訖了，兼未合藥。智者當知如是病者，必死不疑。大王，天尊亦爾，於一邪疑，善知根性而為說法，何以故？若不為說，一切凡夫當言天尊無大慈悲。有慈悲者，名為智慧。若言無慈悲，云何說言一切智人，何以故？天尊為一邪疑而說妙法，大王當知，天尊見諸病者，常施妙藥，病者不服，非天尊無恩愛心。大王當知，邪疑之人，分別有二：一者得見在善根，二者得後世善根。天尊知有一邪疑，能於見在得善根者，則為說法，後世得者，亦為說法，今雖無益，作未來因。是故天尊為一邪疑演說元陽妙經者，復有二種：一者利根，二者中根。利根之人，於見在世能得善根。中根之人，後世則得見法。大王，譬如有人墮墜圖廁糞穢之處，在此廁中，云何得出？有善男子見而愍之，尋前捉髮，拔之令出，因善男子而能清淨。天尊恩濟，亦復如是，諸衆生墮三惡道，

方便救濟，令出三惡道。是故天尊為一邪疑演說元陽寶藏，亦復如是。爾時善種大王問第四真人拘正林：若天尊審如是者，明當選擇良時吉日，然後乃往。真人白王言：道法之中，無有選擇良時吉日。大王當知，譬如重病之人，不擇良日時節吉凶，唯求良醫，大王今病重求天尊良醫，不應選擇良時好日。大王當知，如木中之火，竹中之火，二俱相燒，無有異也，吉日凶日，亦復如是。若能念道思真，俱能消滅一切衆罪，唯願大王今日速往。爾時大王即命一臣名曰吉禎，而告之言：大臣當知吾今欲往元陽世界天尊之所，速辦供養所須之具，皆令備足。臣言：大王欲往元陽世界諮問真道，善哉善哉！所須供養之具，一切悉有。於是善種大王與其眷屬、公卿宰相、諸大臣等，各各莊嚴，淨潔衣服及諸供養，駿馬金鞍，種種車乘，齎持幡蓋、香花、伎樂，種種珍玩，無不備足，導從馬騎，有數千萬衆來詣元陽世界天尊之所，諮請真道，良醫妙藥。爾時天尊告

諸大衆言：一切凡夫為無上正真大道者，無有因緣，無先善友。何以故？善種大王若不隨順真人教化者，來月中間，必定命終，墮於三惡道。是故欲除身心之病者，莫若善友，良醫妙藥，能除重病煩惱之業。大王當知，元陽上品妙經即是一切衆生良醫妙術，當須恭敬禮拜，晨夕誦習，積年不退，必獲自然之果。爾時元始天尊告諸大衆言：善種大王猶有疑意，我今當為作決定心。時衆之中，有元陽第六真人名淨德白天尊：如先說一切諸法，皆無定相，所謂色無定相，所謂空無定相，所謂法無定相，所謂真無定相，乃至無極大道亦無定相，云何天尊今者而言為善種大王作決定心？天尊言：善哉善哉！善男子，我今定為善種大王作決定心，何以故？若王疑心可破壞者，當知一切諸法皆無定相，是故我為善種大王作決定心，當知是心為定。善男子，若彼王心是決定者，王之逆罪云何可壞？以無定相，其罪可壞，是故我為善種大王作決定心。爾時善種大王



即往香林騫樹間，至天尊所瞻視威光，相好微妙。於是口吐八種音聲告言大王。時善種顧視左右，此時衆中，誰是大王？我既罪逆，又無福德，天尊不應，稱爲大王？爾時天尊即復喚言善種大王，時王聞已，心大歡悅，即作是言：天尊今日故以慈愍於諸衆生，大慈大悲，等無差別。善種即上白天尊言：昔日疑心，今得悟解，定知天尊真是衆生無上大師。爾時元陽第六真人淨德語諸衆言：天尊已爲善種大王作決定心，得於自然果報，深疑醒悟，宿滯便開。即以所持幡蓋、香華、伎樂、供養之具，稽首禮拜，左繞三匝，却退一面。爾時元始天尊告善種大王：今當爲汝說元陽上品觀行妙法，微密之義，汝當歛意專心聽我宣說。一切凡夫，常當觀身檢行有二十種事：一者，我此身心，空虛無滿。二者，無諸善根，堪有開發。三者，我此生死，未獲和順。四者，墮墜深坑，無處不畏。五者，以何方便，得見真道。六者，云何修定，得見天尊。七者，生死常苦，無

常我淨。八者，八難之難，難得遠離。九者，恒爲冤家之所隨逐。十者，無有一善，能遮諸惡。十一者，於三惡中未解脫。十二者，具足種種諸惡邪見。十三者，亦未造立，度五逆津。十四者，生死無際，未得真趣。十五者，不作諸業，不得果報。十六者，無有我作，他人受果。十七者，不作善因，終無善果。十八者，若有造業，果終不失。十九者，因無明生，亦因而死。二十者，去來見在，常行放逸。大王雖爲人中長者，當於此身常作如是二十種觀度，作是觀已，身心清淨，無有穢惡，則得正觀。次第觀行：生相、住相、滅相。次第觀心，生住滅相。心定慧進戒，亦復如是。觀生住滅已，知心相乃至戒相，終不作諸惡，無有死畏、三惡道畏。若不用心觀察如二十種事者，心生放逸，無種不作。善種大王言：如我解天尊所說義者，我從昔來未曾觀是二十種事，故多造衆惡，造惡故，則有死畏、三惡道畏，設觀必定當墮三塗地獄。天尊告善種大王：一切諸

法，性相無常，無有決定，王云何言必定墮三塗地獄。善種大王稽首上白天尊言：若一切法無定相者，我之殺罪，亦應不定，若殺定者，一切諸法，則非不定。天尊言大王：善哉善哉！諸真人說一切諸法悉無定相，王復能知殺亦不定，是故當知殺無定相。大王，如彼所言，父王無辜枉加逆害者，何者是父？但假名衆生五陰，妄生父想於十二法、十八界中。何者是父？若色是父，四陰應非，若四是父，色亦應是。若色非色合爲父者，無有是處。何以故？色與非色，性無合故。大王，凡夫衆生於是色陰，妄生父想，如是色陰，亦不可害，何以故？色有十種，是十種中，唯色一種可見可持，亦可稱量，可牽可縛。雖可見縛，其性不住，以不住故，不可得見，不可得捉，不可稱量，不可牽縛。色相如是，云何可殺？若色是色，可殺可害，獲罪報者，餘九應非，若九非者，則應無罪。大王當知，色有三種，過去、未來、見在。過去未來，則不可害，何以故？念念滅故，如是一

色，或有可殺，或不可殺，有殺有不殺，其色不定。色若不定，殺亦不定，殺不定故，報亦不定。云何說言定入地獄？大王當知，一切衆生所作罪業凡有二種：一者輕，二者重。若心口作，則名爲輕，身心口作者，則名爲重。大王心念口說，身不作者，所得報輕。大王昔日口不教殺，唯言削足而無實想，況王不勅，云何得罪一切？諸真人亦應得罪，何以故？大王受生尊貴，良由昔日種於善根，稟道氣而生，是故今日得居王位。若王不稟善業而生，當知受報則不爲王，若不爲王，汝則不能爲國興害。若汝殺父王當有罪者，如是真人亦應得罪。若真人無有罪者，汝獨云何而得罪耶？大王往有惡心，於山遊行射獵，周徧曠野，竟無所得，唯見一仙人，五通具足，見已即生嗔恚惡心，我今遊獵，所以不得，正坐此人，驅逐令去，大王即勅左右而令殺之。其人臨終生嗔惡心，退失神通而作誓言：我實無辜，汝以心口橫加屠戮，我於來世亦當如是還以心口，而害汝命。

時王聞已，即生悔心，供養死屍。大王如是，尚得輕受，不墮地獄，況王不爾，而當地獄受果報耶？王先自作，還自受之，云何令王而得殺罪。如王所言，父王無辜者，云何言無失？有罪者則有罪報，無惡業者則無罪報。汝父先王，若無有罪，云何有報？大王於見在中，亦得善果及以惡果，是故先王亦復不定。以不定故，殺亦不定，殺不定故云何而言定入地獄？大王當知，衆生狂惑凡有四種：一者，心生貪狂一切財物。二者，樂狂欲求潤體。三者，呪狂厭有嫌疑。四者，本業緣狂貪求財物。大王應知，我弟子中有是四種狂，雖多作惡，我終不記。是人犯戒，是人所作，不至三趣，若還得心，亦不言犯。王本貪國，興此逆害，貪狂心作云何得罪？大王，如人醉酒而害其母，既醒悟已心生悔恨，當知是業亦不得報。王今貪醉，非本心作，若非本心，云何得罪？譬如幻化之師於四衢道，幻作種種服玩，男女、車馬、瓔珞、衣被，愚癡之人謂爲真實，達解之人知非真有。

殺亦如是，凡夫謂實，天尊慧眼，知其非真。大王當知，譬如山谷響聲，愚癡之人謂之實聲，達解之人知其非真。殺亦如是，凡夫謂實，天尊真人知其非真。大王，如人有怨詐來親附，愚癡之人謂爲真實，智者了達，知其虛詐。殺亦如是，凡夫謂實，天尊真人知其非實。大王，如人執鏡自見面像，愚癡之人謂爲真面，智者了達，知其非真。殺亦如是，凡夫謂實，天尊真人知其非實。大王，如熱時炎，愚癡之人謂之是水，智者曉達，知其非水。殺亦如是，凡夫謂實，天尊真人知其非實。大王，如寶聚城從地涌出，愚癡之人謂爲真實，智者曉達，知其非實。殺亦如是，凡夫謂實，天尊真人知其非實。大王，如人夢中受五欲樂，愚癡之人謂之爲實，智者曉達，知其非實。殺亦如是。大王應知殺法、殺業、殺果及以解脫，我皆了之，則無有罪。王雖知殺，云何有罪？大王，譬如有主知典酒，知而不飲，則亦不醉，雖復知火，亦不燒。然王亦如是，雖復知殺，云何有罪？大

王，有諸衆生於日出時作種種罪，於月出時復行劫盜，日月不出，則不作罪。雖因日月，令其作罪，而此日月，實不得罪。殺亦如是，雖復因王，王實無罪。大王應知，如王宮中常勅屠羊，心初無懼，云何於彼獨生懼心？雖復人獸尊卑差別，保命畏死二俱無異，何故於羊心輕無懼，於父先王生重憂苦？大王，世間之人，是愛僮僕，不得自在，爲愛所使，而行殺害。設有果報，乃是愛罪，王不自在，當有何咎？大王，譬如元陽妙經，非有非無而亦是有，殺亦如是，雖非有非無而亦是有。慙愧之人，則是非有，無慙愧者，則爲非無。受果報者，名之爲有。空見之人，則爲非有，有見之人，則爲非無。有有見者，亦名爲有，何以故？有有見者，得感果故，無有見者，則無感果。常見之人，則爲非有，無常見者，則爲非無。常常見者，不得爲無，何以故？常常見者，有惡果報故，是故常常見者，不得爲無。以是義故，雖非有非無而亦是有。大王應知，一切衆生者，名出息入

息，斷出入息，故名爲殺。聖人隨俗，亦說爲殺。大王，色是無常，色之因緣亦是無常，從無常因生色。云何常乃至識無常？識之因緣，亦是無常，從無常因生識。云何常以無常，故苦、故空、故以空、故無我？若是無常、苦、空、無我，爲何所殺？無常者得常，聖人殺苦得樂，殺空得實，殺於無相而得真相。大王應知，若殺無常、苦、空、無相者，則與相同，相亦如殺，是無常、苦、空、無相，不入地獄。汝云何入？爾時善種大王言：如天尊所說，觀色乃至觀識。作是觀已，即白天尊言：我今始知色是無常，乃至識是無常。我本若能如是觀者，則不作罪。即稽顙恭敬上白天尊：我昔曾聞，聖人常爲衆生而作父母，雖聞是語，猶未能審，今乃定知，天尊真爲一切衆生父母。我亦曾聞王<sup>①</sup>京山王<sup>②</sup>四寶所成，所謂金、銀、琉璃、瑪瑙，若有衆馬，隨所集處，則同其色。雖聞是說，亦不審定。我今來至玉京山，則與同色者，則知識法無常，苦空無相，作是觀已，皆

悉無常。一切諸法，悉無根本，無根本者，我初不知。思念聖人，不信真道，是名無根。我今有幸得見天尊，開闡玄妙，剖析真經，所得功德，悉能毀壞衆生煩惱，諸惡之心。天尊言：大王，善哉善哉！我今知汝必能消滅衆生惡心，破壞衆生煩惱之結。大王又白天尊：若我審能明了破壞衆生諸惡心者，使我在太山二十四獄之中，無量劫中，爲諸衆生受大苦惱，不以爲苦。爾時復有無量世間衆生，不信真道，常有邪疑。愚癡之人，聞是語已，悉發無上正真大道之心。以如是等無量人民發大慈故，善種大王所有重罪，即得微薄。王及夫人後宮綵女，見王明了法相，身心清淨，悉皆同發無上自然道意。爾時善種大王白天尊言：我今未死，已得深了真宗，捨於短命而得長壽，捨無常身而得真常之身。令諸衆生發無上正真道意，即得長命真常之身，即是天尊真常弟子。說是語已，即以種種寶幢、幡蓋、香花、伎樂，種種微妙珍奇、服玩，供養天尊。復以偈頌而

讚歎言：

天尊體玄妙，道德冠太清，逍遙步金闕，容與遊玉京。時演元陽義，至理甚威靈，是名甘露藥，復號大乘經。若信及不信，受持罪自冥。慈悲救苦惱，恩愛及衆生。若能曉深義，即會玄都庭。無相寄有相，無形寄有形。一切善知識，當須盡至誠。存想一句偈，斂念除緣情，既離煩惱結，道性自然明。神仙當擁護，無憂體自輕。

爾時善種大王既蒙天尊訓誨曉示慇懃，與諸眷屬皆得曉悟元陽祕典，深知因果，作偈讚歎，奉謝天尊，禮拜都畢，左繞三匝，辭退各還本國。

### 太上靈寶元陽妙經卷之七

### 太上靈寶元陽妙經卷之八

#### 德行品

爾時元陽上品德行高貴真人尹妙林及其門徒眷屬、八種智慧第一弟子、無鞅數衆，俱會香園樹下騫木林間，稽首恭敬，遊行三匝，長跪執簡，諮問元始天尊：自顧運幸，得遇聖尊，輒敢啓問心所疑滯，伏願靈顏以見訓喻。天尊含笑：善哉善哉！要乎深矣，隨子所問，當爲解釋。妙林上啓：未審凡夫衆生作逆害罪，有道性邪？如是之人，云何復墮地獄？若如是有道性邪，云何復言無有真常之樂？若斷善根名一凡夫者，斷善根時所有道性，云何不斷道性？若斷，云何復言真常之樂？如其不斷，何故名一凡夫邪？天尊曰：犯四明科，名爲不定。毀謗元陽經，作十惡罪，及一凡夫，悉名不定。如是之人，若決定者，復何因緣得成無上正真自然大道，得九仙之果乃至明

達真人？亦名不定，若九仙果至明達真人是決定者，亦不應成無上正真自然之道。天尊若犯四盟，不決定者，九仙之品乃至明達真人亦不決定，如是乎不定，諸天大聖亦復如是。若天尊不定，元陽法性亦復如是，至一切法亦復不定。云何不定？若一凡夫除一凡夫，則成真道，諸天大聖亦應如是。入元陽品已，亦應還不入元陽。若如是者，元陽之性，則爲不定，以不定故，當知無有真常之樂。云何復言一凡夫等當入仙品？爾時無相天尊告元陽上品德行高貴真人尹妙林言：善哉善哉！善男子，爲欲利益無量凡夫、一切衆生，令獲歡喜，憐愍慈念諸衆生故，爲欲增益發自然心，諸真人道士故，作如是之問。善男子，汝已曾經親近元陽八種真人，並於天尊法中作諸善業；已得成就真道，功德摧伏魔怨，令得退散；已教無量衆生皆悉得至元陽仙品，通達大乘微妙經典；已問過去恒河沙劫諸天大聖。如是妙義，我都不見，一切世間，若人若天，初學弟子有

①王：當作「玉」。

②王：當係衍字。

能諮審天尊是義，今當至心諦聽諦聽，我當一一爲汝子細分別解析。善男子，一凡夫者，亦不決定，若決定者，是一凡夫，終不果於自然之道。以不決定，是故如汝所說道性不斷。云何一凡夫斷善根者？真人道士，夫善根者有二種：所謂內道性，外道性。非外非內，以是義故，道性不斷。復有二種：所謂有漏，無漏。道性非有漏非無漏，是故不斷。復有二種：所謂常，無常。道性非常非無常，是故不斷。若是斷者，則應還得，若不還得，是名不斷。若斷已得，名一凡夫。犯四盟者，亦是不定，若決定者，犯四盟律，終不能得無上正真自然大道。謗毀元陽大乘經典及三景法師亦復不定，若決定者，誹正法人終不能得自然妙道。作十惡罪，亦復不定，若決定者，十惡之人終不能得正真之道。色相二法，俱爲不定。香味、觸相、生相、無明相、陰入界相，一切諸相，皆悉不定。善男子，猶如幻化之師在大衆中化作種種變異，山林、樹木、城郭、聚落，而彼衆

中有諸凡夫，無有智慧，睹見之時，謂爲真實，其中賢人，知其虛誑，以幻力惑人眼目。善男子，一切凡夫乃至諸仙弟子、明達真人等，於一切法見有，實法亦復如是。諸仙真人，於一切法不見實相。善男子，猶如小兒於炎夏月見熱時盛謂之爲水，有慧之人於此熱炎，終不生於實水之想，但是虛炎誑人眼目，非實是水。一切凡夫、諸仙弟子見於諸法，亦復如是，謂言是實。諸天真人，於一切法不見實相。善男子，猶如山谷因聲有響，凡夫聞之謂是實聲，有慧之人，解無定實，但有聲相惑於耳識。善男子，一切凡夫、諸仙弟子於一切法，亦復如是見有實相。諸天真人明解諸法悉無實相，見無常相、空寂等法，無生滅相，以是因緣，真人道士見一切法は無常法。善男子，亦有定相，云何爲定？真常之樂，在於何處？所謂元陽法中。善男子，自然之果，亦復不定。不決定故，經十萬劫得無上大道自然之心。如是道果，亦得不實。不定實故，經八萬劫得正真大

道自然之心。真人之果，亦復不實，不定實故，經六萬劫得無上道心。仙人之果，亦復不實，不定實故，經四萬劫得無上道心。明達真人，亦復不實，不定實故，經二萬劫得無上道心。善男子，天尊今於甘露大城碧林樹下，示現威德、神通、智慧，令諸仙弟子、凡夫衆生，至心奉法，委意投真，讀誦元陽上品大乘經典甚深奧藏微密之義，得無上正真自然大道，修行聖行，永無退轉。善男子，凡夫不能善攝六根，則有諸漏，爲惡所牽，至不善處。善男子，猶如惡馬羸猛，能令乘者至險惡處，不能善攝六根惡業者，亦復如是，令人遠離元陽妙道，至諸惡處。猶如狂象未曾調伏，有人乘之，不隨意去，遠於善邑，至險惡處，不能善攝六根惡業者，亦復如是，將人遠離元陽善邑，至生死險惡曠野之處。善男子，猶如佞臣教王作惡，六根佞臣，亦復如是，常教衆生造無量惡。善男子，猶如頑子不用父母師長教訓，造諸惡事，不調六根，亦復如是，不受父母師長善言教訓，無

惡不作。善男子，凡夫之人，不攝六根，常爲地獄畜生餓鬼之所賊害，亦如怨盜害及善人。凡夫之人，不攝六根，馳騁六塵，猶如牧牛，不善收錄，犯人苗稼。凡夫之人，不檢六根，常在諸有，多受苦惱。善男子，真人道士修元陽上品大乘聖行時，常能善調、檢錄六根，恐怖貪欲、瞋恚、嫉妬、驕慢，爲得一切諸法故。善男子，若能檢錄六根者，則能檢心；若能檢心，則檢六根。譬如有人擁護於國王，守衛國土，衛護國者，則守於王。真人道士，亦復如是，若能聞是元陽上品大乘經典，則得智慧，得智慧已，則能專檢六根。善男子，如善牧牛，設牛放逸，東西噉他苗稼，則能遮止，不令犯物。真人道士，亦復如是，念慧因緣故，檢錄六根，不令縱恣。真人道士，有念慧者，不見我相，不見衆生相，及所受用，見一切法同法性。想生於山嶽、草木、瓦礫之相，猶如屋宅，從因緣生，無有定性。見諸凡夫，一切衆生，四大和合之所成立，推無定性。無定性故，真人於中不

生染著，一切凡夫，見有衆生，故起煩惱。真人道士修元陽經者，有念慧故，於衆生不生染著。復次，真人道士修元陽經者，不染衆生相，作種種法。善男子，猶如畫師，以衆色雜畫，若牛若馬，若男若女，凡夫無智，見之便生男女之相，畫師了知無有男女、牛馬之相。真人道士，亦復如是，於法異相觀於一相，終不生於衆生之想。何以故？有念慧故。真人道士修元陽上品大乘經者，或時睹美麗女人，終不生於愛著之心，何以故？善觀相故。善男子，真人道士知五欲相，無有歡樂，不得淹留，如狗嚙枯骨，如人持火逆風而行，如水上泡畫水之迹，如織經畫，如囚詣市，如假託勢不得久歡，欲亦如是，多諸過患。復次，真人道士，觀諸凡夫、一切衆生爲色香味觸，以是因緣，從無量劫來常受苦惱。一一衆生，一劫之中，所積身骨如妙樂山高，所飲乳汁如四海水，身所出血復多。於是六親眷屬，命終哭泣，所出眼淚，多四大海。盡地草木爲籌，以數父母，亦不

可盡。無數劫來，或在三塗地獄幽牢之中，所受諸苦，不可稱數。真人道士，如是深觀一切衆生，欲因緣故，受苦無量，真人以是生死行善，不失念慧。善男子，猶如世間有諸大衆，滿三十里間，有王名曰莊嚴，勅遣一臣名富林，那持大油盆從衆而過，莫令傾落一滴，當斬汝命。復遣一臣名曰尹林，常拔刀在後監。持油之臣，受王命盡心堅持，經歷衆生，雖見美麗女人不敢觀視，心常戰懼，我若放逸，著彼邪欲，當棄所持，命不全濟。如是之臣，以此恐怖，乃至不敢棄一滴油。真人道士，堅持禁戒，亦復如是，於生死中不失念慧，以不失因，雖見五欲，心不愛著，若見淨色，不生色相，唯觀苦相，乃至識相，亦復如是，不作生相，不作滅相，不作因相，不作緣相，觀一切法，作和合相。真人道士爾時六根清淨故，持戒具足。一切凡夫，六根不淨，不能檢持，名曰根漏。真人道士永斷諸漏，是故無漏，天尊拔出，永除根業，是得清淨。爾時真人尹妙林既聞此事，心生

歡喜，而作偈言：

凡夫及衆生，不知大乘趣，沉淪生死河，往還煩惱步，念念作諸惡，心心起疑悟，魔鬼方便侵，怨家興訟訴，受報往地獄，幽牢相禁固。一切諸罪業，非籌能譬喻，當念元陽經，受持法戒具。愆咎可得消，福德相灌注，解脫大乘門，清淨無爲路，天仙常汲引，地神恒衛護。一日及一日，讀誦如是句，歷劫離憂患，終歲無淪蠹，在所險難地，當無有畏懼。諦受五通偈，堅持於六度。今日說此頌，可爲長樂賦。

真人尹妙林說此偈訖。復次，善男子，有諸離漏，真人道士欲爲無上甘露法界故，離諸惡漏。以何因緣名之爲離？若能行元陽上品大乘經典，受持讀誦，思惟其義，是名爲離。何以故？善男子，我都不見三十六部尊經能除惡漏如是大乘經典。善男子，猶如良師教諸弟子之中有受教者不造過患，真人道士修元陽上品大乘經者，亦復如是不造過患。善男子，猶如世間有於呪術，若有毒蛇不能侵害，一切凡

夫讀誦此經，乃至壽終無有過患。善男子，是大元陽妙經亦復如是。若有衆生一經耳聞如此經者，不墮惡趣。若有書寫、讚歎、讀誦、解說、剖析微妙，當得無上正真自然大道，俱體法相，如彼聖人得甘露法味。善男子，是大元陽威力，修行讀誦，得如是道果。善男子，若有清信弟子能至心書寫讀誦是經，解說其義，爲他開演教化衆生，當知是人真我弟子；善知法教，訓喻凡夫，得知道法，是我所見，我之所愍，是人真知我說元陽經典。隨如是人所住之處，若山林曠野，城邑村落，屋舍宮宅，我亦在中，常住不變，吾於此人，常作受施，或作道士、女冠。善男子，善女人，當令是輩得知天尊受其所施財寶。善男子，是人或眠卧之中，夢見天尊聖人形象，或見諸真人之像，轉輪聖王形像，或見江山大海，日月星宿，或見金銀珍寶，衣服卧具，爾時當知即是天尊受其所施。驚寤之後，得大喜樂，尋得種種所須之物，不造過患，志願真善，是大元陽悉能成就如是

無量功德，不可思議。善男子，汝今應須受持法教微妙之語：若有善男子修行善法，恭敬於我，同於法相，受持至要，破彼惡魔無常、無樂、無我、無淨，欲得天上人中逍遙快樂者，見有受持元陽經典，書寫讀誦，爲人解釋如是經義，當往親近，恭敬禮拜，讚歎尊重，供給所須，令無乏少。此經玄妙，不可譬喻，當應盡心供養，無有退轉，不生疲厭，當得自然道果。善男子，吾念過去無量恒沙之劫，有一世界名曰清淨，有聖人號曰文始天人，神通智慧，天眼第一，爲諸大衆演說元陽上品大乘經典，我於爾時從。善男子，聞彼聖人當爲大衆開闡無上義味，我聞是已，其心歡喜，欲設供養，家貧無物，乃欲自賣，恐身無力，復畏不售。俄頃之間，路見有人而便語曰：我欲賣身，汝能買不？其人答曰：吾家作業，無人堪者，汝必能爲，吾當買汝。吾即問言：有何作業，無人堪者？其人答曰：我有惡病，良師處藥，應當服人之肉，日爲二兩。汝若能以身之肉日與一服，我當酬汝

金錢十文。我時聞已，心生歡喜。我復語云：汝惠我錢，待我五日事訖了時，便來相就。其人答曰：五日不可，若如此者，可期一日。善男子，吾於此時即取其錢，來至天尊之所，恭敬作禮，盡家所有，將以奉獻，然後至心聽讀是經。我時頑聾，雖聞此經，志願受持如是偈頌：

天尊說至要，號曰元陽經。度脫生死業，開發於幽冥。若有至心者，當得瑩心靈。心獲無上樂，屣步玄都庭。逍遙逐羽化，俯仰入雲扃。輪轉會虛寂，倏欵睹真形。南丹上生宿，北斗除死星。知我感妙道，歷劫不沉馨。

受持偈頌，心得悟解，即便還至病者之家。善男子，吾時雖復日與二兩之肉，以念偈頌，不爲苦楚。善男子，以是因緣，其病得差，我亦平復，身體皮肉悉皆具足，無有瘡痍臭穢之處，即發無上正真自然道心。偈頌之力，即有如是威力，何況天尊大聖演說元陽大乘經典，具足受持，至心讀誦。我見是經，有如是利益，當應發心，倍加念

誦，願於過去、未來、見在，得於自然道果。善男子，以是偈頌因緣，令我今者於時衆中爲諸弟子宣說元陽妙典。善男子，以是因緣，是大元陽不可思議，成就無量真善因緣，乃是諸天聖人微密奧藏。以是義故，能受持讀誦者，斷諸惡漏。所謂惡者，狂象，惡馬，羸牛，惡狗，山崖險谷，毒蟲猛獸，江水懸流，不善之輩。如是等惡若作漏因，真人爾時即復去離，若不能作，則不遠離。若增有漏，則便離之，若不增長，則不遠離。若興惡事，則便去之，若能作善，則不遠離。常以智慧而相護持，作於善法，離於惡事。真人道士自觀其身，是大苦聚，是諸一切惡業根本。是身雖復不淨如是，真人猶故觀察瞻視，何以故？非爲貪身，爲善法故，爲元陽，不爲生死，爲真常之樂，不爲無常無我。真淨爲於有道，不爲無道，爲於一乘，不爲三乘。善男子，真人道士常當護身，何以故？若不護身，命則不全，命若不全，則不能讀誦、書寫、受持、供養元陽上品大乘經義，爲人解析

思惟其義，是故真人道士應善護身。以是義故，真人得離一切惡漏。善男子，如欲濟水，善護舟航船筏之具；如臨路人，善護騎乘；如田夫布種，善念糞穢。真人道士亦復如是，雖見是身無量不淨具足充滿，爲欲受持元陽經者，莫令懈怠，厭諸善事。真人道士觀於狂象及不善者，無有等異，何以故？俱壞身故。真人道士於狂象邊，心無恐怖，於惡知識處，生畏忌心，何以故？如是狂象止能壞身，不能壞心，不善之者，二俱能壞。其狂象者，唯壞一身，不善之者，壞無量善身，無量善心。是狂象者，能壞不淨身，不善之者，能破淨身及以淨心。是狂象能壞肉身，不善之者，破於法身。狂象殺者，不至三趣，爲不善之殺者，必至三趣。如是狂象，但爲身怨，不善之者，爲善法怨。是故真人常當遠離諸不善友，不善者等。如是狂象，不善者、凡夫之人不能遠離，是故生漏，真人道士遠能離之，則不生漏。真人道士尚無諸漏，況於元始天尊具大威神而有漏乎？以何因



緣，親近諸漏？一切凡夫取受衣食、卧具、醫藥、口味，爲身心樂，求如是物，造諸過患，不知法味，輪迴三趣，是故爲漏。真人道士見如是過患，則便遠離。若須衣食，即須取受，不爲身故，但爲於法。不生傲忽，意常柔弱，不爲華麗，但爲羞恥。雖受飲食，意無貪著，不爲身故，常爲正法。不爲膚體，但爲衆生。不爲傲忽，爲身力故。不爲逆害，爲治饑渴，雖得上味，心無貪著。取受衣服，亦復如是。貪慢之結，不令在心，但爲正法，不爲壽命，爲常命故。善男子，作是思惟：我若不受如是供養，身則磨滅，不得堅固，若不堅固，則不忍苦，若不忍苦，則不能修行正道，若能忍苦，則能修行正道，無量真善。我若不能堪忍諸苦，則於苦中生於瞋恚，於樂受中生貪愛心，若求樂不得則生無明，是故凡夫於供養中生於有漏。真人道士深能觀察，不生有漏，是故真人名爲無漏。以何因緣，天尊當名有漏？是故聖人不名有漏。善男子，一切凡夫衆生雖名善護身心，

猶故生於惡想，以是因緣，雖斷煩惱，得生非非想處，終墮三塗地獄。善男子，猶如有人濟於巨海，欲至彼岸，垂沒而死，凡愚之人亦復如是，垂盡三有，還墮地獄。何以故？無善智故。何謂善智？所謂六念處。凡夫之人，善心微劣，不善猛盛；善心微劣，智心輕少；智心少故，增長諸漏。真人道士，慧眼清淨，見諸過患，有種種事，常與凡夫一切衆生作三乘怨，以是因緣，乃令凡夫不見法相，恒沙劫來生顛倒想，謂諸天聖人無真常樂，唯有清淨，天尊畢竟虛空。一切凡夫衆生，無常、無樂、無淨、無我，心生顛倒，言有真樂。真人道士應如是觀：一切真人，或時有因緣故，應生驚覺，猶如端正淨潔之人，不受穢污，如執鐵丸人無受者。善男子，至心奉道亦復如是因緣。真人道士思惟：一切凡夫衆生知我是大福田，我今云何受此惡事，若受惡法，則不堪爲一切凡夫衆生作於福田。我自不言是良福田，一切凡夫衆生見相，便言我起如是惡想，則爲欺誑一切

凡夫衆生。我於法時，以欺誑故，恒河劫中流浪生死，墮於地獄。我若惡心，受人覲施，一切聖人，皆悉證明。我若惡想，受人覲施，或令施主果報微薄，或無果報。我若是惡，受人覲施，則與施主是大怨讎。一切凡夫恒於我所起善想念，我今云何欺誑於彼而生惡想？何以故？或令施主不得福業，或少果報。我常自稱爲道士，夫道士者，不應起惡，若起惡者，則非道士。道士之體，身口相應，若不相應，則非道士。我棄恩愛、眷屬、知識，出家學道，正念修集諸善想時，非是修集不善想時。猶如有人濟海求寶，不取真珠，直取金精；亦如有人棄妙音聲而聽惡響；如捨正室而愛婢妾；如捨金器而取瓦盂；如棄甘露法味而食惡毒食；如捨善男子而親諸惡友；如棄良醫而信巫鬼；如捨元始天尊甘露法食而服魔怨種種惡味。我今已值元陽清淨法寶，難得見聞，我今已聞，猶如盲龜，值大浮木。人命危脆，猶如秋葉，今日得度，知明若爲。我今云何縱恣六情，作

於惡法？盛年壯色，俄頃斯須。我今云何而生輕傲？猶如惡魔伺人愆咎，

四大惡鬼搖動身王，亦復如是，常來伺求我之過失。云何當令惡想發起？猶如朽屋，乘至崩摧，我今性命，亦復如是。我今云何起諸惡業？我名道士之人，名之爲通知一切事，我今乃起不善之業。云何名爲道士？我名出家，出家之人，名修善道，我今作惡。云何應得名爲出家？我名真士，真士之體，名破煩惱，我不破惡想煩惱。云何當得名爲真士？世有六根，難可具足，我今已具。云何當令惡想，居心何等爲六？所謂六者：一者大道難值，二者正法難見，三者善心難發，四者中土難生，五者人道難遇，六者身根難備。如是六根，難可備足，我今已備，是故不應起於惡想。真人爾時修行如是元陽經者，常當觀察諸惡心。時一切凡夫不見如是惡心過患，故受諸漏。真人見已，不受不染，是故真人無有受漏。云何當言天尊有漏？以是因緣，一切聖人非是有漏。於是諸天真入神仙道

士，聞此事已，歡喜作禮，一時恭敬而說偈言：

我等今大衆，得聞微密義，各悟苦空性，深解元陽智。自非至學士，何由辯真僞？削落諸煩惱，消滅於瞋恚。男子及凡夫，諦聽真善譬，洗濯身心病，穢惡及漏累。一切諸神仙，稽首讚斯瑞。

太上靈寶元陽妙經卷之八

太上靈寶元陽妙經卷之九

德行高貴品

爾時元始天尊告元陽真人言：善男子，善女人，若有能修行供養無上元陽妙經，得於十種功德，不可思議，聞者驚疑。非隱非顯，非去非來，非生非滅，非難非易，非相非非相，如是法相，無有形貌，世間所無。何等爲十種功德？一者有五。何等爲五？一者，所未聞者，而能得聞。二者，既聞玄妙，能爲利益。三者，能斷諸疑，體於至理。四者，智慧之心，質直無曲。五者，深知元陽祕藏。是爲五事。何等所未聞者而能得聞？所謂甚深玄妙之義，一切衆生俱得道性，一切經法無有差別。若有善男女，至心願念所營在法究竟，得入無上正真之道，常住無變，恒無懈怠。非有爲非無爲，非有漏非無漏，非色非不色，非空非不空，非名非不名，非相非不相，非有非不有，

非因非不因，非果非不果，非明非不明，非闇非不闇，非出非不出，非常非不常，非斷非不斷，非過去非不過去，非未來非不未來，非因緣非不因緣。如是等法，甚深甚妙，甚玄甚奧，昔所未聞，而今得聞，昔所未見，而今得見。所謂一切經書，所謂一切方法，所謂一切伎藝，所謂一切科律，如是等經，昔未曾聞，今於此經，而得了悟。復有三清祕要，七部神圖，如是深奧之義，今因此經而得知之。善男子，善女人，是名所未聞者而能得聞。既得聞已，是大利益，若能讀誦受持，具自然道意，能具知一切方法、大乘經典甚深義味。譬如有人懸於明鏡，具其色像，曉了分明，無有障蔽。元陽寶鏡亦復如是，真人執持，得見元陽經典深奧之義。亦如有人處於闇室，執大炬火，悉見諸物。元陽法炬亦復如是，真人執持，得見元陽深奧之義。亦如日出暘谷，有大光明，悉能照朗，令得一切遠見虛空。是大元陽清淨慧日亦復如是，照了幽冥深邃之處，令一切衆生遠見真

道。所以者何？以能聽受是元陽上品妙經，皆獲無上道果。善男子，若有至心讀誦元陽微妙經典，得知一切諸法名諱，通達玄義，爲他廣說，開悟凡夫，能知元陽諸法至理。善男子，其聽受者，雖知元陽經字，不知元陽義理深妙，若能書寫、授持、讀誦，爲人演說，開導沉迷，令知其義，則能知其義是大利益，增長法橋。復次，善男子，聽此經者，聞有道法，未能得見，至心願念，即得悟解。書寫讀誦，爲人演說，尋思其義，則得見之。聽是元陽經者，聞有神通，未能得見，發心願念，至慕神仙，作是念已，便能知法，具諸道意，了達道源，於諸天魔、惡鬼、虎狼、毒獸怖畏之處，得無所畏，開示分別玉簡金文，丹章紫字，演說其義，無有差違，不從他聞而能自知無上正真道意。是名聞已能爲利益。又復，除疑心者，疑有二種：一者疑名，二者疑義。聽是經者，斷除疑心，思惟義者，斷疑義心。復次，善男子，疑有五種：一者，疑道虛空，有指的不？二者，疑道恍惚，是真

常不？三者，疑道隱祕，是真樂不？四者，疑道幽玄，是清淨不？五者，疑道顯晦，是實義不？聽是經者，則得永斷疑惑之心，書寫讀誦，爲人演說，思惟其義，五疑永斷。復次，善男子，疑有三種：一疑無上正真之道爲有爲無，二疑三十六部尊經爲有爲無，三疑一切妙法爲有爲無。聽是經者，如是三疑永滅無餘；書寫讀誦，爲他廣說，思惟其義，則能了知一切衆生悉有法性。復次，善男子，若有衆生不聞如是元陽經典，疑心甚多，所謂如常不常，如樂不樂，如淨不淨，如我無我，如命非命，如凡夫非凡夫，如究竟不究竟，如未來非未來，若有若非有，若苦若非苦，若樂若非樂，若道若非道，若滅若非滅，若法若非法，若真若非真。聽是經者，如是諸惑悉能除斷。復次，善男子，若有不聞如是經者，復有種種衆生多有疑心。所謂色是我邪，受質相因，識是我邪？眼能見邪，我能見邪？乃至識能知邪，我能知邪？色受報邪，我受報邪？乃至識受報邪，我受報邪？色至

他境邪，我至他境邪？乃至識亦如是？生死之法，有始有卒邪，無始無卒邪？聽是經者，如是等疑亦得永斷。復有人疑：邪見犯四盟科，作五逆罪，毀謗道經，如是等人，有法性邪，無法性邪？聽是經者，如是等疑悉得永斷。復有人疑：世間有際邪，世間無際邪？有十方法界邪，無十方法界邪？聞是經者，如是衆疑亦能除斷。是名斷疑惑之心。復次，善男子，慧心正直無邪曲者，意若有疑則所視不正。一切衆生，若不得聞是元陽上品微妙經典，所見邪疑，乃至下仙悟道之人猶懷邪曲。云何名爲一切衆生所見邪曲？於有漏中見常、樂、我、淨，於天尊所見無常、苦、不淨，無我，見有凡夫壽命長短，非有相處，非無相處，以爲元陽之宮有八聖道。有見，斷見，如是等見，名爲邪曲。善男子，善女人，若得聞是大乘經典，修行聖道，則得斷除如是邪曲。云何名爲一切邪曲？若復有人書寫讀誦，爲他演說，通解其義，則得正直，無邪曲見。善男子，修如是元陽上

品經典，知此經微妙，從無量劫來，至心修行，晨夕願念，得入無上正真之道。復次，善男子，能知元陽上品深密之義，爲他演說，曉悟衆生，悉能知道，除謗法心，盡惡逆罪然後得成無上正真道果，是名甚深祕密之義。復次，善男子，云何復名甚深之義？雖知衆生實無有我，而於未來不失業果；雖知六情於此滅盡，善惡之業終不敗亡；雖有業根，不得作者；雖有妙處，無有去者；雖有執縛，無受縛者；雖有劫濁，終無滅者，是名元陽德行高貴甚深祕奧之義。爾時元陽真人上白天尊言：如向所說聞不聞義，是義不然，何以故？道若有者，便應定有，道若無者，便應定無。無不應生有，有不應滅無。如我所聞，是則爲聞，若不聞者，則爲不聞，云何而言聞所不聞？天尊若不可聞，是爲不聞，若已聞者，則便不聞。何以故？已得聞於道故。云何而言聞所未聞，見所未見？譬如去者，至則不去，去則不至；亦如生已不生；亦如聞已不聞。天尊若不聞聞

者，一切衆生未有道心，即應有之，未得尸解，亦應得之，未見法性，應見法性。云何復言真人雖有法性，未得明了？天尊若不聞者，真人往昔曉悟，從誰得聞？若言得聞，何故真人於天尊所復言不聞？若其不聞，真人何以得稟元陽之號？若如是者，一切衆生不聞經典亦得稟元陽之號不？真人若當不聞如是經典見無上道者，一切衆生不聞是經亦應得見無上正真道不？天尊言：是色者，或可見，或不可見，響亦如是，或是可聞，或不可聞。是大變動，非色非聲，云何而言可得見聞？真人於是了然驚悟，言過去已滅，則不可聞，未來未至，亦不可聞，見在聽時，則不名聞，聞已聲滅，更不可聞，亦非未來、過去、見在。若非三世，則不可說，若不可說，則不可聞，云何而言真人修是元陽妙經聞所不聞？爾時天尊歡喜，讚歎元陽真人及諸大衆言：善哉善哉！汝今深知妙理，洞達玄微。一切諸法，如幻如化，如風如電，亦如泡沫，芭蕉之樹，空無有實，非命非我，無

有真相。時大衆中，儵歎之頃，有大光明徧照國境，非青非黃，非白非黑，爾時大衆，遇斯光已，身心快樂，譬如真人初得道果。爾時元陽真人白天尊言：今此光明從何而有？天尊嘿然不答。元陽真人心懷戰懼，逡巡不安，叩頭稽首，瞻視靈顏，輒敢諮問天尊：以何因緣，有此光明照於大衆？天尊嘿然不答。爾時無鞅數衆、浮空道士，見此明朗，自相謂言：今此光明，誰之所有？天尊又復嘿然不說。明律仙人、

總持法衆復白天尊：以何因緣，有此盛光徧照虛空，無有障蔽？如是大衆自相諮問，無能曉者。爾時元陽真人慇懃慊款，頭腦至地，泣淚和聲，低心下意，諮審尊顏，願垂開示，曉悟來生。天尊於是含笑告元陽真人曰：如是光明名爲智慧，智慧者，即是真道，真道之法，無有因緣，云何有問，有何因緣故有是光明？是光明者，名爲元陽妙法，元陽妙法者，則名爲真道，真道之法，不從緣生，云何仙人疑問，何因緣故有是光明？是光明者，即是元始智

慧，元始智慧者，即是真道之法，不從緣生，云何道士問於因緣？光明者，名爲大慈大悲，大慈大悲者，名爲元陽真道，元陽真道之法者，不從緣生，云何仙人問於緣生？光明者，即是思真念道，思真念道者，是名真道之法，不從緣生，云何仙人問於因緣？光明者，即是一切學道之人吞精咽氣、吐納服御之法，即名真道，真道之法，不從因緣，云何仙人問於因緣？光明者，即是元陽上品法燈。

天尊言：真人，汝今莫入諸法麤穢之義。我今於此東方恒河世界名曰不動之處，國土緬平，無有沙磧，其地七寶莊嚴，無有溝坑，其諸樹木華果茂盛，無時不有，若有衆生聞其華香，身心清淨，曉悟大乘，譬如仙士獲於道果。復有一大河水，其水香美，八味具足，若有衆生在中浴者，皆得清淨，了然悟道。其河有種種之華，種種之香，一切衆生聞其華香，皆得清淨，釋然悟道。復有無量虎狼獅子、諸惡鳥獸，其心相視，猶如赤子。彼世界中一切衆

生，無有犯負之者，毀謗道法及有惡逆等罪。其土調適，無有瘴癘、煩惱、貪欲、嫉妬之人，無有日月晝夜時節，猶如龍漢之運。其土人民聰明正直，無有憍慢之心，一切衆生皆悉悟道，具大功德，其心悉皆尊重正法，修於大乘，愛樂大乘，思念大乘，護惜大乘，功行成遂得大總持，心常憐愍一切衆生。復有達解真人光妙音，深曉元陽正教，調御天人師，隨其處所宣告，衆生無不得聞，爲十方至真大聖衆講說如是大乘經典。善男子及諸眷屬，若能修大乘元陽妙經，所不聞者，皆得能聞無上要道。西方去此二十恒河沙國土，彼有世界名曰大堂國土，多有山陵岡阜，沙磧荆棘周徧充滿。其土人民常有饑渴，四時苦惱，恒無歡泰。爲其愚癡，不能恭敬求於正道，貪著非法之緣，於非法緣中習行邪法，不信正道，壽命短促，常行奸詐，王法持之。王雖有國，不知滿足於他所有，生貪利心，興兵相伐，枉死者衆。國王尋行如是非法，諸天神祇心無歡喜，故降灾旱，

五穀不登，人民饑餓，多有疾病，國土不寧。達解真人光妙音，調御天人師，愍念衆生，遊行世界，於其國土化作七寶香林，種種莊嚴，種種神變，種種奇麗，與諸總持大聖、獨步仙人演說元陽上品妙經，開發衆生，令解智慧，歸依無上正真之道。其土人民聞說是經，各各驚疑，人人嗟訝：以何因緣，忽聞聖人微妙經典，從何而來？我今歡喜，得遇真道。爾時達解真人光妙音與七千四百真仙眷屬，俱持幡蓋、華香，種種伎樂，種種莊嚴，供養之具，至於極樂土中騫林寶樹之間已，用所持供養之具，供養元始天尊，稽首恭敬，左繞三匝，恭敬已畢，却退一面。天尊問達解真人光妙音及諸善男子等：汝爲至來，爲不至來？真人光妙音白天尊言：至亦不來，不至亦不來，我觀此義，都無有來。天尊諸行若常，亦復不來，若是無常，亦無有來。若人見有衆生性者，有來不來，我今不見衆生定性，云何當言有來不來？有輕慢者見有去來，無輕慢者則無去來；有取行

者見有去來，無取行者則無去來；若見真人畢竟無上道者則有去來，不見真人畢竟無上道者則無去來；不聞道性者則有去來，聞道性者則無去來；若見狐疑下仙之人則有去來，不見狐疑下仙之人則無去來；若見真人無常樂我淨則有去來，若見真人有常樂我淨則無去來。天尊且置斯事，敢有諮問，願垂哀愍，少見聽許。天尊言：善男子，隨汝所問，今正是時，我當爲汝次第分別，一一解說，曉悟諸疑。所以者何？諸法難見，千載因緣，有遇靈文三清七部，何由可見？汝等應當精進，專心聽受。爾時達解真人光妙音、元陽真人等，既蒙聽許，兼被教戒，即白天尊言：云何真人有能修行元陽上品聞所不聞？爾時天尊答言：善哉善哉！善男子，汝今受持元陽妙經，復值我能善爲講說。汝今有所疑滯，我爲大醫王，爲汝剖判深疑。汝於道性猶未明了，我有法炬能爲照明。汝今欲濟煩惱大河，我能爲汝作於舟楫。汝於我所生父母想，我亦於汝生赤子心。

汝心今者貪正法寶，諦聽諦聽，善思念之，吾當爲汝次第開張，使無疑滯。真人、善男子，欲聽法者，今正是時。若得聞法，當生恭敬，至心讀誦，尊重正法，於其法所，莫求其過，莫念貪欲、瞋恚、愚癡，莫睹法師，縱性行惡。既聞經已，莫生輕慢，莫爲貪求名譽利養，當爲度世甘露法藥，莫生憎愛，起於疑心。我聽法已，先自度身，然後濟人，先自悟身，然後悟人，先自安身，然後安人。於道法之中，應生念想，於生死中，生大苦想。於道法之中，應生常樂我淨之想，當爲大乘，莫爲小見。於一切法，當無所住，亦莫專執一切法相。於諸法中，莫生貪想，常生知法、見法之想。善男子，必須精進讀誦如是經典，則能永出生死苦海，登於慈善之岸。汝宜遵奉，不得起疑惑之心。真人光妙音稽首禮問元始天尊言：有漏之法，若有生者，爲是常耶，是無常耶？生若是常，有漏之法則無有生；生若無常，即有漏是常。天尊，若生自生，生無自性，若能生他，以何因緣不

生無漏？天尊，若未生時有生者，云何於今名爲生？若未生時無生者，何故不說虛空爲生耶？於是天尊告諸大衆：善哉善哉！善男子，深達法相，具了道源。不生亦不可說生，生亦不可說生，不生亦不可說不生。何以故？以修道得故。云何生亦不可說？以生無故。云何不生不可說？以有得故。云何有因？有因緣故。亦得說十因緣法爲生作因，以是義故，故亦可得說。善男子，汝今莫入甚深空定，何以故？大衆鈍故。善男子，有爲之法，生亦是常，以住無常；生亦無常，住亦是常。亦生生故，住亦無常；以本無今壞亦無常。善男子，以性故生皆悉是常，念念滅故不可說常，是正真之道能除滅，故名無常。善男子，有漏之法未生之時，已有生性，故生能生；無漏之法本無生性，是故生不能生。如火有本性，遇緣即發，眼有見性，因色乃明，故見一切衆生。生法亦復如是，由其有性，遇感因緣，父母和合，便則有生。爾時達解真人光妙音、元陽真人及七

千四百萬衆，聞是經已，心懷踴躍，恭敬慇懃，叩頭稽首，齊執玉板，敢問元始天尊言：今蒙教誨，宣暢泠然，元陽祕藏始得悟解，聞所不聞，亦令七千四百萬衆深解諸法不生等。天尊，我今已解斷，諸疑網然。此衆中有一真人名曰真定光，復欲諮問，唯願垂許。爾時天尊告真定光：善男子，隨意問難，吾當爲汝分別解說。於是真定光與諸徒衆俱從座起，更整衣冠，長跪稽首而白天尊言：此土衆生，當造何業而得生彼不動世界？其土真人云何而得智慧，成就人中之尊，有大威德，具修諸行，利智捷疾，聞則能解？爾時天尊而說偈言：

一切諸衆生，皆含至道性。若能受妙經，即登常樂淨。布施及衆生，救濟諸貧病。斷除疑惑心，調和於識鏡。思念元陽經，晨夕常歌詠。從容出九天，逍遙登八正。善神相擁護，天真悉暉映。既得離三灾，復能超九橫。書寫及受持，當須勤苦行。憐愍善男女，咸使終天命，輪轉成高真，因緣偶賢

聖。今日得苦空，永息於馳競。

天尊說此偈已，一切時衆咸皆醒悟，更無疑滯。爾時元陽真人真定光白天尊言：我今已知所造業因，得生彼國，是元陽高貴之品，憐愍一切衆生。上所諮問，天尊演此妙法，則能利益安樂人天。爾時天尊即告元陽真人：善哉善哉！善男子，汝今於此，當須至心聽吾分別，一一解說。有因緣故未至不至，有因緣故不至至，有因緣故至。善男子，夫不至至者，是大元陽高貴之品，凡夫未至，以有貪欲、瞋恚、愚癡故，身口意業不清淨故，及受一切不淨物故，犯五逆罪謗真善法故，是義故未至不至。善男子，夫不至至者，以無貪欲、瞋恚、愚癡、身口惡故，不受一切不淨物故，不犯四重故，不謗無上道故，不作邪疑心故，不作五逆罪故，以是因緣，名至不至。善男子，以何因緣故，名至不至？至者，名爲二十五有。一切衆生，常爲無量煩惱諸結之所覆蔽，往來不捨，猶如輪轉，是名爲至。爲欲濟度諸衆生，故示現在中亦名爲

至。善男子，何因緣故，名爲至至？至者即是二十五有，一切凡夫煩惱因緣故，名至至。善男子，聞所不聞，亦復如是。有不聞聞，有不聞聞。云何不聞聞？善男子，不聞者，名大元陽之品。何故不聞？非有爲故，非音聲故，不可說故。云何亦聞？得聞名故，所謂常樂我淨，以是義故名不聞聞。爾時元陽真人、一切時衆稽首長跪，白天尊言：如天尊所說，元陽高貴祕密之義，不可得聞，云何復言常樂我淨而可得聞，何以故？天尊：斷煩惱者，名爲元陽高貴之品，若未斷者，名爲不得，以是義故，元陽高貴之品本無今有。若世間法本無今有，則名無常，譬如汝等，本無今有，已有還無，故名無常。元陽高貴之品若爾，云何說言常樂我淨？復次，天尊，凡因莊嚴而得成者，悉名無常，元陽高貴之品若爾應是無常。何等因緣，所謂三十六部尊經，三清祕藏，七部真書，如是等法，皆是成就一切因緣，故名無常。復次，天尊，有名無常，若元陽高貴之品是有，

亦應無常。如天尊昔於元始之先說諸妙經，皆有變化，以是義故，名爲無常。復次，天尊，可見之法名爲無常，如昔所說元陽高貴之品，則得斷除一切煩惱。復次，天尊，譬如虛空，於諸衆生等無障礙，故名爲常，若使元陽高貴是常，何故衆生有得有不得？元陽高貴若爾於諸衆生不平等者，則不名常。天尊，譬如百人共有一怨，若害此怨，則多人受樂。若使元陽高貴是平等法，一人得時，應多人得，一人斷結，應多人亦斷，若不如是，云何名常？譬如有人恭敬三寶，供養經書，尊重讚歎，晨夕不倦，國王、王子、父母、師長則得利養，是不名常。元陽高貴亦爾，不名爲常。何以故？如天尊昔於元始之運演說此經，告元陽真人言：若有人能恭敬讀誦此經，則得斷結，受無量樂。以是義故，不名爲常。天尊，若於元陽中有常樂我淨名者，不名爲常，如其無者，云何可說？爾時天尊告達解真人曰：元陽之體非本無今有，若元陽之體本無今有者，則非無漏常住之法。

有道無道，性相常住，以諸衆生煩惱覆故，不學真道，便謂爲無元陽。真人以戒定慧勤修其心，斷煩惱已，便得見之。當知真道是常住法，非本無今有，是故爲常。善男子，如閻室中種種七寶，人亦知有，闇故不見。有智之人善知方便，燃大明燈，持往照朗，皆得無之，是人於此，終不生念種種七寶本無今有。真道亦爾，昔自有之，非始今也，煩惱闇故，衆生不見，大智真人，以善方便燃智慧燈，令諸大衆得見真道，常樂我淨。是故智者於此真道，不應說言本無今有。如是大衆，汝言因莊嚴故成真應無常者，是亦不然。何以故？如是大衆，真道之體，非生非出，非實非虛，非作業生，非是有漏有爲之法，非聞非見，非墮生死，非別異相，亦非同相，非往非還，非因非果。以是義故，真道是常，恒不變易。是以無量劫中修習善法，以自莊嚴，皆得了見。如是大衆，譬如地有八味之水，一切衆生而不能得，有慧之人用功穿鑿，則便得水。真道亦爾。譬如盲人不睹日月，



良醫療之而能得見，如是日月，非是今有。真道亦爾，昔來有之，非在今也。善男子，如人有罪，繫之牢獄，久乃得出，還家得見六親眷屬。真道亦爾。如是大衆，汝言因緣故真道之法應無常者，是亦不然。何以故？善男子，因有五種，何等爲五：一者生因，二者和合因，三者住因，四者增長因，五者遠因。云何生因？生因者，即是種種煩惱，種種狐疑及諸草木子，是名生因。云何和合因？如善與善心和合，不善與不善心和合，無記與不記心和合，是名和合因。云何住因？如下有住，屋則不傾，山河樹木因大地故而得住立，何有四大無量煩惱，衆生得住，是名住因。云何增長因？因緣服翫，飲食等具，故今衆生增長；如諸種子，火所不燒，鳥所不食，則得增長；如諸道士、四衆男女等，依於真人，善能之者而得增長；如因父母，子得增長，是名增長因。云何遠因？譬如天尊往昔劫時演說此經，爲諸來生作大因緣，所有疑滯皆能除洗，是名遠因；又如父母

血氣爲衆生遠因；如時節等名爲遠因。善男子，真道之體非如是等五因所成，云何當言是無常因？復次，善男子，復有二因：一者作因，二者了因。何等爲作因？如陶師輪繩是爲作因，如燈燭照闇中物是名了因。善男子，元陽高貴經者，不從作因而有，唯有了因。了因者，所謂明了元陽上品深奧義味，爲諸來生作大舟楫，作大橋梁，作大因緣，作大福田，令諸時衆皆得無上正真道果。爾時元陽達解真人光妙音稽首上白元始天尊曰：既蒙訓誨，開導衆生，種種方便，種種宣說，委曲教化，子細讚揚，過泰之歡，實爲無量。然由宿滯，尚有狐疑，不鄙卑陋，輕觸靈顏，叩頭上啓，更有諮問：天尊，未審一切衆生修何功德免離哀憂？修何布施可得富饒？修何福田可得豐足？發何志願可得道真？天尊曰：如人種樹爲得蔭涼，爲得花果及以材木。若人修行，心力專精，嘿念洞思，自然廣作功德，布施窮乏貧賤之人，慈念衆生，恩愛萬物，不惜珍寶，所營在法。

修如是行則能深解妙法，成於真道，能爲一切衆生斷除業障。善男子，譬如有人墮大海水，抱持死屍，則得度脫。真人修無上道，行布施時，亦復如是，如彼死屍。善男子，譬如有人閉在深獄，門戶堅牢，唯有廁孔，便從中至無礙處。真人修無上道，行布施時，亦復如是。善男子，譬如貴人恐怖急危，更無恃怙，發心願念元陽經者，皆得安穩。真人修無上道者，行於布施，亦復如是。善男子及諸時衆，汝等當知元陽祕藏即是無上正真之道，若能按經修行，晨夕願念，於家別立精舍方丈之室，燒香供養，積年不退，如此精誠，皆獲自然之果，見世得免憂危煩惱之患。爾時元陽真人及諸大衆神仙眷屬七千四百萬衆，一時稱善而作偈言：

真道體靈妙，至法甚冲玄，祕跡紫微宮，曜景大羅天。玄都至學士，清虛常自然，鸞鶴遊碧漢，策鳳往青煙。金闕禮大聖，玉戶會高賢，元陽時四衆，偶此大因緣。三清既啓蘊，七部已相傳，開發深疑滯，曉悟昔憂煩。一切善

男子，皆得淨身田，逍遙四正道，放曠九華巔。簫聲出雲外，梵響度風前，偶逢元始運，不謝上皇年。調御天人師，割我恩愛纏，損絕諸疑網，瞋癡遂乃捐。四衆稽首慶，辭謝大神仙。今日蒙開度，願卒大慈憐。

元陽真人及諸時衆說偈都畢，一時恭敬作禮而去。

太上靈寶元陽妙經卷之九

太上靈寶元陽妙經卷之十

昇大羅品

如是我聞，一時天尊在蒲林國中，樊華樹下，元陽宮中，與大聖真人、大仙道士、男女官等百萬人，俱前後圍繞。爾時天尊剋以七月七日昇於大羅上宮，思惟入定，見威神力，放大光明，雜色青黃赤白，遍照三千大千世界，及至十方虛空邊際亦復如是。其中所有六趣衆生，遇斯光者，四垢煩惱一切消除。是諸衆生見聞是已，心大憂惱，同時舉聲涕泣，自相謂言：且各裁抑，莫大愁苦，當共疾往詣元陽宮中。至天尊所，頭面著地，頂禮勸請天尊莫向大羅，住此元陽，或百年，或千載。互相執手，復作是言：世間空虛，衆生福盡，不善諸業增長，我等今當速往，天尊不久即去。又作是言：世間虛空，我等從今無有救護，無所宗仰，貧窮孤露，一旦遠離無上天尊，設有疑惑，當

復問誰？時有無量諸大聖、衆真人、大仙道士、男女官等及諸清信士、清信女，遇見天尊光者，其身顫掉乃至大動，不能自持，心昏迷悶，恍惚無寧。爾時復有松靈真人，光妙真人，鬱羅真人等百千萬人，心得自在，所作已辦，離諸煩惱，調伏諸根，如大龍王有大威德，成就空慧，逮得己利，如栴檀林栴檀圍遶，如師子王師子圍遶，成就如是无量功德，一切皆是天尊。弟子各於晨朝日初出時，離常住處，手執香鑪，遇天尊光明，更相謂言：我等宜速澡漱清淨。作是言已，舉身毛豎，不能自持，涕泣盈目，生大苦惱。爲欲利益安樂衆生，成就大乘第一空行，顯發大道，方便密教，爲不斷絕種種說法，爲諸衆生調伏因緣，故疾至天尊所，稽首尊足，圍繞百匝，稽首恭敬，却坐一面。爾時復有道士、男官女官、男職女職、二十四職，將領徒衆百千萬人等，諸漏已盡，心得自在，所作已辦，離諸煩惱，調伏諸根，如大龍王有大威德，成就空慧。亦於晨朝日初出時，舉身毛豎，涕

泣盈目，生大苦惱。亦欲利益安樂衆生，成就大乘第一空行，顯發大道，方便密教，爲不斷絕種種說法，爲諸衆生調伏因緣，故疾至尊所，稽首尊足，繞百千帀，稽首恭敬，却坐一面。人中之龍，位階十地，安住不動，方便現身，其名曰大王、納善真人、決理真人、最勝真人、妙思真人、大慧真人，而爲上首。其心皆悉敬重大乘，安住大乘，深解大乘，愛樂大乘，守護大乘，善能隨順一切世間。作是誓言：諸未度者，當令得度。已於過世無數劫中，修持淨戒，善持所行，解未解者，紹三寶種，使不斷絕於未來世。當轉法輪，以大莊嚴而自莊嚴，成就如是無量功德，等觀衆生，如視一子，亦於晨朝日初出時，遇天尊光時，舉身毛豎，涕泣盈目，生大苦惱。亦爲利益安樂衆生，成就大乘第一空行，顯發大道，方便密教，爲不斷絕種種說法，爲諸衆生調伏因緣故，疾至尊所，稽首尊足，繞百千帀，稽首恭敬，却坐一面。爾時復有無量清信士女，受持五戒，威儀具足，其名曰威

德、干吉、遠遊、董雙成、許飛瓊、宛陵華等，而爲上首。深樂觀察諸對治門，所謂苦樂，常淨，我無我，實不實，歸依非歸依，衆生非衆生，恒非恒，安非安，爲無爲，斷不斷，常不常，如是觀察等法對治之門。亦欲樂聞無上大乘，如所聞已，能爲他說，善持淨戒，渴仰大乘，既自充足，復能充足餘渴仰者；善能攝取無上智慧，愛樂大乘，守護大乘；善能隨順一切世間，度未度者，解未解者，紹三寶種，使不斷絕於未來世；當轉法輪，以大莊嚴而自莊嚴，心常染味清淨戒行，悉能成就如是功德；於諸衆生生大悲心，平等無二，如視一子。亦於晨朝日初出時，爲欲莊嚴道教，人人各取香木萬束，栴檀、沉水、牛頭栴檀、天木香等，是一一木文理及附，皆有七寶微妙光明，譬如種種雜綵畫飭。以道力故，有是妙色，青黃赤白，爲諸衆生之所樂見。諸木皆以種種香塗，鬱金、沉水及膠香等，以諸華而爲莊嚴衆寶蓮華。諸香木上懸五色幡，柔軟微妙，猶如天衣繡縠繒綵錦

綺。是諸香木，載以寶車。是諸寶車，出種種光，青黃赤白，轆輻皆以七寶廁填。是一一車駕以駟馬，是一一馬駿疾如風，一一車前建立五十七寶，妙幢真金羅網彌覆其上。一一寶車復有五微妙寶蓋，一一車上乘諸華等，青蓮華，白蓮華，紅蓮華，金蓮華，紺蓮華，其華純以真金爲葉，金剛爲臺，是華臺中，多有黑蜂遊集其中，歡娛受樂。又出妙音，所謂無常、苦、空、無我，是音聲中，說真人本所道。復有種種歌舞伎樂，箏笛箜篌，簫瑟鼓吹。是樂音中，復出是言：苦哉苦哉！世間虛空。一一車前有善男子擎四寶案，是諸案上有種種雜華，及鬱金諸香，及餘薰香，微妙第一。諸清信士女，若老若少，各各運心爲天尊及徒衆辦諸食，具種種備足，皆是栴檀、沉水、香薪、八味之水之所成熟，甘食甘美。有六種味：一苦，二酢，三甘，四辛，五鹹，六淡。復有三德：一者輕軟，二者淨潔，三者如法。作如是等種種莊嚴，至元陽宮中，以黃金徧敷其地，繒綵衣物寶

蓋以覆地上。周徧一宮，爲天尊徒衆，敷置七寶師子之座，其座高大如玉京山，是諸座上皆有寶帳，垂諸瓔珞，悉懸種種微妙幡蓋，種種好香用塗其座，復以種種名華以散座間。諸清信士女，各作是念：一切衆生，若有飲食衣服，頭目肢體隨其所須，悉皆給與。作是施時，離欲、瞋恚、穢濁、毒心，無餘思願，求世福樂，唯志無上清淨法戒。是清信士女等，皆以安住真人之道，復作是念：天尊今者受我食已，當向大羅上界捨離我等。作是念已，身毛皆豎，涕泣盈目，生大苦惱。各各齎持供養之具，載以寶車，香木、幢幡、寶蓋、飲食，並至尊所，稽首尊足，以其所持供養之具供養天尊，圍遶百匝，舉聲號泣，哀動天地，淚下如雨。復相謂言：苦哉仁者，世間虛空。便自舉身投天尊前而白尊言：唯願天尊大慈大悲，哀憐我等，受我等施，受我懺悔，除我宿愆。我等從無始世界百千萬劫來至于今日，凡經無量生，凡經無量死，六慾枷鎖，五陰纏縛，貪愛吝惜，惟知造

罪，不識大乘，今藉天尊大乘光明業力，各自呵責。自觀己身，如四毒蛇。是身常爲無量諸蟲之所咬食。是身臭穢，貪欲獄縛。是身可惡，猶如死狗。是身不淨，九孔常流。是身如城，血肉筋骨皮裹其上，手足以爲却敵樓櫓，目爲察孔，頭爲殿堂，心王處中。如是身城，諸善真仙之所棄捨，凡夫愚人常所味著，貪婬、瞋恚、愚癡、羅刹止住其中，是不堅固，猶如蘆葦、伊蘭、水沫、芭蕉之樹。是身無常，念念不住，猶如電光、卑水、幻炎，亦如畫水，隨畫隨合。是身易壞，猶如河岸臨峻之樹。是身不久當爲狐狼、鴟梟、鷂鷲、烏鵲、餓狗之所食噉，惟有智者當樂此身，寧以牛跡盛大海水，不能具說。是身無常、不淨、臭穢，寧久大地，使如棗等，漸漸轉小，猶葶藶子乃至微塵，不能具說。是身過患，是故當捨，如棄涕唾。以是因緣，諸人士女以空無相，無願之法，常修其心。深樂諮受大乘經典，聞已亦能爲他演說，護持本願，毀訾是身，甚患厭不堅牢心。常修集如是正

觀，破壞生死無際輪轉，渴仰大乘，既自充足，復能充足餘渴仰者。深樂大乘，守護大乘，雖現是身，實是真仙等類。善能隨世間，度未度者，解未解者，紹三寶種，使不斷絕於未來世。當轉法輪，以大莊嚴而自莊嚴，堅持禁戒，皆悉成就如是功德。於諸衆生大慈心，平等無二，如視一子。皆發是願：伏願天尊受我供施，容我懺悔，久住下界，開度衆生，授度經典，得法益利，莫捨我等，向於上界。譬如父母，未象成就，忽捨而去，無所成就，諸子孤劣貧窮，失於覆蔭。天尊還於上方，捨我等去，亦復如是。伏願天尊且住世間，成就諸法，覆蔭我等。如此諮請，嗚咽頓悶，大衆哀泣，淚下盈目，不能自止。爾時天尊從其面門出種種光明，其光明曜大衆，大衆遇斯光已，即知是事，傳相告語：天尊今者現是瑞相，不久必當反於上界，所有供養之具宜施天尊及於大衆。松靈真人及大衆等，知天尊放是種種光明，非無因緣。松靈真人等默然良久。天尊告松靈真

人：汝等所奉施天尊及大衆，今正是時。天尊正爾當欲還上方，第二第三，亦復如是。爾時松靈真人等大衆聞此語已，舉聲號哭，悲咽而言：苦哉苦哉！世間虛空。復白大衆：我等今者，一切當共，五體投地，同聲勸請天尊且住下界，覆蔭我等，勿捨我去，還於上方。爾時天尊告松靈等：莫大啼哭自亂。各當觀是身，猶如芭蕉，熱時之炎，水泡幻化，乾闥婆城，坏器電光，亦如畫水，臨死之囚，熟果馳肉，如織碓上下。當觀諸行，猶雜毒食，有爲之法，多諸過患。於是松靈真人復白天尊言：尊不久住於下界，我等云何而不啼哭？苦哉苦哉！世間虛空。唯願天尊哀愍我等及諸衆生，久住於下方，勿返於上界。天尊告松靈真人：汝今不應發如是哀憐我，故久住於下方。我以哀憐汝及一切，是故今日欲還上界。何以故？諸尊法爾，有爲亦然。是故天尊而說偈言：

松靈真人，汝今當觀一切行新<sup>①</sup>，諸法無我，無常不住，此身多有無量過患，猶如水泡，是故汝今不應啼泣。爾時松靈復白天尊言：如是如是，誠如尊教。雖知天尊方便示現，欲還上方，捨我等去，我等不能不懷憂惱，得自思惟，復生慶悅。天尊讚松靈：善哉善哉！能知天尊示同衆生方便，去來諸法，皆如幻相，大聖在中，以方便力，無所染著。何以故？諸有教化，隨方利益，欲度脫衆生死老病苦，悉皆當得，不動果報，常受安樂。何以故？我是衆生良福田故。汝若復欲爲諸衆生作福田者，速辦所施，不宜久停。爾時松靈爲諸衆生得度脫故，低頭飲淚而白天尊言：善哉善哉！我若堪任爲福田時，則能了知天尊還於上方及非還上方。我等今者及諸真人仙人等，猶如蚊蚋，實不能量天尊還於上方及非還上方。爾時松靈真人及其徒衆憂愁啼泣，圍遶天尊燒香散花，盡心敬奉，尋與衆真從座而去，共辦食具。松靈去後，神洲赤縣，三界內外，地大震動，一

切衆生聞見，知覺天尊還於上方，是故此地大動。時諸三界內外，一切衆生聞是語已，身毛皆豎，同聲哀泣而說偈言：

稽首調御師，我等今勸請。違離於人仙，永無有救護。尊今還上方，我等沒苦海，悲戀懷憂惱，如犢失其母，貧窮無救護。猶如困病人，無醫隨自心，食所不應食。衆生煩惱病，常爲諸見害，遠離法醫王，服食邪毒藥。是故大聖仙，不應見遺捨。如國無君主，人民皆饑饉，我等亦如是，失蔭及法味。天尊還上方，我等心迷亂，如彼大地動，迷失於諸方。大仙向上界，我等於今日，云何不愁苦？天尊見放捨，猶如棄涕唾。譬如日初出，光明甚暉炎，既能還自照，亦滅一切暗。天尊神通光，能除我苦惱。處在大衆中，譬如玉京山。

天尊言：譬如國王生育諸子，心常愛念，教以仁義忠孝，悉令通曉，然後聽之，不意諸子所習不善，王乃棄之。天尊告松靈曰：我今爲法教誨汝

等，已具正見，願莫放捨，如其放捨，則同王子矣。天尊，譬如有人善學諸論，復於此論而生怖畏。天尊亦爾，通達諸法而於諸法復生怖畏。若使天尊久住於世，說甘露味，充足一切，如是衆生則不復畏墮於地獄。天尊，譬如有人初學作務，爲官所收，閉之囹圄，有人問之：汝受何事？答言：我今受大憂苦，若其得脫，則得安樂。天尊亦爾，爲我等故，修諸苦行。我等今者，

猶未得免生死苦惱，云何天尊得受安樂？天尊，譬如醫王，善解方藥，偏以祕方教授其子，不教其餘外受學者。天尊亦爾，獨以甚深祕密之藏偏教老子，遺棄我等，不見顧愍。天尊於法，應無祕吝，如彼醫王偏教其子，不教外來諸受學者。彼醫所以不能苦教，情存勝負，故有祕惜，天尊之心，終無勝負，何故如是不見教誨？唯願久住，莫向上方。天尊，譬如老少病苦之人捨遠夷途而行險道，險道多難，備受衆苦，更有異人而愍之，即便示以平坦好路。天尊，我亦如是。所言少者，譬未

增長法身之人；所言老者，譬重煩惱；所言病苦，譬未脫生死；所言險道，譬二十五有。准願天尊示導我等甘露正道，久住於世，勿遠上方。爾時天尊告諸法衆：汝等莫如凡夫、諸天人等愁憂啼哭，當勤精進，繫心正念。時諸天人及大衆等聞天尊所說，止不啼哭，猶如有人喪其愛子，殯送已訖，抑止不哭。爾時天尊爲諸大衆說是偈言：

汝等當開意，不應大愁苦，大道法皆爾，是故當嘿然。樂不放逸行，守心正憶念，遠離諸非法，自慰受歡樂。

復次，松靈等若有疑惑，今皆當問。若空不空，若常無常，若苦不苦，若依非依，若去不去，若歸非歸，若恒非恒，若斷非斷，若衆生非衆生，若有若無，若實不實，若真不真，若滅不滅，若密不密，若二不二，如是等種種法中有所疑者，今應諮問，我當隨順爲汝斷之，亦當爲汝先說甘露，然後乃當還於上方。諸大衆等，天尊出世，歎人身難得；值道生信，是事亦難；能忍，是亦

復難；成就禁戒，具足無缺，得無上道果，是事亦難；如求金玉、衆寶、妙華亦難；離於八難，得人身難。汝等遇我，不應空過。我於往昔種種苦行，今得如是無上方便，爲汝等故，無量劫中，捨身、手足、頭目、髓腦，是故汝等不應放逸。汝等大衆，云何莊嚴正法，寶城具足，種種功德、珍寶、戒定、智慧以爲墻塹？汝今遇是道法寶城，不應取此虛偽之物。譬如商主遇真寶城，取諸瓦礫而便還家，汝亦如是，值遇寶城，取虛偽物。汝諸大衆，勿以下心而生知足。汝等今者雖得出家，於此大乘，不生貪慕。汝諸大衆，身雖得服黃褐染衣，心猶未染大乘淨法。汝諸大衆，雖行乞食，經歷多處，初未曾求大乘法食。汝諸大衆，雖復大衆，未爲正法，除諸結縛。汝諸大衆，今當真實教勅汝等：我今見在，大衆和合，法性真實不倒，是故汝等應當精進，攝心勇猛，摧諸結縛。十方慧日既潛沒已，汝等當爲無明所覆。諸法衆等，譬如大地諸山藥草爲衆生用，我法亦爾，出生

妙善甘露法味，而爲衆生種種煩惱病之良藥。我今當令一切衆生及我諸子四部之衆，悉皆安住祕密藏中，我亦復當安住是中，入於上方。何等名爲祕密之藏？猶如三際，去來不斷。何以故？前際不去，中際不住，後際不來，來無所從，去無所至。上中下亦復如是。上不上，中不中，下不下，去不去，住不住，諸法如是。三法各異，亦非向於上方，汝等應如是觀，時到當還上方。爾時諸法衆聞天尊定向上方，皆悉憂愁，身毛爲豎，涕淚交流，稽首尊足，繞無量帀，白天尊言：天尊妙說無常、苦、空、無我。天尊，譬如一切衆生迹中，鳥迹爲上，是無常想亦復如是，於諸想中最爲第一。若有精勤修習之者，能除一切欲界貪愛色、無色愛、無明、驕慢及無常想。天尊大聖若離無常想者，今則不應向於上方。若不離者，云何說言修無常想，離三界愛、無明、驕慢及無常想？天尊，譬如農夫於秋月時深耕其地能除穢草，是無常想亦復如是，能除一切欲界貪愛色、無色

愛、無明、驕慢及無常想。天尊，譬如耕田，秋耕爲上，如諸迹中，鳥迹爲勝，於諸想中，無常爲最。天尊，譬如帝王知將升遐，恩赦天下獄囚繫閉，悉令得脫，然後捨命。天尊，今者亦應如是，度諸衆生，一切無知、無明繫閉皆令解脫，然後向於上方。我等今者皆未得度，云何天尊便欲放捨，向於上方？天尊，譬如有人爲鬼所持，遇良呪師以呪力故，便得除差。天尊亦爾，爲諸法衆除無明鬼，令得安住大善福業。譬如香鳥爲人所縛，雖有良師不能禁制，須絕羈鎖，自恣而去。我未如是脫五十七煩惱繫縛，云何天尊便欲放捨，向於上方？天尊，如人病瘡，值遇良醫，所苦得除。我亦如是，多諸患苦，邪冷熱病，雖遇天尊，病未除愈，未得無上安穩常樂，云何天尊欲放捨，向於上方？天尊，譬如醉人不自知，不識親疏、母女姊妹，迷荒淫亂，言語放逸，卧不淨中，時有良師與藥令服，服已即吐，還自憶識，心懷慙愧，深自剋責。酒爲不善，諸惡根本，若能除斷，則遠衆罪。

天尊，我亦如是，往昔已來，轉輪生死，情色所醉，貪嗜五欲，非母母想，非姊妹想，非女女想，於非衆生衆生想，是故輪轉受生死苦，如彼醉人卧不淨中。天尊，今當施我法藥，令我還吐煩惱惡酒，而來未得醒寤之心，云何天尊便欲放捨，向於上方？天尊，譬如有人歎芭蕉樹，以爲堅實，無有是處。天尊，衆生亦爾。若歎我人衆生壽命，養育知見，作者受者，是真實者，亦無是處，我等如是，修無我想。天尊，譬如漿滓無所復用，是身亦爾，無我無主。天尊，如七葉華無有香氣，是身亦爾，無我無主。我等如是，心常修習無我之想。如尊所說，一切諸法無我想，汝諸法衆應當修習，如是修已，則除我慢，離我慢已，便向上方。天尊，譬如鳥迹，空中現者，無有是處。有能修習無我想者，而有諸見，亦無是處。爾時天尊讚諸法衆：善哉善哉！汝等善能修無我想。時諸法衆即白天尊：我等不但修無我想，亦更修習其餘諸想，所謂苦想、無常無我想。天尊，譬如人

醉，其心眩亂，視諸山川、城郭宮殿、日月星辰皆悉迴轉。天尊，若有不修苦、無常想、無我等想，如是之人，不名為聖，多諸放逸，流轉生死。天尊，以是因緣，我等善修如是諸想。爾時天尊告諸大眾言：諦聽諦聽，汝向所引醉人譬者，但知文字，未達其義。何等為義？如彼醉人見上日月，實非迴轉，生迴轉想。衆生亦爾，為諸煩惱無明所覆，生顛倒心，我計無我，常計無常，淨計不淨，樂計為苦，以為煩惱之所覆故。雖生此想，不達其義，如彼醉人於非轉處而生轉想。我者，即是道義；常者，是法身義；樂者，上方義；淨者，是法義。汝等法衆，云何而言有我想者驕慢嘖嘖，流轉生死？汝等若我言亦修習無常、苦、無我等想，是三修無有寶義。我今當說勝三修法。苦者計樂，樂者計苦，是顛倒法；無常計常，常計無常，是顛倒法；無我計我，我計無我，是顛倒法；不淨計淨，淨計不淨，是顛倒法。有如是等四顛倒法，是人不知正修諸法。汝諸法衆，於苦

法中而生樂想，於無常中而生常想，於無我中而生我想，於不淨中而生淨想。世間亦有常樂我淨，出世亦有常樂我淨。世間法者，有字無義；出世間者，有字有義。何以故？世間之法有四顛倒，故不知義，所以者何？有想顛倒，心倒，見倒，以三倒故，世間之人樂中見苦，常見無常，我見無我，淨見不淨，是名顛倒。以顛倒故，世間知字而不知義。何等為義？無我者，即生死。我者，即天尊。無常者，聲聞緣教。常者，天尊法身。苦者，一切外道。樂者，即是上方。不淨者，即有為法。淨者，諸天尊真人所有正法。是名不顛倒。以不倒故，知字知義。若欲遠離四顛倒者，應知如是常樂我淨。時諸法衆復白天尊言：如天尊所說，離四倒者，則得了知常樂我淨。天尊今者永無四倒，則已了知常樂我淨，若以了知常樂我淨，何故不住一劫半劫，教道我等，令離四倒，而見放捨，欲向上方？天尊若見顧念教勅，我當至心頂受修習。天尊若當向上方者，我等云

何與是毒身同共止住，修於梵行？我等亦當隨天尊向於上方。爾時天尊告諸法衆：汝等不應作如是語。我今所有無上正法悉以付囑老君，是老君者，當為汝等作大指歸，猶如天尊為諸衆生作指歸處，老君亦復如是，當為汝等作指歸處。譬如大王，多所統領，若遊巡時，悉以國事付囑大臣。天尊亦爾，所有正法，亦以付囑老君。汝等當知，先所修習無常、苦想，非是真實。譬如春時，有諸人等在大池浴，乘船遊戲，失琉璃寶珠，沒深水中，是時諸人悉共入水求覓是寶，競捉瓦石、草木、沙礫，各各自謂得琉璃珠，歡喜持出，乃知非真。是時寶珠猶在水中，以珠力故，水皆澄清，於是大衆乃見寶珠，故在水下，猶如仰觀虛空月形。是時衆中有一智人，以方便力，安徐入水，即便得珠。汝等法衆，不應如是修習無常、苦、無我想、不淨想等，以為寶義，如彼諸人，各以瓦石、草木、沙礫而為寶珠。汝等應當善學方便，在在處處，常修我想、常、樂、淨想。復應當知，先所修習



四法相貌悉是顛倒，欲得真實修諸想者，如彼智人，巧出寶珠，所謂我想、常樂淨想。爾時諸法衆白天尊言：如天尊先說諸法無我，汝當修學，修學是已，則離我想，離我想者，則離驕慢，離驕慢者，得向上方。是義云何？天尊告諸法衆：善哉善哉！汝今善能諮問是義，爲自斷疑。譬如國王暗鈍少智，有一醫師性復頑嚚，而王不別，厚賜俸祿。療治衆病，純以乳藥，亦復不知病起根源；雖知乳藥，復不善解風冷熱病，一切諸患，悉教服乳。是王不別是醫知乳好醜善惡。復有明醫曉八種術，善療衆病，知諸方藥，從遠方來。是時舊醫不知諮受，反生噴嗃輕慢之心。彼時明醫即便依附，請以爲師，諮受醫方祕奧之法，語舊醫言：我今請仁以爲師範，唯願爲我宣暢解說。舊醫答言：卿今若能爲我給使四十八年，然後乃當教汝醫法。時彼明醫即受其教：我當如是，我當如是，隨我所能，當給走使。是時舊醫即將客醫共入見王。是時客醫即爲王說種種醫方

及餘伎藝，大王當知，應善分別，此法如是，可以治國，此法如是，可以療病。爾時國王聞是語已，方知舊醫癡暗無智，即便驅逐，令出國界，然後倍復恭敬客醫。是時客醫作是念言：欲教王者，今正是時。即語王言：大王於我，實愛念者，當求一願。王即答言：從此右臂及餘身分，隨意所求，一切相與。彼客醫言：王雖許我一切身分，然我不敢多有所求。今所求者，願王宣令，一切國內，從今已往不得復服舊醫乳藥。所以者何？是藥毒害，多傷損故。若故服者，當斬其首。斷乳藥已，無復有橫死之人，常處安樂，故求是願。時王答言：汝之所求，蓋不足言。尋爲宣令，一切國內，凡諸病人，皆悉不聽以乳爲藥，若爲藥者，當斬其首。爾時客醫和合衆藥，謂辛苦鹹甜酢等味，以療衆病，無不得差。其後不久，王復得病，即命是醫：我今病困，當云何治？醫占王病，應用乳藥。尋白王言：如王所患，應當服乳。我於先明所斷乳藥，是非實語，今若服

者，最能除病。王今患熱，正當服乳。時王語醫：汝今狂邪爲熱病乎！而言服乳能除此病。汝先言毒，今云何服，欲欺我邪？先醫所讚，汝言是毒，令我驅遣，今復言好，最能除病。如汝所言，我本舊醫，定爲勝汝。是時客醫復語王言：王今不應作如是語。如蟲食木有成字者，此蟲不知是字非字，智人見之，終不唱言是蟲解字，亦不驚怪。大王當知舊醫亦爾，不別諸病，悉與乳藥，如彼蟲道偶得成字，是先舊醫不解乳藥好醜善惡。時王問言：云何不解？客醫答王：是乳藥者，亦是毒害，亦是甘露。云何是乳復名甘露？若是乳牛不食酒糟、滑草、麥麩，其犢調善，放牧之處，不在高原，亦不下濕，飲以清水，不令馳走，不與犢牛同共一群，飲食調適，行住得所，如是乳者，能除諸病，是則名爲甘露妙藥。除是乳已，其餘一切皆名毒害。爾時大王聞是語已，讚言：大醫，善哉善哉！我從今日始知乳藥善惡好醜。即便服之，病得除愈。尋時，宣令一切國內，從今已

往，當服乳藥。國人聞之，皆生瞋恨，咸相謂言：大王今者爲鬼所持，爲是狂邪而誑，我等復令服乳。一切人民，皆懷瞋恨，悉集王所。王言：汝等不應於我而生瞋恨如此，乳藥服與不服，悉是醫教，非是我咎。爾時大王及諸人民踊躍歡喜，倍共恭敬供養是醫，一切病者皆服乳藥。病（原闕）

太上靈寶元陽妙經卷之十

①「新」當係衍字。

（李剛點校）

# 099 太上元陽經（敦煌本）

經名：太上元陽經（敦煌本）。撰人不詳，約出於南北朝。原本卷數不詳。敦煌殘抄本五件：S.482、P.2450、P.2366、臺北4717、S.3016。其前二件卷次品名與《正統道藏》本不同，後三件不見於《道藏》本。今另出為一種，並據《道藏》本校補。

## 元陽上卷超度濟難經品第一

（S.482抄本，前缺）<sup>①</sup>

〔爾時上師在蒲林國中，坐繁華樹下，臨欲昇天。乃有一弟子，名曰條林法淨真人，及諸得道大弟子等一切諸天人，皆來集會師所，各各正坐，白上師言：弟子等願師少坐，留神布化，然後昇天。師告弟子族姓等：於我去之

後，五百世中，一切衆生當惡鬼衆邪蠱道，奪人精氣，求人長短，橫來殺者。復告條林法淨真人言：亦好勤心流布

此經，令惡世中衆生無有病苦，無有橫死，衆邪蠱道悉皆消滅，我所囑累，唯有斯經。若有衆生，無男無女，有能讀此經一句一偈者，衆邪惡鬼不得妄來侵近。若在荒野中、山林中、苦厄難中，若在大火中，若在大水中，常當讀誦此經，悉能斷除。何以故？此經有大威神力，出元陽上品中，常當讀誦。若不能讀者，但當著懷中。至心受此經者，則得仙道，善神營護。若過去世、未來世、見在世諸弟子等，皆蒙先師神力，早度八難。若欲遠行，常當持去處處村落、王化大城、人民都市中，行時一心爲人演說，功德無量。能有須臾聽者，所願悉得。弟子等，吾不虛言，此經吾上師太玄元陽仙公之所出，演化秘要，其難可得。譬如妙藥，能愈毒病，能斷惡毒。有人持行，諸惡毒蟲、衆邪蠱道，欲來爭害，聞此藥氣<sup>②</sup>，四向散去。如汝等一心誦讀之者，諸

魔鬼神不敢迴視。此經神力，亦復如是。〔若〕有病痛者，當清淨洗浴身體手足頭面，一心爲人讀誦，衆患除愈。

上師告條林法淨真人言：若有衆鬼磨兵、〔衆耶〕蠱道，不隨我言者，吾當使此磨曹衆耶蠱道，送付玄都鬼律受罪，如押油殃<sup>③</sup>，悉皆消滅<sup>④</sup>，無有遺餘。吾即舉七仙真人名字，亦<sup>⑤</sup>得度脫衆耶境界。何等七仙真人？第一廣維衛真人，第二戒法真人，第三隨葉真人，第四拘正林真人，第五拘正玄林真人，第六淨得真人，第七釋龍種真人。若有苦厄病痛者，便當讀此七仙真人名字，諸惡蠱道悉皆消滅。無得侵近者。我說此已，復告汝等<sup>⑥</sup>：我今復憐愍衆生，故便演說斯經元陽上部，復有六神仙人名字，一名羅法真人，二名羅上真人，三名賀陽真人，四名懃度真人，五名頭劉真人，六名玄林真人，此是六神仙人名字。汝等若有衆生，無男無女，無貴無賤，有苦厄者，皆當稱說六神仙人名字，所患悉除，衆惡疫氣不得來近，一切滅盡，無有遺餘。

上師告條林法淨真人：汝一心善聽我等陳說。若有無數弟子等，及得道真人，及諸天神王，一切天人，我昇天後，若有受持我所囑累〔妙〕法，汝常當晝夜擁護，令得安隱。條林法淨真人曰：上師尊，弟子當於得道度世，將廿五真人於惡世中，能有讀此經之〔者〕處，弟子等晝夜在其左右，擁護是人，衆耶魍魎魑魅，不得來近。常使是人卧安覺〔安〕，脩行善法。師謂弟子等：善哉善哉，汝能擁護我百千萬劫中所脩集<sup>⑧</sup>，即成神仙元陽上品〔第一〕弟子耳。當說此來既<sup>⑨</sup>，復有四天神王，各將眷屬部曲，行正長跽，叉手言師尊：我等於師尊昇天之後，各將斯等眷屬案行國界，有能讀誦書寫者，受持是經者，我等眷屬常來隨逐是人，晝夜擁護，令不見惡。是人欲行曠野者，我常隨逐導從，懃心擁護，不離是人，不令惡鬼妄來侵近，常得充足，不令饑渴。所欲求者，我等神王遣諸軍將吏兵，悉令供給，如其所願，無所乏少。何以故？是人能流布此經，脩行善法，

供養仙寶，元陽上品繫其仙簿，不令斷絕。說是來既<sup>⑩</sup>，復有七山神王等，各各長跽叉手於上師前，一心合掌白師尊：我等山神王領衆無數，上有百千天人，常當飛行於惡世中，人間有能讀誦書寫，受持是元陽却磨經者，我等山神與天人齊執，與其眷屬共到天上。是人所住之處，此法典常當守護，晝夜不離，在其四面<sup>⑪</sup>擁護是人，衆磨惡鬼不得奪其精氣，不得橫來絕命，不得橫來撓害，不得求其長短，不得觸厭，令毒不行。我等眷屬常來在其人所住處，於虛空中。是人若遇大水，悉決漂去，我山神王力，即於空中來護是人，不令見溺，水即還停，得度水難。苦遇大火，我等山神王力，隨其方便救護其身，不令大火所燒。若遇大賊，我於四面救護是人，能使賊心刀杖不舉，即發慈心。若遇官事繫縛枷鎖，晝夜愁苦，我等山神王力各將眷屬軍將吏兵，於虛空中，能令其官心生歡喜，悉令放赦，皆得解脫。我等山神王力眷屬軍將伏怒<sup>⑫</sup>，一心救護，不令他緣而得擾

亂。於無數國土人民聚落城邑，劫中當念是經。何以故？此經仙聖殷懃所囑之法，其文流布，法應宣傳。若有昇天仙<sup>⑬</sup>道士，經行林野，止息樹崖者，若有山神磨女、〔崖〕嚮惡精、魍魎魑魅，來欲撓害<sup>⑭</sup>之者，我等山神王力，能令是人不生畏想，禪思如故。

上師言令讚<sup>⑮</sup>：汝等山神王徒，善哉善哉。汝等軍將吏兵，勇卒堅勁，伏怒日久<sup>⑯</sup>，曾於過去世時，乃至百千萬歲<sup>⑰</sup>劫中時，值遇<sup>⑱</sup>百千萬億諸仙上品元陽經卷，處第八之中廣度衆生神通第八弟子之例<sup>⑲</sup>。汝若能流布此經，讀誦書寫，方便救濟，不令見惡，常行善心。爾時山神王等，即與諸眷屬軍將吏兵頂禮師尊，一心奉行。即辭出去。

上師告弟子法淨條林真人曰：吾以壬寅歲七月七日，當行遠方。汝等於我去後，好用心〔我〕所眷屬，著<sup>⑳</sup>舉身囑累，汝等唯有廣智弟子，懃心流布此法，令一切衆生悉得聞知。族姓子，汝最是吾心中弟子，我所〔出〕法，悉付囑汝。吾今憐愍一切衆生，故欲令解

脫衆難。還正坐，付囑此法已，〔復告〕族姓子：汝等此經尊〔猛〕，極有神力，勸令一切族姓子家男女，供養香華雜華<sup>①</sup>，燃燈續明。復能轉讀誦習，救人疾病苦〔厄〕之人，現世安吉，無復疾病，將來往生文昌宮宿，即生蓮華中，

軀體神仙，得五通無礙智慧，身壽八萬八千歲，更還年少，五通具足，知勇猛健如上仙，皆元陽仙公功值<sup>②</sup>。如是，不可稱計。族姓子，汝當用好紙好筆好墨<sup>③</sup>，至心細書寫此遺文，流布國界。我所出法上下句文，如吾本師元陽仙公所囑妙法，無有錯誤，汝無令妄失一畫一點<sup>④</sup>。族姓子，我憐愍衆生，唯囑<sup>⑤</sup>此經，皆令一切有形<sup>⑥</sup>之類，悉得聞知，心開意解，常行善法，念念不忘，皆行往生清淨，壽命<sup>⑦</sup>延長，神通無礙。

爾時條林〔法淨〕真人，日在世師尊前，一心叉手，舉身穴相，詩毛悉豎<sup>⑧</sup>，戰戰兢兢，一心諦聽上尊所語，不敢妄失一句一文，流淚而言：師尊所囑妙法，至心受持，廣令流布，弟子等受天尊真教，頂禮先師，一心奉行。師

曰：汝等若行若止，若在山林，他方國土，城邑聚落，人民都市，縣官繫獄中，思念此經，宣傳教他，讚誦<sup>⑨</sup>書寫，吾當神化，令汝悉得神通，倍加於今。頂禮師尊，懺然長別。相善因緣<sup>⑩</sup>。

### 元陽上卷超度濟難經品第一

① 此抄本卷首原有缺損，尾題「元陽上卷超度濟難經品第一」。據其內容文字看，應爲《太上元陽經》缺卷。按《正統道藏》所收《洞玄靈寶上師說救護身命經》，其前半篇文字與本卷相當，今用作參校本（簡稱道藏本）。敦煌抄本中俗寫字及缺筆避諱字，逕改不出注。與文義無關之通假字、異文，亦不作校改。

- ② 以上括號中文字，據道藏本補。以下凡據道藏本所補文字，不復出注。
- ③ 如押油殃：道藏本作「如塵沙覺殃」。
- ④ 消滅：原誤作「微滅」，據道藏本改。
- ⑤ 原本此下衍「得度脫衆耶境界何等七仙真人名字亦」十六字，據道藏本刪。
- ⑥ 原本此下衍「我今復告汝等」六字，刪去。
- ⑦ 原本衍作「師師」，刪去「師」字。
- ⑧ 所脩集：道藏本作「所可修習」，近是。
- ⑨ 當說此來既：道藏本作「當說未訖」。
- ⑩ 說是來既：道藏本作「說是已」。
- ⑪ 四面：原衍作「四面面」，刪去一字。

- ⑫ 伏怒：道藏本作「伏弩」。
- ⑬ 昇天仙：道藏本作「未昇仙」。
- ⑭ 撓害：原誤作「遠害」，據道藏本改。
- ⑮ 令讚：道藏本作「吾今謂」。
- ⑯ 道藏本無「勇卒堅勁伏怒日久」八字。
- ⑰ 百千萬歲：原衍作「百萬歲百千萬歲」，據道藏本刪去三字。
- ⑱ 值遇：原誤作「值愚」，據道藏本改。
- ⑲ 例：道藏本作「列」，近是。
- ⑳ 著：道藏本作「若」。
- ㉑ 香華雜華：道藏本作「香花珍果」。
- ㉒ 功值：道藏本作「功德」。
- ㉓ 好墨：原好「好默」，據道藏本改。
- ㉔ 一點：原誤作「一沾」，據道藏本改。
- ㉕ 唯囑：道藏本作「故遺」。
- ㉖ 有形：原作「有刑」，據道藏本改。
- ㉗ 壽命：原誤作「受命」，據道藏本改。
- ㉘ 舉身穴相，詩毛悉豎：道藏本作「舉身肉袒，身毛肆豎」，近是。
- ㉙ 讚誦：道藏本作「讀誦」。
- ㉚ 道藏本無「相善因緣」四字，但其後較敦煌本多出五頁元陽仙人條林法淨傳記，詳見後。

太上元陽經（卷次品名不詳）<sup>①</sup>

元陽仙人林先生者，紫陽仙第二弟子也。其先出自平等離垢穢王宮，是陵龍王之少子也。其所祖述，紫陽為師；其所傳習<sup>②</sup>，元陽上部；其所好玩，神仙第一；其所纂修，宴淨林野；其所屬名，綜繼天文。始年十三，止在大莊華林山中，與大弟子二千人，皆是修具足行，諸根勇猛，無復煩惱。逮成仙品，除七十二結，心得自在，其名曰條林法淨先生。將二千人止在<sup>③</sup>大莊華林山中，歷年精思，即成其第二仙品。皆心不退轉，利得辯才，神通無礙，能蹈波凌風，忽逕萬里，還來止在故處。爾時有天人二萬，諸天仙人俱，復有諸天玉女二萬四千人，心得自在。有大龍天王、羅龍天王、脩忘天王、吉龍天王、進仙天王，各將侍從神仙鹵簿，來詣條林法淨先生所，問元陽上品宴坐之法。爾時先生四眾圍繞，供養恭敬，尊重讚歎，為諸弟子等說無量功

德上仙上品。爾時先生坐乎樹下，入於無量精思，出演無量智見，欲為諸王說元陽第二，即有種種天華而來蓋蔭其上。普遍大眾，如諸世界，五通備具，望上元陽神師下教，即日為汝等說元陽上品。汝等好聽，即當得此元陽上記。爾時先生處林，放大光明神通，上至元陽仙亭，靡不周遍，下至黑暗地獄。爾時諸王上視，皆元陽仙府，悉見彼土一切天人，金城樓閣臺殿，仙人玉女，諸天淨宮，林雲紫閣。但見天人說元陽經典，並見彼方得道弟子等男女陰陽仙宮，受神內契。種種得道人、種種懇行人、種種信解人、種種神通人。諸王見已，即問先生曰：此何國界，莊嚴如是？先生曰：此是元陽，彼土多諸妙寶宮室，亦有山林河海林野，彼人種種因緣，從心所好而求仙記。或見彼國金銀城池，黃金為地，白銀界側，處處行厨，珊瑚為道，真珠為繩，摩尼為床，碑磔為池，瑪瑙緣邊，一切天人澡浴其中。彼國金剛諸珍，奴婢車乘，寶飾輦輦。有大施主，至心迴向元陽

仙所，求著名記，願得度三界第一，諸仙所歎。復有善人，駟馬寶車，欄楯華蓋，軒飾宮殿，其中仙人身肉手足及妻子，布施求仙上品。復有仙人，頭面軀體，欣樂施與，求仙智慧。有大弟子我見天人及諸明王，往詣仙所問無上道，便捨樂土宮殿臣妾等，散髮宴坐，深思泰定，獲五神通，而著青衣，一心玄解元陽上品。或見弟子而作仙人，獨處閑靜，樂誦經典。有一弟子姓焦名林，勇猛精進，入於深山，思惟上品。有一弟子姓周名喬，晝夜離欲，常處空閑，深修泰定，得五神通。有一弟子姓木名林，安心定思，稽首以千萬仙品，讚諸仙法。有一弟子姓察名林，智深志固，能問諸法，聞悉受持，備得神通。次一弟子姓張名陵，照明道教，安國法王，廣化無量，功修治宣，種種教說。次一弟子姓李名過，定慧具足，以無量喻為眾講法，欣樂說古，化諸王子，天人恭敬，五通具足。次一弟子姓富名林，寂然宴然，天人恭敬，備五神通，處林放光，功濟天人，普令入仙品。次一

弟子姓猛名功，處林修志，翼習仙靈。神通具足，元陽第七。次一弟子姓尹名經，未常睡眠，經行林中，勤求上品，智慧神通，力能移山。次一弟姓張名角，威儀具戒，終身無缺，淨如寶珠，以求仙度，深心備慧，以五神通，〔元陽〕<sup>①</sup>第十七。次一弟子姓羽名林，住欲憎上，慢人惡罵捶打，皆悉能忍，以求五通，能訶有德者。次一弟子姓宮名雲，離諸戲歎，妻子布施，以求上品，備得智慧，神通無礙。次一弟子姓姜名媯林，一心除亂，擾心念道萬歲，遊行國界，以求上真，元陽第九。次一弟子姓韓名終，餽膳飲食，百種湯藥，廣療疾病，救度生死，開悟衆生，元陽第十三。次一弟子姓賈名林，千萬幢儀，栴檀寶蓋，衆妙卧具，施給太上，以求仙品，如此人等，元陽第十四。次一弟子姓呂名子，老里先生，清淨園林，華果茂盛，流泉浴池，求施上仙，證爲都伯，決定仙記，元陽第十八。次一弟子姓成名興，種種廣行，出度衆生，歡喜一心，無有厭倦，以求仙品，元陽第二十。次一

弟子姓馬名征，具足行體，種種微妙，說寂滅法，種種教化，無數衆生，觀諸仙姓，無有二相，猶如虛空，乃能分別，如是人等，元陽經中第二十二。次一弟子姓東郭名星林，心如虛空，心無所著，以此妙慧，國界遊行，求人補代，如是人等，元陽第二十四。次一弟子姓梁名石，宴坐林樹，深思元陽神經妙句，無量演說，嚴飾國界，寶臺高妙，五百由旬，縱廣正等，閑於此坐，爲衆讚法，如是之人，元陽第三。次一弟子姓朱名仲，用行一一，高寶臺廟，各千萬幢幡，珠衣露幔，寶鈴彌羅，高坐和鳴玉床，爲衆說法，如是之人，元陽第四。次一弟子姓胡名林，千萬智慧，教諸龍王，人及非人，皆能獲仙，常以香華伎樂，供養諸仙，如是之人，元陽第二十七。次一弟子姓寇名林，少習遊仙，涉登九獄，殊越微塵，供養諸仙，如是之人，元陽第二十九。次一弟子姓趙名林，少修行學，廣度人民，安然清淨，樂誦仙品，如天樹王，開敷一切，如是之人，元陽第三十。次一弟子姓嚴名平，

處林閑坐，放一淨光，我及衆生，見此國界，種種神力，智慧希有，如是之人，元陽第三十一。次一弟子姓子名丹，多行世界，事君思仙，遠適山林，勤求太上，定慧具足，常在日中，我等見此，得未曾有，如是之人，元陽第三十二。

### 太上元陽經

① 本篇據《正統道藏》所收《洞玄靈寶上師說救護身命經》後半篇抄補。從內容文字看，本篇是元陽真人條林法淨及其弟子本行記，應插在S. 482與P. 2450號抄本之間，卷次品名不詳。姑置於此。

② 傳習：原誤作「儒習」，據文義改。

③ 止在：原誤作「正在」，據文義改。

④ 據上下文例補「元陽」二字。

太上元陽經（卷次品名不詳）<sup>①</sup>

（P. 2450 抄本，前缺）

〔諸弟子等上白師尊言：衆生各有緣品，及諸大士、男官女官等。如弟子惟忖，今聖非過去聖師〕，廣演次第，即是元陽昇〔仙大法，演大義經，諸〕法衆聖、男官女官、外契內〔契。我於過去〕諸仙界上，得大莊嚴，神通明了。曾〔見此瑞，放〕斯光明，即說大法。是故當知師尊現視〔變化〕<sup>②</sup>，廣演言教，神通第二。一切諸法，亦復如是。故令弟子等咸得聞知。一切世間難信之人，故發斯瑞。諸男官女官等，若過去無量無邊不可思議劫時，有一王名大相燈清淨法王，應化八萬四千地。其地平政<sup>③</sup>，歡樂饒人，無有山河沙石溝坑，原陸埴阜。其城黃金爲壁，水銀爲池，真珠玉室，瑪瑙華寢，連綿四百餘里，人民慈善。有一弟子名大法林，廣聞諸法，明惠具足，超登無上，化導天人，其義不雜，其音巧妙，具足明白，五

通之相，說法利益，度脫衆生，了一切法空。是爲真人，與上六神王俱次得道，元陽上品真人第二，能成就一切道智。次復有一弟子，名常精進行相大士，名曰明如長相。是人曾於廿二身得生文昌宮，由以宿植德本，靈智自天，稟化玄風，餐訓妙法，積福具備，證果九天，獲慶將來，得蔭太清，凝神天府，功德弘厚<sup>④</sup>，靈獄真府，仙官授手。其所習翫，紫陽仙公太清圖品，應爲第七。未出家時，有一大士，姓李名過，字拯難，智慧具足。其所祖述，紫陽爲師，而每勤學神仙元陽，爲上天圖仙品有焉第二<sup>⑤</sup>。其人能知初仙、中仙、下仙，初善、中善、後善，其義深遠最後。仙真人未出家時，有八從弟子：一名晃林，二名珍珠林，三名意林，四名表林，五名善林，六名樂林，七名寶林，八名除疑林。是人而繫名天宮元陽上品，具足智行，備五神通，威德自在，各領天人。初出家時，思惟樹下，棄捨高位，發大悲心，秉意逃逝，常脩真行，皆爲仙伯，於千萬歲後，所植諸善，悉皆

成就。夜半子時建剛，仰候北斗魁中紫微文昌，忽然而開，但見太上老子乘雲青龍而下，〔下〕則青馬也。謂其人曰：是何真賢？時老子答言：吾是東海小童子李元真人，天人慶會，遣我來下，化子林大士，後能演無量義經，敷元陽神仙第二，天花覆其上，普化世界，六種震動。爾時會中有一年少，厥年十二，姓尹名林，字妙香，上白師尊曰：如我大衆得未曾見，今歡喜娛樂，長跪端心，觀師尊所說，善辭巧妙，善喻方便，能放一大光明，普照一切，令其會中蒙得開明，所爲因緣，照明元陽上品仙聖大品天人之界，其土清淨，得未曾有，故使百千萬歲中，衆生永安大福。條林<sup>⑥</sup>法淨真人曰：吾師說元陽上品以來，曾經六十小劫，不起於座，今欲攝應歸本，正月七日當還天宮，慶集天人。汝等若有一人二人，乃至十人，於我去後，能宣傳妙法，勸化衆生，皆當往生元陽品中，莫得懈倦。六十小劫，天人並位，齊心受記。乃告諸大士等：得條林法淨真人言，今當慶會



天人，其人去後，妙元林與光妙林，應達五通廣智神仙巧利經記，當得淨慧，開悟衆生，號曰淨慧度。真人授記已，便於壬辰年正月七日，忽然去矣。

元陽淨慧度林真人者，生於深妙王宮，其先代積行，勤心翹念，耽讀真經，每習仙記，常所祖述太一元宮。其所脩學太一仙經八百卷，其中廣演言教，化度衆生。說妙林仙記八千卷，滿八十小劫不起於坐，爲人演說。有八弟子：一名晃林，一名妙林，三名教林，四名堅固林，五名燈香林，六名樂林，七名度林，八名化林。是八弟子，皆有明行，於元陽上品第三弟子也，處臺榭園田廣林樹下。有成仙品者，名曰伯皇真人，求在左右，通利誦典，廣演諸經，宣暢至品。曾於大衆過去之世，經六十小劫，其衆嚴敬演教，度一切無數，令入元陽上品。初出家時，有三弟子，見神大聖，諸仙隨從，說此經中無量種義，諸天仙人，當廣分別。吾當說此時，即於天上玄坐虛空中八十小劫，下觀汝等，廣演言教，昇入無量

品，天香寶蓋，天龍仙王，供養人中。一切諸仙世界嚴淨，其土如脂，多諸寶樹，名師子像王宮。即時六種天人神響震動，淨慧度林真人放神通光明，見諸希有之相，悉見彼土一切人民。其土清淨，真珠爲地，黃金爲城，水銀爲壁，白銀爲室，黃青赤繩，連綿其中，瑤界側，水精爲殿，白玉爲樓，處處行樹，園林臺榭，清淨蓮池，華果茂盛。一切衆生受樂其中，連綿相續四千餘里，天光普照，衆寶莊嚴，琉璃頗梨，內外朗徹，不由日月。諸仙供辦餽膳飲食，自然天厨供具餽膳，彼有天人，明淨第一，出乘雲車，駕龍神虎，飛鳳蕭茗<sup>⑦</sup>，四面懸鈴，八方安施，自然伎樂，身色光明，如金寶山，端嚴甚妙，如淨琉璃。內見真金大士，厥名辯慧度厄真人，所從弟子，皆得昇天太一官府，開度無數，因我光明，飛行自在。悉見大衆諸仙，山林精進大士，持戒符契，妙靈<sup>⑧</sup>仙品，猶如明珠。有一弟子名莊妙林，其人脩行，常在山林精進，持戒淨行，施慧忍辱，元陽仙品中，其人第

卅三。有一弟子名大智藏，入深妙定，身心寂滅，度智定慧，求在元陽第卅四。次一弟子名妙梵林，智法深曠寂滅，神智不動，各於其國說法上品，如是之人，元陽第卅五。次一弟子名大梵林，現大神通，其心歡喜，四部弟子，廣演言教，各各相問元陽仙品。次一弟子名觀梵林，好樂至道，天人所尊，三界第一，能讚諸仙，世間希有，如是之人，元陽第卅六。次一弟子名真妙音，廣知一切天人所趣，歸信大行，能奉至業<sup>⑨</sup>，如是之人，元陽第卅七。次一弟子名寶玄林，玄智虛空，照明仙記，每讚陰陽，廣演言教，慶集天人，妙光世度，如是之人，元陽第卅八。次一弟子名智惠深，智慧五通，滿八十小劫，能開世教，不起于坐，所說上妙，深奧難測，號曰月光無上仙師，如是之人，元陽第二。次一弟子名寶妙林，天人並悅。諸法實相，已爲汝說於中長短。十月五日歸還天宮，語諸弟子言：汝等一心精進，當昇天宮，號曰大清天人。如是弟子，皆是元陽仙品，神

通無礙。淨慧度真人說是既已，語諸弟子言：自吾與子仙記斷絕，慶會天宮，有何隔乎？吾至十月五日，當還天宮，上命甚速，告會非常。於是真人還，以此十月五日日中之時，與諸仙衆雲車羽蓋，侍從八千萬人，飛仙天仙無量聖衆，乘空而去。

元陽度太清天人，從義著<sup>①</sup>王宮乘三世界安庠而起，告諸弟子曰：吾受真人智慧，甚妙甚深無量智慧，見生智慧門，五神洞朗，請根猛利，饒益衆生。一切世間難解難了，難入一切，天人所不能及。所以者何？吾曾見親近百千萬<sup>②</sup>（億無數真人大士，盡行無量大道，勇猛精進，名稱普聞，成就甚深，得希有法，獄靈天圖仙官授法，下化三界，隨宜啓導。吾從成真人以來，種種姻緣，種種譬喻，廣演言教無數，方便引導衆生，令離諸染著。所以者何？吾之方便知見深遠，皆以具足百姓子人。我太上先師，其智廣深遠，無量無邊，無所畏憚，心定解脫，深入秘藏，知見無際，成就一切未曾有法，皆至天宮大

妙仙圖元陽上品大仙。寶經種種，分別巧說諸法，言辭柔軟，悅可衆心。百姓子等，取我要言之法，無有限量，承我所說，悉皆成就，不可思議。子等不須復說。何以故？我所成就，微妙第一，義趣難解，唯吾上師乃能分別。諸法深奧，不能究盡。吾今有如是相，有如是性，如是體，如是力，如是作，如是緣，如是因，如是果，如是報，如是本末盡等究竟。爾時天人授記與信行善男善女，一切咸使聞知，悉皆開悟。

乃<sup>③</sup>天老玄淨王少子，其先出自慰田王宮。其所祖述，大寶爲上；其所脩習，太清經八千卷，能廣演言教，六十小劫不起於座，本從無數，具足諸行，甚深甚妙，難見難了。有從弟子三人：一名玄妙真人，二名證果真人，三名明智真人。然此弟子有大聖行，能說法元陽仙品，千日千夜不起於座。次一弟子名真梵林，諸根猛利，甚深微妙，行此諸品，還得成果，我以悉知如是大果，元陽功德。次一弟子名大梵林，種種方便，我及十方諸餘衆生，悉

能演化，開悟暗冥。次一弟子名真淨林，其人智慧，信力堅固。及諸弟子煩惱漏盡，住是最後，悉皆昇天太上仙宮，依位各處。<sup>④</sup>

① 本篇敦煌P. 2450抄本首尾均殘缺，無經名卷次。其文字與《正統道藏》所收《太上元陽經》卷四《問行品》大致相當。按《道藏》本卷次品名疑有訛誤。今據抄本內容，接在S. 482抄本及條林法淨真人記之後。此三篇當合爲一卷。

② 敦煌抄本卷首原有缺損，以上括號中文字，均據道藏本卷四補。下文同此，不復出注。

③ 平政：當作「平正」。道藏本作「平整」。

④ 弘厚：道藏本作「彌厚」，近是。

⑤ 有焉第二：疑衍「有焉」二字。道藏本無此四字。

⑥ 條林：原誤作「脩林」，據道藏本改。

⑦ 蕭茗：道藏本作「嘯歌」，近是。

⑧ 妙靈：原誤作「妙零」，據道藏本改。

⑨ 至業：原誤作「志業」，據道藏本改。

⑩ 義著：道藏本作「無著」。

⑪ 敦煌抄本止於此行，以下缺文據道藏本補。

⑫ 道藏本「乃」字原誤作「及」。此字前疑脫漏「元陽度太清真人」之名。

⑬ 道藏本卷四止於此，疑有缺漏。按《上清道類事相》卷三引《本相經》云：「太清玉寶臺，法靜真人說《元陽經》處也。」當即本卷佚文。

太上元陽經（卷次不詳）<sup>①</sup>

（P. 2366 號寫本，前缺）

太上元陽經觀山品第十六

元陽真人時遊禪黎世界，南有研嘉山，廣二千里，在大海中，其水深廣，無能道者。爾時真人與諸門徒眷屬，仙真上聖，雲車羽駕，到研嘉山。其山乃仙宮靈館，香樹寶林間錯行列，有寶蓮華以爲嚴飾。其地清淨，妙麗希有，華蓋香雲，彌覆其上，充滿一切，妙香之種，皆出彼山林海坦之上。有三仙宮，其地平整清淨，園林廣嘉羅山。樹下有二天人，講元陽上品第一仙品，法不可壞，平等安隱，二萬四千年不起於座。其人清淨種種，教中有上師，名曰妙元林，演化莊嚴。金玉爲地，悅可衆心，寶輪羅網，彌覆其上，種種寶華，以爲嚴飾，雜種衣服，珍妙法輪，隨次遍布一切大地。天人朝觀寶林瓔珞，思

其土壤離垢莊嚴，光明外照，妙香雜寶，悉充滿足。光明流照，遍一切處，無不明徹，彌滿十方，寶華遍覆一切大地，悉能長我及天人功德，大德大辨，興一切雲雨，流滿虛空。光明普照，猶不可盡，悉入一切天人所願，常能廣見一切法，具說我界能<sup>②</sup>出甘露，雨於大地，一切下土得如所願，三世第一，隨順天人大士富林，於彼大地，皆悉能現。此國莊嚴清淨，寶蓋一切，天人亦悉入中，衆寶莊嚴。十方天人常住其中，常聞天人一切發願，及諸弟子等，自在神力，多重寶光，莊校嚴飾，離垢嚴淨，演出妙音，示現一切諸仙世界，充滿法門，土界清淨，猶如虛空。有得富林，所願者成也。諸仙境界，元陽第三，無量智見。彼得清淨勝妙樂世界，神通自在，能入無邊諸法海。彼有大

地，辟方四千餘里，衆香水海，衆寶莊嚴，一切皆香，真珠寶玉以爲其岸，真珠羅網彌覆林上，衆寶色水盈滿其中，一切衆華皆悉開敷，練末栴檀以香其水。常出天神妙音不絕，衆香次第普

薰十方，雜寶爲階道，真珠爲蘭楯，衆寶潮浪，出妙音聲。

塵沙天際，十二萬歲等起一寶樓，臺殿宮館，金玉爲道，周匝圍遶無量天人，十二萬歲衆寶樹下，不起於座。衆寶華城以周其外，十方國土一切境界〔無量天人〕<sup>③</sup>，十二萬歲一一皆居蓮華樹下。卅八里敷鮮茂盛，遍滿水上，其香普薰一切世界十方國土，十二萬歲香樹不朽，以爲莊校。乃有嚴淨大地之處，香水寶海，清淨寶地，常安住之，金剛堅固，不可殞壞。真珠寶帳，華香瓔珞，離垢清淨，香水湛然，滿衆寶池，華光奕奕，妙聲悅樂，自在神力，衆仙澡<sup>④</sup>浴，遍滿其中。衆珍莊校，八交階道，處處嚴淨，地安不動，真珠妙寶，以爲蘭楯，光明徹外，悅可衆心，寶樹羅生，緣其道側，真珠寶飾，煥明曜日。中有神人，演出無量，和雅邕邕，音歎元陽。香水深濡，湛然不流，衆仙妙華，而遍圍遶，一切香華，自出光明，各各所照，不由日月，清淨具足。寶幢干雲，垂幡旌旗，有聞見者，莫不馳奔，皆

往觀之。衆寶華城無量寶色淨光，上徹下照，靡不周遍，一切具足。垣墻周匝而圍遶之，種種雜樹，珍寶莊飾。然此仙館，富林清園，寶樹相接。

非過去時無數無量無邊彼處，一切自在神力，一一香水海，有四天下九百萬坦香水之池，與諸池交合，互相流入，種種寶華彌覆水上。彼土香水，皆從大輪山中出，多有真珠寶玉，化領四海，汎風隨流入於芳園，溉灌五菓。園林樹木，香華雜萊，多有異菓，朱實華林，綺靡麗日，及諸無量珍琦，淨妙階道，七寶爲墻，行樹婀娜，蔭蔭相接，水精玉銀，以爲蘭楯，上植蓮華，一切妙色。清淨香水，處處波浪，衆音和諧，演上部元陽列仙圖品。栴檀寶帳，處處憩息，無量雜寶，迴復還入，種種香光，常流一切。一方<sup>⑤</sup>境界天人，光明時時一現，放光下照無量衆香世界。天人道場，寶華灑地，衆寶香河，盈流滿淵，陶設鼓作，多有龍遊，師子猛獸，白鹿麒麟，鳳凰鸕鷀，蛟龍遊仙，神魚熠熠，投波海源。諸羅縵彌覆其上，天

人浮止，演我音聲，常不令絕。一切天人，普及大士，上及元陽受仙童子，於彼寶岸，常得安住，七十萬歲不起於座。漸漸盈滿，昇天仙界元陽宮宅，五通第一。

### 太上元陽經淨土品第十七

元陽淨土海世界者，六主龍王也，各領四大海微塵淨土，寶如蓮華藏世界，海中一一境界。有一世界，名曰海微塵莊嚴，諸天仙人皆來集中香水海上。有不可思議無量微塵王世界，姓好和氏，世界人民皆坐蓮華中，脩習無爲，在無量色蓮華下住。或有依真珠寶樹下住，或有依諸七寶網羅樹下住，或有依種種衆生土界住，或有依天龍王宮住，或有依真珠寶住，或有依諸寶山玉嶺下住，或有依河坦止住，或有依轉龍王住，或有依水之流坦上住，或有依樹香龍王住，或有依樓觀住，或有依海虬王王<sup>⑥</sup>住，或有依雲彌王住。如是種種天人，布四天下，依止其土。其

土堅固清淨，諸仙仙壇淨室，離垢解脫，光照宮殿，依止種種無量衆生，香海方便莊嚴，衆色寶山，種種香樹，琉璃宮殿，種種莊嚴，千門相似，萬戶若一，諸身華藏，寶雲光明，充滿世界，寶地海藏，不可殂壞，清嚴無量。或有妙音與諸世界，自無常住無數萬歲，樂彼樂土，自在神力，行雲聲教衆生無量，最勝第一妙樂世界。時我入門，見諸壇場宮館妙室，不可思議。無數天人，一切滿中，無盡無量，普皆自在，何者可尊，何者可卑，不知不識。先師何處？其室廣大五百餘里，中房外房一千七百。彼<sup>⑦</sup>衆香海中，有一香樹高七萬丈，海名樂光明。有一香樹方圓七十六里，真珠寶玉，莊嚴蓮華，上有世界，名清虛寶縵，中有一王，號曰離垢淨眼廣大。彼世界上過十二萬里，仙壇上有一國世界，名雜香蓮華勝妙莊嚴，依寶縵虛空王宮住，形如師子座，天人號曰師子座王光明最勝照。彼世界上過<sup>⑧</sup>十二萬里，仙壇上有世界，有一天人國，名寶莊嚴光明，依諸業住，

如日輔雲，天人號曰廣大光明智勝照。彼世界上過十二萬里，有一仙壇，上有一世界，有一天人國，名雜光蓮華，天人號曰金光明極大精進普起香林。彼世界上過十二萬里，有一仙壇世界，有天人國，國名無畏嚴淨，天人號曰平等莊嚴妙童幢林。彼世界上過十二萬里，有一仙壇世界，有天人國名華開淨炎，天人號曰受海功德稱玉林。彼世界上過卅八萬里，有一仙壇世界，有天人國名總持，天人號曰淨智慧海雲。彼世界上過卅萬里，有一仙壇<sup>⑧</sup>世界，有國名曰解脫聲，天人號曰善相幢林。彼<sup>⑨</sup>世界上過廿萬里，有一仙壇世界，有國名曰善住金剛不可破壞，天人號曰淨羅不壞林。彼<sup>⑩</sup>世界上過十八萬里，有一仙壇世界，有國名曰華林赤蓮華，天人號曰雜寶鬢知王。彼世界上過十八萬里，有一仙壇世界，有國名曰淨光勝電天人藏，天人號曰能起一切所願功德林。彼世界上過七萬里，有香水海，名淨光炎起，中有世界人，名善住氏。次上六萬里，復有香水海，名

金剛眼，中有〔世〕界人，名法界等起氏。次上五萬里，有一香水海，名蓮華平正<sup>⑪</sup>，中有世界人，名出十方化身氏。次上<sup>⑫</sup>四萬里，有一香水海，名寶地莊嚴光明，中有世界人，名寶林莊嚴氏。次上三萬里，有香水海，〔名〕化香炎，中有世界人，名清淨化氏。次上二萬里，復有香水海，〔名〕寶幢，中有世界人，名天護念林。次上一萬里，有世界人<sup>⑬</sup>，名衆色普光天民。如是次上九千里，有一世界名、香水海〔名〕及世界人名，如是一方，十方亦復如是。〔如〕是眇行上行，過此世界里數，乃至元陽天宮耳。過是元陽天宮卅八萬里，有一世界長寶光明，長壽無量，國土平正，名住莊嚴，人姓無爲。過此世界卅萬里，有一世界名登上上王<sup>⑭</sup>大炎天宮，人民長壽，清淨無爲。過此世界卅萬里，有一世界名天越輒功德果，人民熾盛，壽無量歲。過此世界卅萬里，〔有一世界〕<sup>⑮</sup>名重華幢王宮，人民壽無量歲。最上天人名曰無極天宮，上卅萬里有壯士天宮，上卅萬里有供正天宮，

上卅萬里有智妙天宮，上卅萬里有寶相天宮，上卅萬里有雲陽天宮，上卅萬里有元陽天宮，上卅萬里有大勝妙元陽天宮。如是次第，說不可盡。皆有金色栴檀，明雲安住，世界莊嚴，自在神力。大勝妙樂元陽宮府，有一無量自在王，無量妙幢天人，自在崑崙天人，無量充滿天人，八嶠四維莊校天人，梵寶輪釋天人，寶月幢王天人，金山寶形天人，界處梵釋天人，師子坐寶天人，主月形天人，惡論王天人，明論種智天人，壽命一切<sup>⑯</sup>天人，壽命香積天人，如光太妙天人，太如不思洪正天人，壽命百劫天人，無量王天人，龍主自在王天人，他香壯士天人，他方一境天人，嗟嗟天人，太一天人，太寶天人，玄府天人，中里天人，降伏天人，種色天人，普門天人，植因果天人。然此天人等，五通第一，各各將弟子無鞅數，先住元陽宮外，一匝十二萬九千里，起宮觀舍宅，常住一切天下。

## 太上元陽經莊嚴品第十八

海契仙經元陽童子，始年十四，乃往久遠日過去世界時一海微塵數劫，東行過是數長樂世界，國名海世淨光。其土平正，權晏饒人。中有世界，名勝妙音，依止嚴淨浴池，上有華縵海王，清淨無穢。其北有崑崙山塵數世界，以爲眷屬無量寶莊嚴王地，有三百重衆寶圍山，高廣嚴淨，周匝圍繞。其世界人民，姓形如依止<sup>①</sup>，方丈山南大有宮殿莊嚴，以念爲食，養彼世界人民中和姓忠。中有香水大海，廣以四千里，海名清淨光林。世界香海中有崑崙山，名大炎華莊嚴幢，以十種寶蘭楯圍遶。彼山王有林觀，名寶華枝，以無量華樓閣、無量寶幢樓閣、無量紺寶縵，種種華莊而莊嚴之，無量香雲彌覆其上，十億百千城周匝圍遶。於林東有一大城，名曰炎光純香所城，面有四萬里，七寶爲郭，周匝圍遶。其城樓觀，雜寶莊嚴，覆以雜華及諸寶網，微

妙風吹動，出妙音聲。其城有門一萬二千，寶幢而莊嚴之，十億園林。城中衆生，皆悉成就<sup>②</sup>，業報神足，行同諸天，一切所欲，應念即至。彼林南有一天城，名樹華莊嚴。次有龍城，名曰究竟。次有夜叉城，名金剛勝。次有勝妙莊嚴幢王城，次有乾王城，名曰離垢善。次有興王城，名寶輪地。次有樓羅城，名衆寶莊嚴善光。次有吉王城，名娛樂莊嚴。次有王侯城，名寶金剛幢。時彼林中有一道場，名寶華莊嚴。其道場前有大蓮華，名華炎具足，縱廣廿萬里，十億蓮華眷屬圍遶。時彼世界過百歲已，天人出世，如是次第有其崑崙山塵數元陽童子，出行興化於世。其最初天人，名曰一切功德本勝崑崙山王。時天人處彼大蓮華上，分身萬國，目中出光明，照一切功德，覺有十方天人世界塵數，光明以爲眷屬。彼光滅除一切衆生煩惱蓋郭，令得淨心起功德海，永離三惡八難，諸趣散神仙樹下，廣弘誓願。諸天人時，彼炎光城中有王，名處見善惡。其王統領萬億

諸城，有三萬七千天人采女，二萬五千童子。其一弟子名功德勝，次名普莊嚴。童子見天人無量自在功德，善根因緣，故即得十種三世，廣地方便海世三童<sup>③</sup>，名曰童子具足功德三世、普門方便三世、淨光方便三世、教化衆生三世、一切音聲充滿三世、無量功德識向三世、如寶覺諸法三世、廣地方便海三世、契勝解脫三世<sup>④</sup>、一切知見光明三世。猶如千日競出東方，虛空靡不照耀。離垢淨坐，思惟道場光明，如是無量萬億難遇導師，出興於世，一切最勝。觀察天人光明如雲，難可思議，一切悉見如對面。因毛孔放光，如雲而下，不可量數，隨生諸讚我無量。衆生遇我，如子見父，離苦出家，悉皆安隱快樂，喜戲充滿，如子見母。觀察天人充滿十方，放真珠寶光，讚歎諸天，常住道場，染妙音聲，譬如渡水。渡水已解滅諸苦，淫我自在，一切恭敬，懽喜無量。譬如行人到家，歡喜及見眷屬，父母兄弟、夫婦子息<sup>⑤</sup>。乃至天人得道，亦爾往詣王所，瞻仰恭敬。元陽童

子，諸仙第一，童聲柔和，於彼世界無有不聞。譬如天子征伐鄰國，大獲利安，功成作樂，慶會諸侯，吾亦如是。元陽童子知見<sup>25</sup>（以下原缺）。

① 本卷有敦煌抄本兩件。P.2366 號抄本，由《洞淵神咒經》、《太上元陽經》、《本際經》三種經文粘貼而成。其中《元陽經》保存《觀山品》第十六、《淨土品》第十七、《莊嚴品》第十八。首行品題下有一「八」字，不知是否第八卷。臺北4717 號抄本，首尾殘損，文字與P.2366 抄本第55-166 行相當，今用作參校本。

- ② 「能」字原誤作「純」，據文義改。
- ③ 無量天人：四字據文義補。
- ④ 「澡」字原誤作「藻」，據文義改。
- ⑤ 一方：疑當作「十方」，或作「一切」。
- ⑥ 海虬王王：疑當作「海虬龍王」，或作「海虬王」。
- ⑦ 「彼」字原誤作「被」，據後文例改。
- ⑧ 「過」字原誤作「遍」，據前後文例改。
- ⑨ 「仙壇」上原衍「世界」二字，據前後文例刪。
- ⑩ 「彼」字原誤作「使」，據前後文例改。
- ⑪ 「彼」字下原衍「有」字，據前後文例刪。
- ⑫ 此二句原誤作「有一世界名香水海蓮華平正」，據前後文例刪改。
- ⑬ 次上：原誤作「上復有」，據前後文例改。
- ⑭ 此句前疑有脫漏文。
- ⑮ 登上上王：臺北4717 作「登上王」。
- ⑯ 以上凡括號中文字，均據前後文例補。

⑮ 一切：臺北4717 作「一劫」，近是。

⑯ 此句文義不通，疑有訛漏。

⑰ 成就：原誤作「成就」，據文義改。

⑱ 此句八字疑係衍文。

⑲ 此上二句原誤作「廣地方便海契三勝世解脫三世」，據前後文例改。

⑳ 子息：原誤作「子自」，據文義改。

㉑ 按《上清道類事相》卷四引《元陽童子淨土經》云：「脩多童城，純以水精爲壁，純金爲梁柱，蓮華覆樓層，珊瑚爲椽，白銀爲楹，黃金爲檀櫺也。」當係本卷佚文。

### 太上元陽經卷十（品名不詳）<sup>①</sup>

（S.3016 抄本，前缺）

□□□□□□□□□□精進三界智慧威神  
□□□□□□□□□□喜念諸仙法海窮深極  
□□□□□□□□□□勝敬怒聖人承無人雄  
□□□□□□□□□□廣大智慧神妙光明威  
□□□□□□□□□□道齊仙法王過度衆生生死摩  
□□□□□□□□□□解脫，布施調意。我思惟精進，如是  
三界，智慧爲上。五<sup>②</sup>誓得仙道，普行  
此願，一切恐懼，爲作大安。假令有骨  
百千億萬，無量大聖，數如河沙，養育  
一切。斯等諸尊，不知求道，堅心正  
意，譬如河沙。諸仙世界，復不可計，  
無數道士，光明悉照，遍此諸國，如是  
惟進，威神難量，令我作仙，國土第一。  
其衆奇妙，道場超絕<sup>③</sup>，國如琉璃，而無  
等雙。我當哀愍，度脫一切，十方來  
生，心悅清淨，已到我國，快樂安隱，達  
仙信明，是我真證，發願於彼，力精所  
欲。十方世界，智慧無闕，常令此尊，  
知我心行。假令身止諸苦毒中，我行

惟進思，終不悔也。

元陽仙公告弟子等：天下<sup>④</sup>九十六種道，無極最尊；九十六種法，神仙最真；九十六種弟子，赤松子最上。所以者何？吾從十二萬劫以來，發願誠諦，願令積德，誓為衆生開導，無男無女，頭面血肉，以用布施，無戀愛之心。有若虛空，無所不覆，六度四等，衆善備德，惠城<sup>⑤</sup>仙品神通，遨遊飛行世界，天上天下天中。我尊相好無比，去來見在，無不照然朗達，三界尊仙，諸天不及。我言信重，震動天地。其有衆生，發一敬心，向元陽仙庭者，勝獲大千世界珍奇好寶。說卅七品十二部仙經，分別罪福，言皆至誠，開三明白通之教。若得奉聞者，歡喜樂欲出世，信我行法，志尚清高。衆仙之中，有四雙八輩十二賢士，捨世貪靜，道世開福，天人路通，衆仙之由矣，甚為最尊無上之道。諸仙弟子，緣此天亭，應真皆從中出，教化一切，度脫群生。我說是時，天帝衆仙，一切衆會，皆發無上正真大道，不可稱計。時天人等得

法，徹眼皆見元陽仙宮，諸城聚落人民，都市國王臣民。香林世界諸七寶樹下，坐高廣坐，妙不可稱計，猶如靈端華也。

梅檀香樹、琉璃妙香樹、七寶樹、金樹、銀樹、琉璃樹、頗梨樹、珊瑚樹、馬瑙樹、車磔樹。金樹銀葉華菓，銀樹金葉華菓，珊瑚樹瑪瑙為葉華菓，馬瑙樹琉璃為葉華菓，車磔樹衆菓為葉華菓也。

有七寶樹，紫金為本，白銀為莖，琉璃為枝，水精為條，珊瑚為葉，馬瑙為華，車磔為實。

或有<sup>⑥</sup>寶樹，白銀為本，琉璃為莖，水精為枝，珊瑚為條，馬瑙為葉，車磔為華，紫金為實。

或有寶樹，瑠璃為本，水精為莖，珊瑚為枝，馬瑙為條，車磔為葉，紫金為華，白銀為實。

或有寶樹，水精為本，珊瑚為莖，馬瑙為枝，車磔為條，紫金為葉，白銀為華，瑠璃為實。

或有寶樹，瑠璃為本，馬瑙為莖，

車磔為枝，紫金為條，白銀為葉，珊瑚為華，水精為實。

或有寶樹，馬瑙為本，車磔為莖，紫金為枝，白銀為條，瑠璃為葉，水精為華，珊瑚為實。

或有寶樹，車磔為本，紫金為莖，白銀為枝，瑠璃為條，水精為葉，珊瑚為華，馬瑙為實。

行行相對，莖莖相望，枝枝相準，葉葉相向，華華相順，實實相當，榮色光曜，不可稱視。清風時發，出五種音聲，微妙宮商，自然相和。天人普集，坐千樹下，廣坐高妙。樹高四百萬丈，其本周圍五千餘尺，枝葉四布卅七里，一切衆寶自然合成。以月光摩尼持海輪，寶衆妙之仙而莊嚴之。周匝條間，垂寶瓔珞百千萬色，種種異變，八十萬光明，照曜無極太上。無數彌妙寶縵，羅覆其上，一切莊嚴，隨應而見。微風條動，吹諸枝葉，演出十二萬億妙法音聲，其聲流遍諸仙世界〔國〕<sup>⑦</sup>土。其間人民聞其音者，得染法慧，住不退轉心，至成仙品，不遭苦患。目霏其色，



鼻知其香，口甘其味，身觸其光，心〔覺〕以法，皆得甚深法品，太上上清玄道，氣六<sup>⑥</sup>相徹，都無所煩惱。若彼國天人見樹者，皆當往生妙樂世界，成我元陽第三弟子。一者〔名〕音雲王真人，二者名柔順王真人，三者名無上生法法忍真人，此皆元陽壽真弟子。威神力故，本願力故，滿足願故，明了願故，堅固願故，究竟願故。

元陽仙師告諸弟子：世間帝王有百千音樂，自我宮商，乃至第六天上伎樂，音聲展轉，勝千億萬倍，不如我許。假使第六天上萬種樂音，不如我界衆仙上品。吾有無量七寶樹一種，音聲千種，億萬倍<sup>⑦</sup>勝於下方。第六天宮亦有自然萬種伎樂，有其樂聲，無非法音，清揚和雅，其音哀亮，十方世界音聲之中，仙品最上，妙樂第一。有種種講堂淨室、宮殿樓觀仙臺，皆以七寶莊嚴自然化成，復以真珠明月、摩尼衆寶，以交露覆蓋其上，內外左右諸香浴池，或十由旬，廿卅〔由旬〕，乃至百千由旬，縱廣深淺卅萬丈，直東南流八十

六百萬億。諸所經歷衆仙界土，功德之水湛然盈滿，清淨香潔，味如甘露。黃金池者，底有白銀沙。白銀池者，底有黃金沙。水精池者，底有琉璃沙。琉璃池者，底有水精沙。珊瑚池者，底有虎碧沙。虎碧池者，底有珊瑚沙。車磔池者，底有馬瑙沙。瑪瑙池者，底有紫金沙。紫金池者，底有白玉沙。或有二寶三寶，乃至七寶，轉共合成其池。岸上有栴檀樹，華葉垂布，香氣普薰<sup>⑧</sup>。天仙妙香、葉林曇雲日香、未吒甘香、紫珠薰香等，雜色光茂，彌覆水上。彼諸仙人，乃大仙都伯，清信男女等，若入寶池，彼意欲令水沒足，水即沒足；欲令至膝，水即至膝；欲令至腰，水即至腰；欲令至項，水即至項；欲令灌身，自然灌身；欲令還復，水輒還復。調和冷暖，自然隨意，開神仙歷<sup>⑨</sup>悅體，蕩除穢汗，漱洗垢膩，去清明涕澄漢淨若無人頂<sup>⑩</sup>，視之無形，寶眇映徹，無深不照，微瀾迴流，轉相還住，安詳除折不遲不務不疾<sup>⑪</sup>。波揚無量自然妙聲，〔聲〕隨所應，莫不聞者。或

〔聞〕仙人妙聲歌欲<sup>⑫</sup>，或聞赤松子法聲清淨，或聞男女歌聲俗響。或爲〔清〕淨玄中之音，空無我聲。我有大慈悲想，聲振大千世界，下至卅八地獄，上至大竟太清無極天宮。或十方世界<sup>⑬</sup>無畏天下，不共法聲、諸通慧聲、無所〔畏〕聲、不起滅聲、無生忍聲，乃至甘露灌頂衆妙法聲，如是等聲，稱其所聞者，輒得歡喜無際，隨順清淨離欲寂滅無言真實之義，隨順元陽仙亭力無所畏不共之法，元陽爲師，隨順通慧所行之道，無有三塗苦難之名，但有自然快樂之音。是故元陽仙境，名曰最勝安樂。諸仙神人百千萬億，皆當往生妙樂世界，具足三明，學道六通。如是清淨色身，諸妙音聲，神通功德，所處宮殿，衣盈飲食，衆妙華香，莊嚴之具，猶第六天自然之物。若欲食時，七寶槃器自然在前，諸仙玉女雲隕送觴，金銀、琉璃、車磔、馬瑙、珊瑚、琥珀、明月、真珠，如是諸器，隨意而至，百味飲食，自然盈足。雖有此食，實無食者。但見色女行香供養，神以爲食，自然飽

滿，身心柔濡，無所味著。事以化去，時至復現。元陽國土，清淨安隱，微妙快樂，次於無為長樂我淨神通之道。其靈壇廣眾仙宅，諸天仙人智慧高明，神通洞達，大同一類，形無異狀，但因順餘方。故有天人之類，〔形〕貌端正，超世希有，容色微妙非〔常〕。天人皆受自然虛空之身、無極之體，與道氣合成天地也。

太上元陽經卷第十

① 此卷原抄本卷首殘損，尾題《太上元陽經》卷第十。其內容與《道藏》本卷十截然不同，亦不見於《道藏》本其餘各卷。本卷中兩次提及「赤松子」。按唐釋法琳《辯正論》第八引《元陽經》云：「赤松子遊仙，觀元陽宮宅中變化事，其中備有華嚴善才童子求善知識，入法界及現神通」等語。當即本卷佚文。

- ② 「五」字疑當作「吾」。
- ③ 超絕：原誤作「起絕」，據文義改。
- ④ 天下：原誤作「無下」，據文義改。
- ⑤ 惠城：疑當作「慧成」。
- ⑥ 或有：原作「或為」，據後文例改。
- ⑦ 原漏「國」字，據文義補。以下凡括號中文字，均係擬補。
- ⑧ 氣六：疑當作「六氣」。

- ⑨ 億萬倍：原作「億萬億」，據文義改。
- ⑩ 薰：原誤作「勳」，據文義改。
- ⑪ 「仙歷」二字當係衍文。
- ⑫ 此句文字有訛誤，疑當作「清明潔澄，淨若無人」。
- ⑬ 此句文字有訛誤，疑當作「安詳徐折，不遲不疾」。
- ⑭ 歌欲：疑當作「所欲」。
- ⑮ 世界：原誤作「世唯」，據文義改。

(王卡點校)

# 100 洞玄靈寶上師說救護身命經

經名：洞玄靈寶上師說救護身命經。撰人不詳，約出於南北朝。係《太上元陽經》缺卷。底本出處：《正統道藏》洞玄部本文類。

爾時上師在蒲林國中，坐繁華樹下，臨欲昇天。乃有一弟子名曰條林法淨真人，及諸得道大弟子等一切諸天人，皆來集會師所，各各正坐，白上師言：弟子等願師少坐，留神布化，然後昇天。師告弟子族姓等：於我去之後，五百世中，一切衆生當惡鬼衆邪蠱道，奪人精氣，求人長短，橫來殺者。條林法淨真人言：亦好勤心流布此經，令惡世中衆生無有病苦，無有橫死，衆邪蠱道悉皆消滅。我所囑累，唯

有斯經。若有衆生，無男無女，有能讀此經一句一偈者，衆邪惡鬼不得妄來侵近。若在荒野中，山林中，若厄難中，若在大火中，若在大水中，常當讀誦此經，悉能斷除。何以故？此經有大威神力，出元陽上品中。常當讀誦，若不能讀者，但當著懷中。至心受持此經者，則得仙道，善神營護。若過去世、未來世、見在世，諸弟子等皆蒙先師神力，早度八難。若欲遠行，常當持去處處村落，王化大城。人民都市中行時，一心爲人演說，功德無量，能有須臾聽者，所願悉得。弟子等，吾不虛言此經，吾上師太玄元陽仙公之所出，演化祕要，其難可得。譬如妙藥能愈毒病，能斷惡毒，有人持行諸惡毒蟲，衆邪蠱道，欲來爭害，聞此藥氣，四向散去。汝等一心讀誦之者，諸魔鬼神不敢迴視，此經神力，亦復如是。若有病痛者，當淨洗浴身體手足頭面，一心爲人讀誦，衆病除愈。

上師復告條林法淨真人言：若有惡鬼魔兵、衆邪蠱道不隨我言者，吾當

使此魔曹送付玄都鬼律，受罪如塵沙罽殃悉皆消滅，無有遺餘。吾即舉七仙真人名，亦得度脫衆邪境界。何等七仙真人？第一廣維衛真人，第二式法真人，第三隨葉真人，第四拘正林真人，第五拘正玄林真人，第六淨德真人，第七釋龍種真人。若有苦厄病痛者，便當讀誦此七真人名，諸惡蠱道悉皆消滅，無得侵近。我說此已，復憐愍告汝等：我今復憐愍衆生故，便演說此經元陽上部。復有六神仙人名字：一名羅法真人，二名羅上真人，三名加陽真人，四名勲度真人，五名頭劉真人，六名郗林真人。此是六仙人名字，汝等若有衆生，無男無女，無貴無賤，若有苦厄難者，皆當誦六神仙人名字，所患悉除，衆惡疾氣，不得來近，一切滅盡，無有遺餘。

上師告條林法淨真人曰：汝一心善聽我所陳矣，若有無數弟子，及諸得道真人，及諸天神王、一切天人，我昇天去後，若有受持我所囑累妙法，我等常當晝夜擁護，令得安穩。條林法淨

真人白上師尊：弟子當於得道度世將二十五真人，於惡世中，能有讀誦此經者處，弟子等晝夜在其左右，擁護是人，衆邪魍魎不得來近，常使是人卧安覺安，修行善法。師謂弟子曰：善哉善哉！汝能擁護我百千萬劫中所修習，即成神仙，元陽上品第一弟子耳。當說未訖，復有四山神王各將眷屬部曲，行正長跪，叉手言師尊：我等於師尊升天去後，各將斯等眷屬累安行國界。有能讀誦書寫受持此經，我等眷屬常來隨逐是人，晝夜擁護，令不見惡。是人欲行曠野者，我常隨逐導從，勤力擁護，不離是人，不令惡鬼妄來侵近，常得充足，不令饑渴。所欲求者，我等山神王遣諸軍將吏兵，悉令供給，如其所願，無所乏少。何以故？是人能流布此經，修行善法，供養仙寶，元陽上品，繫其仙簿，令不斷絕。說此已，復有七山神王等各各長跪，叉手於上師前，一心稽首，白師尊言：我等山神王領衆無數，上有百千天人，常當飛行於惡世中。人間有能讀誦書寫受持

是元陽却魔經者，我等山神王與天人齊執，與其眷屬共到天上。是人所住之處，受此法典，常當守護，晝夜不離其四面。擁護是人，衆魔惡鬼不得奪其精氣，不得橫來絕命，不得橫來擾害，不得求其長短，不得觸厭，令毒不行。我等眷屬常來在其人所住，於空虛中，是人若遇大火，我等山神王力隨其方便，救護其身，不令大火所燒。若遇大水，悉決漂去，我等山神王力即於空中來接是人，不令見溺，水即淳住，得度水難。若遇大賊，我於四面救護是人，能使賊心刀仗不舉，即發慈心。若遇官法繫縛枷鎖，晝夜愁苦，我等山神王力各各將眷屬軍將吏兵，於虛空中，能令其官心生歡喜，悉令放赦，皆得解脫。我等山神王力眷屬軍將吏兵伏弩，一心救護，不令他緣而得擾亂，於無數國土人民、聚落城邑劫中，常念是經。何以故？此經仙聖殷勤所囑之法，其文流布，法應宣傳。若有未昇仙道士，逕行林野，止息樹崖者，若有山神魔女、崖響惡精、魍魎魍魎來欲撓害

之者，我等山神王力能令是不生畏想，存思如故。上師言：吾今謂汝等山神王承從，善哉善哉！汝等軍將吏兵曾於過去世時，至百千萬歲劫中時，值遇百千萬億諸仙上品元陽經卷第八之中，濟度衆生神通第八弟子之列。汝等能流布此經經法，讀誦書寫，方便救護，不令見惡，常行善法。爾時山神王等與諸眷屬軍將吏兵頂禮師尊，一心奉行，即辭而去。

上師告弟子條林法淨真人曰：吾以壬寅歲七月七日，當行遠方，汝等於我去後，好用心我所眷屬。若舉身囑累汝等，唯有廣智弟子勤心流布此法，令一切衆生悉得聞知。族姓子，汝能聽受，是吾心中弟子，我所出法，悉付囑汝。吾今憐愍一切衆生，故令解脫衆難。還正坐付囑此法已，復告族姓等：此經尊猛，極有神力。令一切族姓子家男女，供養香花珍果，然燭續明，復能轉讀誦經救人疾病苦厄之者，安吉見世，無復疾病，將來往生文昌宮宿，即生蓮華中，軀體神仙，備足五通

無礙智慧，身受八萬八千歲，更還年少。五通具足智，勇猛健如上仙等，皆元陽仙公功德，如是不可稱計。族姓子，汝當用好紙、好筆、好墨，至心細書寫此遺文，流布國界。我所出法上下文句，如吾本師元陽仙公所囑妙法，無有錯誤，汝無令忘失一畫一點。族姓子，我憐愍衆生，故遺此經，皆令一切有形之類，悉得聞知，心開意解，常善念念不忘，皆行往生清淨林崖，壽命延長，神通無礙。爾時條林法淨真人，日在世師尊前，一心叉手，舉身肉袒，身毛肆豎，戰戰兢兢。一心諦聽上師所語，不敢忘失一句一文，流淚而言：師尊所囑妙法，至心受持，廣令流布。弟子等受天尊真教，頂禮先師，一心奉行。師曰：汝等若行若止，在山林中，他方國土，城邑聚落，人民都市，帝鄉縣官，因獄繫中，思念此經宣傳，教他讀誦書寫。吾當神化，令汝悉得神通，倍加於今。頂禮師尊，慘然長別。

元陽仙人林先生者，紫陽仙第二弟子也。其先出自平等離垢穢王宮，

是陵龍王之少子也。其所祖述，紫陽爲師；其所傳習，元陽上部；其所好玩，神仙第二；其所纂修，宴淨林野；其所屬名，綜繼天文。始年十三，止在大莊華林山中，與大弟子二千人皆是修具足行，諸根勇猛，無復煩惱。逮成仙品，除七十二結，心得自在，其名曰條林法淨先生。將二千人止在大莊華林山中，歷年精思，即成其第二仙品，皆心不退轉，利得辯才，神通無礙，能蹈波凌風，忽逕萬里，還來止在故處。爾時有天人二萬，諸天仙人俱，復有諸天玉女二萬四千人，心得自在。有大龍天王、羅龍天王、脩忘天王、吉龍天王、進仙天王，各將侍從神仙鹵簿來詣條林法淨先生所，問元陽上品宴坐之法。爾時先生四衆圍繞，供養恭敬，尊重讚歎，爲諸弟子等說無量功德上品。爾時先生坐乎樹下，入於無量精思，出演無量智見，欲爲諸王說元陽第二，即有種種天華而來蓋蔭其上。普遍大衆，如諸世界，五通備具，望上元陽神師下教，即日爲汝等說元陽上

品，汝等好聽，即當得元陽仙記。爾時先生處林放大光明神通，上至元陽仙亭，靡不周遍，下至黑暗地獄。爾時諸王上視，皆元陽仙府，悉見彼土一切天人，金城樓閣臺殿，仙人玉女，諸天淨宮，林雲紫閣。但見天人說元陽經典，并見彼方得道弟子等男女陰陽仙官，受神內契，種種得道人，種種懇行人，種種信解人，種種神通人。諸王見已，即問先生曰：此何國界，莊嚴如是？先生曰：此是元陽，彼土多諸妙寶宮室，亦有山林、河海、林野，彼人種種因緣，從心所好而求仙記。或見彼國金銀城池，黃金爲地，白銀界側，處處行厨，珊瑚爲道，真珠爲繩，摩尼爲床；碑礫爲池，碼碯緣邊，一切天人澡浴其中；彼國金剛諸珍，奴婢車乘，寶飾輦輦。有大施主，至心迴向元陽仙所，求著名記，願得度三界第一，諸仙所歎。復有善人，駟馬寶車，欄楯華蓋，軒飾宮殿，其中仙人身肉手足及妻子布施，求仙上品。復有仙人頭面軀體，欣樂施與，求仙智慧。有大弟子我見天人

及諸明王往詣仙所，問無上道，便捨樂土宮殿臣妾等，散髮宴坐，深思泰定，獲五神通而著青衣，一心玄解元陽上品或見弟子而作仙人，獨處閑靜，樂誦經典。有一弟子姓焦名林，勇猛精進，入於深山，思惟上品。有一弟子姓周名喬，晝夜離欲，常處空閑，深修泰定，得五神通。有一弟子姓木名林，安心定思，稽首以千萬仙品，讚諸仙法。有一弟子姓察名林，智深志固，能問諸法，聞悉受持，備得神通。次一弟子姓張名陵，照明道教，安國法王，廣化無量，功修治宣，種種教說。次一弟子姓李名過，定慧具足，以無量喻為衆講法，欣樂說古，化諸王子，天人恭敬，五通具足。次一弟子姓富名林，寂然宴然，天人恭敬，備五神通，處林放光，功濟天人，普令入仙品。次一弟子姓猛名功，處林修志，翼習仙靈，神通具足，元陽第七。次一弟子姓尹名經，未常睡眠，經行林中，勤求上品，智慧神通，力能移山。次一弟子姓張名角，威儀具戒，終身無缺，淨如寶珠，以求仙度，

深心備慧，以五神通第十七。次一弟子姓羽名林，住欲憎上，慢人惡罵捶打，皆悉能忍，以求五通，能訶有德者。次一弟子姓宮名雲，離諸戲歎，妻子布施，以求上品，備得智慧，神通無礙。次一弟子姓姜名嫫林，一心除亂，攝心念道萬歲！遊行國界，以求上真，元陽第九。次一弟子姓韓名終，餽膳飲食，百種湯藥，廣療疾病，救度生死，開悟衆生，元陽第十三。次一弟子姓賈名林，千萬幢儀，梅檀寶蓋，衆妙卧具，施給太上，以求仙品，如此人等，元陽第十四。次一弟子姓呂名子，老里先生，清淨園林，華果茂盛，流泉浴池，求施上仙，證為都伯，決定仙記，元陽第十八。次一弟子姓成名興，種種廣行，出度衆生，歡喜一心，無有厭倦，以求仙品，元陽第二十。次一弟子姓馬名征，是足行體，種種微妙，說寂滅法，種種教化，無數衆生，觀諸仙姓，無有二相，猶如虛空，乃能分別，如是人等，元陽經中第二十三。次一弟子姓東郭名星林，心如虛空，心無所著，以此妙慧，國

界遊行，求人補代，如是人等，元陽第二十四。次一弟子姓梁名石，宴坐林樹，深思元陽神經妙句，無量演說，嚴飾國界，寶臺高妙，五百由旬，縱廣正等，閑於此坐，為衆讚法，如是之人，元陽第三。次一弟子姓朱名仲，用行一，高寶臺廟，各千萬幢幡，珠衣露幔，寶鈴彌羅，高坐和鳴玉床，為衆說法，如是之人，元陽第四。次一弟子姓胡名林，千萬智慧，教諸龍王，人及非人，皆能獲仙，常以香華伎樂供養諸仙，如是之人，元陽第二十七。次一弟子姓寇名林，少習遊仙，涉登九嶽，殊越微塵，供養諸仙，如是之人，元陽第二十九。次一弟子姓趙名林，少修行學，廣度人民，安然清淨，樂誦仙品，如天樹王開敷一切，如是之人，元陽第三十。次一弟子姓嚴名平，處林閑坐，放一淨光，我及衆生，見此國界，種種神力，智慧希有，如是之人，元陽第三十一。次一弟子姓子名丹，多行世界，事君思仙，遠適山林，勤求太上，定慧具足，常在日中，我等見此，得未曾有，如是之

人，元陽第三十二。

洞玄靈寶上師說救護身命經

①「條林法淨真人言」之前疑脫「復告」二字。

②欲：原誤作「故」，據敦煌本改。

③「萬歲」二字疑爲衍字。

(王卡點校)







『十五』國家重點圖書出版規劃項目

主 編 張繼禹

本冊主編 王 卡

華夏出版社

# 中華道藏

第四冊

# 目錄

001 太上洞玄靈寶宿命因緣明經	一
002 太上洞玄靈寶導引三光妙經	五
003 洞玄靈寶二十四生圖經	一〇
004 太上洞玄靈寶飛行三界通微內思妙經	二五
005 太上洞玄靈寶芝草品	三一
006 元始天尊說變化空洞妙經	四八
007 太上洞玄靈寶五符序	五四
008 上清太極隱注玉經寶訣	八四
009 太上洞玄靈寶真文要解上經	九一
010 太上靈寶威儀洞玄真一自然經訣(敦煌本)	九七
011 太極真人敷靈寶齋戒威儀諸經要訣	一〇二
012 太上洞玄靈寶智慧本願大戒上品經	一一一
013 太極左仙公請問經	一一九
014 仙人請問本行因緣衆聖難經(敦煌本)	一二七
015 太上洞玄靈寶本行因緣經	一三一
016 太極真人問功德行業經(敦煌本)	一三四
017 太上洞玄靈寶衆篇序經(敦煌本)	一三六
018 洞玄靈寶諸天世界造化經	一四五
019 太上洞玄靈寶天關經	一五〇

020 太上洞玄靈寶誠業本行上品妙經	一五二
021 太上洞玄靈寶三元無量壽經	一六二
022 太上洞玄靈寶三元玉京玄都大獻經	一六七
023 洞玄靈寶九真人五復三歸行道觀門經	一七八
024 太上洞玄靈寶淨供妙經	一八一
025 洞玄靈寶太上六齋十直聖紀經	一八五
026 太上洞玄靈寶福日妙經	一八九
027 太極真人說二十四門戒經	一九〇
028 太上十二上品飛天法輪勸戒妙經	一九三
029 太上洞玄靈寶淨土生神經(敦煌本)	一九七
030 洞玄靈寶太上真人問疾經	二〇七
031 太上洞玄靈寶十號功德因緣妙經	二一八
032 太上洞玄靈寶三十二天尊應號經	二二一
033 太上靈寶洪福滅罪像名經	二二九
034 太上洞玄靈寶天尊名(敦煌本)	二四二
035 太上洞真賢門經	二五一
036 太上洞玄靈寶出家因緣經	二六二
037 太上洞玄靈寶轉神度命經	二六九
038 太上洞玄靈寶十師度人妙經	二七三
039 太上洞玄靈寶國王行道經	二七七
040 太上洞玄靈寶太玄普慈勸世經	二八二
041 靈寶天尊說祿庫受生經	二八六
042 太上洞玄靈寶護諸童子經	二八八

043	太上洞玄靈寶四方大願經	二九〇
044	太清五十八願文	二九二
045	太上洞玄靈寶三途五苦拔度生死妙經	二九五
046	太上洞玄靈寶往生救苦妙經	二九八
047	天尊說隨願往生罪福報對次說預修科文 妙經(敦煌本)	三〇四
048	太上洞玄靈寶天尊說濟苦經	三一〇
049	靈真戒拔除生死濟苦經(敦煌本)	三一二
050	太上洞玄靈寶救苦妙經	三一四
051	太上洞玄靈寶天尊說救苦妙經註解	三一六
052	太一救苦護身妙經	三二六
053	太上救苦天尊說消衍滅罪經	三二八
054	太上三生解冤妙經	三二九
055	太上洞玄靈寶五顯靈觀華光本行妙經	三三一
056	太上靈寶天尊說禳灾度厄經	三三五
057	太上靈寶天尊說延壽妙經	三三六
058	太上洞玄靈寶消穰火灾經	三三七
059	太上洞玄靈寶天尊說養蠶營種經	三三八
060	太上說利益蠶王妙經	三四一
061	太上靈寶補謝竈王經	三四二
062	太上洞真安竈經	三四四
063	太上說牛犢妙經	三四五
064	太上元始天尊說消殄蟲蝗經	三四六
065	太上安鎮九壘龍神妙經	三四七
066	洞玄靈寶五嶽古本真形圖(并序)	三四八
067	五嶽真形圖序論	三五八
068	玄覽人鳥山經圖	三六七
069	太上洞玄靈寶五嶽神符	三七〇
070	上清金母求仙上法	三七五
071	太上洞玄靈寶衆簡文	三八三
072	太上洞玄靈寶投簡符文要訣	三八八
073	太上洞玄靈寶五帝醮祭招真玉訣	三九八
074	洞玄靈寶真人修行延年益算法	四〇一
075	洞玄靈寶道士明鏡法	四〇五
076	靈寶施食法	四〇六
077	洞玄靈寶齋說光燭戒罰燈祝願儀	四〇八
078	太上洞玄靈寶法燭經	四一五
079	太上洞玄靈寶授度儀	四一九
080	太上洞玄靈寶二部傳授儀	四三八
081	太上洞玄靈寶大綱鈔	四四二
082	靈寶九幽長夜起尸度亡玄章	四四四
083	洞玄靈寶六甲玉女上官歌章	四四八
084	太上洞玄靈寶智慧禮讚	四五〇
085	三皇內文遺祕	四五三
086	太清金闕玉華仙書八極神章三皇內祕文	四五八
087	洞神八帝妙精經	四七九

088	洞神八帝元變經	四九〇
089	太上洞神行道授度儀	五〇四
090	太上洞神三皇儀	五一〇
091	太上洞神三皇傳授儀	五一五
092	陶公傳授儀(擬本)	五二一
093	太上三皇寶齋神仙上錄經	五二六
094	洞神三皇七十二君齋方懺儀	五二九
095	太上洞神太元河圖三元仰謝儀	五三二
096	太上大道玉清經	五四三
097	元始應變歷化經	六五二
098	太上靈寶元陽妙經	六五五
099	太上元陽經(敦煌本)	七三一
100	洞玄靈寶上師說救護身命經	七四七